

Holy Bible

Aionian Edition®

**Tuivang Holy Bible
Tuivang Matu Chin Bible**

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®
Tuivang Holy Bible
Tuivang Matu Chin Bible

Creative Commons Attribution ShareAlike 4.0, 2018-2021

Text source: eBible.org

Source copyright: Creative Commons Attribution Share-Alike license 4.0
Batupei Christian Fellowship, 2020

Formatted by Speedata Publisher version 4.3.5 on 3/27/2021

100% Free to Copy and Print

<http://AionianBible.org>

Published by Nainoia Inc
<http://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

Tuivang at AionianBible.org/Preface

The *Holy Bible Aionian Edition* ® is the world's first Bible *un-translation!* What is an *un-translation?* Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a lexicon. The Aionian Bible un-translates and instead transliterates ten additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal*! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to *eternal* life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the afterlife destinies of mankind and fallen angels.

This *un-translation* helps us to see these ten underlying words in context. The original translation is unaltered and a note is added to 63 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org and with the Android App. Why purple? King Jesus' Word is royal... and purple is the color of royalty!

Table of Contents

OLD TESTAMENT

Saam	11
Awicyih	48

NEW TESTAMENT

Matthai	63
Marka	83
Luke	95
Johan	116
Cei	132
Rom	152
1 Korin	161
2 Korin	170
Galatia	176
Efesa	179
Filipi	182
Kolosa	184
1 Thessalonika	186
2 Thessalonika	188
1 Timote	189
2 Timote	192
Titu	194
Filemon	196
Hebrai	197
Jakob	204
1 Piter	207
2 Piter	210
1 Johan	212
2 Johan	215
3 Johan	216
Juda	217
Awiphawng	218

APPENDIX


Reader's Guide

Glossary

Maps

Illustrations, Doré

OLD TESTAMENT



Adam and Eve Driven Out of the Garden of Eden

*"So he drove out the man; and he placed cherubim at the east of the garden of Eden,
and a flaming sword which turned every way, to guard the way to the tree of life."*

Genesis 3:24

Saam

1 Thlak che a cuihnaak awh amak cet man, thlak thawlhkhqi a ceh lam awh amak dyi man, huhsit qaihsaikhqi ang ngawihnaak awh amak ngawi man thlang taw a zoseen hy. **2** A awmhlynaak taw Bawipa a cawngpyinaak awi awh awm nawh, ce cawngpyinaak awi ce than dai poek poepa hy. **3** Anih taw tui keng awhkaw thing ling, qah tym awh ak qah, a hah amak reu man ing lo qu nawh, a ik-oeih sainaak a hoei awh laang poepa hy. **4** Thlak chekhqi taw cemyihna am awm kawm uh! A mingmih taw canghi zilh ing a zawn amyihna ni ami awm. **5** Cedawngawh thlak chekhqi taw awidengaak awh am dyi thai kawm u saw, thlak thawlhkhqi awm thlakdungkhqi ang cunnaak awh am dyi thai ti kawm uh. **6** Bawipa ing thlakdungkhqi a lam ce sim hy, cehlai thlak chekhqi a lam taw plawci kaw.

2 Ikawthi, pilnam ing za qu unawh thlang boeih ing a hqawng a hqap mai awh aming hqum qu hy voei? **2** Khawmdekk sangpahrangkhqi ing Bawipa ingkaw Situi a syp thlang ce qaal na thawh sih uhy. **3** A mingmih a thiqli ce boet pe unawh taw, amik khawceh bynhqi awm khawng pe valh u sih”, ti uhy. **4** Khan awh BOI na ak ngawi ce qaaai nawh; Bawipa ing cekkhqi ce qaih am qin nak khqi hy. **5** Cekcoengawh a mingmih ce ak kawsonaak ing toel khqi nawh, ak kawtawkaak ing ly a lap sak khqi hy. **6** Kamah qoe ing ka tlang ciim Zion awh ka sangpahrang ce ngawih sak hawh nyng”, tinawh kqawn hy. **7** Bawipa ak awipeek ce khypyi kawng. “Nang taw ka capa na awm hyk ti; tuhngawi awhkawng na capa na awm nyng” ni tina hy. **8** Thoeh law lah cawhtaw pilnam ce qo na ni pe kawng, khawmdekk a dytraak dy na koena awm kaw. **9** Thicung ing a mingmih ce nang ing uk khqi kawp ti, dek-am ami deep kqek kqek amyihna cekkhqi ce deep khqi kqek kqek kawp ti. **10** Cedawngawh nangmih sangpahrangkhqi, cyi unawh taw, Aw nangmih khawmdekk ukkungkhqi ngaithaak ing awm hlah uh. **11** Kqih doena Bawipa bi ce bi unawh awmhly doena thyn lah uh. **12** Cakpa ce mawk lah uh, cekaa awhtaw ak kaw so kawmsaw na lam awh plawci hau kawp ti.

3 Aw Bawipa, ka qaalkhqi doem soeih mah hy! Kai qaal na anik thawh sihkhqi doem soeih hy! **2** Khawsa ing am hul tang” tinawh thlang khawzah ing ni tina uhy. **3** Bawipa, nang taw kai anik hlipkung phuhqa na awm hyk ti, kah khawanh boemangnaak ce ni pe nawh ka luu ni zoek pe hyk ti. **4** Bawipa venawh khawteh na khy nyng saw, anih ing a hun ciim awhkawng nim hlat pehy. **5** Nung zaih nawh ip nyng; Bawipa ing a niimtu khak a dawngawh hang hyng law tlaih bai nyng. **6** Qaal thonghqa ing hu hai na nik en khoep bai seiawm ap kqih qoe kawng nyng. **7** Aw Bawipa tho lah! ka Khawsa nang ing ni hul lah! Ka qaalkhqi a kapkhe quh ce vyk pek khqi nawhtaw, thlak chekhqi a haa ce khoeng pek khqi lah. **8** Hulnaak taw Bawipa ven awhkawng law hy. Nak thlangkhqik khanawh na zosennaak awm seh nyng.

4 Aw ka dyngnaak Khawsa, ka nik khy awh ce oei lah. Ngaih kyi ing ka awm awh ngaihqepnak ni pe lah; nim geen nawh kak cykcah awi ning ngai pe leh. **2** Aw thlangkhqi, ka boemangnaak ve han dy awh nu chahqai na naming coeng hly sak hy voei? Han dy awh nu oek thawlhaak ce lungna unawh, amak thym khawsa ce nami sui khak kaw? **3** Bawipa ing amah ben awh ak ypwam thlangkhqi ce amah aham hoep hawh hy ti sim lah uh; kah khy awh Bawipa ing kak awi za kaw. **4** Namik kaw a sonaak awh koech thawlhuh; ihkhun awh naming zaih awh namik kaw poek hoheet unawh awm dyn uh. **5** Ak thym bulnaak ce nawn nawh Bawipa ce ypnah lah. **6** U ing nu them leek a nim huh lah

voei?” thlang khawzah ing ti uhy. Aw Bawipa na haai vangnaak ce kak khanawh be sak lah. **7** Caang ingkaw misur thaih ami zen awhkaw zeelnaak anglakawh, kak kawlung ve zeelnaak ak bau soeih ing be sak khqpet hyk ti. **8** Zaih nyng saw ngaihding cana p hly hawh nyng; Aw Bawipa ka loetnaak taw nang doek khoeih ni.

5 Aw Bawipa kak awi ce ning ngai pe nawh, kak khy awi ce poek lah. **2** Ka sangpahrang ingkaw ka Khawsa kak khy awi ce ngaih; na venawh nik cykcah law nyng. **3** Bawipa, mymcang awh kak awi ve ngai tiksaw; mymcang awh na haiawh qeenaka thoeh doena ngaih-unaak ing qeh nyng. **4** Nang taw thawlhaak awh ak zeel Khawsa na am awm hyk ti; na venawh thlak chekhqi am awm thai uhy. **5** Thlak oek qu soeih ing na haiawh am dyi thai ti kawmsaw; ik-oeih ak sai palkhqi ce nang ing sawh na hyk ti. **6** A qaaai ak kqawnkhqi ce nang ing hqe hyk ti; thlang a thi ak ngaihkhqi ingkaw a qaaai ak kqawnkhqi ce Bawipa ing tyih hy. **7** Cehlai kai taw na lungnaak ak camping na ip khuina law kawng; kqihchahaak ing na bawk im ciim benna koep kawng nyng. **8** Aw Bawipa ka qaalkhqi a awm dawngawh na dyngnaak benna ni hqui lah; ka haiawh na lampy ce dyng sak lah. **9** Cekkhqi am khak khui awhkaw awi taw lungoet awm cangnaak kawina am awm hy; kawthi, amik kawlungkhqi seetnaak ing be uhy. Amik awihqawngkhqi ce phyi ak awng qu hyt amyihna awm nawh, a mim lai ing ami qaaai kqawn uhy. **10** Aw Khawsa, cekkhqi ce thlak thawlhaak na kqawn khqi hlah! Aming cainaak ce a mimah ang tluknaak na awm lat seh nyng. Thawlhaak khawzah ami sai hawh a dawngawh hqek khqi bang hlah, cekkhqi ing nang ni oelh uhy. **11** Cehlai, nang awh thuknaak ak suikhqi taw zeel u seh. Zeel doena laa sa u seh, cekkhqi ce chung khqi koeplah. Cawhtaw nang ming ak lungnaak thlangkhqi ce nang awh zeel kawm uh. **12** Aw Bawipa thlakdungkhqi taw nang ing zosennaak pe kawm tiksaw; nam qeenakaak ing cekkhqi ce chung khqi koeplah kawp ti.

6 Aw Bawipa, kawso doena koeh ni zyi nawhtaw kaw tawkaak ing koeh ni toel. **2** Bawipa kak tha am awm saw nang ing nim qeen lah; Aw Bawipa ka quhkhqi tlo boeih hawh nawh, ni qoei sak lah. **3** Ka hqingnaak aih tha hoet hawh hy. Aw Bawipa iqyt dy hly nu ve? **4** Hlat law nawhtaw aw Bawipa kai ni hul lah; amak diti thai na lungnaak ing ni hul lah. **5** U ingawm a thi coeng awhtaw nang ce amni sim voel hy. U ing phyi khui awhkawng nang ce a nim kyihiyah kaw? (Sheol h7585) **6** Kang ko aih awh hoet hawh nyng, than zung kang kqang aih awh ka ih hun plym sak hawh nyng, ka iihkhum awm ka mikphli tui ing plym hawh hy. **7** Kawset aih awh ka mik awm ak tha hoet khing nawh, ka qaalkhqi dawngawh ka mik awm am dai voel hy. **8** Nangmih them che ak saikhqi, ka ven awhkawng cet hlah uh, kawthi Bawipa ing kang kqangnaak awi za hawh hy. **9** Qeenaka thoeh nawh kak khynaak awi ce Bawipa ing za hawh; kak cykcahnaak awi ce Bawipa ing do hy. **10** Ka qaalkhqi boeih ing a mingngaih kyi kawmsaw chah phyi kawm uh; chah phyih doena ami huna hlat tlaih kawm uh.

7 Aw Bawipa ka Khawsa, nang awh kai thuk nyng; kai anik hqutkhqi kut khui awhkawng ni hul lah; **2** U ingawm ama ni hul awhtaw samthynn amyihna cekkhqi ing ni phu vit vit kawm uh. **3** Aw Bawipa ka Khawsa, ve a them sai nawh ka kut ve a thawl vek awhtaw - **4** Kai ingqawi kang qoep pyi thlang venawh them che ka sai, am awhtaw a sawhqt na ka qaal a them ce ka muk peek awhtaw; **5** ka qaal ing ni hqut pha seitaw; ka hqingnaak ce dek awh leh nawh dekvai lak awh ni ih sak seh. **6** AW Bawipa, kawso doena tho nawhtaw; ka qaalkhqi ak kawsonaak ce tuk lah. Ka Khawsa hyng nawhtaw awih thym kqawn lah. **7** Thlangkhqeng ak cunkyng ing nang ce nik chung khoep lah seh. Hun sang nakawng cekkhqi ce uk lah; **8** Bawipa ing thlangkhqi ce awi deng lah seh.

Aw Bawipa sawsang soeih, ka dyngnaak ingkaw ka leeknaak amyihna, nang ing awi ni deng lah. 9 Aw ak dyng Khawsa, thlang ak kawlung kawpoek ak chingkung, tlak che khawboe seeptaak ce dyt sak nawhtaw tlakdyng ce loet sak lah. 10 Kai a phuhqa taw sawsang soeih Khawsa ni, anih ingtaw kawlung ak dyngkhqi ce hul hy. 11 Khawsa taw ak dyng awidengkung na awm nawh, myngawi kawsonaak ak dang sakkung Khawsa na awm hy. 12 Anih ing a mang hloet qu mai mantaw, zawzi ce ak hqaat na taak kawmsaw; a licung ce a hawi coengawh hlah kaw. 13 Thihnaak kawi lungpawk ce tlaih oepchoeh nawh; maina ak kqawng thai la ce met hyt hawh hy. 14 Seetnaak ing phyihsu nawh kyinaak ak hu ingtaw seetnaak ce thang sak hy. 15 Lawk-kqawng ak co ing amah a lawk-kqawng nawn awh tla hy. 16 Thawlhnaak ak sai ce amah a pum awh tla lat kawmsaw, boeseetnaak ak sai ce amah a luk khan awh tla kaw. 17 A dyngnaak awh ce Bawipa venawh zeelhaak awi kqawn nyng saw, sawsang soeih Bawipang ming kyihcahnaak laa ce sa kawng nyng.

8 Aw Bawipa, kaimih a Bawipa, khawmdek khan boeih awh na boemangnaak be soeih mah hy! Na boemangnaak ce khankhjik khanawh ta hyk ti. 2 Qaalkhqi ingkaw lu ak lokhqi sit sak aham ingkaw na qaalkhqi awh, naasenkhiq ingkaw naacakhqi a hui awhkawng kyihcahnaak ce caksak hyk ti. 3 Khan nakaw ak awm na kut sai pihla ingkaw aihchikhqi, amah a awmnaak hun boeih awh na taakkhqi ce kak poek awh, 4 Thlanghqing ve ikawpna a awm aih awh, na geetnaak khaak nawh, thlanghqing capa awm na kqijp loet hy voei? 5 Anih ce khan khaw na ak awm anglakawh ak nem bet na sai nawh boemang thangleeknaak ing sing hyk ti. 6 Na kut saikhqi boeih ukkung na ta nawh, a khawk kaiawh ik-oeeihkhqi boeih ce taak pe hyk ti. 7 Tui a nga ingkaw kqawng nakaw qamsa boeih, 8 khawngni nakaw chukphakhqi, tuih khui nakaw lum a nga boeih ingkaw tuicunli awhkawk ak cawlkhat boeih ce a khawk kaiawh taak pe hyk ti. 9 Aw Bawipa, kaimih a Bawipa, khawmdek pum awh nang ming gypawn soeih hy.

9 Aw Bawipa, kak kawlung boeih ing nang nim kyi vang; kawpoek kyi ik-oeeih na sai boeih ce khypyi vang nyng. 2 Namah awh ce kaw zeel nawh, awm kawng. Aw, sawsang soeih, nang ming kyihcahnaak laa sa vang. 3 Ka qaalkhqi taw na haiawh bah unawh; seet doena ami huna hlat tlaih uhy. 4 Kak cangnaak awhtaw nang ing ning dyih pyi nawh; na ngawihdoelh awh ngawi nawh, ak dyng cana awi deng hyk ti. 5 Pilnam thlangkhqi ce toel nawh, tlak chekhqi ce milh sak khqi hyk ti; cekkhqi ang ming ce kumqui dyna khawng pe hyk ti. 6 Amak dyt thai seetnaak ing qaalkhqi ce zawl nawh, cekkhqi a khawk bau ce hqe pe pheng hawh hyk ti; ami sim loetaak awm hqe pek khqi boeih hawh hyk ti. 7 Bawipa taw kumqui dyna boei na awm hy; awidengnaak aham a boei ngawihdoelh ce caksak hawh hy. 8 Khawmdek ve ak dyng cana awi deng kawmsaw; thlangkhqi ce ak thym cana uk kaw. 9 Bawipa taw thekha na ak awmkhqi ang dynamka na awm nawh, kyinaak a awm tym awh ce vawng cak na awm hy. 10 Nang ming ak simkhqi ing nang ce ni ypnna uhy. Bawipa, nang ingtaw nang anik suikhqi ce am qoeng hyt hyk ti. 11 Zion awh boei na ak ngawi Bawipa venawh kyihnaak laa sa unawh, a ik-oeeih sai ce pilnam thlangkhqi venawh khypyi lah uh. 12 Ikwatih, thlang thi a lawng sak ce sim loet nawh; khawdeng khuikha khqi ing kqangnaak awi ce ang zaak peek kaana am awm hy. 13 Aw Bawipa, ka qaalkhqi ing anih thekhaanak khqi ve toek lah! Nim qeen nawh thihnaak chawmkeng khui awhkawng ni hqui lah. 14 Cawhtaw na kyihcahnaak laa ce Zion canu ak chawmkeng awh khypyi thai kawng nyng saw, na hulnaak awh ce zeelnaak awm kaw. 15 Pilnam thlangkhqi ing amik cawh lawk-kqawng khuiawh tla boeih uhy; a mimah ing ami zan hyt lawk awh aawk boeih uhy. 16

Am dyngnaak awh ce Bawipa taw sim lah uh; cehlai tlak chekhqi taw a mimah a kut sai awh ce aawk nawn uhy. 17 Khawsa ak hilh pilnam thlangkhqi ingkaw tlak chekhqi ingtaw phyi na ce cet kawm uh. (Sheol h7585) 18 Ak voethluah thlangkhqi ce am hilh kawmsaw, khawdeng thlangkhqi ang ngaih-unaak awm am reng tikaw. 19 Aw Bawipa, tho lah, thlanghqing ing koeh ni noeng seh; na haiawh pilnam thlang awideng na awm u seh. 20 Aw Bawipa, cekkhqi ce kqihnaak ing ly a lap sak khqi lah; pilnam boeih ve thlanghqing mai ni ti sim sak lah.

10 Aw Bawipa, kawtih ak hla na nang dyih? Kyinaak a awm huiawh kawtih nang thuh qu valh? 2 Ak oek qu soeih tlak che ing tha amak awm thlangkhqi, amah ing teng nawh am tu thlangkhqi ce hqutu hy. 3 Ak kawlung hymnaak awh oek qu nawh; ak lawn na ak ngaih ce zoeksang nawh Bawipa taw hlah phlam hy. 4 Ak oek qu tlak che ingtaw amah ingkaw amah am sui qu nawh; Ak poeknaak boeih awh Khawsa ham hun qoe am awm hy. 5 A lamkhqi boeih awh a zo awm hy. Anaa a hqam aih awh nang a cawngpyinaak awi ing hla qu hy nih; a qaalkhqi boeih ce huhsitnaak ing qaih na hy. 6 Amah ingtaw, ikaw ingawm am ning tah sak tikaw; zeel loet nyng saw kyinaak am hu tang tikawng" tinawh poek hy. 7 Anih am kha taw seet lawhnaak, qaaainaak ingkaw kqij am hqinnaak ing be hy, am lai awh awm kyinaak ingkaw seetnaak doek khoeih ni. 8 Khawkeng imceng khqi awh ngawi nawh, ak awm poek poek khqi ce mam nawh him hy. 9 Sendeih ing ak kawk khui awhkawng a qeh dym amyihna, a hlip naak awh qeh hy, hulkung amak awm thlang ce tu aham qeh nawh; bawmkung amak awmkhqi ce lawk ing sing hy. 10 A thekhanaak thlangkhqi ce kqij am hqin hy; cekkhqi ce ak thaawmnaak khuiawh tlaak sak khqi hy. 11 Amah ingtaw Khawsa ing hilh hawh hy; a hai sing kheop nawh am hu thai voel hy" tina poek hy. 12 Aw Bawipa, tho lhal! Aw Khawsa na kut thlek hlah, hulkung amak ta thlangkhqi ce koeh hilh. 13 Thlak che ing kawtih Bawipa a thekha naak? Ikwatih amah ingkaw amah, "Ikaw am ni tina tang", tina ak poek hy voei? 14 Cehlai aw Khawsa, kyinaak ingkaw ko kqangnaak ve toek nawhtaw; na kut khuiawh lawh aham poek lah. Kyinaak ak hukhqi ing nang a venawh pe qu unawh, pa amak takhqi ak hulkung na awm hyk ti. 15 Thlak chekhqi ingkaw tlak thawlha baan ce hqem pe nawh; huh thai na ama awm hlan dy awh a thawlhaak ce tlet pe lah. 16 Bawipa taw kumqui awhkawng kumqui dy sangpahrang na awm hy; pilnam thlangkhqi taw a kut awhkawng kqeng bang kawm uh. 17 Aw Bawipa, khuiilha ak hukhqi a ngaihnaak ce zaak penawh; tha na peek coengawh, cekkhqi ang kqangnaak awi ce ngai pe hyk ti. 18 Pa amak takhqi ingkaw a thenaak khqi ce dyih pyi nawh, khawmdek thlangkhqi ing cekkhqi ce am huhsit hqa voel hy.

11 Bawipa awh thuk loet nyng. Kaw amyihna nang ing na ti; Pha amyihna na tlang awh ding hlah. 2 Toek mai lah, tlak che ing licung hawi nawh; than a hypnaak awhkawng tlakdyng ce a lingbyi awh kah aham a licung qui awh laa met hyt hy. 3 A lungsym ce ni hqe peek hoek awhtaw, tlakdyng ing ikaw asai thai hly tang," na ti? 4 Bawipa taw bawkim ciim khuiha awm nawh; Bawipa taw ak khan ngawihdoelh awh awm hy. Thlanghqing capakhqi ce khoom hawh; amik ing cekkhqi ce nym anai poepa hy. 5 Bawipa ing tlakdyng nym anai nawh; tlak chekhqi ingkaw kawpoek sekhhqi taw ang myihla ing sawn na hy. 6 Thlak chekhqi ak khanawh mai-eh ingkaw katmai tlan sak kaw; ak hlawk soeih khawhli ce a mingmih a pang kawi na awm kaw. 7 Bawipa taw a dyng a dawngawh, ak thym ik-oeeih ce lungna hy; kawlung ak dyngkhqi ingtaw a haai ce hu kawm uh.

12 Bawipa ni bawm lah, Khawsa ak kqjh thlang am awm voel hy. 2 Thlang boeing a imceng venawh qaih awi kqawn unawh; awih haal kqawnnaak hui ing ami qaai kqawn boeih hawh uhy. 3 Bawipa ing awih haal kqawn nawk huikhqi ce geet peh khqi seitaw, oek qunaak lai awm geet pe seh. 4 Lai ing ni noeng khqi ngai bit kaw; hui ni ta u saw kaw ningnih a boei na u nu ak awm bai?" ak tikhqi ce. 5 Tha amak awm khawdeng thlangkhqi ingkaw, kaw amak ta thlanghinqing konaak awi awh, tuh taw tho hawh kawng nyng. Cekkhqi ak kqawn seetkungkhqi ven awhkawng chung a hlip khqi kawng, "tinawh Bawipa ing tihy. 6 BawipaK awikhqi taw coet am kap qoe nawh, deknawng maih hlawk awh voei khqih di ngun a tui tle ing myih hy. 7 Aw Bawipa, nang ing ni loet sak kawm tiksaw, cemyih, thlangkhqi anglakawhkawng ni hlip nik chung kawp ti. 8 Thlangkhqi anglakawh chahnak hly kawi ik-oehi zoeksangnaak a awm awh, thlak chekhqi taw ami ngaih ngaih na chah phiyh doena cet uh.

13 Aw Bawipa, handy hly nu? Kai na nim hilh hly loet hawh nawh nu? Handy nu na haai na thuh kaw. 2 Handy awh kawpoek inggawi kqak qu nih nawh myngawi kawseet ing ka awm loet kaw? Handy nu ka qaalkhqi ing kai ami noeng kaw? 3 Aw Bawipa ka Khawsa, ni toek nawhtaw nim hlat lah. Kamik ve dai law sak lah, cek kaa mantaw thihihaak ing ip loet hawh kawng nyng; 4 Cawhtaw ka qaalkhqi ing, "Noeng hawh nyng," ni tina kawm usaw, keng tluk awh ce ka qaalkhqi zeel hawh kawm uh. 5 Cehlai, amak dyt thai na lungnaak ce cangna nyng; na hulnaak awh kak kawlung zeel hy. 6 Kak khan awh leek saw, Bawipa venawh laa sa vang nyng.

14 Thlak qaw ingtaw ak kawk khuiawh, "Khawsa am awm hy," ti. Kwna amak awm, amak thym ik-oehi ce sai hy; ik-oehi leek ak sai thlang pynoet ca awm am awm qoe hy. 2 Ak zasim thai awm nawh, Khawsa ak sui thlang ak awm khoem hy voei nu, tinawh khan nakawng Khawsa ing thlanghinqing capakhqi ce nuk toek law hy. 3 Ak chang na pleng boeih unawh, plawci kang hawh uhy; ik-oehi leek ak sai thlang pynoet awm am awm nawh, pynoet ca awm am awm hy. 4 Ik-oehi che ak saikhqi - thlang ing phaihpia ai amyihna kak thlang ak dailkhqi, Bawipa amak khy man thlangkhqi ing a sim kaana awm hly u nawh nu? 5 Thlakdyngkhqi ing cunnaak awh Bawipa taw a awm dawngawh, a mingmih ing kqjhnaak ing be uhy. 6 Nangmih thlak chekhqi khawdengkhqi ing cainaak kang pe u tik seiawm, Bawipa taw a mingmih ang thuknaak na awm hy. 7 Aw Israelkhqi thaawngnaak ce Zion awhkawng law lah voe! Bawipa ing ak thlangkhqi zoseennaak a peek tlaih awh, Jakob ing zeel seitaw Israel ing ak kaw zeel poe seh!

15 Bawipa, na awmnaak hun ciim awh u nu ak awm kaw? Na tlang ciim awh u nu ak awm lah kaw. 2 Coet kap kaana cet nawh ik-oehi dyng ak sai thlangkhqi, kawlung khui awhkawng ak thym awi ak kqawnkhqi. 3 Am lai ing thlang amak theet man, a imceng venawh thawhnaak ik-oehi am sai man nawh, a pilnam ang ming seetnaak amak sai man thlang, 4 thlak che husit nawh Bawipa ak kqjh thlangkhqi ak zoeksangkhqi, amah aham tlo seiawm awitaak ak cak thlang, 5 A ca khawzah aih na tangka amak pu thlang ingkaw ak awm poek poek, thlang a venna ve mih ik-oehi ak sai thlangkhqi taw ity kawp am tat tikaw.

16 Aw Khawsa, ni loet sak lah, namah a venawh ni kang thuk law. 2 Bawipa venawh, Nang taw ka Bawipa na awm hyk ti; nang kaa taw leeknaak techa awm am ta nyng," ka ti. 3 Qam khuiawh ak awm thlang ciimkhqi ce, Boemangnaak ing ak be kai a zeelnaak kungkhqi na awm uhy. 4 Ak chang khawsakhqi venna ak

cenkhqi ak kawseetnaak taw pung khqoet kaw. A mingmih a thi ce khawsakhqi hamna am hawk pe kawng nyng saw, a mingmih ang ming awm ka hui awh ap kqawn qoe kawng nyng. 5 Bawipa, ka huh hly kawi ingkaw ka boet ce ni taak pe hyt hawh tiksaw; ka huh hly kawi ce ni taak pe khak hawh hyk ti. 6 Khawqi ing a leeknaak soeih awh kai aham khan qu nawh; ka qo pang hly kawi awh ce zeel soeih nyng. 7 Khaw anik poek peekkung Bawipa ce kyihcah vang; khawmthan awh awm kak kawlung ing ni cawngpyi hy. 8 Bawipa ce ka haiawh awm sak poepa nyng. Anih ce kak tang ben awh a awm dawngawh, am thyn qoe ti kawng. 9 Cedawngawh kak kawlung zeel nawh kam lai ak kaw zeel hy; ka pum awm a sa loet kaw. 10 Ikwitih, nang ing phyi awh am ni cehta hyt kawm tiksaw, nak Thlang Ciim ce am thu sak kawp ti. (Sheol h7585) 11 Hqingnaak lam ce nani sim sak hawh a dawngawh; na haiawh zeelnaak, nak tang ben awhkaw kumqui zeelnaak ing ni be sak kawp ti.

17 Aw Bawipa, dyngnaak ing ka thoeh law ve za nawhtaw, kak khynaak awi ve ngai law lah. Kak cykcahnaak benna nang haa keeng lah-qaa kqawnnaak hui awhkawng ak law awi amni. 2 Nang a ven awhkawng kai khanawh awi tlyhnaak law seitaw ak thym ik-oehi ce namik ing lu lah seh. 3 Kak kawlung ve nik ching nawh than awh ni hqip lah, ni nai ni nawng hlai hyk ti, kaw awm am hu kawp ti; kam kha ing am thlowlawh tikaw ti hawh nyng. 4 Thlanghinqing a ik-oehi sai amyihna - na hui awhkaw awi ing thlak chekhqi cehnaak lam awh am ka paanaak aham khoem qu hawh nyng. 5 Ka khawkham ing na lam hqut nawh; ka khaw ing am bah man hy. 6 Aw Khawsa nang ce nik khy nyng, nang ing nim hlat kawm tiksaw; nang haa keng law nawh kak cykcahnaak awi ve za lah. 7 Qaal anglakawhkawng nang awh thuknaak sui nawh tang kut ing ak hulkung, na lungnaak ak bau soeih ce dang sak lah. 8 Na mik thlang amyihna ni gym nawh, nang hla khuiawh ning thuk sak lah. 9 Kai cem a qaal na anik thawh sihkhqi ingkaw kai anik chung khoep ka pumsa qaal anglakawhkawng. 10 Am thin ak sah thlang na awm unawh, am kha ing cawngcah qunaak awi kqawn uhy. 11 Ka hu thuih law unawh nik chung khoep hawh uhy, Deklai khawngnaak aham ni mik lyl na hawh uhy. 12 Mehsa buh na cawi khit nawh, ak plup nakawng qamsa cuuk sih aham ak cai samthynn amyihna awm uhy. 13 Aw Bawipa, tho lah, a mingmih ce mam khqi nawh, tluk sak khqi lah; nak zawzi ing thlak che kut khui awhkawng ni hul lah. 14 Aw Bawipa, na kut ing ce mih thlangkhqi, ve khawmdek hqing khui doeng awhkaw laksawng ak takhqi a kut khui awhkawng ni hlam lah. Thlangkhqi amik phoen ce kawn ing be sak khqi nawh, a canaakhqi awm kqeng nawh ami cakhqi aham khawththem ce cun pek khqi uhy. 15 Kai ingtaw dyngnaak ing na myi ce hu kawng; ka hang hqyng law awh, na myi ak lo na ka awm ce hu nyng saw kang ngaih tlyp tikaw.

18 Kak thaawmnaa na ak awm, Aw Bawipa, nang ce ni lungna nyng. 2 Bawipa taw ka lungnu, ka vawngcak ingkaw ka hulkung na awm hy: Khawsa taw kang thuknaak lungnu na awm hy. Amah taw ka phuhqa ingkaw ka hulhaak kii, vawngcak boeih na awm hy. 3 Kyihcah tng Bawipa ce khy nyng saw, anih ing ka qaalkhqi anglakawhkawng ni hul hy. 4 Thihnaak quikhqi ing ni pin nawh seetnaak tuipuh ing ni zawl khup hy. 5 Ceikhui quikhqi ing ni pin qap nawh; thihnaak dawng ing ni mani khoep hy. (Sheol h7585) 6 Kang ngaih a kyi awh Bawipa ce khy nyng; bawmnaak thoeh doena Khawsa venawh khy nyng. Anih ingtaw a bawkim awhkawng kak awi ning zaak pe nawh; kak khy awi ing a haiawh pha saw, ang haa khuiawh kun hy. 7 Khawmdek ing tyn nawh thyn hy, ak kawsonaak awh thlangkhqi awm am cei dyna tyn boeih hy. 8 Am haqawng khui awhkawng maihku cawn nawh; mai kqawng ce am khak khui awhkawng cawn hy; cawhkawng mai ce alh hy. 9 Myi ak than tit tit ce a khawk kai awh ta nawh; khan khawnghi

ce hawi nawh kqum law hy. 10 Chequbim ak khanawh ngawi nawh ang ding doen; zilh ang hla awhkawng hak pawm qu hy. 11 A sing qunaak na than sai nawh, a ceng a cawi awh ak chung qunaak aham khan rawhnu pui tlan sak hy. 12 Ak vang soeih haai awhkawng myi ak sah soeih ingkaw khawphla ce thai sak hy. 13 Khan nakawng Bawipa hum khawmrang nawh; sawsang soeih awh ak awi hum dur dur hy. 14 La ing kap nawh a qaalkhqi ce a thek a zak na kqeng sak khqi khawngkhak nawh, khaw khawteh na phla sak tiksaw hqut khqi khawngkhak hy. 15 Aw Bawipa tuicunli ang lawngnaak ce sai pe nawh, khawmdiek ang dyihnaak hun ce nam haqawng awhkaw nang hqi ing zyi nawh kaa na tiksaw, pho sak hyk ti. 16 Anih ing khan ben nakawng a baan thla nawh; a nimtu coengawng tulii dung awhkawng nik dawk hy. 17 Tha ak awm soeih qaal, am ka noeng thai khing ka thunkha khqi kut khui awhkawng ni hul hy. 18 Ka seeatnaak khawnghyp awh ni mam kheop u seiawm, Bawipa taw tha anik pekung na awm hy. 19 Anih ing a hoel a poeng na awmnaak hun na ni ceh pyi hy; kak khanawh ak kaw a law a dawngawh ni hul hy. 20 Bawipa ing ka dyngnaak lawt amyihna khaw nik poek pehy; ka kut qawi a ciim lawt amyihna laksawng ce ni pehy. 21 Bawipa a lampyi ce ka hqut a dawngawh Khawsa cehta nawh thawlhaak ce am sai nyng. 22 Amah a cawngpyinaak awikhqi boeih ce ka haiawh awm nawh; ak awi tlypnaak ce am pleng taak man nyng. 23 A haiawh coet kap kaana awm nawh, thawlhaak ce hqe nyng. 24 Ka dyngnaak ingkaw amik huh awh ka kut qawi a ciim amyihna Bawipa ing laksawng ni pehy. 25 Ueppawm thlang venawh yipawm na dang pe tiksaw, coet amak kap thlang venawh coet a kap kaana dang pe hyk ti. 26 Ak zawzih thlang venawh ak zawzih na dang pe nawh, kawpoek ak kawi thlang venawh taw cyihnaak ce dang sak hyk ti. 27 Dungyoeng na ak awmkhqi ce hul nawh ak thym na mik ak daikhqi ce ak nem na thla hyk ti. 28 Aw Bawipa, nang ing ka mai-im ve vang law sak loet nawh; ka Khawsa ing thannaak ce vangnaak na coeng law sak hyk ti. 29 Nang ak pyinaak ak camping ni ka qaal hqut nawh, ka Khawsa ing ni vawng ka lyn thai. 30 Khawsa lampyi taw soep nawh Bawipa awi taw caih soeih hy. Amah awh ak thukkhqi boeih aham anih taw phuhqa na awm pehy. 31 Bawipa coengawh u Khawsa nu ak awm bai? Ningmih a Khawsa am kaa taw u mih lungnu nu ak awm bai? 32 Khawsa ing a bantha awm sak nawh ka lampyi soep sak hy. 33 Ka khaw ce saksuk khaw amyihna ni sai pe nawh hun sang na ning diyh sak hy. 34 Ka kutqawi ve qaal kahnaak ham ni cawng sak nawh, ka baan qawi ing qawhum la ce oi thai hy. 35 Noengnaak phuhqa ce nang ing ni pe nawh, nak tang kut ing nim tu hyk ti; dungyoeng na na awmnaak ing kai ni sang sak hyk ti. 36 Ka khawk kai awhkaw lampyi ce kau law sak tiksaw, ka khaw am pleng thai voel hy. 37 Ka qaalkhqi ce hqut nawh khai khqi nyng, ama ming qeng hlan dy taw am hlat kawng. 38 A mami thawh hqa kaana chawm khqi nyng, ka khawk kai na tlboeih uhy. 39 Qaal tuk aham thamahaak ing ni thoiehciam nawh, ka qaalkhqi ce ka khawk kai na koep sak hyk ti. 40 Nang ing ka qaalkhqi hu benna cen sak khqi hyk ti, cawh kai ing him khqi pheng nyng. 41 Khy laawt hlai uhy, cehlai a mingmih ak hul hly kawi pynoet awm am awm hy - Bawipa ing cekkhqi ak khynaak awi ce am hlat pehy. 42 Zilh ing a zawn dekvai amyihna vyk khqi nyng saw, lam awhkaw nawngtui amyihna hawk khqi nyng. 43 Kai anik tulkungkhqi kut khui awhkawng ni hul nawh; pilham a lu na ni sai hawh hyk ti. 44 Kai a thang aming zaak awh, kak awi ngai unawh; qapchang thlangkhqi ing ka haiawh pe qu law uhy. 45 Amik kaw boet nawh; a mimah a vawng kuh khui nakawng thyn doenaw law uhy. 46 Bawipa taw hqing hy; ka lungnu venawh kyihcahaak awm seh nyng! Ka hulkung Khawsa taw zoeksang na awm seh! 47 Anih taw kai aham kut anik thung peekkung Khawsa

na awm nawh, pilnam thlang anik noeng sakkung na awm hy. 48 Ka qaalkhqi ven awhkawng anik hulkung na awm hy. Nang ing ka qaalkhqi khanawh ni zoeksang nawh, khawboek chekhqi kut khui awhkawng ni hul hyk ti. 49 Cedawngawh aw Bawipa, nang ce pilnam thlangkhqing lak awh nim kyihcah vang; nang ming kyihcahaak laa sa vang. 50 Anih ing a sangpahqang venawh noengaak ak bau soeih pe nawh; a caksak thlang venawh amak dyt thai qeennaak ce dang sak hy. David ingkaw a cadil naakhqi venawh kumqui dyna am qeennaak dang sak hy.

19 Khan khawkhqi ing Khawsa boemangnaak khypyi unawh, khawnghi khqi ing a kut sai bibi ce khypyi uhy. 2 Hypoet coeng hypoet cekkhqi ing awi kqawn unawh, than oet coeng than oet cyihnaak ce dang sak uhy. 3 Han a hun awh awm am ning zaak hly kawi awih kqawn ingkaw awi am awm hy. 4 Cekkhqi ak awi ing khawmdiek pum pha nawh, khawmdiek a dytnaak dyna thang khawngkhak hy. 5 Cadawng zu ak lo iptung khui awhkawng ak thoeng law ingkaw, ang tah ak ly thlang dawng loehlangnaak awh awmhly doena ak dawng ing myih qu hy. 6 Khan a dytnaak awhkawng thoeng law nawh a dytnaak bai dyna vil hy; a hawknaak awh ikaw awm thuh thai na am awm hy. 7 Bawipa a cawngpyinaak awi taw soep nawh, myihla caih sak pan hy. Bawipa ak awipeek taw ypnaak awm nawh, thlang mailaikhqi awm cyi sak hy. 8 Bawipa am cukkiknaak awi taw dyng nawh, kawlung zeel sak hy. Bawipa ak awipeekkhqi taw caih nawh mik dai sak hy. 9 Bawipa kqjinhaak taw caih nawh, kumqui dyna cak hy. Bawipa ak awitlyhaak taw thym nawh dyng boeih hy. 10 Sui anglakawh a phu tlo nawh, sui a tuicil anglakawh a phu tlo khqoet hy; khawtitu anglakawh awi nawh, khawi a lutui anglakawh awm awi khqoet hy. 11 Cekkhqi ingkaw tyihzawikhqi ce ngaihtaakaak pe nawh; ak ngai ak thlangkhqi taw laksawng ak bau soeih pe hyk ti. 12 A ing amah a thawlhaak ce a sim? Ang hyp ka sai thawlhaaka awh queenkaw ngai law lah. 13 Thawlh am ka sainaak ngah ngah aham na tyihzawih ve ni khoem lah; cekkhqi ing koeh ni uk u seh. Cawhtaw coet a kap kaana awm kawng nyng saw, thawlhaaka khawteh anglakawh awm poek poek hawh kawng nyng. 14 Aw Bawipa ka lungnu ingkaw ka hulkung, kam kha awhkaw awi ingkaw kak kawlung khui awhkaw poeknaak ve namik huh awh ni kawina awm seh nyng.

20 Ngaihyki kabwing na na awm huiawh Bawipa ing nim hlat seitaw; Jacob a Khawsa ang ming ing ni hilp nik chung seh nyng. 2 Ahun caih awhkawng na ham bawmnaak tyl law seitaw Zion awhkawng dylnaak ce ni pe seh nyng. 3 Lucik na sainaak boeih ce sim loet seitaw na hyihphumnaak ce zeel doena do seh nyng. 4 Nak kawlung ngaihnaak ce ni pe seitaw nang cainaakkhqi boeih ce coeng sak seh nyng. 5 Noengnaak na huh awh zeel doena khy kawng unyng saw ni Khawsa ang ming ing hizan ce hak zoek kawng unyng. Bawipa ing na thoehnaak boeih ce ni pe seh nyng. 6 Bawipa ing ak thlang tyh ce hul hy ti sim hawh nyng; ak tang ben awhkaw hulhaak tha ing ak han caih nakawng anih ce hlat hy. 7 Thlang pynoet ing meqangkhqi ypna uhy, cehlai ningnih ingtong Bawipa ni khawsa ang ming ce ni ypna uhy. 8 Cekkhqi ing amim khuk tawk et nawh tlou hlai uhy, ningnih taw ni hang tho the unawh ak cak na ning dyi uhy. 9 Aw Bawipa, sangpahqang ve hul lah! Kaimih ing kamik khy awh nim hlat khqi lah!

21 Aw Bawipa, sangpahrang ing nang ak tha awmnaak awh zeel hy. Noengnaak na peek dawngawh anih ing a zeelnaak ikawmyih aih na a bau! 2 Ak kawlung ing a ngaih ce pe tiksaw, a hui ing a thoeh ik-oeih ce am hlawh na hyk ti. 3 Anih ce zosennaak ak bau soeih ing do nawh a lu awh sui tuici lumyk ce myk sak hyk

ti. 4 Anih ing hqingnaak a thoeh law awh ce, nang ing pe hyk ti - khawkdai sangkhqi kumqui coeng kumqui dyna pe hyk ti. 5 Noengaak na peek ak caming, a boemangnaak ce bau khqoet hy; thangleeknaak ingkaw qyp awmnaak ce ak khanawh taak pe hyk ti. 6 Kumqui zoseennaak ce na peek hawh a dawngawh na haai zeelnaak ing be sak hyk ti. 7 Cedawngawh sangpahrang ing Bawipa ypna nawk, sawsang soeih awh amak dyt thai qoe lungnaak caming anih taw am tat qoe kaw. 8 Na qaalkhqi boeih ce na kut ing tu kawmsaw; na thunkhkhqi ce nak tangkut ing tu kawp ti. 9 Nang, nang dang law awhtaw a mingmih ce mai awhkaw ak alh tap amyihna sai kawp ti. Bawipa ing ak kaw a so dawngawh cekkhqi ce daili kanglak kawmsaw, a mai kqawng ing cekkhqi ce uih sak kaw. 10 Khawmdek awhkawng cekkhqi a cadikhqi ce nang ing hqe boeih kawp ti. 11 Nang ce ak che na khaw ni khan sih unawh, kawpoek che ing nik kqawn hlai uhy, ikaw na am awm hy. 12 Nang ing cekkhqi ce licung hawi nawk nam hyt khqi awh ce ami hu benna cen kawm uh. 13 Aw Bawipa, nak thaawmnaak awh hak zoeksang qu lah; nak thaawmnaak laa sa unyng saw nim kyihsah lah vang unyng.

22 Ka Khawsa, ka Khawsa, kawtih nani ceh taak vi? Ikawtih a hul kaana ak hla na awm hoe nawk, kak khy awi awhkawng ak hla na na awm hy voei? 2 Aw Bawipa, dai awh khy nyng, cehlai am nim hlat tiksaw than awh awm am sit thai nyng. 3 Cehlai nang taw thlak ciim na boei ngawihdoelh awh ngawi nawk; Isarelkhqi a zoeksang na awm hyk ti. 4 Ami pakhqi ing nang ce ni ypnna unawh; a mingmih ing ami ypnna a dawngawh nang ing cekkhqi ce hul hyk ti. 5 Na venawh amik khy awh ce hul na awm uhy, nang ce ami ni ypnna dawngawh amik kaw am boet hy. 6 Kai taw thlanghqing na am awm voel nyng, ceilaak nani ka awm hawh, thlang ak kqawnseet ingkaw thekhanak na awm nyng. 7 Kai amik hukhqi boeih ing ni qaih na uhy; a hui ni mele sih unawh, ami luu ni hyl sih uhy. 8 Bawipa ypnna saw; Bawipa ing hul thaw vоеi. Anih ing hul thaw vоеi, anih ak khanawh ak kaw a law soeih koenoek," ti uhy. 9 Cehlai nang ing zenbu ak khui awhkawng nik plawk nawk; ka nu suk ka awk hui awh awm namah ce ni ypnna sak hawh hyk ti. 10 Ka thang cyk ca awhkawng namah awh peek na awm hawh nyng saw, ka nu puk khuiawh ka awm awhkawng nang taw ka Khawsa na awm hyk ti. 11 Ak hla na koeh ni awm taak hoe, kynik ing ni zoe law nawk anik hulkung u awm am awm hy. 12 Vaitaw am caikhqi ing nik chung unawh, Bashan a vaitaw am cai ak tha ak awm awmkhqi ing nik chung khoep uhy. 13 A kawk doena a ai kawi qamsa ak phu pat pat samthynn ing am kha ang khara nawk ning hawi sih hy. 14 Tui amyihna hawk na awm nyng saw, ka quh cawngkhqi pet hoh hoh boeih hy. Kam thin ve khawi-ut amyihna paan nawk kak khuiawh a tui na te boeih hy. 15 Kak thaawmnaak awm am keek amyihna qum boeih nawk, kam lai awm kak dangkhyl na bet qap hawh hy; nang ing thihsnaak dekvai awh ni tloeng hawh hyk ti. 16 Uikhqi ing nik chung khoep unawh; thlakche tloek ing nik chung khoep uhy, ka kut qawi ingkaw ka khaw qave wi ni hen pe uhy. 17 Ka quhkhqi ve a cuna noet thai nyng, thlanghqing ing kawqep doena nim dai sih uhy. 18 Kai si bai ce qek qu unawh ka angki ce taicung zyk sih uhy. 19 Cehlai Bawipa ak hla na koeh ni awm taak; Aw kak thaawmnaak, kai hul aham ang tawnna law lah. 20 Zawzi awhkawng ka hqingnaak ve hul nawk, uikhqi ak thaawmnaak awhkawng a phu ak tlo ka hqingnaak ve hul lah. 21 Sendeikhqi am khak khui awhkawng ni hul nawk; cungkhqi ak kii awhkawng ni hul lah. 22 Ka koeinakhqi venawh nang ming ce khypyi nyng saw; thlangqeng anglakawh nang ce nim kyihsah vang. 23 Nangmih Bawipa ak kqjikhqi, kyihsah lah uh! Nangmih Jacob a cadil boeih, amah ce zoeksang lah uh! Nangmih Isarel cadikhqi boeih, amah ce kqjichah lah uh! 24 Khuikha nawk kyinaak ak hu thlang ce husit nawk am tyih hy; a

haai awm am thuh pe nawk hul aham ak khynaak awi ce ngai pehy. 25 Thlangqeng anglak cunnaak awh namah ka nim kyihsnaak awi ve namah a ven awhkawng ni a law; kak awikamnaak ve nang anik kqjikhqi haiawh soep sak vang. 26 Khawdengkhqi ing ai kawi hu unawh amik phoen phyi kaw; Bawipa ak suikhqi ing amah ce kyihsah seitaw- nak kawlung ce kumqui dyna hqing seh. 27 Khawmdek a dytnaak boeih ing sim kawm usaw Bawipa venna hlat kawm uh, qam pum awhkawng cakaw paqeng boeih ing na haiawh koep kawm uh- 28 Uknaka taw Bawipa koena a awm dawngawh pilnam thlang boeih ce amah ing uk hy. 29 Khawmdek awhkawng boeikhqi boeih ing poei sai unawh bawk kawm uh; dekvai khuiha ak cekkhqi boeih- amah poek awh a mak hqing thaikhqi ing a haiawh khawkhlu sym kawm uh. 30 Cadikhqi ing bibi pe kawm usaw; hai ben awhkawng ak law hly cadikhqi venawh Bawipa kawng ce kqawn pe kawm uh. 31 Cekkhqi ing ak thang hlan thlangkhqi venawh anih a dyngnaak ce kqawn pe kawm uh. Anih ing ce ce asai hawh a dawngawh.

23 Bawipa taw ka tuudoenkung na a awm dawngawh, am syt voel kawng nyng. 2 Qam a sainaak hun awh ni ih sak nawk, tui ang bymnaak hun na ni hqui hy. 3 Ka hqingnaak ve ni tlaih pe nawk ang ming ak caming dyngnaak lam benna ce ni sawi hy. 4 Thihsnaak lawk-kqawng hqaw nyng seiawm, ap kqij tikawng; kawtih na thingboeng ingkaw na sawnghqaww ing kang ngaih ni qep sak hy. 5 Ka qaalkhqi haiawh kai aham caboei ni tloeng pe hyk ti, ka lu ve situi ing ni syp pe nawk; kak boet awh be ngen hy. 6 Leeknaak ingkaw lungnaak ing ka hqing khui pyt awh ni hqut kawmsaw, Bawipa im awm kumqui dyna awm hawh kawng nyng.

24 Khawmdek ve Bawipa koena awm nawk, ak khui awhkawng oek-oeikhqi boeih, khawmdek ingkaw ak khui awh ak awm boeih awm a koe na awm hy. 2 Anih ing tuicunli ak khan awh diyh sak nawk tuikhqi ak khan awh caksak hy. 3 Bawipa thlang awh ce a u nu ak kai kaw? A hun caih awh ce u nu ak dyi kaw? 4 Kut ak caihkhqi ingkaw kawlung ak caihkhqi, a hqingnaak myiqawl bawknaak benna amak awm man ingkaw amak thym ik-oeikh awh awi amak kam mankhqi doeng ing kai kawm uh. 5 Bawipa ven awhkawng zoseennaak hu kawmsaw, ak hulkung Khawsa ven awhkawng ngaihqeepnaak ce hu kaw. 6 Amah ak sui cadikhqi taw cemyihna awm kawm uh, Aw Jacob Khawsa, nang a haai ak sui thlangkhqi ce. 7 Aw chawmkengkhqi aw, na luukhqi ce thawh lah; boeimang sangpahrang a kunnaak thai aham, nangmih syn awhkawng chawmkengkhqi aw zoeksang qu lah uh. 8 Boeimang sangpahrang ve a u nu? Boeimang Bawipa qaal tulnaak awh tha ak awm soeih Bawipa ce ni. 9 Aw chawmkengkhqi aw, na luukhqi ce thawh lah; boeimang sangpahrang a kunnaak thai aham, nangmih syn awhkawng chawmkengkhqi aw zoeksang qu lah uh. 10 Boeimang sangpahrang ve a u nu? Boeimang Bawipa thak awm soeih Bawipa - Boeimang sangpahrang ce anih hawh ni.

25 Aw Bawipa, na venawh ka hqingnaak zoek law nyng. 2 Aw ka Khawsa, nang ni ka ni ypnnaak. Chah koeh ni phyihsak nawk, ka qaalkhqi ingawm koeh ni noeng sak. 3 Nang awm ngaihunaak ak takhqi boeih taw chah am phyi tikaw, cehlai ikaw am maiawh ypnna thlang na amak awmkhqi taw chah phyihsnaak hu kawm uh. 4 Aw Bawipa, nang ing na lamkhqi ce nim hul nawk na cehnaak lamkhqi ce ni cawng sak lah; 5 Nang taw ka hulkung Khawsa na na awm dawngawh nak awitak khuiawh ni sawi nawk ni cawngpyi lah, myngawi kang ngaihunaak taw nang ni. 6 Aw Bawipa, syn awhkawng ak awm nam geennaak ingkaw na lungnaak bau soeih ce sim poe lah. 7 Ka taai hui awhkawng ka thawlhnaakkhqi ingkaw hatlauh na ka awmnaak khawboe qamlangkhqi ce koeh sim poe lah, na lungnaak awh ce ni sim poe

lah, Bawipa nang taw leek hyk ti. 8 Leeknaak ingkaw dyngnaak ve Bawipa koe ni; Cedawngawh thlak thawlkhkqi ce amah a lamkhkqi cawngpyi khqi hy. 9 Dungvoeng na ka awm thlangkhkqi ce a thymnaak benna sawi nawh amah a lam ce cawngpyi hy. 10 Ak awipeek paipi ak thin tlawhnaak khqi taw lungnaak kap nawh a ypawn hy. 11 Aw Bawipa, ka sai thawlkhkqi ve bau soeih mai seiawm, nang ming ak caming queenkawh ngai law lah. 12 Cawhtaw, Bawipa ak kqjih thlang ce a u hy voei nu? Lam ak tyk peek naak amyihna anih ce cuk am kik kaw. 13 Anih ing khawnghyp boeih ce zo awmnaak ing hawna kawmsaw, a cadilkhkqi ing qam ce pang kawm uh. 14 Bawipa ing amah ak kqjihkqi venawh a paipi ce ang hyp na sim sak dyn hy. 15 Kamik qawi ing Bawipa ben doeng ni a toek, amah doeng ing ni ka khaw qawi ve thang awhkawng a hlam law hly. 16 Kai benna mang law nawh nim qeen leah, khuikhka ing kamah doeng ca ka awm a dawngawh. 17 Kak kawlung khuikhanaak ve kqawn kaw am hut voel hy, ngaihang kawbin na ka awmnaak awhkawng ni loet sak lah. 18 Ka khuikhanaak ingkaw kang ngaih a kyinaak toek nawhtaw ka thawlhnaka boeih ve khoe law bang lah. 19 Ka qaalhkqi pung khawngkhawh kai a mini sawhnaak ve toek lah! 20 Ka hqinggaak ve qym nawhtaw kai ve ni hul lah; nang ak khuiawh kang thuk a dawngawh chahqai na koeih ni awm sak. 21 Kawlung thymnaak ingkaw dyngnaak ing nik chung lah seh, kang ngaih-unaaq taw nang awh a awm dawngawh. 22 Aw Khawsa, a kyinaak awhkawng Isarel ve hul lah!

26 Aw Bawipa, ak thym na awi ni deng lah; coet a kap kaana khaw ka sak a dawngawh; kaw cak doena ni Bawipa ce ka ypnnaak. 2 Aw Bawipa, ni noekdak nawh, ni nai plak plak lah, kam thin ka kyl ve ni silh pe lah. 3 Na lungnaak ve ka haiawh awm poepa nawh, nak awitak awh ka ceh poepa a dawngawh. 4 Qaai ak kqawn thlang mi am ngawi hah man nyng saw, ak hoel qo thlangkhkqi ing am pyi qu man nih nyng. 5 Ik-oeih che ak saikhqi ang cunnaak ce tyih nyng saw thlak chekhqi ing ngawih hah am awm tha na nyng. 6 Coet kap kaana kut ve sil nyng saw, Bawipa na bawkthang a kengsam awh cet vang. 7 Namah kylhcahnaak ce khawteh na khypyi nyng saw kawpoek kyi ik-oeih na saikhqi boeih ce kqawn vang. 8 Aw Bawipa, na awmnaak im, na boeimang a awmnaak hun ce thin tlawh na nyng. 9 Ka hqinggaak ve, thlak thawlkhkqi, thlang ti a thi ak ngaihkhkqi mi koeih lawh sih. 10 Ami kut awh ce ak che cainaak awm nawh amik tang ben kutkhkqi awm ang hyp ik-oeih peeknaak ing be uh. 11 Cehlai, kai taw coet kap kaana khaw ka sak dawngawh, ni hul nawh nim qeen lah. 12 Ka khaw ve hun a nepnaak awh dyi nawh; thlangkqeng ang cunnaak awh Bawipa ce kylhcah kaw.

27 Bawipa taw ka maihchoei ingkaw ka hulnaak na awm hy - u nu kak kqjh bai kaw? Bawipa taw ka hqinggaak vawngcak na awm hy - u nu kak kqjh re bai kaw? 2 Ka sa daih aham thlak chekhqi ing ni pan unawh ka qaalhkqi ingkaw ka thunkhkhkqi ing amim tu awh ce bah kawm usaw tlu kawm uh. 3 Qalkap ing nik chung khoep seiawm, kak kawlung am thyn qoe tikaw; tangboek ing ni boeng qoe seiawm kak kawlung yp khak kaw. 4 Bawipa venawh ik-oeih pynoet doeng thoeh nyng, ka thoeh taw veni; ka hqing khui pyt Bawipa im awh awm aham ingkaw Bawipa a myi daw soeih ce toek doena a bawkim khuiawh amah sui ve doeng ni. 5 Ikwatih kyinaak ka um awh ce a awmnaak hun awh kai ce ngaihding cana ni awm sak kaw; a hizan im awmnaak khuiawh ni thuh kawmsaw lungnu awh ce ak sang na nim hawh kaw. 6 Cawhtaw kai anik chung khoep ka qaalhkqik khianawh ka luu ve zoeksang kaw; a hizan im awh seel doena khy nawh lucik nawn nyng saw; Bawipa kylhcah ing laa sa hawh kawng nyng. 7 Aw Bawipa, ka nik khy awh ce kak awi ngai law lah; nim qeen

nawhtaw nim hlat lah. 8 Kak kawlung ing "A haai sui lah!" ni tina hy. Bawipa nang haai ni ka sui hly. 9 Na haai ce koeih thuh valh nawh, na tyihzawih ve koeih mang taak; nang taw kai anik bawmkung ni. Aw Khawsa ka hulkung, koeih ni qoeng nawtaw koeih ni cen taak. 10 Ka pa ingkaw ka nu ing ni cehta seiawm, Bawipa ing ni do ngai kaw. 11 Aw Bawipa, na lam ce ni cawng sak nawh; kai anik thekhanaakkhqi awh na lap dyng awh ni sawi lah. 12 Ka qaalhkqi ngaihnaak awh kai ce koeih ni pe, amak thym diythingkhkqi ing ni thawh sih unawh, amak leek ben awi ce amik kqawn a dawngawh. 13 Ka hqinggaak qam awh ve Bawipa a leeknaak hu ngai kawng tinawh yp qu na mang kang nyng. 14 Bawipa mah qeh lah; kawlung cak doena nak tha awm sak nawh, Bawipa mah qeh lah.

28 Aw Bawipa ka lungnu, namah ni ka nik khy, am hlat kaana koeih ni awm taak. Nang ing am na ning ngainaak awhtaw lawk-kqawng khuiawh ak tlakkhkqi amyihna ni ka awm hly. 2 Nam qeennaak huh aham ni doet nyng, na hun caih soeih benna ka kut qawi ka soeng law awh qeennaak thoeh doena kak khynaak ari ve ngai law lah. 3 Thlak chekhqi, ik-oeih amak leek aai thlangkhkqi mi koeih nik dawh siih qen, cekkhqi ing a pilnamkhkqi venawh zeelaak ari taw kqawn kaa lawt hlai uhy, ak kawlung khui awhtaw ak che khqoet ni a awm. 4 Ak che ik-oeih ami sainaak amyihna thung pek khkqi tolop lawt lah; a mimah ing ak tyng na amah a kut sainaak ce thung pe lah. 5 Bawipa a bibinaakkhqi ingkaw a kut saikhqi ce kaw na awm a maming ngaih dawngawh, cekkhqi ce khqai poet poet kawmsaw ityk awh awm am thawh khkqi voel tikaw. 6 Qeennaak ka thoehnaak khkqi ve a ning zaak peek a dawngawh, Bawipa venawh zoeksangnaak awm seh nyng. 7 Bawipa taw kak thaawmnaak ingkaw ka phuhqa na awm hy; kak kawlung ing amah ce ka ypnnaak a dawngawh ni bawm hy. Kak kaw zeel soeih nawh amah venawh zeelaak ari kqawn doena laa sa vang. 8 Bawipa taw ak thlangkhkqi ham hulnaak vawngcak na awm hy. 9 Nak thlangkhkqi ce hul nawhtaw na qo ak pangkhkqi ce zosennaak pe lah; a mingmih a tuudoenkung na awm nawh kumqui dyna khai khkqi loet lah.

29 Aw nangmih boeimang thak awm toek, Bawipa taw boeimang soeih hy tinawh dawk lo lah uh. 2 Ang ming a boeimang a dawngawh Bawipa venawh pe u nawhtaw; a zawziihnaak ing thoehcam qu doena Bawipa ce bawk lah uh. 3 Bawipak awi taw tuikhkqi ak khan awh pau nawh; Khawsa a boeimangnaak taw khaw na hum hy, tui ak doem soeih ak khan awh Bawipa taw khaw na hum hy. 4 Bawipak awi taw ak tha awm nawh; Bawipak awi taw a qym awm soeih hy. 5 Bawipak awi ing sider thingkhkqi ek sak nawh; Lebanon awhkaw sidar thingkhkqi ce Bawipa ing kqai poet poet hy. 6 Vaitaw camiyihna Lebanon ce peh sak doep doep nawh, vaitaw am cai camiyihna Sirion ce awm sak hy - 7 Bawipak awi taw khawphlamiyihna phla hlap hly hy. 8 Bawipak awi ing qamkhkqi tyn sak nawh; Bawipa ing Kadesh qamkhkqi awm tlayi sak hy. 9 Bawipak awi ing ther thingkhkqi kqai poet poet nawh thinghahkhkqi reu pheng pheng hy. A bawkim khuiawh thlang boeih ing "boeimang soeih hy" tinawh khy uhy. 10 Bawipa taw tuiliu ak khan awh boei na ngawi nawh; kumqui sangpahrang na Bawipa taw ngawi loet hy. 11 Bawipa ing ak thlangkhkqi venawh thaawmnaak pe nawh; Bawipa ing ak thlangkhkqi ce ngaihqeepnaak ingkaw zosennaak pehy.

30 Aw Bawipa, nang ce ni zoeksang vang nyng, nang ing a dungnaak hun awhkawng nik dawk nawh ka qaalhkqi kak khan awh amik kaw am qep sak hyk ti. 2 Aw Bawipa ka Khawsa, qeennaak thoeh doena kak khy awh ce nang ing ni qoei sak hyk

ti. **3** Aw Bawipa, phyi ak khui awhkawng nik dawk tiksaw; lawk-kjawng khuina ceh sak kaana nim hlyn hyk ti. (**Sheol h7585**) **4** Nangmih ak thlangciimkhqi aw, Bawipa venawh laa sa lah uh: ang ming caih ce kyihsah lah uh. **5** Ak kawsonaak taw kawlkalca doeng awh ni, cehlai a zeelnaak taw hqing khui dy aham awm hy; cimthan awh ning kqang hly mai hlai hy, mymcang awh zeelnaak law tlaih hy. **6** Kang ngaih a ding tloek awh ce "am tat qoe tikawng" ti nyng. **7** Aw Bawipa, kak khan awh nak kaw a zeel awh, ka tleng ce ak cak na dyih sak hyk ti; cehlai na haai na thuh awhtaw ngaihang tum na awm hqoeng nyng. **8** Aw Bawipa, nang ni ka nik khy; Bawipa venawh qeennaak thoeh doena khy nyng. **9** Ka seetnaak ingkaw lawk-kjawng khuina ka cehnaka ve nang aham hawihkhangnaak ikaw a awm? Dekvai ing nang ce anik kyihsah nu? **10** Aw Bawipa ngai law nawhtaw, nim qeen lah; Aw Bawipa kai anik bawmkung na awm law lah. **11** Kang kqangnaak ve lamnaak na coeng law sak hyk ti; nang ing dipche kang byng ve ni khoe pe nawh zeelnaak ing ni sing hyk ti. **12** Kak kawlung ing a awm dym kaana laa sa kaw, Aw Bawipa ka Khawsa, na venawh kumqui dyna zeelnaak awi kqawn kawng.

31 Aw Bawipa, nang awh ni kang thuk hy, chah koeh ni phyih sak; na dyngnaak awh ce ni hul lah. **2** Nang haa keng law nawhtaw, kai hul aham ang tawnna law lah; kang thuknaak lungnu na awm nawh, ka hulkung vawngcak na awm lah. **3** Nang taw kang thuknaak ingkaw ka vawngnu na, na awm a dawngawh nang ming ak caming ni ceh pyi nawhtaw ni hqui lah. **4** Ka haiawh a dun qu thang awhkawng ni loet sak lah, nang taw kang thuknaak kung na na awm a dawngawh. **5** Na kut awh kang myihla ni pe nyng; Aw Bawipa awitak Khawsa ni hul lah. **6** Kawnna amak awm myiqawl ak bawkkhqi ce sawh na nyng saw; Bawipa ce ypna nyng. **7** Na lungnaak awh ce zeelmang ing awm vang, kawthi nang ing ka kyinaak ce hu law tiksaw kang myihla ing a khukhnaak ce sim hyk ti. **8** Ka qaal a venawh amni pe nawh ka khaw qawi ve hun nepnaak awh ning dyih sak hyk ti. **9** Aw Bawipa ngaihang kawbin na ka awm a dawngawh, kai ve nim qeen lah; kak kawseet aih awh mik awm am dai hqa voel nyng; kang myihla ingkaw ka pum awm kawseet lungnat zawk hy. **10** Ka hqingnaak ve kawsetnaak ing daih nawh ka kumkhqi awm ko ang kqangnaak ing khaw kum boein hy; ka khuihka aih awh kak tha awm boet hqoeng nawh, ka quh awm ak tha am awm voel hy. **11** Ka qaalkhqi dawngawh, ka pilnamkhqi ing ni hep unawh; ka pyikhqi ing nik kqih uhy - lam awh kai anik hqihqi ing ni centaak boein uhy. **12** Ak thi hawh amyihna cekkhqi ing nim hilh boein uhy; dek-am ak kqek zak amyihna ni ka awm hqoeng hawh. **13** Thlang khawzah ing a mini tengnaak awi doeng za nyng; voei a vang awh kqihnaak hqoeng na awm hy; kai ing am ka ngaihnaak ben awh ce za qu unawh ka hqingnaak him aham cai uhy. **14** Cehlai, Bawipa nang ni ka ni ypnaak; "nang taw ka Khawsa ni" ti nyng. **15** Ka tymkhqi ve nang a kut khuiawh ni a awm; ka qaalkhqi ingkaw kai anik hqutkhqi kut khui awhkawng ni hul lah. **16** Na tyihzawih ak khan awh na haai hlangpan sak nawh; amak dyt thai na lungnaak ing ni hul lah. **17** Aw Bawipa, chah koeh ni phyih sak, nang a venawh ni kak khy law; cehlai tlak chekhqi taw chah phyih sak nawh phyi khuiawh awimyh na zaih sak khing lah. (**Sheol h7585**) **18** Cekkhqi ing qaa'i awi amik kqawnnaak hui ce sit sak lah, oek qunaak ingkaw hepnaak ing thlakdyngkhqi ce amik kaa naak a dawngawh. **19** Nang anik kqijhkhqi aham cun pe nawh, thlanghqeinkhqi haiawh nang awh ak thukkhqi aham na taak zoseennaak taw bau soeih hy. **20** Ang hyp na ak tengkungkhqi ven awhkawng na haai awhkaw awmnaak hun awh ak mawng na ta hyk ti. **21** Khawl bau cak awh ka awm awh kawpoek kyi qeennaak ce ang dang law sak a dawngawh, Bawipa venawh thangleeknaak awm seh nyng. **22** Ka ly aih awh, "ning hawi taak valh hawh amih hyk ti!" ti nyng. Cehlai, qeennaak ka thoeh law awh ce qeennaak

ing kak khynaak awi ce ngai law hyk ti. **23** A thlakciimkhqi boein aw, Bawipa ce lungna lah uh! Bawipa ing ypawm thlangkhqi ce hqui a sawi nawh ak oek qu thlangkhqi taw a khawboe amyihna thung pehy. **24** Nangmih Bawipa awh ngaih-unaak ak takhqi boein namik tha awm sak unawh na mim thin caksak lah uh.

32 A sai thawlhaakkhqi ak khan awh qeenkhaw ngai pe nawh, a thawlhaakkhqi ak dah peek ak thlang taw a zoseen hy. **2** Bawipa ing a thawlhaak ce kawna awm am poek pe nawh myihla hqingnaak awh qaai kqawn na amak awm thlang taw a zoseen hy. **3** Awimyh na khawngi zung kong konaak awa ka qukhqi awm hawn boein hawh hy. **4** Khawmthan khawdai kak khan awh na kut ve qih soeih hy; khawngqai awhkaw khawkhlawk ing a eng amyihna kak tha awm reu hawh hy. **5** Ka thawlhaak awh ce na venawh dawk hul nyng saw ka awm tloetnaak awm ap thuh phah nyng. "Bawipa venawh ka sai thawlhaakkhqi ve khypyi vang" ti nyng - cawhtaw nang ing ka thawlhaak awh ce qeenkhaw ngai law hyk ti. **6** Cedawngawh nang ve huh thai na, na awm law awh Khawsa ak kqih thlangkhqi boein ing cykcah awi kqawn u seh; cawh ni tuiliu a law awm cekkhqi ce ama pha hly thai. **7** Nang taw kang thuknaak hun na awm tiksaw; kyinaak anglakawhkawng nik chung nawh hulnaak laakkhqi ing nik chung kheop kawp ti. **8** Na cehnaka hly kawi lam ce nim huh kawng nyng saw ni cawngpyi bit kawng. **9** Zaaksimnaak amak ta meqang ingkaw laa amyihna koeh awm, cekkhqi ing haa aming zaakaak thai aham am kha awh thiqui ing a kyang ngaih hy; cemyih am kaana am sawi thai ti kawp ti. **10** Qaal ingkaw thalk che khawzah awm thai hy, namah anik ypnaak thlang taw Bawipa lungnaak amak dyt thai ing chung poepa hy. **11** Nangmih thlakdyngkhqi aw, Bawipa awh zeel unawh namik kaw zeel sak lah uh; kawlung ak dyng thlangkhqi boein aw, laa sa lah uh!

33 Nangmih thlakdyngkhqi aw, Bawipa venawh zeelnaak laa sa lah uh; thlakdyng ham taw amah kyihsah ve tyng qoe hy. **2** Tingoeng ing amah ce kyihsah unawh taw; a qui pahqa ak law qaw tingoeng ing tum sih bai lah uh. **3** A venawh lak thaia sa unawh; zeelnaak ing khy am kqang doena tum lah uh. **4** Ikwatih, Bawipa akawi taw thym nawh dyng hy; a ik-oeih sainaak boein awh ypawm hy. **5** Ak dyng ingkaw ak thym ve Bawipa ing lungna nawh; khawmdek ve amak dyt thai a lungnaak ing be hy. **6** Bawipa akawi ing khankhqi ce sai na awm nawh, ang hqi ing aihchikhqi awm sai hy. **7** Tuicunli awhkaw tuikhqi ce cun kang nawh; tuidungaak hun ce am cunnaak im na tahi. **8** Khawmdek boein ing Bawipa kqih seitaw; khawmdek thlangkhqi boein ing amah ce kqijhchah seh. **9** Ikwatih, anih ingtaw kqawn nawh coeng sak hy; awi pe nawh ak cak na dyih sak hy. **10** Pilnamkhqi ing cainaak ce Bawipa ing plal sak hy; thlangkhqi boein ang cai sihnaakkhqi awm hqeq pehy. **11** Cehlai, Bawipa ang cainaak ce Bawipa ing plal sak hy; thlangkhqi boein awm cadil dyna cak hy. **12** A qo pang aham amah ing tyk nawh, Bawipa ce a Khawsa na ak ta qam taw a zoseen hy. **13** Khan nakawh Bawipa ing anuk toek awb thlanghqeinkhqi boein ce hu hy. **14** A awmnaak hun awhkawng khawmdek awhkaw ak awm thlangkhqi boein ce qeh hy. **15** Thlang boein ak kawlung ak saikung ing, a ik-oeih sainaakkhqi boein awm poek pehy. **16** Kawmih a sangpahrang awm a qalkap ing am hul hy, ikawmyihna a qaal ak leek soeih awm ak thaawmnaak ing am loet sak hy. **17** Hul thainak aham meqang pynoet doeng ce kawna am coeng hy; ak tha awm seiawm am hul thai hy. **18** Amak dyt thai a lungnaak awh ngaih-unaak ak ta thlangkhqi ingkaw amak ak kqijhkhqi ak khan awh Bawipa amik taw awm hy, **19** thihihaak khui awhkawng cekkhqi ce hul aham ingkaw khawset khawhka a pha law awh cekkhqi ce hul aham. **20** Bawipa ce ngaih-unaak ing ni qeh uhy;

amah taw ningnih a hulkung ingkaw ningnih a phuhqa na awm hy. 21 Ang ming ciim ce ni ypnaka a dawngawh, ningnih ak kawlung taw zeel hy. 22 Aw Bawipa namah awh kaimih ang ngaih-unaak taw a awm dawngawh, amak dyt thai na lungnaak ce kaimih ak khan awh awm seh nying.

34 Kawmih a tym awh awm Bawipa taw zoeksang kawng nying; amah kyihcahnaak ce ka hui kam lai awh awm quiqah kaw.

2 Ka hqjinggaak ve Bawipa awh ak tha awm kaw; a khuikhakhqi ing za seitaw zeel u seh. 3 Bawipa ce nim kyihcah pyi unawh; ang ming ce kut oet cana zoeksang lah u sih. 4 Bawipa ce sui nying, amah ing nim hlat hy; kak kqjihnaak boeih awhkawng amah ing ni hul hy. 5 Amah ak toek thlangkhqi boeih taw vang unawh; ami haaihqi ce chahnaak ing am dah pe qoe hy. 6 Khawdeng thlang ing ak khy awh ce, Bawipa ing zaak pe nawk, a khuikhanaak khqi boeih awhkawng anih ce hul hy. 7 Amah ak kqjih thlangkhqi taw BawipaK khan ceityihkhqi ing chung unawh anih ce hul uhy. 8 Bawipa a leeknaak ce tan unawh taw hu lah uh; amah awh ak thukkhqi taw a zoseen hy. 9 Nangmih amah ak thlangciimkhqi, Bawipa ce kqjih lah uh, kawtih amah ak kqjihkhqi taw ikaw awm am deng ti kawn uh. 10 Sendeih taw ak tha boeih nawk ak phoen cawi thai hy, cehlai Bawipa ak sui thlangkhqi taw ik-oeih leek am deng qoe uhy. 11 Ka cakhqi law unawh taw ngaih lah uh; Bawipa kqjihnaak ce ni cawngpyi vang nying. 12 Nangmih hqjinggaak ak lungnaakkhqi ingkaw khawngkhik leek khawzah huh aham ak ngaihkhqi, 13 awihche am nak kqawnnaak aham nam lai ce cyt unawh na hui ing qaai awi amak kqawnnaak aham cyt lah uh. 14 Ik-oeih che ce cehta unawh ik-oeih leek ce sai lah uh; qoepnaak ce sui unawh hqut lah uh. 15 Thlakdyng ak khan awh Bawipa amik taw awm nawk ak khynaak avi ce ang haa ing ngaih pehy. 16 Cehlai, ik-oeih amak leek ak sai thlangkhqi ce Bawipa ing hawi taak nawk, khawndeak awh a mingmih ami awm ce am sim loet voel hy. 17 Thlakdyng ak khynaak ce Bawipa ing zaak pe nawk; cekkhqi ce kyinaak ak khui awhkawng hul khqi hy. 18 Kawlwing ak kqekkhqi venawh Bawipa taw zoe penawh lingbyi ak kqekkhqi ce hul hy. 19 Thlakdyng taw kyinaak khawzah hu seiawm, cekkhqi boeih ak khui awhkawng Bawipa ing anih ce hul hy; 20 a quhkhqi boeih ce ak chung a hlip peek a dawngawh, pynoet ca awm am ek tikaw. 21 Cehlai, thlak che taw leeknaak ing him kawmsaw; thlakdyng a qaal ce thawl sak na awm kaw. 22 Bawipa ing a tyihzawikhqi ce hul nawk; amah awh ak thukkhqi boeih taw am thawlq qoe kaw.

35 Aw Bawipa, kai anik eek thlangkhqi ce nang ing mele sih nawkhaw; kai anik tukkhqi ce nang ing tuk lah. 2 Phura ingkaw kqjong dahnaak ce lo lah; tho nawk kai bawm aham law lah. 3 Kai anik hqutkhqi haiawh cai thlek pek khqi nawk mam khqi kheop lah, Ka hqjinggaak venawh, "Kai taw nang a hulnaak ni," tina lah. 4 Ka hqjinggaak hqe aham ak suikhqi ce amik kaw boet seitaw chah phyi u seh; kai plawci sak aham amik zu qukhqi ce kqjih doe ing huna voei tlaih u seh. 5 Zilh ing a zawn caughi amyihna awm u seitaw, Bawipa a khan ceityih khqi ing cekkhqi ce ak chang na hqut u seh; 6 A cehnaka lam ce hyp pe seitaw hal pe seh, Bawipa ak khan ceityihkhqi ing cekkhqi ce hqut seh. 7 Ikaw am mai awh kang awhnaak aham lawk zan unawh kai aham lawkkawng co law uhy, 8 poek kaana cekkhqik khan awh seetnaak ing pha tawk qat seh a mimah ing ami zan lawk awh a mimah awk nawn u seh, a seetnaak aham a mimah a lawk-kqawng awh tla nawn u seh. 9 Cawh Bawipa awh ka hqjinggaak zeel kawmsaw a hulnaak awh ce kak kaw zeel kaw. 10 Cawh kaw coengnaak boeih boeih ing, "Bawipa, nang amyihna u nu ak awm bai? Tha ak awm soeikhqi anglakawhkawng khawdengkhqi ce nang ing hul hyk ti, a mingmih ak mukkung a kut khui awhkawng khawdengkhqi

ingkaw thlang ak voethlauhkhqi ce hul hyk ti," tinawh kqawn kaw. 11 Qeennaak amak ta dyihting qawlkhqi haina thoeih unawh; am ka sim ik-oeihkhqi ing ni deng uhy. 12 Ik-oeih leek ce ik-oeih che ing ni thung unawh ka hqjinggaak ve a sungnaak aham cehta uhy. 13 Cehlai, cekkhqi ami tlawh awhtaw, kai ingtaw tlamhi byng nawk buh zehnaak ing chung na awm nying. Kak cykcahnaak hlat na ama awm awh ce, 14 ka pyi ingkaw ka koeina amih koep na kqah sih nying. Ka nu ak thi amyihna kawseet aih awh koep nawk kqap nying. 15 Cehlai kangbah awhtaw, cekkhqi ce zeel unawh cun uhy, am ka simkhqi ing ni sawi loet uhy. 16 Khawsa kawma amak hu thlang qaihna amik kqawn amyihna, ami ha ni tah sih uhy. 17 Aw Bawipa, ityk dy nu nani toek hly hqoeng? Ka hqjinggaak hqe aham ak caikhqi kut khui awhkawng ni hul lah, a phuk tlo soeih ka hqjinggaak ve samthyyinkhqi kut khui awhkawng ni hul lah. 18 Thlangkqeng ang cunnaak awh nang ce ni ym kawng nying saw; thlangkqeng khawzah anglakawng nang ce ni zoeksang kawng. 19 Kaw am mai awh ka qaalkhqi ing kawqep doena koeh ni toek u seh; ikaw am mai awh kai anik sawhnaakkhqi ing mik koeh ni hqip sih u seh. 20 Cekkhqi ing qoepnaak awi kqawn kaana, qam khuiawh a ding a syk na ak awmkhqi ce thainaak aham qaai puk uhy. 21 Ni aang sih unawh, "A ha! A ha! Ni mik qoe ing ni hu hawh saw ve," ni tina uhy. 22 Bawipa vekkhqi ve na huh hawh dawngawh; koeh ni awm taak poek poek lah. Bawipa ak hla na koeh ni awmtaak lah. 23 Kai hul aham hqyng nawkhaw, dyl iah! Ka Khawsa ingkaw Bawipa, kang zyng na cekkhqi mi noek qu lah uh. 24 Aw Bawipa ka Khawsa, na dyngnaak a caming awi tlyk law lah; cekkhqi mi koeh ni kqep sih seh. 25 Cekkhqi ce, ce pae seh, vemiyhna maw ni ngaih qoe pai," ce am awhtaw, "Amah taw nik daih koe noek," tinawh koeh poek sak. 26 Kak kawseetnaak awh kaw anik qep sihkhqi ce chah phyi u seitaw ngaih kyinaak hu u seh; kak khan awh ak zoeksang qu plakkhqi ce chahnaak ingkaw ngaih kyinaak ing sing kheop seh nying. 27 Ka dyngnaak awh ak zeel thlangkhqi taw awmhly doena khy usesh; cekkhqi ing, "A tyihzawih a ik-oeih leek ak ym, Bawipa taw zoeksang na awm seh," ti phat u seh nying. 28 Kam lai ing nang a dyngnaak awi kqawn kawmsaw hypoet pyr awh na kyihcahnaak awi kqawn kaw.

36 Thlak che a thawlhaak ing kak kawlung khuiawh awi kqawn law hy; Amik awh ce Khawsa kqjhnaak qoe qoe am tahy. 2 Amah amik huh nawn awh cainaa huh amak ngaih ingkaw aq sawhnaak amyihna kiyh am cah quhy. 3 Am kha awhkaw awikhqi ve se nawk qaai kqawnnaak hqoeng na awm hy; thlakcyi na am awm voel nawk ik-oeih lek sai aham qoeng uhy. 4 Ang zaihnaak kung awhkawng ak che doeng poek poepa hy; ik-oeih che sai aham cai qoe nawk amak thym ik-oeih ce am qoeng hy. 5 Aw Bawipa nang a leeknaak ingtaw khawk khan hak pha nawk, na ypwynaak ing khawngi hak pha hy. 6 Na dyngnaak taw khawmcung bau soeih amyihna awm nawk, na thymnaak taw dungnaak bau soeih amyihna awm hy. Aw Bawipa, nang ing thlanghqing ingkaw qamsakhqy boeih khoem hyk ti. 7 Na lungnaak amak dyt thai ve a phu am kqawn thai pai hy! Thlanghqing ak nem al sang ing nang ang thlak khuiawh thuknaak hu boeih uhy. 8 Na ipkhui awhkaw ik-oeih khawzah papu ce aw a ai unawh; na awmhlynaak lawngu awhkawng aawk hly kawi ce pe hyk ti. 9 Ikwatih nang a venawh hqjinggaak tuibym ce awm nawk; na vangnaak awhkawng vangnaak ce hu unyng. 10 Nang anik sim thlangkhqi venawh na lungnaak awm, na dyngnaak awm awm sak loet lah. 11 Ak oek qu thlang a khaw ce ka ven benna koeh law sak nawk, thlak che a kut ingawm koeh ni hqek seh. 12 Ik-oeih che ak saikhqi ikawmyihna aming tluk tice toek lah- khaawng na awm unawh, am tho hqa voel uhy.

37 Ik-oehi che ak saikhqi awh ce nak kaw koeh seet sak nawhtaw ik-oehi amak thym ak sai thlangkhqi awm koeh nai.

2 Cekkhoi taw qam amyihna reu naai kawm usaw qam saihqing amyihna thi naai bit kawm uh. 3 Bawipa ypna nawhtaw ik-oehi leek ce sai lah; ve qam khuiawh awm nawh qamhqing ve ngaihding ing awm sih lah. 4 Bawipa awh zeelnaak ta lah, nak kawlung hym ngaihnaakkhqi ce amah ing ni pe bit kaw. 5 Na cehnaak lam ce Bawipa awh hal lah; amah ce ypna lah amah ing sai law bit kaw: 6 Anih ing na dyngnaak ce mymcang khaw amyihna bee law sak kaw, ak thym ik-oehi na sainaak awm khawnghyp khawmik amyihna bee law sak kaw. 7 Bawipa haiawh awm poek poek nawhtaw kaw dungnaak ing amah ce qeh lah; thlangkhqi ing a ik-oehi sai awh nak kaw koeh tlawh sak. 8 Kawsonaak ce re nawhtaw kaw tawknaak awhkawng hlat lah; nam thim koeh tlawh sak - ce ing ce ak che ben doek khoeih awh ni ani hquisawi hly. 9 Ikawtih, thlak chekhqi taw moelh a moeng kawm uh, cehlai Bawipa awh ngaih-unaaak ak takhqi ingtaw qam ce pang kawm uh. 10 Kawlkhalkh awh, thlak chekhqi taw am awm voel tikaw; cekkhoi ce sui tik seiawm, am hu voel kawp ti. 11 Cehlai kaw ak daw thlangkhqi ingtaw qam ce pang kawmsaw ak bau qoep ang quinaak ing nawm kawm uh. 12 Thlak che ingtaw thlak leek ce teng nawh a ta tah sih hy. 13 Cehlai Bawipa ing thlak che ce qaih na hy, cekkhoi a tym ce law huili hawh hy ti a sim dawngawh. 14 Thlakche ing khawdengkhqi ingkawg ak voethlauh khqi ce tluk sak aham ingkaw lap dyng awh ak cekkhoi ce him aham zawi ce phlawng nawh licung ce hawi hy. 15 Cehlai a mimah ak zawiw ing a mimah a lingbyi nawn ce sun pek khqi kawmsaw ami licungkhqi awm ek pek khqi kaw. 16 Thlak che a boeinaak anglakawh thlakdyng ing a khoeh ca a taak ce nep bet hy. 17 Cehlai thlak che ak thaawmnaak taw ek kawmsaw, thlakdyng cetaw Bawipa ing tu kaw. 18 Coet amak kap qoe thlangkhqi a khawny ce Bawipa ing sim pehy, a qopang hly kawi awm kumqui dyna cak loet kaw. 19 Plawcinaak atym a pha awh ce am zai kawm uh; khawseet khawhka awm kawm khawzah ta kawn uh. 20 Cehlai thlak chekhqi taw qeeng kawm uh; Bawipa a qaalkhqi taw qam a leeknaak amyihna ni ami awm hly, qeng bang kawm usaw mai khu amyihna ding bang kawm uh. 21 Thlak che ingtaw pu hlai hy am thung voel hy, cehlai thlakdyng ingtaw khawboe cawnnaak ing pehy. 22 Bawipa ing zosenaaak a peek khqi ing qam ce pang kawm uh, cehlai kawsi ak hawi thlangkhqi taw milh a moeng kawm uh. 23 A cehnaak awh BawipaK kaw ak law sak thlang taw, a khaw kan cak pe sak hy; 24 Bah seiawm, am tlu tikaw, Bawipa ing a kut ing tu hy. 25 Thak awm hui na hang awm hawh nyng saw tuh taw pacawng hawh nyng, thlakdyng cehtaak na ak awm am hu khawi hlan nyng saw a cakhqi ing buh ami thoeh awm am hu khawi hlan nyng. 26 Khawboe cawnnaak ing thlang amik pu poepa dawngawh a cakhqi ing zosenaaak hu kawm uh. 27 Ik-oehi che cehtaaw nawk ik-oehi leek sai lah; cawhtaw qam khuiawh kumqui dyna awm kawp ti. 28 Bawipa ing thlakdyng ce a lungnaak dawngawh amah a ypaawm thlangkhqi a cadilkhqi taw moelh sak kaw; 29 Thlakdyng ingtaw qam ce pang kawmsaw, ak khuiawh kumqui dyna awm kaw. 30 Thlakdyng am kha ingtaw cyihnaak awi sa nawk, am lai ing awih thym ce kqawn hy. 31 A Khawsak a cawngpyinaak awi ce ak kawlung khuiawh khoem nawh; a khaw am bah hy. 32 Thlak che ingtaw thlakdyngkhqi ce him aham ngawih sih poepa hy; 33 Cehlai Bawipa ing cekkhoi kut awh am cehta hyt ti kawmsaw awidengnaak a awm awh awm am thawlh sak tikaw. 34 Bawipa ce qeh nawhtaw a lam ce hqout loet lah. Qam pang sak aham nang ce ni zoeksang kaw; thlak chekhqi moelh sak na ami awm ce hu kawp ti. 35 Ang lai boet na nawk a hqing sup na ak hlul thing amyihna ak awm thlak che ingkaw, thlang queenkaw amak ngaih thlang ce hu nyng, 36 Cehlai kawlkhalkh awh anih ce khum bang

kawmsaw am awm voel tikaw; sui nyng awm, huh thai na am awm voel kaw. 37 Coet amak kap thlangkhqi ce poek nawhtaw, thlakdyngkhqi ce hat lah; qoepnaak ak sai thlangkhqi ingtaw cadil ta kaw. 38 Thlak thawlkhqi taw hqe na awm kawm usaw; thlak chekhqi a cadilkhqi awm moelh kawm uh. 39 Thlakdyng hulnaak taw Bawipa ven awhkawng law nawh; kyinaak ami huh awh anih taw cekkhoi ham vawngnu na awm pehy. 40 Bawipa ing cekkhoi ce hul nawh thaawng hy; amah awh ang thuk dawngawh, thlak chekhqi anglakawhawng hul nawh thaawng hy.

38 Aw Bawipa, kawso doena koeh ni zyi nawk thin tawinaak ing koeh ni phep. 1 Kawtih, na lakhqi ing ni sun nawk, na kut ing kak khan awh ni nam khak hy. 2 Nam thin tawinaak ka pum awh sadip na qoe am awm tlaib hy; ka thlalhwnaak awh ka quhkhqi awm a sa am dip voel hy. 3 Ka thlalhwnaak ing ni viyh khoep nawk phyihqih naa tloei hak amyihna ni nam hy. 5 Ka thawlkh ka qawnaakkhqi ve thu nawk tyih awm hy. 6 Nung koep nawk am cei qeet awh balak nyng; khawnghi zung ko doena pla nyng. 7 Kam ting kawng plih kang hawh nawk; ka pum awh sadipnaak qoe am awm voel hy. 8 Kak tha boeih hqoeng nawk sawp qu plawk hawh nyng; kawlung khuikha doena ko hqoeng nyng. 9 Aw Bawipa, ik-oehi ka hym ka dawng soepkep na haiawh awng qu pheng nawk; kang konaak awi ve awm thuh thai na am awm hy. 10 Ka bawng tlaip lawp lawp nawk, kak tha am awm voel hy; kamik dainaak awm khum hawh hy. 11 Phoei am lit hqoeng na ka awm dawngawh ka pyikhqi ing ni qee uhy; ka imcengkhqi ingawm ak hla na ni awm ta uhy. 12 Ka hqingnaak hqe aham ak suikhqi ing thang ni dun sih uhy, nganbawh peek aham ak caikhqi ing ka seeetaak hly doek khoeih ce kqawn uhy; Khawnghi zung awh qaii kqawnnaak awi doeng ce kqawn uhy. 13 Awi amak za ang hakpang amyihna awm nyng saw; kha amak ang thai awimyh amyihna awm hqoeng nyng; 14 Awi am za thai qoe nawk hlatnaak awi amak kqawn thai qoe amyihna awm nyng. 15 Aw Bawipa, nang ni ka ni qeh; Aw Bawipa ka Khawsa, namah ing nim hlat kawp ti. 16 Kai ingtaw, Cekkhoi ing kaw koeh ni qep sih seitaw kang bah awh kak khan awh koeh zoeksang qu u seh," ti nyng. 17 Ikawtih, tlu tawm ca nawk, ka tlawhnaak ing amni hlah qoe hy. 18 Ka sai thlalhwnaak ce kqawn nyng; ka thlalhwnaak ing kyinaak ni pehy. 19 Tha ak awm ka qaalkhqi kqeng soeih uhy; ikaw am mai awh anik sawhnaak thlangkhqi khawzah ni. 20 Ka leeknaak ce seeetaak ing anik thungkhqi ing ak leek ik-oehi ka hqout awh ak che na nik kqawn uhy. 21 Aw Bawipa, nang ing koei ni hlah hyt; Aw ka Khawsa, ak hla na koeh ni awm taak. 22 Ka Bawipa ingkaw ka hulkung, kai hul ahám ang tawnna law lah.

39 Ka cehnaak lam awh ce kang ngaih ta nawk kam lai awm thlalhwnaak awhkawng khoem vang; thlakchekhqi ka haiawh a awm khui awhtaw kam kha ve cyp vang," ti nyng. 2 Cehlai awimyh na awm poek nawk, ik-oehi leek kqawn kaana ka awm awh zani, kak kawseetaak ing pung hy. 3 Kak kawk khuiawh kak kawlung hlawk nawk, poek typ typ nyng saw, mai ce kqawng hy; cawhtaw kam lai ing awi ce kqawn nyng. 4 Aw Bawipa, ka hqing dytnaak ce nim huih nawhtaw khawny iqyt nu ka hqing kawtice nim huih lah; ka hqingnaak ve choet ca mai ni ti ni sim sak lah. 5 Ka hqing khui khawsaknaak ve kut pha teh doeng ni sai tiksaw; ka hqingnaak ve na haiawh ik choet awm am law hy. Thlang boeih a hqingnaak ve hqi doek khoeih mai ni. 6 Thlanghqing ve huih na ak cet miyhlip ing miyh hy; amah poek awhtaw tamtaw soeih lawt hlai hy, a zap mai ni; them awm cun hlai hy, u ing a pang kawtice am sim hy. 7 Cehlai tuh Bawipa, kai ing u nu ka sui? Kang ngaih-u-naak taw nang awh ni a awm. 8 Ka sai thlalhwnaak ak khui awhkawng ni hul nawhtaw; thlakqawkhqi ak kqawnseet na koeh ni sai. 9 Awimyh na awm nyng saw; kam kha am awng

nyng, kawtih, ve ve nang ing na sai hawh ni. **10** Na ni vyknaak ve ka ven awhkawng khoe lhah; na kut zawk hawh nyng. **11** A thawlhaak awh thlangkhqi ce zyi nawh toel hyk ti; thlang boeih ve hqj doek khoeih mai ni. **12** Aw Bawipa, kak cykcahnaak ve ngai law lah, qeenaka thoeh doena kak khynaak awi ve ngai lah; kang kqangnaak ve nang haa koeh kqek sih lah. Ikawtih, na venawh khin amyihna awm nyng saw, ka pakhqi amyihna tlak chang na awm nyng. **13** Cet nawh am ka awm voel tym apha hlan awk ka zeelnaak tlaih aham, ak chang na ning mang tak mai.

40 Bawipa ce kawdungnaak ing ka qeh dawngawh; kai benna mang law nawh kang kqangnaak awi ce za hy. **2** Lawkkawng dek nawng ak plai ak khui awhkawng nik dawk nawh, lungnu awh ka khaw ce ni leh sak hy, kang diyhnaak na hun nep ce ni pehy. **3** Ningmih a Khawsa kyihcahnaak lak thai ce kam kha awh ta law hy. Thlang khawzah ing ami huh awh ce kqjh kawm usaw Bawipa ce ypnna kawn uh. **4** Bawipa ak ypnna thlang, amak thym khawsakhqi benna hawi unawh ak oek qu thlang amak toek taw a zoseen hy. **5** Aw Bawipa ka Khawsa, kapwoek kyi na saikhqi doem soeih hy. Kaimih aham ik-oehi na qaalkhqi ve a doem soeih a dawngawh u ingawm am dang sak thai noeng hy, cemyihkhqi ce kqawn goe nying seiwam, noet noeng kaa ingkaw kqawn noeng kaana doem soeih hy. **6** Bulnaak lucik nawn ce am hy tiksaw, kang haa ni vyh pe hawh hyk ti; hyih phumnaak ingkaw thawl bulnaak ce am ngoe hyk ti. **7** Cawhtaw kai ing, "Vena awm nyng, law hawh nyng cahawn khuiawh ka kawng qee na awm hawh hy. **8** Aw ka Khawsa, nak Kawngaih ce sai aham hy nawh; na anaa awi ce kak kawlung awh khoem khak nyng," ka ti. **9** Dyngnaak ce thlangkqeng anglakawh kqawn nawh; AW Bawipa na sim hawh amyihna ka hui am khyp nyng. **10** Na dyngnaak ce kak kawk khuiawh am thuh nyng saw; na ypmnaak ingkaw na hulhaak khqi ce kqawn nyng. Thlangkqeng khawzah anglakawh na lungnaak awitak ce am phah nyng. **11** Aw Bawipa, nam qeenaka ce ka hamna koeh hlawh lah; na lungnaak ingkaw nak awitak ing nik chung poepa seh. **12** Ikawtih, noet boeih kaa kyinaakkhqi ing nik chung khoep nawh; ka thawlhaak ing anik chung hawh dawngawh, ka mik am dang voel hy. Ka lu awhkaw ka lusam anglakawh doem khqoet unawh, kak kaw boet hqoeng hy. **13** Aw Bawipa, kai hui aham nak kaw zeel sak lah; Aw Bawipa, kai hui aham ang tawnna law lah. **14** Ka hqingnaak hqe aham ak tengkhqi ce chah qai phyi kawt na awm u seitaw ngai hangtum na awm lah u seh; kai plawci sak aham ak ngaiikhqi ce kawboet doena hlat u seh. **15** A ha! kai anik tinaakkhqi ce amik chah aih awh cat lyt lyt u seh. **16** Cehlai, nang anik suikhqi boeih taw zeel u seitaw nang ak khan awh ce amik kaw zeel seh; ang quina, "Bawipa taw zoeksang na awm seh!" ti u seh. **17** Cehlai, kai taw khawdeng thlang ingkaw ak syt thlang na awm nyng; Bawipa ing nik poek seh. Nang taw ka hulkung ingkaw anik hulkung na awm hyk ti; Aw ka Khawsa, koeh yih.

41 Tha amak awm khawdeng thlang ak husim thlang taw a zoseen hy; kyinaak a huh awh anih ce Bawipa ing loet sak lawt kaw. **2** Bawipa ing anih ce hloep kawmsaw a hqingnaak ce loet pe sak kaw; qam khuiawh anih ce zoseennaak pe kawmsaw a qaalkhqi ak kawgaihnaak a soepnaak aham anih ce am pe tikaw. **3** A tlawh awh awm Bawipa ing awm pyi kawmsaw a tlawhnaak ikhun awhkawng thawh tlaih kaw. **4** Kai ing, Aw Bawipa, kai ve nim qeen lah; ni qoei sak lah, nak khan awh thawlkh vik nyng," ti nyng. **5** Ka qaalkhqi ing kai ve "ityk awh nu thi nawh a platham kaw?" ni tina uhy. **6** kai hui aham ak law poh ing, amak thym hqoeng kqawn hy, ak kawk khuiawh thetnaak awi hqoeng awm hy; a ceh coengawh ak doem khqoet na kqawn hyn bai hy. **7** Ka qaalkhqi boeih ing kai ve tlak che na ni hu unawh, ak che doek khoeih ka ham poek uhy, **8** Tlawnche ing pha hawh nawh, ang

zaihnaak hun awhkawng am tho voel tikaw," ni tina uhy. **9** Ka piyheek soeih, ka ypnna soeih ingkaw phaihpi anik veel pyi vey, a khawdil nik thlek sih hy. **10** Cehlai, Aw Bawipa, nang ing nim qeen lah; cekkhqi kut ka thungnaak aham, nim thawh cang lah. **11** Ka qaalkhqi ing a mami noeng dawngawh, kak khan awh nak kaw zeel hy ti sim nyng. **12** Ak thym kawlung ka taak dawngawh nang ing nim tu khak nawh na haai awh kumqui dyna ni awm sak hyk ti. **13** Israel Khawsa, Bawipa venawh thangleeknaak awm seh nyng, kumqui awhkawng kumqui dyna Amen ingkaw Amen.

42 Saksuk ing sihtui ang ngai amyihna, Aw Khawsa, kang miyila ing nang ning ngai soeih hy. **2** Ka hqingnaak ing Khawsa, ak hqing Khawsa ce tui na ngain hy. Ityk awh nu ka ceh nawh Khawsa ing ka ning hqum lah voei? **3** Khawmthan khawdai mikphli tui ve buh na ai nyng saw, thlangkhqi ing khawngi zung awh, "Na Khawsa hana a awm? ni tina uhy. **4** Khatwty khaw ning awh thlangkqeng ing Khawsa im na ceh buk buk doena khy ang kqang ing awmhly zeelnaak awi ak kqawn khqi ce kak poek awh, ka hqingnaak ve khuikha hy. **5** Aw ka hqingnaak kawtih nang ngam khak vik hy voei? Ikawtih kak kaw khuiawh ngaihang tum na a awm? Bawipa awh ngaih-unaak ce ta lah, ka hulkung ingkaw ka Khawsa ce kyihcah hyn ngai kawng. **6** Kak kawk khuiawh ka hqingnaak ve ang ngam khak hawh dawngawh; Jordan qam, Herman tlang sang. Mizar mawl awhkawng namah ce ni sim loet kawng. **7** Chawihawng tuih awi awh tuihdung ingkaw tuihdung ce khy qu nih nawh na tuiphu ingkaw tui sambakkhqi ing ni liu mylh hy. **8** Khawkdai awh Bawipa ing a lungnaak ce hlat law nawh, khawmthan awh a laa ce ka venawh awm sak hy. Ka hqingnaak Khawsa venawh kak cykcahnaak ce awm hy. **9** Lungnu ka Khawsa venawh, "Ikawtih na nim hilh hyt vik? Ikawtih ka qaal ing ani penelt qap awh kawboet ing ko doena kang pla khing kaw?" tina nyng. **10** Ka qaalkhqi zakdam kawi awi awh ka quhkhqi awm thiit pit dyna khuikha hy; myngawi, "Hana na Khawsa a awm?" ni tina uhy. **11** Aw ka hqingnaak, kawtih nang ngam khak vik? Khawtih kak kawk khuiawh ngaihang tum na na awm? Bawipa awh ngaih-unaak ce ta lah, anih taw kam kyihcah hly dawngawh, ka hulkung ingkaw ka Khawsa ce.

43 Aw Khawsa, ka thymnaak ve dang sak lah, Khawsa amak sim pilnam anglakawh ka thymnaak ve nik kqawn pyi lah; qaii ak kqawnkhqi ingkaw thlakche kut khui awhkawng ni hul lah. **2** Nang taw Khawsa ka vawngcak na awm hyk ti. Ikawtih na ni qoek vik? Ikawtih ka qaalkhqi ing ni nam qap nawh ngaihkyi ing ko doena kang pla khing kaw? **3** Na vangnaak ingkaw nak awitak ce tyi nawhtaw, cekqawi ing ni sawi lah seh; cekqawi ing na awmnnaak tlang ciim na ni ceh pyi lah seh. **4** Cawhtaw Khawsa a bawkthang a awmnnaak, ka awmhlynaak ingkaw ka zeelnaak Khawsa venna cet kawng. Aw Khawsa, ka Khawsa nang ce tingtoeng ing nim kyihcah vang. **5** Aw ka hqingnaak ikaw tinawh nu nang ngam hqoeng vik? Ikawtih kak kawk khuiawh ngaihang tum na na awm? Bawipa awh ngaih-unaak ce ta lah, anih taw kam kyihcah hly dawngawh, ka hulkung ingkaw ka Khawsa ce.

44 Aw Khawsa ka ming haa ing zahawh unyng; ka pakhqi ami hqing tloek awh ak kqym awh nang ing na sai peekkhqi ce kaimih a venawh kqawn hawh uhy. **2** Na kut ing nang ngawh thlangphyn khqi tlak khqi phenh nawh ka pakhqi ce diyh sak hyk ti; thlangkhqi ce hqe nawh ka pakhqi ce kqeng sak hyk ti. **3** Zawzi ing cekkhqi a qam ce am noeng unawh, ami bantha ingawm am noeng uhy; nang ak tang ben, nang a baan, ak vang nang a haai ing ni, kawtih cekkhqi ce nang ing lungna hyk ti. **4** Nang taw ka sangpahrang ingkaw ka Khawsa na awm hyk ti, Jacob aham na noengaak awi ak pekung na awm hyk ti. **5** Namah ak caming

kaimih ing ka qaalkhqi huna nawn sak unyng; namah ang ming ing ka qaalkhqi ce leh unyng. **6** Ka licung ve am ypna nyng saw, kak zawzi ingawm amni noeng sak hy; **7** Cehlai, ka qaalkhqi khan awh noengaak ce ni pe nawk, ka thunkhakhqi ce chah phyih sak hyk ti. **8** Myngawi Khawsa awh oek qu kang nyng saw, nang ming ce kumqui dyna kyiicah kawng unyng. **9** Cehlai tuh taw ni qoek nawk ak kai dyt na ni ta hawh hyk ti; ka qaalkapkhiq ingawm am cet hain voel hyk ti. **10** Ka qaal a haiawh hu na ning thoeih sak nawk, ka thunkhakhqi ing ni him khqi pheng hy. **11** Tuu amyihna daih aham ni hlah hyt tiksaw pilnam tlhang venawh ni thek ni zak hyk ti. **12** Nak tlhangkhqi ce a phu ak zawi cana zawi hlai hyk ti, zawih phu awm am awm lawk a he hy. **13** Ka imcengkhqi am theet hly hqoeng na ni sai tiksaw, ka keng tlhangkhqi a thekha qaihnaak ni phyih sak hyk ti. **14** Pilnam anglakawh tlhang ak kqawn hly kqoeng na ni sai tiksaw; tlhang ing a lu nik kqek sih hy. **15** Na haiawh myngawi kang ming se nawk, ka haai ve chahnaak ing sing kheop hy, **16** ak che na nik kqawn seet nawk, lu lawh aham ak caika qaalkhqi a dawngawh ni. **17** Nang ce am nim hilh unyng saw na paipi awm a sawhqtat na am sai thai unyng; vemyihkhqi boeih ve kaimih a venawh pha law hy. **18** Kamik kawlungkhqi huna am thoeih nawk; kami khawkhqi awm na lam awhkawng am pleng hy. **19** Cehlai kqawng uikhqi a hqip thek thyk aham nang ing ni nam qap nawk thannaak ing ni sing kheop hyk ti. **20** Ka Khawsa ang ming ce hilh unawh qapchang khawsa a venawh kut kami phyl mantaw, **21** kawlung ak hpy zani ak simkung, Khawsa ing am hu kawm nu? **22** Cehlai, nang awh myngawi thihihaka hu unyng; him ham kawina ak awm tuu amyihna ning ngai uhy. **23** Aw Bawipa, hqyng lah! Ikawtih, na ih hy voei? Kqoek qu lah! Kaimih ve kumqui dyna koeh ni hqek khqi. **24** Ikawtih, na haai thuh nawk kaimih a kyinaak ingkaw khuikhanaak ve nam hilh hy voei? **25** Dekvai awh nung tla unawh; dek awh kami pum ve bet qu qap hawh hy. **26** Tho nawhtaw kaimih ve nik pyi khqi lah; amak dyt thai na lungnaak awh kaimih ve ni hul khqi lah.

45 Sangpahrang aham ka phawh peek awi ce kak kqawn awh ak leek cainaak ing kak kawlung phyl hy; kam lai ve caeqee ak thai tlhang a cacung na awm hy. **2** Nang taw tlhangkhqi anglakawh leek soeih hyk ti. Khawsa ing kumqui dyna zoseennaak ani peek hawh a dawngawh, na hui nam lai ce qeennaak ing caksak na awm hawh hy. **3** Aw that awm tlhang, nak zawzi ce bah lah; qypawmnaak ing thoieihcam qal lah. **4** Awitak, kawdungnaak ingkaw dyngnaak ak camping haina noengaak ingkaw qypawm doena cet nawk; nak tang kut ing kqjih ak awm ik-oeh ce dang sak lah. **5** Ak sum na la ing sangpahrang a qaalkhqi lingbyi ce kah pe poelh seitaw; pilnam tlhang ing na khawl kaina tlu seh nyng. **6** Aw Khawsa, na boei ngawihdoelh cetaw kumqui dyna cak loet kaw; awideng thymnaak sawnghqawl ce na qam sawnghqawl na awm kaw. **7** Dyngnaak ce lungna nawk ak che ce sawh na hyk ti; cedawngawh Khawsa, na Khawsa ing na thawn pyikhqik khan awh ni ta nawk zeelnaak situi ing ni syp hawh hy. **8** Na subaikhqi ce mura ingkaw thiing baw na hqim nawk; vyi a ha ing thoieihcam na ak awm sangpahrang a im awhkawh tumding awi ing nak kaw zeel sak hy. **9** Sangpahrang a canukhqi awm kqihchah ak kap nukhqi anglakawh awm uhy; nak tang benawh taw ophir sui ing ak thoieihcam qu sangpahrang a zu ce dyi hy. **10** Aw canu, ngai lah, poek nawhtaw nang haa keng lah; nak tlhangkhqi ingkaw na pa im ce hilh hlah. **11** Nak tlhang dawnnaak ing sangpahrang ce zeel sak hy; zoeksang lah, anih cetaw na boeipa na awm hawh hy. **12** Tura canu ing laksawng hawlaw nawk law kaw, tlhang boeikhqi ing nak kawngaih sai aham thoeh law kawm uh. **13** Sangpahrang canu ce a awmnaak ip khuiawh boeiba soeih na awm nawk a suisak taw sui ing tak hain hy. **14** A boe ak leek soeih suisak ing

thoeihcam qu doena sangpahrang venna ceh pyi uhy; a pyi nulak cym tloek ing bawng law unawh na venna law pyi uhy. **15** Cekkhqi ce awmhly doena law pyi unawh; sangpahrang a awmnaak ip khuiawh kun uhy. **16** Na cakhqi ing na pakhqi a hun ce hu tloep kawm usaw; cekkhqi ce na qam khuiawh boeina ta kawp ti. **17** Na sim poenaak ve chawn khawzah ing arna hilhnaak aham sai kawng nyng saw; pilnam ing nang ce kumqui ingkaw kumqui dyna nim kyiicah kawm uh.

46 Khawsa taw ningnih ang thuknaak ingkaw thaawmnaak na awm nawk, kyinaak anglakawh kawng anik bawngkung na awm loet hy. **2** Cedawngawh khawmdek ing lawha nawk tlhangkhqi ing tuicunli dung ak khuiawh tlu mai seiawm am nik kqjih tikaw. **3** Tuinu tho nawk phyl pung pung mai nawk, tuinu ang tyn awh tlhangkhqi tat nyk nyk mai seiawm am nik kqjih tikaw. **4** Khawsa a khawk bau, sawsang soeih a awmnaak hun ciim ak zeel mang sak lawngu pynoet awm hy. **5** Ce khawk bau khuiawh Khawsa taw awm hy, cedawngawh am tlu tikaw; khaw a dai awh Khawsa ing bawng kaw. **6** Penglum ing tyn nawk, qamkhqi ing zak hy; awi a hak sa awh, khawmdek a tui na zut hy. **7** Thak awm Bawipa taw ningnih a venawh awm nawk; Jacob a Khawsa taw ningnih a vawngcak na awm hy. **8** Law nawhtaw Bawipa a ik-oeih sai ve toek lah, khawmdek awh seetnaak ce hawlaw hy. **9** Khawmdek a dytnaak dyna qaal ding sak hy; licung ce hqem pe nawk caikhqi ce ek pe sak hy, phuhqakhqi ce mai awh phum pehy. **10** Awm poek poek unawh taw, kai ve Khawsa ni tice sim lah uh; pilnam anglak li awh zoeksang na awm kawng nyng saw; khawmdek awh zoeksang na awm kawng". **11** Thak awm Bawipa taw ningnih a venawh awm nawk; Jacob a Khawsa taw ningnih a vawngcak na awm hy.

47 Pilnam tlhangkhqi boeih aw, nami kut bei unawh taw; zeel doena Khawsa venawh khy lah uh. **2** Sawsang soeih Bawipa taw kqjih awm nawk, khawmdek boeih ak khan awh sangpahrang bau soeih na awm hy! **3** Pilnam tlhangkhqi ce ningnih ak kaina ta law nawk, ningnih a khawk kaina ta law hy. **4** Amah ing a lungnaak, Jacob ing a zoeksang qunaak qam ce ningnih a khawk kaina ta law hy. **5** Awmhly zeelmang ing khynaak anglak li awh Khawsa ce hang kai nawk, uut awi anglak li awh Khawsa taw hang kai hy. **6** Khawsa venawh kyiicahnaak laa sa lah uh, kyiicahnaak laa sa lah uh; ningnih sangpahrang a venawh kyiicahnaak laa sa lah uh, kyiicahnaak laa sa lah uh. **7** Ikawtih Khawsa taw Khawmdek boeih a Khawsa na awm hy saam kyiicah naak laa ce a venawh sa lah uh. **8** Pilnam ak khan awh Khawsa taw boei na awm hy; a boei ngawihdoelh ciim awh ce Khawsa taw ngawi hy. **9** Abraham Khawsa ak tlhang na ami awm dawngawh pilnam tlhang boeikhqi ing cun uhy; kawtih, aw khawmdek awhkaw sangpahrang khqi awm Khawsa koe ni; anih taw khawteh na zoeksang na awm hawh hy.

48 Bawipa taw Boeimang na a awm dawngawh, ningnih a kyiicah tyng na awm qoe hy. **2** A sangnaak awh ak leek soeih, khawmdek awmhlynaak na awm hy. Boeimang soeih sangpahrang a khawk bau taw Zaphon tlhang a sangnaak soeih Zion tlhang amyihna awm hy. **3** Khawsa taw amah a im awm nawk, amah ce vawngu na chung qu hy. **4** Sangpahrangkhqi ing za qu unawh, cem a qaal na ami ceh hain awh, **5** Anih ce hu tawk qat unawh cat uhy, kyi doena cen bang uhy. **6** Cawh ce thyn ngawng ngawng unawh, nu ca awm tlawh ing a kee amyihna awm uhy. **7** Khawlaw ben nakaw khawhli ing Tarshish awhkaw lawngkhqi a khup phlet peek amyihna cekkhqi ce hqe hyk ti. **8** Ningnih ing ning zaak amyihna, Boeimang Bawipa ningnih a Khawsa khawk bau khuiawh ni huh hawh amyihna; Khawsa

ing khawk bau ce kumqui dyna loet sak hy. **9** Aw Khawsa, na bawkim khuiawh, amak dyt thai na lungnaak ce poek unyng. **10** Aw Khawsa, namah ang ming amyihna nam kyihnaak ing khawmdek a dytnaak pha nawh, nak tang ben kut ce dyngnaak ing be loet hy. **11** Nak awidengnaak awh ce, Zion tlang ing zeel nawh, Juda khawkhqi ing amik kaw zeel hy. **12** Zion kqang cet lah, a keng kqang cet nawhtaw, qaltoeng imkhqi ce noet lah, **13** Na cadiikhqi venawh nak kqawn peek na qaal a qeh awh dek ak cawhkhqi ingkaw a khawk bau ce toek lah. **14** Ve Khawsa ve ningnih a kumqui Khawsa na awm nawh; a dyt dyna ningnih anik sawi khqi kung na awm kaw.

49 Nangmih thlangkhqi boeih aw, ve ve za unawh taw; ve khawmdek awh ak awmkhqi boeih aw ngai lah uh, **2** Ak nem ak sang, boei khawdengkhqi boeih: **3** Kam kha ing cyihnaakawi kqawn kawmsaw; kak kawlung khuiawh kaw awi ing zaksimnaak ni pe kaw. **4** Awicyih benna kang haa keng Kawng nyng saw; tingtoeng ing kak awh rylh ce kqawncaih Kawng nyng. **5** Khawnghi amak leek a pha law awh kawtih kqih nawh, qaa ak kqawn thlakche khqi – **6** a mimah a boeinaak ak ypnak thlangkhqi ingkaw a boeinaak awh ak oek qu thlangkhqi ing anik chung khoep awh kawtih kak kqih kaw? **7** U ingawm thlang a hqjngnaak am hul thai nawh anih aham Khawsa venawh hulnaak a phu awm am pe thai hy- **8** hqjng thaawngnaak a phu ve tlo soeih nawh, ikawmyih a phu pek ingawm am khoeck nawh- **9** thlang ing kumqui dy hqjng nawh ama thu naak aham. **10** Thlakcyi a thiawm thlang boeih ing hu hy; thlak qaw ikaw amak sim thlang ing ang amyihna qeeng hah unawh thlang aham nani kawn ce ami ceh taak uh. **11** A mimah ingtaw a mimah ang ming ing qamkhqi ce ta lawt hlai uhy, ami phyikhqi ni kumqui dy ami awmnaak imkhqi na awm nawh, amak dyt qoe ami cadi dyna ami awmnaak hun na awm loet hy. **12** Thlanghinqing ve, boei seiawm, am cak loet hy; qamsa ak qeeng ing ni a ming myih hy. **13** Amah ingkaw amah ak yp qunaak khqi taw cemiyihna awm kawm uh, anih ak awi cangna nawh anih a hu awh ak bat thlangkhqi awm cemiyihna awm kawm uh. **14** Tuu amyihna cekkhqi a dytnaak taw phyi mai ni, thihnaak ing a mingmih ce hqin khqi kaw. Thlak dyngkhqi ing cekkhqi ce mymcang hqit awh uk kawm usaw; cekkhqi a myi ce phyi awh ni a thu hly, a boeinaak im nu awhkawng hla hawh kaw. (*Sheol h7585*) **15** Cehlai, Khawsa ing ka hqjngnaak ve phyi khui awhkawng thaawng kawmsaw; amah a venna ni ceh pyi kaw. (*Sheol h7585*) **16** Thlang ce khawhthem zen nawh, a ip khuiawh ik-oeih a taai law awh ce koeh kqih paqap; **17** A thiawhkhaw pynoet ca awm khyn vang am ti a he hy, a taak khawhthem ing am nuk hqut tikaw. **18** A hqjng tloek awhtaw a zoseen soeih na ngai qu nawh – na boei tloek awhtaw thlang ing nim kiyih hlai hy- **19** a pakhqi a cadiil ce ni ak bawng hly lawt hy, hqjng vangnaak am hu voel qoe tikaw. **20** Zaaksmnaak taak kaana ak boei thlang taw qamsa ak qeeng ing ni a ning myih.

50 Boemang thak awm, Khawsa, Bawipa ing, khaw a lawnaak awhkawng a nung tlak dyna khawmdek ve khy nawh awi kqawn pehy. **2** Thlang dawnaka soepbit ing Zion awhkawng Khawsa ce vang law theng hy. **3** Ningmih a Khawsa ce law kawmsaw am awm dym kaw; a haaiauh mai kqawng kawmsaw, a kengsam awh khawhli ing chung kaw. **4** Khan ingkaw Khawmdek ce khy kawmsaw, ak thlangkhqi ce awi deng kaw: **5** Bulnaak ing kai ingkaw paipi ak sai hahih thlak ciim ka hoep tloek ce cawi law lah uh,” ti kaw. **6** Khawsa amah ce a thym a dawngawh, khankhqi ing a dyngnaak ce kqawn uhy. **7** Ngai lah uh, Aw ak thlangkhqi, awi kqawn law vang nyng, aw Israel, am ka ni ngaihnaak ve ni sim sak khqi lah vang: kai taw Khawsa, na Khawsa na awm nyng. **8** Ka haiawh ak awm loet bulnaak ingkaw hyih phumnaak awh am ni zi hlyk khqi nyng. **9** Na ip kai awhkaw vaitawm cai am ngoe nyng

nak khqin im awhkaw mem-cai awm am ngoe nyng. **10** Ikawtih, kqawng nakaw qamsa boeih boeih ce kai a koe ni, tlang thong oet awhkaw khqin ak taikhqi boeih awm kai a koe ni. **11** Tlang awh ak awm pha boeih boeih ce sim nyng saw, qam khuiawh kaw ik-oeih sai boeih boeih awm kai a koe ni. **12** Buh cawi nyng seiawm kak kqawn re am ngoe hy, kawtih, Khawmdek ingkaw ak khuiawh ak awm ik-oeih boeih ve kai a koe ni. **13** Vaitawm cai a sa ka ai nawh mee a thi ka aw nawh nu? **14** Khawsa venawh ymnaak bulnaak sai nawh sawsang soeih a venawh nak awikamnaak ce soep sak lah, **15** Kyinaak na huh nyn awh ce nik khy lah; kai ing ni loet sak Kawng nyng saw, cawhtaw kai ce ni zoeksang kawp ti.” **16** Cehlai, thlakche venawh, Khawsa ing: “Ka cawngpyinaak awi kqawn thainaaik ikaw na nawh, ka paipi na huiawh pha thainaak ikaw na taak? **17** Ka ni cawngpyinaak sawh na nawh na huna kak awh Kawng hyk ti. **18** Thlang quk-ai na huh awh, bawk pyi hyk ti; samphaiikhqi mi zawk qu hahih uhyk ti. **19** Nam kha ce awih che kqawnnaak na hawna nawh nam lai ce qaa kqawnnaak ing sing hyk ti. **20** Na koeinaa ce a dyt kaana kqawn seet nawh na nuca nawn ce ak che na kqawn hyk ti. **21** Vemyihkhqi boeih ve sai hlai hyk ti, ni awm taak dym nyng; nang amyihna ni ka awm lawt namih hy tinawh poek hyk ti. Cehlai, ni toel nyng saw na mik huh qoe awh dang sak lah vang nyng. **22** Nangmih Khawsa ak kqih tloek, ve ve poek lah uh, am awhtaw hulkung taak kaana ni phukkhqi vyt vyt Kawng nyng. **23** Uepmaak lucik ak sai ing kai ni zoeksang nawh, Khawsa a hulnaak kam huhnaak thai aham anih ing lam loek a bah hy.

51 Aw Khawsa, na lungnaak amak dyt thai ak caming kai ve nim neen cang lah; na thintlawhnaak ak bau soeih ing ka sai thawlhmaak ve caih law sak cang lah. **2** Kang plawng thawlhmaak ve sil law nawhtaw ka thawlhmaak awhkawng ni ciim sak lah. **3** Ikawtih, ka sai thawlhmaak ve sim nyng saw, ka thawlhmaak ve kahaiawh awm loet hy. **4** Nang ing ak kah na, nang aven doengawh, thawl hawh nawh namik huh awh ak che ik-oeih ce sai hawh vik nyng, cedawngawh awi nak kqawn awh na thymnaak ce dang nawh awi na ceknaak awh thym hyk ti. **5** Ka thang plek awhkawng thawl hawh nawh namik huh awh ak che ik-oeih ce sai hawh vik nyng, cedawngawh awi nak kqawn awh na thymnaak ce dang nawh awi na ceknaak awh thym hyk ti. **6** Nang ingtaw ak khui ben awitak doeng ngaih nawh; kawlung am cei dyt awh nang ing cyihnaak ni cawngpyi hyk ti. **7** Hyssop ing ni ciim sak nawhtaw, cawhtaw ciim hawh Kawng nyng; ni sil nawhtaw, cawhtaw vyl anglakawh bawk hawh Kawng nyng. **8** Awmhly kaw zeelhaak awi ce ning zaak sak lah; na ek sak ka quhkhqi ve zeel lah seh. **9** Ka thawlhmaak awh na haaithuh nawh kang plawng thawlhmaak ve caih law sak lah. **10** Aw Khawsa, kak khuiawh kawlung ciim sai law lah, kang myihla ve thai law sak pang lah. **11** Na ven awhkawng koeh nik khawng valh nawh nang Ciim Myihla awm koeh lo law valh cang. **12** Na hulnaak zeelhaak ce ni pe tlaih nawhtaw na nim tunaak qap aham boe ak ngai myihla ce ni pe lah. **13** Cawhtaw ik-oeih ak sai thawl thlangkhqi ce na lam cawngpyi Kawng nyng saw, thlak thawlkhqi ing na venna hlat law tlaih kawm uh. **14** Aw Khawsa, kai anik hulkung Khawsa, thi lawng sak thawlhmaak awhkawng ni hul cang lah, cawhtaw kam lai ing na dyngnaak laa ce sa kaw. **15** Aw Bawipa, ka hui ve awng law lah, cawhtaw kam kha ing nam kyihnaak ce kqawn kaw. **16** Bulnaak awh nak kaw am zeel hy, cekkaa mantaw hawlaw hawh Kawng nyng; hyih phumnaak awh awm am zeel bai hyk ti. **17** Khawsa a bulnaak khqi taw myihlak kqek ve ni; kawlung kqek nawh kawseethaak ve ni, Aw Khawsa ve ve nang ing am sit ti kawp ti. **18** Na ngaihnaak amyihna Zion ce hang leek sak nawh; Jerusalem vawng ce thawh tlaih lah. **19** Cawhtaw dyngnaak bulnaak ce awm kawmsaw nang ak khawzeelaak a

cuna hyih phumnaak ce awm hawh kaw; cekcoengawh taw na bawkthang awh vaitawm caikhqi ce nawn law hawh kawm uh.

52 Nang tha ak awm soeih, kawtih ik-oehi amak leek awh nang oek qu hy voei? Khawsa mik huh awh chah qai na ak awm nang, kawtih myngawi nang oek qu paqap? 2 Nam lai ing seetnaak doeng cai sih nawh; zawzi ak hqat thak bat amyihna awm hy, qaai kqawnnaak doeng ce sai hyk ti. 3 Ik-oehi leek anglakawh ik-oeh che ce lungna lat tiksaw, awitak kqawn anglakawh amak thym awih kqawn ce ngaih bet hyk ti. 4 Aw qaai kqawnnaak ing ak be lai! Awih tlo kqawn ce lungna hyk ti. 5 Khawsa ing kumqui plamnaaka na ni nuk thla kaw; nang ce ni qawt kawmsaw na khawngi im awhkawng nik dawk plawk kaw; na awmnaak qam awhkawng nak kqa mah na ni phu kaw. 6 Thlakdyngkhqi ing hu kawm usaw kqih kawm uh; a mingmih ing qaih na kawm usaw, vemyihna, 7 Khawsa ce vawngcak na taak kaana amah a boineaak ypna lat nawh thlang hqenaak ben awh tha ak awm thyk thlang vawh awm hy vel! tina kawm uh. 8 Cehlai, kai taw Khawsa ip khuiawh ak qah olive thing amyihna awm nyng; amak dyt thai Khawsa lungnaak ce ni kumqui ingkaw kumqui dyna ka ypnnaak. 9 Na ik-oehi sai awh kumqui dyna ni zoeksang kawng nyng saw; namah ang ming awh ngaih-unaaq ce ta kawng nyng, kawtih namah ang ming taw leek hy. Nak thlang ciimkhqi haiawh nang ce nim kyih kawng nyng.

53 Thlak qaw ingtaw ak kawk khuiawh, "Khawsa am awm hy," tihy. Vemih thlangkhqi taw ak plawcikhqi na awm unawh, a khawboe qamlang awm tyih ak awm thlangkhqi na awm uhy. 2 Zaaksimnaak ta nawh Khawsa ak sui, ak awm khoem hy voei nu tinawh, Khawsa ing khawk khan nakawng thlanghqing capakhqi ce nuk dan hy. 3 Thlang boeih ing lam awhkawng pleng unawh, a cu boeih na plawci kang hawh uhy; ik-oehi leek ak sai u awm am awm hy, u pynoet ca awm am awm hy. 4 Thlang ing phaihpi a ai amyihna kah thlangkhqi daih nawh Khawsa awm amak khy man ik-oehi che ak saikhqi ing a sim kaana awm kawm u nu? 5 Kqih hly kawi ama awmnaak awh kqih awmnaak ing sing khqi hawh hy. Nang anik tukkhqi a quhkhqi ce Khawsa ing hqej phang tleng hawh hy; cekkhqi ce chahqai phyih sak khqi hawh hyk ti, kawtih, cekkhqi ce Khawsa ing kawna am sui voel hy. 6 Aw, cawhkaw Israelkhqi hulhaak ce Zion awhkawng law lah voei! Khawsa ing ak thlangkhqi zo a seen law sak tlaih awhtaw, Jacob ing zeel seitaw Israel ing ak kaw zeel sak seh.

54 Aw Khawsa, nang ming ing kai ve ni hul lah; nak thaawmnaak ing ak thym na awi kqawn law lah. 2 Aw Khawsa, kak cykcahnaak ve za law nawhtaw; kam kha awhkaw awi ve ngai law lah. 3 Thlak changkhqi ing ni tuk unawh; qeenaaak amak ta thlangkhqi Khawsa kawna amak sui thlangkhqi ing ka hqjinggaak doen law uhy. 4 Khawsa taw anik hulkung na awm tak tak nawh; Bawipa taw kai anik dylkung na awm hy. 5 Kai anik kqawn seetkhqi ce seetnaak ing zeen kheop seitaw; na ypwamnaak ing cekkhqi ce hqe seh. 6 Na venawh kamah ak kaw sim ing bulnaak sain vang nyng; Aw Bawipa, nang ming kyiicah ve a leek dawngawh niim kyiicah vang nyng. 7 Ikwatih, anih ing ka kyinaak boeih ak khui awhkawng nik dawk nawh, ka mik ing ka qaalkhqi ce noengnaak ing toek hy.

55 Aw Khawsa, kak cykcahnaak ve ngai law lah, qeenaaak ka thoeh lawnaak ve kawna a sui kaana koh awm; 2 Ngai law nawhtaw hlat law lah. Kawpoek ing ngaih kyinaak ni pe nawh, 3 ka qaal ak awi ingkaw, thlakchekhqi amik dai sihnaak awh ly a lap na awm hqoeng nyng; kak khan awh khuihanaak pha sak unawh khawso doena ka qaalkhqi ing ni zyi uhy. 4 Kak kawlung khuiawh ka lingbyi ve khuikha zawk nawh; thihi kqihnaak ing ni

sing kheop hawh hy. 5 Kqihnaak ingkaw thynnaak ing nik chung nawh; kqih awmnaak ing ni myk kheop hawh hy. 6 Cawh, Aw, kqukkku amyihna kang hla ta lah voei nyng! Ak hla na cen nyng saw awm oehi oehi lah voei nyng – 7 Ak hla na cen nyng saw qamkoh awm lah voei nyng; 8 Hlinu ingkaw khawhli ing a phanaak voet ka awmnaak hun na ang tawnna cet lah voei nyng," ti nyng. 9 Aw Bawipa, thlak chekhqi ce lungcing haven na ta nawh, ak awih kqawnkhqi awm chum hang sak lah, khawk bau khuiawh awipungnaak ingkaw hqo ang hqjitaak hu nyng. 10 Khawmthan khawdai vawng awhkawng thlang qym uhy; ak khuiawh amak leek ingkaw amak thym poeknaak awm hy. 11 Plawcinaak ing khawk bau khuiawh bibi nawh; thekhanaak ingkaw qaai awikhqi lamkhqi awh am poet qoe hy. 12 Qaal ing anji thekhanaak mantaw, yh thai kawng nyng; qaal ing cem ni thawh sih mai seiawm, thuk taak thai kawng nyng. 13 Cehlai, kamah amyihna thlang ak awm, ka pyi, ak zoe khyt ka pyi taw nang ni. 14 Khawsa im na thlangkeng mi ceh hah awh awmhly zeel doena ka pawlneng hah ceni. 15 Thihnaak ing ka qaalkhqi ve tu qut sang mai nawh; phyi khuina a hqing a saina ceh pyi mai thawh voei uh, kawtih seetnaak ing a mingmih anglakawh awmnaak hun tahi. (Sheol h7585) 16 Cehlai, Khawsa ce khy nyng saw, Bawipa ing ni hul hy. 17 Myncang, khawmy ingkaw khawnghyp awh ce ngaih kyi doena khy nyng saw, anih ing kah awi ce za law hy. 18 Ka qaal ce doem soeih bai seiawm, kai anik tukkhqi anglak khui awhkawng a tlawh ang zak kaana ni hul hy. 19 Kumqy di boei ngawihdoelh awh ak ngawi, Khawsa ing cekkhqi ce za kawmsaw a tlawh zaak sak khqi kaw. A khawboe amak chawt man thlangkhqi ingkaw Khawsa amak kqih thlangkhqi na awm uhy. 20 Ka pyi nawn ing a pyi ce tuk nawh; a paipi ce a sawhqt na awm sak nawn paqap hy. 21 Ak awih kqawn taw sithau amyihna haal hlai saw, ak kawk khuiawh qaal tuknaak doeng awm hy; cehlai zawzikhqi ak phlawng na awm hy. 22 Na phyihqih ce Bawipa awh hal lah anih ing tha ni awm sak kaw; ak thlang dyng ce ityk awm am tluk sak kaw. 23 Cehlai, Aw Khawsa, nang ing tlak che ce seetnaak lawk-kqawng khuina nuk thla bit kawp ti; thlang thi ak hoetkhqi ingkaw qaai awi ak kqawnkhqi taw a hqinggaak pyng thym awm am hqing kaw. Cehlai kai ingtaw, nang ni ka ni ypnnaak.

56 Aw Khawsa, nim qeen cang lah, thlak chekhqi ing nik thla khqek khqek unawh; ang qui na ni tuk khqoet khqoet uhy. 2 Kai anik kqawn seetkhqi ing ang loet na ni hqutun unawh: thlang khawzah ing oek qu doena kai ni tuk uhy. 3 Kai ing kak kqih awh, namah ce ni ypnnaak vang. 4 Ak awi kam kyih peek ce, Khawsa ni, Khawsa ni ka ypnnaak; ap kqih tikawng. Ak thi thai thlanghqing ing ikaw ani tinaak tang kaw? 5 Myngawi kak awi ni hawi pe unawh; kai tlawh peek aham doen na ni teng uhy. 6 Ka hqinggaak him aham za qu unawh, ni mah unawh ka khaw kan qym halal uhy. 7 Cekkhqi ce ikawmyih na awm koeh loet sak khqi; Aw Khawsa, nak kawsonaak ing piñnam thlang zawk sak lah. 8 Ka lungnat ve khoem lah; na cak-chawti awh ka mikphli tui ve qee lah - na khoemnaak cauk awh cekkhqi ce ak awm nu? 9 Qeenaaak thoeh doena nang ka nik khy awh ka qaalkhqi ce hlat kawm uh. Cawthaw Khawsa taw kai a koe ni tice sim hawh kawng nyng. 10 Ak awi kam kyih peek ce Khawsa, ak awi kam kyihcak peek ce Bawipa ni. 11 Khawsa ce ka ypnnaak dawngawh; ap kqih kawng. Thlanghqing ing kai ikaw ani tinaak tang kaw? 12 Aw Khawsa, na venawh awi kam law nyng; ymnaak ik-oehi ce na venawh nawn law kawng. 13 Ikwatih, thihnaak awhkawng ni loet sak hyk ti, hqing vangnaak Khawsa haaiawh ka cehnakaak thai aham ka khaw ve am bah sak hyk ti.

57 Aw Khawsa, nim qeen lah, nim qeen lah, kawtih nang awh ni ka hqinggaak ang thuk. Plawcinaak ang khum hilan dy nang

hlak khuiawh thuk vang nyng. 2 Kai aham ang cainaak ak soep sak Khawsa, sawsang soeih Khawsa venawh khy nyng. 3 Anih ing khan nakawng tyi nawh kai ce ni hul hy, kai anik hqut khqek khqekkhqi ce toel hy. 4 Kai taw samthyn anglak li awm awm nyng saw; qamsak tlung anglakawh zaih nyng – ce thlangkhqi a ha taw ak hqat soeih zawzi na awm hy. 5 Aw Khawsa, khan poeng voelh dyna hak zoeksang qu lah; na boemangnaak ve khawmdek boeih ak khan awh awm lah seh. 6 Ka khaw ang awhnaak aham lawk zan law unawh kawboet doena ngam hqoeng nyng. Ka cehnaak lam awh lawk-kqawng co law hlai hy – a mimah ce lawk-kqawng awh tla lat uhy. 7 Kam thin taw cak hy, Aw Bawipa kam thin ce cak hy; tingtoeng tum nawh laa sa vang. 8 Ka hqjinggaak, hqyng lah! Tingtoeng ingkaw qaw tingtoeng nang, hqyng lah! Kai taw mymcang hqit awh hqyng hawh kawng nyng. 9 Pilnam tlhang anglak li awh, Aw Bawipa, nang ce nim kyihcrah vang. Thlanghqing lak awh nang ce laa na ni sa vang. 10 Ikawtih, na lungnaak taw bau nawh, khan hak pha hy; na ypawmnaak ing khan hak pha hy. 11 Aw Khawsa, khan poe voelh dyna hak zoeksang qu lah; na boemangnaak ve khawmdek boeih ak khan awh awm lah seh.

58 Nangmih ukkungkhqi ak thym na nu awi namik kqawn ce? Thlangkhqi anglakawh ak thym na nu awi nami deng? 2 Nak kawk khuiawh taw amak thym poek u tiksaw, nami kutkhqi ing ak che ik-oeih ni naming thoeng sak uh. 3 Thlakche taw a thang plek awhkawng lam pleng qoe hawh hy; a nu a puk khui awhkawng qaai awi kqawn doena thoek hy qoe hawh uhy. 4 Cekkhqi a chy taw khqui a chy amyihna awm nawh, ngentau a haak ak pangkhqi amyihna awm uhy, 5 Kawmih aih dyna thoemnaak ing mawk mai seiawm, 6 Aw Khawsa, cekkhqi am kha awhkaw ami haakkqi ce koeng pe leh; Aw Bawipa, samthyn a haakkqi ve ek sak kang lah. 7 Qam na ak lawng tui amyihna qeng sak bang nawhtaw; licung ami hawi awh ce ami lakkhi rem pe kang seh. 8 Kawlawk taw ang thoeih awh tui a zut noe noe amyihna, naasen ak qawk amyihna, khawmik qoe koeh hu u seh. 9 Nak amkhqi ing hling maih hlawk ang zaak hlan awh - a hqing awm ak koh awm-thlak che taw qeng bang kaw. 10 Lu lawh na awm nawh tlhak chekhqi a thi ing khaw ami silh awh ce tlhakdyngkhqi taw zeel kawm uh. 11 Cawhtaw tlhangkhqi ing; "tlhakdyng khqi taw laksawng huk cang unawh; Khawmdek awi ak dengkung awm awm cang ti maw ve" ti kawm uh.

59 Aw Khawsa, ka qaal kut khui awhkawng ni loet sak lah, kai anik qaalnaak tlhangkhqi ven awhkawng nik chung lah. 2 Ik-oeih amak leek ak sai tlhangkhqi kut khui awhkawng ni loet sak nawh tlhang a thi tui na ak ngaihkhqi kut khui awhkawng ni hul lah. 3 Kaw amyihna kai ami ni mah ce toek lah! Aw Bawipa, kaw thawlhaak awm am ka sai mai awh, tlhak tlungkhqi ing kai ni teng uhy. 4 Ka sai thawl ikaw awm am awm hlai hy, kai tuk aham oepchoeh na awm uhy. Kai hul aham tho lah; ka lynaak ve toek lah! 5 Aw Bawipa Boemang Khawsa, Israel Khawsa pilnam tlhang boeih toeil aham tho lah; Thlak chekhqi ce koeh queen qoe qoe. 6 Khawmy awh hlat law unawh, uikhqi amyihna tlhang oh doena, khawk bau khuiawh thoek uhy. 7 Am khak khui awhkawng a sa ce toek lah - ami hui awhkawng zawzi sa unawh, "U ing nik chah hly paqap?" ti uhy. 8 Cehlai, Bawipa, nang ing cekkhqi ce qaih na lah; ce pilnam tlhangkhqi ce qaih na hawh hyk ti. 9 Aw kak tha awmnaak, nang ni ka ni qeh; Aw Khawsa, nang taw kai a vawngcak na awm tiksaw, 10 Ka lungnaak Khawsa na awm hyk ti. Khawsa taw ka hai benawh cet kawmsaw kai ak che na anik kqawnkhqi ce kawqepnaak ing ni toek sak kawp ti. 11 Cehlai, kaimih a phuhqa na ak awm, Aw Bawipa, cekkhqi ce koeh him lah, kak tlhangkhqi ing cekkhqi ce qoe sak khqi nawhtaw, zawk sak lah. 12 Am kha awhkaw thawlhaak, a huikhqi awhkaw awi awh, a

mimah ang oek qunaak awh tu sak nawh lah. Ami seet lawhnaak ingkaw qaai amik kqawnnaak dawngawh, 13 Nak kawsonaak ing cekkhqi ce milh sak nawhtaw, a mami awmnaak tlhai qoe dy awh milh sak phang tlhang lah. Cawhtaw khawmdek a dytnaak dyna Khawsa ing Jacob uk hy tice sim kawm uh. 14 Khawmy benawh hlat law unawh, uikhqi amyihna tlhang oh doena, khawk bau khuiawh thoek uhy. 15 Buh sui unawh thoek uhy, amik phoen ama phyi awhtaw khy uhy. 16 Cehlai, kai ingtaw nak thaawmnaak ce laa na sa kawng nyng saw, mymcang awh na lungnaak ce laa na sa vang; kawtih nang taw ka vawngcak, kyinaak ka huh awh kang thuknaak na awm hyk ti. 17 Aw kak thaawmnaak, nang kyihcrah Khawsa, ka vawngnu na awm hyk ti.

60 Aw Khawssa, kaimih ve ni qoek khqi hawh tiksaw, kaimih ak khan awh nak kaw so hawh hy; nak kaw so hawh nawh-nim thawh tlhai lah! 2 Nang ing qam ce tlhooek tiksaw can sak thulh hawh hyk ti; ak kqek khqi ve caung tlhai lah, tlai nyk nyk hy. 3 Nak tlhangkhqi ce kawboet kyinaak ni huh sak khqi tiksaw; misur tui ni awk sak khqi nawh kami ceh am thym voel hy. 4 Cehlai, nang anik kqjikhqi ahami taw, hizan ce hak zoek tiksaw li ce dan khoep hy. 5 Nak tang kut ing ni hui khqi nawhtaw ni thaawng khqi lah, na lungnaak tlhangkhqi loet na u seh. 6 Khawsa ing a hun ciim awhkawng: "Noengnaak ing Shechem ce cun kawng nyng saw Succoth tuikaw ce tahl vang. 7 Gilead ve kai a koe ni, Monasseh awm kai a koe ni; Ephraim ve ka thi lumyk na awm nawh, Judah ve ka sawnghqawl na awm hy. 8 Moab ve kang silh qunaak beihthuk na awm nawh, Edom ak khan awh ka khawmyk khawng nyng saw; Philistia qam khan awh noengnaak ing khy nyng," tihy. 9 U ing nu khawk bau cak na anik ceh pyi kaw? U ing nu Edom na ani sawi kaw? 10 Aw Khawsa, nang ing ni qoek khqi nawh ka qalkapkhqi mi am cet hahih voel hyk ti ka ti my? 11 Qalkap tuknaak thai aham bawngnaak ni pe leh, kawtih tlhanghqing ak bawngnaak taw a phi am awm hy. 12 Khawsa ing ni noengnaak ce ka mi huh hly, anih ing ni qalkapkhqi ce a khaw ing a leh hly.

61 Aw Khawsa, kang kqangnaak awi ve za nawh taw; kak cyckahnaak awi ve ngaih lah. 2 Ikawtih, khawmdek a dytnaak nakawng nik khy nyng, kak kawlung a haal doena nik khy nyng; kai anglakawh ak sang khqoet lungnu venna ni ceh pyi lah. 3 Ikawtih, nang taw ka ning thuknaak na awm tiksaw, ka qalkapkhqi a qaltoeng ipsang na awm hyk ti. 4 Na hizan im awh kumquy di umce ngaih nyng saw nang hlak khuiawh thuk ce ngaih nyng. 5 Aw Khawsa, nang ing awi ka kam ve za hawh hyk ti; nang ming ak kqjih tlhangkhqi a qo ce ni pang sak hawh hyk ti. 6 Sangpahrang a hqing khui khawngchi ve sap pe nawh a cadiil dyna a kum sang sak lah. 7 Khawsa haiawh kumquy di boei na ngawi lah seh; na lungnaak ingkaw ypawmnaak ing anih ce hlip ak chung lah. 8 Cawhtaw nang ming kyihcrahnaak laa ce sa poepa kawng nyng saw hypoet coeng hypoet kak awikam ce soep sak kawng nyng.

62 Ka hqjinggaak ing Khawsa doek khoeih awh dymnaak hu hy; ka hulnaak awm anih aven awhkawng ni a law. 2 Anih doeng ve ka lungnu ingkaw ka hulnaak na awm hy; ahih taw ka vawngnu na a awm dawngawh, ityk awh awm am tat ti kawng nyng. 3 Thlang pynoet ce igyt dy nu na thekhanaak kaw? Anih ce ak kai na, nami det hly nawh nu vawhkaw ak tlu tawm vawng, a khanaak ak dyi tloeil ve? 4 A awmnaak hun sang awhkawng ak kaina tlaak sak aham cai unawh; qaai awi kqawn ce lungna uhy. amim kha ingtaw zoseennaak pe hlai uhy, amik kawk khui awhtaw seet lawh uhy. 5 Aw ka hqjinggaak, Khawsa doeng awh dymnaak sui lah; kang ngaih-unaak taw anih a ven doeng awhkawng ni a law. 6 Anih doeng ce ka lungnu ingkaw ka hulnaak na awm hy; anih taw ka vawngnu na a awm dawngawh ityk awh awm am tat

kawng. 7 Ka hulnaak ingkaw ka kqihchahnaak taw Khawsa awh ni ang hang hy; anih taw ka lungnu bau, kang thuknaak na awm hy. 8 Aw thlangkhqi aw, ikawmyih awh awm amah ce ypna lauh uh; amah venawh namik kawlunkhqi ce pe leh uh, kawtih Khawsa taw ningnih ang thuknaak na awm hy. 9 Ak nem na ak thangkhqi taw zilh hqoeng na awm nawk, ak sang na ak thangkhqi awm a qaa Mai ni; a khingnaak awh ni khing awh ce a hqawng na awm bawk hy nih; pak khh bawk na zilh mai ni. 10 Huhsitaak ce koeh ypna nawk quk ik-oeih awh awm koeh oek qu; na boeinaak hang taai hqui seiawm, cawh ce nak kawlung koeh ta. 11 Khawsa ing awi pynoet doeng kqawn nawk, ik-oeih pak khh doeng ni kang zaak; cetaw Aw Khawsa, nang taw nak tha awm hy tice, 12 Cawn Aw Bawipa, nang taw lungnaak na awm bai hyk ti. Nang ing thlang boeih a mimah a sainaak boeih amyihna laksawng pe qip kawp ti.

63 Aw Khawsa, nang taw ka Khawsa na na awm dawngawh nang ce ni sui khak nyng; tui a khanaak qamkoh khuiawh, ka hqingnaak ing tui na ni ngaih nawk, ka pum ing na myi kyng na hy. 2 Hun cim awh nang ce ni hu hawh nyng sawnak thaawmnaak ingkaw na boemangnaak ce toek nyng. 3 Na lungnaak ce hqingnaak anglakawh awm a leek khqoet a dawngawh, ka hui ing nang ce nim kyihtah kaw. 4 Ka hqing khuiawh nang ce nim kyihtah kawng nyng saw, nang ming awh ka kut ve phyl kawng. 5 Buh ak tui soeih ka phyi amyihna ka hqingnaak ing ak phoen phyi kawmsaw; ka hui ing laa sak doena kam kha ing nang nim kyihtah kaw. 6 Ka ikhun awhkawng nang ce ni sim loet kawng nyng saw; than zung namah ce ning ngai kawng. 7 Nang taw ka hulkung na na awm dawngawh, nang hla hlip awh namah kyihtah doena laa sa kawng. 8 Ka hqingnaak ing namah awh hawi nawk; namah ing nak tangkut ing nim tu hyk ti. 9 Kai him aham ak caikhqi ce plawci bit kawm uh; dek a dungnaak khuina nu kun bit kawm uh. 10 Zawzi ce zawk kawm usaw kqawng ui a buh na coeng bit kawm uh. 11 Cehlai, sangpahrang taw Khawsa awh zeel kaw; Khawsa ang ming phuk doena awi ak kamkhqi ing anih ce kyihtah kawm uh, Cehlai qaai awi ak kqawnkhqi am kha taw sit kaw.

64 Aw Khawsa, kang ngaih kyinaak awi ka sa awh ve, ngai law lah; kqih awm qaal anglakawhawng ka hqingnaak ve hlip chung lah. 2 Thlakchekhqi a tengnaak awhkawng ni thuh nawhtaw, khawboek chekhqi awipungkhqi ven awhkawng ni thuh lah. 3 Amim laikhqi ce zawzi amyihna taak pat la unawh, ak chy ak ngan la amyihna amik awi ing thlang hyt uhy. 4 Ak awm dym thlang ce mah unawh kaap uhy, kqihnaak taak kaana, anih ce kaap zap uhy. 5 Ak che ik-oeih poeknaak awh tha pe qu unawh, ang hypna ami dun thang akawng ce kqawn uhy; "U ing a huh tang kaw?" ti uhy. 6 Amak thym ik-oeih awh za qu unawh, "sai ham hly nik poek hloem lauh hy aa!" ti uhy. Thlanghqing ak kawlung ve qaa kqawn thai pai hy. 7 Cehlai, cekkhqi ce Khawsa ing la ing kaap kaw; kawlkalh awh cekkhqi ce kaap hawh kaw. 8 A mimah am lai ha ce hawi pek khqi khup phlet kawmsaw plawci sak khqi kaw; ak hukhqi boeih ing thekhhanaak ing a lu thlek sih kawm uh. 9 Thlanghqing boeih ing kqih hawh kawm uh; Khawsa bibi ce kqawn kawm usaw a ik-oeih sai ce poek kawm uh. 10 Thlakdyng ingtaw Khawsa awh zeel seitaw amah awh ce thuk seh; kawlung ak dyngkhqi boeih ing amah kyihtah seh!

65 Aw Khawsa, Zion awh kyihtahnaak ing nang ce ni qeh hy, nang a venawh kaimih akawi taaknaak ce soep kaw. 2 Aw nang caycahnaak awi ak za venawh, thlangkhqi boeih law kawm uh. 3 Thawlhaak ing kaimih a ni sing khqi khup awh, kaimih a ik-oeih sai thawlhaak awh queenkawh ngai hyk ti. 4 Na vawngup khuiawh ak zoena awm aham ak tykkhqi taw a zoseen hy! Na im awhkaw, na bawkim ciim awhkaw ik-oeih leekkhqi ing be unyng. 5

Nang ing dyngnaak kqih awm ik-oeih sai ing kaimih nim hlat hyk ti. Aw Khawsa kaimih hulkung, Khawmdeak a dytnaak boeih awhkaw ngaih-unaak ingkaw ak hla soeih tuicunli awhkaw ngaih-unaak; 6 Nak thaawmnaak ing mawlkhqi ak saikung, namah ingkaw namah ce tha awmnaak ing thoeih ang cam qu hyk ti, 7 Tuicunli awhkaw tuiphu ingkaw toilet thawh ak awi ak sit sakkung, pilnam thlangkhqi ak khy am kqangnaak awi ak sit sakkung na awm hyk ti. 8 Ak hla na ak awm thlangkhqi ing nak kawpoek kyi ik-oeih sai ce kqih uhy; mymcang khawkdai ingkaw khawmy ben khawtlak awh nang ing zeelaak laa sak sak hyk ti. 9 Khawk kqawng ve qeet a kawt na nawk tui ing syp hyk ti; khawzah papa na pung a tai sak hyk ti. Khawsa a lawngca lawngnukhqi awm thlanghqing a ai kawi, am ci ak ui awm sak hamna nang tui ing tui be sak hyk ti. 10 Dek nawk a qyttaak ngaw boeih ce tui bym pe sak nawk; Khawk-aa ing na syp coengawh tawi a an leek sak hyk ti. 11 Kum ce thai taknaak ing myk nawk na phyihtah vawh awm be ngen hy. 12 Qamkoh awm qam no saihim sak nawk; thlangkhqi ce awmhly zeelaak ing sing hyk ti. 13 Khawkpawi ce tuu kqeng ing sing khoep tiksaw lawng khui cengkhqi ce kym a cang ing khuk hyk ti; cekkhqi ing zeelmang laa sak ing khy uhy.

66 Dek lunglai boeih aw, zeel doena Khawsa venawh khy lauh uh! 2 Ang ming boemangnaak laa ce sa unawh taw; boemang soeih na kyihtah lauh uh! 3 Khawsa venawh, "Na ik-oeih saikhqi ve myi kqih tamzin hawh ni! Nak tha awmnaak ve a bau aih dawngawh na qaalkhqi awm na haiawh tum qu hqoeng hy. 4 Dek lunglai boeih na haiawh koep doena; na kyihtahnaak laa sa uhy, namah ang ming kyihtahnaak laa sa uhy. 5 Khawsa a ik-oeih sai ve law nawhtaw toek lauh uh, thlanghqing anglakawh a ik-oeih sai ve myikqih tamzin hawh ni! 6 Tuicunli ce khawk kqawng na coeng sak nawk, a khaw ing tui awh cet poe uhy – law lauh uh amah awh zeel lauh u sih. 7 Kumquid ayak thaawmnaak ing uk nawk, amik ing pilnam thlang boeih khoem hy – ak oelh khqi taw koch tho que voel u sih. 8 Aw thlangkhqi aw, ningnih a Khawsa ve kyihtah lauh uh, a kyihtahnaak awi ve zaak na awm lauh seh; 9 Ningnih a hqingnaak ve khoem nawk ni khawkhqi awm am bah sak hy. 10 Aw Khawsa, kaimih ve ni nym ni nai khqi hawh tiksaw; tangkamihna atui na ni hloei hawh hyk ti. 11 Thawngim khuina nik thia nawk phyihqih ce kamim ting awh ni phyih sak khqi hawh hyk ti. 12 Ka lu awh thlang ngawih law sak nawk; mai ingkaw tui awh ni ceh sak hyk ti, Cehlai khawbulh qam sainaak hun na ni ceh pyi hyk ti. 13 Hyih phum nawnnaak ing na bawkim na law nyng saw, na venawh aki a kam ce soep sak kawng nyng. 14 Kyinaak ka huh awh ka hui ing aki a kam amyihna kam kha ing awikam caksak kaw. 15 Ak plan ak tha tuu ing bulnaak lucik nawn law kawng nyng saw; vaitawm cai ingkaw mem cai ce nawn kawng nyng. 16 Nangmih Khawsa ka kqihkhqi boeih aw, law unawh taw ngai lauh uh; kai aham ik-oeih a sai law ce kqawn law lauh vang nyng. 17 Kam kha ing anih a venawh khy nyng saw: kam lai awh amah kyihtahnaak ce awm hy. 18 Kak kawlung khuiawh thlawlhnaak ka taak khak mantaw, Bawipa ing kak awi am ngai tikaw; 19 Cehlai, Khawsa ing kak awi ngai law nawk kak cycckahnaak awi ce za hy. 20 Kak cycckahnaak amak zyng sak nawk kai aham a lungnaak amak hai, khawsa venawh thangleeknaak awm seh nyng!

67 Khawsa ing nim qeen seitaw zoseennaak ni pe seh nyng, a haai ce ningnih ak khan awh vang sak seh nyng. 2 Na lamkhqi ce khawmdeak awh sim na awm seitaw, na hulnaak ce pilnam thlang ing sim seh nyng. 3 Aw Khawsa, thlangkhqi ing nang ce nim kyihtah u seh nyng; thlang boeih ing nang ce nim kyihtah u seh. 4 Pilnamkhqi ak thym na uk tiksaw, khawmdeak awhkaw thlangkhqi ce sawi hyk ti. 5 Aw Khawsa, thlangkhqi ing nang nim kyihtah u seitaw; thlang boeih ing nang ce nim kyihtah

u seh. 6 Cawhtaw khawmdeek ing ak thaith thawt sak kawmsaw, Khawsa, ningnih a Khawsa ing zoseennaak ni pe kaw. 7 Khawsa ing ningnih ce zoseennaak ni pe kawmsaw, khawmdeek a dytnaak awh ak awm thlangkhqi boeih ing anih ce kjih hawh kawm uh.

68 Khawsa tho seitaw, a qaalkhqi ce a tik a zak na awm sak seitaw; Khawsa ak sawhnaakkhqi ce a ven awhkawng cen u seh nyng. 2 Maiku ziilh ing a zawn bang amyihna, nang ing cekkhqi ce zawn bang lah; mai awh khawi-it a tle amyihna, tlakchekhqi taw Khawsa haiawh plawci u seh. 3 Cehlai, tlakdymghqi taw Khawsa haiawh zeel u seh; amik kaw awm hqa seitaw zeel u seh. 4 Khawsa venawh laa sa lah uh, ang ming kyihcahnaak laa sa lah uh, myi khan awh ak ngawi ce zoeksang uh - anih ang ming taw Bawipa ni - a haiawh zeel lah uh. 5 Pa amak takhqi aham pa na awm nawh, nuhaikhqi ak diyh pyikung na awm hy, Khawsa taw a awmnaak hun ciim awh awm hy. 6 Amah doengca ak awmkhqi ce cakaw ak kjeng na coeng sak hy, thawng ak tlakhqi ce laa sak doena ceh pyi hy; Cehlai, ak oelh ak taih ak thlangkhqi taw khawk hlawk ing a engnaak qam awh awm uh. 7 Aw Khawsa nak thlangkhqi haiawh na ceh awh, qam qamkoh awh nang ing na ceh pyi phaat awh, 8 khan nakawng khaw ce aa hy, Khawsa haiawh, Sinai tlang awhkaw ce, Khawsa, Israelkhqi Khawsa haiawh kawmdeek tyn hy. 9 Aw Khawsa, nang ing khaw khawzah aa sak hyk ti; nang ing ak hoet na qo ak pangkhqi ce caih sak pang hyk ti. 10 Nak thlangkhqi ing ce ak khuiawh awm unawh, Aw Khawsa, na khawhthem khawzah ak khui awhkawng khawdengkhqi hqin hyk ti. 11 Bawipa ing awi sa nawh, ce ak awi ak khypyi thlangkhqi ce kjeng soeih uhy. 12 Sangpahrangkhqi ingkaw qalkapkhqi ce ang tawnna cen uhy; qeh-im khui awhkaw thlangkhqi ing qaalkhqi khawhthem ce qek qu uhy. 13 Nang ing qeh-im kawt hai a venawh na ih awh ce, kai a kqukkqu ang hlakhqi ce ngun ing zawl nawh, ang hlakhqi ce sui na phla hlap hlap hy. 14 Boeimang thak awm ing sangpahrangkhqi ce qam khuiawh a thek a zaak awh ce, Zalmon awh qawhnu ak tlamiyinha awm uh. 15 Basham tlangkhqi taw cypawm tlangkhqi na awm nawh; lunkqawng ingkaw hqeng ang hqah hqoeng na Bashan tlang taw awm hy. 16 Aw lunkqawng hqoeng na ak awm tlangkhqi, uknaak aham Khawsa ing ak tyh tlang, kumqui dyna Bawipa a awmnaak hly kawi tlang ce kawtih tlae seet doena nami toek uh? 17 Khawsa a qaal tuknaak rangleng taw thong thongoet ingkaw thong zakhat dyna doem hy; Bawipa taw Sinai awhkawng amah a hun ciim na law hawh hy. 18 Hun sang na na hang kai awh ce, khawh na ak awm tamnaakhqi ce hak khyn nawh; thlangkhqi ven awhkawng laksawng ce do hyk ti, ak oelkhqi ven awhkawng zani – Aw Bawipa Khawsa, nang taw cawh ce awmnaak thai han ni. 19 Khawsa ningnih a hulkung, ningnih a phyihqih ak phi loet Bawipa venawh thangleeknaak awm seh nyng. 20 Ningmih a Khawsa taw anik hulkung Khawsa na awm hy; Rypawm Khawsa ven awhkawng thihsnaak awhkawng loetnaak ce law hy. 21 Khawsa ing a qaalkhqi a lukhqi, thawlhaaka a nawn kaana a saikhqi tloek a lu ce neet pe kaw. 22 Bawipa ing, “Bashan awhkawng a mingmih ce law pyi kawng nyng saw; tuncunli dung awhkawng a mingmih ce law pyi kawng, 23 Na qaalkhqi thi ce na khaw ing leh kawm tiksaw, na uikhqi ingawm leek pe kawm uh,” tinawh Bawipa ing kqawn hy. 24 Aw Khawsa, a ciimnaak hun na a law ingkaw ka Khawsa ka Sangpahrang a law ce hu hawh uh. 25 Haiben na laa ak sakhqi ce cet unawh, cekkhqi hu awh tingoeng ak tumkhqi cet uhy; cekkhqi anglak li awh nulaakhqi ing poeng ak beeii ce bei uhy. 26 Thlangkeng ang cunnaak awh Khawsa ce kyihcah lah uh; Israelkhqi ang cunnaak awh Khawsa ce kyihcah lah uh. 27 Benjamin phun vezit ca ing cekkhqi ce sawi nawh, Judah sangpahrangkhqi, Zebulon ingkaw Nephtali sangpahrangkhqi ing

hquut uhy. 28 Aw Khawsa, nak thaawmnaak ce khy lah; Aw Bawipa ak kjym awh na sai amyihna, nak thaawmnaak ce nim huh khqi lah. 29 Jerusalem awh na bawkim a awm dawngawh sangpahrangkhqi ing laksawng hawlaw kawm uh. 30 Paiopoeng a ding awhkaw qam saklung ce toel nawhtaw, pilnam anglakawhkw vaitawkhqi anglakawhkw vaitawmciai ce chhep lah. Ak kai na ta lah, ngun awm hawlaw na lah u seh. Qaal tuk ak ngaih soeih qaalkhqi ce thek a zak lah. 31 Izip qam nakawng dyihtingkhqi law kawm uh; Kush ing amah ingkaw amah Khawsa venawh pe qu kaw. 32 Khawmdeek awhkaw qamkhqi aw, Khawsa venawh laa sa unawh, Bawipa kyihcahnaak laa sa lah uh, 33 Syn awhkaw khan khawngi poeng awh ak ngawi a venawh, khawhum qawdewh laa awi ak sakung a venawh kyihcahnaak laa sa lah uh. 34 A qypawmnaak Isreal khqik khan awh ak awm, khan khawngi awh thaawmnaak ak ta, Khawsa ak thaawmnaak ce khypyi lah uh. 35 Aw Khawsa, na hun ciim awh nang taw kjih awm na awm hyk ti; Israel Khawsa ing thaawmnaak ingkaw sai thainaak ce ak thlangkhqi venawh pehy. Khawsa venawh thangleeknaak awm seh nyng!

69 Aw Khawsa, ni hul lah, tui ing ka hawng dy pha law hawh hy. 2 Khaw lehnaak coet amak awm dizui ak khuinna tla hawh nyng. Tuidung na nung tla nyng saw; tui ing ni zawl malh hawh hy. 3 Bawmnaak thoeh doena kak khy aih awh; kak awiqawng koh hawh hy. Khawsa ka toeknaak awh kamik awm am dang voel hawh hy. 4 Kaw am maiawh, kai anik sawhnaak thlangkhqi ve ka lu awhkaw lusam anglakawh doem khqoet uhy; amak awm qoe ikaw am maiawh kai hqe aham anik sui ka qaalkhqi kjeng soeih hy. 5 Aw Khawsa, ka qawnaak ve nang ing sim hyk ti, ka sai thawhnaak ve na hai awhkawng thuh thau na am awm hy. 6 Aw Bawipa, Boeimang Bawipa, nang awh ngaih-unaaq ak ta thlangkhqi ce kai awh kawboethaak koeh ta u seh; Aw Israelkhqi a Khawsa, nang anik suikhqi ce kai awh chahqai koeh hu u seh. 7 Ikawtih, nang awh ce kqawn setnaak kung na nawh chahnaak ing ka haai ni dah khoep hy. 8 Ka koeinakhqi venawh khin na awm nyng saw, ka nucakhqi venawh thlak ha na awm nyng; 9 Na im awh kak tha thawhnaak ing ni ai zip nawh, nang anik kqawnsetkhqi ak kqawn setnaak ce kak khan awh ta hy. 10 Buh zeih ing kqang doena kak cykcah awhtaw, kqawn setnaak ce yh thai bit kawng nyng; 11 Dip che kang byng awh ce, thlangkhqi ing lym hangnaak ni na sai uhy. 12 Vawng chawmkeng awhkaw ak ngawikhqi ing ni qaih na unawh, zuk quikhqi a qenglung taila na awm kqoeng nyng. 13 Nang nak kaw a zeel tym awh, Aw Bawipa, na venawh cykcah law nyng; Aw Khawsa, cawh ce na lungnaak awh, na hulnaak tak ing nim hlat lah. 14 Nawng khui awhkawng ni hul nawhtaw, koeh ning cum sak; kai anik sawhnaakkhqi kut khui awhkawng ni hul nawhtaw tui dung khui awhkawng ni thaawng lah. 15 Tui doem ing koeh ni sing seitaw tui dung ingawm koeh nik daih seh. Lawk-qawng ingawm am kha koeh ni khyp sih seh. 16 Aw Bawipa, na lungnaak leeknaak ing nim hlat lah; nam qeenaka bau soeih ak caming kai benna hawi qu law sang lah. 17 Na tyihzawih a ven awhkawng na haai ce koeh thuh nawhtaw; kyinaak hu vik hawh nyng, nang ing a tawnna nim hlat lah. 18 Ka venawh zoe law nawh ni hul lah; ka qaalkhqi awhkawng nang ing ni thaawng lah. 19 Kawamiyinha nik kqawn seet unawh, kaw boethaak ingkaw chahqai na ni ta uhy tice nang ing sim hyk ti; ka qaalkhqi boeih ve na haiawh ni ami awm. 20 kqawn setnaak ing kak kawlung kqek sak unawh hulkung ak taal na ni ta hyt uhy; hlang qeenkhaw ak ngai sui moe nyng, u awm am hu nyng saw, ak hloepkung sui moe nyng, u awm am awm hy. 21 Ka buh awh a hyt kha ni taak law pe unawh ka tui ngaih a sitnaak na misur tui ak thui ni pe uhy. 22 A mingmih a haiawh caboei dawn peek na ak awm ce thang na dun pe u sei taw; Khawboe set phu zawk naak ing pel na phawk pe u

seh. 23 Ami mikkhqi a mang dangnaak aham hyp pesak khqi seitaw, amim tingkhqi awm khun pek khqi loet seh nyng. 24 Cek khqik khan awh nak kawsonaak ce hawk pe lah; nak kawsonaak ak eih ing cekkhqi ce kee seh. 25 A mingmih a awmnaak ce pawng seitaw; cekkhqi a im awhkaw a u awm koeh awm voel seh. 26 Ikawth, nang ing ngawha na ai sak thlangkhqi ce the a kha na unawh nang ing tlawh na peek thlangkhqi kawng ce kqawn uhy. 27 A sai thawlhmaak ce sai thawlhmaak ing sap pe lah; nang a hulnaak ce koeh huh sak. 28 Hqjinggaak cauk awhkawng cekkhqi ce caih sak bang nawn thlakdhyngkhqi mi koeh noet sih hain. 29 Thawlhmaak ing khuikhawh nyng; Aw Khawsa, na hulnaak ing nik chung seh nyng. 30 Laa ing Khawsa ang ming ce kyihcah nyng saw zeelnaak awi kqawnnaak ing zoeksang kawng nyng. 31 Vaitawm cai anglakwah Bawipa zeel sak khqoet kawmsaw, ki ingkaw khawme ak ta vaitawm cai anglakwah Bawipa zeel sak khqoet kaw. 32 Khawdengkhqi ing hu kawm usaw zeel kawm uh. Nangmih Khawsa ak suikhqi, namik kawlung hqjeng seh! 33 Bawipa ing ak voethlauh thlangkhqiqi awi ce zaak pek khqi nawh tamnaa na ak awm thlangkhqi awm am hep hy. 34 Khan ingkaw dek ing amah kyihcah seitaw, tuicunli ingkaw ak khui awhkaw ak cawlthat khqi boeih ingawm, 35 Ikawth, Khawsa ing Zion ce hul kawmsaw Judah khawh baukhqi ce thawn tlaih kaw. Cawhtaw thlangkhqi ce ak khuiawh awm kawm usaw pang pahoei kawm uh; 36 A tyihzawihkhqi a cadiikhqi ing pang kawm usaw, ang ming ak lungnaak thlangkhqi ce a hawk khuiawh awm hawh kawm uh.

70 Aw Khawsa, kai hul aham nang hqi tawn sak lah; Aw Bawipa kai hul aham ang tawnna law lah. 2 Kai him aham anik tengkhqi ce chahqai phyi u seitaw ngaihangtum na awm u seh nyng; kai plawci sak aham ang ngaiikhqi boeih kawboet doena awm u seh. 3 Ka venawh, Aha! Ak tikhqi ce chah doena hlat tlaih u seh. 4 Cehlai nang anik sui thlangkhqi taw zeel u seitaw zoeksang na awm seh nyng!" ti u seh. 5 Cehlai, kai taw khawdeng ingkaw ak voethlauh thlang na awm nyng; Aw Khawsa, ka venawh ang tawnna law lah. Nang taw kai anik hulkung ingkaw kai anik hulkung na awm hyk ti; Aw Bawipa, koeh di lah.

71 Aw Bawipa, nang awh ni kang thuk; ityk awh awm chah qai koeh ni huh sak. 2 Na dyngnaak ing ni boem nawhtaw ni hul lah; kai benna nang haa hawi law nawhtaw ni hul lah. 3 Ka cehnaak loet aham kang thuknaak lungnu na awm nawh; kai hul aham awi pe lah, kawthi nang taw ka lungnu ingkaw kang thuknaak na awm hyk ti. 4 AW ka Khawsa, thlak thawlkhqi kut khui awhkawng ni hul lah, thlak chekhqi ingkaw tlak tlung am tunaak awhkawng ni hul lah. 5 Aw Boeimang Bawipa, nang taw kang ngaih-unaak kung na awm hyk ti, ka tawng plang awhkawng ka ypnaka na awm hawh hyk ti. 6 Ka thang plek ca awhkawng ni nang awh kang hanh qu hawh hy; nang ing ka nu puk khui awhkawng nik dawk hyk ti. Nang ve ang loet na nim kyihcah vang. 7 Thlang khawzah ang ngaihkyi naak na awm nyng. Cehlai, nang taw kang thuknaak na awm hyk ti. 8 Kam kha ve nang kyihcahnaak ing be nawk, khawngi zung na boemangnaak ce kqawn hy. 9 Ka pacawng awh ce nang ing koeh ni qoek sut; kak tha a boeih awh ce koeh ni qoeng sut. 10 Ikawth, ka qaalkhqi ing kai ama ni ngaihnaak awi kqawn unawh; kai him aham anik qehkhqi mi kut oet na hqui qu uhy. 11 Cekkhqi ing, Khawsa ing qoek hawh hy; hquut u nawhtaw tu uh, u ingawm am hul tang ti kaw," ti uhy. 12 Aw Khawsa, ak hla na koeh ni awmataak: Aw ka Khawsa, kai hul aham ang tawnna law lah. 13 Kai thawlth anik pukkhqi ce chahqai phyi u seitaw, kai a thawlth peek aham ak ngaihkhqi ce kqawn setnaak ingkaw kaw boetnaak ing sing khqi kheop seh nyng. 14 Cehlai, kai ingtaw ngaih-unaak ta loet nyng; nang ce nim kyihcah khqoet khqoet kawng nyng. 15 Kam

kha ing nang a dyngnaak ce kqawn kawmsaw, a nytahnaak am sim hqawh bai nyng seiawm, na hulnaak ce myngawi na kqawn kawng. 16 Aw Boeimang Khawsa, law nyng saw nang ak thaawm ik-oeih saikhqi ce khypyi kawng nyng; nang a koe, nang doeng a dyngnaak ce kqawn kawng nyng. 17 Aw Khawsa, ka tawng plang awhkawng nang ing ni cawngppi tiksaw, tuhngawi dy awh nang a kawpoek kyi ik-oeih saikhqi ce kqawn nyng, 18 Hang pacawng nawh ka lusam kqawk hawh seiawm, Aw Khawsa, nak thaawmnaak ce ak law hly cadilkhqi ingkaw ak law hly thlangkhqi venawh kak kqawn hlan dy, nang ing koeh ni qoek sut. 19 Aw Khawsa, ik-oeih bau soeih ak saikung, na dyngnaak ing khawngi hak pha hy, nang amyihna u nu ak awm bai? 20 Kyinaak khawzah papa ingkaw ak kha soeih khawzah na ni huh sak hawh hlai hyk ti, ka hqjinggaak ve ni pe tlaih kawp ti, dek a dungnaak a hun awhkawng ni hak dawk tlaih kawp ti. 21 Ka thangleeknaak pung law sak kawm tiksaw ni ngaih ding law sak tlaih bai kawp ti. 22 Aw ka Khawsa, na ypawmnaak awh nang ce tingtoeng ing nim kyihcah kawng nyng saw; Aw Israel a thlak ciim, qaw tingtoeng tum doena nang kyihcahnaak laa ce sa vang. 23 Nang kyihcahnaak laa ka sak awh ce ka hui ve zeel doena khy kaw. Kai ve nang ing ni, nani hul hy. 24 Kam lai ing nang a ik-oeih sai ak dyng ce khawngi zung kqawn kaw, kawthi kai tlawh peek aham ak ngaihkhqi ce chahqai phyi unawh ngaihang tumna awm hawh uhy.

72 Aw Khawsa, sangpahrang ve na thymnaak ing sing nawhtaw, sangpahrang capa ce na dyngnaak ing dah lah.

2 Anih ing nak thlangkhqi ce dyngnaak ing awi deng kawmsaw, nang a khawdeng thlangkhqi ce ak thym na awi deng kaw. 3 Tlangkhqi ing nak thlangkhqi venawh kam awmnaak hawlaw pe kawm usaw, khawmcungkhqi ing dyngnaak thlaih ce hawlaw pe kaw. 4 Thlangkhqi anglakwahkawng khawdengkhqi ce hul khqi kawmsaw ka voethlauh a cakhqi ce hul kaw; thlang ak thekhanaak khqi ve ak kai na neet kaw. 5 Khawmik ingkaw pihla a awm khui, cadi ly ing nang ce nik kqjih kawm uh. 6 Taitin ami vawk ak khan awh khak aa amyihna anih taw awm kawmsaw, dek ak syp khawk aa amyihna awm kaw. 7 Anih a awm khui taw thlakdhyngkhqi ami zo awm kawmsaw; pihla ama awm am ka dy taw khaw buh qam sai hawh kaw. 8 Anih ing caqai ben tuicunli awhkawng vang a caqai ben tuicunli dy lawngtui awhkawng khawmdek a dytnaak dyna uk kaw. 9 Qamkoh awhkaw thlangkhqi ing koep kawm usaw a qaalkhqi ing dekvai ce leek kawm uh. 10 Tarshish ingkaw khawk hla tuikeng awhkaw sangpahrangkhqi ing ik-oeih hawlaw pe kawm uh; Sheba ingkaw Seba sangpahrang qawi ing kudtokhqi pe law kawm nih. 11 Sangpahrang boeinig a haiawh koep kawm usaw pilnam ing bibi pe kawm uh. 12 Ak voethlauh ak kqangkhqi, khawdeng hulkung amak ta thlangkhqi ce hul kaw. 13 Tha amak takhqi ingkaw ak voethlauhkhqi ce qeen kawmsaw a voethlauhkhqi ce thihnaak awhkawng hul kaw. 14 Anih ing cekkhqi ce thekhanaak ingkaw hepnaak awhkawng thaawng kaw, kawthi amik huh awh cekkhqi a thi ce a phu tlo hy. 15 A hqjenglu sang seh! Shehba a sui ce anih a venawh pe u seh. Thlangkhqi ing cykcah pe loet u seitaw a poepa na zoseennaak pe u seh. 16 Qam khuiawh khaw buh qam sai seitaw, mawl ingkaw tlang boeinig a cangvui hqoeng na awm seh. Lebanon amyihna ak thaih qah seitaw; zawi khaw awhkaw taitin amyihna tai u seh. 17 Ang ming ve kumqu dyna awm poepa seitaw; khawmik a awm khuiawh awm loet seh nyng. Pilnam thlang ing anih ak caming zoseennaak hu kawm usaw, kam ak awm tloek tinawh khy kawm uh. 18 Israel Khawsa, Bawipa Khawsa venawh thangleeknaak awm seh nyng, anih doeng ing kawpoek kyi ik-oeih sai hy. 19 A boeimangnaak kumqu dyna thangleeknaak awm seh nyng; Khawmdek boeinig ve

a boeimangnaak ing be seh nyng. Amen coengawh Amen. 20 Jesse capa David ak cyckahnaak taw vawh dyt hy.

73 Kawlung ak ciim, Israelkhqi venawh Khawsa taw leek tak tak hy. 2 Cehlai, kai aham taw, ka khaw ve bah tawm ca nawh; diyh hun hlauh tawm na awm nyng. 3 Ikawtih, thlak chekhqi ami kam ak awm ce ka huh awh ak oek qukhqi ce nai haunyng. 4 Ami thi haw ce khuikha am sim voel hy; ami pumqawkhqi ami sa dip pyng pyng nawh amik tha awn hy. 5 Thlak changkhqi amyihna phiyihq am za tlaih uhy; thlanghqing tlawhnaak ing am khuikha sak khqi tlaih hy. 6 Cedawgawh oek qunaak ce aawi na awi unawh; khawboe seetraak ing theoii ang cam qui uhy. 7 Thin hqamnaak awhkawng thawlhnnaak ce law hy; qaii qawnnaak kawpoek ing a qm am ta qoe hy. 8 Kawpoek seetraak ing thlang qaih na unawh; oek qunaak ing thang the a kha na uhy. 9 Amim khakhqi ce khanna ak awm na ngai unawh, amim laikhqi ing khawmdek ik-oeih ce lo uhy. 10 Cedawgawh ak thlangkhqi ing a mimah a venna hlai unawh tui hqawng ce aw thu hqut uhy. 11 Cekkhqi ing, Ikawmyihna Khawsa ing ani sim naak kaw? Sawsang Soeih awh ak awm ce ak cyi hy voei nu?" ti uhy. 12 Thalk chekhqi taw vemyihna awm uhy – ikawmyih poeknaak awm am ta voel uhy, a boeina boei khqoet khqoet uhy. 13 Kawlung ak caihna ka taak ve a hoeina awm nawh kut sil nyng ka awm dym awm a hoeina awm hy. 14 Kharwngi zung khuikha za nyng saw; mymcang qoek awh phepnaak hu nyng. 15 Kai ing, Cemiyh na sai u vang," ka ti mantaw, na cakhqi ana zawi hawh kawng nyng. 16 Vemyihkhqi boeih ve zaaksim aham tha ka lawh awh, ka ham quh soeih hy. 17 Khawsa a hun ciim ka pha deng awh ni, a dytnaak ce kang zaksim hly hyn. 18 A plainaak a hun awh cekkhqi ce nang ing ta tiksaw; plawci aham cekkhqi ce nuk khawng hyk ti. 19 Ikawmyihna cekkhqi ce amii plawci bat paqap, kqih awmnaak ing cekkhqi ce nawi phang tlang pai hy! 20 Thlang ing a hang hyqng awh ang mang kawna awm a mang ngaih amyihna, Aw Bawipa, nang awm na hang thawh awh, cekkhqi poeknaak mailai amyihna nang ing kawna awm am ngai kawp ti. 21 Kak kawlung ko nawh kang myihla ak khuikha awh, 22 kaw awm a sim kaanaa a khat qat na awm hqoeng nyng; na haiawh qamsa myihna awm nyng. 23 Cehlai, nang a venawh awm loet nyng; nang ing ka kut kak tang benawh nim tu hyk ti. 24 Nak poek na lahnaak ing ni sawi kawm tiksaw, cek coeng awhtaw boeimangnaak khuiawh ni ceh pyi kawp ti. 25 Nang kaa taw a u nu khawk khan awh ka taak bai kaw? Nang coeng awhtaw ka ngaih ve khawmdek ing am tahi. 26 Ka pumsa ingkaw kak kawlung ve tlu mai seiawm, Khawsa taw kak kawlung thaawmnaak ingkaw ka kumqui taham na awm hy. 27 Nang a ven awhkawng ak hlakhqi boeih ce qeeng kawm usaw; na venawh ypaawm na amak awm thlangkhqi ce nang ing hqe kawp ti. 28 Cehlai, kai aham taw, Khawsa ing ak zoena awm ve nep hy. Boeimang Khawsa ce kang thuknaak hun na ta hawh nyng; na ik-oeih saikhqi boeih ce khypyi kawng nyng.

74 Aw Khawsa, kaiwthi kumqui dyna nani qoek khqi? Ikawtih na gammo a sainaak awhkaw tuukhqi khan awh nak kaw a so aih. 2 Ak qy whole kawp kawt thlang nak thlaikhqi, namah ing tlan hyk ti, nang a qo ak pang thlangkhqi na awmnaak Zion tlang ce poek cang lah thoeih ti. 3 Vawhkaw kumqui dy ak plawcikhqi, na hun ciim awh na qaalkhqi ing a hawlaw vawhkaw seetnaak boeih benna nak kaw hawi lah. 4 Nang ing kaimih na ning hqumnaak hun awh na qaalkhqi ing khy am kqang unawh; a mimah ang diyh hun simhatnaak ce ling uhy. 5 Kqawng thing ak ding khyng ce hqaica ing a hlam sih amyihna awm uhy. 6 Kut ing ami suk biit ik-oeikhqi boeih hqaica ing deh phenh uhy. 7 Na hun ciim ce dawi unawh tluk sak uhy; Nang ming a awmnaak hun ce tyih awm sak uhy. 8 Ak kawk khuiawh, "A cuna nawi hoem u sih!" ti uhy.

Qam khui awhkaw Khawsa bawknaa imkhqi boeih ce dawi uhy. 9 Kawpoek kyi hatnaak kaimih a venawh ikawmyih awm am awm hy; tawngkhqi awm am awm voel hawh nawh, handy nu vemyihna a awm khing kaw tice u ingawm am sim hy. 10 Aw Khawsa, handy awh nu na qaalkhqi ing anik kqawn set kaw? anik qaalaak ing nang ming ce kqawn seet hly let hawh unawh nu? 11 Ikawtih nak tang kut ben ce nak dawh tlaib? Na hibai ak khui awhkawng na kut ce soeng nawhtaw cekkhqi ce him hlah. 12 Cehlai, Aw Khawsa nang taw ak kqym awhkawng kai a sangpahrang na awm hyk ti; nang ing khawmdek awh hulnaak hawlaw hyk ti. 13 Nang ing ni tuicunli ce nak thaawmnaak ing pek a bo nawh, tui khuiawh ak awm qaiikhqi a lukhqi ce kqek pe sak hyk ti. 14 Nang ing ni Leviathan a lukhqi ve vyk pe kqek kqek nawh qamkoh awhkaw qamsa ham buh na be hyk ti. 15 Nang ing ni tui bym ingkaw lawngca tuikhqi phyt sak nawh; lawngnu tuipakhqj awm kak sak cup cup hyk ti. 16 Khawkdai ve nang a koena awm nawh, khawmthan awm nang a koe ni; nang ing khawmik ingkaw pihih ce sai hyk ti. 17 Nang ing ni khawmdek awhkaw a qj a mawngkhqi boeih na syn hy; khawhqai ingkaw chikca awm sai hyk ti. 18 Aw Bawipa, na qaal ing ikawmyihna ani thenaak tice sim loet lah, thlakqawkhqi ing nang ming ami seet ami bat ce. 19 Na kqukkku a hqingnaak ce qam sak tlungkhqi venawh koeh pe; namah a khawdeng khuikha thlangkhqi a hqingnaak kumqui dyna koeh hilh. 20 Na paipi ce sim lah, kaiwthi khawboe seetnaak ing qam khui awhkaw thannaak boeih ce sing hawh hy. 21 Ak khuikha thlangkhqi ak kawboet ce sing hawh hy, khawdengkhqi ingkaw ak voethlaukhqi ing nang ming ce kyihcah lah u seh. 22 Aw Khawsa, hang dyi nawhtaw na ik-oeih sai ce hul lah; thlakqawkhqi ing a poepa na ani thenaak ce sim loet lah. 23 Na qaalkhqi a tym awi ce ang ngai ngak kana koeh awm, a boet kana ak khy ak kqang na qaalkhqi ak awi ce.

75 Aw Khawsa, na venawh zeelnaak awi kqawn unyng; thlangkhqi ing nak kawpoek kyi ik-oeih sai ce kqawn uhy. 2 Nang ing, A tym ka hoep ce tyk nyng saw; kai ing ni ak thym na awi ka deng. 3 Khawmdek ingkaw thlang boeih aming thyn awh, tungkhqi ak cak na ak tu ce kai ni. 4 Ak oek qu venawh, 'Koeh oek qu voel,' tina nyng saw, thlakche venawh, nak ki koeh thawh. 5 Khan benna nak ki koeh thawh, na hawng zyng nawhtaw awi koeh kqawn," ti hyk ti. 6 Khawlaw ben nakawng ing aw khawtak ben nakawng awh aw ce am awhtaw qamkoh nakawng ing aw u ingawm thalng pynoet am zoeksang thai hy. 7 Cehlai, Khawsa ing ni awi a deng: pynoet ce tlaak sak nawh pynoet ce zoeksang hy. 8 Bawipa a kut awh misur tui ak hawm cawt cawt a bawk tui ing ak kqit ce awm hy; anih ing ce a boet ce nuk hawk hy, cawh khawmdek awhkaw thlakchekhqi boeih ing a dik a hawi mahna aw boeih uhy. 9 Kai ingtaw ve ve kumqui dyna kqawn vang; Jacob Khawsa kyihcahnaa laa ce sa vang nyng. 10 Thlakchekhqi ak ki ce hlyng pe kawng nyng saw, thlakdyngkhqi ak ki taw zoeksang pekawng.

76 Judah qam awh Khawsa ce sim unawh; Israel qam awh ang ming bau soeih hy. 2 Salem awh a hibai im ce awm nawh, Zion awmnaak hun ce awm hy. 3 Amah cawh lakhqj, phuhqa ingkaw zawzikhqi, qaal tuknaak liva sapangkhqi ce hqe pehy. 4 Nang taw vangnaak ing na qym awm soeih hy, chukpha ing ak be tlang anglakawh na qyp awm khqoet hy. 5 Am thin ak awm thlangkhqi aming zaih awh muk nawh, ih a dytnaak ing ip poe uhy; qaal tuk tha ak awmkhqi pynoet ca ingawm a kut am phyl hqa uhy. 6 Aw Jacob a Khawsa, nang ing na heph dawngawh meqang ingkaw meqang sen awm zaih hqoeng hy. 7 Nang doeng ni kqih aham na awm. Nak kaw a so awh ce na haiawh a u nu ak dyi thai kaw? 8 Khan nakawng awi dengaak ce kqawn

tiksaw, qam ing ak kqjih aih awh awm dym hy. **9** Aw Khawsa, awi deng aham na hang diyh awh ce, qam khui awhkaw khawdeng thlangkhqi hul aham cawh nang diyh awh. **10** Thlanghqingkhqj khan awh nak kawsonaa ang nam kyihcahnaak ce hawlaw nawh, nak kawsonaaq nak qoeng thoemkhqi ing thoieihcam qu hyk ti. **11** Bawipa na Khawsa venawh awi na kam ce soepkep boeih ing kqjih aham ak awm thlang a venawh laksawng ce khyn law pe u seh. **12** Anih ing ukkungkhqi ang myihla hqe pehy; Khawmdtek awhkaw sangpahrang khqi ing anih ce kqjih uhy.

77 Khawsa venawh bawmnaak thoeh doena khy nyng saw; kak awi ngaih aham Khawsa ce khy nyng. **2** Kak kawpoek a kyi awh, Bawipa ce sui nyng; khawmthan awh awm ka kut qawi ve thlak kana phyl loet nyng saw ka hqingnaak ing ngaihqep cana awm aham tha na hy. **3** Aw Khawsa, nang ce ni sim khak nyng saw, kang ko; ka poek qu hqet awh ce, kang myihla ak tha hoet hy. **4** Kamil ve ni tang sak khak tiksaw: awi ka pau kaw a ma lawnaak dyt awh kyi nyng. **5** Ak kqymkqawkhqi poek a vat sam nyng saw, ni hu ben awhkaw kumkhqi ce ka poek vat sam lah awh; **6** Khawmthan awhkaw laa ka sakkhqi ce poek hqoet nyng. Kak kawlung ing kak poek hqet awh ce kang myihla ing awi doet hy; **7** Bawipa ing kumqui dyna nik qeng hly nu? Kak khan awh ak kaw am law hly voel nawh nu? **8** Amak dyt thai a lungnaak ce ang loet na qeng hly hawh nawh nu? Ak awikam awm plal hly poe hawh nawh nu? **9** Khawsa ing qeennaak taak aham hilh hly hau hawh nawh hy voei nu? Ak kawsonaaq ing a lungqeennaak ce byp hly pe khoep hawh nawh hy voei nu?" ti nyng. **10** Cawhtaw, Vemyihna qeennaak thoeh kawng; Sawsang Soeih awh ak awm tangkut ben awhkaw kumkhqi ce, "tiawh poek nyng. **11** Bawipa a ik-oeih saikhqi ce sim loet kawng nyng saw; oeih, ma nakaw kawpoek kyi ik-oeih na saikhqi ce sim loet vang nyng. **12** Na bibinaak khqi ce poek nyng saw nak thaawm ik-oeih sai ce ak nep na poek kawng nyng. **13** Aw Khawsa, nang a lawnglamkhqi taw zawzihh hy. Ningmih a Khawsamihna ak awm ikawmyih khawsa nu a awm bai? **14** Nang Khawsa ing ni kawpoek kyi ik-oeihkhqi na sai nawh; thlangkhqi venawh nak thaawmnaak ce ang dang sak. **15** Nak thaawm ban ing nak thlangkhqi, Jacob ingkaw Joseph cadilkhi ce hul hyk ti. **16** Aw Khawsa, tuikhqi ing ni hu uhy, tuikhqi ing ni hu unawh chawi qu kawlh kawlh uhy; tuihdungkhqi awm thyn hqoeng uhy. **17** Cingmaikhqi ing tui hawk unawh, khawngchi ing hum hy; na lakhqi ing hunna haina phla hlap hlap hy. **18** Khawhum awi ce khaw na phla nawh, khawkphla ing khawmdtek ce vang sak hy; Khawmdtek ing tyn nawh thyn hy. **19** Na lam ce tuicunli dyna awm nawh, na khawleh am dang hlai hy, na cehnaak ce tuinu thingpa anglakawh awm hy. **20** Nang ing Mosi ingkaw Aaron a kut hawna nawh nak thlangkhqi ce tuu kqeng amyihna sawi hyk ti.

78 Aw kak thlangkhqi aw, ka ni cwangpyinaak ve ngai lah uh; kam kha awhkaw awi ve ngai lah uh. **2** Nyhtaahnaak ing kam kha awng kawng nyng saw, syn awhkaw ik-oeih, ang hyp ik-oeihkhqi ce kqawn law kawng. **3** Ningmih ing ning za nawh ni huhkhqi ve, ni pakhqi ing amik kqawn law ce ni. **4** A cakhqi venawh am nik phah pe hly khqi hy, ak law hly kawi cadilkhi venawh Bawipa am kyihcah hly kawi ik-oeih saikhqi, amah ak tha awmnaak, kawpoek kyi ik-oeih a saikhqi ce niit kqawn pe patoe kaw. **5** Jacob aham a hqut hly kawi awi ce pe nawh Israelkhqi anglakawh anaa awi ce caksak hy, cawlkaw anaa awi ce ningnih a pa venawh a cakhqi ami cawng sak patoe aham pehy, **6** ak law hly kawi cadil naasenkhqi ing, ak thang hly kawi naasenkhqi ingawm sim unawh, a cadilkhi venawh ak kqawn pek patoe aham pehy. **7** Cawhtaw Khawsa ce ypna kawm usaw a ik-oeih saikhqi ce am hilh voel ti kawm uh, ak awi peekkhqi ce hqut hawh kawm uh. **8** Cekkhqi taw ami pahqamkhqi amyihna am awm kawm uh -

kaw ak tiing ingkaw ak oelh taih, Khawsa venawh kawlung amak cak thlangkhqi ingkaw aming myihlakhqi awm a venawh ypawm na am awm uhy. **9** Ephraim thlangkhqi ce, li pawm mai u seiawm, qaltuknaak nyn awhtaw a huna hlat tlaih uhy. **10** Khawsa a paipi ce am ha na unawh a anaa awi a peek amyihna awm am sai uhy. **11** Kawpoek kyi ik-oeih a mingmih a venawh ang dang peek sak ce hilh uhy. **12** Izip qam zan khaw awh ami pahqamkhqi mik huh awh kawpoek kyi ik-oeih ce sai pehy. **13** Tuncunli ce pak khih na hqe phuk nawh lan hqawng awh cekkhqi ce sawi hy; tui ce ip bang amyihna dyih sak hy. **14** Dai awh cingmai ing sawi nawh than zung awh maivang ing sawi hy. **15** Qamkoh awh lungnu ce can sak nawh tuicunli zah tui ce khawzah pehy; **16** Lungnu ak kqek awhkawng tui phyt sak nawh lawngnu amyihna lawng sak hy. **17** Cehlai cekkhqi ing ak khan awh thawlak bak bakh hyn uhy, Sawsang Soeih ce qamkoh awh oelh sih hyn uhy. **18** A mimah ak phoen cawih a sitnaa qungna Khawsa ce noek a dak uhy. **19** Khawsa oelh doena, "Qamkoh awh Khawsa ing caboei dawn law hly tang nawh nu?" **20** Lungnu a vyk awh, tui cawn law nawh tui khawzah lawngca tuina lawng hy. Buh awm ni pe hly thai bai nawh nu? Ak thlangkhqi meh ak ai hly sak thai tang lawt nu?" ti uhy. **21** Bawipa ing ce ak awi ce ang zaak awh, ak kaw so hy; Jacob ak khan awh mai kqawng sak nawh, Israel ak khan awh ak kawsonaaq ce pha hy. **22** Cekkhqi ing Khawsa ce ap cang na unawh a hulaakaw awm ap cangna uhy. **23** Cehlai khan khawngchi ce awi pe nawh khan chawmkeng ce awng sak hy; **24** cekkhqi ing ami ai ham manna ce khaw na aa sak hy, khan nakawng buh ce pehy. **25** Khan ceityih a muk ce ai unawh; ami ai thai khuina buh ce pek khqi boeih hy. **26** Khan nakawng khawlaw ben khawhl ci hlah pe nawh ak thaawmnaak ing a hawt ben nakaw khaw ce hli pe sak bai hy. **27** Dekvai amyihna meh ce khaw na tlan pe sak hy, tuicunli a keng awhkaw dizui amyihna pha ce ding pe sak hy. **28** Ami awmnaak hi ipkhuikhqi na tlak pe sak nawh, hi im a ceng a awm awh awm pe sak kyang hy. **29** Ami hym ami ngaih ce a peek khqi hawh a dawngawh, a mingmih ing ami phyi aawk dyna ai uhy. **30** Cehlai ami hym buh zani ami ceataak hlanawh, amim kha awh ami pem hui awh; **31** Khawsak kawsonaaq ce cekkhqik khan awph hya ph; cekkhqik khuiawh tha ak awm soeih khqi ce thihi pe sak nawh Israel cadawngkhqi ce him pek khqi hy. **32** Vemyihna awm bai seiawm thawlak bak bakh hyn uhy; kawpoek kyi ik-oeih a sai pek khqi awh awm ap cang na bak bak hyn uhy. **33** Cedawngawh cekkhqi a khawngchi ce a sawhqat na boeih pe sak khqi nawh kum khqi ce kqij awmnaak ing boeih pe sak hy. **34** Khawsa ing cekkhqi ce ahim git awh amah ce sui uhy; cawhtaw amah a venna hlat tlaih uhy. **35** Khawsa taw a mimah a Lungnu ni tice sim unawh Sawsang soeih Khawsa taw a mingmih a hulkung ni tice sim uhy. **36** Cehlai amim kha hqoeng ing amah ce kyihcah unawh, amim lai ing a venawh ami qaai kqawn uhy; **37** a venawh amik kawlung am cak hy, a paipi sai awh ypawm na am awm uhy. **38** Cehlai anih taw qeennaak ing a be a dawngawh; cekkhqi a thawlak ce queenkawh ngai pe nawh cekkhqi ce am hqe hy. Ak kawsonaaq ce yh ngahngah nawh ak kawso a benaak amyihna am dang sak hy. **39** Cekkhqi taw pumsa, amak hlat voel hawh zilh mai ni, tice amah ing sim hy. **40** Qamkoh awh iqyt dy nu oelh unawh kqawnguh awh iqyt nu ak kaw ami seet sak ce! **41** Khawsa ce noek a dak khawthai uhy; Israelkhqi a thlakciim ce yng sak uhy. **42** Ak thaawmnaak ce am sim qoe uhy – a mingmih ak thekhanaak thlangkhqi kut khui awhkawng a hulaakaw ce. **43** Izip qam awhkaw poek kyi hatnaak ang dang sak khqi ingkaw zoan hun awhkaw ngaihyk ik-oeih a saikhqi ce. **44** Lawngukhqi ce thi na ang coeng sak a dawngawh; lawngca tuikhqi ce am aw thai voel uhy. **45** A mingmih ak cuui aham pi hlah pek khqi khawng hak nawh, a mingmih hqe aham uphyihkhqi tyih pehy. **46**

Ami locangkhqi ce khamkhokkhqi venawh pe nawh, ami bibinaak khqi ce khamkhawk peek pehy. **47** Misur a thingkhqi ce qeel ing him pe nawh thaikungkhqi awm qawhnu ing him pehy. **48** Amik khqintaikhqi awm qeel ing him pe nawh, vawk a ai amim cahkhi awm kqek mai a venawh peek pehy. **49** Cekhqi khan awh ak kaw a hlawnaak ce am dawk qoe voel hy, ak kawsonaak, yh thai na amak awm voel kawsonaak ingkaw ak kaw ama lawnaak awh - a mingmih him aham khan ceityih hloep oet ce tyih pehy. **50** A kawsonaak ham a lam ce qoek a bah nawh; cekhqi ce thihnaak awhkawng am hly kana tlawh che a venawh cekhqi ce pehy. **51** Izipkhqi ak caming boeih him pehy, Ham ipkhui awh ak awm thlanghqing ak thaih cyl khqi ce him pe boeih hy. **52** Cehlai, ak thlangkhqi cetaw tuuk kqeng amyihna khai nawh; gamkoh awhkaw tuu amyihna sawi poe hy. **53** Syngyp cana a sawi dawngawh cekhqi ing ap kqih uhy; Cehlai a qalkhoi cetaw tuicunli ing sing pe malh hy. **54** Cemiyhna cekhqi ce qam ciim a khawqi dyna sawi khqi nawh, ak tangkut ing a lawh tlang qam dyna sawi khqi hy. **55** Cekhqi haiawh pilnam thlangkhqi ce hqek pek khqi nawh ce a qam ce cekhqi venawh qo na pang sak khqi nawh: cekhqi a im awh Israelkhqi ce pah sak khqi hy. **56** Cehlai cekhqi ing Khawsa ce noek a dak unawh Sawsang Soeih ce oelh unawh; ak awipeek ce am hqut uhy. **57** Ami pakhqi mih baina ypawm na ami awm kaana cangnaak awm am ta uhy, ypnak amak cu la amyihna hlat uhy. **58** Hun sangkhqi sai unawh ak kaw so sak unawh; myi bawkaak ing tlai seet sak uhy. **59** Cekhqi ce Khawsa ing zaak awh, ak kaw so soeih hy; cedawngawh Israel ce qoeng bang tlang hy. **60** Shiloh awh thlang khqing lak awh ang dyih sak hi im awm cehta hy. **61** Ak tha awmnaak bawm ce tamna na khum sak nawh, a boeimangaak ce qaal a kut awh pehy. **62** Ak thlangkhqi ce zawzi ing him aham pe nawh; a qo ak pang hly khqik khan awh ak kawso soeih hy. **63** A tawngpalangkhqi ce mai ing daih pek khqi boeih nawh a nulakhqi ing zulawh vataaknaak a laa am sa voel uhy; **64** A khawsoeikhqi awm zawzi ing thi unawh, nulakhqi awm am kqang hqa voel uhy. **65** Cawhtaw zu ak qui a caih amyihna, Bawipa ce a ihnaak awhkawng hqyng law hy. **66** A qalkhoi ce tuk pe pheng nawh; kumqui dy awh chah qai phyikawt na tathy. **67** Cek cong awhtaw Joseph a hi im ce qoeng nawh, Epharaim a phun awm ap tyk voel hy; **68** Cehlai Judah phun, Zion tlang, amah ing a lungnaak ce tyk hy. **69** Amah ing khawmdek kumqui dy a caksak amyihna, amah cawh hun ciim ce ak sang soeih na sa hy. **70** A tyihzawih David ce tyk nawh tuu a ip khui awhkawng dawk hy; **71** Tuu ak khainaak kung awhkawng hawlaw nawh ak thlang Jacob, a qo pang Israel ce tuu ak khaikung na tathy. **72** David ing cekhqi ce kawlung dyngnaak ing qym hy; a kut suinaak ing cekhqi ce khai hy.

79 Aw Khawsa, pilnam thlangkhqi ing na qo ak pangkhqi tuk hawh uhy; na bawkim ciim ce tyih kap sak unawh, Jerusalem ce qawp sak hawh uhy. **2** Na tyihzawih thlangkhqi qawk ce khan nakaw phakhqi a buh na pe uhy; nak thlang ciimkhqi a sa ce khawmdek qamsakhqi a buh na pe uhy. **3** Jerusalem a kengsang awh tui amyihna thi ce hawk uhy, qawk ag pup hy kawi u pynoet awm am awm hy. **4** Kami kengsang awhkaw thlangkhqi a qaihbu nani kami awm hawh hy. **5** Iqyt dy nu, Aw Bawipa? Kumqui dyna nak kaw so hly hawh nawh nu? Iqyt dy nu nak thatlainaak ce mai amyihna a uih kaw? **6** Nang ama nik sim pilnam ak khan awh nak kawsonaak ce hawk lah, nang ming amak khy pilnam ak khan awh nak kawsonaak ce hawk lah; **7** kawthi cekhqi ing Jacob ce daih unawh a im a lohkhqi ce hqe pe pheng hawh uhy. **8** Ami pakhqi a thawlhaak ce kaimih koeh nik kawqut nak khqi; nam qeenaaak ing kaimih hqum aham ang tawnna law lhah seh, voet a hlauh na awm hqoeng hawh unyng. **9** Aw Khawsa kaimih a hulkung, kaimih ve ni hul khqi lah, nang ming thangleeknaak aham; namah ang

ming ak caming kaimih ve ni hul khqi nawhtaw ni thaawng khqi lah. **10** Ikwatih pilnam thlangkhqi ing, "Hana a Khawsa a awm?" ami ti hly paqap? Kaimih amik huh awh pilnam thlangkhqi a sim a kqawn unawh, na tyihzawih thlangkhqi a thi phu nang ing lo hy tice sim lah u seh. **11** Thawng ak tlakhqi ak khynaak awi ing na haai pha law seitaw; na bantha ing thiham aham ami thawlak sak ce dem sak lah. **12** Ka kengsang awhkaw thlangkhqi namah a nik thekhanaakkhqi ce a phai awh pyh ak khqih dy awh Bawipa nang ing thung lah. **13** Cawhtaw nang ak thlangkhqi, na qamno a sainaak awhkaw tuukhqi ing nang ce kumqui dyna nim kyihsah hawh kawm uh; cadil dyna nang kyihsahnaak ce kqawn kawng unyng.

80 Aw Israel tuudoenkung, tukkqeng amyihna Joseph ak sawikung ngai law lah, nang cherubim anglak li awh ngawi nawh, yang law lah. **2** Ephraim, Benjamin ingkaw Manoseh a haiawh. Nak thaawmnaak y lah; law nawhtaw kaimih ve ni hul khqi lah. **3** Aw Khawsa, kaimih ve ni thaw khqi tlaih nawh; na haai ce kaimih ak khan awh vang sak lah, cawhtaw hulna awm kawng unyng. **4** Aw Bawipa Boeimang Khawsa, ityk dy nu nak thlangkhqi ak cykcahnaak awh nak kaw a seat hly. **5** Cekhqi ce nang ing mikphili ing buh ai sak khqi hawh tiksaw; boet awh ak bena mikphili tui ce awk sak hawh hyti. **6** Ka kengsang awhkaw thlangkhqi ak Kawqepnaak na ni sai tiksaw, ka qalkhoi a qaihbu na ni sai hyti. **7** Aw Boeimang thakawm Khawsa, kaimih ve ni thaw khqi tlaih nawh; na haai ce kaimih ak khan awh vang sak lah, cawhtaw hulna awm kawng unyng. **8** Izip qam awhkawng nang ing misurkung hawlaw tiksaw; pilnam thlangkhqi na hqek boeih congawh ling hyti. **9** Ce nang lingnaak aham dek chei hqeeet hyti, aik kqa tlaih nawh qam khuiawh zam tikkaz hy. **10** Thlangkhqi ce a hliip ing dah nawh, a paangkhqi ing sidor thing tha ak awm soeih khqi awm dah tphyt hy. **11** A paangkhqi ing tuicunli pha nawh, ak kqakhqi ing lawngu tui pha hy. **12** Ak thoek cawnkhqi ing misur thaini amik bihnaka ham ikan hamna vawng na hqeq peek? **13** Kqawng nakaw vawmngaihqi ing naawh unawh kqawng nakaw chukphakhqi ing ai uhy. **14** Aw Boeimang Khawsa, kaimih benna hlat law lah! Khan nakawng ni nuk toek law nawhtaw ni hu lah! **15** Nak tangkut ing nang ling ak kqa, namah aham nam thawh ca pa ve. **16** Na misur ve chawm unawh, mai awh phum uhy; nang a toelnaak awh nak thlangkhqi plawci kang uhy. **17** Na kut ce nak tang benawh ak ngawi thlang ak khan awh tloeng pe, namah aham nang ing nam thawh thlanghqing capa ak khan awh. **18** Cawhtaw nang ce am ning hlat taak voel kawng unyng; kaimih ve ni caih sak khqi tlaih lah, cawhtaw nang ming ce nik khy hly hawh unyng. **19** Aw Bawipa Boeimang Khawsa, ak cyk awhkaw amyihna kaimih ve ni awm sak khqi tlaih lah; hulna kami awmnaak thaini aham na haai ce kaimih ak khan awh vang law sak lah.

81 Ningmih a Khawsa thak awm soeih a venawh zeel doena laa sa lah uh; Jacob a Khawsa venawh khawteh na khy lah uh! **2** Tumding tum unawh, poeng ak beej khoek lah uh, akawi ak ding tingtoeng ingkawg qaww tingtoeng ing kyihsah lah uh. **3** Pihla a thei nyn awh tuu'm cai ak ki yng unawh pihla a lum awh ce, ningnih a khawng hqyng nyn awh; **4** Ve ve Israelkhqi ham awipeek na awm hy, Jacob a Khawsa bawkaak awipeek na awm hy. **5** Ningmih ing am ning zaak sim awi ningzak naak Izip qam na a ceh awh, Joseph aham awipeek amyihna cak pe sak hy. **6** Anih ing ak phleng awhkaw phyihsah ce khoe pe nawh; ami kutkhqi ing vaihqang awm am nen sak voel nyng. **7** Ngaihkyi doena nik khy tiksaw nim hlat nyng, khawhun ak khui awhkawng nim hlat khqi nyng saw, Meribah tui awhkawng ni noekdak khqi nyng. **8** Aw kak thlangkhqi, ngai lah uh, ngaihaaknaak awi nik kqawn pek khqi vang - Aw Israel, kak awi ve ngai lah thaw voei uk ti! **9** Qap chang

a khawsa ce nangmih anglak li awh koeh ta kawm u tiksaw; thalk chang a khawsa a venawh koeh ta kawm uk ti. **10** Kai taw Izip qam awhkawng nangmih ak hquikung, Bawipa na Khawsa na awm nyng. **11** Cehlai kak thlangkhqi ing kak awi am ngai uhy; Israel ing ka venawh am ap qu uhy. **12** A mimah am thinsahaak amyihna a mimah a ngaihnaak hqut aham hlah khqi hyt nyng. **13** Kak thlangkhqi ing kak awi mah aming ngai mantaw, Israel ing ka lam ve mah a hqut mantaw, **14** a qaalkhqi ce ang tawnna noeng pe nyng saw a qaalkhqi benna ka kut ve hlah pe voei nyng! **15** Bawipa ak sawhnaak thlangkhqi ce a haiawh kqijh doena kyn hqoeng kawm uh, a mingmih a toelnaak ce kumqui dyna awm hawh kaw. **16** Cehlai nang ingtaw buh ak tui soeih ai kawm tiksaw, lungkaw awhkaw khawitui ing nak phoen ni phyi sak kawng nyng, "tihi.

82 Khawsa ing ak thlangkqeng ak cun ce hqui a sawi nawh; "Khawsa" khqi anglak li awh awi deng hy. **2** Amak thym ce ityk dy awh nu naming dyih pyi naws thlakchekhqi a haai ce iqyt dy nu nami toek kaw? **3** Tha amak awm ingkaw pa amak ta thlangkhqi ce qeet na unawh; khawdengkhqi ingkaw a khuikhakhqi a huu tyng ce huk sak uh. **4** Tha amak awmkhqi ingkaw ak voethlauhkhqi ce hul unawh; thlakche a kut khui awhkawng hul lah uh. **5** Kaw awm am sim uhy, zaaksimnaak awm am ta uhy. Than khuiawh qoe unawh; deklai ang dyih naak ing thyn naws tlaai hy. **6** Kai ing, nang taw khawsakhqi na awm uhyt ti." Nangmih taw sawsang soeih a cakhqi na awm uhyt ti." **7** Cehlai thlanghqing amyihna ni na thihi lawt hy; ukkung changkhqi amyihna ni naming tluk hly lawt hy, **8** Aw Khawsa, tho naws khawmdek ve awi deng lah, kawtih pilnam thlangkhqi ve nang a qo ak pangkhqi na ni ami awm.

83 Aw Khawsa, awi myhna koeh awm nawhtaw; Aw Khawsa, koeh awm hqoeng naws koeh awm dym lah. **2** Na qaalkhqi ikawmyihna tlawk lum lum unawh; na qaalkhqi ing ikawmyihna ami lukhqi ami thawh tice toek lah. **3** Nak thlangkhqi tuk aham thai latnaak ing za qu unawh; nang anik thin tlawhnaak thlangkhqi ce kqawn uhy. **4** Cekhqi ing, law lah uh, a phyn amilhnaak aham him usih, Israel ang ming ve u ingawm koeh zaak na voel seh," ti uhy. **5** Kawlung pynoet na awng unawh za qu uhy; nang tuk aham pynoet na hqui qu uhy. **6** Edom a hi imkhqi, Ishamael thlangkhqi, Moab ingkaw Hagar thlangkhqi; **7** Gebal, Ammon ingkaw Amelek, Philistia thlangkhqi ingkaw Tura khaw awhkaw thlangkhqi. **8** Assyria thlangkhqi ingawm bawng unawh lot a cadilkhqi ce tha awmnaak vat uhy. **9** Midian thlangkhqikhan awh na sai amyihna, Kishon lawngnu awh Sisera thlangkhqi ingkaw Jabin thlangkhqi venawh na sai amyihna, **10** Cekhqi ce Endor awh plawci kang unawh Khawmdek awh boeih a bai na awm kqoeng uhy. **11** Ak thlangkhqi ce Oreb ingkaw Zeeb amyihna sai naws, a sengpahrang a cakhqi ce Zebah ingkaw Zalmunna na coeng sak, **12** Cekhqi ing, Khawsa qammo a sainaak ce hul pe usih," ti uhy. **13** Aw ka Khawsa, cekhqi ce zilh ing a khyn boeih amyihna sai naws, zilh ing a zaawn cangihi amyihna sai lah. **14** Kqawng mai ing kqawng sak naws, tlangkhqi mai ing a uih amyihna sai lah, **15** na khawhli ing cekkhqi ce hqut naws na khawhli ing cekkhqi ce ly a lap sak lah. **16** Aw Bawipa, thlangkhqi ing nang ming ami suinaak thai aham cekkhqi a haai ce chahnaak ing dah pelah. **17** Cekhqi ing chak u seitaw kqijh phat u seh; mingseet doena geng u seh. **18** Bawipa ak mingnaak nang ce, sim sak nawhtaw - nang doeng ni khawmdek awh Sawsang soeih na nak awm tice sim na lah u seh.

84 Aw Boemang Bawipa, na awmnaak hun taw lungnaak cu soeih mah hy! **2** Ka hqingnaak ing Bawipa a ipkhui kawng ce ang ngai aih awh zai hqoeng naws, kak kawlung ingkaw ka thi ka sa ing aq hqing Khawsa ce khy hy. **3** Aw Boemang

Bawipa, ka Sangpahrang ingkaw ka Khawsa, na bawkthang a kengawh hqiqita ing za a awmnaak hu naws, a ca a taaknaak aham pingpir ingawm ang bu sawn hy. **4** Nang ang loet na nim kiyihcawh naws, na im awh ak awmkhqi taw ami zoseen hy. **5** Nang awh thaawmnaak ak takhqi ingkaw nangsawhnaak lam benna kawlung ak takhqi taw a zoseen hy. **6** Baca lawng khui ami hqaw awh awm, tuibym a awmnaak hun na ai uhy; Khawcui qawhnu ing tuili na coeng sak hy. **7** Zion awh Khawsa haiawh ami pha qip halndy thaawmnaak awhkawng thaawmnaak khqoet na cet uhy. **8** Aw Bawipa Boemang Khawsa, kak cykcahnaak ve ngai lah; Aw Jacob a Khawsa, nang haa keng law lah. **9** Aw Khawsa, kaimih a phuhqa, namah ing na caksak thlang ve kawhymnaak ing toek lah. **10** Ak chang awh kum thonguet awm anglakawh na bawkim khuiawh nynoet awm ve nep khqoet hy. Thlakchekhqi a hi im awm awm anglakawh BOIA im awhkaw chawkmeng kq qeh kungna ka awm ve nep khqoet hy. **11** Ikwatih, Bawipa Khawsa taw khawmik ingkaw phuhqa na awm naws; Bawipa ing kawhymnaaki ngkaw thangleek naak pe kawmsaw; coet a kap kaana ak cet thlangkhqi aham ik-oeih leek qoe qoe am hlawh na kaw. **12** Aw Boemang Bawipa, nang anik ypnaka thlangkhqi taw a zoseen hy.

85 Aw Bawipa, na qam khan awh nak kaw law naws; Jacob ak khan awh kam awmnaak ce pe tlaai hyt ti. **2** Nak thlangkhqi a sai palhnaak awh qeenkhaw ngai naws a thawlhnakkhqi boeih ce myk a dah pe hyt ti. **3** Nak kawsonaakkhqi boeih ce khoe tiksaw nak kaw tawinaak ce hawi taak hyt ti. **4** Aw Khawsa kaimih a Hulkung, kaimih ve ning dyih sak khqi tlaai naws, kaimih ak khan awh nak kaw ama lawnaak ce ak chang na ta mai sang. **5** Kaimih ak khan awh nak kawso hly loet hawh naws nu? Cadil dyna nak kawsonaak ce na sang hly sak naws nu? **6** Namah awh nak thlangkhqi ing zeelaak ami huhnaak thai tlaai aham, kaimih ve am nani do hlyk khqi voel hawh naws nu? **7** Aw Bawipa, amak dyt thai na lungnaak ce dang law sak cang naws, na hulnaak ce ni pek khqi sang. **8** Bawipa Khawsa ing ak kqawn hly kawi ce ngai kawng nyng, amah ing ak thlangkhqi, thlakcimkhqi venawh ngaihqeepnaak awi kam hy - cemyihkhqi ce qawnaak benna koeh mangsak voel. **9** Amah a boemangnaak ce ni qam khuiawh thlangkhqi venawh amah a hulnaak ce zoe pe sak hy. **10** Lungnaak ingkaw ypwamnaak ce hu qu nih naws; dyngnaak ingkaw qoepnaak ce mawk qu hy nih. **11** Khawmdek awhkawng ypwamnaak ce hak cawn naws, khan nakawng dyngnaak ing nuk toek hy. **12** Bawipa ing ik-oeih nep ce ni pe kawmsaw, ni qam ing ak thaih ce hawlaw kaw. **13** Dyngnaak ce a haiawh cet naws a khaw kan aham a cehnaak lam ce qoek a bah pehy.

86 Aw Bawipa, ngai law nawhtaw, hlat law lah, khawdeng na awm nyng thlang voet na awm nyng. **2** Nang ni ka ni ypnaka, ka hqingnaak ve khoem law lah. Nang taw ka Khawsa na awm hyt ti; nang anik ypnaka na tyihzawih ve hul cang lah. **3** Aw Bawipa, nim queen cang lah, khawngi zung nang nik khy nyng. **4** Na tyihzawih ve zeel sak cang lah. Aw Bawipa, na venawh ka hqingnaak hak soeng law nyng. **5** Aw Bawipa, nang taw qeenkhaw ngai thai naws leek hyt ti, nang anik khykhqi boeih a venawh na lungnaak khawzah na dang sak hyt ti. **6** Aw Bawipa, kak cykcahnaak ve ngai law lah; qeennaak thoeh doena kang kqangnaak awi ve ngai law lah. **7** Kyinaak ka huh nyn awh ce nik khy kawng nyng saw, nang ing nim hlah law kawp ti. **8** Aw Bawipa, khawsakhqi anglak li awh nang amyihna ak awm pynoet awm am awm hy; nang a ik-oeih sai ing kqawn nyt hly kawi pynoet awm am awm hy. **9** Nang ing na sai pilnam thlangkhqi ce law kawm usaw na haiawh ni bawk kawm uh, Aw Bawipa; nang ming ce thangleek sak kawm uh. **10** Ikwatih, nang taw bau soeih tiksaw kawpoek kyi

ik-oeihkhqi ce sai hyk ti; nang doeng ni Khawsa na nak awm. 11 Aw Bawipa, na lam ce ni cawng sak lah, nak awitak awh cet vang nyng; nang ming kak kqjihnaak thai aham a plawk a plak na ak awm kawlung koeh ni pe. 12 Aw Bawipa ka Khawsa, kak kawlung boeih ing nang ce nim kyiuhcang vang; nang ming ce kumqui dyna ni zoeksang kawng. 13 Ikawtih, ka venawh na lungnaak ve bau soeih hy; nang ing hlan a dungnaak awhkawng ni hul hawh hyk ti. (*Sheol h7585*) 14 Aw Khawsa, ak oek qukhqi ing kai ni tuk uhy; qeenaka amak ta thlangkhqi, nang kawna ama nik hu thlangkhqi ing kai him aham ni sui uhy. 15 Cehlai, Aw Bawipa, nang taw qeenaka ing ak be Khawsa na awm hyk ti, ak hengna kaw ak so, lungnaak ypawmnaak ing ak be na awm hyk ti. 16 Kai ben na mang law nawh nim queen cang lah; na tyihzawih nu a capa ve hul cang lah. 17 Ka qaalkhqi ing hu unawh amik chahnaak aham na leeknaak man ce ni pe lah, Aw Bawipa, nang ing nik pyi nawh kang ngaih qep law sak hawh hyk ti.

87 Anih ing a tleng ciim awh dyih hun sai hy; 2 Jacob a awmnaak hunkhqi boeih anglakawh Zion chawmkeng ce BAWPA ing lungnak khooet hy. 3 Nang a boemangaak ce kqawn uhy, Aw Khawsa a Hawk bau; 4 Kai anik simkhqi anglakawh Rahab ingkaw Babylon ce khoem kawng nyng – Philistia awm, Tura ingkaw Kush ing haih awh - Ve ak thalng taw Zion awh thang hy,” ti kawng nyng. 5 Zion awh vemyihna a nak kqawn kawm uh, “Vawhkaw ingkaw cawhkaw ce anih ing cuun nawh, Sawsang Soeih ing anih ce caksak kaw,” tinawh. 6 Thlang boeih ang ming khoemnaak cauk awh Bawipa ing “Ve ak thlang taw Zion awh thang hy,” tinawh qee kaw. 7 Tumding tum kawm usaw, “Ka zeelnaak tui bym boeih taw nang awh ni a awm,” tinawh laa sa kawm uh.

88 Aw Bawipa, kai anik hulkung Khawsa, khawmthan khawdai na haiawh khy nyng. 2 Kak cykahnaak ve na haiawh pha seitaw; kak khynaak benna nang haa keng law lah. 3 Ka hqingnaak ve kyinaak ing be nawh ka hqingnaak ve hlan ing ni a ning zoe qu hawh hy. (*Sheol h7585*) 4 Lawk-kqawng na a nuk cethkhiq ing nik dawh sih haih uhy; kai vemyih tha amak awm thlang ve. 5 Thlak thikhqi anglakawh ni hoeup unawh, thlang him unawh hlan awh ami soei amyihna, nang a khoemnaak ak khuiawh amak awm voel hawh thlangkhqi amyihna, nang ing anih ce am sim qoe voel hyk ti. 6 Lawk-kqawng ak kai dyt ak hypnaka tit tit na ti ya hyk ti. 7 Nak kawsonaak ce kak khan awh ak qih soeih na ta tiksaw; hilipu ing ce ni sing malh hyk ti. 8 Ka pyikhqi awm ni lawh pe tiksaw cekkhqi am tyih kawi na ni sai hyk ti. Nik kqyp khak tiksaw ap cawn thai nyng; 9 Kak kaw a seet aih awh ka mik qawi awm hyp kheop hawh hy. Aw Bawipa, nang ce khawngshi zung nik khy nyng saw, nang a venawh ka kut qawi ve phyl nyng. 10 Thlak thi a venawh kawpoek kyi ik-oeih nak dang sak nu? Ak thikhqi ing tho unawh nang nim kyiuhcang unawh nu? 11 Phyi awh nang a lungnaak ce amik kqawn nu; seeetnaak a hunawh nang a ypawmnaak ce amik kqawn nu? 12 Thannaak awh nang ak kawpoek kyi ik-oeih sai ce sim na ak awm nu, am awhtaw lunghlnaak qam awh nang a dyngnaak ik-oeih ai ce a mik sim nu? 13 Cehlai Aw Bawipa, qeenaka thoeh doena na venawh khy nyng, mymcang hqit awh kak cykahnaak ing na hai pha law hy. 14 Ikawtih Aw Bawipa, ni qoeng nawh, na haai na thuh hy voei? 15 Ka naasen ca awhkawng khuikha sim nyng saw thih pit dyna awm nyng; nak kqjih awmnaak zawk nyng saw kawboet ing awm nyng. 16 Nak kawsonaak ing ni sing khyngh nawh; nak kqjih awmnaak ing ni plawci sak hy. 17 Khawngzhiung tuinu amyihna nik chung khoep uhy; cekkhqi ing nik chavi malh uhy. 18 Ka pyikhqi ingkaw ka lungnaak thlangkhqi ce lo tiksaw; thannaak ve ni ak zoe khyt pyi na a awm hawh hy.

89 Bawipa a lungnaak ak bau soeih ce kumqui dyna laa na sa kawng nyng; kam kha ingkaw cadil dyna nang a ypawmnaak ce sim sak kawng nyng. 2 Nang a lungnaak taw kumqui dyna cak hy tice kqawn nyng saw, namah a ypawmnaak ce khawk khan awh caksak hawh hyk ti tice kqawn kawng nyng. 3 Nang ing Kak tyh thlang ing paipi aw nih nyng saw, ka tyihzawih a venawh awi kam hawh nyng. 4 Na cahlah qui ce kumqui dyna caksak kawng nyng saw cadil dyna na ngawihdoelh ce caksak kawng,” ti hyk ti. 5 Aw Bawipa, kawpoek kyi ik-oeih na saikhqi ce khankhqi ing kyiuhcang unawh, thlakcimkhqing cunnaak awh, nang a ypawmnaak awm kyiuhcang uhy. 6 Kawhnglik khan awh Bawipa ing nythah hly kawi u nu ak awm? Khan ik-oeih sai anglakawh Bawipamyihna u nu ak awm? 7 Thlakcimkhqing cunnaak awh khawsa ve kqjih soeih uhy; amah ak chungkhqi anglakawh amah ve kqjih awm khooet hy. 8 Aw Bawipa Boeimang thak awm Khawsa, nang amih u nu ak awm bai? Aw Bawipa, nang taw bau nawh na ypawmnaak ing nik chung hy. 9 Nang ing tuicunlikhqi ce uk tiksaw, a hak tho ce dym sak hyk ti; na baan thak awm ing, na qaalkhqi ce hqe khqi hyk ti. 10 Nang ing him na ak awm amyihna Rahab ce neet hyk ti; na baan thak awm ing, na qaalkhqi ce hqe khqi hyk ti. 11 Khan ce nang a koena awm nawh, khawmdekk awm nang a koena awm hy; khawmdekk ingkaw ak khuiawh ak awm ik-oeihkhqi boeih ce nang ing syn hyk ti. 12 A sip ingkaw a hawt ce nang ing sai tiksaw; Tabor ingkaw Hermon ing namah ang ming awh zeelnaak laa sa hy. 13 Na ban thawthaawmnaak ing be nawh; na kut ce ak tha awm hy, nak tang kut ben ce zoeksang na awm hy. 14 Dyngnaak ingkaw thymnaak ce na ngawihdoelh ang dyih hunna awm nawh; lungnaak ingkaw ypawmnaak ce na haiawh cet hy. 15 Nang a venawh zeel awi kqawn aham ak cawngkhqi taw a zoseen hy, Aw Bawipa, na haiawh vangnaak ing ak cethkhiq taw a zoseen hy. 16 Cekkhqi cetau nang ming awh nynnoet pyt zeel uhy; 17 Ikawtih, nang taw cekkhqi a thangleeknaak ingkaw thaawmnaak na awm nawh, nak kawzeelnaak ak caming kaimih ak ki ve zoeksang hyk ti. 18 Kaimih a phuhqa taw Bawipa a koe tak tak ni; kaimih a sangpahrang awm Israelkhqi ak thlangcim soeih na awm hy. 19 Namah a ypawm thlangkhqi venawh huh saknaak ing hypboet kqawn hyk ti: “Qalkap ak tlung pynoet a venawh thaawmnaak pe nyng; thlangkhqi anglakawh kawng tawngplang pynoet ce zoeksang hawh nyng. 20 Ka tyihzawih David ce hu hawh nyng; ka situi caih ing anih ce syp hawh nyng. 21 Ka kut ing dawm kawng nyng saw; ka baan ing tha awm sak kawng nyng. 22 Han a qal ingawm am kham pe sak kawmsaw; ikawmyih a thlakche ingawm am thekha na ti kaw. 23 A haiawh a qaalkhqi ce hqawi a neet pek khqi kawng nyng saw, a thunkhakhqi ce him pe kawng nyng. 24 Ka lungnaak ve ak khan awh ypawm na ta kawng nyng saw, kang ming ak caming ak ki ce zoeksang hqii na awm kaw. 25 Tuicunli ak khan awh a kut ce taak pe kawng nyng saw, pe kawng nyng. 26 Anih ing “Nang taw Ka pa, ka Khawsa, anik hulkung lungnu,” tinawh nik khy kaw. 27 Kai ing anih ce cakyk na sai kawng nyng saw, khawmdekk awh sangpahrangkhqi anglak li awh zoeksang kawng nyng. 28 A venawh lungnaak ce kumqui dyna cak pe sak kawng, a venawh paipi ka sai awm am plal tham tikaw. 29 Anih a cahlah qui ce kumqui dyna cak pe sak kawng nyng saw, khan a awm khui a ngawihdoelh ce cak pe sak kawng. 30 A cakhqi ing ka cawng saknaak awi ve cehta unawh kak awipeek ve a mami hqut awhtaw; 31 Ka awi tloepnaakkhqi ve eek unawh kak awipeekkhqi ve a mami khoem awhtaw, 32 Thingboeng ing a thawlhnakkhqi ce toel kawng nyng, a sai thawlhnakkhqi ce qawkkek ing toel kawng; 33 Cehlai ka lungnaak ce a ven awhkawng am lawh pe kawng nyng saw, ka ypawmnaak ve ityk awh awm am zawi valh ti kawng nyng. 34 Ka paipi ve am eek kawng nyng saw ka hui ing ak kqawn hawh taw

ap chawt ti kawng. 35 Ka ciimnaak ing hypboet ak khoek na awi kam hawh nyng – David a venawh qai ap kqawn ti kawng nyng. 36 Anih a cahlah qui ce awm phaat kawmsaw ka haiawh khawmik amyihna ngawihdoelh ce awm loet kaw; 37 Khanhi awh ypawm na ak awm pihla amyihna anih ce caksak loet kawng nyng.” 38 Cehlai nang ing qoek tiksaw kawna awm am ngai hyk ti; situi na syn ak khan awh nak kawso sak soeih hyk ti. 39 Na tyihzawih ing paipi na sai ce qoek pe valh nawh a boei lumy awm dekvai awh hqjt pe sak hyk ti. 40 A wavngkhqi hqe pe boeih nawh a wavng cakkhqi awm plawci sak boeih hyk ti. 41 Ak thoekkhqi ing ik-oeih qawt pe unawh; a kengsam awhkaw thlangkhqi ak kqawnseet na awm hawh hy. 42 A qaalkhqi ak tang kut ben ce zoeksang pe tiksaw; a qaalkhqi boeih ce zeel sak hyk ti. 43 Zawzi ak h qaat ben ce hawi pe khup phlet tiksaw qaal tuksaung kung awh awm am dyih pyi voel hyk ti. 44 A boeimangnaak ce dyt pe sak nawh a bi ngawihdoelh ce khawmdek na khawng pe hyk ti. 45 A tai pyngthym hui awhkaw khawngi ce tawi pe sak nawh, chah phyihnaak hi ing zawl malh hyk ti. 46 Aw Bawipa, ityk dy aw? Na haai ce na thuh hly loet hawh nawh nu? Nak kawsonaak ce mai amyihna iqyt dy a uih kaw? 47 Ka hqjinggaak ve ikawmyih dyna ang khum a zoe tive sim lawt lah. Nang ing na sai thlanghqing ve a hqawng a h qap mai ni. 48 Thihnaak amak hu thlanghqing a u mih ak thlang nu awm nawh, hlan a sai thainaak awhkawng amah ingkaw amah ak hul qu thai u nu ak awm? (**Sheol h7585**) 49 Aw Bawipa, ma nakaw na lungnaak ak bau soeih ce hana a awm, na ypwamnaak ing a tyihzawih David a venawh awi na kam ce ti? 50 Bawipa, na tyihzawih qaiuba na a awm ce sim poe nawhtaw, pilnam thlangkhqi a thekhanaak awikhqi ikawmyih dyna kak kawlung ing ang yh tice sim lawt lah. 51 Aw Bawipa, na qaalkhqi ing thekhanaak ingkaw qaihbu na ami ni sai ve, ve ing nang ing na caksak thlang ce a khaw kan boeih awh qaihbu na sai uhy. 52 Bawipa venawh thangleek naak kumqui dyna awm seh nyng! Amen coeng awh Amen.

90 Bawipa, nang taw cadil dyna kaimih a awmnaak hun na awm hyk ti. 2 Thlangkhqi a awm hlanawh lungdek ingkaw khawmdek na syn hlan awh, kumqui ingkaw kumqui dyna nang taw Khawsa na awm hyk ti. 3 Thlanghqing ce dekvai na hlat sak tlaih tiksaw, “thlanghqing cakkhqi aw, dekvai na hlat tlaih hlah uh,” tina hyk ti. 4 Kum thongoet awm nang a huh awhtaw ak khum bang khawynoet amyihna ni a awm, am awhtaw thanoet amyihna ni a awm. 5 Thlanghqing ve thihnaak awh ihnaak ing khawl bang tiksaw; mymcang awhkaw qam qai cawn thai amyihna ni a awm. 6 Mymcang hqjt awhtaw sai pai hlai uhy, khawmyi bau awhtaw zai nahn reu hy. 7 Nak kawsonaak ing kaimih ve ni ai nahn nam thin tawinaak ce kaimih aham kqjh awm soeih hy. 8 Kaimih a sai thawlhnakkhqi ce na haiawh ta nawh, kaimih anghyp thawlhnakkhqi ce na hai awhkaw vangnaak ing coei pheng hy. 9 Kaimih a khawngi boeih ve nak kawso ak kaiawh khum boeih hy; kumkhqi boeih ve ko ang kqangnaak ing dyt sak unyng. 10 Kaimih a khawngi a sang taw kum khqjhk - tha a awm awhtaw kup kqetkip pha thai mai hy; Cehlai ce ak khuiawh ak leek soeih zani kyinaak ingkaw kawseetnaak hqoeng ni, ang tawnna khum bang nawh, ding bang unyng. 11 Nang ak kawso thaawmnaak ce u ing a sim? Ikawtih nang ak kawsonaak ve kqjh hly kawi dyna bau soeih ky. 12 kawlung cyihnaak kami huhnaak thah am, hqjinggaak khawngi ak thym na noet thainaak ce ni cawngpyi lah. 13 Aw Bawipa, ngai qu dawn cang! Ikhoet nu nak kaw a so hyn kaw? Na tyihzawihkhqi ak khan awh qeennaak ta cang. 14 Na lungnaak amak dyt thai ing mymcang awm ni phyi sak khqi nawh, cawhtaw zeelnaak laa sa kawng unyng saw ka hqjinggaak pyt kamik kaw zeel kaw. 15 Khawngi khawqyt nani khuikha sak khqi hawh amyihna kawzeelnaak ni pek khqi lawt lah, kawthum

khawqyt awh kyinaak hu hawh unyng. 16 Na ik-oeih sai ce na tyihzawihkhqi venawh dang sak nawh, na boeimangnaak ce na cakkhqi venawh dang sak lah. 17 Ningmih a Bawipa Khawsa ak kawzeelnaak ce ningnih ak khan awh awm seh nyng; kaimih a kut bibi ve cak law sak lah.

91 Sawsang soeih a awmnaak hun awh ak awm taw Boeimang thak awm a hlip awh dym kawm uh. 2 Bawipa, Anih taw khang thuknaak ingkaw ka vawngcak, ka ypnana Khawsa na awm hy,” ti kawng nyng. 3 Anih ing pha aham dawng dun peek a kut khui ingkaw thihnaak tlawhnu khui awhkawng ni loet sak kaw. 4 Anih ing ahl ing ni hlip kawmsaw, ang hlak kep awh dymnaak hu kawm uk ti; anih a ypwamnaak ce nang a phuhqa ingkaw kqangdan na awm kaw. 5 Than kqjh awm awm ap kqjh kawp ti, dai awh ak ding thai awm ap kqjh kawp ti. 6 Khawmthan awh ak thoek tlawhpui awm ap kqjh voel ti kawp ti, khawnghyp awh ak law thihnaak awm ap kqjh ti kawp ti. 7 Na venawh thlang thawngqha tlu u seiawm, nang a ven am pha qoe kaw. 8 Namik doeng ing toek hqoeng kawm tiksaw thlakchekhqi shepnaak ce hu kawp ti. 9 Sawsang Soeih ce na awmnaak hun na na taak awhtaw – kai khang thuknaak, Bawipa ce – 10 Tlawhnaak qoe qoe ing am ni pha tikaw, ikawmyih a seetnaak ingawm na hi im am pha law ti kaw. 11 Ikawtih na cehnaka a hoeiawh anik awmpyi aham ak khan na cehnaka a hoeiawh anik awmpyi aham ak khan ceityikhqi ce awi pe kaw. 12 Lung awh na khaw am na sukaak aham cekkhqi ing na kut awh ni hak pawm kawm uh. 13 Sendieh ingkaw ngentau ce leh kawm tiksaw; samthynn ak bau soeih ingkaw khuih bau ce nawi kawp ti. 14 Ikawtih Bawipa, Kai ani lungnaak dawngawh, hul kawng nyng; kang ming ce a sim dawngawh, hlip a chung kawng nyng. 15 Kai ce nik khy kawmsaw, kai ing hiat kawng kyinaak a hu awh ce awmpyi kawng nyng saw, ka hul coengawh zoeksang kawng nyng. 16 Hqjnglung sangnaak ing ngaihqep sak kawng nyng saw ka hulnaak ce huh sak kawng nyng.

92 Bawipa kyihcah ve nep nawh, Aw sawsang soeih, tumding ing nang ming kyihcah ve leek hy, 2 mymcang awh na lungnaak kqawn nawh than awh na ypwamnaak kqawn ve nep hy, 3 A qui pahqa ak law tingtoeng ingkaw qaw tingtoeng ing nang ming kyihcah ve nep hy. 4 Aw Bawipa, na ik-oeih sai ing ni zel sak hyk ti; na kut sai awh zeelnaak laa sa nyng 5 Aw Bawipa, na ik-oeih sai ve bau soeih nawh, nak poeknaak awm dung soeih hy! 6 Poeknaak amak takhqi ing ce ce am sim uhy, thlakchekhqi ing am zasim bai uhy, 7 thlakchekhqi taw qam amyihna cawn nawh ik-oeih amak leek ak saikhqi ing qoeng a taai mai u seiawm, kumqui dyna plawci kawm uh. 8 Cehlai Bawipa, nang taw kumqui dy zoeksang na awm hyk ti. 9 Aw Bawipa, na qaalkhqi, na qaalkhqi bai taw plai a tham ngai kawm uh; ik-oeih che ak saikhqi boeih taw a kqeng a zang na awm ngai bit kawm uh. 10 Vaitawm cai ak ki amyihna kak ki ve zoeksang tiksaw; situi leek ing ni syk hyt. 11 Ka thunhakhhqi noeng na ami awm ce ka mik ing hu nawh; ka qaal thlakchekhqi ing cen khawng hly tice kang haa ing za hawh hy. 12 Thlakdying taw that thing amyihna taai kawmsaw. Lebanon awhkaw sidar thing amyihna a taai nep kaw; 13 Bawipa a ipkhuiawh ling na ak awm taw, ningnih a Khawsa a vawngup khuiawh taai hqui kaw. 14 Pacawng nawh kum a sang coengawh awm qah bak bak kaw, a hqjng sup na awm loet kaw, 15 Bawipa taw thlakdying ni; anih taw ka lungnu na awm nawh, anih awh seetnaak ve tehca awm am awm hy,” tinawh kqawn kaw.

93 Bawipa taw boei na ngawi nawh, qypawmnaak ing thoeihcam quhy; Bawipa taw qypawmnaak ing thoeihcam qu nawh thaawmnaak ing myk ang dah qu hy. Khawmdek ve ak cak na dyih sak nawh; am thoeih qoe hy. 2 Na boei ngawihdoelh ce ak

kqym awhkawng caksak cena awm hawh hy; nang taw kumqui awhkawng awm hawh hyk ti. 3 Aw Bawipa, tuicunlikhqi hak zoek qu hy, tuicunlikhqi ing ak awi y uh; tuicunlikhqi ing tuibak awi y uh. 4 Tui ak awi ak hum anglakawng awm khan ben nakaw Bawipa taw ak tha awm khqoet hy. 5 Nak awipeekkhqi ce ak cak na dyi nawh; Aw Bawipa, cimnaak ing na im ce a dyt ka qoena thoeihcam loet hy.

94 Aw Bawipa, lu ak lokung Khawsa, lu ak lokung Aw Khawsa, vang pheng lah. 2 Aw Khawmdek awi ak dengkung, tho lah; ak oek qukhqi ce a nai a koem na thung lah. 3 Thlakchekhqi iqyt dy, Aw Bawipa, thlakche khqi iqyt dy ami hoel poeng kaw? 4 Oek qunaak ak awi sa unawh; thlakchekhqi ing oek qunaak ak awi ing be uh. 5 Aw Bawipa, nak thlangkhqi ce phep a re unawh; na qo ak pangkhqi ce the a kha na uh. 6 Nuhaihkhqi ingkaw khinkhqi ce him unawh, pa ak naikhqi ce him uh. 7 Bawipa ing am hu hy; Jacob a Khawsa ing kawna am sui hy," ti uh. 8 Nangmih thlang khqing lak awh poeknaak amak takhqi aw, poek hqeet lah thaw voei uk ti; nangmih thlakqaw tloek aw, ityk awh nami cyih kaw? 9 Haa ja saikung ing am za hawh nu? Mik ak saikung ing am hu hly hawh nu? 10 Pilnam thlang ak cawngpyikung ing am toel hly hawh nu? Thlang ak cawngpyikung ce cyihnaak voet nawh hy voei nu? 11 Thlangkhqing ak kawpoek Bawipa ing sim nawh; cekkhqi taw zilh mai ni nice sim hy. 12 Aw Bawipa, nang ing nam cuuk thlangkhqi taw a zoseen hy, nang a anaa awi ak cawngkhqi taw a zoseen hy; 13 thlakche aham lawk-kqawng ak co na a awm hlan dy kyinaak khawnghi ak khui awhkawng cekhqi ce hawih khangnaak pe hyk ti. 14 Ikawtih, Bawipa ing ak thlangkhqi cetaw am qoek tang; a qo ak pang hly tyng thlangkhqi ce am hilah tikaw. 15 Awidengnaak ce dyngnaak awh awm kawmsaw, kawlung ak dyng thlangkhqi boeih ing ce e hqut kawm uh. 16 Thlakche ak tuk aham ka ham u nu ak dyi kaw? Ik-oeh che ak saikhqi ce u ing nu a oehl law lah voei? 17 Bawipa ing ama nik pyi mantaw, thiinhaak dek khuiawh ni ka awm hly hawh hy. 18 Kai ing, Ka khaw bah hy," ka ti awh ce, Aw Bawipa, na lungnaak ing nim thaws hy. 19 Ka kawpoek a kyi soeih awh, nang ngaihqepnaak ing ka hqingnaak zeel sak hy. 20 Ak awi tlyhnaak ing kyinaak pe nawh, ak plawci thai boei ngawihdoelh ingkaw nang anglakawng phaquaak ak awm hly thai aw? 21 Cekhqi ing za qu unawh thlakdyng ce tuk uh, ak awm dym ce thih ham dyna dawk sak uh. 22 Cehlai Bawipa taw kai a vawngbau cak na awm nawh, kai kang thuknaak lungnu taw Khawsa ni. 23 Cekhqi a thawlhmaak ce thung pe kawmsaw ak che sainaak awh cekkhqi ce hqe kaw; Bawipa ningnih a Khawsa ing cekkhqi ce hqe kaw.

95 Law lah uh, Bawipa venawh zeelnaak laa sa lah usih; ningnih a bulnaak lungnu venawh khawteh na khy lah usih. 2 Zeelnaak awi kqawn doena a venawh cet unawh taw tumding ing laa sak doena zoeksang lah usih. 3 Ikawtih Bawipa taw boemang soeih Khawsa na awm nawh, khawsa boeih ak khan awh Sangpahrang ak bau soeih na awm hy. 4 A kut awh dek ak dung soeih khqi ce awm nawh, tlangsawmkhqi awm amah a koena awm hy. 5 Tuicunlikhqi awm amah ing a sai dawngawh, amah a koena awm hy, a kut ing kawngceng awm sai bai hy. 6 Law lah uh, amah bawk doena koep lah usih, ningnih anik saikung Bawipa haiawh khuk sym lah usih, 7 anih taw ningnih a Khawsa na awm nawh, ningnih taw a qamno a sainaak awhkaw thlangkhqi na ni awm uh, amah ing ak khai tutkkqeng na ni awm uh. Tuhngawi awh ak awi naming zaak awhtaw, 8 Meribaha awh na mik kaw ting sak unawh, Massah khawnghi awh qamkoh awhkaw nam si amiyihna na mik kaw koeh ting sak voel uh, 9 Ka ik-oeh sai hu hawh hlae uh, cawh ce ne paikhqi ing ni noekdak uh. 10 Ikawtih kum phlikip khuiawh cekkhqik khan awh kak kaw so hy; "Ve ak

thlangkhqi ve kawlung ak plengkhqi, ka lam amak sim thlangkhqi ni," ti nyng. 11 Cedawngawh kawso doena "Vekkhqi ing ityk awh awm kang dymnaak awh am kun hly thai uh," tinawh awi kam nyng.

96 Bawipa venawh lak thai sa unawh; khawmdek thlangkhqi boeih aw, Bawipa venawh laa sa lah uh. 2 Bawipa venawh laa sa unawh, ang ming ce kyiuhciah lah uh; nynnoet coeng nynoet awh a hulnaak ce kqawn lah uh. 3 Pilnam thlang anglakawng a boemangnaak ce khypyi unawh, thlang boeih a venawh kawpoek iki ik-oeh a sai ce kqawn lah uh. 4 Ikawtih Bawipa taw a mang soeih a dawngawh kyiuhciah aham tyng hy; khawsa boeih anglakawng kqih aham awm hy. 5 Ikawtih pilnam thlangkhqi a Khawsa taw myi sai mai ni, Cehlai Bawipa ingtaw khan ce sai hy. 6 Boemangnaak ingkaw qypawmnaak ce a haiawh awm nawh; a hun ciim awh thaawmnaak ingkaw boemangnaak ce awm hy. 7 Aw pilnam cakawkhqi boeih aw, Bawipa ce sim unawh, Bawipa venawh boemang thaawmnaak ce pe lah uh. 8 Bawipa venawh ang ming boemangnaak pe unawh; ik-oeh nawn hly kawi khyn doena a bawkim vawngup khuiawh law lah uh. 9 Ak ciim ik-oehing thoeihcam qu unawh Bawipa ce bawk lah uh; Khawmdek thlangkhqi boeih aw, a haiawh thym lah uh. 10 Pilnam thlang anglakawng, "Bawipa taw boei na ngawi hy," tinawh kqawn uh. Khawmdek ve ak cak na ang dyih sak dawngawh am thoeih que voel hy; anih ing Khawmdek thlangkhqi ce ang myihlip na awi deng kaw. 11 Khan zeel seitaw, Khawmdek ak kaw law seh tuicunli ingkaw ak khuiawh ak awmkhqi boeih ing awi sa useh; 12 Lokhqi ingkaw lo ak khuiawh awh ak awmkhqi boeih ing zeelnaak laa sa u seh. Cawhtaw kqawng awhkaw thingkhqi boeih ing zeelnaak laa sa kawm usaw; 13 Bawipa haiawh laa sa kawm uh, Khawmdek awideng aham law hawh kaw, anih ing Khawmdek ve am dyng na awideng kawmsaw thlangkhqi ce awitak ing awi deng kaw.

97 Bawipa taw boei na ang ngawih dawngawh, Khawmdek zeel seh; ak hla na ak awm tuisang lak khqi awm zeel u seh. 2 Myi ingkaw than ing zawl nawh; dyngnaak ingkaw thymnaak ce a boei ngawihdoelh hawihnaak na awm hy. 3 A haiawh mai cet nawh a kengsam awhkaw a thunkhakhqi ce uih sak hy. 4 A Khawk phla ing Khawmdek ve coei hlap hlap nawh; Khawmdek ing a huh awh thyn hy. 5 Tlangkhqi awm Khawmdek a Bawipa haiawh khawtiut amiyihna tle uh. 6 Khankhqi ing a dyngnaak khypyi unawh, thlang boeih ing a boemangnaak ce hu uh. 7 Myihlip ak bawkkhqi boeih taw chahphyi uh, myihlip awh ak oek qu thlangkhqi ce nangmih khawsakhqi boeih ing amah ce bawk lah uh! 8 Zion ing ang zaak awh ce zeel nawh Judah qam awhkaw vangcakhqi awm Bawipa, nang ak awidengnaakkhqi awh amik kaw zeel hy. 9 Nang taw, Bawipa, Khawmdek boeih ak khan awh Sawsang Soeih na awm hyk ti; khawsakhqi boeih ak khan awh zoeksang na awm hy. 10 Bawipa ak lungnaak thlangkhqi ingtaw ak che ce sawh na u seh, amah a yipawm thlangkhqi ce awm pyi nawh thlakche a kut khui awhkawng hul hy. 11 Thlakdyng ak khan awh vangnaak awm nawh kawlung ak dyngkhqi venawh zeelnaak awm hy. 12 Nangmih thlakdyngkhqi aw, Bawipa awh zeel unawh taw, ang ming ciim ce kyiuhciah lah uh.

98 Bawipa venawh lak thai sa lah uh, kawtih amah ing kawpoek iki ik-oehkhqi ce sai hy; tang kut ben a ban caih ing hulnaak ce amah aham sai hawh hy. 2 Bawipa ing a thaawngnaak ingkaw a dyngnaak ce pilnam thlangkhqi venawh sim sak nawh dang pe sak hy. 3 Israel ipkhuikaw venawh amah ak lungnaak ingkaw a yipawmnaak ce sim khak hy; khawdyt nakaw thlang boeih ing ningnih Khawsa thaawngnaak ce hu hawh uh. 4 Khawmdek thlangkhqi boeih aw, zeel doena Bawipa venawh khy lah uh;

tumding tum doena zeelnaak laa sa lah uh; 5 tingtoeng ing Bawipa venawh tum unawh, tingtoeng tum doena laa sa lah uh. 6 Uut awi ingkaw tuu'm cai ak ki yng doena, Bawipa sangpahrang haiawh zeel doena khy lah uh. 7 Tuicunli ingkaw ak khuiawh ak awmkhqi boeih, Khawmdek ingkaw ak khuiawh ak awmkhqi boeih ing awi sa u seh. 8 Lawngnukhqi ing kut bei u seitaw, tlangkhqi ing zeelnaak laa kutoet na sa u seh; 9 Bawipa haiawh laa sa u seh, kawtih anih taw Khawmdek awideng aham law hy. Anih ing dyngnaak ing Khawmdek deng kawmsaw thlangkhqi ce ang myih pil na awi deng kaw.

99 Bawipa taw boei na ngawi hy, pilnam thlang boeih thyn u seh nyng; anih taw cherubim anglakawh boei ngawihdoelh awh ngawi hy, deklung deklai ing thyn seh. 2 Zion awh Bawipa taw boeimang na awm nawh; pilnam boeih ak khan awh zoeksang na awm hy. 3 Nang ming boeimang ingkaw kqij awm ve kyihcrah u seh – anih taw ak ciim ni. 4 Sangpahrang taw thak awm thlang na awm hy, ak thym ce lungna hy – nang ing ang myih pil na caksak hyk ti; Jacob awh ak dyng ak thym ce sai hawh hyk ti. 5 Bawipa ningnih a Khawsa ce zoeksang unawh taw a khawlung awh bawk lah uh; anih taw ak ciim ni. 6 Mosi ingkaw Aaron ve a khawsoeh anglakawh awm nih nawh, ang ming ak khykhqi anglak li awh Samyl taw awm hy; cekkhqi ing Bawipa ce khy unawh anih ing hlat pehy. 7 Anih ing myi ak dyi awhkawng awi kqawn pe nawn, amah ing a peek awipeek ingkaw ak awi ak kqawn peekkhqi ce ngai pe uh. 8 Aw Bawipa kaimih a Khawsa, cekkhqi ce nang ing hlat hyk ti; a sai thawlhnakkhqi awi nang ing toel hlai hyk ti, Israelkhqi aham queenkawh ak ngaikung Khawsa na awm pe hyk ti. 9 Bawipa ningnih a Khawsa ce zoeksang unawh a tlakang ciim awb bawk lah uh, kawtih ningnih a Bawipa Khawsa taw ciim hy.

100 Khawmdek thlangkhqi boeih aw, awmhly doena Bawipa venawh khy lah uh. 2 Zeel doena Bawipa ce bawk unawh taw; zeelnaak laa sak doena a haiawh law lah uh. 3 Bawipa taw Khawsa ni tice sim uh. Amah ing ningnih ve ani sai khqi a dawngawh, amah a koena ni awm uh; ak thlang na ni awm unawh, qam a sainaak awhkaw tukkengeng na ni awm uh. 4 Zeel awi kqawn doena ak chawmkeng awh kun unawh, amah kyihcrah doena a bawkim ipkhui awh kun lah uh; a venawh zeel awi kqawn unawh ang ming ce kyihcrah lah uh. 5 Ikatih, Bawipa taw leek nawn a lungnaak ce kumqui dyna cak hy; a ypwamnaak awm cadil dyna cak hy.

101 Aw Bawipa, na lungnaak ingkaw na thymnaak awh laa sa nyng saw, nam kyihnaak laa sa vang nyng. 2 Coet a kap kaana khaw ka saknaak aham ngaightha vang nyng – ityk awh ka venna na law kaw? Coet amak kap kawlung ing ka ipkhui na cet vang nyng. 3 Amak leek ik-oehi ce ka mik huh awh am awm sak kawng. Cangnaak amak ta thlangkhqi a ik-oehi saikhqi ce sawh na nyng; cekkhqi ing kai am nim tu kawm uh. 4 Kawlung amak dyng thlangkhqi taw ka venawh kawng ak hla na awm kawm uh; ak che ik-oehi qoe qoe ce ap kqip ti kawng. 5 U awm a kengsam awhkaw thlang ang hypna ak kqawnseetkhqi taw, hqe kawng nyng; u awm oek qunaak mik dai nawh kawlung ak oek qu taw, am dun khing ti kawng. 6 Kai ing ami awm haih thainaak aham, qam khuiawh kaw ypwam thlangkhqi ce toek kawng nyng; coet a kap kaana ak cet thlangkhqi ing ka bibi kawm uh. 7 Thlak thaikhqi ka ipkhui awh am awm thai kawm uh; amak thym awi ak paukhqi ka haiawh am dyi thai kawm uh. 8 Qam khuiawh kaw thlakchekhqi ce mymcang qoek awh hqe khqi kawng; ik-oehi che ak saikhqi boeih ce Bawipa khawk bau khuiawh kawng milh sak kawng.

102 Aw Bawipa, kak cykcahnaak awi ve ngai law lah; bawm aham kang kqang awi ve na ven pha seh. 2 Ka khuikha

awh ve na haai koeh thuh. Kai benna nang haa keng law nawhtaw; ka nik khy awh ang tawnna nim hlat lah. 3 Ka hqinq khuiawhngkhikhqi ve maikhu amyihna ding bang nawh; ka quhkhqi ve maiyah amyihna alh hy. 4 Kak kawlung ve koh aai nawh qam amyihna reu hy; buh ai aham awm hilh qu hawh nyng. 5 Kang ko awh ka quh ingkaw ka vyn hqawng ni ak awm hqoeng hawh. 6 Qamkoh awhkaw bukbu amyihna ngawi hqoeng nyng saw, ak plawci anglakawhaw bukbu amyihna awm hqoeng nyng. 7 Ihmyh lonai na awm nyng saw; iptih khanna amah doeng ak ngawi hqoeng pha amyihna awm nyng. 8 Khawngi zung ka qaalkhqi ing nik kqawnset unawh, kai anik huhqytkhqi ing kah ming ve kqawn setnaak na hawna uh. 9 Maiyvthkqi ce buh na ai nyng saw ka awk hly kawi awm mikphli tuikhqi ing kqit uh. 10 nak awa a so aih awh, ni lo hqeto nawh nik khawng hyk ti. 11 Ka hqingnaak khawngkhikhqi ve khawmy benna kaw khawngkawn amyihna awm nawh; qam amyihna reu hy. 12 Cehlai, Bawipa, nang taw kumqui dy boei ngawihdoelh awh ngawi hyk ti; nang ming awm cadil naa dyna cak hy. 13 Nang tho kawm tiksaw Zion ce geen kawp ti, anih a venawh zeelnaak tym qoe hawh ni; a tym a taak ce pha law hawh hy. 14 Na ceityikhqi ing anih a lung ce lungna unawh; a dekvai ing cekkhqi ce am thin tlawh sak hy. 15 Phynlumkhqi ing Bawipang ming kqij kawm usaw, khawmdek awhkaw sangpahrangkhqi boeih ing na boeimangnaak ce kqjichah kawm uh. 16 Ikatih Bawipa ing Zion ce sa tlaih kawmsaw a boeimangnaak ing dang tlaih kaw. 17 Khawdeng ak voethlaukhkqi ak cykcahnaak ce hlat pe kaw; cekkhqi a geen thoehnaak ce am huhsit pek khqi tikaw. 18 Ve aek law hly kawi cadil naakhqi ham qee na awm seh; saina ak awm hlankhqi ing Bawipa ce kyihcrah na seh. 19 Bawipa ing a hun ciim sang soeih awhkawng nuk toek hy, khan nakawng khawmdek ve nuk toek hy, 20 thawng ak tlakhqi a ko kqangnaak awi ce ngai peek aham ingkaw thih aham ami palh sak thlangkhqi ce loet sak aham." 21 Bawipang ming ce Zion awi kqawn na awm kawmsaw am kyihnaak ce Jerusalem awh awm kaw, 22 thlangkhqi ingkaw qamkhqi ing Bawipa bawk aham cawn kawm uh. 23 Khaw ka sak pyngthym mai awh kak tha ni boek pe nawh; ka hqinglung ni tawi pe sak hy. 24 Cedawngawh kai ing, Aw ka Khawsa, ka hqinq hulii awh koeh ni lo valh; nang a kumkhqi taw cadil naa dyna ak awm ni. 25 Ak cycka awh nang ing khawmdek pengnelhnaak sai tiksaw, khanhqi ce na kut ing sai na awm hy. 26 Ceekhqi taw qeng hlai voei uh, nang taw awm poe kawp ti; cekkhqi taw hi amyihna se kawm uh. Bainaka amyihna thaw kawm tiksaw lawha boeih kaw. 27 Cehlai nang taw amah toeng na awm poe kawp ti, nang a kumkhqi ingtaw a dytnaak awm am ti kaw. 28 A tyihzawihkhqi a cakhqi ce na haiawh awm kawm usaw; a cadilkhqi awm na haiawh cak poe hawh kawm uh."

103 Aw ka hqingnaak, Bawipa kyihcrah lah; kak kawk khuiawh uh. 2 Aw ka hqingnaak, Bawipa ce kyihcrah lah, a zoseennaak ani peekkhqi boeih ce koeh hilh – 3 na thawlhnakkhqi awi queenkawh ngai law nawh na tlawhnaakkhqi boeih ce goei law sak hy, 4 lawk-kqawng khuiawh kawng na hqingnaak ce hul law nawh lungnaak, queennaak ing ni sing hy, 5 na taithymnaak ce hu amyihna tha sak pan aham ik-oehi leek ingkaw na ngaihnaak ce sit law sak hy. 6 thekhanaak ak hukhqi han Bawipa ing dyngnaak ingkaw thymnaak ce sai hy. 7 Mosi venawh a lamkhqi ce sim sak nawh, Israel thlangkhqi venawh a ik-oehi sai ce sim sak khqi hy. 8 Bawipa taw thlang queenkawh ak ngai ingkaw lungnaakkung na awm hy, kaw amak so nai, lungnaak ing ak be na awm hy. 9 Anih thlawh ap puk khing kawmsaw, ak kawlung kumqui dy am so khing kaw; 10 ningnih a thawlhnakkhqi ing ak tynq na nik khan awh ik-oehi am sai nawh sai thawlhnakkhqi amyihna amni thung khqi bai hy. 11 Khawmdek awhkawng khawngi ce a sang soeih

amyihna, amah ak kqjikhqj ham lungnaak taw bau soeih hy; **12** khawlaw ben ingkaw khawtlak ben a hla soeih amyihna, ningnih a thawlhnaakkhoji ce ak hla na ni khoe pek khqj valh hawh hy. **13** Paing a cakhqj a lungnaak amyihna, amah ak kqjikhqj ce Bawipa ing lungna hy; **14** kawtih ikawmyihna ningnih ve sai na ni awm tice amah ing sim hy, dekvai nani ni awm uh tice amah ing sim loet hy. **15** Thlanghqing aham taw, a hqjng khui khawngi ve qam amyihna ni a awm, qam a pai amyihna ni a awm; **16** khaw a hli awhtaw zawn bang nawh am awm voel hy, a awmnaak hun zani am sim voel hy. **17** Cehlai Bawipa ak kqjh thlangkhqj venawh taw a lungnaak ce kumqui coengawh kumqui dy awm poepa nawh, a dyngnaa ce a cakhqj a cakhqj petoe dyna awm pe hy – **18** a paipi amak hlepkhqi ingkaw ak awipeek ak sim loetkhqj taw cemiyihna awm kawm uh. **19** Bawipa ing a boei ngawihdoelh ce khan na caksak nawh, a qam ing khan boeih ce uk hy. **20** Tha awm nawh ak awi ngai doena ak kawngaih ik-oehi ak sai peek, nangmih khan ceityikhqj aw, Bawipa ce kyihsah lah uh. **21** Amah ak kawngaih ak sai nangmih a tyihzawikhqj ingkaw khan qalkapkhqj boeih aw, Bawipa ce kyihsah lah uh. **22** A uknaka hun boeih awhkaw a ik-oehi saikhqj aw, Bawipa ce kyihsah lah uh. Aw ka hqjngnaak, Bawipa ce kyihsah lah.

104 Aw ka hqjngnaak, Bawipa kyihsah lah. Aw Bawipa ka Khawsa, nang taw bau soeih hyk ti; boeimang ypwamnaak ing thoeihcam qu hyk ti. **2** Vangnaak ce hi amyihna bai nawh; khankhqi ce hi im amyihna phyl hy, **3** a awmnaak ak khan ipkaikhqj ce tuikhqik khan awh zilh ang hlakhqj awh ce ngawi hy. **4** Zilh ce a ceityikhqj na sai nawh; maikqawng ing mai ce a tyihzawih na sai hy. **5** Khawmdek ve ang hangnaak hun awh hawih nawh, am thoeih qoe hy. **6** Tuihdung ingkaw hi amyihna zawl malh nawh; tlangkhqi ak khan awh tui pha sak hyk ti. **7** Cehlai nang ing na ziyh a dawngawh tuikhqi cen nawh, nang a khawhun awi awh ang tawnna cen hy; **8** tlangkhqik khanna lawng unawh tuikawkhqj awh awm nung lawng uhy, a mingmih aham hun na qoek na bah peeknaak hun awh lawng uhy. **9** Cekkhqi amang lawgnaak thai aham qamqji taak pe hyk ti; ityk awh awm khawmdek ve am leu voel tikaw. **10** Lawngsip awm sak nawh lawng hawi dung awh lawng sak hy; tlangkhqi anglakawh ce lawng hy. **11** Qam awhkaw chukphakhqj boeih ce awk sak nawh; kqawng meqangkhqj ami tui ngaih sit hy. **12** Khan nakaw phakhqj ing tuikeng awh bu sawn unawh; thingpangkhqj awh laa sa uhy. **13** A awmnaak aham im awhkawng tlangkhqj ce tui ing syp nawh; a bibinaak ak thaikh ing khawmdek ve phoen phyi sak hy. **14** Khiqin aham qam cawn sak nawh, thlanghqing aham tawihah anhah cawk sak hy – khawmdek awhkawng buh a an taak law pehy: **15** thlang ak kawlung ak zeel sak misur tui, haai a plangnaak aham situi, ak kawlung tha ak awm sak phaihipi ce pehy. **16** Bawipa a thingkhqi, Lebanon awh amah ing ang lingkhqi ce khaw ing ak qui na syp hy. **17** Cawh phakhqj ing bu sawn unawh, sidar a thing awh phungawkhqi ing im ta uhy. **18** Tlang sangkhqi cetaw sangza sithai awmnaak hun na awm nawh; minpoengkhqi cetaw phiihkhqi a awmnaak hun na awm hy. **19** Hla ing khawcan sim nawh, khawmik ing a nung tlaak tym sim hy. **20** Nang ing thannaak haw law tiksaw, khawmthan na coeng hy, cawh khqinkhqi lym ang hang uhy. **21** Sendeikhqj ing khqin a ai kawi tu aham ami ngaih awh kaww unawh, Khawsa venawh kawng ai sui uhy. **22** Khawmik ang thoeng law awhtaw qeng sap uhy; a awmnaak lukkawk khuina voei unawh zaih uhy. **23** Cawh thlang ing bibi aham cet nawh, khawmy dy bi sai hy. **24** Aw Bawipa, na bibi ve kgeng soeih mah hy! Cyihnaak ing vemyihkhqi boeih ve sai hyk ti; khawmdek ve na sai ik-oehi ing bengen hy. **25** Ak kau soeih tuicunli awm awm nawh, noet noeng kaana a sai lumgakhqi ak zawi ak bau awm hy. **26** Cawh lawk baukhqj

hu hai na cet unawh, cawh nang ing tuinga ang lymnaak khoek hun ce sai pe hyk ti. **27** A tym can awh nang ing buh na peek hly ce lamtoen doena nang ce ni toek uhy. **28** Cekkhqi ce buh na peek awh, a mingmih ing cung hloep uhy, nang ing na kut nak thlek awh cekkhqi ing ik-oehi leek ing be uhy. **29** Cehlai haa na thuh awh, mawn uhy, cekkhqi ang khqj ce na lawh peek valh awh, thi unawh dekvai na hlat uhy. **30** Nang Myihla ce na tyih awh, a mingmih ce sai na awm unawh, nang ing khawmdek ce tlaih pan hyk ti. **31** Bawipa a boeimangnaak taw kumqui dy awm poe seh; a bibinaak awh Bawipa taw zeel seh – **32** khawmdek toek nawh, tyn sak hy, tlangkhqi bi nawh khu sak hy. **33** Ka hqjng khui pyt Bawipa venawh laa sa kawng nyng; ka hqjng khui ka Khawsa kyihsahnaak laa sa wang nyng. **34** Bawipa awh ka zeel lawt amyihna, kak Kawpoeknaak ve a venawh zeelnaak na awm seh. **35** Cehlai thlak thawhkhqj taw khawmdek awhkawng cing baat u seifawh thlakchekhkhqj awm koeh awm voel u seh. Aw ka hqjngnaak, Bawipa ce kyihsah lah.

105 Bawipa venawh zeelnaak awi kqawn unawh taw, ang ming ce khy lah uh; a ik-oehi sai ce thlangphyn a venawh sim sak lah uh. **2** A venawh laa sa unawh taw, am kyihsahnaak laa sa lah uh; Kawpoek kyi ik-oehi a sai ce kqawn uh. **3** Ang ming ciim boeimang seitaw; Bawipa ak suikhqi ak kawlung taw zeel seh. **4** Bawipa ingkaw ak thaawmnaak ce sui u nawhtaw; a haai ce a poepa na sui lah uh. **5** Kawpoek kyi ngaihak ik-oehi a saikhqi ingkaw awidengnaak ak kqawn ce sim poe lah uh, **6** a tyihzawih Abaraham a cadilkhqi aw, amah ing ak tyh Jakob cakhqj aw sim poe lah uh. **7** Anih taw Bawipa ningnih a Khawsa na awm hy; a awidengnaak taw khawmdek boeih ak khan awh awm hy. **8** A paipi ce kumqui dyna sim poe nawh, ak awipeek ce, cadil naa thong oet dyna sim poe hy, **9** Abraham ing ani awk hiah paipi ing Isak a venawh awi a taak ce sim khak hy. **10** Ce ak awi ce awitlyh a myihna Jakob a venawh caksak nawh, Israel a venawh kumqui paipi na tahi: **11** Kanan qam ce ni pe kawng nyng saw na tahan qo amyihna pang kawp ti,” tina hy. **12** Thlangmi ami zawica awh, ak zawica tloek ce, qam khuiawh khin na awm hy, **13** phyn pynoet ingkaw pynoet a venawh, qam pynoet ingkaw pynoet a venawh pla khing uhy. **14** U ingawm cekkhqi ce am thekha nak khqj uhy; a mingmih awh sangpahrangkhqi ce toel hy: **15** Situi ak syphqj ve koeh bi kawm uk ti; ka tawngkhakqj awm nganbawh koeh pe qoe kawm uk ti,” tina hy. **16** Ram khuiawh khawseet khawkhha pha sak nawh cekkhqi a buh boeih ce hqe pehy; **17** cekkhqi haiawh thlang pynoet – tamnaa na ami zawiil Joseph ce tyih pehy. **18** A khaw awh khawcekhqj byn pe unawh, a hawng awh thi quikhqi ing khit uhy, **19** amah ing ak kqawn oepchoehe ce a soep hlan khui, Bawipak awi ing ak thym ce a sim sak hlan dy cemiyihna awm hy. **20** Sangpahrang ing thlang tyi nawh loet sak hy, thlang kqeng ak ukkung ing anih ce loet sak hy. **21** Anih ce ipkhui awh boei na ta nawh, a taak ik-oehikhqj boeih ak khan awh ukkung na tahi, **22** boei capakhqi ce a ngaih amyihna cawngppi aham ingkaw, a hqmacakhqi cyihnaak cawngppi aham cemiyihna awm sak hy. **23** Cekcoengawh Israekhqi ce Izip ram na kun hy; Ham ram awh khin na Jakob ce awm hy. **24** Bawipa ing ak thlangkhqj ce ak thaikh qah sak hy; qaalkhqi ham khawzah na coeng sak hy, **25** amah ak thlangkhqi sawhnaak aham cekkhqi ak kawlung ce hawi pe nawh, a tyihzawikhqj ce huhqyt sak hy. **26** A tyihzoeih Mosi ingkaw ak thlang tyk Aaqon ce tyi hy. **27** Cekkqawi ing cekkhqing lak awh Kawpoek kyi hatnaak ingkaw ngaihak ik-oehi ce Ham qam awh sai pe hy nih. **28** Thannaak ce tyi pe nawh rampum awh khaw than sak hy – kawtih ak awi ce cekkhqi ing am eek pehy na ti nawh nu? **29** Tuikhqi ce thi na thoeng sak nawh, ngakhqi thih pe sak kang hy. **30** A ram khuiawh ta-ukhqi da pe sak nawh a

boeikhqi a ihkunkhqi dyna awm pe sak hy. **31** Awi kqawn pe tlaih bai nawh, pikhqj law pe khung bai hy, a rampum awh hlip hqoeng na be sak hy. **32** Khawtlan ce qeel na thoeng sak nawh, a rampum awh khaw phla pe sak hy; **33** misurkungkhqi ingkaw thaikungkhqi deh pe kanglek nawh a qam khuiawh kaw thingkhqi tluk pe sak boeih hy. **34** Awi kqawn tlaih bai nawh, cawh boeikhqi ce law uhy, noet noeng kaana khamkhawkkhqi ce doem hy; **35** a qam khuiawh kaw thinghah ai pe kanglek nawh dek awh ak cawt tawi a an ai pe kang hy. **36** Cekcoengawh a ram khui awhkaw cakcyk boeih ce him pehy, thlanghqing ak thaihcykkhqi boeih ce him pehy. **37** Sui ingkaw ngun phyih sak nawh, Isreal ce cawn sak hy, a pilnam khuiawh tha amak awm pynoet awm am awm hy. **38** Israel a dawngawh cekkhqi ak khan awh kqihnaak a pha a dawngawh, cekkhqi ami ceh awh lizpkhqi amik kah zeel hy. **39** Cekkhqi ak dah aham myi zam sak hy, thanh vangnaak ak pe na mai pehy. **40** Cekkhqi ing ami thoeh awh, tyty pe nawh khan nakaw phaihipi ing ait phoenkhqi phyi pe sak hy. **41** Lungnu awng nawh tui thoeh pe sak hy; kqawng qamkoh awh tuiva a myihna lawng hy. **42** A tyihzawih Abaraham a venawh a peek a awitaak ciim ce sim khak hy. **43** Zeel doena ak thlangkhqi ce ceh pyi nawh, ak tyh thlangkhqi ce awmhly khynaak ing hqui a sawi hy; **44** thlangphyn khqi a ram ce cekkhqi venawh pehy, thlak chang ing a bi a lawh ce ram ce qo na pang uhy – **45** a mingmih ing ak awipeekkhqi ce hqutun unawh a cawngpyinaak awikhqi ce ami hqutuntha ahm cekkhqi ce sai pehy. Bawipa taw kyihcah lauh uh.

106 Bawipa taw kyihcah lauh uh. Bawipa taw a leek a dawngawh, a venawh zeelnaak awi kqawn lauh uh; a lungnaak awm kumqui dyna cak hy. **2** U ing Bawipa ak thaawm ik-oeih sai ce kqawn thai nawh a kyihsahaak ce ak kqawn thai boeih kaw? **3** Ik-oeih thym ce sai phat nawh, ik-oeih thym ce sai phatkqi taw a zoseen hy. **4** Aw Bawipa nak thlangkhqi venawh nak kaw a law awh kai awm koeh nin hilh, cekkhqi ce na hul awh kai anik hulkung law lawt seh, **5** nak tyh thlangkhqi a zo awmnaak ce pang lawt kawng nying saw, na pilnamkhqi a zeelnaak ce ka bawm coengawh namah kyihsahaak doena ka qo ce pang thai lawt kawng. **6** Ka pakhoi ami thawl amiyihna, kaimih awm thawl unyng; ik-oeih sai thawl unyng ak che soeih na sai unyng. **7** Ka pakhoi Izip qam awh ami awm awh, nang ak kawpoek kyi ik-oeih saikhqi ce ikaw na awm am poek unawh; nam qeenaka khawzah ce am sim voel uhy, tuicunli keng awh, Tuicunli Sen awh oelh uhy. **8** Cehlai amah ak thaawm ik-oeih sai thainaak ce ang dang thainaak aham ang ming ak caming cekkhqi ce hul hy. **9** Tuicunli Sen ce zyi nawh kak qup hy; cekkhqi ce qamkoh awhkaw amiyihna tuihdung khuiawh kawng hqisawi poe hy. **10** A thunkhakhqi kut awhkawng hul nawh; a qaalkhqi kut awhkawng thaawng hy. **11** Tui ing a qaalkhqi ce sing khup nawh; pynoet awm am loet uhy. **12** Cawh ak awikamnaak ce cangna unawh amah kyihsahaak laa ce sa uhy. **13** Cehlai iqyt awm a dii hlanawh ik-oeih a sai peekkhqi ce hilh nawh bai unawh am cuk kiknaak awm am sim voel bai uhy. **14** Qamkoh awh a mimah a qaihnaak awh pe qu unawh; khawkawng awh Khawsa ce noek a dak uhy. **15** Cedawngawh cekkhqi ing a thoeh ce pehy, cehlai pimqep tlawhnaak ce pha pe sak hy. **16** Hi im awm Mosi ingkaw Bawipa venawh nawh na ak awm Aaron ce yt uhy. **17** Khawmdtek ing ang nawh Dathan ce dailh hy; Abiqam a pyikhqi ce pup malh hy. **18** A hubatkqing lak awh mai kqawng pung nawh, maikqawng ing thlakchekhqi ce ui boeih hy. **19** Horeb awh vaitaw ca sai unawh cawhkaw myi thi ing ami hloih ce bawk uhy. **20** A mimah a boeimangnaak ce qam ak ai vaitaw myi ing thung uhy. **21** Izip qam awh ik-oeih ak bau soeih sai nawh a mingmih ak hulkung Khawsa ce hilh uhy; **22** anih ing

Ham qam awh kawpoek kyi ik-oeihkhqi sai nawh Tuicunli Sen keng awh kqjh awm ik-oeih ce sai pehy. **23** Ce a dawngawh a mingmih ama seeptaah aham ak kawsonaak sit sak aham, amah ak thlang tyh Mosi mah a kunnaak hly kawi awh ama nang dyih koep mantaw cekkhqi ce plawci sak kaw. **24** Qam leek soeih mai ikaw na am hu unawh; ak awikamnaak awm ap cangna uhy. **25** A mimah a hi imkhqi awh kawso unawh Bawipak awi ce am ngaih uhy. **26** Cedawngawh cekkhqi ce qamkoh awh tluk sak aham a kut phyl nawh tuui khyn hy, **27** a cadil naakhqi ing phynlum kut awh tlu unawh qampum awh a thek a zak na ami awmnaak aham tuui khyn sih hy. **28** Peor awhkaw Baal benna hawi qu lat nawh, hqingnaak amak ta khawsakhqi venawh ami nawn lucik buh a ankhqi ce ai uhy; **29** ik-oeih che sainaak ingkaw Khawsak kawsonaak ce ami sai a dawngawh, a mingmih anglakawh tlawhnaak ce tlung pehy. **30** Cehlai Phinehas ce tho nawh cekkhqing lak awh ang dyih a dawngawh tlawh khap qu dup hy. **31** Vawhikaw ik-oeih a sai awh anih ak law hly kawi amak dyt qoe cadil naa dy ing tlakdying na kqawn uhy. **32** Meribah a tuihkawng awh Bawipa kawso sak unawh, cekkhqi dawngawh Mosi a venawh kyinaak pha pehy; **33** Khawsa Myihla ce amim tu a dawngawh, Mosi a hui awhkawng poek kaana awi thoeng tara hy. **34** Bawipa ing awi a peeknaak amiyihna, cekkhqi ing thlangkhqi cetaw am plawci sak uhy, **35** cehlai phyn chang thlangkhqi mi kqit qu unawh cekkhqi a singzoe ce oet uhy. **36** A mimah aham dawng na amirk dum qu, thlakchang a myiqawl ce bawk uhy. **37** Qaai a venawh a capakhqj ingkaw a canukhqi ce lucik bulnaak na pe uhy. **38** Thawlhaak amak awm a capakhqj ingkaw a canukhqi a thi ce Kanankhqi a myiqawl ami bawkaak awh thoeh sak unawh, thi ingkaw qam ce tyih ak awm na sai uhy. **39** A mimah ingawm ik-oeih sai ing tyih awm sak uhy; a ik-oeih sainaak ing pup zawi na coeng uhy. **40** Cedawngawh Bawipa taw ak thlangkhqik khan awh ak kawso nawh ak qo ak pang hly kawikhqi ce tyih hy. **41** Cedawngawh cekkhqi ce thlangphyn khqi kut awh pe nawh, a qaalkhqi ing uk khqi hy. **42** A qaalkhqi ing thekha nak khqi nawh a saithainaaak ak kaiawh tak khqi hy. **43** Cekkhqi ce hul khqi khing hawh hlai hy, amah ce ami tuk lat lat a dawngawh a mimah a thawlhaak awh cum uhy. **44** Cehlai cekkhqi ang kqangnaak awi ce ang zaak awh ami khuikhanaak ce ngai na bai hy; **45** cekkhqi ce ak poek awh a paipi sai ce poek tlaih nawh a lungnaak bau soeih awh hul qu tlaih hy. **46** A mingmih tamnaa na ak sawikungkhqi ce qeen sak khqi nawn hy. **47** Nang ming ciim awh zeelnaak awi ka mik kqawn thainaak aham, Aw Bawipa kaimih a Khawsa, kaimih ve ni hul khqi nawhtaw, qampum awhkawng ni cunboem khqi tlaih lah. **48** Bawipa, Isrealkhqi a Khawsa venawh kumqui coeng kumqui dy kyihsahaak awm seh. Thlang boeih ing, “Amen!” ti seh.

107 Bawipa taw a leek a dawngawh a venawh zeelnaak awi kqawn lauh uh; a lungnaak awm kumqui dy cak hy. **2** Bawipa a hul thlangkhqi ing ve ve kqawn seh – qaal a kut khuiawh kawng a hul thlangkhqi, **3** qampum awhkawng a cunboem thlangkhqi, khawlaw khawtlak, a sip a hawt awhkaw thlangkhqi boeih ing kqawn seh. **4** Thlang vang taw khawkawng qamkoh awh pla unawh, ami awmnaak hly kawi awm am hu uhy. **5** Phoen cawi tui ngaih unawh zai doek doek hqoeng uhy. **6** Cemyihna ami khuikhqa awh Bawipa venawh kqang uhy, anih ing cekkhqi ce ami khuikhanaak awhkawng hul khqi hy. **7** Anih ing cekkhqi awmnaak hly kawi khawk bau lam dyng awh ce hqui a sawi phat hy. **8** A lungnaak amak dyt thai ing thlangkhqi ham kawpoek kyi a ik-oeih sainaak awh cekkhqi ing Bawipa venawh zeelnaak awi kqawn u seh, **9** kawtih tui ak ngaih ce tui ngaih sit sak nawh phoen ak cawi ce ik-oeih leek buh ing phoen phyi sak hy. **10** Thlang vang taw thannaak a hyp tit khuiawh ngawi unawh, kenqui qui ing thawng tla uhy, **11** Ikwatih cekkhqi ing Khawsak awikhqi ce

hilh unawh Sawsang soeih ak awi ynaak ce ikaw na am hu uhy. **12** Cedawngawh cekkhqi ce bik tlo bi sak khqi hy; bah hlai uhy, ak leng hly kawi u am awm hy. **13** Kyinaak ami huhnaak khui awhkawng Bawipa venawh khy uhy, cawh anih ing khuikhanaak khui awhkawng cekkhqi ce hul khqi hy. **14** Cekkhqi ce than a hypnaak awhkawng sawi law nawk kenquikhqi ce hlam pehy. **15** A lungnaak amak dyt thai ing thlangkhqi ham kawpoek kyi ik-oeih a sainaak awh cekkhqi ing Bawipa venawh zeelnaak awi kqawn u seh, **16** kawtih anih ing qawhum chawh ce hqe nawk a kalthnaak thiбоeng awm ek pe sak hy. **17** A mimah ang hqohqitnaak awh a vang taw qaw unawh, awm tloei tlawhnaak awh khuikha boeih uhy. **18** Buh a an boeih tyih unawh thiinnaak chawmkeng benna thoieh uhy. **19** Kyinaak ami huh awh Bawipa venawh kqang unawh khuikhanaak khui awhkawng cekkhqi ce hul khqi hy. **20** Ak awi ce tyi nawk cekkhqi ce qoei sak hy; phyi ak khui awhkawng cekkhqi ce hul hy. **21** A lungnaak amak dyt thai ing thlangkhqi ham ik-oeih leek a sai a dawngawh Bawipa venawh zeelnaak awi kqawn u seh. **22** Zeelnaak ik-oeih ce nawn u seitaw zeelnaak laakhqi ing a ik-oeih sainaak ce kqawn u seh. **23** Ak changkhqi taw tuicun awh lawng ing cet uhy; tuibau awh ik-oeih ak zavikhqi na awm uhy. **24** Cekkhqi ing Bawipa a sai ik-oeih, tuihdung khuiawh ak sai ik-oeihkhqi ce hu uhy. **25** Ikawtih awi kqawn nawk khaw hli sak hy, ce ing tuinu ak sang na thawn sak hy. **26** Khawnghi dyna hang tho nawk tuihdung khuiawh nung tla tlahi hy; kqih a awm aih a dawngawh a qaal leeknaak ce sauh pung hy. **27** Zukquikhqi amyihna a kenghal na cet unawh; a cyihnaak a dytnaak awh plai pahoei hy. **28** Kyinaak ami huh awthtaw Bawipa venawh kqang unawh, khuikhanaak khui awhkawng cekkhqi ce hqui a sawi khqi hy. **29** Khawhli ce zilh na sit sak nawk; tuicunli awhkaw tuinu ce dym sap uhy. **30** A ming dym sap awh zeel uhy, cawh ang cainaak tuikeng na cekkhqi ce sawi khqi hy. **31** A lungnaak amak dyt thai ing cekkhqi ce, thlangkhqi hamna kawpoek kyi ik-oeih a saikhqi awh Bawipa a venawh zeelnaak awi kqawn u seh. **32** Thlang kqeng a cunnaak awh anih ce zoeksang unawh taw a hqamcakhhqi amim cunnaak awh kyihcah lah uh. **33** Anih ing longkhqi ce qamkoh na coeng sak nawk, lawngca awhkawng ce cengdekk na coeng sak hy. **34** Ce hun awh ak awm thlangkhqi a seetnaak awh, lunglai ak leek soeih ce sihtu cidek na coeng sak hy. **35** Qamkoh ce tui ing be sak hamna ak koh hun awhkawng tui thoeng sak bai hy; **36** cawh phoen ak cawikhqi ce awm sak khqi nawk, cekkhqi ami awmnaak hly khaw ce syn uhy. **37** Lohkqi toen unawh misur thingkhqi ling uhy, ak thaikhqi qah pehy; **38** cekkhqi ce zoseennaak pe nawk, pung a tai uhy, ak khqinkhqi awm am zavitlak pe sak hy. **39** Cekcoengawh taw huhsitaak, khuikhanaak ingkaw kawseetnaak awh thlangmi ce zawi hqui voe voe unawh, ak kaidyt na awm bai uhy; **40** thlakbaukhqik khan awh khawsi ak qawnkung ing cekkhqi ce khawkpawng lam ama awmnaak awh pla sak khqi hy. **41** Cehlai anih ing khawdeng thlangkhqi ce hak zoeksang nawk tukkqeng amyihna a jpkhui cakawkhqi ce kqeng sak hy. **42** Thlakdyng ingtaw hu nawk zeel hlai hy, thlakchekhqi ingtaw amim kha mym khoep uhy. **43** U awm ak cyi ingtaw, ve ik-oeihkhqi ce poek seitaw Bawipa a lungnaak bau soeih ve poek seh.

108 Aw Khawsa, kak kawlung ve cak hy; ka hqingnaak boeih ing tingtoeng tum doena laa sa kawng nyng. **2** Tingtoeng ingkaw qaw tingtoeng nang hqak lah nih! Myncang hi awh thawl na lah vang! **3** Phynlum thlangkhqing lak awh, Aw Bawipa, nang ce nim kyihcah vang; thlangkhqing lak awh nang laa na ni sa vang. **4** Ikawtih na lungnaak taw bau nawk, khan anglakawh sang khqoet hy; na ypmawnaak ing khawnghi hak pha hy. **5** Aw Khawsa, khankhqi ak khan na hak zoeksang qu lah, khawmdek boeih ak khan awh na boemangnaak awm lah seh. **6** Na lungnaak

thlangkhqi hul na a awmnaak thai aham nak tang kut ing kaimih ve ni hul khqi nawk ni bawm khqi lah. **7** Khawsa ing a hun ciim awhkawng awi kqawn hawh hy: "Noengnaa ingkaw Shqekem ce qek ang ra kawng nyng saw Sukoth Tuikawk ce tahl vang nyng. **8** Gilead ve kai a koe ni; Ephraim ve ka thi lumyka na awm nawk Judah ve ka cawngqawli na awm hy. **9** Moab khaw ka silhnaak beihdung na awm nawk, Edom qam khawmyk ka suhnaak; Philistia qam khan awh noengnaak ing khy nyng." **10** Vawngcak ingkaw thingtung khawk bau khui na u ing nu kai a ni kun pyi kaw? U ing Edom qam na anii ceh pyi kaw? **11** Aw Khawsa, kaimih ni qoeng khqi tiksaw kaimih a qalkapkhi mi amak cet haih qoe voel ce nang am nu? **12** Qaal ka mi tuk awh nang ing ni bawm lah, thlangkhqing a bawmnaak taw phu am tahi. **13** Khawsa ingqawi taw ni noeng mare kaw, amah ing ni qaalkhqi ce leh law kaw.

109 Kai ing kam kyih, Aw Khawsa, awi myhna koeh awm hqoeng, **2** kawtih thlakchekhqi ingkaw thlak thaikhqi ing amim kha ni ang sih khqi nawk; ami qaai ce kqawn uhy. **3** Sawhnaak awi ing nik chung khqi nawk, akawng a awm kaana ni tuk khqi hy. **4** Ka pyi na ka taaknaak ce thawl puknaak na haw law na uhy, cehlai kai taw ak cykcah thlang na awm nyng. **5** A leek ce ak che ing thung law unawh, pyi na ka taaknaak cesawhnaak ing thung law uhy. **6** Anih ak oehl aham thlakche ce teak pe tloep; thawl a pukkung ce ak tang ben awh pha seh. **7** Awideng na a awm awh, dawk lo seitaw, ak cykcahnaak ing dawk sak seh. **8** A hqinglu tawi pe seitaw; thlakchang ing hquikung dyih hun ce qawt pe tloep seh. **9** A cakhqi cadah na awm u seitaw a zukhqi nuhai na awm u seh. **10** A cakhqi ing kut dun doena van u seitaw; a imqawk awhkawng hqek na awm u seh. **11** Ik-oeih a capung na ak pukhqi ing a khawhthemkhqi ce lawh pe boeih u seitaw; a bibinaak phu ce khinkhqi ing muk pe bang seh. **12** U ingawm koeh qeen seitaw pa amak ta naasenkhqi awm koeh qeen u seh. **13** A cadiil naa ce law boet seitaw, ak law hly kawi chawn awhkaw ming khui awhkawng qeng u seh. **14** Ami pakhqi thawlhaak ce Bawipa hai awh sim loet na awm seitaw ami nu a thawlhaak ce koeh qeng voel seh. **15** Cekkhqi sim loetnaak ce khawmdek awh a law boetnaak aham a mingmih a thawlhaak ce Bawipa haiawh awm loet seh. **16** Ikawtih qeennaak tive poek awm ap poek qoe qoe hy, khawdeng ak voet hlaukhqi ingkaw kawlung ak kqekhqi ce him aham hqut hy. **17** Lihoei ce lungna hy – amah ak khan awh tla tloep seh; thlang a zoseennaak awh ak kaw am law hy – zoseennaak ce anih a venawh kawng ak hla na awm lawt seh. **18** Lihoei ce hi na bai nawk; a pum khuiawh tui amyihna kun pehy. **19** Ce ing angki amyihna zawl khak seitaw cawi pinnaak amyihna kumqui dy pin seh. **20** Kai thawl anik puk khqi ingkaw, kai ak che na anik kqawnkhqi a venawh Bawipa ing ve thaphu na pe seh. **21** Cehlai, Aw Boemang Khawsa, nang ing nang ming ak caming ak leek na ni sai nawk; na lungnaak ak leek ak caming ni hul lah. **22** Khawdeng ingkaw voethlauh thlang na awm nyng saw, kak kawk khuiawh ak lingbyi ing ngawha ai hy. **23** Khawmy ben awhkaw khawngkawn amyihna nung thoieh hawh nyng saw; khamkhawk amyihna tla let let nyng. **24** Buh ka hyhnaak awh kam khawkhlu qawi am cak voel hy; kang sak boeih qep qep nawk a tankqat na awm hqoeng nyng. **25** Thawl anik puk khqi ak kqawnseet aham awm kqoeng nyng saw; a mini huh amii lu hil uhy. **26** Aw Bawipa ka Khawsa, ni hul lah; na lungnaak ak caming ni hil cang lah. **27** Ve ve nang a kut ni tice sim sak nawk, Aw Bawipa, nang ing ni na sai tice sim sak lah. **28** Cekkhqi ing khawseet hly hlai uhy, nang ingtaw zoseen pe hyk ti; cekkhqi ing ami tuk awh chah phyi kawm uh, cehlai nang a tyihzawih taw zeel kaw. **29** Kai thawl anik puk khqi taw ming seetnaak ce hi amyihna bai kawm u saw chahnaak ing angki amyihna zawl qu khoep kawm uh. **30**

Kam kha ing Bawipa ce khawzah na zoeksang kawng nying saw; thlang kqeng khawzah anglakawh amah kyihcah kawng nying. **31** Ikawtih anik palh sak khqi a venawh kawng anih a hqjinggaak ce hul peek aham anih taw ak voethlaukhkqi ak tang ben awh dyi hy.

110 Bawipa ing Ka Bawipa a venawh: "Na qaalkhqí ce na khaw tloengnaak na ka sai hlan dy kak tang benawh ngawi lah," tina hy. 2 Bawipa ing nang a sawngqawl thakawm ce Zion awhkawng hil law kawmsaw, na qalkhinqjok lak awh nang ing uk kawp ti. 3 Na qalkapkhwí ing na qaal tuknaak khawngħi ce ngaiħ kawm uh. Ak ciim qypawmaak ing thoeihcam qu nawħ; mymcaq phoen khui awhkawng ak thoeng law dam tui amyihna thak awm thym ce hu kawp ti. 4 Bawipa ing awi a sa hawh a dawngawħ am thaw voel kaw: "Melkhizadek amyihna nang taw kumquī khawsoejah na awm hyk ti," tihy. 5 Bawipa taw nak tang ben awh awm nawħ; ak kaw a sonaak nyn awh sangpahrangħkhwí ce tun kqai khqí boeih kaw. 6 Anih ing phyllum awideng kawmsaw, thlhang a qawk ce a qawn kyg coengawħ khawmdekk pum awhkaw a luhkji ce cepħ khqí kaw. 7 Lamkeng awhkaw lawngca tui ce aw kawmsaw, lu ċe hak zoek kaw.

111 Bawipa taw kyihcاحlah uh. Thlak dyng cunnaak ingkaw thlang kqeng cunnaak awh Bawipa ce kak kawlung boeih ing zoeksang kawng nyng. 2 Bawipa a ik-oeih saikhqi taw bau soeih hy; ce miikhqi ce ak ngaih boeih ing poek hheet uhy. 3 Boeimangnaak ingkaw qypawmnaak boeih ve amah a sai boeih na awm nawk, a dyngnaak awm kumqui dy cak hy. 4 Sim loet aham kawpoek kyi ik-oeikhqi ce awm sak hy; Bawipa taw thlang qeenkhaw ak ngai ingkaw qeennaak kawpoek ing be hy. 5 Amah ak kqjikhqi venawh ai kawi pe nawk; a paipi ce sim poepa hy. 6 A ik-oeih sainaak ce ak thlangkhqi venawh dang sak nawk, thlakchang qam ce cekkhqi venawh pehy. 7 A kut sai ik-oeikhqi ce a yapwm nawk dyng hy; awipeekhqi awm yp a awm hy. 8 Ueppawmnaak dyngnaak ing a sai a dawngawh, cekkhqi taw kumqui ing kumqui dy cak poe hy, 9 Ak thlangkhqi ham huilak ce pe nawk; a paipi ce kumqui dy caksak hy – ang ming taw ciimcaih nawk kqjih awm hy. 10 Bawipa kqjihnaak taw cyihnaak a kung na awm hy; ak awipeek ak hqutkhqi boeih taw zaksimnaak leek ta uhy. Khaw kum khaw hqai kyihcاحنااك taw amah a koe ni.

112 Bawipa taw kyihcrah lah uh. Bawipa kqjh nawh ak awipeekkhqi awh zeelnaak ak takhqi taw ami zoseen hy. 2 A cakhqi qam khuiawh thlak bau na awm kawm usaw; thlakdnyngkhqi a cadit taw ami zoseen kawm uh. 3 Boeinaak ingkaw mangnaak taw ijkhui awh awm kawmsaw, a dyngnaak ce kumquj dy awm loet kaw. 4 Thlang qeenkhaw ak ngai lungnaak pa a thlak dyngkhqi ham taw, thannaak awh zani vangnaak awm pehy. 5 Boecannaak ing a zoena thlang pu nawh ak thym na khaw ak sakhqik khan awh ik-oeih leek pha law kaw. 6 Anih ce ityk awh awm am tat tikaw; thlak dyng taw kumqui dy u ing am hilh tikaw. 7 Awithang che awh kqjhnaak am ta kaw; ak kaw cak nawh, Bawipa ce ypna hy. 8 Ak kawlung yp nawh, kqjhnaak am tahi; a dytnaak awhtaw a qaalkhqi ce noengnaak ing toek kaw. 9 Khawdeng hahqanhkqi veniawh kutdo a qek a ra a davngwah, a dyngnaak ce kumquj dy cak hy; ak ci ke zoeksangnaak ing kyih na awm kaw. 10 Thlakche ing a huh awh ak kaw am zeel kaw; a ha taak kawmsaw plai a tham pahoei kaw; thlakchekhqi a ngaihnaak taw dyt hgoeng kaw.

113 Bawipa taw kyihcah lah uh. Aw Bawipa a tyihzawikhqj aw, kyihcah lah uh, Bawipang ming ce kyihcah lah uh. 2
Tuh kawng kumqui dyna Bawipang ming taw kyihcah na awm seh.
3 Khaw a law cyk awhkawng a nung tlak dy na, Bawipang ming taw kyihcah aham awm hy. 4 Rawina taw gamtawm ak khan awh

a boeimangnaak ce awm hy. 5 Hun sang na boei ngawihdoelh awh ak ngawi Bawipa ningnih a Khawsa amyihna u nu awm nawk, 6 khankhqi ingkaw khawmdekk aham anih amyihna anuk balak law u nu ak awm? 7 Khwadeng thlang ce dekval awhkawng thawh nawk ah voet hlauhkhqi ce maiyvt awhkawng thawh hy; 8 cekkhqi ce sangpahrang a cakhqi, a mimah ak thlangkhqi a sangpahrang a cakhqi ing ngawih sak hain hy. 9 Ca ak qeng nu ce cakhqi ak ta ak awmhly nu na tahi. Bawipa taw kyihcah lah uh.

114 Izip qam awhkawng Israel a law awh, qapchang amsim awi ak paukhqi a venawh kawng Jakob ipkuikaw a law awh, 2 Judah ce Khawsa hun ciim na coeng nawk, Israel ce amah a ukkung na awm hy. 3 Tuicun ing toek nawh cen hy, Jordan tui a hu na hiat tlaih hy; 4 tlangkhqi ing tumcaikhqi amyiha, tlangkhqi ing tuucakhqi amyiha pet doep doep uhy. 5 Aw tuicun nang, kawtih cen nawk, Aw Jordan long nang, kawtih hu na nang hlat tlaih, 6 namgih tlhangkhqi, kawtih tumcaikhqi amyiha, namgih tlangkhqi, kawtih tuu cakhqi amyiha naming pet doep doep? 7 Aw khawmdtek, Bawipa haiawh, Jakob Khawsa haiawh thyn lah, 8 anih ing lungnu ce tui im na coeng sak nawk, lunkqil ce lawngca tui na lawng sak hy.

115 Kaimih a venawh kaana, Aw Bawipa, kaimih a venawh kaana, na lungnaak ingkaw na yp awmnaak awh namah ang ming a venawh boemangnaak awm seh. 2 Ikwatih thlangphyn khqi ing, "A mingmih a Khawsa hana a awm?" a mi ti. 3 Ningmih a Khawsa taw khawk khan na awm nawk, amah ak kaw ak zeel sak boeih ce sai hy. 4 Cehlai a mingmih a myiqawlkhqi taw thlanghjing a kut ing sai na ak awm sui ingkaw ngun khqi mai ni. 5 A mim kha taw ta lawt hlai uhy, am pau thai uhy; mik awm ta lawt hlai uhy, am hu thai uhy; 6 haa ta lawt hlai uhy, am za thai unawh, haqawng awm ta lawt hlai uhy, a baw am za uhy; 7 kutkhqi ta hlai uhy, am bi thai uhy, khaw awm ta hlai uhy, am cet thai uhy; amik awiqawng ing ikaw awm ap kqawn thai uhy. 8 Vemih ak saikhqi taw vemyih khqi amyihna awm lawt kawm uh, vemyih ak ypnaka thlangkhqi boeih awm vemyih khqi amyihna awm lawt kawm uh. 9 Aw Israel ipkuikaw, Bawipa ypnala, anih taw cekkhqi ak hulkung ingkaw – cekkhqi a phuhqa na awm hy. 10 Aaron ipkuikaw aw, Bawipa ypnala – anih taw cekkhqi a hulkung ingkaw phuhqa na awm hy. 11 Amah ak kqjikhqi aw, Bawipa ypnala, anih taw cekkhqi ak hulkung ingkaw cekkhqi a phuhqa na awm hy. 12 Bawipa ing ningnih ani sim khqi loet a dawngawh zoseennaak ni pe kaw: Israel ipkuikaw ce zoseennaak pe kaw, 13 anih ing Bawipa ak kqjikhqi ce zoseennaak pe kaw – ak zawi awm ak bau awm. 14 Bawipa ing namah ingkaw na cakhqi ce pung a tai sak seh. 15 Khan ingkaw dek ak saikung Bawipa ing zoseennaak ni pek khqi seh. 16 Ak sang soeih khankhqi ce Bawipa koe na awm nawk, khawmdek ve thlanghjing a kut awh pehy. 17 Ak thi khqi dek khui ihaak na anuk cet khqi ing Bawipa am kylhcah uhy; 18 ningnih ing ni tuhgawwi awhkawng kumqui dyna Bawipa ve ni zoeksang uh. Bawipa taw kylhcah lah uh.

116 Kak awi ang zaak a dawngawh, Bawipa lungna nying; qeennaak thoeh doena kang kqangnaak awi za hy. 2 Ang haa ce kai benna ang keng law a dawngawh, ka hqing khui pyt amah ce khy vang nying. 3 Thihnaak qui ing ni zen nawh, phyi khuiikhanaak ce kak khan awh law hy; kyinaak ingkaw kawseetnaak ing ni noeng hy. (Sheol h7585) 4 Cawh Bawipang ming ce khy nying: "Aw Bawipa ni hul cang lah!" ti nying. 5 Bawipa taw qeennaak ing be nawh dyng hy; ningnih a Khawsa taw lungnaak ing ak be na awm hy. 6 Bawipa ting thlankqawng ce chung ak dah nawh; ka ngoe awh kai ce ni hul hy. 7 Aw ka hqingnaak vai awh dyi tlaih bai cang lah, kawith Bawipa taw na venawh leek hy. 8 Aw

Bawipa, nang ing ka hqingnaak ve thihsnaak awhkawng, ka mik qawi ve mikphli awhkawng, ka khaw qawi ve bahnaak awhkawng hul hawh hyk ti. **9** cawhtaw ak hqingkhqi qam na Bawipa haiaawh cet hawh kawng nyng. **10** Cangna nyng; ce a dawngawh, "A boena khuikha nyng," ti nyng. **11** Lylap nyng kqjih doena, "Thlangkhqi boeih ve qaaik ak kqawn khqi boeih ni," ti nyng. **12** Ka venawh a leeknaak boeih awh vawh Bawipa ve ikawmyihna ka peek tloep lawt lah voei? **13** Thaawngnaak boet ve hak soeng nyng saw Bawipang ming ce khy kawng nyng. **14** Ak thlangkhqi boeih a haiawh Bawipa venawh awi ka sa ce soep sak vang. **15** Bawipa mik huh awh a phu ak tlo soeih taw ak thlang ciimkhqi thih ve ni. **16** Aw Bawipa, kai ve na tyihzawih tang tang ni; kai taw na tyihzawih, na tyihzawih nu a ca na awm nyng; nang ing kenqui qui ce hlam law hawh hyk ti. **17** Zeelhaak awi kqawn lucik bulnaak ce na venawh nawn nyng saw Bawipang ming ce khy kawng nyng. **18** Ak thlangkhqi boeih a haiawh Bawipa venawh awi ka sa ce soep sak vang. **19** Bawipa ipkhu kawngma awh – Aw Jerusalem, nang lak lung awh soep sak vang nyng. Bawipa taw kyihcah lah uh.

117 Nangmih thlangphyn boeih aw, Bawipa ce kyihcah lah uh; nangmih thlangkhqi boeih aw, amah ce zoeksang lah uh. **2** Ikawthi ningnih ani lungnaak taw bau soeih nawh, Bawipa a ypwamnaak taw kumquid cak hy. Bawipa taw kyihcah lah uh.

118 Bawipa taw a leek a dawngawh, a venawh zeelnaak awi kqawn lah uh; a lungnaak awm kumquid dyna cak hy. **2** Israel ing, A lungnaak taw kumquid dyna cak hy," ti seh. **3** Aaron ipkhuwing: A lungnaak taw kumquid dyna cak hy," ti seh. **4** Bawipa ak kqjikhqi boeih ing, A lungnaak taw kumquid dyna cak hy," ti seh. **5** Ka khuikha awh Bawipa venawh khy nyng saw, amah ing hoelopoeng na awmnaak ing nim hlat hy. **6** Bawipa taw ka venawh a awm a dawngawh, ap kqjih ti kawng. Thlanghqing ing ikaw ni tina hly nawh nu. **7** Bawipa taw ka venawh awm nawh, kai anik bawmkung na awm hy. Ka qaalkhqi ce noengnaak ing toek kawng. **8** Thlanghqing ypnnaak anglakawh Bawipa awh thuk ve nep khqoet hy. **9** Boeikhqi ypnnaak anglakawh Bawipa awh thuk ve nep khqoet hy. **10** Qamtawm thlang ing nik chung khoep hlai hy, Bawipang ming ing cekkhqi ce noeng boeih nyng. **11** Hu haina ni mam hlai uhy, Bawipang ming ing cekkhqi ce noeng boeih nyng. **12** Khawimi amiyihna ni bawl khoep hlai uhy, a hling ak ui bang amiyihna qeng bang uhy; Bawipang ming ing cekkhqi ce noeng boeih nyng. **13** Kang tluk hlo dyna ka hu nakawng ni buuk hlai uhy, Bawipa ing ni hul hy. **14** Bawipa taw kak thaawmnaak ingkaw ka laa na awm hy; anih taw anik hulkung na awm hy. **15** Zeelhaak ingkaw noengaak ing khy lah uh, thlakdymghqi a hi imkhqi awh khy lah uh: "Bawipa ak tang ben kut ing ik-oeih ak bau soeih khqi sai hawh hy!" tinawh. **16** Bawipa awh tang ben kut ce pawm qu nawh: "Bawipa ak tang ben kut ing ik-oeih ak bau soeih khqi sai hawh hy!" ti uhy. **17** Am thi kawng nyng saw hqing hyn kawng, Bawipa a ik-oeih sai ce khypyi kawng. **18** Bawipa ing khatwteh na ni phep hawh hlai hy, thihsnaak a venna taw amni pehy. **19** Dyngnaak chawh ce kai aham awng law lah; kun nyng saw Bawipa a venawh zeelnaak awi kqawn lah vang. **20** Vetaw thlakdymghqi a konnaak Bawipa ak chawh na awm hy. **21** Nang ing na nim hlat a dawngawh, na venawh zeelnaak awi kqawn kawng; nang taw ka hulkung na awm hyk ti. **22** Ip sakungkhqi ing ami qoeng lung ce a kil awhkaw lung ak khoeng soeih na awm hawh hy; **23** ve ve Bawipa ing sai nawh, ningnih a mik huh awh kawpoek kyi na awm hy. **24** Ve a khawnghi ve Bawipa ing a sai na awm nawh zeel lah u sih. **25** Aw Bawipa, kaimih ve ni hul khqi lah; Aw Bawipa, zoseen kam awmnaak ce ni pe lah. **26** Bawipang ming ing ak law taw a zoseen hy. Bawipa im awhkawng zoseennaak ni pek khqi nyng. **27** Bawipa Khawsa na awm nawh, ningnih awh vangnaak ce hlaih law hy, lucik tloeng

aham qamsa ce bawkthang ki awh qui ing khit lah uh. **28** Nang taw ka Khawsa na awm hyk ti, na venawh zeelnaak awi kqawn kawng nyng; Nang taw ka Khawsa na awm hyk ti, nang ce ni zoeksang kawng. **29** Bawipa taw a leek a dawngawh a venawh zeelnaak awi kqawn lah uh; a lungnaak taw kumquid cak hy.

119 A cehmaak lam coet amak kapkhqi ingkaw, Bawipa a cawngpyinaak amiyihna ak cekkhqi taw a zoseen hy. **2** Ak awipeek khoem nawh kawlung boeih ing amah ak suikhqi taw a zoseen hy. **3** Cekkhqi ing am sai thawlun unawh; anih a lam awh ce cet uhy. **4** Hqt boeih aham ak awm am cukkinaak awi ce nang ing cekkhqi ham taak pe hyk ti. **5** Aw nang ak awipeek khqi ce ka hqutnaak thai aham ka lamkhqi ve cak seh! **6** Nang ak awipeek khqi boeih ce kak poek awh chahqai na am awm ti kawng. **7** Nang a koe ak dyng cawngpyinaak awikhqi ka cawng amiyihna kawlung dyngnaak ing namah ce nim kyihcah vang. **8** Nak awipeek khqi ce hqut bit kawng; koeh ni qoeng hyt cang. **9** Ikwamihna taithym ing a lam ce a ciimcaih sak thainaak kaw? Nak awi amiyihna khaw a saknaak amiyihna a ciimcaih sak thai kaw? **10** Kak kawlung boeih ing nang ce ni sui nyng, nak awipeek awhkawng koeh ning pleng sak. **11** Nang oell nawh am ka thawlhaak aham kam thin kak kawk khuiawh nak awi ve thuh hawh nyng. **12** Aw Bawipa, nang a venawh thangleeknaak awm seh; nak awipeekkhqi ce ni cawngpyi lah. **13** Nam khak khui awhkawng ak cawn cawngpyinaak boeih ce ka hui ing kqawn nyng. **14** Bawipa awh ak zeel soeih thlang amiyihna nam cuk kiknaak awipeek ka hqut awh zeel nyng. **15** Nak awipeek khqi ce poek typ typ nyng na lamkhqi ce poek nyng. **16** Nak awipeek khqi awh zeel nyng saw; nak awi ce ak poek kaana am awm nyng. **17** Na tyihzawih a venawh ak leek sai law cang, cawhtaw hqing kawng nyng; nak awi ce ngai kawng nyng. **18** Na cawngpyinaak awi awhkawng kawpoek kyi ik-oeih khqi am ka huh thainaak aham koeh thuh law. **19** Khawmdtek awh khin na ni ka awm; nak awipeek ce kai aham koeh thuh law. **20** Nang ak awipeek ang ngai awh akihka hqingnaak ve ityk awh awm am rem thai hy. **21** Oek qu nawh seet ak hu khqi, nak awipeek ak pleng taak thlangkhqi ce nang ing toel hyk ti. **22** Nak awipeek khqi ce ka hqut a dawngawh, kqawn seetnaak ingkaw hulu sitnaak khqi ve khoe law lah. **23** Ukkungkhqi ing ngawicun unawh nik kqawn seet u seiawm, na tyihzawih ingtaw nak awipeek khqi ve ni ak poek hly tit ti hy. **24** Nam cuk kiknaak awipeek khqi ve ka zeelhaak na awm hy; cekkhqi ing kawpoek leeknaak ni pe uhy. **25** Dekvai awh helh hyt na awm nyng; nak awi amiyihna ka hqingnaak ve khoem law lah. **26** Ka lamkhqi ce kak kqawn thlaih awm nang ing nim hlat hyk ti; namah ak awipeek khqi ce ni cawngpyi lah. **27** Nang ing nani cawngpyi awipeek khqi ce ning zaksim sak lah; cawthaw nak kawpoek kyi ik-oeih khqi ce poek typ typ kawng nyng. **28** Ka hqingnaak ve kawseet doena ak tha hoet hy, nak awi amiyihna kak tha awm law sak tlaih lah. **29** Qaainaak lam awh am ka cehmaak aham ni hoep lah; na cawngpyinaak awi ing nim qeen cang. **30** Awitak lam ce tyk hawh nyng; Na cawngpyinaak awi awh kak kawlung ling hawh nyng. **31** Aw Bawipa, nam cuk kiknaak awipeek ce tu qap hawh nyng, chah koeh ni phyih sak. **32** Nang ing kak kawlung na loet sak hawh a dawngawh, nak awipeek naak lam awh dawng nyng. **33** Aw Bawipa, nak awitlyhnaak ce ka hqutnaak thai aham ni cawngpyi lah; cawhtaw a dyt dyna hqut kawng nyng. **34** Zaksim thainaak ni pe lah, cawhtaw na cawngpyinaak awi ce khoem kawng nyng saw kak kawlung boeih ing hqut kawng nyng. **35** Nak awipeeknaak lam awh ni hqui ni sawi lah; ce a dawngawh ni zeelnaak ka huh. **36** Ak lawn ngaihnaak ben am nawh nam cuk kiknaak benna kak kawlung ve hawi law lah. **37** Aphu amak awm ik-oeih benna ka mik qawi ve koeh dai sak nawh; nak awi amiyihna ka hqingnaak ve khoem law lah. **38** Kqjih na na awm thainaak

aham, na tyihzawih a venawh ve nak awipeek ve soep sak lah. **39** Kak kqjih soeih ming leeknaak ve lo law valh lah, kawtih nang a cawngpyinaak awi taw nep hy. **40** Nak awipeek khqi ce ngai mah nyng! Na dyngnaak awh ka hqingnaak ve khoem law lah. **41** Aw Bawipa, amak dyt thai na lungnaak ingkaw nak awi taaknaak amyihna na hulnaak ce ka venna law seh; **42** nak awi ce ka ypnnaak a dawngawh, kai anik kqawnsekung ce hlat kawng nyng. **43** Kam khak khui awhkawng nak awitak ce koeh lo law voel, kawtih nang a cawngpyinaak awi awh ni kang ngaih-unaak a awm. **44** Na cawngpyinaak awi ce ngai loet kawng nyng, kumqui ingkaw kumqui dyna. **45** Ngaihding na cet a cawn vang nyng, kawtih nak awipeek ce hu hawn nyng. **46** Sangpahrangkhqi haiawh nak awipeekkhqi ce kqawn kawng nyng saw, chahqai na am awm ti kawng, **47** nak awipeekkhqi ce ka lungnaak a dawngawh zeelnaak ta nyng. **48** Ka lungnaak awi peek benna ka kut ve hak phyl nyng saw nak awitlyhnaak awipeekkhqi ce poek typ typ nyng. **49** Na tyihzawih a venawh awi na peek ce sim loet lah, nang ing ni ngaih-unaak ce nani peek. **50** Ka khuikhka awh kang ngaihqepnaak taw ve ni: Nak awikamnaak ing ka hqingnaak khoem law hy. **51** Uephnaak taak kaana ak oek qukhqi ing ni qaih na uhy, cehlai na cawngpyinaak awi ce am pleng taak nyng. **52** Aw Bawipa, syn awhkaw na cawngpyinaak awi khqi ce sim loet nyng saw, cekkhqi awh ngaihqepnaak hu nyng. **53** Thlakche khqi nang a cawngpyinaak awi ak qoeng khqi awh ngaih seeetaak ing nim tu khak hy. **54** Ka awm ihaaka boeih awh nang ak awitlyhnaak awipeekkhqi ve ka laa ak leek soeih na awm hy. **55** Aw Bawipa, khawmthan awh nang ming ce poek nyng, na cawngpyinaak awi khqi ce khoem kawng nyng. **56** Nak awipeek khqi hqut ve: Ka sai khawi na awm hawh hy. **57** Aw Bawipa, nang taw ka taham na awm hyk ti; nak awikhqi ce hqut aham awi ta hawh nyng. **58** Kak kawlung boeih ing na haai ce sui hawh nyng; nak awitaak amyihna nim qeen lah. **59** Ka cehnaak lamkhqi ve poek nyng saw nak awipeeknaak benna khaw khan law hawh nyng. **60** Nak awipeek khqi ce yih kaana ang tawnna hqut hlai vang. **61** Thlakchekhqi ing qui ing ni pin u seiawm, nang a cawngpyinaak awi ce am hilh ti kawng. **62** Na cawngpyinaak awihdyingkhqi awh thanlung awh na venawh zeelnaak awi kqawn aham tho nyng. **63** Kai taw nang ak kqjikhqi boeih ingkaw nang ak awipeek ak hqutkhqi boeih a pyi na awm nyng. **64** Aw Bawipa, khawmdek ve na lungnaak ing bengen hy; nak awitlyh awipeekkhqi ce ni cawngpyi lah. **65** Aw Bawipa, nak awi amyihna na tyihzawih a venawh ik-oeh leek sai lah. **66** Cyihnaak ingkaw awideng thainaak ce ni pe lah, kawtih nak awipeekkhqi ce ni kak cangnaak. **67** Ka khuikhka hlan awh lam pleng hlai nyng, tuh taw nak awi ngai hawh nyng. **68** Nang taw leek hyk ti, ik-oeh na sai awm leek hy; nak awitlyhnaak awipeekkhqi ce ni cawngpyi lah. **69** Ak oek qukhqi ing qaai kqawn ing ni zan hlai uhy, kak kawlung boeih ing nak awipeekkhqi ce hqut nyng. **70** Cekkhqi ak kawlung taw qil soeih hy, cehlai kai taw nang a cawngpyinaak awi awh ni ka zeel hy. **71** Ka khuikhka ve kai aham leek hy, cawh ni nang ak awitlyhnaak awipeekkhqi ce ka cawng hly thai. **72** Sui ngun thong sang anglakawh nam kha awhkaw cawngpyinaak awi ce ni kai aham a phu a tlawh khqoet hy. **73** Na kut qawi ing ni sai nawh ani syn ni; nak awipeekkhqi ce ka cawng thainaak aham zaksimnaak ni pe lah. **74** Nang anik kqjikhqi ing kai ami huw ahw zeel u seh, kai ing nang ak awi awh ni ngaih-unaak ka taak. **75** Aw Bawipa, nang a cawngpyinaak awikhqi taw dyng nawh, na ypwamnaak ing kai ni khuikhka sak hy tice sim nyng. **76** Na tyihzawih a venawh awi na taak amyihna, amak dyt thai na lungnaak ve kang ngaihqepnaak na awm law seh. **77** Ka hqingnaak aham nam qeenaaak ce ka venna law lah seh, na cawngpyinaak awi taw ka zeelnaak ni. **78** Akawng a awm kaana kak khan awh ik-oeh che ak sai ak oek qukhqi ce chah phyi

u seh; cehlai kai ingtaw nak awipeekkhqi ce poek typ typ vang nyng. **79** Nang nik kqjih nawh nang ak awipeek ak zasimkhqi taw kai benna mang u seh. **80** Chah am ka phyihnaak aham, nak awitlyhnaak awipeek benna kak kawlung ce coet a kap kaana awm seh. **81** Ka hqingnaak ing na hulnaak ang ngai aih awh zai hqoeng hy; cehlai nak awh ngaih-unaak ce ta nyng. **82** Ka mik qawi ing nak awikamnaak ce dan hlai hy, am huhy; "Itky awh ngaih nani qep sak kaw?" ti nyng. **83** Maikhu anglakawhkaw mehvyn um amyihna awm nyng seiawm, nak awitlyhnaak awipeekkhqi ce am hilh nyng. **84** Na tyihzawih ing ve iqyt nu ani qeh kaw? Kai anik thekhanaak thlangkhqi ce ityk awh na toel kaw? **85** Nang a cawngpyinaak awi ing ak kahl na, ak oek qukhqi ing kai aham lawk-kqawng co law uhy. **86** Nak awipeekkhqi boeih ve a ypwam hy; ni hil lah, kawtih thlangkhqi ing akawng a awm kaana ni the ni kha na uhy. **87** Khawmdek awhkawng ni khoe hlo uhy, cehlai nak awipeekkhqi ce am qoeng nyng. **88** Na lungnaak ing ka hqingnaak ve khoem law lah, cawh ni kam kha awhkaw cuk kiknaak awipeekkhqi ce kang ngai hly. **89** Aw Bawipa, nak awi taw kum qui dy cak hy; hawk khan awh ak cak na dyi hy. **90** Na yp awmnaak ce cadil naa dyna cak hy; nang ing khawmdek ve caksak nawh, awm poe hy. **91** Tuh dy na cawngpyinaak awi ve cak hy, soekkep boeih ing na bi ve bi uhy. **92** Na cawngpyinaak awi ce ka zeelnaak na ama na awm mantaw, khuikhka doena ana thi hawh kawng. **93** Nak awipeekkhqi ce ityk awh awm am hilh ti kawng, cekkhqi ing ni ka hqingnaak ve na khoem law. **94** Ni hil lah nang a koe na ni ka awm; nak awipeekkhqi ce sui nyng hu hawh nyng. **95** Thlakchekhqi ing kai plawci sak aham ni qeh uhy, cehlai nang am cuk kiknaak awipeekkhqi ce ni kak poek hy. **96** Ik-oeh boeih a soepnaak a dawng ce hu hawh nyng; cehlai nang ak awipeekkhqi taw a dythaak am awm hy. **97** Aw, na cawngpyinaak awi ce lungna mah nyng! Khawnghi zung poek typ typ khing nyng. **98** Ka qaal khqjeng lak awh nang ak awipeekkhqi ing ni cyih sak khqoet hy; kawtih cekkhqi ce ka venawh awm poe uhy. **99** Nam cuk kiknaak awipeekkhqi ce kak poek typ typ a dawngawh, ka cawngpyikungkhqi boeih anglakawh poek thainaak tak khqoet nyng. **100** Nak awipeekkhqi ce ka hqut a dawngawh, a hqamcakhqi anglakawh poek thainaak tak khqoet nyng. **101** Nak awi ka hqut thainaak aham lap che saqu awh khaw am poek nyng. **102** Namah qoe ing nani cawngpyi hawh a dawngawh, na cawngpyinaak awi awhkawng am pleng qunyng. **103** Nak awikhqi ce kam tan awh awi soeih nawh, kam kha awh khawi anglakawh awi soeih mah hy! **104** Nak awipeekkhqi awhkawng cyihnaak hu nyng; ce a dawngawh amak thym lam boeih ce sawh na nyng. **105** Nak awi taw ka khaw aham maihchoei na awm nawh ka lam aham vangnaak na awm hy. **106** Nang a koe ak dyng cawngpyinaakkhqi ce ka hqut thainaak aham, awi sa nyng saw caksak hawh nyng. **107** Khuikhka soeih nyng; Aw Bawipa, nak awi amyihna ka hqingnaak ve khoem law lah. **108** Aw Bawipa, kam kha ing ngaihnaak ing a nim kyihcah ve, do law nawh na cawngpyinaak awikhqi ce ni cawngpyi lah. **109** Ka hqingnaak ve ka kut awh tu qap hlai nyng, na cawngpyinaak awi ce am hilh ti kawng nyng. **110** Thlakchekhqi ing thang dun law hlai uhy, nak awipeeknaak awhkawng am pleng nyng. **111** Nam cuk kiknaak awipeekkhqi ve ka kumqui qo na awm nawh; kak kawlung zeelnaak na awm hy. **112** A dyt dyna nak awitlyh awipeekkhqi hqut aham kak kawlung qawn hawh nyng. **113** Kawlung pakkhii na ak ta thlang ce sawh na nyng, cehlai nani cawngsak awi ce lungna nyng. **114** Nang taw kang thuknaak ingkaw ka phuhqa na awm hyk ti; nak awi awh ngaih-unaak ta nyng. **115** Nangmih ik-oeh che ak saikhqi, ka ven awhkawng cet lah uh, ka Khawsak awipeekkhqi ngai na lah vang! **116** Nak awikamnaak amyihna caksak lah, cawhtaw hqing kawng nyng; kang ngaih-unaak akawng awhkawng chah koeh ni

phyih sak. **117** Nim tu khak lah, cawhtaw hulna awm kawng; nak awitlyhnaak awipeekkhqi ce poek quiqah kawng nyng. **118** Nak awitlyhnaak awipeek awhkawng ak pleng khqi boeih ce nang ing qoeng hyt ti, mingmih a qaai kqawnnaak ce a hqawng a h qap mai ni. **119** Khawmdek awh thlak chekhqi boeih ce nang ing thi-ek tui amyihna na hui ban awh; nam cuk kiknaak awipeekkhqi ce lungna nyng. **120** Nang anik kqih aih awh ka sa ve tyn hy; na cawngpyinaakawi kqih doena dyi hqoeng nyng. **121** Ak thym ingkaw ak dyng ce sai hawh nyng; kai anि husit thlangkhqi kut awh koeh ni hal hyt. **122** Na tyihzawih leeknaak aham ak khoeng na sai law sang lah; ak oek qukhqi ing koeh ni husit khqi seh. **123** Nang a hulnaak ingkaw ak dyng awikammaak ce sui vang nyng, ka mik awm hyp hqoeng hawh hy. **124** Na lungnaak ing na tyihzawih ve ngai cang nawk, nak awitlyhnaak awipeekkhqi ce cawngpyi sang. **125** Na tyihzawih na ni ka awm; nam cuk kiknaak awipeek kang zaksimmaak thai aham phekbo thainaak kawlung ni pe leah. **126** Aw Bawipa, tuh ve sai tym hawh ni; na cawngpyinaakawi hqei huili na awm hawh hy. **127** Sui anglakawh, sui tuici anglakawh nang ak awipeekkhqi ce ka lungnaak a dawngawh; **128** nak awipeekkhqi ce thym hy ka ti a dawngawh, amak thym lam boeih ce sawh na nyng. **129** Nam cuk kiknaak awikhqi ve kawpoek kyi na awm hy; ce a dawngawh hqut nyng. **130** Ak dai qu nak awi ing vangnaak ce ni pehy; thlang mailakhqvi venawh zaksimmaak ce pehy. **131** Nak awipeekkhqi ce kang ngai a dawngawh, kam kha ng nyng saw khang hqi hawp hqoeng nyng. **132** Nang ming ak lungnaak thlangkhqi venawh na sai khawi amyihna, kai benna hawi nawh nim queen sang lah. **133** Nak awi amyihna ka khaw khamkhqi ve hawi law lah; thawlhnak ing koeh ni uk seh. **134** Nak awipeekkhqi ka hqut thainaak aham, thlangkhqi a huhsitnaak ak khui awhkawng ni hul lah. **135** Na tyihzawih khan awh na haai vang sak nawh nak awitlyhnaak awipeekkhqi ce ni cawngpyi lah. **136** Na cawngsak naak awikhqi a mami hqut a dawngawh, ka mik qawi awhkawng ka mikphli tuikhqi ve lawngca tui amyihna lawng hy. **137** Aw Bawipa, nang taw dyng ticksaw, na cawngpyinaak awikhqi awm thym hy. **138** Cuk kiknaak awipeek na taakhqi ve dyng nawk; a ypwam soeih hy. **139** Ka qaalkhqi ing nak awi ce ami hilh a dawngawh ka ypwamnaak ing ni hawn sak zip hawh hy. **140** Nak awikammaak khqi ce ak nep cana noek a dak na awm hawh nawh, ce ce na tyihzawih ing ve lungna hy. **141** Ak nem na awm nyng thlang a huhsit na awm nyng seiawm, nak awipeekkhqi ce am hilh qoe nyng. **142** Na dyngnaak taw kumqui dyna awm nawh nak caksaknaak awikhqi ce thym hy. **143** Kyinaak ingkaw khuikhanaak ing ni sing bai seiawm, nak awipeekkhqi ce ka zeelnaak na awm hy. **144** Nam cuk kiknaak awipeekkhqi ce kumqui dy thym hy; ka hqingnaak aham zaksimmaak ce ni pe lah. **145** Aw Bawipa, kak kawlung boeih ing nik khy nyng, nang ing nim hlat lah, cawhtaw nawl peeknaak awitlyhkhqi boeih ce hqut kawng nyng. **146** Nang ni ka nik khy; ni hul lah cawhtaw nam cuk kiknaak awipeekkhqi ce hqut kawng. **147** Khaw a dai hlan awh tho nung saw bawmnaak thoeh doena kqang nyng; nak awi awh ngaih-unaa ce ta nyng. **148** Na awitaak ce kak poeknaak typ typ aham, thanlung a poeng hlan dy ka mik dai phat hy. **149** Na lungnaak amyihna kak khynaak awi ce ngai law lah; Aw Bawipa na cawngpyinaakawi amyihna ka hqingnaak ve khoem law lah. **150** Ak che ik-oehingkaw kai anik tengkhqi zoe law khqoet uhy, cehlai nang a cawngpyinaakawi iringtaw hla quhy. **151** Cehlai, Aw Bawipa, nang taw zoe hyt ti, nak awipeekkhqi boeih awm thym hy. **152** Ce miikhqi ce kumqui dyna nang ing caksak hawh hyt ti, tice nam cuk kiknaak awipeek awhkawng sim hawh nyng. **153** Kak khuikhanaak ve toek law nawhtaw ni hul lah, kawtih na cawngpyinaakawi ce am hilh nyng. **154** Kai akawng a dawngawh ni hul nawhtaw ni thaawng lah; na awikammaak amyihna ka

hqingnaak ve khoem law lah. **155** Hulnaak ve thlakchekhqi hamna taw hla hy, kawtih cekkhqi ing nang a awitlyhnaak awipeek ce am sui uhy. **156** Aw Bawipa, na lungnaak taw bau soeih hy; na cawngpyinaakawi amyihna ka hqingnaak ve khoem law lah. **157** Kai anik thekhnaak qaalikhqi ve kqeng soeih uhy, cehlai nang am cuk kiknaak awipeek awhkawng am pleng nyng. **158** Cangaaka amak ta thlangkhqi ce tyih doena toek nyng, kawtih cekkhqi ing nak awi ce am hqut uhy. **159** Nak awipeekkhqi izah dy ka lungnaak tive toek lah; Aw Bawipa, na lungnaak amyihna ka hqingnaak ve khoem law lah. **160** Nang ak awipeekkhqi boeih ve thym hy; nang a koe ak dyng cawngpyinaakawi hqut kumqui dy cak hy. **161** Akawng a awm kaana ukkungkhqi ing ni thekha na uhy, cehlai kak kawlung taw nang ak awi awh tyn hy. **162** Kawnthem ak hu moek thlang amyihna nak awikammaak awh seel nyng. **163** Amak thym ce sawh na nyng saw tyn nyng, cehlai na cawngpyinaakawi taw lungna nyng. **164** Ak thym nang a cawngpyinaakawi hqut kumqui dy cak hy. **165** Nang a cawngpyinaakawi ak lungnaak thlangkhqi ingtaw ngaihqeepnaak bau soeih ta uhy; ikaw ingawm a mingmih ce am bah sak khqi thai hy. **166** Aw Bawipa nang a hulnaak ce lamtoen nyng saw, nang ak awipeekkhqi ce hqut nyng. **167** Nang ak awipeekkhqi ce ka lungnaak a dawngawh hqut nyng. **168** Nang ak awipeekkhqi ingkaw cuk kiknaak awipeekkhqi ce hqut nyng, kawtih ka lam boeih ce nang ing sim hyt ti. **169** Aw Bawipa, kang kqangnaakawi na hai pha law seh; nak awi amyihna zaksimmaak ce ni pe lah. **170** Qeenaaak ka thoeh law ve na hai pha law seh; na awikammaak amyihna nang ing ni hul lah. **171** Ka hui ve kyihcahaak ing bengen seh, kawtih namah ing namah a awitlyhnaak awipeekkhqi ce ni cawngpyi hyt ti. **172** Kam lai ing nak awi ce laa na sa seh, kawtih nak awipeekkhqi taw dyng hy. **173** Na kut ce kai bawmnaak aham a oepchoeh na awm lah seh, kawtih nang ak awipeek ce ni kak tyh hawh. **174** Aw Bawipa, nang a hulnaak ce ngai soeih nyng, nang a cawngpyinaakawi taw ka zeelnaak na awm hy. **175** Ka nim kyihcahaak ahama, ni hqing sak lah, na cawngpyinaakawi ing dyihpiyih se. **176** Tuu ak qeng amyihna lam hang hqoeng hawh nyng. Na tyihzawih ve sui lah, kawtih nak awipeekkhqi ce am hilh nyng.

120 Ka khuikhwa awh Bawipa ce khy nyng saw, anih ing nim hlat law hy. **2** Aw Bawipa, qaai ak kqawn huikhqi ingkaw qaai kqawn na ak nget laikhqi anglakawh kawng ni hul lah. **3** Aw qaai kqawn na ak nget hui lai nang, nang ak khan awh anih ing ikaw a sai kaw, cekcoengawh ikaw ak awn bai? **4** Kaw ak awmkhqi a la sumkhqi ing nang ce ni toel kawmsaw, innawt thing mai alh ing ni toel kaw. **5** Kedar awhkaw hi im anglakawh awm nawh, Meshqek awh ak awm ve kai aham khaw map mah hy! **6** Roepnaak ak sawhnaak thlang anglakawh ka awm ve sang soeih hawh hy. **7** Kai taw qoepnaak ak ngaih thlang na awm nyng; cehlai awi kak kqawn awh, qaal thawh aham ngaih lat uhy.

121 Hana kawng nu kai anik bawmkung a law lah kaw? **1** Ti nyng tlang benna mik hak dai nyng – **2** Kai anik bawmkung taw dek ingkaw khan ak saikung, Bawipa venna kawng ni a law. **3** Anih ing na khaw ce am ning bah sak kawmsaw – nang anik khoemkung ce am ngam kawmsaw ip awm am ip kaw. **5** Bawipa ing nang ce ni qeh hy – Bawipa taw nak tang ben awh nang anik chungkung na awm hy; **6** khawnghyp awh khawmik ing amni eng kawmsaw, khawmthan awh pihla ing amni eng bai kaw. **7** Bawipa ing nganbawh soepkep khui awhkawng ni khoem kawmsaw – na hqingnaak ce khoem law kaw; **8** Bawipa ing na lawnnaak ingkaw na cehnaak boeih awh tuh kawng kumqui dy ni qeh loet kaw.

122 Bawipa a im na cet u sih," tinawh amik kqawn law awh zeel soeih nyng. 2 Aw Jerusalem, kaimih a khaw khqi ve vawng chawmkeng awh dyi hawh uhy. 3 Jerusalem taw khawk bau ak zoei cana ami sak amyihna sak na awm hy. 4 Israel a venawh cuk kiknaak awipeek peek na a awm amyihna, Bawipang ming kyiinch ham, cawh ce thlang pilnamkhqi, Bawipa a pilnam khqi hang cet uhy. 5 Cawh ce awidengnaak boei ngawihdoelh khqi, David ipkhui awhkaw boei ngawihdoelh khqi awm hy. 6 Jerusalem ngaihqepnaak aham cykcah lah uh: "Nang anik lungnaak thlangkhqi ce qalmawng na awm u seh. 7 Na vawng khuiawh ngaihqepnaak awm seitaw, na boei awmnak im kqang ngaihqepnaak awm seh." 8 Ka koeinaa ingkaw pylikhqi awh, "Nang ak khuiawh ngaihqepnaak awm seh," ti kawng nyng. 9 Bawipa ningnih Khawsa im awh, nang a boemangnaak ce sui kawng nyng.

123 Nang a venawh khan na boei ngawihdoelh ak awm nang a venawh, ka mik hak dai law nyng. 2 Tamnaakhqi mik ing ami boei a kut ami toek amyihna, tyihzawih nukhqi ing ami boei nu a kut ami toek amyihna, am qeennaak ce ningnih a venawh ang dang sak hlan dy, kaimih a mik ing Bawipa ningnih a Khawsa ce toek hy. 3 Kaimih ve nim qeen khqi cang, Aw Bawipa, kaimih ve nim qeen khqi cang, thlang a huhsitnaak yh khing hawh unyng. 4 Ak oek qukhqi a qaihsai zawk khing hawh unyng saw, ak oek qukhqi a huhsitnaak awm zawk khing hawh aih unyng.

124 Bawipa mah ningnih benna ama awm mai mantaw – Israelkhqi ing kqawn seh – 2 Bawipa mah ningnih benna ama awm mai mantaw, thlangkhqi ing ningnih ani tuk khqi awh, 3 cekkhqi ing ningnih ak khan awh amik kaw a so awh; ningnih ce a hqing na nik dahi khqi hawh kaw; 4 tuibau ing ningnih ce ni sing malh kawmsaw, tuibak ce ningnih ak khan na tho hawh kaw, 5 tuibau tha ak awm ing ningnih ce ni zawn khqi hawh kaw. 6 Cekkhqi a ha ing ningnih am choek nawh, Bawipa venawh thangleeknaak awm seh. 7 Pha a ham dawng ak dunkung ak dawng awhkawng a hlawng pha amyihna ningnih taw ni awm uhy; dawnkhqui ce boet nawh, ningnih ce ni loet uhy. 8 Ningnih bawmnaak taw dek ingkaw khan ak saikung, Bawipang ming awh ni a awm.

125 Bawipa ak ypnaak thlangkhqi taw amak tyn qoe kumqui dyna ak cak Zion tlang ing myih hy. 2 Tlang ing Jerusalem ak chung khoep amyihna, Bawipa ing tuh kawng kumqui dyna ak thlangkhqi ce chung sih khqi hy. 3 Thlakche a boei sawngqawh ing thlak dyngkhqi a gam khuiawh am awm loet thai ti kaw, cemyih mantaw thlak dyngkhqi ing ami kut ce ik-oeih che sainaak aham hawna hau kawm uh. 4 Aw Bawipa, thlakchekhqi, kawlung ak dyng thlangkhqi venawh ak leek ik-oeih sai lah. 5 Cehlai lap kawi awh ak pleng thlangkhqi cetaw amak leek ik-oeih ak saikhqi mi Bawipa ing hqek baat kaw. Israel ak khan awh ngaihqepnaak awm seh.

126 Qaal ing am tukhqi ce Bawipa ing Zion na a sawi law khqi tlaih awh, kaimih taw mang ak hukhqi amyihna awm unyng. 2 Ningnih am khakhqi taw qaihaak ing be nawh, nim laikhqi taw zeelnaak laa khqi ing be uhy. Cawh thlangphyn khqi anglakawh, "Bawipa ing ik-oeih bau soeih cekkhqi hamna sai pehy," tinawh kqawn uhy. 3 Bawipa ing ik-oeih bau soeih ningnih aham sai law hawh hy, cedawngawh ningnih taw zeelnaak ing ni be uhy. 4 Aw Bawipa, ni hu awhkaw zoseennaak ce ni pe tlaih lah, Negev a lawngcakhqi amyihna ak awm ce. 5 Mikphli ing ak sawkhqi ing zeelnaak laa sak doena aat kawm uh. 6 Grang doena camci saw aham ak cet khqi ing, cangvui pawm doena zeelnaak laa sak ing hlat law tlaih kawm uh.

127 Bawipa ing im ama sak awhtaw, ip sakungkhqi ing a hoi nani bi ami sai. Bawipa ing khawk bau ama qeh awhtaw, qaltoeng khqi ing a hoi nani ami qeh hy. 2 A hoi na mymcang hqit awh tho unawh buh ai thainaak aham khawmy ben than dy bi sai uhy ti – anih ingkaw a lungnaak thlangkhqi venawh ihnaak ce pehy. 3 Cakpa khqi ve Bawipa venawh kaw qo nik pangkhqi ni, canaa khqi ve amah a venawh kaw kutdo peek khqi ni. 4 Tha awm hui awhkaw cakpa cun khqi ve qalkap kawk awm kut awhkaw la khqi ing myih hy. 5 A lacung ce ce miikhqi ing ak be hyp na ak ta thlang taw a zoseen hy. Vawkchawh awh a qaalkhqi mi aming noek qu awh chah am phyi kawm uh.

128 Bawipa kqih nawh, a lam awh ak cet thlangkhqi boeih taw a zoseen hy. 2 Na bibinaa phu ak thaih ce ai kawp ti; zoseennaak ingkaw boeimangnaak ce nang aham awm kaw. 3 Na zu ce na ipkhui awh misur thaih ak qah soeih amyihna awm kawmsaw; na capakhqi ce beihdung kung awh olive dil amyihna awm kaw. 4 Bawipa ak kqih ak thlangkhqi taw cemyihna ce awm kawn uh. 5 Bawipa ing Zion awhkawng ka hqing khui pyt zoseennaak ni pekaw; Jerusalem awhkaw boeimangnaak ce hu kawp ti, 6 na hqinglung sang kawmsaw na cakhqi a cakhqi patoe ce hu kawp ti. Israel ak khan awh ngaihqepnaak awm seh.

129 Ka naasen awhkawng cekkhqi ing ni husit hawh uhy, tina – Israelkhqi ing amik kqawnnaak taw – 2 cekkhqi ing ka naasen awhkawng ni husit hilai uhy, amni noeng khawi uhy. 3 Lai ak nawkkhqi ing kam tingkawh awh lai nawk unawh, a qytynaak a ngaw sim hqa hy. 4 Cehlai Bawipa taw dyng hy; anih eng thlakchekhqi a qui ce boet law nawh ni loet sak hy. 5 Zion ak sawhnaak thlangkhqi boeih taw chah doena hlat u seh. 6 Iptih na sai ak cawt, a tai hlan awh ak zai nawn amyihna awm u seh; 7 cemyih cetaw ak aatkung ing a kut awh ap pawm nawh, ak cawikung ingawm a ban awh ak be na ap tawm bai hy. 8 Ce a hun awh ak cet saqui ing, "Bawipa a zoseennaak nak khan awh awm seh; Bawipang ming ing zoseennaak ni pe nyng," am tina kawn.

130 Aw Bawipa, a dungnaak hun awhkawng nang a venawh khy nyng. 2 Aw Bawipa, kak awi ve ngai law lah. Qeenaaak thoeh doena na venawh kak khynaak benna nang haa keng law lah. 3 Aw Bawipa, nang ing thawlhaaka khqi ve na khoem mai mantaw, Aw Bawipa, u nu ak dyi thai kaw? 4 Cehlai namah a venawh queenkaw ngainaak awm hy; cedawngawh kqih awm na awm hyk ti. 5 Bawipa ce qeh nyng, ka hqingnaak ing qeh hy, ak awi awh kang ngaih-unaak ce awm hy. 6 Qaltoengkhqi ing mymcang ami qehdam anglakawh, ka hqingnaak ing Bawipa lamtoen hy. 7 Aw Israel Bawipa awh nang ngaih-unaak ce ta lah, kawthi Bawipa awh amak dyt thai lungnaak ing thaawngnaak soep ce awm hy. 8 Amah ing Israelkhqi ce a thawlhaakkhqi boeih awhkawng hul kaw.

131 Aw Bawipa, kak kawlung ve am oek qu nawh, ka mikdai awm am sang hy, kamah ingkaw kamah ak bau soeih ik-oeih awh am pe qunyng saw kawpoek kyi soeih khqi awh awm am paa nyng. 2 Ka hqingnaak ve oei nyng saw awm sak poek poek nyng; naaca ing a nu suk a nawn amyihna, suk awk ak nawn naacamyihna kak khuiawh ka hqingnaak ve awm hy. 3 Aw Israel, tuh kawng kumqui dyna nang ngaih-unaak ce Bawipa awh ta lah.

132 Aw Bawipa, David a khuikha ce sim loet lah. 2 Anih ing Bawipa venawh awi sa nawh Jakob a Thak awm Thlang a venawh awikamnaak ta hawh hy: 3 Ka ipkhui awh am kun kawng nyng saw ih hun awm am pan kawng nyng – 4 ka mik qawi ve am ih sak kawng nyng saw, ka mik khu qawi awm am ngam tikaw, 5 Bawipa ham hun ka huh hlan dy," tinawh awi ta hawh

nyng. 6 Ce ce Ephrathah awh ning za unawh, Jaar hun awh ce ak khan na ni cet hawh uhy: 7 Anih a awmnaak hun cet u seitaw; a khawkung awh anih ce bawk lah u sih, 8 Aw Bawipa, tho nawhtaw nang dynnaak hun na law lah, namah ingkaw nak thaawnmaak bawm ingqawi law nih. 9 Na khawsoeikhqi ing dyngnaak ing thoeihcam qu u seitaw; na thlakciimkhqi ing awmhly laa sa u seh.” 10 Na tyihzawih David ak caming, situi na syp thlang koeh qoeng. 11 Bawipa ing David a venawh awi sa naws, awikamnaak ak cak ce ityk awh awm huna am hlat taak tikaw: “Na caksak anglakawkaw thlang pynoet ce na boei ngawihdoelh awh ngawih sak kawng nyng. 12 Na cakhqi ing ka paipi ve khoom unawh cuk kiknaa awipeek ak cawngypy khqi ce ami hqut awhtaw, cekkhqi a cakhqi ing na boei ngawihdoelh awh kumqui ingkaw kumqui dy ngawi kawm uh. 13 Ikawith Zion ce Bawipa ing tyk nawh; a awmnaak aham ce a hun ce a ngeoe a dawngawh tyk hy: 14 Ve ve kumqui ingkaw kumqui kang dynnaak hun na awm kaw; ve ve kak kawlung ing a ngeoe a dawngawh, vawh boei na ngawi loet hawh kawng nyng. 15 Anih ce awk a ai khawzah ing zoseennaak pe kawng nyng saw; anih a khawdeng thlangkhqi ce ak phoen phyi sak kawng. 16 A khawsoeikhqi ve huilaak ing chung ak dah khqi kawng nyng saw, a thlakciimkhqi ing zeelnaak laa ang qui na sa kawm uh. 17 Vawh David aham kii cawn sak kawng nyng saw situi ka syp thlang aham maivang taak pe kawng. 18 A qaalkhqi ce chah phyih ing sing pek khqi kawng nyng, cehlai anih a lu awhkaw boei lumyk cetaw vang kaw.”

133 Cingnahqui hui oet na ak awm taw leek nawh ngaih awm mah hy! 2 Lu awh situi phuk tlo ing syp naws, khapkho dyna ak lawng, Aaron am khakkho dyna ak lawng, a angki hawng dyna anuk lawng amyihna awm hy. 3 Hermon awhkaw dam tui Zion Tlang na anuk lawng amyihna awm hy. Cawh Bawipa ing kumqui dy hqingnaak zoseennaak ce pehy.

134 Nangmih khawmthan awh Bawipa im na bi ak saikhqi, Bawipa ce kyihcah lah uh. 2 A hun ciim awh nami kut ce phyl unawh taw Bawipa ce kyihcah lah uh. 3 Khan ingkaw dek ak saikung, Bawipa ing Zion awhkawng nangmih ce zoseennaak ni pek khqi seh.

135 Bawipa taw kyihcah lah uh. Bawipang ming ce kyihcah lah uh; nangmih Bawipa a tyihzawihkhqi aw, amah ce kyihcah lah uh, 2 nangmih Bawipa ipkhui awh bi ak saikhqi, ningnih Khawsa ipkhui kawngma awb bi ak saikhqi, Bawipa ce kyihcah lah uh. 3 Bawipa taw a leek a dawngawh, Bawipa ce kyihcah lah uh; ang ming kyihcahnaak laa sa lah uh, kawtih ce ce ngaih awm hy. 4 Ikawith Bawipa ing Jakob ce amah aham tyk nawh, Israel ce amah aham kawk bawm phuk tlo na tavy. 5 Bawipa taw bau naws, khawsa boeih anglakawk bau hy tice sim nyng. 6 Khan ingkaw dek, tuicunli ingkaw tuihdungkhqi boeih awh amah ak zeel sak boeih Bawipa ing sai hy. 7 Khawmdiek a dytnaak awhkawng myi zaam sak naws; khawphla ingkaw khawtlan tui ce tyi law hainh hy, ik-oehi a taaknaak im awhkawng zilh ce hlah law hy. 8 Izip qam awhkaw cadil boeih ce him pehy, thlanghjing coming ingkaw qamsa ak thang cyk khqi ce him pehy. 9 Aw Izip, Pharaoh ingkaw a tyihzawih khqi boeih tuk aham, nang ak khuiawh hatnaakkhqi ing kapwoek kyi ik-oehkhqi ce anih ing tyi law hy. 10 Phynlum thlang khawzah papa ce anih ing him naws tha ak awm sangpahrangkhqi ce him hy – 11 Amorkhqi sangpahrang Sihon, Bashan sangpahrang Og ingkaw Kanan qam awhkaw sangpahrangkhqi boeih – 12 cekkhqi a qam ce qo na ak thlang Israelkhqi venawh pehy. 13 Aw Bawipa nang ming taw kumqui dy cak naws, namah simpoenaak awm, Aw Bawipa, chawn khawzah dyna awm kaw. 14 Ikawtih Bawipa ing ak thlangkhqi ak

thym na awi deng kawmsaw a tyihzawih khqik khan awh qeennaak ta kaw. 15 Phynlum thlangkhqi a myiqawl taw sui ingkaw ngun mai ni, thlanghjing kut ing ni a sai. 16 Kha taw ta lawt hlae uhy, am pau thai uhy, mik awm ta hlae uhy am hu thai uhy; 17 haa ta hlae uhy, am za thai uhy, amim kha awh hqi awm am hqi thai bai uhy. 18 Vemih ak sai thlangkhqi tav vekkhqi amyihna awm lawt kawm uh, vekkhqi ak ypnaka thlangkhqi awm vekkhqi amyihna awm lawt kawm uh. 19 Aw Israel ipkhui kawkhqi aw, Bawipa ce kyihcah lah uh; Aw Aaron ipkhui kawkhqi aw, Bawipa ce kyihcah lah uh. 20 Aw Levi ipkhui kawkhqi aw, Bawipa ce kyihcah lah uh. 21 Zion awhkawng Jerusalem khawk khuiawh ak awm Bawipa venawh kyihcahnaak awm seh. Bawipa taw kyihcah lah uh.

136 Bawipa taw a leek a dawngawh a venawh zeelnaak awi kqawn lah uh. A lungnaak taw kumqui dy cak hy. 2 Khawsakhqi a Khawsa venawh zeelnaak awi kqawn lah uh. A lungnaak taw kumqui dy cak hy. 3 Boeikhqi a Bawipa a venawh zeelnaak awi kqawn lah uh. A lungnaak taw kumqui dy cak hy. 4 Kawpoek kyi soeih ik-oehi ak sai amah doeng a venawh, A lungnaak taw kumqui dy cak hy. 5 a cyihnaak ing khankhqi ak saikung a venawh, A lungnaak taw kumqui dy cak hy. 6 tuikhqik khan awh dek ak phaihkung a venawh, A lungnaak taw kumqui dy cak hy. 7 vangnaak bau soeih ak saikung a venawh, A lungnaak taw kumqui dy cak hy. 8 khawdai ak uk aham khawmik, A lungnaak taw kumqui dy cak hy. 9 khawmthan ak uk aham pihla ingkaw aihchikhqi, A lungnaak taw kumqui dy cak hy. 10 Izipkhqi a caming dan ak tatkung a venawh, A lungnaak taw kumqui dy cak hy. 11 cekkhqi anglakawkawng Israel ce sawi hy, A lungnaak taw kumqui dy cak hy. 12 kut thak awm soeih ingkaw ban ak phylkung, A lungnaak taw kumqui dy cak hy. 13 Tuicun Sen ak qkek phuk a venawh, A lungnaak taw kumqui dy cak hy. 14 ce anglak li awh Israelkhqi ce sawi hy, A lungnaak taw kumqui dy cak hy. 15 cehlai Pharaoh ingkaw a qalkapkhqi ce Tuicun Sen ing liu malh hy, A lungnaak taw kumqui dy cak hy. 16 qamkoh awhkawng ak thlangkhqi ak sawikung a venawh, A lungnaak taw kumqui dy cak hy. 17 sangpahrang bau khqi dan ak tatkung a venawh, A lungnaak taw kumqui dy cak hy. 18 tha ak awm sangpahrangkhqi ak himkung – A lungnaak taw kumqui dy cak hy. 19 Amorkhqi a sangpahrang Sihon, A lungnaak taw kumqui dy cak hy. 20 Bashan sangpahrang Og – A lungnaak taw kumqui dy cak hy. 21 cekkhqi qam ce lo na pehy, A lungnaak taw kumqui dy cak hy. 22 amah a tyihzawih Israel a venawh qo na pehy; A lungnaak taw kumqui dy cak hy. 23 ningnih ak kai dyt na ni awm awh anik sim loetkung, A lungnaak taw kumqui dy cak hy. 24 qaal kut khuiawh kawng ni loet sak hy, A lungnaak taw kumqui dy cak hy. 25 a sai ik-oehi boeih a venawh ai kawi ak pekung, A lungnaak taw kumqui dy cak hy. 26 Khan Khawsa venawh zeel awi kqawn lah uh. A lungnaak taw kumqui dy cak hy.

137 Babylon long keng awh ngawi unyng saw Zion ce ka mik poek awh kqang unyng. 2 Cawh tuiqi awh tingtoeng ce hoei unyng, 3 cawh kaimih anik tukhqi ing laa sak aham ni ceei khqi hy, kaimih anik thekhanaak thlangkhqi ing zeelnaak laa sak aham ni ngaih hy, “Zion a laa pynoet awh sa law lah uh ee!” ni tinak khqi hy. 4 Ikawmyihna thlang a qam na Bawipa a laa ce ka mi sak thai kaw? 5 Aw Jerusalem, nang ce ka ni hilh awhtaw kak tang ben kut ing a simnaak hilh poe lawt seh. 6 Nang amni sim voel nyng saw, ka zeelnaak soeih Jerusalem, nang ce am ka nik poek voel hawh awhtaw, kam lai ing dangkhyl na bet qu qap seh. 7 Aw Bawipa, Jerusalem a zawk nyn awhkaw Edomkhqi ing ik-oehi ami sai ce, sim loet lah. “Hre bang tlang, tung nang lingnaak dyna phu bang tlang uh!” tinawh amik khy ce. 8 Aw Babylon canu, ak plawci hly kawi, kaimih ak khan awh ik-oehi na sainaak amyihna,

nang ak khan awh ik-oehi ak thung lawkhqi zeel kawm uh – 9 na naacakhqi ce amim tu law coengawh lung khawng na kawm uh.

138 Aw Bawipa, kak kawlung boeih ing nang ce nim kyihcah vang; “khawsakhqi” haiawh nang kyihcahnaak laa sa vang nyng. 2 Nang a bawkim ciim benna koep nyng seitaw, na lungnaak ingkaw na ypaumnaak awh nang ming ce kyihcah vang, kawtih ing nang ming ing na lungnaak ce ik-oehi boeih ak khan awh zoeksang hawh hyk ti. 3 Kai ing ka nik khy awh, nang ing nim hlat hyk ti; ka qaal ni leek sak nawh kak kaw awm sak hyk ti. 4 Aw Bawipa, khawmdtek awhkaw sangpahrangkhqi boeih ing, nam kha awhkaw awi a ming zaak awh nang ce nim kyih u seh. 5 Bawipa a boeimangnaak taw a bau soeih a dawngawh, a lamkhqi ce laa na sa u seh. 6 Bawipa taw hun sang na awm hlai hy, kaw ak dungkhqi ce toek hy, cehlai ak oek qu ak thlang taw ak hla na awm taak hy. 7 Kyinaak anglak li awh cet nyng awm, nang ing ka hqingnaak khoem law hyk ti; ak kaw ak so ka qaal benna kut zyng law nawh, nak tang ben kut ing ni hul hyk ti. 8 Bawipa ing kai aham cainaak a taak ce soep law sak kaw; Aw Bawipa; na lungnaak taw kumqui dy cak hy – na kut sai ce koeh qoeng hyt.

139 Aw Bawipa, nang ing ni sui nawh ni sim hyk ti. 2 Ngawi nyng kang dyih awh awm nang ing ni sim hyk ti; kak poeknaak ve ak hla nakawng sim hyk ti. 3 Cet nyng kang zaih awh awm nang ing ni sim hyk ti; lam boeih ce nang ing sim hyk ti. 4 Kam lai awh awi khangoet pateng za a awm hlan awh, Aw Bawipa, nang ing ni sim pheng hyk ti. 5 Nang ing huhai na ni hawi ni le nawh, kak khan awh na kut ce tloeng law hyk hy. 6 Cemyih cyihnaak ce kai aham kawpoek kyi soeih na awm hy, sang aih nawh pha voet hqoeng nyng. 7 Nang ang myihla a ven awhkawng hana ka ceh thai kaw? 8 Khan na hang cet mai nyng seiawm, cena nang awm hyk ti; dek kai a dungnaak khuina zaih nyng seiawm, cena nang awm bai hyk ti. (Sheol h7585) 9 Myncang khawkdai awhkaw ang hla awh tho nyng, tuicunli vang ben caqai a hlanaak na awm mai nyng seiawm, 10 cena awm nang a kut ing ni sawi bai kawp ti, nak tang ben kut ing ak cak cana nim tu kaw. 11 Thannaak ing ni hlip kawmsaw vangnaak ce ka ven toek awh thannaak na coeng kaw,” ti mai nyng seiawm, 12 thannaak ing nang ce amni sing noeng tikaw; khawmthan ce dai amyihna vang kaw, thannaak ce nang aham vangnaak na awm kaw. 13 Ikwatih nang ing kak kawlung khui boeih ve sai hyk ti; ka nu ak phoen khui awh nang ing ni sing boeih hawh hyk ti. 14 Kjih awm ingkaw kawpoek kyi na nani sai a dawngawh nang ce nim kyihcah nyng; nang a ik-oehi saikhqi ve poek kyi na awm hy tice ak leek cana sim pheng nyng. 15 Ang hyp na sai na ka awm awh, ka pumqaw sainaak ve nang a venawh kawng thuh thai na am awm hy. Khawmdtek a dungnaak awh kutoet na bawl na ka awm awh, 16 na mik ing ak bawl qu hlan ka pum ve hu hawh hy. Kai a khawngchi caksak na ak awmkhqi boeih ce pynoet awm ang coeng hlan awh, na cauk awh qee na awm hawh hy. 17 Aw Khawsa, nak poeknaakkhqi ve kai aham a phu tlo soeih mah hy! 18 Ka toek aham a awm mai mantaw, dizu dek anglakawh doem khqoet kaw. Kang hqyng law awh, na venawh awm hyn bak bai bai nyng. 19 Aw Bawipa, nang ing thlakche khqi doeng mah na him mai mantaw! Nangmih thlang a thin a mik ngaih tloek, ka venawh kawng ak hla na awm hoer uh! 20 Vekkhqi ing nang ce ak che na nik kqawn ngah ngah unawh; na qaalkhqi ing nang ming ce amak thym na hawna uhy. 21 Aw Bawipa, nang anik sawhnaakkhqi ce sawh na nyng saw, nang qaal na anik thawh sihkhqi ce am ka tyih nawh nu? 22 Cekkhqi sawhnaak doeng ni ka taak; cekkhqi ce ka qal nani kak poek. 23 Aw Khawsa, nang ing ni sek nawhtaw, kak kawlung ve sim law lah; ni noek ni dak nawhtaw kak kawpoekkhqi

ve sim law lah. 24 Kai awh boeseetnaak khqi ak awm hy voei nu, toek nawhtaw, kumqui lam awh ni sawi lah.

140 Aw Bawipa, thlakchekhqi kut khuiawh kawng ni hul lah; boeksekhhqi a kut khui awhkawng nang ing nik chung lah, 2 ak kawlung khuiawh ak che poeknaak doeng ta unawh myngawi qaal na tho loet uhy. 3 A mim laikhqi ce khqi am lai amyihna hqat sak unawh; khquihse a chy ce ami hui kqang awm hy. 4 Aw Bawipa, thlakchekhqi kut khui awhkawng nang ing ni khoem lah; kai a khawham lawlh sak aham ak cai thlakchekhqi anglakawhkawng ni hlip lah. 5 Ak oek qukhqi ing kai aham ang hyp na dawng dun law unawh; lawlk qui ce zan law uhy, ka cehnaka lam boeih awh dun law uhy. 6 Aw Bawipa, nang a venawh, “Nang taw ka Khawsa ni,” ti nyng. Aw Bawipa, qeenaka thoe doena kang kqangnaak awi ve ngai law lah. 7 Aw Boeimang Khawsa, kai anik hulkung thakawm, qal tuknaak kung awh ka lu ak dah lawkung – 8 Aw Bawipa, thlakchekhqi a ngaihnaak ce koei soep law pe sak; a ming cainaak awm koei coeng sak, cemyih am mantaw oek qu hau kawm uh. 9 Kai anik chungkhqi a lukhqi taw a mimah a hui ing ang coeng sak kyinaak ing sing pe seh. 10 Maikqawng ce a mingmih ak khan awh tlak pe seitaw; a mami thawh thai voel aham mai awh, lawk-kqawng khuiawh kawng u seh. 11 Qam khuiawh thlang kqawnseet na ak nget khqi ce koei awm seh; boeksekhhqi taw seetnaak ing a hu awh hqut seh. 12 Bawipa ing thymnaak ce khawdengkhqi ham taak pe nawh ak voethlauhkhqi ce dawm a hlai hy tice sim nyng. 13 Thlakdyngkhqi ing nang ang ming ce kyihcah kawm usaw thlak leek khqi ce na haiawh awm kawm uh.

141 Aw Bawipa, nang ni ka nik khy; ka venawh ang tawnna law cang. Ka nik khy awh kak awi ve ngai cang lah. 2 Kak cykcahnaak ve na haiawh bawktui na awm seitaw; ka kutphyl ve khawmy ben awhkaw lucik nawn amyihna awm seh. 3 Aw Bawipa, kam kha awh khoemkung ta law nawhtaw; ka hui chawmkeng ve geh law lah. 4 Kak kawlung ve ik-oehi che benna, thlakchekhqi a ik-oehi sainaak ing amak leek ik-oehi ak sai thlangkhqi benna koei hawi law; a mingmih a buh a an tui awm koei ni ai sak. 5 Thlak dyng ingtaw ni vyk mai seh – qeenaka dawngawh ni; ni zyi awm ni zyi seh – ka lu awhkaw situi nani a awm. Ka lu ing ap tha na tikaw. Cehlai kak cykcahnaak ing thlakchekhqi a ik-oehi sai ce oelh poepta hy; 6 a ningnih ak ukkungkhqi ce minpoeng na khawng kawm uh, kak awih kqawnkhqi ve ak leek ni ka kqawn tice thlakchekhqi ing sim kawm uh. 7 Cekkhqi ing, “Thlang ing dek a nawk awh deklai a ah amyihna, kaimih a qukhqi taw phyi a keng awh theh qu kang hy,” ti kawm uh. (Sheol h7585) 8 Cehlai, Aw Boeimang Bawipa, ka mik qawi ing nang ni ani dan; nang awh ni kang thuk – thihiak benna nang ing koei ni pe. 9 Kai aham ami dun law dawng awhkawng ni loet sak nawhtaw; thlakchekhqi ing ami dun law dawng awhkawng ni loet sak lah. 10 Kai taw ngaihding na ka ceh awh, thlakchekhqi taw a mimah a lawk awh awk nawn u seh.

142 Bawipa venawh khawteh na khy nyng; qeenaka thoe doena Bawipa venawh awi y nyng. 2 A haiawh ka ngaihnaak awi kqawn pe nyng saw; ka kyinaak ce a haiawh kqawn pe nyng. 3 Kak khuina kang myihla ve a zai awh, nang ing ni ka lam ve na sim law. Ka cehnaka lam awh thlangkhqi ing ang hyp na dawng dun law uhy. 4 Kak tang ben ve toek mai lah; kai anik ngainaak u pynoet awm am awm hy. Thuknaak am ta nyng saw; kai ka hqingnaak ve u ingawm ikaw na am huhy. 5 Aw Bawipa, nang a venawh khy nyng, “Nang taw kang thuknaak na awm hy ti, ak hqingkhqi qam awh ka taham na awm hyk ti,” ti nyng. 6 Kak khynaak awi ve ngai lah, ni ngoe soeih nyng; kai anik hqutkhqi

kut khuiawh kawng ni hul lah, kai aham taw amik tha awm soeih hy. 7 Nang ming kam kyihcah thainaak aham, thawngim khui awhkawng ni loet sak lah. Cawhtaw kak khan awh na leeknaak awh ve tlak dyngkhqi ing nik chung khqi khoep kaw.

143 Aw Bawipa, kak cykcahnaak awi ve ngai law nawhtaw, nam qeenakaak thoeh doena kak khynaak awi ve ngai law lah; na y pawmaak ingkaw na dyngnaak ce kai aham hoeihhangnaak na awm lah seh. 2 Na tyihzawih ve awi koeh deng cang, kawtih na hawaih ak dyng thlang pynoet awm am awm hy. 3 Ka qaal ing ni hqut nawh dek nik khawng na hy; thi ce thlangkhqi amyihna thannaak khuiawh ni ta hyt hy. 4 Cedawngawh ka kawk khuiawh kang myihla zai hqoeng nawh; kak kawlung kqihnaak ing be hy. 5 Ak kqym a tym khqi poek nyng; na ik-oehi saikhqi boeih ce poek typ typ nyng saw na kut saikhqi ce poek nyng. 6 Nang benna kut phyl law nyng; qamkoh ing tui a ngaih amyihna ka hqingnaak ing nang ce tui amyihna ni ngaih hy. 7 Aw Bawipa, ang tawnna nim hlat lah; kang myihla zai hqoeng hawh hy. Ka venawh na haaí koeh thuh law, cemyih am mantaw lawlkqawng khuina khaw ak sakhqi amyihna awm hau lawt kawng unyng. 8 Amak dyt thai nang a lungnaak ce mymcang ing haw law seh, kawtih nang ni ka ni ypnaka. Ka ceh hly kawi lam nim huh lah, nang benna ka hqingnaak ve hak zoek law nyng. 9 Aw Bawipa, ka qaal khqing lak awhkawng ni hul lah, nang ak khuiawh ni kang thuh qu hy. 10 Ka Khawsa na na awm a dawngawh, nak kawngaih sai thainaak aham ni cawng sak lah; nang a koe ak leek Myihla ing lamtlang awh ni sawi lah seh. 11 Aw Bawipa, nang ming ak caming ka hqingnaak ve khoem law lah; na dyngnaak ak caming kyinaak anglak li awhkawng ni loet sak lah. 12 Amak dyt thai na lungnaak ing, ka qaalkhqi sit sak lah; na tyihzawih na ka awm a dawngawh, ka qaalkhqi boeih ve hqe law lah.

144 Qaal tuknaak aham ka kut qawi cawngpyi nawh qaal kahnaak aham ka kut dawnhqi ak cawngpyi Bawipa ka lungnu venawh kyihcahnaak awm seh. 2 Anih taw ka lungnaak Khawsa ingkaw ka vawngcak, ka qaltoeng vawng khoeng ingkaw anik hulkung, kang thuuknaak phuhqa, ka hui awh thlangkhqi ak kun sak kung na awm hy. 3 Aw Bawipa, thlanghqing ve ikawmyihna nu tinawh nang ngainaa khak, thlanghqing capa awm nak poek loet; 4 Thlanghqing taw hqi amyihna ni a awm; a hqing khui khawngi awm myihlip ak khum bang amyihna ni a awm. 5 Aw Bawipa, nak khankhqi ce nung ngam sak nawh nu law lah, tlangkhqi ce a khunaak aham bi lah. 6 Khawpha tyi nawhtaw qaalkhqi ce kqeng a zang na ta kang lah; na la ce kap nawhtaw dawng lam hang sak lah. 7 Hun sang nakawng na kut ce nuk thla law nawh; ni hul nawh tuih tha ak awm ing, tlakchangkhqi kut khui awhkawng ni hul cang lah, 8 cekkhqi am kha taw qaai kqawn thai unawh, amik tang ben kutkhqi awm qaai ak kqawn kut na awm uh. 9 Aw Khawsa, nang a venawh lak thai sa vang nyng; a qui pahqa ak law tingtoeng ing nang a venawh tumding tum kawng nyng, 10 sangpahrangkhqi venawh noengnaak ak peking, thihnaak kawi zawzi awhkawng a tyihzawih David ak loet sakkuung a venawh ce. 11 Qaai ing ak be khakhqi ingkaw qaai kqawn ak nget tang ben kut ak ta qap chang thlangkhqi kut khuiawh kawng ni hul nawhtaw ni thaawng cang lah. 12 Cawhtaw ka capa thak awm hui khqi awm a dawn ak sai thingkung amyihna awm kawm usaw, ka canukhqi awm sangpahrang a im awhkaw a theoilehcam hqeet tungkhqi amyihna awm kawm uh. 13 Kaimih ak khaikhqi awm ai kawi soeckep ing bengen kawi. Kaimih a tuukhqi awm thong sang dyna pung a tai kawmsaw ka mimah a lo khuiawh lym kawm uh; 14 vaitawm caikhqi ing phyihqih phyi kawm uh. Cawhtaw vawng hqe awi am ning za voel kaw, thlang a tamnaa na amni khum voel kawmsaw, lam awh kawseet kqangnaak awi am ning za voel ti

kaw. 15 Ve ak awi ve ak thym thlangkhqi ham taw a zoseen hy; Bawipa ce Khawsa na ak takhqi taw a zoseen hy.

145 Ka Khawsa ingkaw sangpahrang, nang ce ni zoeksang vang nyng, nang ming ce kumqui ingkaw kumqui dy nim kyihcah vang. 2 Myngawi nang ce nim kyihcah nyng saw, nang ming ce kumqui ingkaw kumqui dyna zoeksang vang nyng. 3 Bawipa taw a bau soeih a dawngawh kyihcah ham tyng hy; a baunaak ce u ingawm am lam noeng thai hy. 4 Chawn oet ing na ik-oehi sai ce ak chang a venna kqawn pe patoe kaw; nang ak thaawm ik-oehi sai ce kqawn kawm uh. 5 Nang a boeimang gypawmaak ingkaw kqjih awmnaak ce cekkhqi ing kqawn kawm uh, kai ingtaw nang ak kawpoek kyi ik-oehi sai ce poek typ typ kawng nyng. 6 Cekkhqi ing nang ak kawpoek kyi kqjh awm ik-oehi sai ce kqawn kawm uh, kai ing nang a ik-oehi sai bau soeih khqi ce kqawn kawng nyng. 7 Nang a koe ak doem soeih leeknaak ce ym kawm usaw na dyngnaak laa ce zeel doena sa kawm uh. 8 Bawipa taw thlang queenkawh ak ngaikung ingkaw lungnaak kung na awm hy, ak kaw am so hqet nawh lungnaak ing ak be na awm hy. 9 Bawipa taw thlang boeih a venawh leek hy; a sai ik-oehi boeih ak khan awh lungnaak tahi. 10 Aw Bawipa, nang a sai ik-oehi boeih ing nang ce nim kyihcah kawm uh, nak thlangciimkhqi ing nang ce ni zoeksang kawm uh. 11 Na qam boeimangaak ingkaw nak thaawmnaak ce cekkhqi ing kqawn kawm uh. 12 Cawhtaw thlang boeih ing nang ak thaawm ik-oehi sai ingkaw na qam boeimangaak ce sim kawm uh. 13 Nang a qam taw kumqui qam na awm nawh, na uknaak awm cadil naa dyna cak hy. Bawipa taw ak awikamnaak awh a y pawm nawh a sai ik-oehi boeih ak khan awh lungnaak tahi. 14 Bawipa ing ak tlukhqi boeih ce thawh nawh a sai ik-oehi khqjik khan awh lungnaak tahi. Bawipa taw ak awikamnaak awh a y pawm nawh a sai ik-oehi boeih ak khan awh lungnaak tahi. 15 Thlang boeih a mik ing nang ni ami toek uh, cekkhqi ce amah a tym awh nang ing buh pe boeih hyk ti. 16 Na kut phyl nawh khqjih hqing boeih a hym ngaihnaak ce soep pe sak hyk ti. 17 Bawipa a sainaak lam boeih taw dyng nawh a sai ik-oehi boeih ak khan awh lungnaak tahi. 18 Bawipa ak takhqi boeih, awitak na amah ak takhqi boeih a venawh zoe pehy. 19 Amah ak kqjh thlangkhqi boeih a ngaihnaak ce soep pe sak hy; cekkhqi ak khy awi ce zaak pe nawh hul hy. 20 Amah ak lungnaak thlangkhqi ce Bawipa ing qeh hy, cehlai tlakchekhqi ce hqe bang kaw. 21 Kam kha ing Bawipa kyihcahnaak ce kqawn kaw. A sai ik-oehi boeih ing amah ce kumqui ingkaw kumqui dy kyihcah seh.

146 Bawipa taw kyihcah lah. Aw ka hqingnaak Bawipa kyihcah lah. 2 Ka hqing khui pvt Bawipa ce kyihcah kawng nyng saw; ka mik a hqing khui ka Khawsa kyihcahnaak laa ce sa vang nyng. 3 Boeikhqi ce koeh ypna, amak cak thlanghqing awm koeh ypna; cekkhqi ing amni hul thai uh. 4 A ming myihlakhqi ing a ceh taak khqi awhtaw, deklai nani a ming hlat tlaih hy; ce nyn qoe awh a ming cainaakkhqi boeih awm plal boeih hawh hy. 5 Jakob Khawsa ce bawmkung na ta nawh, ang ngaih-unaak ce Bawipa a Khawsa venawh ak ta thlang taw a zoseen hy, 6 khan ingkaw dek, tuicunli ingkaw ak khuiawh ak awm ik-oehikhqi boeih ak saikung – Bawipa taw, kumqui dy y pawm na awm poepa hy. 7 Thlang ing a thekhanaak thlangkhqi ce thawh nawh phoen ak cawikhqi ce buh pehy. Bawipa ing thawng ak tlakhqi ce loet sak hy. 8 Bawipa ing mikhypkhqi ce mik huh sak nawh, ak ngamkhqi ce Bawipa ing toeckoek sak hy, Bawipa ing tlakdyng ce lungna hy. 9 Khin ce Bawipa ing khoem nawh pa ak naikhqi ingkaw nuhaikhqi ce hqin hy, cehlai tlakchekhqi a lam cetaw mam pe khoep hy. 10 Bawipa taw kumqui dy boei na ngawi hy, Aw Zion, cadil naa dyna na Khawsa ce awm hy. Bawipa taw kyihcah lah uh.

147 Bawipa taw kyihcah lah uh. Ningmih Khawsa venawh kyihcahnaak laa sak ve leek nawh amah zoeksang doena kyihcah ve zeel aham awm mah hy! **2** Bawipa ing Jerusalem ce thawh tlaih nawh; tlhang a qam na ak pla Israelkhqi ce cawi tlaih hy. **3** Kawlung ak kgek khqi ce noeit nawh ang ming ing khy boeih hy. **5** Bawipa taw bau soeih nawh, ak tha awm soeih hy; a simnaak ing dytnaak am tahi. **6** Dung voeng na ak awm tlhangkhqi ce Bawipa ing dawm a hlai hy, cehlai tlakchekhqi cetaw dek na khawng hy. **7** Zeel awi kqawn doena Bawipa venawh laa sa lah uh; tingtoeng ningnihn Khawsa venawh tumding tum lah uh. **8** Khawngi ce myi ing zawl hy; khawndeak awh khaw tian sak nawh tlhangkhqi awh sai cawi sak hy. **9** Kqchin ce buh pe nawh vangaak ca ak khy khqi awm buh pehy. **10** Anih a zeelhaak taw meqang ak thaawmnaak awh amni, ak kawzeelhaak awm tlhangqing a khawkhqi awh amni; **11** Bawipa a zeelhaak taw amah ak kqihkhqi ingkaw anak dyt thai a lungnaak ak ngaih-ukhqi ak khan awh ni a awm. **12** Aw Jerusalem, Bawipa ce zoeksang lah; Aw Zion, na Khawsa ce kyihcah lah, **13** anih ing na vawk chawh tlhangkhqi ce zoseennaak pehy. **14** Na qamqi ak khan awh qoeepnaak sai nawh buh ak tui soeih ing nak phoen phyl law sak hy. **15** Ak awipeek ce khawndeak awh nuk tyl law nawh; ak awi ce ang tawwna dawng hy. **16** Vyl ce tuu myi amyihna theh nawh maikhu amyihna vyl pai bawk ding sak hy. **17** Reel ce lunkqel amyihna hlah hy. Tuikhala a dingnaak awh u nu ak dyi thai kaw? **18** Ak awi ce tyl nawh tui na zut sak hy; zilhding law sak nawh, tui ce lawng hy. **19** Jakob a venawh ak awi ce dang pe sak nawh a cawngpyinaak awi ingkaw ak awithyhaak ce Israel a venawh dang sak hy. **20** Qapchang tlhang a hamna ve ve am sai pehy, cekkhqi ing a cawngpyinaak awi ce am sim uhy. Bawipa taw kyihcah lah uh.

148 Bawipa taw kyihcah lah uh. Khan nakawng Bawipa ce kyihcah unawh, sawsang soeih awh Bawipa ce kyihcah lah uh. **2** Ak khan ceityihkhqi boeih aw, amah ce kyihcah lah uh. **3** Khawmik ingkaw pihla aw, amah ce kyihcah lah, nangmih aihchi ak ngaihkhqi boeih aw, amah ce kyihcah lah uh. **4** Nangmih khan ak sangkhqi aw, amah ce kyihcah lah uh. **5** Bawipang ming ce kyihcah lah u seh, kawtih amah ing awi pe nawh ik-oeih a sai na awm hy. **6** Cekkhqi ce amah a hun boeih awh kumqui dyna tahi, amak khum thai awipeek ce cekkhqi venawh pehy. **7** Khawndeak awhkawng Bawipa ce kyihcah lah uh, nangmih tuicunli khui awhkaw a sai ik-oeih ak bau soeih khqi ingkaw tuihdungkhqi aw, **8** hawkphla ingkaw kgeek khqi, vyl ingkaw cingmaikhqi, ak awipeek ak ngai khawhli, **9** nangmih tlhangkhqi ingkaw cungkhqi, ak thaih kawi thingkhqi ingkaw sidar thingkhqi. **10** kqawng qamsakhpqi ingkaw khqinkhqi, qamsa ak zawikhqi ingkaw ak ding phakhqi, **11** khawndeak awhkaw sangpahrangkhqi ingkaw phynlum boeih, nangmih boei a cakhqi ingkaw khawndeak ak ukkungkhqi boeih, **12** cadawngkhqi ingkaw nulakhqi, pacawngkhqi ingkaw naasenkhqi boeih aw, Bawipa ce kyihcah lah uh. **13** Cekkhqi ing Bawipang ming ce kyihcah u seh, kawtih anih ang ming doeng ni zoeksang aham a awm; a boemangnaak taw dek ingkaw khan ak khan awh awm hy. **14** Anih ing ak tlhangkhqi ham kii hak thawh pehy, ak tlhangciimkhqi am kyihcahnaak ing, ak kawlung ing ak zoe khet Israelkhqi kyihcahnaak awm sai pehy. Bawipa taw kyihcah uh.

149 Bawipa taw kyihcah lah uh. Bawipa venawh lak thai sa unawh, tlakciimkhqi cunnaak awh am kyihcahnaak laa ce sa lah uh. **2** Israel ing amah ak saikung awh zeel seitaw; Zion tlhangkhqi ing a mimah a Sangpahrang awh zeel u seh. **3** Ang ming ce lam doena kyihcah u seitaw, qaica ingkaw tingtoeng tumding ce tum pe u seh. **4** Bawipa taw ak tlhang khqik khan awh zeel nawh, dungvoeng na ak awm tlhangkhqi ce hulnaak myk sak

hy. **5** Ve kqihchahnaak awh tlakciimkhqi ing zeel u seitaw a ih hun awhkawng zeelnaak laa sa u seh. **6** Cekkhqi am kha awh kyihcahnaak ce awm seitaw, ami kut awh a hu a hai ak hqat zawzi ce pawm u seh, **7** tlhangphyn a venawh lu lawh aham ingkaw tlhangkhqi ce toel aham, **8** a sangpahrangkhqi ce khawcgeh byn nawh, ak tlhang bau khqi ce thi khawcgeh byn aham, **9** a mingmih awidengnaak gee ce canhah ce khyn peek aham awm hy. Ve ve ak tlhangciimkhqi boeih a thangleeknaak na awm hy. Bawipa taw kyihcah lah uh.

150 Bawipa taw kyihcah lah uh. A hun ciim awh Khawsa ce kyihcah u nawhtaw; ak khan thaawm hun awh amah ce kyihcah lah uh. **2** A boeimang thaawm saithainaak awh kyihcah unawh; a baunaak kqawn noeng am awh kyihcah lah uh. **3** Uut awi ing kyihcah unawh, tingtoeng ingkaw qaw tingtoeng ing amah ce kyihcah lah uh, **4** qaica khoek doena lamnaak ing kyihcah unawh, a qui ak awm phungding ing kyihcah lah uh, **5** tlaklak khoek doena amah ce kyihcah unawh, tlaklak awi ing kyihcah lah uh. **6** Soepkep ak hqi thai pooh ing Bawipa ce kyihcah seh. Bawipa taw kyihcah lah uh.

Awicyih

1 Israel sangpahrang David a capa Solomon ak awicyih taw; **2** Cyihnaak ingkaw cawngpyinaak, zaaksimnaak thaikhqi siimsak ham, **3** Dyngnaak, awitlyknaak, pekbonaak a awm kaana hawnaak thai ham ingkaw cawngpyinaak ak thym pawmnaak thai ham; **4** Khawk hangkhqi khawsimnaak taaksak ham ingkaw, cacoenkhiq khawkpoek thainaak taaksak ham; **5** Thlakcyikhqi ing siim unawh a mi cyihnaak a pungnaak khqoet nawh, khawkpoek thaikhqi ing khawkpoeknaak thai a mi taaknaak khqoet hamna, **6** Awicyih ingkaw ak qkawncaihnaakkhiq, thlakcyi akawi ingkaw a mik awhi kqawn zaaksimnaak thai nace awm hy. **7** Bawipa kqijchahaanak taw cyihnaak a kungpinya awm nawh; Cehlai, thlakqawkhqi ingtaw cyihnaak ingkaw cawngpyinaak husit uhy. **8** Ka capa, na pa cawngpyinaak ce ngai nawh, na nu cawngpyinaak ce koeh hoet. **9** Na lu hamna khqaipai leek soeihna awm nawh, na hawng hamna aawi hun leek soeihna awm kaw. **10** Ka capa, thlakchekhqi ing a ni zoek awh koeh ngai kawp ti. **11** "Kami venna law lah, thlang a thi lawng sak lah usih, thlakche ak queenkhqi ce gym khqi lah usih; **12** Ceikhui amyihna a hqjngpumna daih khqi lah usih, phyi khui amyihna. (**Sheol h7585**) **13** A phuk tlotlokhhqi ni ham kawm saw, thlang a theem ni qawtkhqi ing ni im ce nik bee kaw. **14** "Kami venawh bang lawlawt nawh taw, tangka bawm ni qup hah kawm uh," a mi ti awh, **15** Ka capa, a ming laikawh koeh boei awm, a mi lam awhkawng phleung qu kawp ti. **16** A mi khaw ce thawlhaak lam benna kaan unawh, thi ak lawngsak hamna a ming hqii tawn sak uhy. **17** Lawk ce ak chaap maina zan ni, kawmyih phaa a haiawh awm. **18** Cekkhqi taw a mimah thi ce lawngsak unawh a mi hqjngnaak ak plamsakkhiq ni. **19** Ceamyihna ni, a mak thymna ak kamvaakkhiq lam taw; ami boei a hqjngnaak ce lawh pe uhy. **20** Chawmkeeng awh cyihnaak ce khawteh na khyy nawh, Chawmkeeng tung keengawh ce khyy hy; **21** Thlang khawzah ang cunnaak ang lungkil awh ce khyy nawh, khawkkhu lutnaak vawng chawmkeeng awhce khyy hy. **22** Nangmih khawl hangkhqi aw, i qyt dy nu khaw na mi hang hly? I qyt dy nu a nik husit khqi huhsitnaak khuiawh na mi awm hly, thlakqawkhqi ing cyihnaak na mi maa hly? **23** Ka ni toelnaakkhiq benna voei law uh: Ngai lah uh, na mik khanawh kang myihla theeh kawng nyng saw, kak awi zaaksimnaak ni pekkhqi kawng. **24** Nik khykhqi nyng, ni maa uhyk ti, ka kut soeng nyng, uca ingawm am do uhyk ti; **25** Ka khawkhannaakkhiq boeih ikawna am ngai unawh, ka ni toelnaakkhiq boeih ce hooot uhyk ti. **26** Ceamyihna awmsaw, kai ingawm na mi zoseet nyn awh ni qaih nak khqi kawng nyng saw, kyinaak na mi sawng lawawh ni qaih nak khqi kawng nyng. **27** Na mi lynam hlinu amyihna a thoeng law nawh, na mi zoseetnaak tym ing a pha lawawh, kyinaak ingkaw ngaihangnaak namik khanawh a pha law awh. **28** Chawh ce, nik khy kawm uh tik saw, cesei-awm am nim hlat khqi kawng: mymcang hii awh ni sui kawm uk tik saw, ceseiawm am ni hu kawm uk ti; **29** Cyihnaak maa unawh, Bawipa kqijchahaanak ce ama mik tyhnaak ak caming. **30** Ka khawkhannaak pynoet ca mai awm am ngaih unawh, ka toelthamnaak boeih ce a mi huhsit caming. **31** Ceamyihna awmsaw a mi khawsak ak thaih qah ce aii kawm usaw, a mik poeknaak ing qoh kawm uh. **32** Thlakchekhqi hu benna nawngnaak ing a mimah him khqi kawm saw, ak qawkhqi ang ngaihdinggaak ing amimah moeng sak khqi kaw. **33** Kak awi ak haanaak taw ak ding cana khaw sa kawm usaw, zoseetnaak khuiawh awm ngaiqueep cana khawsawh.

2 Ka capa, kak awi ve do nawh kak awipek ve nak khuiawh na kym awhtaw, **2** Cyihnaak ce nang haa ing ngai nawh,

nak kawlung ing cyihnaak lam benna ang hawi awh- taw; **3** Zaaksimnaak ce khy nawh, simthainaak ce nak khy awhtaw, **4** Tangka amyihna sui nawh, khawh amyihna na sui awhtaw, **5** Khawsawh kqijchah lawthai kawm tik saw, Khawsawh simthainaak ce ta kawp ti. **6** Khawsawh ingtaw cyihnaak pe thai nawh, am khaa awhkawng cyihnaak ingkaw zaaksimthainaak ce cawn sak thai hy. **7** Ak thym thlangkhqi ham cyihnaak ak thym ce khoem nawh, ypawm ing ak khawsakhqi ce doen khqi hy. **8** Ak thlangciimkhqi ing ak thymna khaw a mi sak naak ham a mi lam ce doen pek khqi hy. **9** Cawhce dyngnaak ingkaw ak thym awitlyknaak ce sim thai kawm tik saw, pekbonaak a taak kaana, lam leek boeih awm. **10** Nak kawlung khuiawh cyihnaak ce lut kawm saw, na hqjngnaak hamna simthainaak ce ak aawi soeihna awm kaw; **11** Khawsimnaak ing ni kheomdoen kawm saw, khawsimthainaak ing ni hqin kaw; **12** Thawlhnaak lam awhkawng a ni loet sak ham ingkaw amak thym awi ak qkawnkhqi lakawh kawng a nik loet sak hamna; **13** Cekkhqi ing taw seetnaak lamawh ceh ham lamdyng ce ceh taak unawh; **14** Theem amak leek sai ce ami ngaih kawina awm kawm saw, thawlh sainaak awh ce awmhly kawm uh; **15** A mi lam taw kaawi nawh, ypnak am cu hy. **16** Nukche awhkawng ni loet sak nawh, a nik zoek ang lak awhkawng; **17** A cacoen hui awhkaw pyi ceh ta nawh, A Khawsawh awikam ak hilh ak thlang awhkawng ce. **18** A im ing thihihaak lam ben mang nawh, a lam cehnaak ing thihihaak lam benna ce, **19** A ven ak pha thlang boeih ing am voei voel ti kaw, hqjngnaak lam ce am pan voel ti kawm uh; **20** Thlakleek ceehnaak lamawh bang nawh, thlakdying ceehnaak lamawh na ceeh naak thai ham. **21** Ak dyngna khawsawh thlangkhqi taw ve khawmdek awh khawsawh thai kawm usaw, thlakleek khqi taw ce hyn awh ce khawsawh poe kawm uh; **22** Cehlai ak halang ak thlangkhqi taw khawmdek awhkawng qeeng sakna awm kawm saw amak thymna khaw ak sakhiq ce qeengsak na awm kaw.

3 Ka capa, kak awipek ve koeh hilh nawh, nak kawlung awh kym lah. **2** Na hqjngnaak khawng hii khawkum ingkaw ngaiqueepnaakkhiq ing ni tawmsap kaw. **3** Queenaaak ingkaw awitak ing nang ce koeh ni hooet seh. **4** Cawhtaw, Khawsawh ingkaw thlanghqing mik huh awh mikhaileek ingkaw mingleeknaak ce pang kawp ti. **5** Nak kawlung boeih ing Bawipa ce caang na nawh, Na siimnaak awh koeh hang qu; **6** Na lam hoeiawh amah ce siim poe nawh, na lam ce nim huh kaw. **7** Namah ngaih awh ak cyina koeh ngai qu nawh; Bawipa ce kqih nawh, thawlhaak ce cehtaak. **8** Nak thangqui ham sadingnaak na awm nawh, na quh ham ak thlikna awm kaw. **9** Na khawlkham ing Khawsawh ce kylciah lah. Na them ak pung law lammacyk boeih ing awm; **10** Cawhtaw nak khai baawp ing bee ngen kawm saw, na misur um ing bee poeng kaw. **11** Ka capa, Bawipa a toelnaak ce koeh husit nawh, A ni toelzyihnaak ce koeh zadam kawp ti. **12** Bawipa ing a lungnak cekhqi ce toel khawi nawh, Pa ing ca a lungnak awh a toelzyih khawi a myihna. **13** Cyihnaak ak hu ak thlang ingkaw kawcyihnaak ak hu ak thlang taw a zoseen hy. **14** Cetaw ngun a phu tlo ingkaw sui a phu tlo ang lakawh a phu tlo ngai hy. **15** Suiitung a phu tlo lakawh a phu tlo ngai nawh ngaihnaak ing awm am pha thai hy. **16** Ak tangkut benawh hqjnglung sangnaak awm nawh, ak cawngkut benawh khawthhem ingkaw boeimangnaak ce awm hy. **17** A lam ce awmhlynaak lampyina awm nawh, a lam boeihboeih ce ngaiqueepnaak ing bee hy. **18** Ak tuu thlang boeih ham hqjngnaak thingkungna awm nawh, ak kym thlang boeih ham zoseenaaak ni. **19** Bawipa ing a cyihnaak ing khawmdek ve synn nawh, ak kawcyih ing khan ce caksak hy; **20** A thoemnaak ing tuinu ce hqaa sak nawh, cingmai ing daamtui baw sak hy. **21** Ka capa, na mik ing khaw koeh hang seh, cyihnaak ingkaw khawkpoek thainaak ce ak cakna tu; **22** Na hqjngnaak ham hqjngnaak awm nawh, na

haawng ham mikhaileek na awm kaw. 23 Cawhce na lamawh ak dingna cet kawm tik saw, na khaw am tawngtawh kaw. 24 Na ih awm am kqih kawm tik saw, nang zaih nawh na ih awhawm na ih tui kaw. 25 Kqjihlynaak bawtbet awh ak dang law ce koeh kqih nawh, thlang ak mukkhiq a pha law awhawm koeh kqih kawp ti. 26 Bawipa taw na loetnaak na awm nawh, na khaw thang awhkawng ni doen kaw. 27 Themleek ak hu tyngkhqi a do hly kawi themleek koeh haimah, na kutawh dangsak ham na taak khui taw. 28 Na imceng venawh, "Ceh nawh ak changna va sui cang nawh voei law tlaih khwangawi ni pe kawng nyng," koeh ti, na taak a loeiawh. 29 Na imceng ak khanawh khawboeset koeh toen, ni yip na nawh na venawh khawksa ni ti na sim loei. 30 Khawboeseteenak nak khanawh a ma toen awhtaw leehcaihnaak a awm kaana na kut koeh thlak. 31 Khawboeset ak toen ak thlang koeh oet nawh a lampyi awh koeh hqut. 32 Ak thymma khaw amak sa taw Bawipa mikuhu awh tyih kawina awm nawh thlakleekhhqi taw pyi na kqih hy. 33 Bawipa a khawsii taw thlakche khqi imawh awm nawh, thlakdyng khqi cunnaak taw zoseenaak ing bee hy. 34 Thlang ak husitkhqi ce husitkhqi nawh, kawnemkhqi ce qeennaak ham sak khqi hy. 35 Kyihcahnaak taw thlakcyi ing ham nawh chahpyihnaak taw thlakqaw ing ham kaw.

4 Ka capakhqi aw, pa a cawngpyinaak ce ngai unawh, zaaksimthainaak na mi taaknaak ham ngai lah uh; 2 Nami venawh ak leek soeih cawngpyinaak ka ni pekkhqi; ka cawngpyinaak koeh mangtak uh. 3 Ka pa capa na awm nyng. Ka nu a ca, capa a lungnak soeih na awm nyng. 4 Ni cawngpyi nawh, ka venawh, "Nak kawlung ing kak awikhqi ve kym poe sei taw; kak awipekkhqi ce haana nawh hqing pyi," ti hy. 5 Cyihnaak thlai nawh, zaaksimnaak awm thlai. Koeh hilh nawh, kam kha awhkawng ak cawn law awiyynnaakkhqi ce seetnaak lam benna koeh mag taak. 6 Koeh hawi taak nawh, nik chungkhoep kaw; lung na nawh, ni khoemoendan kaw. 7 Cyihnaak veni a kungypyi soeih hy; cemyihna awmsaw cyihnaak ce thlai; na khawhkhampkhi boeih ingawm cyihnaak ce thlai. 8 Zoeksang nawh, anih ing ni zoeksang lawt kaw; na ym na lam awhtaw kqihchah kawi thlangning coeng sak kaw. 9 Na luu-awh mikhaileek lumyq ning byng sak kawm saw, dawnaak boei lumyq ni pe kaw. 10 Ka capa, kak awi ngai nawh kym lah; Cawhtaw na hqing kum pung khqoet khqoet kaw. 11 Cyihnaak lamawh ni cawngpyi nyng, dyngnaak lamawh ni sawi nyng. 12 Na ceh huiauw nak khawkan ing zaang nawh, nang dawngawh awm am tawngtawh kawp ti. 13 Cawngpyinaak awh ak cakna tu nawh, koeh hilh; ak cakna tu, na hqingnaak ham ni. 14 Thlakchekhqi cehnaak awh koeh plaa nawh, thlakhalangkhqi a cehnaak awh koeh cet. 15 Qei nawh taw, a vena koeh cet; mangtaak nawh loen taak. 16 Kut a mamik thlak khui taw am ip thai kawm usaw, thlang ak khanawh seetnaak a mi sai hlan khui taw milk am kuu kaw. 17 Seetnaak phaipej ce ai unawh, them amak leek sainaak misurtui ce aw uhy. 18 Thlakdyngkhqi a cehnaak lam taw khawbee ang lakawh bee khqoet hy. 19 Thlakchekhqi a cehnaak lam taw khawmthan amyihna ikawh a ming tawh am sim uhy. 20 Ka capa, kak awi ngai nawh, kak awipek awh nang haa dun lah. 21 Namik huu awhkawng koeh thoeng; nak kawlung khuiawh khoeo. 22 Ak hukhqi ham hqingnaak na awm nawh, a mi pumsa ham sadiningnaak na awm hy. 23 Ak chang boeih ang lakawh nak kawlung ce doen, hqingnaak ak cawnaak ni. 24 Nam khaawh awihche koeh cawn sak nawh, thlang koeh thailat na. 25 Na mik ing hailam dan nawh, ak leekna na hai lam toek. 26 Na khaw ham lamtlak ce chei nawh, na lampyi boeih ce cak sak. 27 Nak tang ben mai aw, nak cawng ben mai awi koeh pleng; seetnaak awhkawng na khaw ce thoeih.

5 Ka capa, ka cyihnaak ngai nawh, kak kawcyihnaak awh nang haa keng lah. 2 Khawkpoek thainaak ce koehm nawh, na hui nam lai ing simthainaak nam tu naak hamna. 3 Nukche a hui awhkawng khawtit cip nawh, am lai ce situi anglakawh plai hy. 4 A dyntaaknaa khankhamyihna kha nawh, pinhai amyihna hqata hy. 5 A khaw ing thiinhaak lam pan nawh, a khawngkham ing ceikhui lam pan hy. (Sheol h7585) 6 Hqingnaak lam am huthai nawh, a cehnaak lam a mam dyng ce am huthai hy. 7 Ceamyihna awmsaw ka cakhqi aw, kak awi ngai unawh, kam kha awhkaw awi ak cawn law ve koeh mang tak. 8 Na lam ce anih awhkawng lak hla sak nawh, ak chawmkeng koeh va hem. 9 Cemiyha kaataw na dawaak ce thlang chang ven pe kawm saw, na kum ce khawsak amak leek thlang ven pe kawp ti. 10 Thlak changkhqi ce nak thaqui phu ham sak khqi nawh, na bibi phu ce am na siim imlangna pha kaw. 11 Na haikhaw a dyt lawawh na pum na saana hawn nawh kqaang kawp ti. 12 Cawhce, "Kawhamna cawngpyinaak ak thym ce hoet nawh, kak kawlung ing toelnaak ce kak husit qoe nu, 13 A nik cawngpyikungkhqi ak awi am haana nyng, a nik cawngpyikungkhqi venna kang haa am na keng nyng; 14 Thlang kqeeng ingkaw thlanghoei anglak-awh ka thih hlo hy," ti kawp ti. 15 Na tui im awhkaw tui na tuipum ing thaan nawh aw. 16 Na tuihaa ce doem sak nawh lam keng awhkaw ak lawng hawk hawk tuinu amyihna coeng sak lah. 17 Namah ham doengna awm seitaw thlak-chang ing koeh ni qup pyi seh. 18 Na tui im awh zoseennaak awm seitaw, nak thaawm huiauw kaw na zuuawh ce nak kaw zeel sak. 19 A nih ce lungnak ak kap saksuk ingkaw ak daw soeih sakki amyihna, kawmyih a tym awhawm a lungnak ing nang ce ni zeel sak poe seh. 20 Ikaw hamnanu nang, ka capa ing nukche awh na zeel hly nawh ak kqang awh nang kooep hly? 21 Thlanghinq a cehnaak lam boeih ce Bawipa mik huhawh awm boeih nawh, a cehnaak lamkhqi boeih ce kawng sak boeih hy. 22 Amah a awmseethaak ing thlakche ce tu kawm saw, a seethaak qui ingawh amah ce pinzen kaw. 23 Cawngpyinaak a khawdeng caming thi kawm saw, a qawnak caming plam kaw.

6 Ka capa, na pyi ham qii khoeng nawh khawlawng thlang khanawh na kut nak thlak awhtaw, 2 Nak awiawh namah awk nawh, nak awi kqawn ing namah ni piin nawh ni. 3 Ka capa, na pyi a kutawh taang vit hyning ti nang simqu awhtaw na loetnaak hamna vermyihna sai kawp ti, na pyi venna cet, nak kawlung ce ak kaina phaih nawh qeennaak thoeh kawp ti. 4 Koeh ip, namik koeh kuu sak oe kawp ti. 5 Sakzym a kut awhkawng sakkhi a cem amyih ingkaw phak zym a kut awhkawng pha ang ding valh amyihna namah ce hul qu kawp ti. 6 Nang, thakdam pa, lieng avena cet nawh, a khawsak ce toek nawh na cyih ta lah; 7 Anih ing boei, ak sawikung, khawkkhan kung am ta na. 8 Khawhqai awh a buh cun nawh cangmaa awh a ai sui hy. 9 Aw, thakdam pa, iqyt dy nu na ih hly? Ityk awh nu na ihnaak awhkawng na thawh hly? 10 Na ngaih awhtaw ip, ngam, kut boem nawh zaih, 11 Na ih hlanawh khawdengnaak ing khit cet amyihna ni pha kawm saw, awk voet ai vaineak ing ak tlung amyihna thoeng law kaw. 12 Thlakche ingkaw khawboeche thlang taw am khaawh awioelhnaak ing ni a plam thaam hy. 13 Amik ing mikhqi, a khaw ing awi kqawn a kut dawn ing pho sak hy. 14 Ak kawlung am dyng nawh, seetnaak sai ham poeakaat ta poepa nawh, qheehnaak sai poeja hy. 15 Cedawngawh ak poek kaana kyinaak ing thoeng law nawh bawtbetawh seetnaak ing pha kawm saw goeinaak a huh voel kaana. 16 Khawsaa ing a sawhnaak khquk awm nawh am tuih soeih khqeeet awm hy. 17 Ak oe qu mikhai, thailatnaak ing ak be lai, thlakdyng a hqingnak ak lo kut, 18 amak leek them ak poek kawlung, thawlh sainaak benna hqingtawn ing ak dawng khaw, 19 a qaai kqawn nawh thailatnaak ing ak

bee, ciengnapaca lakawh hqehnaak ak sai. 20 Ka capa, na pa awipek ve ngai nawk, na nu cawngpyinaak ce koeh mang taak. 21 Na kawlungawh khoemnawh, na hawngawh aawi poe lah. 22 Na cehnak hoeiawh ni hqui nawk, na ih hui awhawm ni doen kawm saw, na thawh lawawh ni tym pau pyi kaw. 23 Awipek taw maihchoei na awm nawk, cawngpyinaak taw vaangnak ni, toelthammaak taw hqingnaak lampyi ni. 24 Nu amak leek ingkaw awih tui ing thlang ak zoek thlangthai nu ang laak awhkawng a nik doen hamna; 25 Nak kawlung ing a dawnaka koeh nai nawk, a mikkhu ing koeh ni zoek seh nyng. 26 Pum ak zawi nu ak caming pa ing phaipi cunoet doeng ham nawk, sampaiah ni ing hqinglung phutlo ce khoem thai hy. 27 Thlang ing a hii a uih kaana mai ce pawm hly thai nawk nu? 28 Thlang ing a khaw a uih kaana maihling leeh hly thai nawk nu? 29 A pyi a zuu venna cet nawk ak hei taw a uu pynoet awm kut tlak kaana am voei ti kaw. 30 Ak phoencawih dipnaak ham ak quu thlang awm am loet ti kaw; 31 A mi huh awhtaw a pyh khqihna sah seitaw a im awhkaw a them a long boeih ing sah kaw. 32 Kawlung ak talh nu taw sampaiah, a hqinglu a seetnaak ham bi ak sai ni. 33 Tlohnat ingkaw chah phyi kawm saw ming seetnaak ce ham kaw. 34 Ytynaak kawlung taw pa khqi kawsoneak na awm nawk phu sui nynawh am loet ti kaw. 35 A mikhuh awh tlansum pynoet awm am khyn kawm saw them khawzah pek ingawm kaw am zeel sak kaw.

7 Ka capa, kak awi kqawn ve ngai nawk, kak awipek khqi boeih ve kym lah. 2 Kak awipek khqi ce haana nawk hqing pyi; kak awipek boeih ve mik amyihna qeetna. 3 Na kutawh byn nawk nak lingbyi catlap awh qee. 4 Cyihnaak venawh, "Ka nanu nang ni," ti nawk, zaaksimnaak ce nam cawtnu na khy. 5 Nuk chee lakawh ni doen nawk khawsak amak leek nu a sykzoekaak awhkawng a ni doen naak ham. 6 Ka im chawhleap ak poek awhkawng qyym nyng, 7 Kawlung amak soep cadawng khqi ang lak awh cadawng poekthainaak amak ta ce hu nyng saw, 8 Nula a awmnaak lamkil benna ce tet nawh a im lam ce pan hy. 9 Khawmy nawk khawmthan, thanlung khuiawh ce nula im lam ce pan hy. 10 Ce nula taw pum ak zawi suihsaak ing hlawihllan qu nawk thailatnaak ing ak khawsa ni. 11 A hy tho nawk imawh awm poekpoek ham am ngaih nawk a khawphaa ing dym am ngaih hy. 12 Tuhqoe awm imkawt awh, imkil awh, lamkil a hoeiawh van nawk sui hy. 13 A huh cadawng ce tunawh mawk hy, a hat thlang amyihna a venawh, 14 "Kaiawh qoepnaak hyih phum ham ka taak ce, tuhngawi kak awikam amyihna pha hawh hy. 15 Ceamyihna awm saw nang ak do ham ingkaw ak sui hamma law nyng, nang nihuk khoem nyng. 16 Ka iihkhunawh hiphaih ak leek soeih, Egypt hiphaih ce phaih nyng. 17 Ka iihkhun ce myrrah, aloe ingkaw thikuuing hloen boeih hawh nyng. 18 Law lah, mymcang khaw a thaikh lhan dy lungnaak ing nawn hainh lah sih, lungnak ingawh ngaihsoep sak lah sih nyng. 19 Imawh ka vaa am awm hy, khawlawnk hla na khinna dii hy. 20 Tangka bawm khyn nawk, pihla a lum hlan dy am voei law hly hy," ti na hy. 21 Ak awitui ing sykzoek nawk, am kyihcah qunaak ing lam hang pyi hy. 22 Cedawngawh him hamna a mi sawi vaitaw, ak qaw ami phephaak qui aawi hamna ak cet, 23 Phaing a thihi hly a siim kaana ang hlaa ing ding nawk dawng lam a pan amyihna nula hu nace baang pahoei hy. 24 Cedawngawh ka capa khqi aw, kak awi ve ngai unawh, kam khaa awhkaw awi ak cawn law ve haana lah uh. 25 Nak kawlung ing a lamawh koeh hquu sei taw, a lampyi awhkawng ce pleeng seh nyng. 26 Anih ing thlang khawzah leembai sak nawk, a him khqi awm thlang khawzah ni. 27 A im taw Ceeikhui cehnak lamna awm nawk, thihiak imkhui na ak sawikung ni. (Sheol h7585)

8 Cyihnaak ing khyy nawk, zaaksimnaak ing ak awi am yy nawk aw? 2 Lampyi hoeiawh, lampyi kengsam hoeiawh ce dyi hy.

3 Khawk khui lutnak vawng kengawh, vawngkawt kengawh ce dyi nawk thayy ing khyy hy. 4 Aw nangmih thlanghqing khqi, nik khy khqi nyng, kak awi ve thlanghqing khqi ham ni. 5 Aw nangmih thlangzap khqi, khingaihnaak ve toen lah uh; nangmih tlakqaw khqi aw, cyihnaak kawlung toen lah uh. 6 Ngaih lah uh, nangmih ham awileek soeih kqawn hly nyng, kak awi kqawn boeih ve ak thym boeih ni. 7 Ka huui ing awihihthym saa nawk, kam lai ing them amak leek ce maa hy. 8 Kam khaa awhkaw awilung boeih ve amak thym ingkaw hoet ham kawi am awm hy. 9 Ak zaasiim ham dang pheng nawk, cyihnaak ak taa khqi ham a hqeenaa pynoet awm am awm hy. 10 Ngun lakawh toelthammaak ce tyk nawk, sui lakawh cyihnaak ce tyk lah. 11 Cyihnaak tau sulung ang lakawh a phu tlo ngai nawk anih ingqawi miyihem ham kawi ak chang am awm voel hy. 12 Kai, cyihnaak taw, ngaihtaakaak ing awm hainh nih nyng, cyihnaak ingkaw ngaihtaakaak ce ta nyng. 13 Bawipa kqjihchah taw amak leek them sawhnaak ni; oeqlunaak, hoelqunaak, khawboe seeetaak ingkaw amak thym awikqawnnaak khqi ce sawh na nyng. 14 Khawkhannaak ak thym ingkaw siimnaak ak thym ce ka koe ni; simthainaak ingkaw saithainaak awm ka koe ni. 15 Kainh caming boekhqi ing boei ngawihnaak awh ngawi unawh, ukkungkhqi ing ak thymna awitlyk uhy. 16 Kainh caming sangpahrangkhqi ing awitlyk unawh, kyiqangkhqi ingkaw khawmdek ukkungkhqi boeih ing awm. 17 Kai a nik lungnaak thlangkhqi ce lungnak khqi nyng, kai a nik sui thlangkhqi ing ni hu kawm uh. 18 Khawthhem ingkaw boeimangaak khqi ka venawh awm nawk, kyihcennaak ingkaw dyngnaak khqi boeih awm ka venawh awm hy. 19 Kak thainh taw sui lakawh a phu tlo nawk ngun ak leek soeih lakawh awm a phu tlo ngai hy. 20 Dyngnaak lampyi awh cet nyng, ak thym lampyi ce tut nyng. 21 Kai a nik lungnak thlangkhqi venawh khawh ing bee khqi nawk ami qo bawm ce kak bee nak pek khqi hamna. 22 Bawipa ing a theem synn lammaacyk amyihna kai ni ta nawk, synnawh a them seh cyk awhkawng ce. 23 Kumqui hamna, ak cyc soeihna synnawh awm nyng, khawmdek a synn hlan awh. 24 Tuicunlii a synn hlannawh lawngcatui ang lawng hlannawh synnawh awm hawh nyng. 25 Tlang khqi a awm hlannawh khawmcung khqi a awm hlannawh kai synn hawh nyng. 26 Khawmdek ingkaw khawhyn khawqaam khqi a synn hlannawh dekvaai awm a awm hlannawh kai synn hawh nyng. 27 Khan ce amah a hyynawh a taak nawk tuidung haaiawh lawnglam a sai hlannawh synn hawh nyng. 28 A saangnak khan hyynawh ciengmaikhqi a sah sak nawk tuicunlii khuina ak lawng tuihawk khqi a sai huiawh, 29 Tui ing ak awipek ama poengaak thai ham tuicunlii awhkaw langhak khqi, lawngca ang lawngnaak khawqii khqi a sai huiawh synn awh nyng. 30 Kutthoem thlang amyihna avenawh awm pe nyng, a awmhlynaakna awm nyng, a venawh awmhlynaak ing bee poepa lawt nyng. 31 A khawmdek saiajw awmhlynaak ta nyng saw thlanghqing khqi khanawh zeelmangaak ce nyng. 32 Cedawngawh, ka ca khqi, kak awi ngai lah uh, ka lam ak tut khqi taw a zoseen thlang khqi ni. 33 Ka cawngpyinaak ve haana unawh cyi unawh koeh maa uh. 34 Kak chawmkeng awh qeh nawk, ka ipkhui kawtawh qeh nawk kak awi ak ngai ak zaa thlang taw a zoseen thlang ni. 35 Anik hu ak thlang boeih ing hqingnaak hu unawh, Khawsa huhhlynaak ce ham kawm uh. 36 Cehlai, kai anik hang ak thlang taw a hqingnaak ak khanawh kut ak thlaana awm kawm saw, kai anik sawhnaak ak thlang taw thihiak ak lungnaak ak thlangna awm kaw.

9 Cyihnaak ing a im sa nawk, ak tung khqih ling hy. 2 Ak khqih ce him nawk misurtui ce tloieh nawk ak caboei ce phaih hy. 3 A bibikung nula khqi ce tyi khqi nawk, khawkkhui a sangnaak hynna cet unawh kyy uhy. 4 "Cyihnaak amak ta khqi boeih vebenna law

lah uh," tinawh siimnaak amak ta khqi ce khyy khqi hy. 5 "Law unawh taw, ka buh ai unawh kak tloieh cee misurtui ce aw lah uh. 6 Aw nangmih thlakqawkhqi aw qaawnnaak lam ce cehtaak unawh hqjng lah uh; siimnaak lamawh ce cet lah uh," ti hy. 7 Thlaktlai ak toel kung ing chah pyi lat nawh, thlakche ak ho kung ing kut zaawk lat hy. 8 Thlaktlai ce koeh toel, ni sawh na kaw, thlakcyi mah toel, anih ing ni lung na kaw. 9 Thlakcyi ce toel lah, a cyihnaak pung khqoet kaw; thlakcyi ce cawngpyi lah, a simnaak ing pung khqoet kaw. 10 Bawipa kjihchahnaak taw cyihnaak a kungpyina awm nawh, ak ciim siimnaak cetaw zaaksimnaakna awm hy. 11 Kaih caming na khawkum pung khqoet kawnt saw, na hqjngnak khawngkhih ing sau khqoet kaw. 12 Na cyih awhtaw, namah ham nak cyina awm kawm saw, thlaktlaina na awm awhtaw namah ing zaawk kawp ti. 13 Nukche ing akut am khoem poek nawh, a khawboe see nawh, am cyi hy. 14 A im chawmkengawh ngawi nawh, khawkkhui hysang ngawihnaak awhce ngawi nawh. 15 A mimah lamawh ak cet khqi ce khy khqi nawh, 16 "Khawn amak simkhqi boeih vena law seh," ti nawh khyy hy. Siimthainaak amak ta khqi venawh bai, 17 "Quuk tui taw aawi diikdik nawh, quuk buh ai taw aawp hy," ti hy 18 Cehlai cawhce thihihnaak awm nawh a cei ak thlangkhqi ing Ceeikhui dung soeiinha amik awm ni ti am sim uhy. (Sheol h7585)

10 Solomon ak awcicyh taw: capa ak cyi ing pa ak kaw zeel sak nawh, capa ak qaw ing nu ak kaw seet sak hy. 2 Amak thymna khawhtheem huh ing phu am ta nawh, dyynnaak ingtaw thihihnaak awhkawng hul hy. 3 Thlakdyng ce Bawipa ing buh am lum sak nawh, amak dyng thlang ang sytnaak ce plathlam sak kaw. 4 Thakdam kut ing thlang khawdeng sak nawh, thlangmeet kut ing thlang boei sak hy. 5 Cangah huiawh aaww ak cun ak thlang taw capa ak cyina awm nawh, cangah huiawh ak ip dudut ak thlang taw thangseet ak pe capa ni. 6 Thlakdyng a luawh zoseennaak awm nawh, thlakche am khaaaawh boeseetaaknig bee hy. 7 Thlakdyng siimnaak taw zoseennaakna awm nawh, thlakche ming taw tlawihzip kaw. 8 Thlakcyi ingtaw ak kawlung ing awipek khqi ce do nawh, thlakqaw ingtaw plamtham sak hy. 9 Dyng nawh ak thyi lamawh ak cet thlang taw a lam cet dyng nawh, cehlai, lam ak kaawiawh ak cet thlang taw pholang ngai kaw. 10 Mik ingawh ak mikhqihkhqi ing seetnaak pha sak nawh, thlakqaw awihpungkhqi ing tlu kawm uh. 11 Thlakdyng am laiaiwh hqjngnaak tui lawng nawh, cehlai thlakche am khaaaawh amak leek them ing bee hy. 12 Sawhnaak ing kqeengnaak pha sak nawh, lungnaak ingtaw seetnaak boeih ce hlipdah kheop hy. 13 Ak che ak leek ak hqimhqaa thai am khaaaawh cyihnaak ce dang nawh; cehlai ak che ak leek amak hqimhqaa thai am tingawh cumcik awm hy. 14 Thlakcyihkhqi ing cyihnaak ce cun nawh; thlakqaw am khaa ing thihihnaak zoe sak hy. 15 Mangpa a khawkhham taw a khawkkhui chungnaak vawng na awm hy, cehlai khawdengnaak taw ak khawdeng khqi hamna patangnaak na awm hy. 16 Thlakdyng a bibi phu ing hqjngnaak pha sak nawh, amak dyng thlang ingtaw toelthamnaak pha sak hy. 17 Toelthamnaak awi ak ngai ing hqjngnaak lamawh cet nawh, toelthamnaak awi amak ngai ingtaw lam hang hy. 18 Thlang sawhnaak ak thuhphah ing thailatnaak awi kqawwnaak hui toen nawh thlang lakawh thlang ak theet thlang taw thlakqaw ni. 19 Awi a doem naak awh hqo tho nawh, awi aki cypp ak thlang taw thacyi ni. 20 Thlakdyng ak awi taw ak tlo seiolah ngun ing myih nawh, thlakche ak kawlung taw huham amak taa ing myih hy. 21 Thlakdyng a hui am lai ing thlang khawzah cawmciah nawh, thlakqaw ingtaw simthainaak khawdeng nawh thi hy. 22 Bawipa a zoseennaak ing boemang sak nawn, patangnaak am tawmsap hy. 23 Thlakqaw ingtaw theem amak leek sainaak awh awmhly nawh, thlakcyi ingtaw cyihnaak awh

awmhly hy. 24 Thlakqaw taw kjihnaak ing zawlkoep kawm saw, thlankdyng taw ang syt boeih pekna awm kaw. 25 Amak dyng thlang khqi taw khawhlii ing zaawn khqi saw qeeng boeih kawm uh. Thlakdyng taw kumqui ak cak lungnu amyihna dyi poepa kaw. 26 Thlang thakdam taw haa ak zaa sak misur tui ak thui ingkaw mik ak thiip sak maiku amyihna, ak tyi khqi hamna awm kaw. 27 Bawipa kjihchahnaak ing khawkum sang sak kawm saw, cehlai thlang amak leek khqi khawkum taw tawi sakna awm kaw. 28 Thlakdyngkhqi a ngaih-uunaak taw awmhlynaak na awm nawh, amak dyng thlangkhqi ang ngaih-uunaak taw a hqawngna coeng kaw. 29 Bawipa a lampyi taw thlakdyngkhqi ham thukzingnaak na awm nawh, theem amak leek ak saikhqi ham taw thihihnaak ni. 30 Thlakdyngkhqi taw thoengna am awm kawm usaw, amak dyng thlangkhqi taw khawmdekk awh am khawska kawm uh. 31 Thlakdyng am khak khui awhkawng cyihnaak thoeng law nawh, amak leek theem ak saikhqi am lai taw qeet pekna awm kaw. 32 Thlakdyngkhqi am khaaaawh ai kawi cawn nawh, khawsak amak leek am khaaaawh amak leek them doeng cawn poepa hy.

11 Bawipa ing amak thym cawi tahnak ce tuih nawh ak thym cawi tahnaak ce um hy. 2 Oequnaak a awm naak awh chahphyihnaak awm nawh, thlakkaina kaw ak phaihkhqi venawh cyihnaak awm hy. 3 Thlakdyngkhqi kawlung leeknaak ing leek-naak lamawh amimah sawi khqi kawm saw, thlang amak ypwamkhqi am ypwamnaak ing amimah plam sak khqi kaw. 4 Kawsonaak a awm khui taw khawhthem ing phu am ta kaw. Dyngnaak ingtaw thihihnaak awhkawng loet sak kaw. 5 Thlakleek a dyngnaak ing lam huh kawm saw; khawsak amak leek thlang taw a seetnaak ing tluk sak kaw. 6 Thlakdyngkhqi taw ami dyngnaak ing ami-mah hul khqi kawm saw, amak dyng thlangkhqi taw seetnaak a mi sai ing amimah bin khqi kaw. 7 Ak thymna khaw amak saa thlang taw a thihihnaang ngaih-uunaak awm boet paohei nawh, ak thamahnaak ingkaw ang ngaih-uunaakkhqi boeih awm qeeng kaw. 8 Thlakdyng taw kyyinaak a sawngawh loet sakna awm kawm saw, amak leek thlang ing a hyn pang tloep kaw. 9 Khawsak amak siim thlang am khaa ing a imceng lovai hqee nawh, thlakdyng ingtaw ak leek khawpoeknaak ing loet sak hy. 10 Thlakdyngkhqi khawsak a vaanawh a tui a khaw ing awmhly nawh, thlakche a thihihnaang thlakdyngkhqi a zoseennaak ing khawkkhui kyihcahna awm nawh, thlakchekhqi am khaa ing thangseet sak hy. 12 A imceng ak husit thlang ing cyihnaak khawdeng nawh, kawcyih ak ta ingtaw am khaa cypp sak hy. 13 Awih doem ing awihhyp pho sak nawh, thlang ypwam ing awihhyp thuh phah khawi hy. 14 Sawikaainaak ak leek aww naak awh tluuknaak awm nawh, poeknaak ak leek a doemnaak awh noengnaak awm hy. 15 Khawlawng thlang ham qii ak khoeng taw amah ham seetnaak ak saina awm nawh, qiqk khoengkung ak toel thlang taw ding kaw. 16 Nukleek ing kyihcahnaak ham kawm saw, pakleek ing khawhthem ham kaw. 17 Thlangqueen khaw ak ngaih amah ham theemleek ham nawh khawsak amak leek ingtaw a pumsa ham kyinaak ham kaw. 18 Thlakche ing thlang a thailatnaak phu hu nawh dyngnaak ak saw ingtaw laksawng do kaw. 19 Dyngnaak awh ak ypwam thlang ing hqjngnaak ham nawh, seetnaak ak hqout ing thihihnaak ham kaw. 20 Kawpoek amak leek thlang ce Khawska ing tuih nawh, thlakdyng taw ym hy. 21 Begoep usei awm, khawsak amak leek thlangkhqi taw toeltham kaana am hlah khqi kawm uh. Cehlai, thlakdyng taw ak dingna cet kaw. 22 Ak thlang daw mai seiawm, amak cypp nula taw vawk a huiawh sui kutchyh byn pek ing myih kaw. 23 Thlakdyng a ngaihnaak taw themleek awh dyt nawh, thlakche ang ngaihypnaak taw kawsonaak ing boet kaw. 24 Theem pek taw pungnak khqoet ni, khawboe seet taw khawdengnaak khqoet ni. 25 Khawboe ak leek thlang taw boei kawm saw, tui ing thlang ak

syyp thlang taw amah awm symna awm kaw. 26 Caang ak hlawh thlang taw kawseet na awm kawm saw, ak zaawi ak thlang taw zoseenaaing bee kaw. 27 Themleek ak sui ing kawpeok leek moe qhun kawm nih saw, amak leek theem ak sui ingtaw amak leek theem mi hqum kawm nih. 28 A them ak ypnak thlang taw tlu kawm saw, thlakdying taw thing a no amyihna hlultawi kaw. 29 A imkhuiawh seetnaak ak saikung ing khawhlil qona pang kawm saw, thlakqaw ing thlakcyi a tamnaa na awm kaw. 30 Thlakdying ak thaihqah taw hqingnaak thingna awm nawh, thlakcyi ing thlang kawlung noeng hy. 31 Ngai lah, thlakdying pateng khawmdiek awh thunga a awm awhtaw thlakche ingkaw thlak-thawlh khqoet taw ikawmyihna nu thunga a awm pai kaw.

12 Toelthamnaak ak lungnaak ing simnaak ce lungna nawh, zyhiertoelaak ak sawhnaak taw qamsa ing myih hy. 2 Thlakdying ing Bawipa kawzeelnaak hu nawh, theem amak leek ak sai ing Bawipa kawsonaak zaawk kaw. 3 Thlanghqing ve seit sainaak ing am cak sak nawh, thlakdying ang dyih hyn taw cak kaw. 4 Khawsak ak leek nu taw a vaa ham boei lumyyna awm nawh, chahnaak kawi theem ak saipyi taw a vaa quh ak haawn sak ni. 5 Thlakdying ak khawpoeknaak taw leek nawh, thlakche ak khawpoeknaak taw thailatnaak ni. 6 Thlakche ak awi ing thlang thi ang lawng hly qeh nawh, thlakdying ak awi ingtaw amah loet sak hy. 7 Khawsak amak leekkhqi taw khaawngna awm kawm saw qeeng kawm uh, thlakdying a ipkhui taw ak cakna dyi poe kaw. 8 Thlang a cyihtaak amyihna kyiuhcyna awm kawm saw, kawpoek amak leek thlang taw thlang ing hep kaw. 9 Kawpoek saang toen nawh aikawi amak ta ang lakawh, kawpoek neem nawh ikawm amak ta tamnaa taak ve leek ngai hy. 10 Thladying ingtaw a qamsaa ai kawi ce poek nawh, cehlai, thlakqaw am qeennaak ak saang soeih taw thekhanaak ni. 11 A lo awh bi ak bii thlang ingtaw ai kawi khawzah ta nawh, a naawmnaak ak sui thlang ingtaw cyihsaak am ta hy. 12 Khawsak amak leekkhqi ing thlakchekhqi a lawk nai unawh, thlakdyingkhqi a zung taw cak poepa hy. 13 Thlangthawlh taw amah ak awi awh aawlk nawh, thlakdying taw kyinaak awhkawng loet kaw. 14 Thlang am lai thaing themleek bee sak nawh, amah a bii phu ing ak tingna pekna awm kaw. 15 Thlakqaw ing amah mik huhawh a lam thym sak hy, cehlai thlakcyi ingtaw thlak awi ngai hy. 16 Thlakqaw ing ak kawsonaak pho sak pahoei nawh, thlakcyi ingtaw chah kawi ce thuophphay. 17 Awihthym ak kqawn ing ypawmnaak dang sak nawh, amak thym diyhthingna ak dyi taw thlangthai palat ni. 18 Poek kaana awi tinaak ing cimcamyihna thlang sun nawh, thlakcyi ak awi ing thlang qoei sak hy. 19 Hui ak thym taw kumquina cak sakna awm kawm saw, qaa'i awi kqawn taw kawlhkall ca ham ni. 20 Them amak leek ak poekkhqi kawlungawh thailatnaak awm nawh, qoepnaak ak sai khqi hamna taw zeelmangaak ni. 21 Thlakdying ak khanawh amak leek them ing am pha kawm saw, khawsak amak leekkhqi cetaw amak leek them ingawh bee kawm uh. 22 Qaa'i ak kqawn am lai taw Bawipa ing sawh na nawh, amak thymna ak khawsakhqi taw Bawipa ing ym khqi hy. 23 Thlakcyi ing cyihsaak thuh nawh. Thlakqaw kawlung ingtaw qawnaak dang sak hy. 24 Thlak meetkhqi kut ing thlang uk kawm saw, thlang thakdamkhqi taw tamnaa bibinaak ing dyt kaw. 25 Lyynaak kawlung ing thlang patang sak nawh, awih leek ing thlang awmhly sak hy. 26 Thlakdying taw a imceng ham hquikungna awm nawh, khawsak amak leekkhqi ing kqeeng-naak pha sak hy. 27 Thaa ak ngak ing a qamsaa kah saa am keuh hy, cehlai thaah ak meet ing a taak khawh khui awhkaw lo nawh thlang pe hy. 28 Dyngnaak lamawh hqingnaak awm nawh, ce lamawh thihnaak am awm hy.

13 Capak cyi ing a pa ak awiyyn ngai nawh, thlang ak husit ingtaw toelthamnaak awi maa hy. 2 A huui awhkaw ak thain leek awhkawng thlang ing ak thain qah hu nawh, cehlai amak ypawm thlang ingtaw boeset sai ce ngaihy. 3 A hui am lai ak ngaihtaak thlang taw a hqingnaak khanawh ak ngaihtaak thlangna awm nawh, cehlai ak poek kaanaawi ak saa paqaap qaap thlang taw plamtham kaw. 4 Thlang thakdam kawpoek ing a hoei ngaihnaak ta lawt hy, cehlai ikaw am ta hy. Thlakmeet ingtaw a ngaih boeih ce hu hy. 5 Thlakdying ingtaw amak thym awi kqawn sawh na nawh, cehlai khawsak amak dyng thlang ingtaw chahnaak ing ming che phyih sak hy. 6 Dyngnaak ing ak thymna khawksaakhy ce khoemdoenkhyi nawh, thawhnaak ing thlakthawlhkhqi ce tuuk sap khqi hy. 7 Boeina ak saa qu ikawm amak ta awm nawh, khawdengnaak saa qu ing khawhthem khawzah ak ta awm hy. 8 Khawh ing ak taakung hqingnaak thwng thai nawh, cehlai khawdeng thlang ing thlang a theet vutnaak awi am za hy. 9 Thlakdying a vaangnaak taw angqungtheng nawh, thlakchekhqi a maihchoei taw him pekna awm kaw. 10 Ooekqunaak ing hqo thawsak nawh, awi ak ngai venawh cyihnaak awm hy. 11 Amak thymna khawh huh taw phu amak tana qeeng zip kawm saw, bibi phu huh khawh taw pung khqoet khqoet kaw. 12 Ngaih-uunaak a plam awh kawlung tio nawh, cehlai ngaih-uunaak a soepnaak taw hqingnaak thingsii ni. 13 Awi amak ngaihkhqi ham thihnaak pha kawm saw, awipek ak kqjihchah ak thlang taw kutdo pekna awm kaw. 14 Thlakcyiikhqi cawngpyinaak taw hqingnaak tuuk amyihna awm nawh, thihnaak thaang awhkawng thlang loet sak hy. 15 Zaaksiimmnaak leek ing thlang mikhaileeknaak pe nawh; cehlai amak ypawm thlang a cehmaak lam taw kyi hy. 16 Khawksiim thlang ingtaw cyihnaak ing bi sai nawh, thlakqaw ing a qawnaak zaan hy. 17 Amak leek tamnaa taw zoseetnaak awh tlu thai nawh, ak ypawm dyihthing taw sadingnaak ni. 18 Toelhaak amak ngaih-khawdeng chah phyih nawh, cehlai toelnaak ak haanaaking kyiuhcynaak ham kaw. 19 Ngaih-uunaak a soepnaak taw kawlung ham aawi nawh, thlakche hamna seat sainaak awhkawng hu nawng ve sawhnaak kawi ni. 20 Thlakcyi pyinaak taw cyihnaakna awm nawh, thlakche pyinaak taw seetnaak ni. 21 Thawhnaak ing thlangthawlh hu hqut nawh, thlakdying taw themleek ing thunga awm kaw. 22 Thlakleek ing a tu a ca khqi hamna khawh taak pek khqi nawh, thlakche a khawh taw thlakdyingkhqi ham cun pekna ak awm ni. 23 Khawdeng a loma awh caang daw soeih moe, amak thymna bibinaak ing phu amak tana zip boeih hy. 24 A ca ak sawhnaak thlang ing cumcik am hawna nawh, ak lungnaak thlang ing a ca ce toelna hy. 25 Thlakdying ing taw buh ak phyina ai nawh, cehlai thlakche taw buh cawih ing awm kaw.

14 Nuk leek ing a im sa nawh, nuk che ingtaw a kut qoe ing hqee hy. 2 Ak thymna khawh ak sa ing Khawska kqihchah nawh, thlakqaw ingtaw husit hy. 3 Thlakqaw am khaaawh oequnaak cumcik awm nawh, thlakcyiikhqi am khaa ing a mimah hul khqi hy. 4 Vaitaw amca i ma awmnaak awh aihkawng caih nawh; cehlai vaitaw amca i tha awhkawng cangvui campai thaawth hy. 5 Dyihihing ak thym ing qaa'i am kqawn nawh, dyihthing amak thym ing a qaa'i kqawn hy. 6 Thlang ak husit ing cyihsaak sui nawh, cehlai am hu hy; simthainaak ak ta khqi ham taw cyihsaak zoe ca hy. 7 Thlakqaw venawh koeh awm, anih a venawh cyihsaak am hu ti kawp ti. 8 Hawkpoekthai cyihsaak taw nimah khawsak sim qunaak ni. Thlakqawkhqi a qawnaak taw thailatnaak ni. 9 Thlakqaw ingtaw thawhnaak tlaihvawng pek ce ikawna am ngai nawh, cehlai thlakdyingkhqi venawh kawpoek leeknaak awm hy. 10 Nik kawseetnaak ce nimah doeng ing ni simthai nawh, ni zeelnaak awm thlakchang ing am ni sim pyih khqi na. 11 Khawsak amak leek a im taw hqee pekna awm kawm saw, thlakdying a imca taw

kau khooet kaw. **12** Thlang ak poeknaak awh ak thymna ak dang thihaak ing ak dyt lam awm hy. **13** Qaihnaak awh awm kawseetaak awm thai nawh, zeelmangnaak awm kokqangnaak ing dyt thai ny. **14** Kawlung khuiawh hu ak nawng taw amah ngaihaak ing bee nawh; thlak leek taw amah ingkaw amah kaw zeel qu sak kaw. **15** Thlakqaw ing awi a hoi cangna nawh, thlang khawksiim ingtaw a lam ceh ak ceetna toek hy. **16** Thlakcyi ing thawl kqih nawh cehtaak hy; thlakqaw ingtaw lep nawh amah yp qu na hy. **17** Kaw ak so ing khawkpoek kaana bi sai kawm saw, seetnaak ak poek ak thlang taw sawh na kawm uh. **18** Thlakqaw ing qawnaak a qo pang kawm saw, khawksimthaik thlang ingtaw cyihnaak lumyk pang kaw. **19** Thlakche taw thlakleek haiawh lut kawm saw, khawsak amak leek thlang taw thlakdying ak chawmkeng awh dyi kaw. **20** Thlak khawdeng a imceng ing sawh na nawh, thlang ak boei ing pyi khawzah ta hy. **21** U awm a imceng ak husit taw thawlkh ak sai ni; khawdeng ak lungnaak taw thlang zoseen ni. **22** Theem amak leek ak poekkhqi ing lam am hang unawh aw? theemleek ak poekkhqi ingtaw lungnaak ingkaw ypaumnaak ce pang kawm uh. **23** Bibinaak ing a phu ta nawh, cehlai hui am lai doeng awhkaw awi ing khawdengaak pe hy. **24** Thlakcyi a boei lumyk taw a khawkhham ni, thlakqaw a qawnaak taw qawnaak doeng awh ni. **25** Dyihtthing ak thym ing thlang loet sak nawh, qaa ak qawng ing thailatnaak cawn sak hy. **26** Khawsa ak kqihchahaak ing ziingnaak ak cak ta nawh, a cakhqi hamna awm thukzingnaak hyanna awm hy. **27** Khawsa kqihchahaak taw hqjinggaak tui a phytnaakna awm nawh, thihnaak dawng khui awhkawng thlang ak loet sakkungna awm hy. **28** Pilnam thlang a doenmaak awh boei a boeimangaak awm nawh, pilnam thlang a zawinaak awhtaw boei capa amangaak qeeng hy. **29** Kawso ak yh thai thlang taw zaaksimnaak ak dung soeih ak ta thai ak thlangna awm nawh, cehlai kawk tawi ak thlang ingtaw qawnaak ni ang dang sak hy. **30** Kawlung sadingnaak taw pumsa hqjinggaak na awm nawh, thlang ytyntaak taw quh hawnnaak mai ni. **31** Khawdeng ak thekhanaak taw amah ak Synkung a thekhanaak na awm nawh, cehlai khawdeng ak qeen ingtaw ak kyihch thlang ni. **32** Thlakche taw a boe seetnaak awh tlu nawh, ak dyngna khawksaa thlang taw thihnaak khui awhkawng zingnak ta kaw. **33** Khawkpoekthai ak takhqi kawlungawh cyihnaak awm nawh thlakqawkhqi ang lakawh pho pe hy. **34** Dyngnaak ing khawqam zoeksang nawh, cehlai thawlhnakaak ing thlang boeih ham mingseet naak ni. **35** Sangpahrang a lungnaak taw tamnaa cyi ak khanawh awm nawh, ak kawsonaak taw chah ak phyih sak ak khanawh awm hy.

15 Awih neem ing kawso qeem sak nawh, awih tlo ing kaw so sak hy. **2** Thlakcyi am lai ing cyihnaak awitak cawn sak nawh, thlakqaw am kha ing qawnaak dang sak hy. **3** Boepa mik taw hyn boeih awh awm nawh, theem leek ingkaw theem che toek poepa hy. **4** Thlang ak qoei sak lai taw hqjinggaak thingna awm nawh, thailatnaak ing ak bee lai taw kawlung patang sak hy. **5** Thlakqaw ingtaw a pa ak toelnaak husit nawh, cehlai toelnaak ak haanaak taw ngaihaak ing khawksaa thlang ni. **6** Thlakdying imawh khawh khawzah awm nawh, thlakche khawboe phu taw kawpoek kyinaak ni. **7** Thlakcyi a hui ing siimnaak tungtai sak nawh, thlakqaw kawlung ingtaw cemiyh am sai hy. **8** Thlakche a hyih phum taw Khawsa ham tuih kawina awm nawh; thlakleek a hlacammaak taw Khawsa ham kawzeelaak ni. **9** Thlakchekhqi lam taw Khawsa ham tuih kawina awm nawh, dyngnaak lamawh ak cethkqi cetaw lungna khqi hy. **10** Lamawh amak cethkqi taw ak tlo soeih toelnaak ing qeeh nawh; toelthamnaak ak sawhnaak thlang taw thi kaw. **11** Ceikhui ingkaw Abaddon ce Khawsa ing a huh pheng awhtaw thlang kawlung taw ikawmyh na nu ang dang

hly pheng? (**Sheol h7585**) **12** Thlang ak thekha naak ing toelnaak am lungna nawh, thlakcyi venna awm am cet ti kaw. **13** Kawlung awmhlynaak ing mikhai hlampan sak nawh, kawlung lhoonaak ing miyihia kawseet sak hy. **14** Khawkpoek thainaak kawlung ak ta ing cyinaak sui nawh, thlakqaw am kha ingtaw qawnaak doengawh awm hy. **15** Kyinaak ak sawng ham khawngchii boeih ve se boeih nawh, kawlung ak nawmkhqi ham taw zeelnaak poei ing bee poepa hy. **16** Patang doena theem khawzah taak ang lakawh Khawsa kqihnaak ing theem a khoeh taak ve leek bet hy. **17** Sawhnaak kawlung ing vaitaw ak tha him nawh buh vel anglakawh lungnak a awmnaak awh an hah ing buh vel haih leek bet hy. **18** Thlang am thin ak see ing hqehnaak coeng sak nawh, ynaak ak ta thlang ingtaw kawso qeem sak hy. **19** Thlang thakdam a lamawh hling bee nawh, thlakmeet a lam taw kau nawh dyng hy. **20** Capak cyi ing pa ak kaw zeel sak nawh, thlakqaw ingtaw a nu thee na hy. **21** Cyihnaak amak ta khqi ham taw qawnaak ve a mi awmhlynaak na awm nawh, khawksii thlang ingtaw a lam dyng sak hy. **22** Awi doet qu kaana bi sai ing am phu mah nawh, cehlai awi doet qunaak a kuum awh bibi coeng hy. **23** Amah a tym canawh awi doet hlatnaak ak thym zaak taw ym ham kawi soeih hy. **24** Thlakcyi ham hqjinggaak lam taw a baang benna kawng nawh, kham lam Ceikhui lamawh ama ceh naak ham. (**Sheol h7585**) **25** Bawipa ing thlak oekqu a im ce khai koep kawm saw, nuhai a im khoeng taw cak sak kaw. **26** Kawpoek amak leek taw Khawsa am tyih kawina awm nawh, kawpoek ak ciimkhqi kawpoek cetaw ym pekkhqi hy. **27** Thlak kamvaa ing a imkhui patang pe hy, cehlai ang hyp kutdo ak sawhnaak thlang taw hqjng kaw. **28** Thlakdying kawlung ing awi khin ngaih hy, cehlai thlakche ingtaw awihche lhah sawghat hy. **29** Khawsa ing thlakche khqi ce lak hla khqi nawh thlakdying khqi a cyckahnaak taw zaak pekkhqi hy. **30** Mikhai hlampannaak ingawh kawlung awmhly sak nawh, awithangleek ing quhqawng cang sak hy. **31** Hqjinggaak pek toelthamnaak ak haanaak taw thlakcyi khqi a imkhui cakawna awm kaw. **32** Toelthamnaak amak haanaak taw ang myihla ak thekhanaak ni, zyihoetnaak ak haanaak ingtaw zaaksimnaak hu kaw. **33** Khawsa kqihchahaak taw cyihnaak ak cawngpyikungna awm nawh; dungvoengnaak taw kylkahna awmnaak hly ni.

16 Kawpoek ing khawhaannaak taw thlanghjing a hutna awm nawh, awi hlatnaak taw Bawipa venna kaw ni. **2** Thlang ing amah poeknaak awh a lam boeih boeih thym sak hy, cehlai Khawsa ingtaw kawlung ni a toek. **3** Na bibi boeih Bawipa kutawh hal lah. Cawhtaw na ngaihnaak boeih ni soep pe kaw. **4** Khawsa ing a hoiie soepkep boeih ce Amah kawngaih amyihna a sai boeih ni, khawsak amak leekkhqi a zoseetnaak khawngchii awm sai pe hy. **5** Ak oek qu kawlungkhqi boeih Bawipa ing tuih nawh, kawlung kutoet mai seiawm, a toel kaana am lhah ti kawm uh. **6** Qeennaak ingkaw awitak ing thawlhnakaak dip sak thai nawh, Khawsa kqihchahaak ing thlang ngawh thawlch ceh taak thai hy. **7** Khawsa ym kawina thlang ing khaw a sak awhtaw, a qaalkhqi mi qoepqui cana awm haih thai hy. **8** Amah thymna theem khawzah huh anglakawh ak thymna theem a khoeh huh leek hy. **9** Thlang, ak kawlung ing a sai ham kawi khawhnaak moe, a khawngkham khqi boeih cetaw Khawsa ing a sawi ni. **10** Sangpahrang am hui lai awh ak thym awithyynaak awm nawh, am khakhui awhkawng amak thym awi ap cawn ti kaw. **11** Ak thym tahaak ingkaw tehnaak taw Bawipa a koena awm nawh, tahaak sawngsa khui awhkaw ak qih boeih awm Amah a sai ni. **12** Sangpahrangkhqi ing amak thymna bibi tuih uhy, ngawlhdoehl ce dyngnaak ingawh cak sak ham ami ngaih awh. **13** Ak thym hui am lai ce Sangpahrangkhqi ing ym unawh, awithyym kqawn ce lungna uhy. **14** Sangpahrang kawsonaak taw thihnaak a dyihtthingna awm nawh, cehlai thlakcyi ingtaw ak kawsonaak dip sak hy. **15**

Sangpahrang a mikhai a hlampannaak awh hqingnaak awm nawh, ak kawzeelnaak taw khawtlan coeng a hu awhkaw cingmai amyih na ni. **16** Sui anglakaww cyihnaak taak ve leek soeih mah hy! Oeih, ngn lakawh zaaksimnaak tyk ve leek soeih mah hy! **17** Thlakdying a cehnaak lam ing thawlhy qei hy; a lam ak ngaihtaak thlang taw a hqingnaak ak ngaihtaak thlangna awm hy. **18** Oek qunaak taw plamthammaak a hai benna cet nawh, soekloeknaak awm tluuknaak a hai benna ak cet ni. **19** Thlak oek qu ingqawi thlang a khawh quk tei ak lakawh thlak khawdeng ingqawi thlak kaina phaih qu nawh awm leek ngai hy. **20** Toelhaak awi ak ngai thlang taw a khawsak vaan kawm saw, Khawsa ak ypnak thlang taw a zoseen thlang ni. **21** Kawlung ak cyi taw khawksiim thlangna awm kawm saw, awih tui ing simnaak pung sak hy. **22** Zaaksimnaak ve ak takkhqi ham taw hqingnak tui a phytnaak na awm nawh, thlakqawkhqi ham toelnaak ve qawnaak na coeng hy. **23** Thlakcyi ak kawlung ing a huui cawngpyi nawh, am lai simnaak ing tawmsap pe hy. **24** Awih leek taw khaawi amyihna, hqingnaak hamna aawi diikdi kawh, quh ham sadingnaak ni. **25** Thlang kawpoek awh lam ak thyymnaak a dang a boetnaak awh thihiaka lamna a awm lam awm hy. **26** Bi ak bi ing awk ai ngaihnaak camawh bi sai nawh, phoen phyinaak hamna bibi hy. **27** Thlak soeek ing theem amak leek sai ham poek nawh, am khaawh maih ling awm hy. **28** Kawpoek amak leek ing hqeihnaak syn nawh, thlang theetnaak ing beqoekhqi kqeng sak hy. **29** Khawsak amak leek ing a imcengkhqi sykoek nawh seetnaak lam panpyi khqi hy. **30** A mik ak hiim ing theem amak leek poeknaak ham hiim nawh, a huui ak cymbyp ing seetnaak pha sak hy. **31** Lukqawk sampai taw boeimangaak lumyki ni; dyngnaak ing ni huh thaina a awm hy. **32** Kawkdung thlang taw thlang thakawm lakawh leek ngaih nawh, kawso ak yhthai thlang taw khaw ak tlyk lakawh leek ngai hy. **33** Taicung taw phai khanawh hlamna awm seiawm ak thyym laityknaak taw Bawipa koe ni.

17 Thlakqaw qu doena imkhuiawh poei ak beena ai anglakawh, qoeppinaak ing buhkak khangoet bai leek bet hy. **2** Tamnaa ak cyi ing ming ak seet sakkung capa ce uk nawh, ciingnaakhqi a qo ce pang pyi khqi lawt kaw. **3** Cak ciimnaak ham cak am, sui ciimnaak ham maih ling ing ciimna awm nawh, lingbyi taw Bawipa ing ni am ciim. **4** Theem amak leek ak saikung ing thailatnaak ak awi ngai nawh, thlak thailat ing thlakche ak awi ce ngai hy. **5** Khawdeng ak thekhanaak taw anih ak Synkung ak thekhanaak ni, thlang kyinaak a sawng awh ak awmhly ak thlang taw a toel kaana am awm ti kaw. **6** Tucakhqi ve pacawngkhqi a boei lumyki na awm nawh, pakhqi taw cakhqi a boeimangaak na awm hy. **7** Awih kqawn thai ve thlakqaw ingqawi am qoeppui na nawh, qai awi kqawn ve Sangpahrang ingqawi am qoeppui khqoet hy. **8** Kutdo ve ak dokung mikawh suilung amyihna awm nawh, a haai ang mangnaak ben hoeiawh saithainaak ce ta hy. **9** Thlang a thawlhaak ak thuhphah ing lungnaak dang sak nawh, cehlai thlang a thawlhaak ak phokung ing beqoep qawi hqeh sak hy. **10** Thlakqaw a voei siim vyk lakawh thlakcyi hykpoet zyjhtoel ing phu ta bet hy. **11** Thlang amak leek ing awi am ngaihnaak ben doenga mang nawh, cemyih thlang cetau thlangqeen khaw amak ngai boei venna tyihna awm kaw. **12** Thlakqaw ak qaw huui ingqawi qhum anglakawh a ca a mi lawh pek phawm ingqawi qum ngaih awm bet hy. **13** Theem leek ce theem amak leek ing ak thung ak thlang taw seetnaak kaana a im am cawn taak ti kaw. **14** Oelh ngawngnaak ve tuile ak poek ing myih hy, cedawngawh khqah qunaak a awm hlanawh oelh ngawngnaak ce hu nawng taak. **15** Thlakthawlhy cang lu ak phiyh sak ingkaw thlakdying thawlhy ak phiyh sak ak thlang ce Bawipa ing am tyih qawi ni. **16** Cyihnaak amak ta thlakqaw kutawh ikaw ham nu cyihnaak thlaihnaak ham

tangka pekna a awm kaw? **17** Pyi leek ingtaw lungnaak ta poepa nawh, cawt taw kyinaak sawngawh a nik pyi ham ak thang law ni. **18** Khawpoeknaak thai amak ta ing a kut bei nawh, a imceng ham qii ak khoengkungna awm hy. **19** Boekoek ak lungnak ing thawlhy lungna awm, ak chawmkeng ak sang sak ing seetnaak ce sui hy. **20** Kawlung amak leek thlang a khawsak am vaan nawh; am kha ing thailatnaak awi ak kqawn poepa taw kyinaak sawng kaw. **21** Thlakqaw ak ca naak taw amah ingkaw amah kawseetnaak ak pe quna awm nawh, thlakqaw ak ca naak pa ing kawzeelnaak am ta kaw. **22** Kawlung zeelnaak taw sadingnaak na awm nawh, kawlung kawseetnaak taw quhqawg hawnnaak ni. **23** Thlakche ing ak dyng awityknaak kawi sak hamna ak hyp kutto lo hy. **24** Cyihnaak taw simthainaak ak takhqi hiaiawh awm nawh, cyihnaak amak ta a mik ing khawdeak a kelcawng dyna sui hy. **25** Capa ak qaw ing a pa kawseetnaak pe nawh, ak canaak nu ham ngaihkyinaak pe hy. **26** Thlangdying toelnaak kut thlak am leek nawh, ak thyymma awihtykkung vyk am leek hy. **27** Awih kqawn ak ngaihtaak ing cyihnaak ta nawh, zaaksimnaak ak ta ing awm mylh mylh hy. **28** Thlakqaw awm a awm mylh mylh awhtaw thlang ing thlakcyi na ngai nawh, a huui a cymbyp awhtaw thlang ing kawhsimna ngai hy.

18 Thlang mi haiben ham ak maa ak thlang ing amah ak kawngaih kawi sui nawh, cyihnaak ak thyym boeih ce thaikh boeih hy. **2** Thlakcyi ing cyihnaak awh am zeel nawh, amah kawpoek ngaihnaak doengawh awmhly hy. **3** Thekhanaak a awmnaak awh hepnaak awm nawh, ming seetnaak a awmnawh awh chahphyinaak awm hy. **4** Thlang am kha awhkawng ak cawn awi taw tui amyihna dung nawh, cehlai cyihnaak taw tuihamyihna phyt hy. **5** Laityknaak awh thlakdying thawlhy lu khqoeh sak hamna, ak bo mikhai toek am leek hy. **6** Thlakqaw am kha ing thlang hqo pe nawh, am lai ing khqawh qunaak khy hy. **7** Thlakqaw am kha taw a qeengnaak kawina awm nawh, a huui taw a hqingnaak ham thaangna awm hy. **8** Theet awi ve buh tui ant tui amyihna thlang kawlung a dungnaak dy lut hy. **9** Bibi ak vaatsam thlang taw ak hqeekung ciengnapaca na awm hy. **10** Bawipa ming taw zingnaak vawngchung na awm nawh, thlakdying ing zing na nawh a loetnaak ni. **11** Mangpa ham a khawhkhham taw ang zingnaak na awm nawh, amah ak poeknaak awh vawngchung ak sang soeih na ngai hy. **12** Thlang kawlung ak oe qu ing thihiaka lam benna mang nawh, kawlung neemnaak ingtaw kyiinhnaak benna ni. **13** Ngaih zaak qu kaana thlak awi thuung maa taw qawnaak ingkaw chahphyihnaak ni. **14** Thlang a tloh awh kawlung ing am thin cak sak hy, cehlai kawlung ak tlo ingtaw ikawmyihna ang yh hly thai pai? **15** Ak zaaksimthai lingbyi ing zaaksimnaak thati ta nawh, thlakcyi ang haa ing simthainaak sui khawi hy. **16** Thlang a kutto ing a lam khui sak nawh, boei a haina ceh pyi hy. **17** Ak cangnaak lammaana ak kqawn ing thlakdying amyihna dang seiawm, a imceng ing law nawh, awi suu tlaib nawh pho khawi hy. **18** Cung zyknak ing awi dip sak nawh, ak tlung qawi awm hqaa sak qawi hy. **19** Amamik qoeppinaak taw khawk chungnaak vawng ak cak lakawh kyi ngai nawh, awipungnaak taw qal tlung a awmnaak vawng chawh ing myih hy. **20** Thlang ing am lai thiah ai nawh ak phyn phyi sak nawh; a hui am lai phu ing ak kaw qeep sak hy. **21** Thlang am laiawh thihiaka ingkaw hqingnaak awm nawh, ak lungnaak thlang ing ak thiah qah ce ai kaw. **22** Zu ak lo taw theem leek ak hu thlang ni, Khawsa venna kaw kawzeelnaak hu hy. **23** Thlang khawdeng ing qeennak thoeh nawh, mang ingtaw a tlung doena thlang voem hy. **24** Pyi khawzah taak taw plam thamnaak ni, cehlai cingna anglakawh lungnaak ak tlo ngai pyi awm hy.

19 Thailatnaak awi ak kqawn thlakqawna awm anglakawh thlak khawdeng, kawpoek leek ak toen na awm leek bet hy. 2 Simnaak kaana ngaihnaak doeng awm am leek nawk, khawng khaam tawn aih awm tlunknaak ni. 3 Thlakqaw a qawnaak ing a lam seet sak nawk, Khawsa awh ak kaw vuung sak hy. 4 Khawh taak ing pyi khawzah ta nawh, khawdeng thlang taw a pyi ing centak kaw. 5 Amak thym dyihthingna ak dyi taw a toel kaana am awm kawm saw, qaaí ak kqawn awm am loet ti kaw. 6 Thlang khawzah ing ukkung kawzeelnaak sai thai nawh, kutdo ak pe thlang ing pyi khawzah ta thai hy. 7 Ak khawdeng cingnakhqí ing a mim cawt ce a mi sawhnaak awhtaw a pyikhqi ingtaw ikawmyihna nu a mi sawhnaak pai kaw! hqut nawk khy khqi seiawm qeeng taak boeih kawm uh. 8 Cyihnaak ak ta ing a hqingnaak lungnaa nawk, simnaak ak ta ing theemleek hu kaw. 9 Amak thym dyihthingna ak dyi taw a toel kaana am awm kawm saw, qaaí ak kqawn taw plam kaw. 10 Khawsak nawmnaak ve thlakqawi ingqawi am qoepqui nih nawk tamnaaing a boei a uk awm am kawihvaih nak khqoet hy. 11 Cyihnaak ingawh thlang yh thainaak pe nawh, thlang a thawlq hqeqnaak taw a boemang-naak ni. 12 Sangpahrang ak kawsonaak taw samthyn a kaawk ing myih nawk, cehlai ak kawzeelnaak taw saaitlim ak khan awhkaw daamtui ing myih hy. 13 Capa ak qaww taw a pa ham zoseetnaak na awm nawk, zuu, hqo ak lo poepa taw tuih poek ben tloei ing myih hy. 14 Im lo ingkaw khawkhkham taw pa venna kaw qona awm nawk, zuu ak cyi taw Bawipa venna kaw qo ni. 15 Ngakaak ing ih tui sak nawk, thlang thak-dam taw buh cawi kaw. 16 Awi pek ak ngai ing a hqingnaak ngaihthyn nawk, a khawsak amak ngaihthyn taw thi kaw. 17 Khawdeng ak lungnaak taw Khawsa kut ak zoe sak na awm nawk, theemleek a sai phu ce thung kaw. 18 Ngaih-uunaak a awm tloek awh na capa ce toel lah, a hamna tlo kaw ti nawk koek poek. 19 Kawkso thlang ing am thin tawi phu zaawk kaw, a nih ce hul tik seiawm na hul tlahi tlahi ngaih kaw. 20 Thlang ing awi ak kqawn ce ngai nawk toelnaak ak awi ce do lah, a dytnaak ben nataw cyi kawp ti. 21 Thlang ing khawlkpoeknaak khawzah ta hy, ceseiawm Khawsa a khawkhannaak awh ni a soep hy. 22 Amak boet thai lungnaak ni thlang ing a ngaih; qaaí kqawn lakawh khawdengna awm leek bet hy. 23 Khawsa kqijchhaanak ing hqingnaak pe nawk, ak ta boeih khawzeel ing awm kawm usaw, zoseetnaak ing am phakhqi kaw. 24 Thlang thakdawh ing am khuiawh a kut tuun nawk am kha a thak hly awm ngak hy. 25 Thlang ak thekhanaak ce vyk lah, cawhtaw cyihnaak amak takhqi ing cyihnaak ta bet kawm uh, khaw ak poek thai thlang ce toel lah, cyi khqoet kaw. 26 A pa khawdeng sak nawk, a nu im awhkawng ak thlaa taw capa, thlang chah ak pyih sak, ming seetnaak ak pekung ni. 27 Ka capa, toelnaak awi am nang ngaihnaak hamna a nik cawngpyi ak awi ce koeh ngai. 28 Cemyih ak thlang ing ak thym ce husit nawk amak leek theem ce am kha ing dahi hy. 29 Toelnaak taw thlang ak thekhanaakkhqi ham saina awm nawk, thlaqaw am ting taw vyknaak hamna ak awm ni.

20 Misurtui ing thlang thekhanaak pe nawk, zuu ing awipungnaak coeng sai hy. 2 Sangpahrang ak kawsonaak taw samthyn a kaawk ing myih nawk, kaw ak so sak taw amah a hqingnaak ak khawng ni. 3 Kawsonaak ak qei thlang ing kyiuhcinaak hu kawm saw, cehlai thlakqaw ingtaw hqo hu hy. 4 Thlang thakdam ing khaw a dingawh lai a thawl ngak nawk; cedawngawh caang ah huiawh ai thoeh kawm saw, ikawawn am ta kaw. 5 Kawlung khuiawh cainaak taw tui amyihna dung hlai hy, simnaak ak ta thlang ing ni ik-oeih a coeng sak hy. 6 Thlak ypaumna kqawn qu mai kawm uh, ak ypaum tang unu ak awm? 7 Thlakdyng, khawlkpoek khawkhhan thainaak ak ta a cakhqi taw thlang zoseenkhqi ni. 8 Awityknaak awh Sangpahrang

ing awi ak tlyk awh, a mik ing theem amak leek boeih ce khqaa ing zah amyihna zaap boeih hy. 9 "Kak kawlung ciim sak nyng, thawhnaak awhkawng ciimcaih nyng," tinawh uing ak kqawn thai. 10 Tahnaak amak thym ingkaw tehnaak amak boeih Bawipa ing tyih qawi hahy. 11 Nasen awm a bibi ing ak thym ak thawl dang sak hy. 12 Zaaknaak haa ingkaw huhnaak mik ve Bawipa ing ni a sai qawi hahy. 13 Ih koeh lungna khawdeng kawp ti; hqak nawk meet lah awklek ainaa ta kawp ti. 14 Them ak thlaikung ing them ak thlaithawh "Am leek hy, am leek hy," tinawh, ang voei hunu a them thlaithawh oequ hy. 15 Sui awm nawk, cak phu tlo awm awm moe, cyihnaak awi ak kqawn hui taw lung phu tlo soeih ing myih hy. 16 Thlangchang asyng naak ham ak dyihpyi-kung ingkaw nukche ak dyihpyikung ing a hii ce hawlh seh. 17 Quuk buh ang hypna ai ve thlang ing tui sak hy, cehlai a hunu am kha ce lungqii ing be kaw. 18 Thlang doet nawk ik-oeih cainaak ta. Ak leekna cai hqeqet nawk ceemqal ce tlyk. 19 Thlang awhpung khawlkawh ak van ing awihyp ce pho sak hy; Ceamyihna awmsaw awi ak pung thlang ce koeh pyi na. 20 A nu mai aw, a pa mai aw qun ak khy pek taw, thanlung ak hyp huiawh a maihchoei him pekna awm kaw. 21 Ak cykawh ang tawnna huu qo cetaw a hunu zoseethaak na awm kaw. 22 "Thawl thung lah vang," koeh ti, Khawsa ce qeh cang nawk, anih ing ni loet sak kaw. 23 Tahnaak amak thym taw Bawipa mikhuhawh tuih kawi ni, amak thym tehnaak awm am leek hy. 24 Thlanghqing a khawkhannaak Bawipa ing a hqui ni, ceekanaa thlanghqing ing ikawmyihna a sim hly thai? 25 Poek kaana hqingtawnaak ing Khawsa them pek ingkaw awikam coengawh hu ak nawng tlaih taw amah ham thang ak dun khoeng ak thlang ni. 26 Sangpahrang ak cyi ing thlakche ce hqimqa nawk awideng hy. 27 Thlanghqing kak kawlung taw Bawipa a maihchoeina awm nawk, kawlung khui a dungnaak dy coei pheng thai hy. 28 Lungnaak ingkaw awitak ing sangpahrang ce syng sak nawk; lungnaak ingawh ang ngawih-naak ce cak sak hy. 29 Cacoen a boemangnaak taw ak themahnaak ni, Pacawng a dawnaaak taw a lumkqawk sampaianaa ni. 30 Mynmaa kawlawknaak ing boeibaai caih sak nawk, vvyknaak ing kawlung ak khui dy ciim sak hy.

21 Sangpahrang ak kawlung taw Bawipa kutawh awm nawk, tui ang lawngnaak amyihna a ngaih ngaihnaak awh sawi hy. 2 Thlang boeih ing amimah khawsak boeih thym sak hy; cehlai Bawipa ing kawlung ni a thoek. 3 Hyih phum anglakawh ak thym ingkaw ak dyngna them sai ce Bawipa huiawh do kawina awm bet hy. 4 Chah ak deng mikdai ingkaw ak oequ kawlung, thlakche a maihchoei taw thawlhnnaak ni. 5 Kawdung ing bi ak bi boei nawk, thin-tawnoekna bi ak bi khawdeng hy. 6 Thailatnaak ing them huhnaak taw cingmai ingkaw thihnaak thang ak dyn ing myih hy. 7 Thlakchekhqi taw a mi seetnaak ing amimah thoeng khqi kaw, themleek sai ami maa ak caming. 8 Thawlak ak saikung a lam taw kawi nawk, themleek ak saikung bi bi taw laang hy. 9 Hqo ak hu poepa nu inggawi im khuiuet awh awm hah anglakawh im hlepawh awm leek bet hy. 10 Thlakche ak kawlung ing them amak leek lungna nawk, imceng thlang ing anih venawh geennaak am hu thi hy. 11 Thlang ak thekhanaak toelna a awm awh, thlang zapkhi ing cyihnaak taakna unawh; thlakcyi cawngpyina a awm awh a simnaak pung khqoet hy. 12 Thlakdyng ing thlakche imkhui ce khawsimnaak ing toek nawk, thlakche taw a sai seetnaak caming plamtham hy. 13 Khawdeng ak khyy awh ang haa ak bym taw amah ak khyy lawtawh haa bym pekna awm lawt kaw. 14 Ang hypna kutdo ing kawso qeem sak nawk, hibai khui awhkaw ang hyp kutdo ing ak tlo soeih kawso dip sak hy. 15 Ak dyng awityknaak taw thlakdyng ham zeelnaakna awm nawk, thlakche ham thihnaak kawina awm hy. 16 Cyihnaak lam awhkawng ak pleng taw thlakthikhqi venawh cun kaw. 17 Nawmnaak ak hlhdam

ing khawdeng nawh, zu ingkaw situi ak lungnaak ing am boei kaw. 18 Thlakche taw thlakdyng ham, thlang amak ypawm taw thlang ypawm ham tlannaak ni. 19 Kaw boen nawh hqo ak hu poepa nu inggawi kutoetna awm hain anglakawh kqawng-qamma awm peek bet hy. 20 Thlakcyi a awmnaak imkhui taw qo ingkaw situi a phuk tlo tlo ing bee nawh, thlakqaw a awmnaak imkhui taw awtoem aitoem kaw. 21 Dyngnaak ingkaw lungnaak ak sui ing hqjinggaak, dyngnaak ingkaw kyihcahnaakkhqi ce hu kaw. 22 Thlakcyi ing thlang ak thamah soeih a khaw ce tlyk nawh a ypnaak vawng awm hqee pe hy. 23 A hui am lai ak sypp sak thlang taw kyinaak awhkawng loet kaw. 24 Thlak oequ ingkaw ak hoel qu thlang taw "thlakche" mingna nawh oeqlunaak ing a khawboe bee hy. 25 Thakdam thlang a ngaihnaak taw amah a thihsnaaka awm kaw, a kut ing bibi a ngak caming. 26 Khawnghypp khui kamvaanaak ing them ak nai awm nawh; thlakdyng ingtaw pe nawh, ikawm am hai hy. 27 Thlangthawlh hyih phum taw tuih leh kap nawh, amak leek cainaak ing a lawpyi khqoet taw kawmyih nanu tuih ang cuuk khqoet kaw! 28 Amak thym simphyikung taw qeeng kawm saw; cehlai ak thym awi ak zaa ing awih thym ce kqawn hy. 29 Thlakche ing qalleek mikhai toen qu sak nawh, thlakdyng ingtaw a cehnaak lamawh poek-ngaihnaak ta hy. 30 Bawipa ingqawi ak kah qu cyihnaak, simnaak, khawkhannaak am awm hy. 31 Meqang taw qal tuknaak hamna toenna awm moe, noengnaak taw Bawipa koe ni.

22 Khawhthem khawzah anglakawh mingleek naak tyk, Sui ingkaw tangka anglakawh mikhaleeknaak ce tyk. 2 Kuiqang ingkaw khawdeng awm hain nih nawh, ak synkung taw Khawsa ni. 3 Khawkpoekthai ing them amak leek a huawh thuk taw nawh, Khawk hang ingtaw pan nawh kyinaak sawng hy. 4 Kawdungnaak ingkaw Khawsa kqihchahnaak taw khawhthem, kyihcahnaak ingkaw hqjinggaakna awm hy. 5 Thlakche a cehnaak lamawh hling ingkaw thang awm nawh, a hqjinggaak aq ngaihthyn ingtaw cece qei hy. 6 Nasen a cehnaak hly lamawh cawngpyi lah, a pacawngnaak dy am hilh kaw. 7 Boei ing khawdeng uk nawh, them ak pu taw ak pu pek a tamnaa ni. 8 Them amak leek ak saw ing kyinaak ce hu kaw, ak kawsonaak ing a saithainaak awm hqeena awm kaw. 9 Khawboe ak leek ing zoseennaak hu kaw, thlak khawdeng am cahnaak ak caming. 10 Thlang ak thekhanaak ce hek nawh, hqo dip sak lah, khqah qunaak ingkaw hqonaak dip kaw. 11 Kawlung ciimnaak lungna nawh awihneem ing awi ak kqawn taw sangpahrang ce pyina kaw. 12 Bawipa mik ing simthainaak ak ta thlang ce kheomdo nawh, cehlai amak ypawm thlang ak awi ce am ngai zaik na kaw. 13 Thlak thadam ing, "Im lengawh samthyn awm nawh, a leng kak cawn awhtaw ni cui saw thi hly nyng," ti hy. 14 Nukche am kha taw lawkkhawng ak dung soeih ing myih nawh, Bawipa ing a sawhnaakkhqi taw cek khuina tla kawm uh. 15 Nasen kawlung taw qawnaak ing pin nawh, ceseiawm toelthamnaak cumcik ing ak hlana thoeng pe kaw. 16 A boeinaak hamna khawdeng thekhana nawh boei venna ang hyp kudo ak pe thlang taw khawdeng kaw. 17 Thlakcyi ak awi ve nang haa keng nawi ngai lah; nak kawlung ce ka cyihnaak donaakna hawna lah. 18 Nak kawlung khuiawh kym nawh, nam khaawh ak soepna cak sak lah. 19 Nak cangnaak ce Bawipa a venawh a awm-naak hamna tuhngawi qoe naven qoeawh ning zak sak nyng. 20 Na hamna awicyih sawmthum kawpoek leek pheknaak awi ingkaw simnaaka awicyihkhqi ning zak sak nyng. 21 Nang anik tyikung venawh ak thym awi nak kqawnnaak pe thai ham, ak thym ingkaw ypnaak ak cu awikhqi ce am ka ni cawngpyi nawh aw? 22 Ak khawdeng koeh thekhana nawh, ak voet vai thlang ce vawng kawtawh koeh hep. 23 Bawipa ing amingmih ham awideng kawm saw amingmih ak thekhanaakkhqi

ce thung khqi kaw. 24 Kawso ak nget thlang koeh heem nawh, kawpoekche ak toen koeh pyina. 25 A khawboe oet kawm tik saw, na hqjinggaak ham thang nak dunna awm kaw. 26 Kut beih ing awi ak kamkhqi venawh koeh boei. 27 Ikawawm pek kawi am na tak awhtaw ikaw ham nanu na iikhun ce pek ham nang cai? 28 Nukdam pakdamkhqi ing syn awhkawng ami sym hawh qilung ce koeh thoeih. 29 A bibinaak awh ak ypawm thlang nak hu aw? anih taw thlang zap a bi ak bi am nawh, sangpahrang bi ak bi ni.

23 Ukkung ingqawi buh ai hah hamna nang ngawih awh, namik huh awhkaw ak awm ce ak leekna toek. 2 Awk ai awh ak kamvana na awm awhtaw na hawngawh cimca toen. 3 Thailatnaak buh ni ti sim nawh a tuinaak doeng koeh nai. 4 Boei na ngaih yyt awh lynaak koeh toen, yh thai hamna na cyih ta. 5 Ak qeeng thai khawhawh koeh ly, ang hlaa tawi nawh ding valh kaw, Huu khanna ang ding amyihna. 6 Thlak yyt a buh koeh ai nawh, a buh tui ant tui koeh nai. 7 Ak poek amyih koep nani a awmna, "Ai hlah, aw hlah," ti kawm saw; cehlai ak kawlung ing am ti tang kaw. 8 Na buh ai ce laawk kawm tik saw, nak awihleek ce plak kawp ti. 9 Thlakqaw ang zaakna aui koeh kqawn, nak awicyihkhqi ce husit kaw. 10 Syn awhkawng qii lung ami khoing koeh thoeih nawh, cahad a khawhyn koeh cuh pyi. 11 Amingmih ak diyhyikung taw ak thamah ni, anih ing na venawh awi kqawn law kaw. 12 Cawngpyinaak benna nak kawlung pe nawh, nang haa ing zaaknaak benna hawi. 13 Nasen toel koeh hqeh, cumcik ing vyk tik seiawm am thi kaw. 14 Cumcik ing na vyk awhtaw a hqjinggaak cei khui awhkawng plawk kawp ti. (*Sheol h7585*) 15 Ka capa, nak kaw a cyih awhtaw kak kaw zeel soeih soeih kaw. 16 Oeih, nam kha awhkawng awihthym ak cawnawh kak kaw awmhly soeih kaw. 17 Nak kawlung ing thlakche koeh oet seitaw, Khawsa kqihchahnaak doeng mah nak kawlung ing poek lah. 18 Kudto awm law ngai kawm saw, nang ngaihunnaak ing am qeeng ti kaw. 19 Ka capa, ngai nawh, cyi lah, lam ak thym awh nak kawlung sawi lah. 20 Zuuk awkhqi ven ingkaw buh meh ak sawkhhqi venawh koeh boei; 21 Zuuk quikhqi ingkaw buh meh ak sawkhhqi taw khawdeng kawm uh. 22 Na pa, anik canaanak ak awi ce pawm nawh, na nu ce a nucawng lawawh koeh thekha na. 23 Awihtym ce thlai nawh koeh zawi voel; cyihnaak, cawngpyinaak, zaaksimmaakkhqi awm. 24 Thlakdyng a pa taw awmhlynaak ak sang soeih ta kawm saw, capak cyi ak canaanak ing ak khanawh zeelnaak ta kaw. 25 Na nu ingkaw na pa kawzeel sak lah, nang anik canaanak kung awmhlynaak ing awm seh nyng. 26 Ka capa, nak kawlung ni pe lah, ka khawsak na mik ing hat lah seh. 27 A pum ak zawi nu taw lawkkhawng dung amyihna, samphaiah nu taw ak ceek lawkkhawng amyihna awm hy. 28 Qukai amyihna thlang qym nawh, pakhqci ce amak ypawm thlangna coeng sak khqi hy. 29 Unu khaw ak map? Unu kaw ak see? Unu hqo ak hu? Unu ak patang? Unu ak leem? Unu amik ak ling? 30 Zuukung thawh ta dam nawh, zuu ing ak thoek qu ak aw thlangkhqi ni. 31 Ak ling zuu, boengloeng khanawh phyl nawh, plapleek ing awiawng khui ak kun koeh toek. 32 A dytnaak benawh khqui amyihna thlang cuk nawh khqui sy ak ngaan ing myih hy. 33 Na mik ak changchangna dai nawh, nak kaw khawhang sak kaw. 34 Tuicunli sawawh ak ip amyihna awm kawm tik saw, laawng hizannaak tung lingawh ak ip amyihna awm kawp ti. 35 Ni vyk u seiawm am tlo nawh, ni phawp useiawm am za nyng! Kang hqyng law tlaah awhtaw ka aawk hamkawi ak chang hu tlaah bit kawng," ti kawp ti.

24 Thlakchekhqi koeh oet nawh, aming lakawh ngawih koeh nai. 2 Amik kawlungawh amak leek poeknaak doeng cawng unawh, amin kha ing thawlh sainaak doeng teng uhy. 3 Cyihnaak ing taw sakna awm nawh, simnaak ing cak sak hy. 4 Simnaak ing imkhui awh khawh a phuk tlo tlo bee sakna awm hy. 5 Cyihnaak

ak ta thlang taw a qym awm nawh, simnaak ak ta thlang taw ak thaawmnaak pung hy. 6 Ceem tlyk hlanawh ak leek soeih khawkhannaak taak leek nawh, cainaak ak leek taak ing qaal noeng sak hy. 7 Thlakqaw ham cyihnaak sang aih nawh, thlang kqeng haiawh ak kqawn kawi awi am ta hy. 8 Them amak leek sai ham khawkpoeknaak ak ta taw thlang ing seet ak saikung tina kawm uh. 9 Thlakqaw poeknaak taw thawl ni, thlang husit taw thlang ham sawhnaak kawi ni. 10 Kyinaak na huhawh nang ngaam awhtaw tha amak ta thlang ni. 11 Him ham a mi sawikhqi ce hul lah. Himna ak awm hly khqi ce ang tawwna thawng. 12 "Ngai lah vetaw am sim nyng" na ti awhtaw, kawlung ak khinkung ing am sim hly nawh aw? Na hqjinggaak ak doenkung ing am sim hly nawh aw? Thlang boeih, ami bibi amyihna thungna am awm hly nawh aw? 13 Ka capa, khawitui ak leek soeih aw lah; khawilutui na hamna ak aawi diidik ce aw. 14 Cawhce na hqjinggaak ham cyihnaak taw cemyih nani ti sim nawh; na huhawh, na hamna hai ben ngaih-uunaak awm nawh, nang ngaih-uunaak ing am boet tlaih kaw. 15 Aw, thlakche pa, thlakdying a im koeh muk, a awmnaak koeh hqee pe. 16 Thlakdying taw voei khqih tlu seiawm tho tlaih kaw; thlakche ang tluuk awhtaw am tho thai voel kaw. 17 Na qaal ang tluuk awh koeh zeel nawh, bo sakna a awmawh nak kaw koeh zeel sak; 18 Cekkaataw Bawipa ing ni hu kawm saw, am zeel kawm saw, ak khan awh ak kawsonnaak ce queen kaw. 19 Thlakchekhqi caming koeh ly nawh, thlang thawl koeh oet. 20 Thlangthawl ham kutdo am awm kawm saw, thlakche a maihchoei cetauh him pekna awm kaw. 21 Ka capa, Bawipa ingkaw sangpahrrang ce kqih nawh, kawhaa ak toenkqhi ce koeh pyi na; 22 Ami ham seetnaak thoeng law tawk kawm saw, a mi qeengnaak hly kum uing nu a sim hly? 23 Ve tloek awm thlakcyi ak awi kqawn ni, awi tlyk awh thlang hai toek am leek hy. 24 Ak bo thlang venawh, "Na thawlhaak am awm hy," ak ti naak taw thlang boeih ing tamlawh kawm usaw, khawqam ing hoet kaw. 25 Ak toeltham ak thlangkhqi taw zeel kawm usaw, amik khanawh zoseennaak pha law kaw. 26 Awin thym ing ak hlatkung taw pyi leek ni. 27 Kawngmaa awh bi na sai ham toen boeih nawh, na lo maa awh toen nawh, cecoengawh na im ce sa. 28 Lehcainaak a awm kaana na imcengkhqi a kawnglamawh simpyikungnaa koeh awm nawh, nam kha ingawm koeh thalat na. 29 "Kai khanawh a sai amyihna ak khanawh sai lawt kawng nyng saw, a bi sai amyihna pe kawng nyng," koeh ti. 30 Thlak thakdam lona cet nyng, simnaak amak ta misur dumna awm; 31 Ngai lah, hling hqoengna awm nawh, dek awm bei hqoengna be nawh, a vawng chungnak lung khoeng awm tlu boeih hy. 32 Ka huh awh, ak dungna poek qunyng, a ni cawngpyinaak ce hu nyng saw pawm thai nyng. 33 Na ngaih awhtaw zhai, ip nawh, na kut khooem nawh dyu dm poek poek, 34 Na ih hlanawh khawdeng kawm ti saw, voetvainaaak ing ceemqal amyihna thoeng law tawk kaw.

25 Ve awm Solomon ak awicyih, Juda sangpahrrang Hezekiah ak thlangkhqi ing a mi qee tlaih ni. 2 Ikk-oeih thuh taw Khawsa a boeimangaakna awm nawh, sangpahrrang a boeimangaak taw ce ak thuh qu sui nawh pho sak ni. 3 Khan ve saang soeih nawh, dek awm dung soeih nawh, sangpahrrangkhqi kawlung awm sim boeih hly kawi am ni. 4 Ngun eek ce meet lah, cawftaw ngun ak sepkung hamna them ak leek soeihna coeng kaw. 5 Sangpahrrang haiawh thlak thawl ce thoeng unawh, a sangpahrrang ngawihsdoelh ce dyngnaak ing cak sakna awm kaw. 6 Sangpahrrang haiawh namah ingkaw namah koeh kyihcah qu nawh, boekhqi a haiawh hyn koeh lo. 7 Na huh khawi boei a haiawh chah na phyih anglakawh "ngawihnaak ak leekawh ngawi lah," a mi nitinaak ce leek bet hy. 8 Khqah qu ham hqii koeh tawn sak, a hunna na imcengkhqi ing chah a mini phyih sak awhtaw, ikaw na sai hly

am sim kawp ti. 9 Na kawnglam ce na imceng ingqawi kqawn hain nih nawh, thlakchang ak awihyp mah koeh pho kawp ti. 10 A nik sim ing ni zyi kawm saw, nang ming seetnaak am qeeng thai kaw. 11 Ak thymna awi kqawn balh taw ngun bawm awhkaw sui thaithi ing myih hy. 12 Ak ngaikung ang haawh thlakcyi ak awi kqawn taw sui hathen ing sui ak leek soeih aawi inggawi myih hy. 13 Ak tyikungkhqi ham dyihthing ypaawm taw caang ah tym awhkaw daam tui ing myih nawh, a boei ak kaw caih sak hy. 14 A mapek ak pena ak kqawn qu nawh, ak oe qu taw amak aa cingmai ingkaw khawhli ing myih hy. 15 Kawdungnaak ing ukkung kaw dawm sak thai nawh, awih neem ing quh awm ek sak thai hy. 16 Khawitui na hu lek? Khoek neh sak nawh aw, a ni lawnnaak dy na ai awhtaw laawk kawp ti. 17 Na imceng venna koeh plam aih, ning huuna nawh ni sawhna lat kaw. 18 A imceng ak khanawh ak thym simpyikung na amak dyi taw thingboeng, cimca ingkaw pala ak hqaat ing myih hy. 19 Kyinaak huhawh amak ypaawm thlang ak ypaawm taw haa ak ek ingkaw khaw ak khoem ing myih hy. 20 Thlang ak kawsee venna hla ak sakung taw chikca awh thlang angki suh pek ingkaw thui hqoep awh kuuk sak ing myih hy. 21 Na qaal phoen a cawih awh buh pe nawh tui a hoet awh aawk kawi tui pe lah, 22 Ceamyihna na sai awhtaw a lukhanawh mailh eh ling na tloeng pek ing myih kawm saw, Bawipa ing zoseennaak ni pe kaw. 23 Asipi ben nakaw zilh ing khawkaa a lawpyi amyihna thlang ak theet ing kawsonnaak lawpyi hy. 24 Nu, hqo ak lo poepa ingqawi imkhu oet awh awm hain anglakawh ipthil kilawh awm leek bet hy. 25 Khawkhla nakaw awthiing leek taw thlang tui ak hoet ham tuiding ing myih hy. 26 Thlakdying, thlakche lam ak pleeng taw khawcui awhkaw deknaawng ingkaw tuih nuu ing myih hy. 27 Khawitui khawzah aawk am leek nawh, cemyih koepna thlang amah ham kyihcahnaak ak sui taw thlang leek am ni. 28 Thlang amah ak kawlung amak doen noeng taw vawngchungaak ak tlu khaw ing myih hy.

26 Khawhqa awh damtui a baw ingkaw caang ah tym awh khaw a a a mang kawihvaihnaak amyihna thlakqaw kyihcah am kawihvaih na hy. 2 Hojita ak ding hy ingkaw cinghin pha ak ding amyihna lehcainaak a awm kaana khaw khy ing phu am ta hy. 3 Meqang ham vyknaak qui awmnawh, laa ham hathawng qui a awm amyihna, thlakqaw hamna cumcik awm hy. 4 Thlakqaw ce a qawnaak amyihna koeh thung, amah myih pyi kawp ti. 5 Thlakqaw ce a qawnaak amyihna thung lah, cekkaataw ak cyina ngai qu hau kaw. 6 Thlakqaw awi ak ynn taw amah a khaw ak tlyk ing myih hy. 7 Khawkhem khaw a bat hqoeng amyihna thlakqaw am khaawh cyihnaak ce awm hy. 8 Thlakqaw kyihcah taw pehzaii awh pehlung mawp ing myih hy. 9 Thlakqaw am khaa awhkaw cyihnaak awi taw zukqui kut awhkaw hling ing myih hy. 10 Thlakqaw ingkaw thlakche ak pyinaak taw lii ak kaap thai ak leem hoeih hoeih ing myih hy. 11 Thlakqaw a qawnaak ak dang sak tlaih tlaih taw Uu am lawh ak ai tlaih ing myih hy. 12 Amah ingkaw amah thlakcyina ak ngaiqu nak hu aw? Anih anglakawh thlakqaw awh ngaih-uu kawi khawzah awm lat hy. 13 Thlak thakdam ing, "Lamawh samthyn awm nawh, kawngma awh samthyn awm hy," ti khawi hy. 14 A batnaak quiawh chawh ang bat amyihna thlak thakdam ing iihkun awh bat khaak hy. 15 Thlak thakdam taw a kut ing beeii pui hlai hy, am khaa tui tlaih ham awm ngak hy. 16 Khaw ak poek that thlang khqih ak awi kqawn lakawh thakdam ing ak cyi betna ngai qu hy. 17 A kawnglam a awm kaana lam a ceh doena a ming hqonaak awh ak boei pahoei taw Uiang haa ak tu ing myih hy. 18 Imceng thailat na nawh, "Ka ni citi naak ni? ak tikung taw 19 Thlakqaw, maitawn, laa, thihsnaak ing ak khawng ak kap ing myih hy. 20 Thing a tlawi awh mai a thihs amyihna, theet-naak ama awmnaak awh lai dip hy. 21 Maih eh cak nawh thing ang kqawng

amyihna hqo ak hu ak thlang taw khqah qu ak thawn sak kung ing myih hy. 22 Theethaak awi ak qgawnkhqi awi taw buh tui ant tui amyihna thlak khqik phoen dy lut hy. 23 Ak awi qgawn leek moe kawlung ak see thlang taw dek am khanawh cak tui a mim hluk ing myih hy. 24 Thlang theet ak nget ak thlang taw am kha ing thuh phah nawh, ak kawlung awh thailatnaak ing bee hy. 25 Awi leek soeih qgawn seiawm koeh cangna, tuih ak cu khqih awm hy ak kawlung khuiawh. 26 Ak thlang theetnaak ce thailatnaak ing thuh seiawm, ak kawpoek a seetnaak taw thlang haiawh phona awm kaw. 27 Vaam ak co taw amah a vaamawh tla kawm saw, lung ak lhih taw amah ak khanawh ce a lung lhih law tlaih kaw. 28 Qaai ak qgawn am lai ing a tloh sak thlangkhqi ce sawhnaak khqij nawh, thlang ak kyihcak phawk am kha ing seetnaak pha sak hy.

27 Khawngawi a ham koeh oe qu, ce khawngpii ing ikaw a thoeng law hly pyi am sim hyk ti. 2 Namah ingkaw namah koeh kyihcak qu naws thlang ing mah nim kyihcak seh. Na hui am, am na sim thlang a hui ing nim kyihcak seh. 3 Lung taw qih soeih nawh, dizui ing qih hlai moe, ceseiawm thlakqaww ing thlak kaw a so sak ve qih bet hy. 4 Kawtawinaak ing phyl nawh, kawsonaak ing tlung hy; cehlai ytyaak ve uing nu ang yh noeng kaw? 5 Lungnaak ing thuh phah anglakawh ak dangna toeltham qu leek bet hy. 6 Pyi ingtaw lungnak ing ni lambai na naws, na qaal ingtaw thailatnaak ing ni mawk kaw. 7 Phoet phyi ham taw khawilu awm tuih kawina awm naws, phoet cawi ham taw ant kha awm ak aawi ni. 8 Thlang a im ak vantaak taw, pha ang bu ak poengaak ing myih hy. 9 Bawktui ingkaw bawktui khu ing kawlung a awmhly sak amyihna, kawlung tak awhkawng ak cawn law pyi ak khawsimnaak ing kawlung nawm sak hy. 10 Na pyi ingkaw na pa a pyi ce koeh hlai; kyi-naak na huhawh nam cawt imna koeh ceh; na imceng taw khawlawng hla nakaw nam cawt anglakawh leek bet hy. 11 Ka capa, cyi naws, kak kaw ni zeel sak lah; Anik thekhanaakkhqi kam hlat naak thai ham. 12 Thlakcyi ing amak leek them a huhawh thuk taak naws, thlakqaww ingtaw pan naws amah ing zaawka na hy. 13 Am sim thlang ham ingkaw khawsak amak leek nu ham diythingna ak dyi thlang taw a hibai mai aw, a khawhkhham pynoet oet mai aw hawih seh. 14 Mymcang hii tho naws, a imceng ce khaw-tehna khy naws zoseennaak ak pe taw, quun ak khy pek ing myih kaw. 15 Hqo ak sai poepa zu taw khawcui awhkaww ipith ak cei ben tloei ing myih hy. 16 Cemyih a nu ak khoem taw khawhlui ak khoem ing myih naws kut khanawh sitiu thloen ing myih hy. 17 Thii ing thi a hqaat sak amyihna thlang ing thlang hqaat sak hy. 18 Thai thing ak lingkung ing thai thaih ai kawm saw, a boei ak khuit taw kyihcakna awm kaw. 19 Tuiawh mikhai ang dang amyihna thlang ak kawlung thlangawh dang hy. 20 Ceikhui ingkaw Abaddon ing a khoek sak ama awm amyihna thlanghing mik ing a khoek sak qoe am ta hy. (Sheol h7585) 21 Cak am ing a caknaak dang sak naws, mai ing a suinaak dang sak hy; Cemyih lawtna kyihcaknaak ing ak thlangnaak dang sak hy. 22 Thlaqaww taw supkhai ing sumawh ni deeng seiawm ak qawnnaak ce am khawng ti kaw. 23 Na tuukhqi ce ak leekna sim ham cai naws nak khqinkhqi ce ak leekna khoem. 24 Khawhkhhamkhqi ve kumquai ham am naws, boei lumyk taw na cadih ham dyna cak poepa kaw. 25 Saitlim aat usaw amah ing tawi tlaih tlaih naws, tlang nakaww saitlim cun kawi uhy. 26 Na tuukhqi ce na suisak a ham, meekhqi ce na khawhyn phu hamna awm hy. 27 Na imkhui cakaw ai a ham, na tamnaa nukhqi nam cahnaak ham mee suktui ing be ngen poepa kaw.

28 Thlakche taw ahu am hqut u seiawm cen kaw. Thlakdyng taw samthyn amyihna am thin awm kaw. 2 Qam khuiawh qaal a thawhawh, ulkung khawzah awm hy, cehlai khaw ak poek thaingkaw cyihnaak ak taa thlang ingtaw ak dingna qam uk hy. 3 Khawdengkhqi ak thekhanaak ukkung taw tawi an amak tawi sak

qawh tui ing myih hy. 4 A lawngim ak cehtaakkhqi ing thlakche kyihcak unawh, cehlai a lawngim amyihna khaw ak sakhqi ingtaw oehl uh. 5 Thlang amak leek ing ik-oeh ak dyng am sim thai uh, cehlai Bawipa ak sui thlangkhqi ingtaw ak soep cana sim thai uh. 6 Amak thymna khaw ak sa kuiqang lakawh caawt kawi amak awmna khawksa khawdeng leek bet hy. 7 A lawngim amyihna khaw ak sa thai thlang taw khaw ak poek thai capak cyihna awm hy, cehlai aawk ai ak kamva ak pyinaak capa ingtaw a pa chah pyih sak hy. 8 A pung khawzah lawhnaak ing boei naws thlang hamna them khawzah ak cun thlang taw, khawdengkhqi ak queenkun na awm hy. 9 U awm a lawngim benna haa amak keeng thlang taw, ak cyckahnaak awm tuih ak cu ni. 10 Thlakdyng, lam amak leekawh ak ceh pyi taw amah a vaam cawh naws awm tla kaw, cehlai thlak soep coet amak kap ingtaw qo leek pang kawm uh. 11 Kuiqang thlang ing amah ngaih awh thlakcyi na ngaih qu mai seiawm, thlak khawdeng khawpoek thai ingtaw ak ceetna huu pe hy. 12 Thlakdyng ing noengnaak a huhawh kyihcaknaak ak sang soeih pe uh; cehlai thlakche a boei awh thlangkhqi ing thuk taak uh. 13 A thawlh ak thuhphah ak thlang ing qeennaak am ham kawm saw, a thawlhnak pho sak naws qeennaak ak thoeh ing qeennaak hu kaw. 14 Bawipa ak qgjihcak poe taw thlang zoseen ni, am thin ak sah ak thlang taw kyinaak sawng kaw. 15 Khawdeng ak thekhanaak ukkung taw samthyn ak kaawk ingkaw phawm ak tlung ing myih hy. 16 Khawpoek thainaak amak ta ukkung taw thlang ak phep queekung ni, amak thymna them huu ak sawhnaak thlang taw a hqinglung saang kaw. 17 A kutawh thlang thi ak lawng lawkkhqaawng dungawh tla kawm saw, u ingawm koeh hul seh nyng. 18 U awm ak thymna khawksa taw loet sakna awm kawm saw, amak thymna khawksa taw tlu poe kaw. 19 A loawh bi ak bi ing aawk ai khawzah hu kaw, cehlai a nawmnaak doeng ak sui thlang taw khawdeng kaw. 20 Thlak ypwam ing zoseennaak hu kawm saw, cehlai boei ak ngaih aih taw a phep kaana am lhih kawm uh. 21 Thlang mikhai toek am leek hy, cehlai phaiipi cun oet mai ing thlang ing thawlh sai thai hy. 22 Thlakqu ing them hu hqut naws, ak khan-awh khawdengnaak a pha law hly am sim hy. 23 Awih leek ing anik kyihcaknaak a saa qu thlang lakawh anik toelthamkung ing a huna kyihcaknaak hu kaw. 24 A nu pa a them muk naws, "Am poei hy," ak ti taw thlang ak plam sakkung ni. 25 Ak kamvaa a awmnaak awh phekbonaak awm naws, Bawipa ak ypnaka taw thlang zoseen ni. 26 Ak poeknaak awh ak hanng ak thlang taw thlakqaww na awm naws, cehlai cyihnaak awh ak cet taw thlang zoseen ni. 27 Khawdeng them ak pe taw am khawdeng kawm saw, ak hawimang taak taw quun khy pekna awm kaw. 28 Thlakche a boei awh thlak boei ing thuk taak naws, cehlai thlakche a thih awh thlakdyngkhqi pung uh.

29 Thlang ing a toelzyh coeng awhawm kaw ak ting thlang taw amak voei thai voelna plam kaw. 2 Thlakdyng a awm awh pilnam ak kawzeel naws, thlakche ing a uk awh pilnam kaw vung hy. 3 Cyinaak ak lungnaak ing a pak kaw zeel sak naws, a pum ak zawi nu ah ki pyi taw a khawh plam kaw. 4 Ak thymna ak uk sangpahrang ing khawqam cak sak naws, cehlai ang hyp kuto ak lungnaak ing khawqam seet sak kaw. 5 A imceng ak kyihcak phawk taw a khaw ham thang ak duun ni. 6 Thlakche taw amah thawlhnak awh aawk naws, thlakdyng taw awmhly naws laa sa hy. 7 Thlakdyng ingtaw khawdengkhqi hamna lam ak leek poek pek khqij naws, thlakche ingtaw ak poeknaak ham kawlung am pe hy. 8 Thlang ak thekhanaak ing khawkhui awi pung sak naws, thlakdyng ingtaw kawsonaak qeem sak hy. 9 Thlakcyi ing thlakqaww a oehl awhtaw goepquinaak am awm thai hy. 10 Thi lawng sak ak lungnakkhqi ing thlakleek hudam unawh, thlakdyng ingtaw a hqingnaak hul ham cai hy. 11 Thlakqaww ing ak kawsonaak qgawn boeih naws thlakcyi ingtaw thuh phah naws ngawih pyi hy.

12 Ukkung ing qai kqawn awi ang ngaih awhtaw a tamnaakhqi boeih thlakche na awm uhy. 13 Khawdeng thlang ingkaw thlang ak hep qawi kutoetra khaw sa hain nih nawh, Bawipa ing a ni mik daih sak qawi hain hy. 14 Khawdeng cakhqi ypaum cana ak ukkung sangpahrang taw a boei ngaihnaak ce kumqui cak sakna awm poepa kaw. 15 Cumcik ingkaw toezyihnaak ing nasen cyi sak nawh, hlaphlam awhtaw a nu chah pyih sak kaw. 16 Thlache a pung awh thawlhnak pung nawh, cekhqi a ming tluk thlakdyngkhqi ing hu kawm uh. 17 Na capa ce ak leekna toel nawh, dymnaak ni pe kawm saw kawpoek nawmaak ni pe kaw. 18 Hailam khaw huh thainaak ama awm awh pilnam hlaphlam nawh, cehlai aanaa awi ak ngai thlang taw a zoseen kaw. 19 Tamnaa taw awi mai ing tlaivawng thai am ni; zasim seiawm am sai kaw. 20 Awi ak kqawn pyn ak awm aw? A nih anglakaww thlakqaww awh ngaih-uunaak awm bet hy. 21 A nasen awhkawng awm pyi tamnaa ing ca a qo qup pyi kaw. 22 Thlak kawktawi ing khqah qu coeng sak nawh, thlak kawsonaak ing thawlhnak sai hy. 23 Ak oek qt thlang ak kaina awm nawh, kaw ak daw ing kyihcahnaak hu hy. 24 Thlakqu ak pyinaak taw amah a hqingnaak ak sawhnaak ni; qun khy awi za moe seinu ak kqawn hly kqjih hy. 25 Thlang kqjih nawh awi ak ngai hqoeh hqoeh taw a ham thang ak duun ing myih nawh, Bawipa ak ypnak thlang taw a sa syng kaw. 26 Thlang khawzah ing ukkung haiawh mikhai-leek huh ham sui uhy, cehlai Bawipa ven na kawng ni thlang ing mikhaleek a huh hly thi. 27 Thlakdyng ing amak thym them ce tuih nawh, thlache ing thlakding ce tuih lawt hy.

30 Jakeh a capa Agur ak awicyih taw vemyih na ni. Thlang ing Ethiel a venawh, Ethiel ingkaw Ukal a venawh vemyih na ce kqawn hy, 2 "Thlangkhqi anglakawh ka sim kang zak awm am awm hy. 3 Cyihnaak am cawng nyng saw, thlakciim kawng awm am sim nyng. 4 Unu khanna kai nawh ak kqum law tlaith? Unu a kutawh khawhlil ak bmyi thi? Unu hibai ing tui ak cun? Unu khawmdek a dytnaak ak cak sak? Unu ang ming, a capa ming nak sim aw? 5 Bawipa ak awikhqi boeih taw caawtbauh kawi am awm na, Amah ak cangnaakkhi boeih ham ziinggaak ni. 6 Ak awikhqi ce koeh sap, cekkaataw nik coet kawm saw a qai ak kqawn thlangna awm kawp ti. 7 Aw Bawipa, them pakkhii ni thoeh nyng; ka thih hlanawh ni soep pe sak lah. 8 Amak thym ingkaw qai kqawn ka venawh koeh awm sak; khawdengaak ingkaw boeinaak awm koen ni pe, my ngawi ai tat buh mah ni pe. 9 Cekkataw boei nyng saw nang nim hilh kawng nyng saw 'Bawipa taw a u nu?' ti hau kawng nyng. Amawh ka kawdeng awhawm qu kawng nyng saw na thang nim ceh hau kawng nyng. 10 Tamnaa ce a boei venna koeh theet, quun nik khy pe kawm saw, nak khanawh thawlhnak tla kaw. 11 A pa quun khy pe nawh, a nu amak kyihcah thlang awm hy. 12 Amah poeknaak awh ak ciimna ak ngai qu thlang awm nawh; cehlai a thawlhnak caihsakna am awm hy. 13 Khawpoek saang sak nawh hepnaak ing thlang ak toek awm hy. 14 A haas cimsun amyihna awm nawh, khawmdek awhkaw khawdengkhqi ingkaw ak voetaikhqi daih hamna cimca ing ak be thlang awm hy. 15 "Ni pe hlah, ni pe hlah," tinawh ak khyy canu pakkhii ak ta litno awm hy. Amak phyi thai tlaith them pakthum awm hy, "Khoek hawh ny," amak ti tlaith them puphli awm hy. 16 Phyi, ca ak queeng phoen, tui amak phyi thai deklai ingkaw "khoek hy," amak ti man mai awm hy. (Sheol h7585) 17 A pa ak thekhanaak ingkaw a nuk awi ak hep milk taw lamawh ak ding vangaak ing cuk kawm saw; huu ing a sa ai pe kaw. 18 Kawpoek ak kyi sak ik-oehi pakthum awm nawh am kang zaaksim ik-oehi pupthli awm hy. 19 Khanna kaw huu ang dingnaak lam, Luk khan awhkaw khqui a cehnaak lam, tulcunli awhkaw lawng a cehnaak lam ingkaw tangpa ing nula a pannaak lam tloek ce

ni. 20 Cemyih ceni samphaih nu a cehnaak lam taw; Ce nula ing ai nawh am kha a huih coengawh, "Them amak thum am sai nyng," ti hy. 21 Ve them pakthum ak caming khawmdeh thynn nawh ve them pupthli awh yh thainaak am ta hy. 22 Tamnaa ce sangpahrangna coeng nawh, thlakqaww ing aawk ai ak bena ta hy. 23 A mi hoet nula ing vaa ta nawh tamnaa nu ing a boei nu a qo pang hy. 24 Khawmdek khanawh ik-oehi ak zawi soeih pupthli awm nawh, cehlai cekhqi taw ak cyi soeih na awm uhy. 25 Liing ve ak tha ak zawi soeihna bi ak sai na awm moe, khawhqa ak aawk ai cun hy. 26 Sathel ing tha a khoechha ni a taak hilai, lungnu thelpang khuiawh a im ta hy. 27 Khamkhawkkhqi ing sangpahrang am ta uhy; cehlai kawoet cana cet hain thai uhy. 28 Satuqiing kuting tuuk thaina awm moe, sangpahrang imawh awmnaak hyn ta hy. 29 Qypawmnaak ing ak saangna khaw ak kham ik-oehi pakthum awm nawh ypaum cana ak cet ik-oehi pupthli awm hy: 30 Samthyn taw qamsa chunglak awh ak thamah soeih na awm nawh, ikawmyih ing awm a hu am voei sak khawi, 31 Ak thamah aihlyi kit, memcai sing ingkaw qalkap ing ak chungkoep sangpahrang ce ni. 32 Namah ingkaw namah thangsaknaak ham amak leek them na sai mai awh aw, amak leek ik-oehi poeknaak na taak mai awhtaw, nam kha cypp sak. 33 Suktui hqoet khingnaak ing suktui khai sak nawh ni hmaqawng nawi khingnaak ing thi ak cawn sak amyihna kawsonaak ing hqo hqitnaak cawn sak hy.

31 Lemyl sangpahrang ak awicyih a nu ing a cawngpyinaak awi taw vemyihna ni; 2 Aw ka capa, aw ka thi ka sa awhkawng ka canaak ka capa, aw kak awikam awhkawng ka canaak ka capa, ngai lah, 3 Nak thamahnaak ce nu a hamna koeh pe, sangpahrang him ham ak caikhqi venawh na hqingnaak koeh pe kawp ti. 4 Aw Lemyl, Sangpahrangkhqi ing misurtui a mi aawk hly am ni, ukkungkhqi ing zuu ami aawk hly am ni. 5 A mi aawk awhtaw aanaa awi ce hilh kawm usaw, thlak khawdengkhqi khanawh amak thymna ukhaak ta kawm uh. 6 Ak thi taw ce zuu pe unawh, ak kawsekhqi ce misurtui pe uh. 7 Aw seitaw a khawdengaak ce hilh seitaw a patangnaak ce hilh seh. 8 Awi amak kqawn thai thlangkhqi hamna awi kqawn pe nawh, dihypiung amak ta khqi ing a mi ham kawi ce ham sak khqi. 9 Ak thymna awi kqawn nawh awi deng lah; kawdengkhqi ingkaw ak voetaikhqi a mi ham hly kawi ham sak khqi lah. 10 U nu khawsak ak leek nu ak hu? A phu taw suilung a phuk tlo lakawh a phu tlo ngai hy. 11 A vaa ing anih ce yp na nawh them a voetnaak am ta hy. 12 A vaa hamna a hqing khui them leek ing bee sak hy. 13 Tuumyi ingkaw hla sui nawh, a kut ing kawzeel cana sai hy. 14 A nih cetaw them ak zawi lawng ing myih nawh, khawkhla nakawng ai kawi law pyi hy. 15 Khaw a dai hlanawh tho nawh; a imkhui khaw ingkaw a tamnaa nukhqi ham ai kawi toen hy. 16 Khawhyn ce nainawng hqeet nawh thlai hy; a bibinaak khui awhkawng misur ce ling hy. 17 Thamahnaak ing ak cawi zeen nawh, a baan thamah sak hy. 18 Them a zawihnaak awh a phu awm nawh, khawmthan awh awm a mai im am thih man hy. 19 A kut ingawh bu pawm nawh a kutplyingawh tahplem qawlhy. 20 A kut ce thlak khawdengkhqi benna soeng nawh, ak voetaikhqi ven dyna pha sak hy. 21 Daamtui baw nawh khaw a ding canawh a imkhui khaw ce hibai ak awih ing khuk khqi nawh lynaak am ta hy. 22 Hiphaih leek soeih amah ham tak nawh, suisak leek ing hlawihhlam qu hy. 23 Khawkhui cunnaak chawmkeng kuun nawh a hqaamcakhqi ven ang ngawih awh a vaa ce thlang ing kqjihchah na hy. 24 Hla qui ak leek leek ing subai tak nawh zawi hy, them ak thlaikhqi vena chawmqui ce thak khqi hy. 25 A suisak taw thamahnaak ingkaw qypawmnaak na awm nawh, khawngi ak pha law hly hamna awmhly hy. 26 Cyihnaak ing am kha aang nawh, am khaaawh ypaumnaaak ce awm hy. 27 A imkhui khawsak ak

leekna toek nawh thakdam a buh am ai hy. **28** A cakhqi ing tho unawh, thlang zoseen nu ti kawm usaw, a vaa ingawm kyihsah kaw. **29** "Nu khawsak ak leek khawzah awm uhy. Cehlai nang ing pyh khqi boeih hyk ti," ti nawh. **30** Mikhaileek awm zoeknaak mai ni, dawnnaak bai thailatnaak ni. Bawipa ak kqihchah a nu taw kyihsah tyngna awm kaw. **31** Ce a nu ce a bi thaphu pe unawh, khawkkhui lutnaak chawmkeng awh a bibinaak ing kyihsah lah uh.

NEW TESTAMENT



G. BON

H. PISAN.

Jesu ing, "Kapa, a mingmih ak khan awh qeenkhaw ngai lah,
ikaw kami sai ti am sim unawh ni," tina hy. A hi ce taicung zyk unawh tei uhy.

Luke 23:34

Matthai

1 Abraham capa David, David capa Jesu Khrih a lawnaak cadil thiuihnaa cauk taw vemyihna awm hy. **2** Abraham ing Isaak ca na nawk; Isaak ing Jakob ca na hy; Jakob ing Judah cingnahqui ca na hy. **3** Judah ingkaw Tamar a ven awhkawng Perez ingkaw Zerah cana nawk; Perez ing Herezon cana hy, Herezon ing Qam cana hy. **4** Qam ing Amminadab ca na nawk, Aminadab ing Nahshon ca na hy; Nahshon ing Salmon ca na hy. **5** Salmon ingkaw Rahab a ven awhkawng Boaz ca na hy, Boaz ing Ruth a ven awhkawng Obed ca na hy; Obed ing Jeseet ca na hy. **6** Jeseet ing David sangpahrang ca na nawk; David sangpahrang ing Uria a zu ven awhkawng solomon ca na hy; **7** Solomon ing Rehobam ca na hy; Rehobam ing Abijah ca na hy; Abijah ing Asa ca na hy; **8** Asa ing Jehoshaphat ca na hy; Jehoshaphat ing Uzziah ca na hy; **9** Uzziah ing Jotham ca na hy; Jotham ing Ahaz ca na hy; Ahaz ing Hezekiah ca na hy; **10** Hezekiah ing Manasseh ca na hy; Manasseh ing Amon ca na hy; Amon ing Josiah ca na hy; **11** Babylon khaw awh tamnaa na ami khyn tloek awh, Josiah ing Jekoniah ingkaw a mik cingnahqui ca na hy; **12** Babylon awh tamnaa na ami khyn coengawh; Jekoniah ing shealtiel ca na hy; Shealtiel ing Zerubbabel ca na hy; **13** Zerubbabel ing Abiud ca na hy; A biud ing Azor ca na hy; **14** Azor ing Zadok ca na hy; Akim ing Eliud ca na hy; **15** Eliud ing Eleazar ca na hy; Eleazar ing Matthan ca na hy; **16** Jakob ing Meri va Joseph ca na hy; cawkawng Khrish ami ti uh, Jesu ce thang hy. **17** Abraham awhkawng David dy khuk hlaiphli law hy; David awhkawng Babylon awh tamnaa na ami khyn dy khuk hlaiphli law hy; Babylon na ami khyn coeng awhkawng Khrish dy khuk hlaiphli law bai hy. **18** Jesu Khrih a thangnaak taw ve myihna awm hy: anu Meri ce Joseph ing a zu na kung nawk, kut oet na ani awm hahih lhanawh, Meri ing Ciim Myihla ak caming naasen syn hawh hy. **19** Ava Joseph taw thlak dyng na a awm dawngawh, thlang ing a sim lhanawh, ang hyp na nawn dy amah cai hy. **20** Cemiyihna ak poek huili awh, Bawipa ak khan ceityih ce ang mang awh dang pe nawk, a venawh, "David capa Joseph na zu Meri ce lawh aham koeh kqih: a phiyisu taw Ciim Myihla ak caming ni tina hy. **21** Anih ing cakpa ta kawmsaw, ak thlangkqi ce thawlhnak khui awhkawng hul aham a awm dawngawh, ang ming taw JESU tinawh sui kawp ti, tina hy. **22** Bawipa ing a tawngtha hawnaak ing anak kqawn ce a soepnaak aham ve myihkqi boeih ve ana hang awm hy. **23** Ngai lah, nulak cym ce phiyisu kawmsaw, cakpa ta kaw, ang ming taw Emmanuel tinawh khy kawm uh, ningnih a venawh Khawsa awm hy tinaak ni". **24** Joseph ing ang hoqy law awh Bawipa a ceityih ing awi a peek amyihna, Meri ce zu na hy: **25** a ca a cuun hlan dy taw am heei hy; cekcoengawh a cakyk ce cuun nawk JESU tinawh ming sui hy.

2 Herod ce sangpahrang na a awm awh Judah qam Bethlehem awh Jesu taw thang hy, cawk Khawlaw ben nakaw thlakcyikhqj ce Jerusalem na law uhy, **2** Judah thlangkqi a sangpahrang ak thang ce hana a awm? Anih a aihchi ce khawlaw benna ka mi huh a dawngawh, anih bawk aham ka mik law ni" tina uhy. **3** Ce ak awi ce Herod sangpahrang ing ang zaak awh ak kawpoek kyi hy, Jerusalem awh amik awm thlangkqi boeih awm amik kawpoek kyi hy. **4** Khawsoeih boeikhqi ingkaw ca qeekungkhqi boeih ce khy kqih nawk Khrih a thangnaak kawi hyn ce sui sak khqi hy. **5** Cekkqi ing a venawh, "Judah qam Bethlehem khaw awh thang kaw: kawtih tawngtha ing vemyihna ana qee hyt hawh hy; **6** Nang Bethlehem, Judah qam khuiawh Judah ukkungkhqi anglakawh ak zawi soeih na am awm hyt ti. Ikawtih nak khui awhkawng ukkung law kawmsaw, anih ing kak thlang Israelkhqi ce uk kaw, tinawh qee hy," tina uhy. **7** Cekcoengawh Herod ing thlakcyikhqj ce ang

hyp na khy nawk aihchi dang pehy tice ak nep caana doet hy. **8** Cekcoengawh cekkhqi ce Bethlehem na tyi khqi hy; "Cet unawh naasen ce ak nep na sui law uh; nami huh awhtaw ning zaak law sak uh, kai ingawm cet nyng saw anih bawk lawt vang." tina khy. **9** Sangpahrang awi ce aming zaak coengawh cet uhy; cawk, khawlaw ben nakaw aihchi ce hu tlaih uhy, naasen a awmnaak hyn pha nawk ang dyn hlan dy cekkqi haiawh aihchi ce cet hy. **10** A mingmih ing aihchi ami huh awh zeel soeih uhy. **11** Ipkhuu na lut unawh naasen ingkaw anu Meri ce ami huh awh koep unawh bawk uhy. Ami a khawhbawm ce awng unawh; sui, frankinsen bawktui ingkaw mura ce pe uhy. **12** Herod a venna a maming hlatnaak voel aham Khawsa ing a ming mang awh avi ak kqawn peek khqi j a dawngawh ak chang lam ben nakawng voei uhy. **13** A mingmih ami ceh coengawh Bawipa ak khan ceityih ing Joseph ang mang awh dang pe nawk, "Tho nawhtaw, naasen ingkaw anu ce Egypt qam na cen pyi hlah, awi kak kqawn law hlan dy taw cawk ana awm uh; Herod ing naasen ce him aham sui li hawh hy" tina hy. **14** Cawk anih ing tho nawk naasen ingkaw anu ce thawh nawk khawmthan awh lzip qam na cen pyi hy; **15** Herod a thih hlan dy taw cawk awm uhy: cetaw "lzip qam awhkawng ka capa ce khy nyng," tinawh Bawipa ing a tawngtha hawnaak ing ak kqawn ce a soepnaak aham ni. **16** Thlakcyikhqj ing ni qaai na hawh paoe uh, tice Herod ing a sim awhtaw, ak kaw soeih hy, thlang tyi nawk Bethlehem khaw awh ak awm naasen boeih boeih ingkaw a khawceng awhkawak ak awm naasenkhqi boeih thlakcyikhqj a doetnaak nyn dy awhkaw kum hih awhkawng ak kai boeih ce him sak hy. **17** Cawk ce Jeremiah ak awih kqawn soep hy. **18** Qamah khawk khuiawh lungnat zaaknaak, kqahnaak ingkaw khy ang kqangnaak ce awm hy, Rachel ing a cakhqi ce kqah hy, a cakhqi ama awm voel hawh a dawngawh, ang ngaihqepnaak am awm voel hy". **19** Cehlai Herod ce a thih coengawh lzip qam awh ak awm Joseph ang mang awh Bawipa ak khan ceityih ce dang pe nawk; a venawh, **20** Tho lah, naaca ce lo nawk Israel qam na cephyi hlah: naaca him aham ak suikung ce thi hawh hy", tina hy. **21** Tho nawk naaca ingkaw a nu ce a lawh coengawh, Israel qam na hlat pyi hy. **22** Cehlai Arkhelaus ing a pa Herod ang zyng na, Judah qam awh boei na awm hy tice ang zaak awh, ce benna ceh aham kqih hy, ang mang awh Khawsa ing qalqijingnaak awi ak kqawn peek amyihna, Kallili qam benna ce cet hy. **23** Nazareth ami ti khaw pynoet na ce cet nawk cawk ce awm hy. "Nazareth thlang tinawh khy kawm uh," tinawh tawngkhakqi ing ami nak kqawn awi ce a soepnaak aham ce amyihna awm hy.

3 Ce tloek awh Baptisma ak pekung Johan ce law nawk, Judah qamkoh awh awi kqawn hy, **2** Zut lah uh khawk khan ram taw zoe hawh hy", tinawh kqawn hy. **3** Veni tawngtha Isaiaah ing anak kqawn paicai hy: "Ramkoh awh ak khy awi ing, 'Bawipa lam ce goek abah unawh, a lamkhqi ce dyng sak lah uh', tinawh anak kqawn ce. **4** Johan ing kala-uk myi hi ce bai nawk, ak cawi ce savyn taisawm ing zen nawk, khamkhawk ingkaw khawtitu ce buh a an na ai hy. **5** Anih a venawh Jerusalem khawk thlangkqi, Judah qam awhkaw thlangkqi boeih ce cet uhy. **6** Ami thawlhnakkhqi ce kqawn unawh, anih a baptism ce hu uhy. **7** Cehlai, baptism a peeknaak kung awh Farasikhqi ingkaw Sadusikhqi thlang khawzah amik law ce a huh awh, ami venawh, "Aw khqui a cadilkhqi, kawsonaak ak law hly ce centaak aham u ing nu anik kqawn peek khqi? **8** Zut doena qah phaat lah uh. **9** Ka mi pa Abaraham ta u nyng kaw, tinawh koeh poek uh; ka nik kqawn peek khqi, Khawsa ing vawhkaw lungkhqi ve Abaraham a cakhqi na coeng sak thai hy. **10** Thingkung boeih awh hqaica toen hyt na awm hawh nawk; ak thaih leek amak qah thingkungkhqi boeih taw hlu kawmsaw, mai awh phum kaw. **11** Kai ing tui ngawh zutnaak baptism ce ni

pek khqi nyng; cehlai kai a huawh ak law cetaw kai anglakawh bau khqoet hy, kai taw anih a khawmyk ak pawm peek aham za am tyng nyng; anih ingtaw Ciim Myihla ingkaw mai ing baptisma ce ni pek khqi kaw. 12 A kut awh cang zahnaak khqa ce pawm kawmsaw, caang ce ak caih cana zap kaw, ang tak ce tep khuiawh chan kawmsaw ang hi taw amak thi thai qoe mai awh phum kaw tina hy. 13 Cawh Jesu taw Kalili qam awhkawng Johan a baptismal huh aham Jordan long na law hy. 14 Cehlai Johan ing tha na hy, "kai ing ni nang a baptismal huh aham ka ngaih hlai, kawtih kai a venna na law lat?" tina hy. 15 Jesu ing a venawh, "Tuh sai mai, cawh ni ningnih aham dyngnaak boeih boeih a cup hly", tina hy. 16 Jesu ing Baptisma a huh coengawh, tui awhkawng cet hy. Cawh khawk khan ce anih aham awng qu nawh, Khawsa Myihla ce khqukkhqu amyihna ak khan awh ang cuk peek ce huhy. 17 Cawhtaw khan nakawng, "ve ve ka lungnaak ka Capa, ka ym soeih soeih ni", tinawh awi ce law hy.

4 Cekcoengawh Jesu taw qaai a sykoeknaak huh aham, Myihla ing qamkoh na hqui hy. 2 Dai phlikip ingkaw than phlikip buh ang hyh coengawh, ak phoen ce cawi hy. 3 Ak sykung ce a venna law nawh, "Nang ve Khawsa Capa na na awm awhtaw, vawhkaw lungkhqi ve phaihpi na coeng sak lah", tina hy. 4 Cehlai, Jesu ing ve myihna hlat pehy, "Thlang ve phaihpi doeng ing am hqing nawh, Khawsa am khak khuiawh ak cawn law saqui awi ing ni a hqing hy, tinawh qee ce na awm hy", tina hy. 5 Cekcoengawh qaai ing anih ce khawk bau ciim na ceh pyi nawh, bawkim iptih asaw cilin ca awh tahi. 6 A venawh, "Khawsa Capa na na awm awhtaw, nuk cawn lah; kawtih, vemyihna qee na awm hy; "Ak khan ceityihkhqi ce awi pe kawmsaw, na khawkhqi lung awh am nak chuknaak aham, a kut ing nang ce ni dawn kaw", tina hy. 7 Jesu ing a venawh, "Na Bawipa Khawsa ce koeh noek koeh dak tinawh qee na awm bai hy", tina hy. 8 Cekcoengawh, qaai ing anih ce cung ak sang soeih na van pyi nawh, khawmdeh awhkaw qamkhqi boeih boeih ingkaw a mangnaak khqi boeih ce huu hy. 9 A venawh, "koep nawh kai ve nani beek awhtaw vawhkaw ik-oeihkhqi boeih ve ni pe kawng", tina hy. 10 Jesu ing a venawh, "Setan ak chang na cet, Bawipa na Khawsa doeng ce beek kawm tiksaw, anih a bi doeng ce bi tinawh qee na awm hy", tina hy. 11 Cekcoengawh qaai ing anih ce cehta hy, cawh khan ceityihkhqi ce law unawh anih ce khut a hlep uhy. 12 Johan thawngim awh thla uhy, tice Jesu ing ang zaak awh Kalili ram benna ce hlat hy. 13 Nazareth khaw ce cehta nawh tuili keng Zebulun ingkaw Nophitali khawqi awh ak awm Kapernaum khaw na cet nawh cawh ce awm hy. 14 Tawngnaa Isaiah ing anak khypyi oepchoeh: 15 Zebulun ram ingkaw Naphtali ram tuili na cehnnaak lam, Jordan long caqai, Gentelkhqi a Kalili; 16 thannaak khuiawh ak ngawikhqi ing vangnaak ak bau soeih ce hu uhy; thihnaak hlip ak kaiawh ak ngawikhqi venawh vangnaak ce pha law hy", tinawh anak khypyi ce a cupnaak aham ni. 17 Cawhkawng awh Jesu ing awi kqawn cyk hy, "Zut lah uh, khawtih khan ram taw zoe hawh hy," tinawh kqawn hy. 18 Jesu ing Kalili tuili keng na a ceh awh cingna qawi thlang pakhih, Piter ami ti uh Simon ingkaw a naa Andrew, lawk ak khawng ce hu hy; cekqawi taw ngak hawikung na awm hy nih. 19 Cekkqawi a venawh "Ka hu awh bat lah nih, thlang ak tukung na ni sai qawi vang", tina hy. 20 Cekkqawi ing lawk ce cehta nih nawh ahu awh bat hy nih. 21 Ce hyn awhkawng Jesu ce cet bai nawh, Zebdi a ca qawi Jacob ingkaw a naa Johan ce a nipa Zebedi mi lawng khuiawh lawk amik bu ce hu nawh khy hy. 22 Cekkqawi cingna ingawm anih pa ingkaw lawng ce cehta nih nawh, Jesu a hu awh ce bat pahoei hy nih. 23 Jesu ing Kalili ram khui boeih awh cet nawh, sinakawh awh thlangkhqi ce cawngpyi hy, ram awithang leek ce khypyi hy, sa amak dip thlangkhqi ingkaw tlohnat soekep

ak ta thlangkhqi ce qoei sak hy. 24 Jesu akawng ce Syria qam pum awh thang hy: tlohnatnaak soekep ingkaw khuikhanaak soekep ak hu thlangkhqi, sa amak dip thlangkhqi, thlakqawkhqi, ak kawk khuiawh qaai ak behkhqi, ak khawnkhqi boeih ce a venna law pyi unawh, anih ing cekkhqi ce qoei sak khqi boeih hy. 25 A hu awh Kalili, Dekapoli, Jerusalem, Judah qam ingkaw Jordan long caqai nakaw thlang khawzah bat uhy.

5 Thlang kqeng ce a huh awh, tlang na kai nawh ngawi hy, cawh a hubatkohi ce a venna law uhy. 2 Cekcoengawh a hubatkohi ce vemyihna cawngpyi khqi hy: 3 Kawlung ak khawdeng thlangkhqi taw ami zoseen hy, kawtih khan qam taw a mingmih a koe ni. 4 Kawset ing ak kokhqi taw ami zoseen hy, kawtih a mingngaih qep kaw. 5 Kaw ak dungkhqi taw ami zoseen hy, kawtih khawmdeh qo pang kawm uh. 6 Dyngnaak ce buh a myihna cawi nawh tui a myihna ak hoetkhqi taw ami zoseen hy, kawtih amik phoen phyi kaw. 7 Thlang qeenkhaw ak ngaikhqi taw ami zoseen hy, kawtih qeenhaak ce hu lawt kawm uh. 8 Kawlung ak ciimkhqi taw ami zoseen hy, kawtih Khawsa ce hu kawm uh. 9 Qoepnaak ag saikhqi taw ami zoseen hy, kawtih Khawsa cakhqi tinawh khy kawm uh. 10 Dyngnaak awh thekhaaak ag zakwkhqi taw ami zoseen hy, kawtih khawk khan taw a mingmih a koe ni. 11 Thlangkhqi ing kai ak camawh ni heph khqi uhy, ni thekha nak khqi uhy, amak thym na awihche soekep ing ani ziyh khqi awh ce nami zoseen hy. 12 Ym u nawhtaw namik kawzeel sak uh, ikawtih nangmih aham khawkkhan awh kutdo ak bau soeih awm hy, cemyihna ni nangmih nami awm hlan awhkaw tawngkhqi awm a mina thekhaaak hawhy. 13 Nangmih taw khawmdeh vangnaak na awm uhy ti. 14 Nangmih taw ikawh ingawm am chungdah thai hy. 15 Thlang ing mai a vang awh, dawn ing am myk nawh, maihang ami taaknaak khawi awh ni ami taak, cawh ni ipkhui awhkaw ak awmkhqi boeih ce ak coei. 16 Cemih lawtna, nangmih a them leek sai ce thlang ing a huh awh khawkkhan nakaw ak awm nangmih a Pa ce ami kyihscahaak thai kaw, nami vangnaak ce thlang amik huu awh vang lah seh. 17 Anaa awi aw am awh tawngkhakhyk awi hqe aham kai ve law hy tinawh koeh poek uh; hqe aham am law nyng ak soep sak hamna ni ka law. 18 Awitak ka nik kqawn peek khqi, khawmdeh ingkaw khan ang khum hlan dy, anaa awi awhkaw a dek pynoet ca awm, calung pynoet ca awm ik-oeih soekep a cup hlan dy taw am qeng tikaw. 19 A u ingawm vawhkaw awipeek ak zawi cakhqi ak khui awhkaw pynoet ce eek nawh thlak chang awm eek lawt aham am cuuk awhtaw anih ce khawkkhan awh ak zawi soeih na awm kaw, cehlai a u ingawm vemyihkhqi boeih ve hqout nawh thlak chang awm a cawngpyi awhtaw anih ce khawk khan awh ak bau soeih na awm kaw. 20 Ka nik kqawn peek khqi, nangmih ama dyngnaak ing Farasikhqi ingkaw caqeqekungkhqi a dyngnaak ce ama poe voelh awhtaw khawkkhan awh am lut thai ti kawp uk ti. 21 "Syn awh, thlang koeh him, u awm thlang ak him taw awidengnaa kqjih awm ce hu kaw," tinawh ami nak kqawn ce za hawh u hyk ti. 22 Cehlai, ka nik kqawn peek khqi, a u awm a koeinaaa ak khan awh ak kaw so taw awidengnaa ce hu kaw. A u awm a koeinaaa ce "Thlak zoe" ak tinaak taw Sanhedrin awh awidengnaa awm kaw. A u awm thlang ce, "thlak qaw!" ak tinaak taw hell mai kqjih awm ce zawk kaw. (**Geenna g1067**) 23 Cedawngawh bawkthang awh ik-oeih pek aham nami law pyi awh na koeinaaa ing nak khan awh ak kaw am law hy tice na sim awhtaw, 24 bawkthang a haiawh na themkhqi ce cehta nawh hlat cang. Na koeinaaa ingqawi qoepnaak ce na sai coengawh cet nawhtaw na them ce pe kawp ti. 25 Awidengnaak

awh taza anik cawikung na qaal ingqawi lam nani ceh hahih tloek awh ang tawnnaa qoepnaak sai. Cemyih am awhtaw na qaal ing nang ce awidengnaak kung na a ni khyn coengawh awidengkung ing nang ce boei a venawh ni pe patoe kaw, anih ing nang ce thawngim na nik thla kaw. **26** Awitak ka nik kqawn peek khqi, laiba a boeih dy na sah hlan khui taw thawngim awhkawng am loet kawp ti. **27** "Na samphaih aham am awm hy", tinawh amik kqawn awi ce za hawh uhk ti. **28** Cehlai, ka nik kqawn peek khqi, u ingawm nu pynoet ce hyynaak mik ing a toek awhtaw, ak kawlung khuiawh cawkaw nu ak khan awh ce samphaih hawh hy. **29** Nak tang mik ing a ni thawlh sak awhtaw, koeih nawh khawng; na pum boeih ing hell khuiua nang tlaak anglakawh na pum awh ik-oehi pynoet na taal ce nep bet hy. (**Geenna g1067**) **30** Nak tangtuk ing a ni thawlh sak awhtaw tlyk boet nawh khawng. Na pum awhkaww ik-oehi pynoet na taal ce nep bet hy. (**Geenna g1067**) **31** "U ingawm a zu ce a ma awhtaw, zu manaak ca ce pe seh" tinawh amik kqawn awi ce a na awm hawh hy. **32** Cehlai ka nik kqawn peek khqi, a va ak khan awh a thawlh awh ti kaana, u ingawm a zu ce a ma awhtaw a zu ce samphaih sak hy, cekcoengawh u ingawm thlang a zu ma ak zu naak taw samphaih na awm hy. **33** Cekcoeng bai awh, 'nak awisa ce koeh hqe, Bawipa venawh nak awisa ce cup sak lah', tinawh syn awh ami nak kqawn awm za hawh u hyk ti. **34** Cehlai, ka nik kqawn peek khqi, awi koeh sa qoe que uh: khawkkhan phoei nawh awi koeh sa, kawtih khawkkhan taw Khawsa a ngawihdoelh ni; **35** khawmdek awh phoei unawh awi koeh sa uh, kawtih khawmdek awh a khaw a soengnaak ni; Jerusalem awm phoei unawh awi koeh sa uh, kawtih Jerusalem taw sangpahrang boei a khawk bau ni. **36** Nami lu phoei unawh awi koeh sa uh, kawtih na lu awhkaw na lumsam pynoet ca awm am baawk, am lee sak thai hyk ti. **37** Ak thym ce 'thym hy' ti unawh taw amak thym ce 'am thym hy' ti mai uh; ve ak khan awh awi ak law bai taw them amak leek hawh ni. **38** 'Mik ang zyng awh mik, haa ang zyng awh haa', tinawh awi amik nak kqawn awm za hawh u hyk ti. **39** Cehlai ka nik kqawn peek khqi, thlakche ce koeh oelh uh. Nak tang ben na beeng awh thlang ing anik beih awhtaw ak chang ben na beeng ce awm dun pe. **40** Thlang ing na angki ce lawh aham a ngaih a dawngawh awi a ni oelh awhtaw, hi awm peek sih mai. **41** Thlang ing meng oet a ni qyt ngah ngah awhtaw meng hih dy awh thak. **42** Thlang ing ik-oehi a thoeh awhtaw pe mai, na venawh ik-oehi pu aham ak law ce koeh hawi taak. **43** "Na imceng ce lungna nawhtaw na qaal cetaw sawh na," tinawh qee hyt awi ak awm ce zahawh u hyk ti. **44** Cehlai ka nik kqawn peek khqi, nami qaal ce lung law na uh, nangmih awihche ing anik zyi thlangkhqi ce zoseenaak pe law uh; nangmih anik sawhnaakkhqi aham them leek sai law pe uh, **45** cawh ni khawk khan awh ak awm nangmih a Pa a cakhqi na nami awm hy. Anih ingtaw thlakche ingkaw thlakleek ak khan awh khaw ang myih na law sak nawh, thlakdyng ingkaw thlakthawh ak khan awh awm khaw ang myih na aa sak hy. **46** Nangmih anik lungnaakkhqi doeng nami lungnaak mantaw ikaw kutdo nu nami huh kaw? Mangmu ak cawikhqi ingza cemyihce am sai lawt uh na ti nawh nu? **47** Na koeinaa doeng na ym mantaw, thlak chang anglakawh na leeknaak bet ikaw a awm? Lukih thlangkhqi ingza cemyih ce am sai uh na ti nawh nu? **48** Khawkkhan nakaw ak awm nangmih a Pa a soep lawt a myihna nangmih awm soep lawt lah uh.

6 Thlang ing a huhaak aham, 'them leek sainaak' thlang a haiawh am nami sainaak aham ngaihata lah uh. Cemyihna nami sai mantaw, khawk khan na ak awm nangmih a Pa ven nakaw kutdo am hu kawm uk ti. **2** Cedawngawh ak voet ak hlauh thlangkhqi ik-oehi na dodan awh thlang am kylhcah ngaih awh qaii kqawnkhqi ing sinakawk ingkaw lam suttungkhqi awh a mi sai amyihna uut yng nawh koeh kqawn qu uh. Awitak ka nik kqawn

peek khqi, kutdo ce a mimah ing boet nawn hawh uh. **3** Cehlai, nangmih ingtaw thlang ik-oehi nami dodan awh nak tangtuk ing a sai ce nak cawng ben kut ing koeh sim seh, **4** cawh ni na kutdo ce ang hyp na a awm hly. Cawh ni ang hyp ik-oehi sai ak hukung nangmih a Pa ing samphang na kutdo ce a ni peek hly khqi hy. **5** Na mik cykcah awh, thlak qaii kqawnkhqi amyihna koeh cykcah uh; a mingmih ingtaw thlang ing ni huh na seh a mi ti awh, sinakawk ingkaw lam suttungkhqi awh dyi unawh, amik cykcah ce lungna uh. Awitak ka nik kqawn peek khqi, a mimah ing kutdo ce boet nawn hawh uh. **6** Cehlai, nangmih taw na mik cykcah awh nami ipkhui na lut unawh, chawh nami khaiah coengawh, anghyp na ak awm nami Pa a venawh cykcah uh. Cawh ni ang hyp ik-oehi sai ak hukung nangmih a Pa ing samphang awh kutdo ce ni peek hly khqi hy. **7** Na mik cykcah awh lawkikhkhqi cykcah amyihna awi koeh nawh thlaah thlaah uh, a mingmih ingtaw awh khawzah nik kqawn awh ni ang zaak hly tinawh poek uh. **8** Cekkhqi amyihna koh awm uh, kawtih nangmih ing nami thoeh hlanawh nami ngaih ik-oehikhqi ce nami Pa ing sim oepchoeh hawh hy. **9** "Cedawngawh vemyihna cykcah uh; Khawkkhan nakaw ak awm kaimih a Pa, nang ming kqihchahnaak awm seh, **10** Na qam pha law seh, Khawkkhan awh nak kawngaih sai amyihna khawmdek awh nak kawngaihnaak saina awm seh. **11** Tuhngawi awh myngawi buh ni peek hly khqi lah. **12** Ik-oehi ak pukhqi khan awh queenkawh ka ming ngai amyihna, kaimih a ik-oehi pu ak khan awh queenkawh ngai law lah. **13** Sykoeknaa awh koeh ni sawi khqi nawh, thlakchekhqi anglakawhkaing ni hil khqi lah" **14** Thlang ing nangmih a whi awh ik-oehi a sai palh awh queenkawh na ming ngai awhtaw, khawk khan nakaw ak awm nangmih a Pa ingawm nangmih a khan awh queenkawh ngai law lawt kaw. **15** Cehlai, thlang a thawlhaaka ak khan awh queenkawh amna ming ngaih awhtaw, nangmih a Pa ingawm nangmih a khan awh queenkawh am ngai tikaw. **16** Buh nami zeih awh, thlak qaii kqawnkhqi amyihna kawset myi koeh dang sak uh, cekkhqi ingtaw thlang ing buh zeih hy tina seh, ti unawh thlang a mik huh awh ami haai ce a muqu na ta uh. Awitak ka nik kqawn peek khqi, a mi kutdo hly ce hu boeih hawh u hyk tice. **17** Cehlai nangmih ingtaw thlang ing buh zeih hy tice aŋ dangu naah aham am nawh, mik huh am awm ak awm nami Pa venawh ni buh na zeih, tice aŋ dang naak aham ni; cawh ni ang hyp ik-oehi sai ak hukung nami Pa ing kutdo a ni peek hly khqi. **19** Laihqa ingkaw thieek ing ama ainaak thai, quk-aikhqi ing muk nawh a mam quuaknaak thai, ve khawmdek awh nami them koeh cun law uh. **20** Laihqa ingkaw thieek ing ama ainaak thai, khawk khan na nami them ce cun law lah uh. **21** Ikwatih nami them a awmnaak awh na mik kawlung awm awm kaw. **22** Mik taw pum a maivang na awm hy. Na mik a leek awhtaw, na pum ce vang boeih kaw. **23** Cehlai na mik ama leek mantaw, na pum boeih boeih ce than kaw. Na pum awhkaw vangnaak ce a than mai mantaw, ikawpna na pum boeih ce a thannaak kaw! **24** U ingawm boei pakkhiih a bi ce am kqep thai hy. Pynoet ce sawh na kawmsaw pynoet taw lungna kaw, am awhtaw pynoet ce kqjihchah na nawh pynoet taw husit kaw. Cemyih lawt na Khawsa ingkaw tangka bi am kqep thai hyk ti. **25** Cedawngawh ka nik kqawn peek khqi, kawnu ka ai nawh kawnu ka aawk kaw, tinawh nami hqjinggaa aham koeh ly unawh; kawnu ka bai ka naak lah kaw, tinawh nami pum aham awm koeh ly uh. Aawk-ai anglakawh hqjinggaa, suibai anglakawh pum ve awihtung bet am nu? **26** Khan nakaw phakhqi ce toek lah uh; quk am saw uh, caang awm am aat unawh, teep ak khui awh awm am thla uh, cehlai khawk khan nakaw ak awm nangmih a Pa ing cekkhqi ce hqjin hy. Cekkhqi anglakawh nangmih ve nami phu am tlo khgoet nawh nu? **27** Nangmih ak khuiawh u ingawm a mawnnaak ak caming

a hqingnaa khawnoek pynoet ca ing awm a sap bet thai? 28 Ikawthi nami pum dahnak awh nami ly? Lo awhkaw lili khqaipai ce toek lah uh. Bi am bi unawh, hla awm am bi uhy. 29 Cehlai ka nik kqawn peek khqi, vawhkaw lili khqaipai amyihna, Solomon ing a boeimangaak boeih ing thoeihcam na am awm hy. 30 Ceamiyihna lo awhkaw khuut, tuh-ngawi awh hqing thai moe a ngawi awhtaw geu nawh mai awh phum aham ak awm za Khawsa ing ak chungdah awhtaw, Aw cangnaak ak zawikhqi, nangmih ak khqoet taw khawzah khqoet na am nik chungdah hlyk khqi nawh nu? 31 Cedawngawh kawnu ka ai kaw? am awhtaw kawnu ka aawk kaw? Am awhtaw kawnu ka bai ka naak kaw? tinawh koeh ly uh. 32 Lawkhi thlangkhqi ing ni ve myihkhqi ve a mi sui hy, vemyih ik-oeihkhqi ve ngoe u hyk ti tice khawk khan nakaw nangmih a Pa ing sim hy. 33 A qam ingkaw a dyngnaak ce sui lamma lah uh, cekcoengawh vawhkaw ik-oeihkhqi boeih ve awm ni peek sih khqi bit kaw. 34 Cedawngawh khawngawi awhkaw aham koeh ly uh, khawngawi ing amah aham ik-oeih ce poek lawt bit kaw. Hypoet aham hypoet awhkaw kyinaak ce khoek hy.

7 Thlang awi koeh deng, namah awm awideng na awm lawt kawp ti. 2 Kawthi thlang awi na deng myihna nang awm awi dengnaak hu lawt kawp ti, thlang nyhtahnaak ing nang awm nyhtah na awm lawt kawp ti. 3 Namah a mik awhkaw myn ak awm ce ak poek kaana, ikaw hamna na koeinaa a mik awhkaw myn veteh ca ak awm ce na toek? 4 Namah a mik awhkaw myn a awm hyn awh, ikawmyihna na koeinaa a venawh, 'na mik awhkaw myn a diik ve tehca ce lo law vang nyng', na ti naak? 5 Nang thlang qaaik qkawn, namik awhkaw myn ce khoe sang, cawh ni na mik ce ak caih na dang nawh, na koeinaa a mik awhkaw myn tehca ce na lawh hly thai. 6 Ak caih ik-oeihkhqi ce ui koeh pe uh; na pale lung awm vawkhkqi haiawh koeh khawng uh. Nak khawng mantaw a khaw ing a leh coengawh namah awm ning hawi sih nawh ni cui khup phlet kaw. 7 Thoeh lah ni pe kaw; sui lah hu kawp ti; khoeng lah nim awng kaw. 8 U awm ak thoeh ingtaw hu nawh; ak khoeng taw awng peek na awm kaw. 9 Na ca ing phaihpi a thoeh awh lung ak pe nangmih ak khuiawh na mik awm nu? 10 Nga a thoeh awh khqui ak pe hly na mik awm nu? 11 Nangmih thlak thawlh khqi ing za nami cakhqi ik-oeih leek peek aham nami sim awhtaw, khawk khan na ak awm nangmih a Pa ing ak thoehkhqi venawh ik-oeih leek izah ak doernu a peek khqoet kaw? 12 Thlang ing nak khan awh ik-oeih leek sai sak aham na ngaih lawt a myihna, thlang ak khan awh ik-oeih leek sai lawt lah, ve ing anaa awi ingkaw tawngkhakqwi aki ce cun boeih hy. 13 Chawmkeng ak ceek ca khuiawh lut lah uh; kawthi chawmkeng kau nawh lam ak kau taw seetnaak benna ak sawikung ni, ce benna ce thlang khawzah cet uhy. 14 Cehlai chawmkeng ceek nawh lam ak ceek cetaw hqingnaak benna ak sawikung na awm nawh, ce ben ce thlang a kheoh ca doeng ing hu hy. 15 Tawngha qaaikqawnkhqi ce qaljiling uh. Ak khan awh tuyvn bai hlai uhy, ak khuina taw thailatnaak ing ak be ngentang na awm uhy. 16 A mingmih ce ak thaih awh hat bit kawm uk ti. U ing nu hling a thing awhkawng misur ak thaih bit khawi nawh, hling dum khui awhkawng thaih qah ak bih khawi? 17 Thing ak leek awh-kawng thaih leek qah nawh, thing ak che awh-kawng ak thaih che qah lawt hy. 18 Thing ak leek awhkawng thaih ak che am qah nawh, thing ak che awhkawng thaih leek am qah bai hy. 19 Thaih leek amak qah thing taw hlu unawh mai awh phum uhy. 20 Ce myihna ak thaih awhkawng a mingmih ce hat thai bit kawm uk ti. 21 Ka venawh Bawipa, Bawipa ak ti boeih ing khawk khan am pha kaw, cehlai khawk khan na ak awm ka Pa ak kawngaih ak saikhqi doeng ing ni a pha hly. 22 Ce a khawnyi awhtaw thlang khawzah ing ka venawh, Bawipa, Bawipa nang ming ing awi kqawn unyng saw, nang ming ing qaaikhqi hqek unyng, kawpoek kyi ik-oeihkhqi

am ka mi sai nawh nu? ti kawm uh. 23 Cawh kai ing cekkhqi venawh, 'Am ni sim khqi nyng. Thawlhaak ak saikhqi, ka ven awhkawng ak chang na cet uh!' tinak khqi kawng. 24 Cedawngawh u ingawm vawhkaw kak awih kqawnkhqi ve za nawh a sai awhtaw anih taw lungnu awhkaw im ak sa thlakcyi ing myih hy. 25 Khaw tlan nawh, tuinu tho, khaw hli nawh im ce buuk seiawm; lungnu awh tung ce ang ling a dawngawh, am tlu hy. 26 Cehlai u ingawm vawhkaw kak awih kqawnkhqi ve za hlaiky amak sai thlang taw dizui awh im ak sa thlakhqaw ing myih hy. 27 Khaw aa, tuinu tho nawh khawhli ing im ce a buuk awh, tlu qup hy," tina hy. 28 Jesu ing ve ak awikhqi ak kqawn boeih coengawh, a cawngpyinaak awh ce thlang kqeng ing amik kawpoek kyi hy. 29 Caqeekung khqi a cawngpyinaak amyihna am cawngpyi nawh, saithainaak ak ta thlang ing a cawngpyi amyihna anih ingtaw cawngpyi hy.

8 Thlang awhkawng ak kqum awh, thlang kqeng khawzah ing a hu awh hqut uhy. 2 Cawh mynqaa ak tlo thlang pynoet law nawh a haiaawh khuk sym doena, "Bawipa, na ngaih awhtaw ni qoei sak thai hyk ti," tina hy. 3 Jesu ing a kut a zyng coengawh anih ce bi hy. "Ngaih nyng, ciimcaih lhlah!" tina hy. Kawlkhalk awh a mynqaa ce qoei thlang hy. 4 Cawh Jesu ing a venawh, "U a venna awm koeh kqawn moe, ami simnaak aham cet nawh khawsoeih a venawh na pum ce nam huih coengawh, Mosi ak awipeeknaak a myihna ik-oeih nawnnaak ce sai," tina hy. 5 Jesu ing Kapernaum khawk khui na a lut awh, qaal boei pynoet ce a venna law nawh, qeennaak thoeh hy. 6 Bawipa, ka tyihzawih khawn nawh im awh zaih hy, a tlawh nauh hy," tina hy. 7 Jesu ing, "Law nawh qoei sak bit kawng," tina hy. 8 Qaal boei ing a venawh, "Bawipa ka im awh law aham am tyng nyng. Awi doengmah kqawn nawhtaw, ka tyihzawih ce qoei bit kaw. 9 Kai awm uknaak ak kai awh awm lawt nyng. Cedawngawh pynoet na ce, 'Ceh,' ka tinaak awh cet nawh, thlang chang awm. 'Law,' ka tinaak awh law hy; ka tamnaa awm, 'Ve sai ka tinaak awh,' ka ti awh sai lawt hy," tina hy. 10 Cek awi ce Jesu ing ang zaak awh, ak kawpoek kyi nawh, ahu awh ak bangkhqi venawh, "Awitak ka nik kqawn peek khqi, Israel khqing lak awh vemyihna cangnaak ak bau am hu nyng. 11 Ka nik kqawn peek khqi, khaw law khaw law tlak ben nakawng thlang khawzah law kawm usaw, Abraham, Isak, Jacob mi khawk khan awh buh poei kung awh kutoet na ngawi hiah kawm uk ti. 12 Cehlai ram cakhqi taw kqangnaak ingkaw hatahnaak a awmnaak, a leng ben khawmthannaak awh khawng kawm uh," tina khqi hy. 13 Cekcoengawh Jesu ing qaal boei a venawh, "Cet lhlah! nak cangnaak amyihna na venawh saina awm seh," tina hy. Ce a tym qoe awh ce a tyihzawih awm qoei thlang hy. 14 Piter a im na Jesu a ceh awh, Piter a senu ce a sa tlo nawh zaih hy. 15 Jesu ing anih ce a kut awh tu hy, cawh anih ce a satlawh ing lhlah pahoei hy, tho nawh a mingmih ce do a dan hy. 16 Khawmy benawh ak kawk khuiawh qaaik ak bekhqi ce law pyi uhy, anih ing qaaikhqi ce hqek nawh thlak tlkhqi boeih ce qoei sak hy. 17 Tawngha Isaiah ing: "Amah ing ningnih tha amak awmkhqi ce lo law nawh, ningnih a tlawhnatnaakkhqi ce phyi law hy," tinawh ak kqawn ce a cupnaak aham na ni. 18 A ven awhkaw thlang kqeng ce Jesu ing a huh awh, tuili caqai sa benna ceh aham awi pehy. 19 Cawh anaa awi cawngpyikung thlang pynoet ce a venawh law nawh, "Cawngpyikung na cehnaka hoih awh bat lawt vang nyng," tina hy. 20 Jesu ing a venawh, "Ngentangkhqi ingawm ak khuiawkaw tlu unawh, khan nakaw phakhqi ingawm bu ta uhy, cehlai thlanghqing Capa ingtaw a luttoengnaak awm am tahi," tina hy. 21 Ahu awh ak bat thlak chang pynoet ing, "Bawipa cet nyngsaw ka pa pup cang vang nyng," tina hy. 22 Cehlai Jesu ing a venawh, "Ka hu awh bat law mai, thlak thi ce thlak thi lawt ing pup mai seh," tina hy. 23 Cekcoengawh lawng khuina ce lut nawh a hubatkqi awm

lut pahoei lawt uhy. 24 Cawh poek kaana khawhli khungdeng nawk tuibak ing lawng ce kup phlet hlo hlo hy. Cehlai Jesu taw ip dut dut hy. 25 A hubatkhqi ing thawh unawh, "Bawipa ni hul khqi lah! Tui awh cum hawn kawng u nyng! tina uhy. 26 A mingmih a venawh, "Cangnaak ak zawikhqi, kawith namik khqi?" tinak khqi hy. Cekkoengawh tho nawh khawhli ingkaw tuiphu ce zyi saw, cawhtaw khawhli ingkaw tuiphu ce dym pahoei hy. 27 Cekkhqi ce amik kawpoek kyi nawh, "Kawmih ak thlang hy voei nu ve? khawhli ingkaw tuiphu ingawm ak awi ngai pe uhy! ti uhy. 28 Tui caqai ben awh ak awm Gadarin qam ce a pha awh, ak kawk khuiawh qaai ak be thlang pak khih ce phyi awhkawng a venna law hy ni. Cekkqawi ce a ni tlung soeih a dawngawh ce a lam awh u awm am cet thai hy. 29 Cekkqawi ing anik khy doena, "Khawsa Capa kainih ve ikaw ni ti nak kqawn vang na ti? A tym a khoek hlanawh kainih khuihka sak aharn na law nawh nu? tina hy ni. 30 Cekkhqi ami awmnaak hyn awhkawng a hlanaak bet awh ce vawk khawzah cah uhy. 31 Qaalkhqi ing a venawh, "kaimih ve nani hqeq khqi awhtaw vawkkhqi ak kawk khuiawh ni ceh sak khqi mai," tinawh qeenaka thoeih uhy. 32 Jesu ing cekkhqi venawh, "Cet uh!" tina hy. Cedawngawh cekkhqi ce cawn unawh vawkkhqi ak kawk khuiua lut uhy, cawh vawkkhqi boeih ce tuili na hqang awhkawng cawn unawh thi boeih uhy. 33 Vawk ak khoem thlangkhqi ce khawk khuiua dawng unawh cawkhaw ik-oeih ami huhkhqi ingkaw ak kawk khuiawh qaai ak be thlang pakkhiih akawng ce thlangkhqi venna kqawn pe uhy. 34 Cawh khawk khui awhkaw thlangkhqi boeih ce Jesu huh aham cet uhy. Jesu ce ami huh awh, ce a qam ce cehtaak aham a venawh qeenaka thoeih uhy.

9 Jesu ing lawng ak khuiua a lut coengawh, tui ce kat nawh amah a khaw nace cet hy. 2 Cawh ak khawn thlak lo pynoet hiphiah awh kawt law uhy. Jesu ing a mingmih ak cangnaak ce a huh awh, ak khawn thlang a venawh, "Ka capa, nang ngaih qep sak, na thawlhnakkhqi boeih ak khan awh qeenkhaw ngai na awm hawh hy, "tina hy. 3 Cawh anaa awi ak geekung thlang vang ing amik kawk khuiawh, "Ve ak thlang ing Khawsa thekha na hy ve!" ti uhy. 4 Cekkhqi ak kawpoek ce Jesu ing sim nawh, "kawith namik kawlung khuiawh kawpoek amak leek namik poek? 5 Hannu ak zoe bet: 'na thawlhnakkhqi boeih ak khanawh qeenkhaw ngai na awm hawh hy ti, 'tive nu? 6 Cehlai thlanghing capa ing thawlhnakkhqi ak khan awh qeenkhaw ngainaak tahiye tice nami sim thainaak aham, tina hy. 7 Cawh anih ce tho nawh a im na cet hy. 8 Thlang kqeng ing cawkhaw ik-oeih ce ami huh awh amik kawpoek kyi nawh; thlanghing a venawh vemyihna saithaakaak ak pekung Khawsa ce kylhcah uhy. 9 Ce a hyn awhkawng Jesu taw cet phaat nawh, mangmu cawinaak hyn awh ak ngawi, Mathai ak mingnaak thlang pynoet ce hu hy. A venawh, "Ka hu awh bat law," tina hy. Anih ce tho nawh ahu awh bat pahoei hy. 10 Mathai a im awh Jesu ing buh a ai awh, mangmu ak cawi thlangkhqi ingkaw thlak thawlkhqi khawzah ce law unawh a venawh a hubatkhqi mi kutoet na buh veel haih uhy. 11 Farasikhqi ing ami huh awh, a hubatkhqi venawh, "Kawith namih a cawngpyikung ing mangmu ak cawikhqi, thlak thawlkhqi mi buh kutoet na ami ai?" tina uhy. 12 Ce ak awi ce Jesu ing ang zaak awh, "Sakdip ing Siboei am ngoe nawh, thlak lo ing ni siboei a ngoe hy. 13 Cehlai cet unawh, bulnaak kaana qeenaka ni ka ngaih, ti awi ve cawng law lah uh. Kawith thlak dyng khy aham am law nyng, thlak thawl khy aham nani ka law" tina hy. 14 Cawh Johan a hubatkhqi ce a venawh law unawh, "Kawmyihna kaimih ingkaw Farasikhqi ingtaw buh zeih u nyngsaw, nang a hubatkhqi ingtaw buh a mami zeih?" 15 Jesu ing a mingmih a venawh, "Zuk lokung a awm khui awhtaw, zulawh ak ym pyikungkhqi ce amik kaw ak se hly nu? Cehlai cekkhqi ven awhkawng Zuk lokung ak chang na ceh pyinaak khawnghyp ce pha law kaw, cawh ce zeih dam bit kawm uk ti. 16 U ingawm angki

khqym ce ak thai ing am bu khawi hy, ak bunaak mai mantaw hi ak thai ing ak khqym ce dawk kawmsaw sek khqoet kaw. 17 Cemyih lawtna, u ingawm misur tui ak thai ce cikthlyng khqym awh am than khawi hy. A thun mai mantaw, cikthlyng ce paawk kawmsaw misur tui ce zuut kaw, cikthlyng awm see pahoei kaw. Cedawngawh misur tui ak thai taw cikthlyng thai awh thun uhy, cawhtaw pakkhiih bawk na ciimcaih hy," tinak khqi hy. 18 Ve myihna awi ak kqawn huiauh, ukkung thlang pynoet ce a venna law nawh a haiawh khuk sym doena, "Ka canu tuhca phoeih awh thi hy. Cehlai law nawhtaw ak khan awh na kut tloeng pe cang lah, cawhtaw hqing tlaih kaw," tina hy. 19 Jesu ing the nawh anih a hu awh cet pahoei hy, a hubatkhqi awm bat lawt uhy. 20 Cawh ce kum hqa hlae hih a thi ak tlu na pynoet ce a hu awh law nawh Jesu ihiwai ce bi pe hy. 21 "A hi mah ka bi mantaw qoei ngai voei nyng," tinawh poek hy. 22 Jesu ing hawi ket nawh nu ce toek hy. "Ka canu, nang ngaih qep sak hlah, nak cangnaak ing ni qoei sak hawh hy," tina hy. Cawh nu ce qoei pahoei hy. 23 Ukkung a ipkhui na Jesu ing a lut awh khqung ak tumkhqi ingkaw halum habee na ak awm thlang kqeng ce hu hy. 24 A mingmih a venawh, "Thoeih lah uh. Nuca ve am thi hy, ak ip ni," tina hy. Cehlai cekkhqi ing qaih na uhy. 25 Thlang kqeng ce a leng na a ceh sak coengawh, ak khuiua lut nawh nuca ce a kut awh tu hy, cawh nu ca ce tho hy. 26 Cawkhaw awithang ce rampum awh thang khawngkhak hy. 27 Ce a hyn awhkawng Jesu ce ak chang na a ceh awh, mikhyp thlang pakkhiih ing, "David capa, kainih ve nim qeen lah," tinawh khy doena a hu awh hqutu hy ni. 28 Ipkhui na a lut awh, mikhyp qawi ce a venawh law nih nawh, Jesu ing cekkqawi a venawh, "Kai ing ve ve sai thai kawng, tinawh nanik cangnaak aw?" tina hy. Cekkqawi ing, "Oeih, Bawipa," tina hy ni. 29 Cawh cekkqawi a mik ce bi penawh, "Na nik cangnaak a myihna na nik khan awh awm seh nyng," tina hy. 30 Cawh a ni mik ce dang pe qawi pahoei hy. Jesu ing, "U a venawh awm koeh kqawn qoe qoe nih moe," tinawh yn qawi hy. 31 Cehlai cekkqawi ing cet nih nawh anih akawng qam pum awh kqawn khawngkhak hy ni. 32 A khoeoh a va ceh awh, ak kawk khuiawh qaai be nawh awi amak pau thai thlang pynoet ce Jesu a venna law pyi uhy. 33 Ak kawk khui awhkaw qaai ce Jesu ing a hqek peek coeng awhtaw, ce ak thlang ce awi pau thai tlaih hy. Cawkhaw ak awm thlang kqeng ce amik kawpoek kyi nawh, "Israel ram khuiawh ve milh ve am awm man hy," ti uhy. 34 Cehlai Farasikhqi ing, "Qaaikhqi boei ak caming ni qaaikhqi a hqek hy," tina uhy. 35 Khawk bau ingkaw vangcakhqi awh Jesu ing cet nawh Sinakawk awh thlangkhqi ce cawngpyi hy, ram awithang leek ce ak kqawn coengawh, tlawhnaak soepkep ingkaw sa amak dip thlangkhqi ce qoei sak hy. 36 Thlang kqeng ce a hu awh, khoemkung amak awm, amah a ngaih ngaih na ak plam, tha amak awm tuukhqi myihna a mi awm a dawngawh qeen khqi hy. 37 Cawh ve ak awi ve a hubatkhqi venawh, "Cang ah aham khawzah awm hlai hy, bibikung zawi ca hy. 38 Cedawngawh lo ak takung ing cang ak aat aham bibikung khawzah a lo khuiawh a tyihnaak aham thoeih lah uh," tinak khqi hy.

10 A venawh thlanghqa hlai hih tloek ce khy nawh qaih chekhqi hqek thainaak ingkaw tlawhnaat soepkep qoei sak thainaak ce pehy. 2 Ceityih thlanghqa hlaihih tloek ang mingkhqi tow; Lamma cyk awh, (Piter tinawh amik khy) Simon ingkaw ana Andrew; Zebedi a caqawi Jakop ingkaw ana Johan; 3 Philip ingkaw Batholomu; Thomas ingkaw mangmu ak cawi Mathai; Alfa capa Jakob ingkaw Thaddai, 4 Zealot ami ti Simon ingkaw amah thlang a kut awh ak pekung Judah Isakariot vetloek ve khy hy. 5 Vawhkaw thlanghqa hlaihih tloek ve Jesu ing tyi nawh vemyihna yn khqi hy: Gentelkhqi venawh koeh cet unawh Samaria khaw khuiawh awm koeh lut uh. 6 Tuu ak qeeng Isarekhqi venawh

cet uh. 7 Nami ceh awh, khawkkhan taw zoe hawh hy, tinawh kqawn uh. 8 Thlak tlkhqi qoei sak uh, thlak thikhqi thawh uh, mynqaikhqi caih sak uh. A zoe na nami huh ce, a zoe na pe lawt uh. 9 Sui awm tangka awm am awhtaw qawhum awm cawi zennaak awh koeh khyn uh; 10 Khin cehnaak aham sawngsa, angki pakkhih, khawmyk ingkaw sawngqawl awm koeh khyn uh; kawthi bi ak bi ingtaw amah ang khuut qunaak ce huh aham tyng hy. 11 Khawk bau awh am awhtaw vangca awh aw nami kunnaak hoei awh, nami pahnnaak aham ak tyng im ce sui unawh cawh ce pah uh, ak chang na nami ceh hlan khui awhtaw cawh ce awm poe uh. 12 Ipkhui pynoet oet awh nami lut awh ce, awih leek ing voem law uh. 13 Ce a im awm ngaihqepnaak a awm aham a tyng awhtaw ngaihqepnaak ce pe law uh; cehlai ama tyng awhtaw ngaihqepnaak ce lat tlahi uh. 14 U ingawm amni ym unawh namik awm ama ming ngai awhtaw, cawkawm im am awhtaw ce a khaw ce nami cehtaak awh, thlak thawlha na awm unawh awidengnaa a mi huh aham awm hy tice huhsaknaak aham nami khaw awhkaw dekpli ce khqoek sih uh. 15 Awitak kak nik kqawn peek khqi, awidengnaa nyn awh Sodom ingkaw Gamorah khaw taw ce a khaw anglakawh ana boe bet kaw. 16 Ngentangkhqi anglakawh tuu myihna ni tyi khqi nyng. Cedawngawh khqui a myihna nami cyih ta unawh khqukkhqu a myihna awm moel moel uh. 17 Thlang awh ce naming ngaih ta uh; awidengnaak kung awh ni khyn khqi kawm usaw Sinakawk khqi awh ni vyk khqi kawm uh. 18 Kai a simpyukha na a mingmih ingkaw Gentelkhqi venawh ami awm naak thai aham qam ukkungkhqi ingkaw sangpahqang khqi venawh nangmih ce ni sawi khqi kaw. 19 Cehlai nangmih ce a mim tu khqi awh, kawk awi nu kqawn nawh ikawmyihna kak kqawnnaak kaw, tice koeh mawn uh. Namik kqawn hly kawi ce amah cawh qoe awh ni pek khqi bit kaw, 20 kawthi nangmih ing am kqawn kawm u tiksaw, nangmih a Pa ang Myihla ing ni nangmih awhkawng ak kqawn hly. 21 Koeinaa ing a koeinaa, ami pakhqi ing a cakhqi thihi sak aham thlang a kut awh pe kawm uh; cakhqi ing nu a pakhqi qaal na kawm usaw thlin sak aham thlang a kut awh pe kawm uh. 22 Kai a dawngawh thlang boeih ing ni sawh nak khqi kaw, cehlai a dytnak dy ak yh ak thlang taw tul na awm kaw. 23 Hun pynoet awh a ni thekhanaak khqi awhtaw ak chang na centa patooe uh. Awitak ka nik kqawn peek khqi, thlanghjing Capa a law hlanawh Isarel khawk baukhqi am hqil boeih kawm uk ti. 24 Ak cawngkung ing cawngpyikung ak khan awh am awm hy, tyihzoeih awm a boei ak khan awh am awm hy. 25 Ak cawngkung ing cawngpyikung myihna, tyihzoeih ing a boei myihna a awm ce khoek hy. Im ak takung za Belzabub tinawh amik khy awhtaw, a cakawkhqi khqoet ikawmyihna amik khy paikaw! 26 Cedawngawh cekkhqi ve koeh kqjih uh. Kawthi ikaw awm a mang dang naak aham da khoep ingkaw ama sim naak aham thuh thai am awm kaw. 27 Than awh ka nik kqawn peek khqi ve dai awh kqawn lah uh; nami haakung awh ang hyg na ka nik kqawn peek khqi ve, iptih nakanng kqawn uh. 28 Pum taw him thai hlai uhy, Myihla amak him thai khqi ce koeh kqjih uh. Cehlai Myihla ingkaw pum pakkhih na hell khuina ak geeng sak thai ce kqjih khqoet lah uh. (**Geenna g1067**) 29 Hqjica pakkhih ce qawhum tangka pekhat na zawi unawh nu? Cehlai khawk khan awhkaw nangmih a Pa kawngaih am awhtaw pynoet ca awm dek na am tla hy. 30 Nangmih a lu awhkaw lusam awm noet boeih hy. 31 Cedawngawh koeh kqjih uh; nangmih taw hqjica anglakawh nami phu tlo khqoet hy. 32 Thlang a haiawh kai anik diyh pyi taw khawk khan na ka Pa haiawh diyh pyi lawt kwawng. 33 Cehlai u awm thlang a haiawh anik qoeng taw, khawk khan na ka Pa haiawh qoeng lawt kwawng. 34 Khawmekd awh qoepnaak awm sak aham kai ve law hy, tinawh koeh poek uh. Qoepnaak am haw law nyng saw, cimca ni ka haw law. 35 Kawthi kai a dawngawh "thlang ing a pa ce qaal nakaw, canu ing a nu ce

qaal na nawh, langa ing a ci ce qaal nakaw- 36 a ipkhui nawn awhkaw thlang ce amah a qaal na awm sak aham nani," ka law. 37 U awm kai anglakawh a pa aw a nu aw ak lungnaak ak thlang taw kai ak thlang na am kawih hy; u awm a canu aw a capa aw kai anglakawh ak lungnaak thlang taw kai ak thlang na am kawih hy; 38 u awm amah a thinglam kawh doena kai a hu awh amak bat ak thlang taw kai ak thlang na am kawih hy. 39 U awm a hqingnaak ak hul ak thlang taw a hqingnaak ce hlawng kawmsaw, u awm kai a dawngawh a hqingnaak ce ak hlawng ak thlang ingtaw hu kaw. 40 "Nangmih anik do thlang taw kai a nik do thlang na awm nawh, kai anik do thlang taw kai anik tylikung ak do thlang na awm hy. 41 U awm tawngha ce tawngtha na a awm dawngawh ak do thlang taw tawngtha a kutdu hu kaw. U awm thlak dyng ce thlak dyng na a awm dawngawh ak do ak thlang taw thlak dyng a kutdo ce hu lawt kaw. 42 U ingawm vawhkaw thlak zawicakhqi khui awhkaw thlang pynoet a venawh kai a hubat na a awm dawngawh tuihding boet oet awm a peek awhtaw, awitak ka nik kqawn peek khqi, kutdo ce am myh tikaw," tina hy.

11 Jesu ing a hubat thlanghqa hlaihia a venawh awi ak kqawn coengawh, ce a hyn awhkawng Kalili khawkhqi awh thlang cawngpyi aham ingkaw awi kqawn aham cet hy. 2 Johan ing Jesu a bibinaak ce thawngim nakawng ang zaak awh, a hubatkhqi ce tyi nawh doet sak hy. 3 "Nang ve ak law hly kawi a ming ngaih-u thlang ce hawh nu, am awhtaw thlak chang ka mik ngaih-u hly hyn nu?" tina uhy. 4 Jesu ing, "Voei unawh na ming zaak ingkaw nami huhkhhqi ce Johan a venawh kqawn pe uh: 5 Mikhypkhqi mik dai nawh, khawk khemkhqi cet uhy, mynqaikaikhqi awm ciim nawh, hakpangkhqi haa khui hy, thlak thikhqi the unawh, hahqahkhqi ing awithang leek ce za hawh uhy. 6 U awm kai ak camawh amak tlu thlangkhqi taw ami zoseen hy," tina hy. 7 Johan a hubatkhqi ce ami ceh coengawh, Jesu ing thlang kqeng a venawh Johan akawng ce kqawn pehy: "Ikaw huh nami ngaih awh nu qamkoh na nami ceh? Paipoeng zilh ing a zawn huh nami ngaih awh nu? 8 Am awhtaw, ikaw huh nami ngaih awh nu nami ceh? Suibai ak nep nep ing ak thoeihcam qu thlang huh nami ngaih awh nu? Amni, suibai ak nep nep ing ak thoeihcam qu taw sangpahrang a im awh ni a awm. 9 Cawhtaw ikaw huh nami ngaih awh nu nami ceh? Tawngha aw? Oeih, ka nik kqawn peek khqi, tawngha anglakawh tawngha khqoet ce ni. 10 Anih akawng ce ve myihna ana qee hyt hawh hy: "Nangmih a haiawh ka dyihting laipai ce tyi law kawng nyngaw, anih ing a haiawh lam qoek abah law kaw," tinawh qee hyt na awm hawh hy. 11 Awitak ka nik kqawn peek khqi: nu ing a canaak thlang anglakawh Baptisma ak pekung Johan anglakawh ak bau khqoet thlang am awm hlan hy; cehlai khawk khan awh ak zawi khyt na ak awm ce Johan anglakawh bau khqoet hy. 12 Baptisma ak pekung Johan a awm awhkawng tuh dy awh, khawk khan ing thekhanaak ce ana hu hy, tha ak awm thlangkhqi ing a thama na hul uhy. 13 Ikawthi tawngkhaki boeih ingkaw anaa awi ing Johan dy ni awi ami nak kqawn. 14 Do aham nami ngaih mai mantaw, anih cetaw ak law hly kawi Elijah hawh ni. 15 U awm zaaknaak haa ak ta ingtaw za seh nyng. 16 Vawhkaw cadilkhqi ve ikaw ing nu ka nyhtah lah voei? Ik-oehl ami zaiwihnaak hyn awh ak ngawi naasenkhhqi ing ak chang naasenkhhqi venawh: 17 "Kqung ka mi tum awh awm, am lam u hyk ti; kqahlung ka mik chat law awh awm, am ko am kqang u hyk ti," tinawh amik khy ing myih hy. 18 Johan ce law nawh am aw am ai hlai hy, "Qaai tahi," tina uhy. 19 Thlanghjing Capa law nawh nu a ai hy, cawh, aimaw aawk maw, misur tui ak sawk, mangmu ak cawikhqi ingkaw thlak thawlkhqi a pyi, tina uhy. Cehlai cyihnaak ingtaw a sainaak awh dang sak hy, tina hy. 20 Cekcoengawh kawpoek kyi ik-oehl khawzah a sainaak khawkhqi ce a maming zut a dawngawh zyi khqi hy. 21 Korazin khaw map hyk ti! Bethesaida khaw map hyk

ti! Nangnih ak khuiawh sai na ak awm kawpoek kyi ik-oehkhqi ve Tura ingkaw Sidon khaw awh sai na a awm mantaw, maa deng awh dipche byng unawh, vyt awh ang zeet doenaw zut hawh voei uh. 22 Cehlai ka nik kqawn peek khqi, awidengnaak nyn awh Tura ingkaw Sidon khaw ce nangnih anglakawh ana boe bet kawm nih. 23 Cekcoengawh nang, Kapernuam, khawngni dyna nak zoek qu hly tang nu? Hell na man na nung tlaak kaw. Nak khuiawh saina ak awm kawpoek kyi ik-oehkhqi ce Sodom khaw awh saina ana awm mantaw, tuhngawi dy awh ak awm hly awm ni hlai hy voei. (*Hadès g86*) 24 Cehlai ka nik kqawn peek khqi, awidengnaak nyn awh Sodom khaw ce nang anglakawh ana boe bet kaw tina hy. 25 Cekcoengawh Jesu ing, "Aw ka pa, khan ingkaw khawmdiek Bawipa, nang ce nim kyiuhka nymg, nang ing ik-oehkhqi ve thlak cyikhqi ingkaw thlak thoemkhqi a ven awhkawng thuh nawh naasenkhqi venawh dang sak hyk ti. 26 Oeih, ka pa, ve ve nak kawngaih ik-oehi ni. 27 Ka pa ing ik-oehi boeih ce ka venawh ni pe hawh hy. Pa am kaa taw u ingawm capa ce am sim nawh, Pa ce sim aham Capa ing ak tyh thlang am kaataw u ingawm Pa ce am sim hy. 28 Nangmih phyihqih ak phyikhqi ingkaw ak khuikhakhqi aw, ka venna law lah uh, dymnaak ni pek khqi vang. 29 Kai a phiyh ve phyi unawh, ka venawh cawng law lah uh, kawdaw ingkaw kawdung thlang na ka awm dawngawh, nami lingbyi dymnaak ce hu kawm uk ti. 30 Ikawthi ka phiyh ve nep nawh ka phiyhqi ve awm zang hy," tina hy.

12 Cawh Jesu taw Sabath nyn awh lo awhkawng cet hy. A hubatkhqi ing amik phoen cawi nawh caangvui ce dy unawh ai uhy. 2 Farasikhqi ing ami huh awh, a venawh "Toek lah, Sabath nyn awh sai aham amak ciim ce na hubatkhqi ing sai uhy," tina uhy. 3 Cehlai, a mingmih vanawh, "David ing a pyikhqi mi amik phoen a cawih awhkaw ik-oehi ami sai ce namik noet khawi nu?" 4 Anih ing Khawsa ipkhui na lut nawh, khawsoeikhqi doeng ing ami ai khawi phaihpi ce, amah ingkaw a pyikhqi ing a mami ai hly kawi phaihpi ami ai ce? 5 Sabath nyn awh tempul khuiawh khawsoeikhqi ing Sabath am zeih hlai uhy, coet akap kaana ami awm ce, anaa cabu khuiawh am nami noet khawi nawh nu? 6 Ka nik kqawn peek khqi bawkim anglakawh ak bau khqoet ce vawh awm hy. 7 Bulnaak anglakawh qeenakaak ni ka ngaih, 'ti ak awi ve naming zaaksim mantaw, ak awm moel moel ak thlang ce am thawl sak hlai voei uk ti. 8 Kawtih thlanghqing Capa taw Sabath Bawi na awm hy," tinak khqi hy. 9 Ce a hyn ce cehta nawh, a mingmih a Sinakawk khuiina ce cet hy. 10 cawh kut ak kheem thlang pynoet ce ana awm hy. Jesu ce thawl amik puk thainaa ah, "Sabath nyn awh thlak tlo qoei sak ve ak caih nu?" tinawh doet uhy. 11 A mingmih venawh, "Nangmih ak khuiawh thlang pynoet ing tuu pynoet ta mai lah seh, cawhkaw a tuu ce Sabath nyn awh lawkkhqawng na ang tlaak mantaw am na mik dawk hly aw? 12 Cawhtaw thlanghqing ve tuu anglakawh izah nu a phu a awm khqoet! Cedawngawh Sabath nyn awh ik-oehi leek sai ve thym hy," tina hy. 13 Cawhkaw thlang venawh, "Na baan ce zyng lah," tina hy. Anih ing a baan ce a zyng awh a kut ce akut langben amiyihna leek pahoei hy. 14 Cehlai Farasikhqi taw cawn unawh ikawmyihna nu amah ve ni him naak thai lah voei, tinawh doet qu uhy. 15 Jesu ing ce ce a sim dym a dawngawh, ce a hyn ce cehta hy. Thlang kqeng khawzah ing ahu awh bat uhy, anih ing cekkhqi a tlawhnaakkhi boeih ce goei sak hy. 16 anih a u nu tice a mamik kqawnnaak ah am yn khqi hy. 17 Tawngha Isaiyah ing anak kqawn awi ce a cupnaak thai ah am vemyihna awm hy: 18 Ve ve ka tyihzoeih thlak tyh, lungna nawh ka ym soeih ni; kang Myihla ce ak khan awh ta kawng nyngsaw, anih ing thymnaak ram tawm awh kqawn kaw. 19 Anih taw am tlaai kawmsaw khy awm am khy kaw; lam awh anih ak awi ce u ingawm am za kaw.

20 Anih ing thymnaak ing a noeng hlandy, paipoeng akawng ak pleep ce ap kqai poet kawmsaw, that awhkaw maikhu awm am thi zip kaw. 21 Ang ming awh qam tawm thlang ing ngaih-unaaka ta kawm uh, a ti ceni. 22 Cawh ak kawh khuiawh qaih be nawh mik ak hyp awi awm ak myh thlang pynoet ce, a venawh law pyi uhy, Jesu ing anih ce qoei sak nawh awi awm a pau thai pahoei coengawh amik awm dang pe pahoei hy. 23 Cawhkaw ak awm thlang kqeng ce a ming ngaih kyi nawh, "Ve ak thlang ve David a capa hy voei nu?" ti uhy. 24 Cehlai Farasikhqi ing ce ak awi a ming zaak awh, "Ve ak thlang ing ve qaaai boei Belzabub ak caming ni qaaikhqi a hqek," tina uhy. 25 A mingmih ak kawpoek ce Jesu ing sim nawh a mingmih a venawh, "Kawmih a qam awm ak khuiawh a ming phekbo qu awhtaw am dyi thai hy. 26 Setan ing Setan ce a hqek mantaw, amah ingkaw amah qaal qu nawn kawm nih saw ikawpna a qam ang dyih thai kaw? 27 Kai ing Belzabub ak caming qaaikhqi ka hqek awhtaw, namik thlangkhqi ing u ak caming nu qaaikhqi ami hqek lawt? 28 Kai ing Khawsa Myihla ing qaaikhqi ce ka hqek awhtaw Khawsa qam taw nangmih ak khan awh pha hawh hy. 29 Ikawmyihna thlang ing ip takung thak awm soeih ce a pin hlan awh a im ce muk penawh a ik-oehkhqi ce a lawh naak peek thai kaw? A pin coengawh man a im ce a muk peek thai kaw. 30 Kai ama nik bawng taw kai anik qaalaak thlang na awm nawh, kai ama nik cawipyi taw ak thehkung na awm hy. 31 Cedawngawh ka nik kqawn peek khqi, thawlhaak soeepk ingkaw Khawsa ak kqawnseet thlangkhqi khan awm queenkawh ngainaak awm kaw, cehlai Ciim Myihla ak kqawnseet thlang ak khan awh queenkawh ngainaak am awm kaw. 32 U awm thlanghqing Capa ak kqawnseet taw queenkawh ngai na awm hlai moe, Ciim Myihla ak kqawnseet taw tuh awm, ak law hly kawi a tym awm awm queenkawh ngainaak am awm kaw. (*aïon g165*) 33 "Thing ak leek awhkawng thaith leek qah nawh, thing ak che awhkawng thaith che qah lawt hy, ak thaith awhkawng thing ce sim uhy. 34 Nangmih khqi a cadilkhqi, nangmih thlak chekhqi ing ikawmyihna ik-oehi leek namik kqawnnaak qoe kaw? Kawlung ak khui awhkaw ak awm ik-oehi ceni nim kha ingawm ak kqawn. 35 Thlak leek ing a ik-oehi leek ak khui awhkawng a ik-oehi leek ce hawlaw nawh, thlak che ing a ik-oehi che ak khui awhkawng ik-oehi amak leek ce hawlaw lawt hy. 36 Cehlai ka nik kqawn peek khqi, thlangkhqi ing awi ak poek ceet kaana amik kqawnnaak awh ce awidengnaak nyn awh kqawn caih sak tlaih na awm kaw. 37 Nak awi ak caming cang kawm tiksaw nak awi ak caming dawk kawp ti," tinak khqi hy. 38 Cekcoengawh Farasikhqi ingkaw anaa awi ak geekungkhqi ing a venawh, "Cawngpyikung, nang ak kawpoek kyi ik-oehi sai huh aham," tina uhy. 39 Cehlai a mingmih a venawh, "Thlak leek am ingkaw samphaih cadilkhqi ingtaw kawpoek kyi hatnaakkhi ce thoeih uhy! Tawngha Jonah ak kawpoek kyi hatnaak am taw ak chang hatnaak peek na am awm kaw. 40 Kawtih Jonah taw ngak bau ak phoen khuiawh hyp thym ingkaw than thum awm hy, cemih lawtna thlanghqing Capa awm dek khuiawh awm lawt kaw. 41 Nenivi khaw awhkaw thlangkhqi ce vawhkaw cadilkhqi mi awidengnaak khawny awh dyi haih kawm usaw cekkhqi ing dawk sak kawm uh; kawtih cekkhqi taw Jonah ak awih kqawnnaak awh zut uhy, ngai lah uh, Jonah anglakawh ak bau khqoet ce vawh awm hy. 42 Khan ben nakaw Sangpahrang nu ce ve canukhqi mi awidengnaak nyn awh dyi haih kawm usaw anih ing velkhqi ve dawk sak khqi kaw; kawtih anih taw Solomon a cihnaak awi ak ngai na khawmdiek a dytnaak nakawng law hy; ngai lah uh, Solomon anglakawh ak bau khqoet ce vawh awm hy. 43 "Thlang ak kawh khui awhkawng qaih che ce ak cawn coengawh, tui ama awmnaak hunkhqi na cet nawh dymnaak ce sui hy, cehlai am hu hy. 44 Cedawngawh vemyihna tihy, 'ka cehtaak im na hlat tlaih vang nyng,' ti hy. Ang hlat tlaih awh im ak caihping

ak hoeng ce hu hy. 45 Amah anglakawh ak che khqoet qaaikhqi ce kun pyi nawk, cawh awm uhy. Cawhtaw ce ak thlang ce ak cyk awh kawng lak awh nauh khqoet hy. Cemyihna vawhkaw thlak che cadilkhqi venawh awm lawt kaw," tinak khqi hy. 46 Jesu ing thlang kqeng a venawh awi ak kqawn huiawh a nu ingkaw a koeinaakhqi ce a venawh awi kqawn aham a leng na dyi uhy. 47 Thlang pynoet ing a venawh, "Na nu ingkaw na koeinaakhqi ing na venawh awi kqawn aham a leng na dyi uhy." tina hy. 48 Cehlai awi ak kqawn peekkung a venawh, "Ka nu ingkaw ka koeinaakhqi ce ukhqi nu?" tina hy. 49 A hubatkhqi ce a kut ing khi nawk, "Vekkhqi ve ka nu ingkaw ka koeinaakhqi hawh ni! 50 U awm khawk khan awhkaw ka Pa ak kawngalih ak sai boeih taw ka koeinaakhqi ingkaw ka nu awm hy," tina hy.

13 Ce nyn awh Jesu taw im awhkawng cet nawk tuili kengawh ngawi hy. 2 Cawh thlang khawzah a venawh cun uhy, cedawngawh lawng khuina cet nawk ngawi hy, thlang kqeng taw tuili kengawh dyi uhy. 3 A mingmih a venawh nyttahawi ing awi khawzah kqawn pek khqi hy; "Lo toenkung pynoet taw camci ak theh na cet hy. 4 Camci ce ak teh awh a vang taw lam awh tla nawk, phakhiq ing cung boeih uhy. 5 A vang taw lungpeei ak khan awh tla hy; dek a pam a dawngawh cawt pahoei hy. 6 Cehlai khawling a hawk law awhtaw, ak kqa ama cak a dawngawh khawk hawk ing a hut awh qeu pahoei hy. 7 A vang taw hilik plup awb tla hy, hling ce saang law nawk caang ce eek hy. 8 Camci a vang taw laitak awh tla nawk, vui hy - zakhat, khqukkip ingkaw thumkip dy na pung hy. 9 Haa ak ta ingtaw za seh," tinak khqi hy. 10 A hubatkhqi venawh law unawh, "kawtih thlang kqeng a venawh nyttahawi ing awi nak kqawn peek khqi? tinawh doet uhy. 11 A mingmih a venawh, "Khan qam awihyp sim thainaak cyihnaak ce nangmih a venawh peek na awm hawh hy, cehlai a mingmih a ven awhtaw am pe hy. 12 U awm khan qam awihyp cyihnaak ak ta taw sap pe tanoel kawmsaw khawzah pap a taw. Cehlai u awm amak ta taw atatak chyn awm lawh pekawing. 13 Cawhmaw a mingmih a venawh taw nyttahawi awi ing kak kqawn peek khqi: "Hu hlai uhy, am hat uhy; za hlai uhy, am za thai unawh ang zaak na awm am zasim uhy. 14 A mingmih a dawngawh tawngtha Isiahing: "Ang zaak nataw za hlai voei uk ti, am zasim kawm uk ti; hu taw hu hlai voei uk ti, am hat kawm uk ti. 15 Ikawtih ve ak thlangkhqi kawlung ve mawh hqoeng hy; a ming haakhqi ing za kaa hlai uhy, ami mik ce hiim uhy. Ce ap kaa mantaw ami mik ing hu kawm usaw, a ming haa ing za hau kawm uh, kawlung ing zasim kawm usaw huna a ming voei coengqawh, qoei sak khqi hau kawng, tinawh anak kqawn ceni. 16 Cehlai nangmih a mik taw ami huh tha i a dawngawh a zoseen hy. 17 Awitak ka nik kqawn peek khqi, nangmih ing nami huh ve tawngtha khawzah ingkaw thlak dyng khawzah ing huh aham ana ngaihlai uhy, naming zaak ve zaak ana ngaihlai uhy, am za uhy. 18 "Cawhtaw camci theh nyttahawi ing ak kqawn ngaihnak awi ve ngai lah uh: 19 U ingawm khawk khan awithang ce za hlai uhy am zasim uhy, cawh ak kawlung khuiawh theh na ak awm awithang leek ce qaaai ing qawt pe valh hy. Vetaw lam awh ak tla camci ing myih hy. 20 Lungpeee awh ak tla camci taw, thlang ing awi ce ang zaak awh zeel doena do pahoei hy. 21 Cehlai ak kqa ama taak a dawngawh, kawlhkahl ca doeng awm hy. Ce ak awi dawngawh kyinaak ingkaw thkhanaakkhqi a pha law awh ce tlu pahoei hy. 22 Hilik plup awhkaw ak tla camci taw, awi ce za hlai hy, ve khawmdek khan hqingnaak awh mawn atang nawk qaaai kqawnnaak ingkaw boei a mangnaak ing awi ce a eek a dawngawh thaih am qah thai hy. (aiōn g165) 23 Laitak awhkaw ak tla camci taw awi ce ang zaak awhkawng ak zasim ak thlang na awm hy; ak thaih qah nawk a vang taw a let zakhat, a vang khqukkip, a vang taw thumkip

dyna pung hy," tina hy. 24 Jesu ing ak chang nyttahnaak awi ce a mingmih a venawh kqawn bai hy: "Khawk khan taw thlang pynoet ing a lo awh camci a saw ing myih hy. 25 Cehlai a mi ih tloek awh ami qaal ce law nawk cang anglakawh beei ak ui ce theh awh cehtaak hy. 26 Caang ce cawt nawk a vui ak thaih law awhtaw, beei awm cawt law lawt hy. 27 Cawh lokung a tyihzawihkhqi ce a venawh law unawh, 'Bawipa, ak leek ni na lo awh nak theh hlai. Hanakaw beeikhqi nu ak cawt hy voei?' tina uhy. 28 "A mingmih a venawh, 'Qaal ing ni a sai hawh hy ce,' tina hy. A tyihzawihkhqi ing, 'cawhtaw cet unyng seitaw phu mai vang unyng aw?' tina uhy. 29 Cehlai lokung ing, "amni, beei ce nami phuk mantaw cang awm phuk sih hau kawm uk ti. 30 Caang ah hlai dy taw cawt hali mai cang seh. Cang ah awhtaw cang aatkhqi venawh, 'Beeikhqi ce phu ma unawh, mai awh phum aham ak nep na tum uh, cang taw teep ak khuiawh chan uh, tina bit kwang,' tinak khqi hy. 31 Cekcoengawh a mingmih a venawh nyttahnaak awi ak chang ce kqawn pek khqi bai hy: "Khan qam taw antlam cii ce thlang ing lo nawk a lo awh ak theh ing myih hy. 32 Ce antlam cii taw ak ui boeih boeih anglakawh ak zawi soeih na awm hlai hy, a cawt law awhtaw beei ak chang boeikhqi anglakawh ak bau soeih na awm hy, khan nakaw phakhiq ce law unawh a paangkhqi awh cu uhy," tinak khqi hy. 33 A mingmih a venawh nyttahnaak awi ak chang kqawn pe bai hy: "Khan qam taw nu pynoet ing hen lo nawk vaidam dawn khui thum a zamnaak boeih aham vaidam awh a phul ing myih hy," tinak khqi hy. 34 Vawhkaw ik-oeikhqi boeih ve Jesu ing nyttahnaak awi kaana a mingmih a venawh ikaw pynoet awm ap kqawn pehy. 35 Cedawngawh tawngtha ing: "Nyttahnaak awikhqi ing, khawmdek a syn cyk awhkawng thuh na ak awmkhqi ce kqawn kawng," tinawh anak kqawn ce cup sak hy. 36 Cekcoengawh thlang kqeng ce cehta nawk ipkhui na lut hy. Cawh a hubatkhqi ce a venna law unawh, "Lo awhkaw beei nyttahnaak awi nak kqawn ce kaimih aham kqawn caihlah," tina uhy. 37 A mingmih a venawh, "Camcik leek ak thehkung taw thlanghqing Capa ni. 38 Lo taw ve khawmdek ni, camcik leek taw a qam cakhqi ak kqawnnaak ni. Beeikhqi taw thlak thawlha cakhqi ni, 39 a mingmih ak thehkung cetaw qaaai ni. Cang ah cetaw khawmdek a dytnaak, cang ak aatkungkhqi cetaw khan ceityikhqi ni. (aiōn g165) 40 "Beeikhqi ce phu boeih nawk mai awh amik phum amyihna khawmdek a dyt awh ce amyihna ce awm lawt kaw. (aiōn g165) 41 Thlanghqing Capa ing ak khan ceityikhqi ce tysi kawmsaw, thawlhnak ak saikhqi ingkaw ik-oeih amak leek ak saikhqi ce a qam khui awhkawng caawi kaw. 42 Thii a tui na ami hloeinaak mai khuiawh a mingmih ce khaawng khqi kaw, cawh ce kqangnaak ingkaw tahaahnaak ce awm kaw. 43 Cekcoengawh thlak dyngkhqi taw a mi pa a qam awh khawmik amyihna vang hawh kawm uh. Haa ak takhqi ingtaw za seh nyng. 44 Khan qam taw lo awhkaw qo thung ing myih hy. Cawhkaw qo ce thlang pynoet ing a huh awh thuh tlaih nawk, cekcoengawh zelin doona cet nawk a taak ik-oeikhqi boeih ce zawi nawk cawhkaw lo ce thlai hy. 45 Cekcoeng baiawh, khan qam taw phuk tlo pale ak suikung them ak zaawi ing myih hy. 46 Anih ing pale lung phu ak tlo soeih ce a huh awh, cet nawk a taakkhqi boeih ce zawi nawk thlai hy. 47 "Cek coeng bai awh, khan qam taw tuili awh lawk khawng nawk nga soekep ak kaawi ing myih hy. 48 Lawk awh nga a be awh ce peem awh chan unawh nga ak che taw khaawng uhy. 49 Khawmdek a dyt awhtaw ce amyihna ce awm lawt kaw. Khan ceityikhqi law kawm usaw thlak dyngkhqi anglakawhkhawng thlak thawlkhqi ce hoep khqi kaw; (aiōn g165) 50 cekkhqi ce a tui hloeinaak maih khuina khaawng kaw, ce a hyn awh kqangnaak ingkaw haatahnaak ce awm kaw," tina hy. 51 Jesu ing a mingmih a venawh, "Vawhkaw ik-oeikhqi boeih ve namik zasim nu?" tinawh

doet khqi hy. Cekkhqi ing, "Oeih, Bawipa," tina uhy. 52 A mingmih a venawh, "Cedawngawh khan qam akawng kqawn peek na ak awm cawng saknaak awi ak qeekungkhqi boeih taw iptakung ing a ipkhui awhkawng a khawhthem ak khqym ak thai ak chet phenh ing miyh hy," tina hy. 53 Jesu ing vawhkaw nyighthaakaak awikhqi ak kqawn boeih coengawh, ce a hyn ce cehta hy. 54 Amah a khaw na ce law nawh Sinakawk awh ce thlang cawngpyi hy, cawh a mingmih ce a ming ngaih kyi hy." Ve ak thlang ing hana kaw vemyih cyihnaak ingkaw kawpoek kyi ik-oeih saithainaakkhqi a taak hy voei?" ti uhy. 55 "Anih ve thing aatkung a capa am nu? Anu awm Meri am nu ve, a koeinaakkhqi Jakop, Joseph, Simon ingkaw Juda am nu ve? 56 A koeinkhqi awm ningnih a venawh amik awm hiah lawt am nu ve? Ve ak thlang ing vawhkaw ik-oeihkhqi hana kaw a huh hy voei?" ti uhy. 57 Ak khan awh amik kaw am zeel hy. Cehlai Jesu ing cekkhqi venawh, "Tawngkaaw taw amah a khaw ingkaw amah a im am awhtaw zoeksangna am awm man hy," tina hy. 58 Cangnaak a mami taak a dawngawh ce a hyn awh kawpoek kyi ik-oeih khawzah am sai hy.

14 Cawh Herod sangpahrang ing Jesu akawng ce za hy. 2 Cedawngawh a tyihzoeh a venawh, "Anih ce thihnaak awhkawng ak tho tlaib Baptisma ak pekung Johan hawh ni! Cawh ni kawpoek kyi ik-oeih saithainaakkhqi anih awh a awm hy," tiyh. 3 Herod ing a na Philip a zu Herodi akawng awh Johan ce tu nawh ak khhih coengawh thawngim na thla hy, 4 Johan ing "Na na a zu na zuna na lawh ce am thym hy," a tinaak dawngawh ce miyihna ce sai hy. 5 Thlang kqeng ing Johan ce tawngkaaw taw amik poek a dawngawh, Johan ce him aham ngaih hlai uhy, thlang kqeng ce kqih hy. 6 Cehlai Herod a thangnaak khawnyn a pha awh, Herod a canu ce a mingmih a haiawh lam sak nawh Herod ce ak kaw zeel sak hy, 7 Cedawngawh cawhkwaw nuca ing a ngaih saqui ce peek aham awikamnaak tahi. 8 Nuca ing a nu a cuih amyihna, "Baptisma ak pekung Johan a lu ce beihdung awh ni pe," tina hy. 9 Cawh taw sangpahrang ce ak kaw se hy, cehlai mybih amik veel hiah khinkhqi haiawh awi ana kam hawh a dawngawh nuca ing a ngaih amyihna peek aham awi pehy, 10 thlang tyi nawh thawngim khui awhkaww Johan a lu ce hlyng sak hy. 11 A lu ce beihdung awh hawlaw pe unawh nuca ce pe uhy. 12 Johan a hubatkhqi ce law unawh a qawk ce a mi khyn coengawh pup uhy. Cekcoengawh cet unawh Jesu a ven awh kqawn pe uhy. 13 Ce ak awi ce Jesu ing ang zaak awh, thlang a dingnaak na lawng ing cet valh hy. Thlangkhqi ing a ming zaak awh, khawk khui awhkawng khaw ing cet unawh hqut uhy. 14 Jesu ing kawngceng a pha awhtaw thlang kqeng ce hu hy, cawh a mingmih ce am queen khqi soeih a dawngawh, thlak tllokhyi ce qoei sak hy. 15 Khaw a my law awhtaw, a hubatkhqi ce a venna law unawh, "Ve ve kqawng lak na awm nawh, khaw awm my hawh hy. Cedawngawh thlang kqeng ve ceh sak hlah, khawk khui na set a mimah ing buh a an awm thlai useh," tina uhy. 16 Cehlai Jesu ing, "A mingmih a mi ceh am ngaih hy. Nangmih ing aii kawi pe uh," tinak khqi hy. 17 Cekkhqi ing a venawh, "Phaihipi cun nga ingkaw nga lunghih doeng ni ka mi taak," tina uhy. 18 Cekkhqi venawh, "Ka venna hawlaw lah uh," tina hy. 19 Taaitin awh thlang kqeng ce ngawih sak aham awi pehy. Phaihipi cun nga ingkaw nga lunghih ce a lawh coengawh khan benna mang nawh, zeelnaak awi ak kqawn coengawh phaihipi ce ek hy. Cekcoengawh phaihipi ce a hubatkhqi venawh pehy, a hubatkhqi ing thlang kqeng a venawh teei patoeng uhy. 20 Cekkhqi ing ami ai awhtaw phyl boeih uhy, ami ai ngenkhqi ce a hubatkhqi ing ami kawih awh vawh hqa hlaihii law hy. 21 Cawhawh ak aikhqi ce nu ingkaw naasen a noet kaana, pa hqoeng thawngna law uhy. 22 Jesu ing thlang kqeng ce a tyih khqi huili awh, a hubatkhqi awm lawng awh luh sak khqi nawh caqai benna ana cet uh tinawh awi pek khqi hy. 23 Thlang kqeng ce a cek sak

coengawh, cykah aham amah doeng tlang na kaai hy. Khaw a my law awhtaw, ce a hyn awh amah doeng awm hy. 24 Cehlai lawng taw caqai ing a hlanak na tubak ing mam khoepp hy. 25 Than cinghy khawnoek pali awh, Jesu taw a mingmih a venna tui awh ce cet hy. 26 Tuili awh a ceh ce a hubatkhqi ing ami uhy kqih uhy. "Ce ce myihla ni," ti unawh amik kqih awh khyy uhy. 27 Cehlai Jesu ing a mingmih a venawh: "Koeh ly uh, kai ni, koeh kqih uh," tinak khqi hy. 28 Piter ing a venawh, "Bawipa, nang awhtaw na venna tui awh ce ni law sak lawt lah," tina hy. 29 Jesu ing, "Law," tina hy. Cawh Piter ce lawng awhkawng kqum nawh, tui awh Jesu a venna ce va cet hy. 30 Cehlai khawhli ce a huh awh kqih nawh tuih khui na ce nung tla hy, "Bawipa, ni hul lah! tinawh khqi hy. 31 Jesu ing a kut soeng nawh tuu hy, "Cangnaak ak zawi aw, kawith upvoetnaak na taak," tina hy. 32 Lawng khui a ni kaai coengawh, khawhli ce sit hy. 33 Lawng khui awhkaw ak awm thlangkhqi ing anih ce beek uhy, "Nang ve Khawsa Capa tang tang ni," tina uhy. 34 Caqai benna ce cet phat unawh Gennesaret qam ce pha uhy. 35 Ce a hyn awhkaw ak awm thlangkhqi ing anih ce ami sim awhkawng ami qam pum awh awi ce pha sak boeih uhy. 36 A venawh tlawhnaak ak takhqi boeih ce hawlaw unawh a himai awm ami binaak thai aham a venawh qeenaka thoeih uhy, ak bi thlangkhqi boeih taw qoei uhy.

15 Cawh Jerusalem khaw awhkawng Farasi khqi ingkaw anaa awi cawngpyikung khqi thlang vang ce Jesu a venna law unawh doet uhy, 2 kawthi na hubatkhqi ing a hqamcakhqiqi awi qoe ce ami hqe? Buh ami ai law hly awh ami kut khaw am sil uhy!, tina uhy. 3 Jesu ing a mingmih a venawh, "Cawhtaw kawthi nangmih ing na mimah ak awi qoe ingkaw Khawsa ak awipeek ce nami hqe law?" 4 Khawsa ak awipeek ingtaw, na nu ingkaw na pa zoeksang lah, anu apa awih che ak hlah sih taw thih sak aham awm hy, tinawh ak kqawn ce. 5 Cehlai nangmih ingtaw thlang ing anu apa venawh, "kai a ven awhkawng na ngaih ik-oeih boeih ce Khawsa venawh awm hawh hy." a tinaak mantaw, 6 'anih ingtaw apa ce a zoeksang aham am awm hy," ti u hyk ti. Cemiyhna na mimah ak awi qoe ingkaw Khawsak awipeek ce kawna awm ap poek uhyk ti. 7 Nangmih thlang qaaik qgawnkhqi! Isaiah ing nangmih akawng anak kqawn hyt: 8 "Ve ak thlangkhqi ing a mim kha hqawng ingtaw kai ve ni zoeksang kaa hlai uhy, amik kawlungkhqi taw ak chang na ta uhy; 9 A hoeina ni kai ve ami ni beek hy; ami cawngpyinaak ce awm thlanghqing a cawngpyinaak mai ni, a tive thym hy," tina hy. 10 Jesu ing thlang kqeng ce a venna khy nawh, "Ngai unawh zasim lah uh. 11 Nim khak khuiawh anuk lut awk-ai ing thlang tuih am awm sak nawh, nim khak khuiawh ak cawn law awih che ing ni thlang tuih a awm sak," tinak khqi hy. 12 Cekcoengawh a hubatkhqi ce a venna law unawh doet uhy, "Farasikhqi ing ve ak awi ve aming zaak awh amik kaw am law hy, tice nak sim nu?" tina uhy. 13 Cehlai anih ing, "Khawk khan nakaw Pa ing a mang ling thingkungkhqi boeih taw ak kqa mah na phu kaw. 14 Awm taak dyn uh; sawikung mikhypkhqi ni. Mikhyp ing mikhyp a sawi mantaw, lawkkhawng na tla qen kawn nilh," tina hy. 15 Piter ing a venawh, "Vawhkaw nyighthaakaak awi ve kaimih a venawh kqawn caih lah," tina uhy. 16 Jesu ing, "Nangmih ingawm am nami zasim nawh nu? 17 Nim khak khuiawh a nuk lut boeih boeih taw phoen ak khuiina cet nawh cawh kawng ce naat na cawn hy, tice am nami sim nawh nu? 18 Cehlai nim kha awhkawng ahak cawn law boeih taw kawlung khui awhkawng ni a law, cekkhqi ing ce thlang tyih am leh kap sak uhy. 19 Kawlung khui awhkawng ni kawpoek amak leekkhqi, thlang himnaak, samphaihnaak, nu pa thawlhaak, quuknaak, amak thym dyihting na dyihnaak, Khawsa thekhanaak khqi ce a law hy. 20 Ve miykhqi ing thlang tuih am leh kap sak hy; cehlai

kut silh kaana buh ainaak ing thlang tuih am leh am kap sak hy," tina hy. 21 Ce hyn awhkawng Jesu taw Tura Ingkaw Sidon khaw khqang ce cet hy. 22 Cawh, Kanaan nu pynoet taw a qam khui awhkawng law nawh, a venawh, "Bawipa, David Capa, kai ve nim queen lah! Ka canu qaai ing tu nawh khuikha soeih hy," tina hy. 23 Cehlai awi khang oet awm am hlat pehy. Cedawngawh a hubatkqi ce a venna law unawh, "Ak chang na ceh sak lhah, ni hu awh khy khing hy," tina uhy. 24 Jesu ing, "Isarel tuu ak qengkhqi aham doeng nani ani tyih," tina hy. 25 Cawh nu ce law nawh, "a haiawh khuk sym doena, "Bawipa ni bawm lah!" tina hy. 26 Anih ing, "Cakhqi phaihpi ce lawh pe nawh uikhqi ni peek lat ce am thym hy," tina hy. 27 Cawkawnu ing, "Oeih, Bawipa, thym hy, cehlai ui ingawm a boekhqi a caboei awhkaw buh baw ak tlakhqi ce lym lawt saw, tina uhy. 28 Cawh Jesu ing a venawh, "Nang nu nak cangnaak dung soeih hy! Na theohnaak ce peek na awm hawh hy," tina hy. Cawkawng a canu ce noei tlang hy. 29 Ce a hyn ce Jesu ing cehta nawh Kalili tulii benna cet hy. Cekcoengawh tlang na ce kaai nawh ngawi hy. 30 Cawh thlang kqeng khawzah ce a venna law uhy, khawk khem, mikhyp, awimyh, ak khawnkhqi ingkaw tlakhlakhqi ce a khawlung awh soei pe unawh; anih ing cekkhqi boeih ce noei sak hy. 31 Awimyh ing pau thai nawh ak khawnkhqi ing leek hy, khaw ak khernkhqi ingawm cet thai unawh mikhypkhqi ing hu thai uhy; ce miikhqi ce thlang boeih ing ami huh awh amik kapwoek kyi unawh, Isarel Khawsa ce kyihsah uhy. 32 Cekcoengawh Jesu ing a hubatkqi ce a venna khy nawh, "Vawhkaw thlang kqeng ve queen khqi soeih nyng, vekkhqi ve ka venawh ikaw awm a ai kaana khaw thum voei awm hawh uhy. Buh cawih doena ceh sak aham am ngaih nyng, ka ceh sak man lam lak awh lum hau kawm uh," tina hy. 33 A hubatkqi ing a venawh, "Thlang ve zah a ai tat phaihpi ce ve kqawng khuiawh hana kaw ka mi huh kaw?" tina uhy. 34 Jesu ing a mingmih a venawh, "Phaihpi izah nu nami taak?" tinak khqi hy. A mingmih ing, "Phaihpi khqih ingkaw nga a kheoh ca taw awm hy," tina uhy. 35 Thlang kqeng ce dek awh ngawil sak aham kqawn pehy. 36 Phaihpi khqih ingkaw nga ce lo nawh zeelnaak awi ak kqawn coengawh thek nawh a hubatkqi ce pehy. A hubatkqi ing thlang kqeng a venawh tei pek khqi uhy. 37 A mingmih ing ak phyi na ai boeih uhy. Ami ai ngenkhqi ce a hubatkqi ing ami cawi awh vawh khqih na kawi uhy. 38 Cawkaw ak aikhqi boeih taw naasenkhqi ingkaw nukhqi ak kqawn kaana thlang thawngli law uhy. 39 Thlang kqeng ce a ceh sak coengawh, lawng khuina lut nawh Magadan khaw benna ce cet hy.

16 Farasi ingkaw Sadusikhqi ce Jesu a venna law unawh, khan ben nakaw hatnaak dang sak aham noek adak uhy. 2 A mingmih a venawh, "Khawmy ben awh cingmai a thiim awhtaw khaw seen kaw ti uhyti, 3 mymcang ben awh, khawmai a sah awhtaw, "khaw am seen tikaw," ti uhyti. Nangmih ingawm khaw taw nai a nawng thai hlai uhyti, a tym hatnaak taw am nainawng thai uhyti. 4 Thlak che ingkaw samphai cadilkhqi ingtaw hatnaak sui uhy, tawngtha Jonah a hatnaak doeng am kaa taw ikaw awm peekna am awm kaw," tina hy. Cekcoengawh cekkhqi ce ak chang na cehta hy. 5 Tuili caqai benna ami hali kat awh a hubatkqi ing phaihpi ami khyn hly ce hilh valh uhy. 6 Jesu ing a mingmih a venawh, "Farasikhqi ingkaw Sadusikhqi venawh ce nami cyih ta unawh galqiing lah uh," tinak khqi hy. 7 "Phaihpi am ni taak awh va ni kaw," ti unawh a mimah ingkaw a mimah ce doet qu uhy. 8 Jesu ing cekkhqi ak awih kqawn ce zasim nawh, "Cangnaak ak zawikhqi, kawtiil phaihpi am nami taak akawng ce namik kqawn? 9 Am nami zasim hlan nawh nu? Thlang thawngnnga ing phaihpi ingkaw nga ami ai ce namim hilh hawh nawh nu? Vawh izah nami kawih ce? 10 Thlang thawngli ing phaihpi khqih a mi ai awh vawh

izah nu ami kawih bai ce? 11 Phaihpi akawng name venawh kak kqawn am ni tice ikawthi am naming zaaksim? Farasikhqi ingkaw sadusikhqi henawh ngaihthyn uh," tinak khqi hy. 12 Phaihpi awh ak awm hen akawng qalqiqing aham am kqawn nawh Farasikhqi ingkaw Sadusikhqi a cawngpyinaak awh ngaihthaak aham ni ak kqawn hy tice zasim uhy. 13 Jesu ing kaisary Philipi peng khuina a law awh a hubatkqi ce doet hy, "Thlangkhqi ing thlanghqing Capa ve u nu a mi ti? tina hy. 14 Cekkhqi ing, "Thlang vang ingtaw nang ve, Baptisma pekung Johan ni, ti uhy, thlang vang ing 'Elijah' ti uhy; thlang vang bai ingtaw, 'Jeremiah' am awhtaw tawngtha pynoet oet," tina uhy. 15 Cawh a mingmih a venawh, "Cawhtaw nangmih ingtaw kai ve u nu nami ti?" tinak khqi hy. 16 Simon Piter ing, "Nang taw Khril, ak hqing Khawsa Capa ni," tina hy. 17 Jesu ing a venawh, "Nang Jonah capa, na zoseen hy, kawtiil thlanghqing ing amni sim sak nawh khawk khan nakaw ka Pa ing ni a ni sim sak. 18 Na venawh ka nik kqawn peek, nang taw Piter ni, ve lungnu awh ka thlangboel diyh sak kawng; hell chawmkeng ing ce ce am noeng qoe tikaw. (**Hades g86**) 19 Khan ram cabi ce na venawh ni pe kawng; khawmdek awh nang ing na pinkhqi boeih ce khawk khan na awm pin na awm lawt kaw, khawmdek awh nang ing na hlam boeih ce khawk khan na awm hlam na awm lawt kaw," tina hy. 20 Amah ce Khril ni tice a u venawh awm ama mik kqawn aham a hubatkqi venawh awi pehy. 21 Amah cawkawng taw Jesu ing Jerusalem na cet kawmsaw a hqamcakhqi khawsoeih boeikhqi ingkaw anaa avi cawngpyukungkhqi ing khuihanaak a sim sak hly khqi ingkaw him na awm kawmsaw am thum nyn awh thawh tlaih na a awm hly khqi ce a hubatkqi venawh kqawn caih pek khqi hy. 22 Piter ing amah ce ak chang na cehpyi nawh kaa na hy. "Bawipa, cemih ik-oeih nang ak khan awh koeh pha qoe seh, vemyihkhqi ve nang a venawh koeh awm seh," tina hy. 23 Cehlai Jesu ing Piter ce hawi sih nawh, "Setan, ka huna thoeih lah! Nang ve kang tluuunaak ahamma awm hyk ti: Khawsa a ik-oeikhkhqi ve poek kaana thlanghqing a ik-oeikhkhqi ce poek hyk ti," tina hy. 24 Cekcoengawh Jesu ing a hubatkqi venawh, "U ingawm kai a hu awh law aham a ngaih awhtaw, amah ingkaw amah ce hoet qu seitaw, amah a thinglam ak kawh doena ka hu awh bat seh. 25 U awm a hqingnaak ce thaawng amah ak ngaih ingtaw hlawng kaw. 26 Thlang ing khawmdek pum ve ham mai seiawm a hqingnaak ce a hlawng awhtaw ikaw nu phu a tak? A hqingnaak ce ikaw ing nu ang thung thai kaw? 27 Thlanghqing Capa ing Pa a boeimangnaak ingkaw ak khan ceityikhqi mi law kaw, thlang boeih a venawh a mi them sainaak boeih ve myihna kutdo ce pek khqi boeih kaw. 28 Awitak ka nik kqawn peek khqi, thlanghqing Capa ing a qam na a law ce a huh hlan khui awhtaw, vawhkaw thlang vang ak dyikhqi ak khuiawh thihnaak amak tan hly kawi thlang awm hy," tina hy.

17 Khaw khuk nyu a awm coengawh Jesu ing Piter, Jakob ingkaw a na Johan ce khy nawh a mimah doeng tlang ak sang na ce kaai pyi hy. 2 Cawh ce a mingmih a haiawh a myi ce thawh pehy. A hei ce khawmilk amyihna vang nawh, a hi awm khawkdai amyihna baawk hy. 3 Cawh cekkhqi a haiawh Mosi ingkaw Elijah ce dang pe nawh Jesu mi ce pau uhy. 4 Cawh Piter ing Jesu a venawh, "Bawipa, vawh awm aham nep soeih hy. Na ngaih awhtaw buk pakthum heen law vang - nang aham pynoet, Mosi aham pynoet, Elijah aham pynoet seh," tina hy. 5 Awi ak kqawn huili awh, myi ak vang thlang ing a mingmih ce zawl khqi khoep nawh, myi ak khui awhkaw ahi ing, "Vetaw ka lungnaak ka Capa ni; ak khan awh zeel soeih nyng; ak awi ngai pe uh!" tiyhy. 6 A hubatkqi ing a ming zaak awh kqih soeih unawh a bukhus na koep uhy. 7 Cehlai Jesu ing law nawh cekkhqi ce bi hy, "Koeh khqih uh, tho hlak uh," tina hy. 8 A mingmih ing ami toek awhtaw, Jesu doeng am kaana taw u awm ak chang am hu uhy. 9 Tlang nakawng ami nuk kqum awh, Jesu ing cekkhqi ce

awi yn hy, "Thlanghqing Capa ve thihnaak awhkawng a thawh hlan dy taw, vawhkaw ik-oeih nami huh ve u a venawh awm koei kqawn uh," tinak khqi hy. **10** A hubatkhoi ing doet uhy, "kawtih anaa cawngpyikung khqi ing Elijah lamma na law kaw, a mi ti?" tina uhy. **11** Jesu ing cekkhqi venawh, "Elijah ve lamma na law tak kawmsaw ik-oeihkhqi boeih ce ak nep na sai tlaih kaw. **12** Cehlai ka nik kqawn peek khqi, Elijah taw law hawh hlai hy, a mingmih ing am hat uhy, ami ngaih saqui ce ak khan awh sai pe uhy, cemih lawt na thlanghqing Capa ingawm a mingmih a kut awh khuikha kaw," tina hy. **13** Baptisma ak pekung Johan akawng ni a mingmih a venawh ak kqawn peek, tice a hubatkhoi ing zasim uhy. **14** Thlang kqeng a venna a mi law awh, thlang pynoet ce a venawh law nawh ak khawkung awh khuk sym pehy. **15** "Bawipa ka capa ak khan awh qeennaak ta law cang lah, qaw nawh khuikha kawh hy. Mai awh tlu poepa hawh hy. **16** Na hubatkhoi venawh khyh hlai nyng, am qoei sak thai uhy," tina hy. **17** Cawh Jesu ing, "Aw cangnaak amak ta thlangkhqi ingkaw kawlung ak hqamkhqi, nangmih ve iqyt nu ka ni awm pyi khqi kaw? Iqyt nu ka ning yh pyi khqi kaw? Ka venna hawlaw lah uh," tinak khqi hy. **18** Jesu ing qaai ce zyi nawh, qaai ing cawhkaw naasen ce cehta hy, cawh anih ce qoei tlang hy. **19** Cekcoengawh a hubatkhoi ing aha cana Jesu a venna law unawh, "kawtih kaimih ingtaw am ka mi hqeq thai?" tina uhy. **20** Jesu ing a mingmih a venawh, "Namik cangnaak a zawi a dawngawh ni. Awtak ka nik kqawn peek khqi, antlam ak ui teh mah cangnaak nami taak mantaw, vawhkaw tlang a venawh, 'vawhkawng cena thoieih lah,' nami tinaak awh thoieih kaw. Nangmih aham amak coeng thai ikaw awm am awm kaw. **21** Cehlai vemih ve cykcahnaak ingkaw buh zeihnaak doeng am ingtaw am cet thai hy," tina hy. **22** Kalili qam na ami law awh, Jesu ing a mingmih a venawh, "Thlanghqing Capa ve thlangkhqi kut awh pe kawm usaw tu sak kawm uh. **23** Him kawm usaw, am thum nyn awh tho tlaih kaw," tina hy. Ce ak awi ce a ming zaak awh a hubatkhoi taw amik kaw map hqoeng hy. **24** Kapernaum khaw ami pha law awh mangmu ak cawikhqi ce Piter a venna law unawh, "Nangmih a cawngpyikung ing pumim tangka am cawi nawh aw?" tinawh doet uhy. **25** Anih ing, "Cawi hy," tinawh hlat hy. Imna a mi luh awh Jesu ing khai nawh, "Simon, ikawmyihna nak poek? Khawmdek sangpahrangkhqi ing u venna nu mangmu ami cawi? Ami cakhqi venna nu, tlak chang vena?" tinawh doet hy. **26** Piter ing a venawh, "Tlak chang a venawh," tina hy. Jesu ing, "Cawhtaw a cakhqi taw loet timaw ce. **27** Cehlai amik kaw a zeelnaak aham, tulii na cet nawh cikkoeih vak thla. Ngam nam tu ma ce lo nawh am kha ce phen pe, tangka hu kawp ti. Lo nawh kai ingkaw nanimah hamna cawi," tina hy.

18 Cawh a hubatkhoi ce Jesu a venna law unawh, "Khan qam awh u nu ak bau kaw?" tina uhy. **2** Jesu ing naasen ca ce lo nawh a ming lak lung awh dyih sak hy. **3** A mingmih a venawh: "Awtak ka nik kqawn peek khqi, nangmih ing namik kaw am hloet unawh naasenkhqi amiyihna am nami awm awhtaw, khan qam khuiawh ityk awh awm am lut ti kawm uk ti. **4** Cedawngawh, u awm vawhkaw naasen amiyihna thlang ak kai awh dungvoeng na ak awm taw khan qam awh ak bau soeih na awm kaw. **5** "U awm vemyih naasen ca ce kai ang ming ing ak do ak thlang taw kai anik do thlang na awm hy. **6** Cehlai u ingawm vawhkaw naasen, kai anik cangnaakkhoi ak khuiawh pynoet awm ang tluk sak awhtaw, cang neetnaak lung ak bau ce a hawng awh aawi sak nawh lidung ak khuina nik tlak man a hamna nep bet kaw. **7** "Thlang thawlhnak ak sai sak ik-oeihkhqi awh khawmdek ve khaw na bin hy! Ce mih ik-oeihkhqi ce ak law hly qoe ni, cehlai thawlhnak ak law sakkung thlang ce khaw na bin hy! **8** Na kut am awhtaw na khaw ing a ni thawl sak awhtaw tlyk boet nawh khawng. Kut

pakhih ingkaw khaw pakhih ak soep na kumqui mai khuina nang tlaak anglakawh, pum amak soep doena hqingnaak ak khuiawh na lut ce nep bet hy. (*aionios g166*) **9** Na mik ing a ni thawl sak awhtaw koeih doek nawh khawng. Mik pakhih ing hell mai khuina nang tlaak anglakawh, miklang ing hqingnaak khuina na lut ce na hamna nep bet hy. (*Geenna g1067*) **10** "Vawhkaw naasenkhqi ak khuiawh pynoet awm am nami hepnaak aham qalqiing lah uh. Ikawtih ka nik kqawn peek khqi, a mingmih ak khan ceityihkhqi ing khawk khan nakaw ka Pa a haai ce hu poepa uhy. **11** Ak qengkhqi thaawng aham ni thlanghqing Capa ve a law. **12** "Ikawmyihna namik poek? Thlang pynoet ing tuu zakhat ce ta hlai hy, pynoet ce ak chang na a ceh valh mai mantaw, sawmkow pakow tloek ce tleng na cehta nawh ak chang ak qeng tuu pynoet ce am sui hly nawh nu? **13** Tuu ce a huh tlaih awhtaw, awitak ka nik kqawn peek khqi, ak chang na amak cet valh tuu sawm kow anglakawh cawhkaw tuu ak cet valh ce ym bet hy. **14** Cemyih lawtna khawk khan awh ak awm nangmih a Pa ing vawhkaw naasenkhqi ak khuiawh pynoet ca awm qeng aham am ngaih hy. **15** "Na koeinaa ing nak khan awh, ik-oeih a sai thawl awhtaw cet nawh a thawlhnak ce na mimah anglak doeng awh kqawn pe. Nak awi ce ang ngai awhtaw anih ce na noeng na awm kaw. **16** Cehlai a mang ngai awhtaw, thlang pakhih thum a simpypinaak awh awi ce a caknaak aham, thlang pynoet mai aw am awhtaw pakhih awh ceh pyi. **17** Cekkhqi ak awi awm a mang ngai bai awhtaw thlangboel a venawh kqawn uh; thlangboel ak awi awm a mang ngai awhtaw, lawkhan am awhtaw mangmu ak cawikung na ngai law uh. **18** Awitak ka nik kqawn peek khqi, khawmdek awh nami pinkhqi boeih ce khawk khan na awm pin na awm lawt kawmsaw, khawmdek awhkaw nami hlam khqi boeih ce khawk khan na awm hlam na awm lawt kaw. **19** "Cekcoengawh nik kqawn pek khqi tlaih nyng, khawmdek awh thlang pakhih ing kawpoek pynoet na taak doena ik-oeih a ni thoeh awhtaw khawl khan nakaw ka Pa ing nangmih aham sai pekna awm kaw. **20** Thlang pakhih awm pakthum awm kang ming ing a ming cunnaak awh, a mingmih a venawh kai awm nyng," tina hy. **21** Cekcoengawh Piter ing Jesu a venna law nawh doet hy, "Bawipa, ka koeinaa ing kak khan awh ik-oeih a sai thawl awh, iqyt dy nu qeenkhaw kang ngai kaw? Ak khqih dy nu?" tina hy. **22** Jesu ing, "Ka nik kqawn peek khqi, ak khqih dy doeng amni, ak khqih a pyh khqihkip dy ti nyng," tina hy. **23** Cedawngawh khan qam taw sangpahrang pynoet ing a tyihzawikhqi venawh a tangka lai ak kqawn ing myih hy. **24** Tangka ce a soep awh tangka thonghqa ak pu peek thlang ce law pyi uhy. **25** Anih ing tangka ce ama peek thai voel hawh a dawngawh, a zuca ingkaw a toentaak khawhthemkhqi boeih ce taak nawh a laiba ce sah aham awi pehy. **26** Cawh ce cawhkaw tyihzawih thlang ing a haiawh khuk sym nawh qeennaak thoeh hy, 'Bawipa nim qeen mai cang, ni pe boeih lawt bit kawng,' tina hy. **27** A boei ing anih ce qeen nawh a laiba boeih ce zoe pe sak hy. **28** "Cehlai cawhkaw tyihzawih thlang ce cet hy, cawh tangka denari zakhat ak pu peek a pyi tyihzawih pynoet ce hu hy. Anih ce a hawng awh tu nawh khak hy, 'Tangka nak pu ce ni pe hlah,' tina hy. **29** Cawhkaw tyihzawih pyi ing a haiawh khuk sym doena qeennaak thoeh hy, 'Nim qeen cang, ni pe boeih lawt bit kawng,' tina hy. **30** Cehlai anih ing am hlah hy. A tangka pu ce a ni sam boeih hlai dy anih ce thawngim na thla hy. **31** Cawhkaw ik-oeih ce tyihzawih pyi ak changkhqi ing ami huh awh, amik kaw se hy, cet unawh cawhkaw ik-oeihkhqi boeih ce a pa a venawh kqawn pe uhy. **32** Cawh a boei ing cawhkaw tyihzawih ce a venna khy hy. Nang tyihzawih tlak che, kai a venawh qeennaak na thoeh a dawngawh kai ing na laibakhqi boeih ce ni zoe pe sak nyng. **33** Kai ing nak khan awh qeennaak ka taak lawt amiyihna nang ingawm thlang ak khan awh qeennaak na taak aham awm lawt hy,"

tina hy. 34 Cawhkaw boei ce ak kaw so nawh laiba a sam boeih hlan dy cawhkaw tyihzawih ce phep aham thawng ak thlakungkhqi kut awh pehy. 35 "Nangmih ingawm nami koeinaa khqk khan awh qeenkhaw amna ming ngai awhtaw, khawk khan nakaw Pa ing nangmih ak khan awh ce amyihna sai lawt kaw," tinak khqi hy.

19 Jesu ing vawhkaw awikhqi ak kqawn boet coengawh, Kalili qam ce cehta nawh Judah qam Jordan long caqai benna ce cet hy. 2 Thlang kgeng khawzah ing a hu awh hqut uhy, anih ing cekkhqi ce qoei sak khqi hy. 3 Amah ce noek adak ham Farasi thlang a vang ce a venna law uhy. "Thlang ing ikaw mai awh awm a zu ak thlaak aham ak thym hly nu?" tina uhy. 4 Anih ing, "Ak cyk ca awh saikung ing pa ingkaw nu ce sai nawh, 5 "Ve dawngawh pa ing a pa ingkaw a nu ce cehta nawh a zu ce tawm kaw, pakhih ce pynoet na awm hawh kawm nih," a tice am nami noet khawi nawh nu? 6 Cedawngawh cekqawi ce pakhih na am awm voel nawh, pynoet nani a awm hawh. Cedawngawh Khawsa ing pynoet na am khoep coeng hloehi taw thlanghqing ing koeh kgeng seh," tina hy. 7 A mingmih ing, "Cawhtaw kawtih Mosi ing zu thlaaknaak ca pe nawh zu ce ceh sak aham awi a peek bai hy voei?" tina uhy. 8 Cawh Jesu ing, "Na minn thin a sah soeih a dawngawh ni Mosi ing zu thlaaknaak ham anik kqawn peek khqi. 9 Ka nik kqawn peek khqi, a va ak khan awh a samphaih a dawngawh ti kaana, u ingawm a zu thla nawh nuk chang a zunaak awhtaw anih ce samphaih na awm hy," tina hy. 10 A hubatkqi ing a venawh, "Zu lawh va taak naak awh ce myihna a awm mantaw, zu ama taak aham nep bet hy," tina hy. 11 Jesu ing, "U ingawm vawhkaw awih kqawn ve am do thai ti kawm uh. 12 Thlang pynoet taw a nu ak phoen khui awhkawng tiktak cena thang nawh, thlang pynoet taw thlang ing tleb pehy; thlang a vang taw khan qam akawng awh zu amak ta thlang awm awh bai hy. Ak do thai saqui ing ve ve do seh," tinak khqi hy. 13 Naasenkhpik khan awh kut tloeng nawh cykcah peek aham, naasenkhpik ce Jesu a venna law pyi hy. Cawh a hubatkqi ing ak law pyikungkhqi ce zyi hy. 14 Jesu ing, "Naasenkhpik ce ka venawh law sak lah uh, koeh kham pe uh, kawtih khan qam taw vemyihna ak awm khqi aham nani," tina hy. 15 Cekkhqi ak khan awh kut a tloeng coengawh, cawhkawng cet phaat hy. 16 Cawh thlang pynoet Jesu a venna law nawh, "cawngpyikung, kumqui hqingnaak ka huhnaak aham ikaw ka sai kaw?" tinawh doet hy. (aiōnios g166) 17 Jesu ing, "Ikaw hamna ik-oeih leek akawng ce nani doet? Ak leek pynoet doeng ni a awm. Hqingnaak ak khuiawh lut aham na ngaih awhtaw, awipeekhhqi ce sai theoeh ti," tina hy. 18 Cawhkaw cadawng ing, "Ikawmih awipeekhhqi?" tina hy. Jesu ing, "Thlang koeh him, koeh samphaih, koeh qu, amak thym dyihting na koeh awm, 19 Na nu ingkaw na pa zoeksang lah, na imceng ce namah na lung qunaak a myihna lungna lawt lah, a tice," tina hy. 20 Cawhkaw cadawng ing, "Vekkhqi boeih taw ka naasen awhkawng sai boeih hawh nyng. Ikaw ka voet hyn bai?" tina hy. 21 Cawh Jesu ing, "Thlak soep na awm aham na ngaih awhtaw, cet nawh na khawhthem khqi boeih na zaih coengawh hahqahkhqi ce pe law, cawhtaw khawk khan awh kawn them ta kawp ti. Cekcoengawh law nawh ka hu awb bat lah," tina hy. 22 Ce ak awi ce cadawng ing ang zaak awh, khawhthem khawzah a taak dawngawh kawseet doena cen valh hy. 23 Cekcoengawh Jesu ing a hubatkqi venawh, "Awitak ka nik kqawn peek khqi, boei ing khan qam na a lutnaak aham kyi soeih hy. 24 Kqawn law tlaih bai vang, boei ing Khawsa ram khuiawh a lut anglakawh, kalauk ing kqym ak khuiawh a lut zoei bet hy," tina hy. 25 Ce ak awi ce a hubatkqi ing a mingzaak awh amik kawpoek kyi nawh, "Cawhtaw u nu thaawng na ak awm hly?" tinawh doet uhy. 26 Jesu ing a mingmih ce toek nawh, "Ve ve thlanghqing a hamna taw am coeng thai hy, Khawsa a

hamna taw ik-oeih boeih boeih ve coeng thai hy," tina hy. 27 Piter ing a venawh, "Toek lah, kaimih ingtaw ik-oeihkhqi boeih cehta u nyngsaw na hu awh bat u nyng! Cawhtaw ikaw ka mi hu kaw?" tina uhy. 28 Jesu ing a mingmih a venawh, "Awitak ka nik kqawn peek khqi, ik-oeih boeih ak thai na awm nawh, thlanghqing Capa ing a boeimang ngawihdoelh awh ang ngawih awh, nangmih awm ngawihdoelh paqua hlanih awh ngawi kawm u tiksaw, Isarel phyn paqua hlanih ce awi deng kawm uk ti. 29 U awm kai ang ming awh, a imkhqi, a koeinaakhqi, a pa, a nu a cakhqi ingkaw a lokhqi ce ak cehtaakkhqi taw alet zakhat hlei leeknaak ingkaw kumqui hqingnaak ce pang kawm uh. (aiōnios g166) 30 Cehlai ak maa ce hu kawmsaw ak hu ce maa lat kaw." tinak khqi hy.

20 Khan qam taw dum ak takung thlang pynoet ing a dum khuiawh bi ak bi aham thlang ak sui na mymcang hojt awh ak cet ing myih hy. 2 Bibikungkhqi mi hypoet kutphu denari pynoet peek aham awi ta unawh, cekkhqi ce misur dum na tyi khqi hy. 3 "Khawnoek pathum tluk awh cet nawh, ik-oeih ami zawihaak hyn awh ikaw awm amak sai thlangkhqi ce hu hy. 4 A mingmih a venawh, nangmih awm cet unawh kai a misur dum awh bibi lah uh, a ting a tawk taw ni pek khqi bit kawng, tinak khqi hy. 5 Cedawngawh a mingmih ce cet uhy." Cekcoengawh khawnoek paquk ingkaw pakow tluk awh cek tlaih bai nawh, ce amyihna tina tlaih bai hy. 6 Khawnoek paqua hlaioet tluk awh cek bai nawh, ak dyi mailai thlangkhqi ce hu bai hy. A mingmih a venawh, "kawtih ikaw awm a sai kaana vawh khawnghi zung naming dyih?" tinak khqi hy. 7 Cekkhqi ing a venawh, 'u ingawm kaimih ve amni ceei khqi nawh ni.' tina uhy. Anih ing cekkhqi venawh, 'Nangmih awm cet unawh kai a misur dum awh bibi law lah uh,' tinak khqi hy. 8 "Khaw a my awhtaw, misur dum ak takung ing, tangka ak khoemungkhqi venawh, 'A hu dyt awhkawng ak lamda dy awh bibikungkhqi ce khy nawh amik thaphu ce pe lah uh,' tinak khqi hy. 9 Khawnoek hlaioet awhkawng bi ak bkhqi ce law unawh amik thaphu denari pynoet ce hu qip uhy. 10 Lamma na bi ak bkhqi ce law unawh ak doem bet hu kawng unyng, tina poek uhy. Cehlai cekkhqi awm denari pynoet qip ni ami huh lawt hy. 11 Tangka ami hum boeih coeng awhtaw, dum ak takung ak khan awh saai bi uhy. 12 "Ahu na na law pyikhoi ing khawnoek pynoet khui doeng ni bi ami bi hy, hypoet khui khawk hlawk anglakawh bi ka mik bi kaimih mi ang amyihna na taak paqap," tina uhy. 13 Cehlai anih ing a mingmih ak khui awhkaw thlang pynoet a venawh, 'ka pyi, amak thym na mak khan awh ik-oeih am sai nyng. Denari pynoet nani avi ni taak ka ti my?' 14 Namah a bibi phu ce lo nawhtaw cet lhlh. Nang a venawh ka ni peek lawt amyihna ahu na bi ak bi thlang a venawh awm pe lawt kawng nyng. 15 Ka tangka ak khan awh ka ngaihnaak amyihna saithainaak am ka ta hly nawh nu? Kai ka khawboe a leek awh nang ing nani yt nawh nu? tina hy. 16 Cedawngawh ak hukhqi ce ma kawm usaw ak maakhqi ce hu kawm uh. Ak khy taw doem kawmsaw ak tyk taw zawi kaw," tinak khqi hy. 17 Jesu ing Jerusalem na a hang ceh awh, a hubat thlang paqua hlanih ce cehpyi nawh a mingmih a venawh, 18 "Tuh Jerusalem na ni hang cet kawm uh, thlanghqing Capa taw khawsoeih boeikhqi ingkaw anaa awi cawngpyikungkhqi venawh pe kawm uh, a mingmih ing thihi sak aham thawlak sak kawm uh, 19 qaihnaak na sai aham Gentelkhqi kut awh pe kawm uh. Am thum nyn awh tho tlaih kaw," tina hy. 20 Cawh Zebedi a cakhqi a nu ing a ca qawi ce Jesu a venna law pyi nawh, khuk sym doena ak kawngah pynoet sai sak aham qeenmaak thoeh hy. 21 Jesu ing a venawh, "Ikaw na ngaih?" tina hy. Cawhkaw nu ing, "vawhkaw ka capa qawi pakhih ve na ram khuiawh pynoet ve nak tang ben awh pynoet ce nak cawng ben awh ngawih law sak lah," tina hy. 22 Cehlai Jesu ing a venawh, "Na theoeh ve am sim hy nik ti. Kai ing

ka aawk hly kawi khuinha boet ve na nik aw hly thai lawt nu? Baptisma ka huh hly kawi ve na nik hu hly thai lawt nu?" tina hy. 23 Jesu ing cekqawi a venawh, "Kai a khuinha huhnnaak boet ve aw hly thai tang tang nih nawh Baptisma ka huh hly kawi ve awm hu thai kawm nik ti, cehlai kai ak tang ben awh ngawih sak thainaak ingkaw cawng ben awh ngawih sak thainaak taw, kai a peek kawi am ni. Ka pa ing a hoep peek ce thlangkhqi venawh pe kaw," tina hy. 24 Ce ak awi ce thlang pahqa tloek ing a ming zaak awh, cekqawi cingna ak khan awh amik kaw so hy. 25 Cehlai Jesu ing cekkhqi ce a venna khy khqi boeih nawh, "Gentelkhqi ingtaw a mimah khqik khan awh uknaak ce ta unawh, ukkungkhqi ing a mingmih ak khan awh uk thainaak ce ta uh." 26 Cehlai nangmih anglakawtaw ce myihna am awm kaw. Nangmih ak khuiawh ak bau soeih na awm ak ngaih ingtaw nangmih a bi ak bikung na awm seh, 27 u awm nangmih anglakawh lamma cyk na awm ak ngaih taw nangmih a tamnaa na awm seh; 28 Thlanghqing Capa ing thlang bibi sak aham am law nawh, thlang a bibi peek aham nani a law, thlang khawzah thaawngnaak aham a hqingnaak ak pe hamna ni a law," tinak khqi hy. 29 Jesu ingkaw a hubatkhqi ing Jeriko khaw ce ami cehtaak awh thlang kqeng ing ahu awh hqut uhy. 30 Cawh mikhyp thlang pakhii ce lam keng awh ngawi hy nih, Jesu a ceh awi ce a ning zaak awh, "Bawipa, David Capa, kainih ve nim qeen qawi lah!" tinawh khy hy nih. 31 Thlang kqeng ing cekqawi ce a ni awmnaak dym aham zyi uhy, cehlai cekqawi ing khawtew khqoet na, "Bawipa, David Capa, kainih ve nim qeen qawi lah!" tinawh khy khqoet hy nih. 32 Cawh Jesu ce dyi nawh cekqawi ce khy hy. "Ikaw sai sak aham nu nani ngaih?" tinawh doet qawi hy. 33 Cekkqawi ing, "Bawipa, mik dai aham ngaih nih nyng," tina hy nih. 34 Jesu ing cekqawi ce geen nawh cekqawi a mik ce bi pehy. Cawh cekqawi ce ani mik dai pahoei nawh ahu awh bat pahoei hy nih.

21 Jerusalem pha tawm unawh Olive tlang awhkaw Bethphage khaw ami pha awh, Jesu ing a hubat thlang pakhii ce haina tyi hy, 2 Cekkqawi a venawh, "Nani haiawh ak awm khawk khuina cet nih nawhtaw meqang ca ingkaw a nu ami king ce hu kawm nik ti. A qui ce hlam nih nawh ka venna sawi law nih. 3 U ingawm anik kaanaak qawi awhtaw, Bawipa ing ngoe hy, thak law tlaih bit kaw, tina nih," tinak qawi hy. 4 Vawhkaw ik-oelikhqi boeih taw tawngtha ing anak kqawn hyt ce a soepnaak a hamna ni: 5 "Zion canu ce kqawn pe, 'Na sangpahrang kawdaw ing meqang awh, meqang noca awh ngawi kawmsaw law kaw," a tice. 6 A hubat qawi ce cet nih nawh Jesu ing awi a peek qawi amyihna sai hy nih. 7 Cekkqawi ing meqang a nu ingkaw ak noca ce hawlaw hy nih, meqang ak khan awh hi phaih pe nih nawh, ak khan awh Jesu ce ngawih sak uhy. 8 Thlang kqeng khawzah ing hikhqi ce lam awf phaih pe uhy, thlang vang ing thingbukhqi ce chawn unawh lam awh phaih pe uhy. 9 Haina ak cetkhqi ingkaw hu nakaw ak law thlang kqeng ing, "David capa venawh Hosanna! Bawipang ming ing ak law taw a zoseen seh!" "Sawsang soeih awh Honsanna!" tinawh khy uhy. 10 Jerusalem khawk khui na Jesu a lut awh, khawk bau ce tyn nawh, "Ve ak thlang ve u nu ti?" ti uhy. 11 Thlang kqeng ing, "Ve ak thlang taw Kalili qam Nazareth khaw awhkaw tawngtha Jesu ni," tina uhy. 12 Jesu ing bawkim khuina lut nawh bawkim khuiawh ik-oelih ak zawi ingkaw ak tlhai thlangkhqi ce hqek hy. Tangka ak hlengkhqi a caboeikhqi awm khup phlet pek khqi hy. 13 A mingmih a venawh, "Ka im ve cykcahnaak im ni, ti kawm uh," tinawh a qee hyt awm hlai hy, nangmih ingtaw qukaikhqi awmnaak hyn na sai u hyt," tinak khqi hy. 14 Mikhypkhqi ingkaw khawhemkhqi ce a venawh bawkim na law unawh, anih ing cekkhqi ce qoei sak khqi hy. 15 Cehlai khawsoeih boeikhqi ingkaw anaa awi cawngpyikungkhqi ing kawpoek kyi ik-oelih a

saikhqi ingkaw naasenkhoj ing bawkim a keng awh, "David capa venawh Hosanna," tinawh amik khy ce ami huh awh amik kaw am law hy. 16 "Naasenkhoj ing amik kqawn ce nak za nu?" tinawh Jesu ce doet uhy. Jesu ing, "Oeh, 'Naasenkhoj ingkaw naasenkhoj am kha awhkawng zoeksangnaak ce ta hawh hyt,' a tice am nami noet khawi nawh nu?" tinak khqi hy. 17 A mingmih ce a cehtaak coengawh, Bethany khaw na cet nawh, cawh ce ip hy. 18 A khawngawi mymcang hqit awh khawk bau na ang hlat tlaih awh ak phoen cawi hy. 19 Lam a keng awhkaw thai thing ce hu nawh, a hang ceh awh ahah doeng kaa taw ikaw awm am hu hy. Thai thing na ce, "Koeh qah qoe voel," tina hy. Cawh thai thing ce khawng phaoei hy. (aiōn g165) 20 A hubatkhqi ing ami huh awh amik kawpoek kyi hy, "Ikawmyihna thai thing ak khawng paqap hy voei?" ti uhy. 21 Jesu ing a mingmih a venawh, "Awitak ka nik kqawn peek khqi, ypoetnaak a taak kaana cangnaak nami taak awhtaw, thai thing awhkaw sai na ak awm doeng ve am sai thai kawm uk tik saw, vawhkaw tleng a venawh awm, 'Cet nawh tuicunli na thoeih lah,' nami tinaak awhtaw thoeih kaw. 22 Namik cangnaak awhtaw cykcahnaak ing nami thoeih ce hu kawm uk ti, "tinak khqi hy. 23 Jesu ing bawkim khuina lut nawh thlang a cawngpyi huili awh, khawsoeih boeikhqi ingkaw a hqamcakhqi a venawh law unawh doet uhy, "Hanakaw saithainaakkhqi ve u ing anि peek," tina uhy. 24 Jesu ing, "Awi pynoet ni doet khqi cang vang. Nami nim hlat awhtaw, hanakaw saithainaak ing vemiyh ik-oelikhqi ka sai tice nik kqawn pek khqi kawng. 25 Johan a Baptisma ce hana kaw nu ce? Hana kawng a law, khawk khan nakaw nu am awhtaw thlang a ven awhkawng nu?" tinak khqi hy. Cawh a mimah ingkaw a mimah ce doet qu unawh, "Khawk khan benna kaw niti naak man, 'cawhtaw kawtih amna mik cangnaak,' niti nak khqi kaw. 26 Thlang a ven awhkawng ni, niti bai man thlang nik kqih koek bai, thlang kqeng ing Johan ce tawngtha ni a mi ti a dawngawh," ti uhy. 27 Cedawngawh, "Am sim nyng," tina uhy. Cawh Jesu ing, "Cawhtaw hana kaw saithainaak ing vemiyh ik-oelikhqi ka sai, tice ap kqawn hly lawt nyng," tinak khqi hy. 28 "Ikawmyihna nangmih ing namik poek? Cakpa pakhii ta ak thlang pynoet awm hy. A capa a hqam a venawh cet nawh, 'Ka capa, tuhngawi awh misur dum na cet nawh bibi lah,' tina hy. 29 Am cet tikawng," tina hlai hy ahu na ak kaw hlat nawh cet tlaih hy. 30 Cekcoengawh a pa ce a capa ak chang a venna cet bai nawh ce amyihna tina bai hy. Anih ingtaw, 'cet bit kawng,' tina hy, cehlai am cet hy. 31 "Ce pakhii ak khuiawh u ing nu a pa ak kawngaih a sai?" tinak khqi hy. Cekkhqi ing, "Lamma awhkawng," tina uhy. Jesu ing a mingmih a venawh, "Awitak ka nik kqawn peek khqi, mangmu ak cawikungkhqi ingkaw pum ak zawikhqi ing nangmih ve Khawsa qam khuina ni cehtaak khqi kaw ve. 32 Ikatwih Johan ce nangmih dyngaak lam ak huh na law hy, cehlai nangmih ing am cangna uhyt ti, mangmu ak cawikhqi ingkaw a pum ak zawikhqi ing cangna uhy. Ve ve hu lawit seiawm, am zut utik saw anih ce am cangna u hyt ti. 33 Nytahnaa awi ak chang pynoet ve ngai bai lah uh: Dum ak takung thlang pynoet awm nawh anih ing misur ce ling hy. Dum ce chung hqet nawh, misur suinaak ce co nawh a gehnaak ipsang ce sa hy. Cekoengawh loh phlo thlangkhqi ce dum awh bibi sak aham a ceei coengawh amah ce khawk hla na cet valh hy. 34 Misur qah bih tym a pha awh, misur qah ak bit aham a tyihzawih thlangkhqi ce dum qehkungkhqi venna tyi hy. 35 Dum awh bi ak bikhqi ing cawhkaw tyihzawihkhqi ce tu unawh pynoet ce vyk uhy, pynoet ce him uhy, pynoet bai ce lung ing khaawng uhy. 36 Cawh dum ak takung ing lamma awhkawng lak awh tyihzawih ak chang khawzah ce tyi bai hy, cehlai dum awhkaw bi ak bikhqi ing ak cyk awhkaw amyihna sai tlaih bai hy. 37 A hukhit nataw cekkhqi venawh amah a capa ce tyi hy. 'Ka capa taw kqijchah na bit kawm

uh,' tina poek hy. 38 Cehlai cekkhqi ing, "Vetaw qo ak pangkung ni ve. Law lah uh, him unawh a qo lawh pe usih," ti uhy. 39 Anih ce tu unawh ami him coengawh vawng ak kep na khaawng uhy. 40 Cedawngawh, misur dum ak takung ce law nawh, cawhkaw dum awh bi ak bikhqi ce ikawmyihna a sai kaw? tinak khqi hy. 41 Cekkhqi ing, "Cawhkaw thlak thawlkhqi ce ak tlo soeih na him kawmsaw, cawhkaw misur dum ce a qah tym a pha awh ak thaih ak pe hly thai kawi thlak chang a venawh ceei kaw," tina uhy. 42 Jesu ing cekkhqi venawh: "Im ak sakungkhqi ing ami qoeng lung ce, a kil awhkaw ak khoeng soeih na awm hawh hy; ve ve Bawipa ing sai nawh, ningnih amik huh awh kawpoek kyi na awm hy, 'tinawh Awihiicii awh ak awm ce am nami noet klawi nawh nu?' 43 Cedawngawh ka nik kqawn peek khqi, cemiyh lawtna nangmih a ven awhkaw Khawsa qam ve lawh na awm kawmsaw ak thaih ak qah sakkungkhqi venawh pe kaw. 44 Vawhkaw lung awh ak bahkhqi taw kqek kawm usaw, lung ing ang tluk khqi ce a dik a huina neet kaw," tinak khqi hy. 45 Khawsoih boeikhqi ingkaw Farasikhqi ing Jesu a nyighthnaak awi ce a ming zaak awh cekkhqi akawng ni ak kqawn hy tice sim uhy. 46 Anih a mim tunaak thai aham lam ce sui uhy, cehlai thlang kqeng ing anih ce tawngtha ni, a mi ti a dawngawh thlang kqeng ce kqjih uhy.

22 Jesu ing cekkhqi venawh nyighthnaak awi kqawn pek khqi thlaih hy: 2 "Khan qam taw sangpahrang pynoet ing a capa aham zulawh poeoi a sai ing myih hy. 3 Zulawh poei awh buh veel aham a tyihzawikhqi ce tyi nawh thlang khy sak hlai hy, u awm law aham am ngaih uhy: 4 Cekcoengawh ak chang tyihzawikhqi awm tyi thlai bai nawh, 'ka ceei thlangkhqi venawh, buh veel aham qoek abah oepchoeh hawh nyng. Zulawh poei buh veel aham law uh tina uh, tinak khqi hy. 5 Cehlai kawna awm am ngai pe unawh, a mimah a ngaih ngaih na cehta uhy. Pynoet ing lo na cehta nawh, pynoet ing ak chang bibinaak na cehta hy. 6 Ak chang ak awm tloek ing cawhkaw tyihzawikhqi ce tu unawh, thekhanaak ing chah phyih sak unawh him uhy. 7 Sangpahrang ing ce ce ang zaak awh ak kaw so hy. A qalkapkhqi ce tyi nawh thlang ak himkhqi ce a him sak coengawh, cekkhqi a khaw ce mai ing dawi sak hy. 8 Cekcoengawh a tyihzawikhqi venawh, zulawh poei buh taw oepchoeh na awm hawh hy, cehlai ka ceei thlangkhqi ce buh veel aham am kawih uhy. 9 Cedawngawh lamkilkhqi awh cet unawh thlang nami huh saqui ce buh veel aham ceei law uh, tina hy. 10 Cedawngawh tyihzawikhqi ce lam saqui awh cet unawh ami huh saqui thlangkhqi ce cawi uhy, thlak che awm thlak leek awm, zulawh poei buh ce ak behyp na veel uhy. 11 Cehlai sangpahrang ing khinkhqi toek aham a law awh, zulawhnaak hi amak bai thlang pynoet ce hu hy. 12 A venawh, 'ka pyi, ikawmyihna zulawhnaak hik kaana vawh na lut law?' tina hy. Cawh anih ce awi am pau que hy. 13 Sangpahrang ing a tyihzawikhqi venawh, vawhkaw thlang ve a kut a khaw pin pe unawh, kqangnaak ingkaw hatahnaak a awmnaak a leng ben khawmthannaak na ce khaawng uh, tinak khqi hy. 14 Ikawtih khawzah khy hlai hy, ak tyh taw a khoechka ni, tina hy. 15 Cawh Farasikhqi ce cet unawh anih ak awih kqawnnaak awh a thawlhmaak tu peek aham doet qu uhy. 16 A mimah a hubatkhqi ingkaw Herod a hubatkhqi ce Jesu a venna tyi uhy. Cekkhqi ing, 'Cawngpyi kung', nang taw ak thym kqawn nawh Khawsa lam ce awitak ing cawngpyi hyk ti tice sim unyng. Thlang ak kawngaih awm am qoei tiksaw, a u a haa awm am toek hyk ti. 17 Ikawmyihna nak poeknaak kqawn law lah? Kaisar a venawh mangmu peek ve ak thym nu? tina u hy. 18 Cehlai Jesu ing a mingmih ang cainaak amak leek ce sim nawh, "Nangmih thlang qaa'i kqawnkhqi", kaw hamna kai a thawlhmaak tu aham nami sui? 19 Mangmu na nami peek tangka ce nim huh lah uh.", tinak khqi hy. A mingmih ing denari pynoet ce khyn pe uhy, 20 cawh anih

ing, "U ang myihlip nu ve? U ang ming nu a mi qee ve?" tinak khqi hy. 21 Cekkhqi ing, "Kaisar," tina uhy. Cawh anih ing, "Kaisar a them ce Kaisar a venawh pe unawh, Khawsa a them ce Khawsa venawh pe uh," tinak khqi hy. 22 Ce ak awi ce a ming zaak awh, amik kawpoek kyi hy. Cedawngawh anih ce cehta unawh ak chang na cen uhy. 23 Ce nyn awh ce thlak thi thawh thlaingnaak am awm hy amik ti Sadusikhqi ce a venna law unawh awi doet uhy. 24 Cawngpyikung, thlang pynoet ing a ca ataak kaana a thih man a naa ing anih a zu ce zu na kawmsaw anih aham ca taak pekaw, tinawh Mosi ing nik kqawn pek khqi hy. 25 Kaimih anglakawh cingnahqui thlang khqih awm hy. Lamma cyk ing a zu lo moe ca taak kaana thih talyh, cedawngawh a zu ce a naa ing pang hy. 26 Cemyihna a voei hihnaak, am thumnaak ingkaw ak khqihnaak dyna awm hqui hy. 27 Ahu na taw cawhkaw nu ce awm thi lawt hy. 28 Cawhtaw thawh thlaih nyn awh cawhkaw nu ce khqih ak khuiawh a u a zu na u a awm kaw, zu na boeih u saw? tina uhy. 29 Jesu ing, "Khawsa a cak ciim ingkaw Khawsa a saithainaka am nami sim a dawngawh, nangmih ing poek thawl hawh u hyk ti. 30 Thawh thlaingnaak nyn awh chungvanaak ingkaw zulawhnaak awm am awm voel kaw; khawk khan awhkaw khan ceityikhqi amyihna va awm hawh kawm uh. 31 Thlak thikhqi thawh thlaingnaak awh, Khawsa ing nangmih a venawh ak kqawn law ce am nami noet nawh nu. 32 Kai taw Abraham Khawsa, Isaak Khawsa, Jakob Khawsa na awm nyng, a tice? Anih cetaw thlak thikhqi a Khawsa am nawh ak hqingkhqi a Khawsa ni," tinak khqi hy. 33 Thlak kqeng ing anih ak awi ce a ming zaak awh a cawngpyinaak awh amik kawpoek kyi hy. 34 Jesu ing Sadusikhqi awi am pau sak khqi qoe hy, tice Farasikhqi ing a ming zaak awh, pynoet na cun uhy. 35 A mingmih ak khuiawh anaa awi ak thoem thlang pynoet ing anih ce noek adak nawh doet hy. 36 "Cawngpyikung, anaa awi ak khuiawh ikawmyih awipeek nu ak bau soeih?" tina uhy. 37 Jesu ing, "Bawipa na Khawsa ce nak kawlung boeih, na hqingnaak boeih, na lingbyi boeih ing lungna kawp ti". 38 Ve ve awipeek lamma cyk ingkaw ak bau soeih na awm hy. 39 A pakihnaak taw vemyihna awm hy: 'Na imceng ce namah a pum amyihna lungna lawt kawp ti,' tive ni. 40 Anaa awi boeih ingkaw tawngkhakhi ak awi boeih vawhkaw awipeek pakhih awh cui boeih hawh hy," tina hy. 41 Farasikhqi ce pynoet na a ming cun awh, Jesu ing doet khqi hy. 42 "Khril akawng we ikawmyihna namik poek?" tinak khqi hy. A mingmih ing, "David capa," tina uhy. 43 Jesu ing a mingmih a venawh, "Cawhtaw ikawmyihna David ing, Myihla ak caming anih ce, "Bawipa," a ti bai hy voei? Anih ing, 44 Bawipa ing ka Bawipa a venawh: Na qaalkhqi ce ka khawk kaina ka taak hlan dy, kak tang ben awh ngawi lah, a tice. 45 David ing anih ce 'Bawipa' tinawh ak khy awhtaw, ikawmyihna anih ce a capa na a awm hly thai hy voei? tinak khqi hy. 46 U ingawm anih a doetnaak ce khang oet awm am hlat pe thai uhy, ce nyn awhkawng taw u ingawm awi am doet hqa voel hy.

23 Cekcoengawh Jesu ing thlang kqeng ingkaw a hubatkhqi venawh awi kqawn peh. 2 "Vemyihna tina hy, "Anaa awi cawngpyikungkhqi ingkaw Farasikhqi ing Mosi a ngawihdoelh awh ngawi uhy. 3 Cedawngawh a mingmih ing amik kqawn saqui ce ngai pe kawm utik saw sai pe kawm uti. Cehlai a mingmih amyihna ik-oeih koeh sai law uh, a mingmih ingtaw a mimah ing amik kqawn ce am sai uhy. 4 A mimah a phyihqih ak qih soeih ce thlang ak phleng awh tloeng pe uhy, cehlai a mimah ingtaw ami kutply kangnaa ingawm cawhkaw ik-oeihkhqi ce theohi aham am ngaih uhy. 5 Ik-oeih soekpep ami sai ce thlang a huh aham doeng ni ami sai hy: Ami talqi ingkaw ami baan awhkaw a bawm taw ak tla soeih na sai unawh ami hibai ce a vawkthawk na tlaak sak uhy; 6 poei buhkungkhqi awh thlang a zoeksang ngaih unawh Sinakawk

khqang awh ngawihnaak ak nep nep ingkaw; 7 ik-oehi zawihnaak hyn awh thlang ing kqjhchahnaak a peek khqi, 'Cawngpyikung' tinawh amik khykhqi ce lungna uh. 8 Nangmih taw Boei pynoet doeng ni nami taak hy, nangmih taw cingnahqui na awm u hyk ti, cedawngawh nangmih ce, 'Cawngpyikung' tinawh am nik kh khqi tikaw. 9 Cekcoengawh khawmdek awh 'ka pa' tinawh koeh khy law uh, kawih nangmih taw khawk khan na ak awm Pa pynoet doeng ni nami taak. 10 'Cawngpyikung' am ti kawm uk ti, cawngpyikung pynoet doeng ni nami taak, anih taw Khrih ni. 11 Nangmih ak khuiawh ak bau soeih taw nangmih a tyihzawih na awm seh. 12 U awm amah ingkaw amah ak zoeksang qu taw ak kaina thlaak na awm kawmsaw, u awm ak kaina ak awm taw zoeksang na awm kaw. 13 Nangmih qaaq kqawn Farasikhqi ingkaw anaaawi cawngpyikung khqi, khaw map uhyk ti! Nangmih ing thlang a haiawh khan qam ce khaih pe uhyk ti. Na mimah awm an kun uhyk ti. 14 Nangmih qaaq kqawn anaaawi cawngpyikungkhqi ingkaw Farasikhqi khaw map uhyk ti! Nuhai cakhqi imkhqi ce qawt pe unawh, thlang a huh awh ak dung soeih na cykcah uhyk ti. Cedawngawh nangmih ve khawzah khqoet thawl kawm uk ti. 15 Nangmih qaaq kqawn anaaawi cawngpyikungkhqi ingkaw Farasikhqi khaw map uhyk ti! Thlang pynoet qung nami huhsnaak thai aham tuicunli ingkaw khawmdekkhqi leh plep unawh cet uhyk ti, thlang ce nami huh awhtaw na mimah let hih hell aca na sai uhyk ti. (Geenna g1067) 16 Nangmih sawikung mikhyp loek, khaw map uhyk ti! U ingawm bawkim ang ming phoei nawh awi a kam awhtaw ikawna awm am coeng law hy; cehlai u ingawm bawkim awhkaw sui ang ming phoei nawh awi a kam awhtaw, ak awi ngaan hy, ti uhyk ti. 17 Nangmih mikhyp thlakhqawkhqi! Hannu ak bau khqoet: sui nu, am awhtaw sui ak ciimcaih sak bawkim nu? 18 Bawkthang ang ming phoei nawh awi a kam awhtaw kawna am coeng hy; cehlai ce bawkthang ak khan awhkaw zoepeek ik-oehi ang ming phoei ing awi a kam awhtaw, ak awi ce ngaan hy ti bai uhyk ti. 19 Nangmih mikhypkhqi! Hannu ak bau khqoet: Ak khan awhkaw zoopeek ik-oehi nu, am awhtaw ak khan awhkaw ak ciimcaih sak bawkthang ce nu? 20 Cedawngawh, u ingawm bawkthang ang ming phoei nawh awi a kam awhtaw bawkthang ingkaw ak khan awhkaw ak awm them pek ang ming phoei ing awi kam hahih hawh hy. 21 U ingawm bawkim ang ming phoei nawh awi a kam awhtaw bawkim ingkaw ak khuiawh ak awm inggawi ang ming phoei nawh awi kam hahih hawh hy. 22 U awm khan ang ming phoei nawh awi a kam awhtaw Khawsa a ngawihdoelh ingkaw ak khan awhkaw ak ngawi ang ming phoei ing awi kam hahih hawh hy. 23 Nangmih qaaq kqawnkhqi ingkaw anaaawi cawngpyikungkhqi ingkaw Farasikhqi, khaw map uhyk ti! Nangmih ing sawngsingkhqi, cynyqkhqi ingkaw paipoengkhqi dyna pahqa awh pynoet ce pe uhyk ti. Cehlai anaaawi awhkaw awihtung na ak awm - thymnaak, qeenaaak ingkaw yawpmnaakkhqi ce kawna am ngaih uhyk ti. Lamma awhkaw khqi ce dalqa naak kaana ahu awhkaw khqi ve awm nami sai aham awm hy. 24 Nangmih sawikung mikhypkhqi! Pica taw ciit hlai uhyk ti kalauk ce dahi lat hawh uhyk ti. 25 Nangmih anaaawi cawngpyikungkhqi ingkaw Farasi thlak qaaq kqawnkhqi khaw map uhyk ti! Caboei ingkaw beece ak khan ben taw sil hawh hlai uhyk ti, ak khui ben taw qaaq kqawnnaak ingkaw a pyh ngaihnaak ing be uhyk ti. 26 Farasi mikhypkhqi! Caboei ingkaw beece ak khui ben ce sil ma cang uh, cawhtaw ak khan ben ce awm ciimcaih kaw. 27 Nangmih anaaawi cawngpyikungkhqi ingkaw Farasi thlak qaaq kqawnkhqi khaw map uhyk ti! Phy, ak khan awh a baawk ing thuut nawh ak khan awh ni toek awhtaw nep soeih hlai hy, ak khui awhtaw thlak thi a quh ingkaw amak caih a soep a hoei ing ak be ing myih uhyk ti. 28 Cemyih lawtna nangmih ve ak khan ben awhtaw thlak dyng amyihna awm hlai uhyk ti, ak khui ben awhtaw qaaq

kqawnnaak, thawlhaak ing be uhyk ti. 29 Nangmih anaaawi cawngpyikungkhqi ingkaw Farasi thlak qaai kqawnkhqi khaw map uhyk ti! Tawngqa khqik phyi ce sa u tksaw thlak dyngkhqik phyi taw thawi a cam uhyk ti. 30 Nukdam pakdamkhqi khuk awh ana awm mai ning seiawm, tawngkhakhqi thisen lawng saknaak awm amnaa paa ti kawng, ti uhyk ti. 31 Tawngkhakhqi ak himlung a cadil na nami awmnaak ce na mimah ing diyh pyi nawn hawh uhyk ti. 32 Nami pakdamkhqi thawl ang lawngnaak ce be sak ngala hlah uh. 33 Nangmih khquikhqi! Kqui a cadilkhqi! Ikawmyihna hell khui awhkawng nami loet pai kaw? (Geenna g1067) 34 Cedawngawh tawngkhakhqi, thlak cyikhiq ingkaw cawngpyikungkhqi ce tylaw kawng. A vang ce him kawm u tksaw thinglam awh taai kawm uk ti. 35 Cedawngawh nangmih ak khan awh thlak dyng Abel awhkawng bawkim ingkaw bawkthang anglakawh nami him Berekiyah a capa Zekariah dyna khawmdek awh ak lawng thlak dyngkhqi boeih a thi ce nangmih ak khan awh awm kaw. 36 Awitak ka nik kqawn peek khqi, vemyihkhqi boeih ve vawhkaw cadilkhqik khan awh law kaw. 37 Aw Jerusalem, Jerusalem, nang tawngkhakhqi ak himlung ingkaw na venawh tyih na ak awmkhqi lung ing ak deepkung, aainu ing a cakhqi ang hlak khuiawh a khawl a cui amyihna, na cadil izah nu khawl a cui aham ang hlah ce, cehlai nang ingtaw am ngaih hyk ti. 38 Toek lah na im ve a hqawng nani ceitaak hyt na a awm hawh hy. 39 Ikawthi ka nik kqawn peek khqi, 'Bawipa ming ing ak law taw a zoseen hy,' tinawh nak kqawn hlan dy taw kai ve amni hu voel kawm uk ti,' tina hy.

24 Jesu ing bawkim ce cehta nawh ak chang na cet hy, cawh a hubatkhqi ing bawkim huh aham a venna law uh. 2 Cekkhqi na ce, 'Vawhkaw ik-oehikhqi boeih ve nak hu nu? Awitak ka nik kqawn peek khqi, vawhkaw lung ak phoeng qu ve pynoet awm am awm kaw, khaawbong boeh kawm uh,' tinak khqi hy. 3 Jesu ing Olive tlang awh ang ngawih awh, a hubatkhqi ce a venna law dym uh. "Vawhkaw ik-oehi ce itykh awu nu a awm kaw, nang na lawnaak ingkaw tym a dyt hatnaak ce kawmyihna a awm kaw, kqawn law lah," tinawh doet uh. (aiōn g165) 4 Jesu ing, "Thlang ing ama ni thainaak khqi aham nami cyih ta lah uh. 5 Ikawthi kai ang ming ing thlang khawzah law kawm usaw, 'Kai ni Khrih,' ti kawm uh, thlang khawzah ce thai na kawm uh. 6 Qaal tuknaak ingkaw cem a qaal awithang ce za hlai kawm uk ti koeh ly uh. Cemyih ik-oehikhqi ce ak awm hly qoe ni, cehlai a dythaak ce law hyn kaw. 7 Thlang phyn ingkaw thlang phyn tuk qu kawm usaw, qam ingkaw qam awm tuk qu kawm uh. Penglum awh khaw se kawmsaw lipi tlaii kaw. 8 Vemyihkhqi taw naa a awm hly awhkaw tlawh ak kqannaak hyn mai ni. 9 Thlangkhqi ing thekhanaak aham ingkaw thih sak aham thlang a kut awh ni pek khqi kawm uh, kai a dawngawh thlang phyn boeih ing nangmih ce ni sawh nak khqi kaw. 10 Cawh thlang khawzah ing cangnaak ce a mi ceitaak coengawh a mimah ingkaw a mimah nawn ce thak qu kawm usaw sawh qu na kawm uh, 11 tawngqa qawl khawzah awm kawmsaw thlang khawzah ce thai na kawm uh. 12 Thawlhaak a pung hqui hawh a dawngawh, lungnaak awm sit hawh kaw, 13 cehlai ang dyt dyna ak dyt phat khqi taw thaawng na awm kawm uh. 14 Ce qam awithang leek ve thlang phyn boeih a venawh simpyikung na a awmnaak thai aham, khawmdek penglum awh khypyi na awm kaw, cekcoengawh a dythaak ce law kaw. 15 Cedawngawh nangmih ing hyn caih khuiawh, Daniel ing anak kqawn amyihna - ak noetkung ing zasim seh - 'qam ak sit sak tuih ak awm ik-oehi,' ce nami huh awh, 16 Judah qam khuiawh ak awmkhqi ce tleng na cen u seh. 17 Iptih na ak awmkhqi ing ik-oehi ak lo na koeh kqum voel seh. 18 Lo na ak awm thlang ing a hi ak lo na koeh hlat qoe voel seh. 19 Cawh ak phyihsukhqi ingkaw naa ak pawm nukhqi aham ikawmyih aih nanu a kyi kaw! 20 Cawhkaw

nangmih nami cennaak hly a tym ce chicka ingkaw sabath nyn awh ama pha law naak aham cyckah uh. 21 Ikawthi khawmdek a awm cyk awhkawng amak awm man ingkaw ityk awh awm amak awm hly voel kyinaak ce am law kaw. 22 Cawkhaw khawnyn ce ama tawi sak awhtaw, u awm am syng tikaw, cehlai ak tyh thlangkhqi ak caming a khawnyn ce tawi sak kaw. 23 Cawk u ingawm, 'Vawh ni Khrir a awm,' am awhtaw 'cawk ni a awm,' ani tinaak khqi awhtaw koeh cangna uh. 24 Khrir na ak sa qukhqi ingkaw tawngtha qawl khqi awm kawmsaw, ang coeng thai mantaw ak tyh thlangkhqi za thainaak aham hathnaak ak bau soeikhqi ingkaw kawpoek kyi ik-oeikhqi ce sai kawm uh. 25 Ngai lah uh, oepchoeo cana kqawn law hawn nyng ve. 26 "Thlang ing, 'kqawng na ni, anih a awm,' ani tinaak khqi awhtaw, koeh cawn uh; cemyih am awhtaw, 'Ipkhui awh ni anih a awm,' ami ti awh awm koeh cangna uh. 27 Khawlaw benna khaw a phla awh khawng tlaak dyna ni huh amyihna thlanghqing Capa a law awh ce amyihna awm lawt kaw. 28 Sa qaawk a awmnaak hoei awh, langtahkhqi ce awm kawm uh. 29 Kyinaak khawnynkhqi ce a awm coengawh, 'khawmik ce than kawmsaw khan sai thainaakkhqi ce thloek kaw'. 30 Cawk thlanghqing Capa a hatnaak ce khawk khan awh dang kaw, khawmdek awhkaw thlang phynkhqi boeih ce khy am kqang kawm uh. Thlanghqing Capa ing boemang saithainaak ing khawk khan myi awhkawng a law ce hu kawm uh. 31 Anih ing ak khan ceityikhqi ce uut ak awi ing tyi kawmsaw, khawk khan pynoet ben a dythaak awhkawng pynoet ben dyna, ak tyh thlangkhqi ce khawmdek kili awhkawng caawi kaw. 32 Thai thing awhkawng ve ve caung lah uh: a paang awh keh nawh a hahno ak cawn awhtaw, khawhqi tym zoe hawh hy ti sim uhyk ti. 33 Cemyih lawtna, nangmih ing vawhkaw ik-oeikhqi boeih ve nami huh awh, anih taw zoe hawh hy, chawmkeng awh dyi hawh hy, tice sim uh. 34 Awitak ka nik kqawn peek khqi, vawhkaw ik-oeikhqi a awm hlan dy taw ve a khuk awhkaw thlangkhqi ve am khum kawm uh. 35 Khawk khan ingkaw khawmdek taw khum hlai voei, kak awi taw am khum qoe qoe tikaw. 36 Cawkhaw khawnyn ingkaw a tym ce u ingawm am sim hy, khawk khan nakaw khan ceityikhqi ingawm, Capa ingawm am sim hy, Pa doeng ing ni a sim. 37 Noah a khuk awhkaw amyihna, thlanghqing Capa a law awh awm lawt kaw. 38 Tuiliu a law hlanawh thlangkhqi ing ai unawh awh, chungva qu unawh zulawh poeikhqi sai uhy, Noah ing lawng khuina a lut dy ce amyihna awm uhy; 39 tuiliu a law hlan dy awhtaw ikaw ak law kaw, tice am sim uhy, cawk tuiliu ing a mingmih ce khyn khqi boeih hy. 40 Thlang pakhih lo awh awm kawm nih; pynoet ce lo kawmsaw pynoet ce cehta kaw. 41 Nu pakhih sum deeng kawn nih; pynoet ce lo kawmsaw pynoet ce cehta kaw. 42 Cedawngawh ityk awh na Bawipa a law kaw tice am nami sim a dawngawh qalqiing ing awm lah uh. 43 Cehlai ve ve sim lah uh: ip takung ing ityk awh quk-ai a law kaw tice a sim oet oet mantaw, ak nеп na ana qeh kawmsaw a im ce am muk sak kaw. 44 Cedawngawh nangmih awm qalqiing na awm lah uh, nangmih ing am namik poek tym awh thlanghqing Capa ce law kaw. 45 Cawhtaw tyihzawih ypawm thlak cyi, a boeipa ing a ipkhui awhkaw a tyihzawihkhqi boeih ak khan awh ukkung na ta nawh a tym a khoek awh a mingmih buh a an peek aham a taak thlang ce u hy voei nu ce? 46 Cemyihna ik-oeikh ak sai, boeipa ing ang voei awh a huh tyihzawih cetaw a zoseen kaw. 47 Awitak ka nik kqawn peek khqi, a khawhthem ik-oeikhqi boeih ak khan awh anih ce ukkung na ta kaw. 48 Cehlai cawkhaw tyihzawih ce thlak che na awm nawh, 'Ka boeipa taw ak hla nani a awm,' 49 tinawh tyihzawih ak changkhqi ce a vyk coengawh zukhqui thlangkhqi mi zu ce aw mai lah seh. 50 A boeipa ce amak poek a khawnyn ingkaw ama sim a tym awh ce law plak kaw. 51 A boeipa ing anih ce chawm kawmsaw thlang

qaai kqawnkhqi a huh hly kawi ce huh sak lawt kaw, ce a hyn awh kqangnaak ingkaw haatahnaak ce awm kaw.

25 Cawk khan qam taw nulak cym thlang pahqa ing Zuk lokung do aham mai-im pawm unawh ak cethkhqi ing myih qu kaw. 2 Cekkhqi ak khuiawh pumha tloek taw qaw unawh pumha tloek taw cyi uhy. 3 Ak qaw tloek ingtaw mai-im ce khyn lawt hlai uhy maitui am khyn uhy. 4 Cehlai ak cyi tloek ingtaw maitui ingkaw a uum ce mai-im inqgawi khyn qen uhy. 5 Zuk lokung ama law hqet a dawngawh, a mingmih boeih ce ami mik ku nawh ip uhy. 6 Thanlung law awhtaw, Zuk lokung law hawh hy! Ak do na cet hlai uh! tinawh khy na awm hy. 7 Cawk nulak cyikhqi boeih ce tho unawh mai-im ce dawi uhy. 8 Nulak qaw tloek ing ak cyikhqi venna, maitui ni pe thoem lah uh, mai-im thi hawh kaw ve, tinak khqi uhy. 9 Ak cyi tloek ing, 'Amni, nangmih ingkaw kaimih aham am khoek tikaw. Maitui ak zawikhqi venna cet unawh nami ham thlai cang uh,' tina uhy. 10 Cehlai maitui ak thlai na ami ceh tloek awh, Zuk lokung ce law hy. Oepchoeh na ak awm nulak cyikhqi taw zulawh poeikhui zuk lokung mi lut haih uhy. Cekcoengawh chawh ce khaai uhy. 11 Ahu na ak changkhqi ce law lawt uhy, 'Bawipa! Bawipa! kaimih chawh nim awng khqi lahi tina uhy. 12 Cehlai anih ing, 'Awitak ka nik kqawn peek khqi, amni sim khqi nyng,' tinak khqi hy. 13 Cedawngawh khawngih ingkaw a tym ce am nami sim a dawngawh qalqiing na awm lah uh. 14 Cek coeng bai awh khan qam taw thlang pynoet ing qam ak hla soeih na cet nawh, a tyihzawihkhqi ce ak khy coengawh cekkhqi venawh khawhthem a khoem sak ing myih hy. 15 A mimah a saithainaak qip amyihna, thlang pynoet a venawh tangka talen pumha pehy, thlang pynoet a venawh tangka talen pakhih pe nawh ak chang pynoet a venawh talen pynoet pehy, cekcoengawh khawlawng na cet hy. 16 Tangka talen pumha ak hu ing cet nawh cawkhaw tangka ing bi a binaak coengawh a meek pumha huh sih hy. 17 Cemyih lawtna, tangka talen pakhih ak hu ingawm a meek pakhih huh sih bai hy. 18 Cehlai tangka talen pynoet ak hu thlang ingtaw cet nawh, dek co nawh a boeipa a tangka ce thuh hy. 19 Khawnghi khawqyt a di coeng awhtaw a mingmih a boeipa ce law nawh a tangka kawng ce kqawn hy. 20 Cawk tangka talen pumha ak lo ing a meek pumha ce hawlaw nawh law hy. 'Bawipa talen pumha ni khoem sak hyk ti, toek lah a meek pumha huh sih nyng ve,' tina hy. 21 A boeipa ing, nep hy, tyihzawih leek ingkaw ypawm! Ik-oeikh a khoehca awh ypawm na na awm a dawngawh, ik-oeikh khawzah ak khan awh ukkung na ni ta kawng. Na boeipa zeelnaak ak khuiawh kan lah! tina hy. 22 Cekcoengawh tangka talen pakhih ak hu ce awm law nawh, 'Bawipa tangka talen pakhih ni khoem sak hyk ti; toek lah, a meek pakhih huh sih nyng ve!' tina hy. 23 Bawipa ing, nep hy, tyihzawih leek ingkaw ypawm! Ik-oeikh a khoehca awh ypawm na na awm a dawngawh, ik-oeikh khawzah ak khan awh ukkung na ni ta kawng. Na boeipa zeelnaak ak khuiawh kan lah! tina hy. 24 Cekcoengawh tangka talen pynoet doeng ak hu thlang ce law hy. 'Bawipa, nang taw thlak cyp na awm hyk ti, am na sawnaak awh awm aat tiksaw, camci am nak thehnaak awh awm cawi hyk ti. 25 Ka nik kqjih dawngawh cet nyng saw nang a tangka ce dek khuiawh thuhy nyng. Toek lah, na koe ve, tina hy. 26 A boeipa ing, 'Nang thlak che tyihzawih thakdam! Kai ing am ka sawnaak awh aat nawh am kak thehnaak awh ka cawi ce sim zawk hyk ti my?' 27 Cawk man tangka ak thungkhqi kut awh ka tangka ce ta tiksaw ka law tlaih awh ka tangka ce a ca inqgawi ka huhnaak voei. 28 A ven awhkaw talen ce lawh pe unawh talen paheq a ta a venawh pe uh. 29 Ikawthi ak ta thlang a venawh sap pek khqoet kawmsaw khawzah ta kaw. Amak ta thlang cetaw, a taak ang cang awm lawh pe kaw. 30 Kawna awm amak nyt tyihzawih thlang ce a leng ben thannaak na khawng uh, cawk ce kqangnaak ingkaw

hatahnaak awm kaw, tina hy. 31 "Thlanghqing Capa ing amah a boemangnaak ingkaw khan ceityikhqi boeih mi a law awh, khan boemangnaak ngawihdoelh awh ngawi kaw. 32 Thlang phynkhqi boeih a haaiawh cun kawm usaw, tuukhaikung ing mee ak khui awhkawng tuukhqi a hoep amyihna anih ing thlangkhqi ce pek a qee kaw. 33 Tuukhqi ce ak tang benawh ta kawmsaw meekhqi ce ak cawng benawh ta kaw. 34 Cekoengawh sangpahrang ing ak tang ben awhkaw thlangkhqi venawh, 'Law lah uh, nangmih ka Pa ing zoseennaak a peek thlangkhqi, khawmdek a syn cyk awhkawng nangmih aham a sai cee qam ce pang lah uh. 35 Kak phoen a cawih awh buh ni pe hyk ti, tui ka ngaih awh tui ni pe hyk ti, khin na ka awm awh ni pah sak hyk ti, 36 hi ka ngaih awh hi ni bai sak hyk ti, ka tlawh awh ni hqip ni toek hyk ti, thawngim kang tlaak awh ni hqip hyk ti, tina kaw. 37 Cawh thlak dyng ing a venawh, Bawipa, ityk awh nak phoen a cawih awh buh ka mi ni peek? Tui na ngaih awh tui ka mi ni peek? 38 Ityk awh khin na awm nawh ka mi ni pah sak? Hik kaana na awm awh hi ka mi ni peek? 39 Ityk awh na tlawn awh ka mi ni hqip? ti kawm uh. 40 Cawh sangpahrang ing a mingmih a venawh, 'Awitak ka nik kqawn peek khqi, vawhkaw koeinaaak zawi khytkhqi ak khuiawh pynoet a venawh ik-oeih nami saikhqi boeih ce kai a venawh nami sai hawh ni,' tinak khqi hy. 41 Cekoengawh ak cawng benawh ak awmkhqi venawh, nangmih khawssi ak hawikhqi ka ven awhkawng cet uh, qaii ingkaw a khan ceityikhqi aham a sai peek hyt kumqui mai khuiina cet uh. (aiōnios g166) 42 Ikawtih kak phoen a cawih awbuh amni pe uhk ti, tui ka ngaih awh tui amni pe uhk ti, 43 khin na ka awm awh am ni pah sak uhk ti, hi ka ngaih awh hi amni pe uhk ti, tlo nawh thawngim kang tlaak awh am ni hqip uhk ti, tinak khqi kaw. 44 Cawh cekkhqi ing, 'Bawipa, ityk awh nang nak phoen a cawih, tui na ngaih, khin na na awm, hi kaana na awm, na tlawn, thawngim tla nawh am ka mi bawm thai? tina kawm uh. 45 Cawh anih ing, 'Awitak ka nik kqawn peek khqi, vawhkaw ak zawi khyt koeinakhqi aham am na sai ce kai aham am na sai hawh ni,' tinak khqi kaw. 46 Cek coeng awhtaw a mingmih ce kumqui khuikhanaak a hyn na cet kawm usaw, thlak dyngkhqi taw kumqui hqjinggaak ak khuiina cet kawm uh," tina hy. (aiōnios g166)

26 Jesu ing ve ak awikhqi ak kqawn coengawh, a hubatkhqi venawh, 2 "Nami sim a myihna, Loentaak poei taw khaw hih voei doeng ni a ngaih hawh hy. Cawh thlanghqing Capa taw thinglam awh taai aham thlang a kut awh pe kawm uh," tinak khqi hy. 3 Cawh khawsoeih boeikhqi ingkaw a hqamcakhqi ce khawsoeih boei soeih Kaiapha a iwh awh cun uhy. 4 Jesu ce zoek nawh am tu coengawh him aham kqawn uhy. 5 Cehlai poei khui awhtaw koeh sai usih, thlang kqeng anglakawh awipungnaak awm hau kaw, ti uhy. 6 Jesu taw Bethany khaw awhkaw mynqai ak neh Simon a im na a awm awh, 7 a venawh nu pynoet ing alabaster um awbawktui a phu ak tlo soeih ce hawlaw nawh, caboei awbuh a veel huili awbuh syna hy. 8 A hubatkhqi ing a mi huh awh, amik kaw so hy. Ikaw hamna vemiyihna ak plak? 9 A phu khawzah na zawi nawh tangka ce hahqahkhqi pe thaw voei, ti uhy. 10 Jesu ing ce amyihna a mi ti ce a sim awh, 'Ikaw hamna vawhkaw nu ve nami lawl plak? Anih ing them ak leek soeih ce kak khan awh sai hawh hy. 11 Hahqahkhqi taw nangmih a venawh awm quiqah kawm uh, cehlai kai taw nangmih a venawh am awm phat tikawng. 12 Vawhkaw nu ing bawktui ing ka pum a ni sypnaak vetaw ka qawk vyinaak aham a sai hawh ni. 13 Awitak ka nik kqawn peek khqi, khawmdek pum awh vawhkaw awithang leek amik kqawnnaak hoi awh, anih ing kak khan awh a sai law ve amah simpoenaak aham kqawn kawm uh," tina hy. 14 Cawh a hubat thlanghqa hlanih ak khui awhkaw thlang pynoet - Judah Iskariot ing, khawsoeih boei soeih a venna cet nawh 15 doet hy, nangmih a kut awh anih ce ka ni peek khqi awhtaw ikaw nami ni

peak kaw? tina hy. Cekkhqi ing tangka sawmthum peak aham awi ta uhy. 16 Cekoengawh Juda ing anih ce am tunaak thai aham a tym leek ce sui hy. 17 Hen amak pa phaihipi poei a hyp oet naak nyn awh, a hubatkhqi ce Jesu a venna law unawh doet uhy, "Loentaak poei buh ainaak aham han awh nu sai sak aham na ngaih?" tina hy. 18 Anih ing, "Khawk bau khui awhkaw thlang pynoet a venawh cet nawh cawngpyikung ing: ka tym taw zoeca hawh hy. Ka hubatkhqi mi loentaak poei buh na im na veel kawng u nying, tihy tina," tina hy. 19 Cedawngawh Jesu ing ak kqawn peek amyihna a hubatkhqi ing loentaak poei ce sai pe uhy. 20 Khaw a my law awhtaw, a hubat thlanghqa hlanih thloek mi buh veel uhy. 21 Buh a mi ai huili awh, a mingmih a venawh, "Awitak ka nik kqawn peek khqi, nangmih ak khui awhkaw thlang pynoet ing kai ve thlang a kut awh ni thak kaw," tinak khqi hy. 22 Cawh a mingmih ce amik kaw se nawh a venawh, "Bawipa, kai aw?" tina hy. 23 Jesu ing, "Kai ingqawi beeii ak zoep haing ing kai ve thlang nim tu sak kaw. 24 Thlanghqing Capa taw amah akawng qee hyt na a awm hawh amyihna cet kaw. Cehlai thlanghqing Capa thlang a kut awh ak thakkung ce khaw na map hy! Anih ce ama thang mantaw nep bet hlai voei," tina hy. 25 Cawh amah ce thlang a kut awh ak pe hly Juda ing, "Kai aw cawngpyikung?" tina hy. Jesu ing "Oeih, nang hawh ni," tina hy. 26 Buh ami vel huili awh, Jesu ing phaihipi lo nawh, zeelawi ak kqawn coengawh thek hy, a hubatkhqi venawh pe nawh, "Lo unawh, ai lah uh, ve ve ka sa ni," tinak khqi hy. 27 Cekoengawh boet awm lo bai nawh, zeelawi ak kqawn coengawh a mingmih a venawh pehy, "Aw boeih lah uh; 28 Vetaw awikamnaak ka thi, thlang khawzah a thawlh qeenkhaw ngainaak aham ka hawk ni. 29 Ka nik kqawn peek khqi, ce nyn awh ka Pa qam awh ak thai na nangmih mi amni aawk hlan dy taw vawhkaw misur tui ve tuh awhkawng am aw voel tikawng nying," tinak khqi hy. 30 Laa pynoet ami sak coengawh, Olive tlang na cet uhy. 31 Cawh Jesu ing a mingmih a venawh, "Tawh than awh kai ak camawh nangmih boeih tlu kawm uk ti, "Tuukhaikung ve vyl kawng nyngsaw, tuukhqi boeih a mi ngaih ngaih naak na kqeng kang kawm uh," tinawh a qee hyt hawh a myihna. 32 Cehlai ka thawh tlaih coengawh, nangmih a haaiawh Kalili na ana cet kawng," tinak khqi hy. 33 Piter ing, "Nang ak camawh ak changkhqi boeih tlu u seiawm kai ingtaw am ning tluk taak qoe qoe kawng nying," tina hy. 34 Jesu ing, "Awitak ka nik kqawn peek khqi, tawh than qoe awh, ai ang khawng hlanawh thum voei nik khawng kawp ti," tina hy. 35 Cehlai Piter ing, "Na thihnaak awh thih aham awm mai nyn seiawm, ityk awh awm am nik khawng qoe qoe tikawng," tina hy. A hubatkhqi boeih ingawm ce amyihna ti lawt uhy. 36 Cekoengawh Jesu taw Gethsemane a mi ti hyt na a hubatkhqi mi cet uhy; a hubatkhqi venawh, "Cena cykcah aham cet hy nying, vawh a nang ngawi uh," tinak khqi hy. 37 Piter ingkaw Zebedii a caqawi ce ceh pyi hy, ak kaw se nawh ang ngaih kyi soeih hy. 38 A mingmih a venawh, "Thihnaak khawzah kawseetraak ing ka hqjinggaak ni vui malh hawh hy. Vawh awm unawh ni qeh pyi lawt lah uh," tinak khqi hy. 39 A hlanaak benna va cet nawh dek awh a koep coengawh cykcah hy, "Ka Pa, ang coeng thai awhtaw, vawhkaw boet ing ni qei seh nying; cehlai kai ak kawngaih na koeh awm seitaw nang ak kawngaih myihna awm seh nying," tina hy. 40 A hubatkhqi venna a law awh a mingmih ce ip boeh boeh uhy. Piter a venawh, "Khawnoek pakhat khui kangna awm am nam qeh pyi thai nawh nu?" 41 Syknaak ak khuiawh am naming tluknaak thai aham geh unawh qalqiling doena cykcah lah uh. Myihla ingtaw ngaih hlai hy, pumsa ingtaw zai hqoeng hy," tinak khqi hy. 42 Ahii voeinaak cet nawh cykcah bai hy, "Ka Pa, vawhkaw boet ing a ni qei ham am coeng thai voel nawh aawk aham a awm vik awhtaw namah ak cam seh," tina hy. 43 A law tlaih bai awhtaw, a mingmih ce mikku ing a noeng khqi a dawngawh ana ip tlaih bai

uh. 44 Cedawngawh a mingmih ce cehta nawh a thum voيناak na ak cykcah khawi amyihna cykcah bai hy. 45 Cekcoengawh a hubatkqi venna law nawh a mingmih a venawh, "Ip unawh dym bak bak uhyk ti my? Toek lah uh, a tym khoek hawh hy, thlanghjing Capa taw tu sak aham thlak thawlkhqi kut pe hawh uhy," tinak khqi hy. 46 "Tho uh, cet hlah usih! Kai thlang anik tu sakkung taw vawh awm hawh hy ve!" tinak khqi hy. 47 Awi ak kqawn hui awh, thlanghqa hlaihak khui awhkaw thlang pynoet, Juda ce pha law hy. Khawsoih boeikhqi ingkaw a hqamcakhqi ven awhkaw tangboek cimca ingkaw thingboeng amik pawm thlang kqeng ce law pyi hy. 48 Thlang a kut awh ak thakkung ing huhsimnaak ce sai pe hy: "Kai ing ka mawk thlang cetaw anih hawh ni, anih ce tu uh," tinak khqi hy. 49 Jesu a venna cet pahoei nawh, Juda ing, "Cawngpyikung na sa dip seh!" a tinaak coengawh mawk hy. 50 Jesu ing, "Ka pyi, nani law sihnaak ce sai," tina hy. Cawh thlanghqi ce haina theiohun unawh, Jesu ce tu uhy. 51 Cawh Jesu ing anik awm hah thlang pynoet ing ab cimca ce phlawng nawh, khawsoeh boei a tyihzawih ang haa ce zek pe hlak hy. 52 Jesu ing a venawh, "Nak cimca ce sapangkawp awh chan tlaih lah, u awm cimca ak phlawng taw cimca ing thi lawt kaw. 53 Khan ceityh qalkap bu pahqa hlaihak ce tuh qoe awh tyih law aham, ka Pa a venawh am thoeh thai tikaw, tinawh namik poek nawh nu? 54 Ce myihna a awm mantaw ikawmyihna Bible awi ing ak kqawn hyt ce a soepnaak kaw? tinak khqi hy. 55 Cawh Jesu ing thlang kqeng a venawh, "Nangmih ing kai ve quk-ai a myihna, cimca ingkaw thingboeng ing kai tu aham nami law nawh nu? Myngawi tempul khuiawh thlang cawngpyi nyng, cawh am nim tu uhyk ti. 56 Cehlai tawngkhaki ak caege a soepnaak aham ve ik-oeih ve a awm aham awm hy," tinak khqi hy. Cawh a hubatkqi boeih ing amah ce ta hyt unawh cen ta uhy. 57 Amah ak tukhqi ing Jesu ce anaa awi cawngpyikungkhqi ingkaw a hqamcakhqi ang cunnaak, khawsoeh boei soeih Kaiapha im na khyn uhy. 58 Cawh Piter ing khawsoeh boei soeih a im dyna ak hla nakawng a huu awh qym hy. Ikawmyihna nu a mi sai law kaw tice sim a ngaih a dawngawh ak khuiina ce lut nawh cawhkaw im ak qehkungkhqi venna ngawi lawt hy. 59 Khawsoih boeikhqi ingkaw Sanhedenhkhqi ing Jesu a thawlhaak ce tu pe nawh thihs thainaa aham awi ce deng uhy. 60 Amak thym thawlth puknaakkhqi ce khawzah awm hlai hy, a thawlth ce am tu pe thai uhy. 61 A hukhit na taw thlang pakhih ce haina law nih nawh ve ak thlang ing, "Kai ing Khawsa a tempul ce hqe nyngsaw khaw thum voei khuiawh sa tlaih kawng nyng tinawh kqawn hy," tina hy nih. 62 Cawh khawsoeh boei soeih ce hang dyi nawh Jesu a venawh, "Am nam hlat hly nawh nu? Vekkqawi ing nang thawlth anik puk ve ikawmyihna a awm?", tina hy. 63 Cehlai Jesu ing awmtaak dik dik hy. Khawsoih boei soeih ing, "Ak hqing Khawsa ming phoei doena ni doet nyng: Nang ve Khrin, Khawsa Capa tan nu?" tina hy. 64 Jesu ing, "Oeih, nak kqawn a myihna awm nyng, Nangmih boeih a venawh kqawn law nyng: Tuhkawng awh thlanghjing Capa ing boeimang soeih ak tang benawh ngawi kawmsaw khan myi awhkawng a law ce hu bit kawp ti," tina hy. 65 Cawh khawsoeh boei soeih ing a hibai ce theek nawh, "Khawsa the a kha na hawh saw kaw ve! Kaw hamna simpyikung ni ngoe hly bai? Khawsa a thekhanaak awi ning za hawh saw kaw. 66 Ikawmyihna na mik poek? tinak khqi hy. Cawh a mingmih ing, "A thihs aham awm hy," tina uhy. 67 A haiawh sawh unawh kuthlym ing thawng uhy. Thlang vang ing bei uhy. 68 "U nu anik bei, nang Khrin, kqawn lah?" tina uhy. 69 Piter ing kawngma awh ang ngawih awh tyihzawih nuca ce law nawh a venawh, "Nang awm Kalili thlang Jesu a venawh nak awm lawt ni," tina hy. 70 Cehlai Piter ing cekkhqi boeih a haiawh oelh hy. "Nak kqawn ce am sim nyng," tina hy. 71 Vawng chawmkeng benna a ceh awh nu pynoet ing hu bai nawh, cawhkaw ak awmkhqi venawh, Ve ak

thlang ve Nazareth Jesu ingqawi awm hah lawt hy nih," tina bai hy. 72 Cawh seet awi lawh doena: "Ve ak thlang ve am sim nyng," tinak khqi bai hy. 73 Cawh a koeoh a awm coengawh a keng awhkaw ak dyikhqi ing, Piter a venna, "Nang awm amingmihkhqi lakawhkhaw thlang lawt ni, nak awi pau awh sim hqa hawh hy," tina uhy. 74 Anih ing, "Ce ak thlang am sim nyng." tinawh seet awi am saa awhkawng ai khawng pahoei hy. 75 Cawh, Piter ing Jesu ak awikqawn, "Ai ang khawng hlanawh nang ing thum voei nik khawng kawp ti," a ti ak awi ce sim law hy. Cekcoengawh a lengna cet nawh kqang hlawp hlawp hy.

27 A khawngawi mymcang hqijt awh, khawsoeh boeikhqi boeih ingkaw a hqamcakhqi boeih ce law unawh Jesu ce him aham awi kqawn uhy. 2 Jesu ce ami pin coengawh sawi unawh, qam ukkung boei Pilat a venna khyn uhy. 3 Amah thlang a kut awh ak thakkung, Juda ing Jesu a mi thawlth sak ce a huh awh, zut nawh tangka sawmthum ce khawsoeh boeikhqi ingkaw a hqamcakhqi venawh bal tlaih hy. 4 "Thawlth soeih hawh nyng, thawlhaak amak ta a thi ce kai ing thlang a kut awh pe hau hawh nyng," tinak khqi hy. Cekkhqi ing, "Kaimih ingtaw kaw ka mi tinaak hly nu? Namah ak cam hawh ni," tina uhy. 5 Cedawngawh Juda ing tangka ce bawkim ak khuiina khawng nawh cehta hy. Cekcoengawh cet nawh kaiawh hy. 6 Khawsoih boeikhqi ing tangka ce lo unawh, "Ve a tangka taw thi phu na a awm a dawngawh, tangka bawm khuiawh chan aham am caih hy," tina hy. 7 Cedawngawh cawhkaw tangka ing khin ak thikhqi pupnaak aham am ak sepkung a lo ce tlaih na uhy. 8 Cedawngawh cawhkaw lo ce tuh dyna "Thi hyn" ti uhy. 9 Cedawngawh tawngtha Jeremiah ing anak kqawn ce soep hawh hy: "Isarel thlanghqi ing anih a phu ak ting na amik poek tangka sawmthum ce lo unawh, 10 Bawipa ing awi a ni peeknaak amiyihna, a mingmih ing am ak sepkung a lo ce amik tlhaihnaak aham haw na uhy," a ti ce. 11 Qam ukkung boei a haaina Jesu ang dyih awh, qam ukkung ing doet hy, "Nang ve Judahqi a sangpahrang aw?" tina hy. Jesu ing, "Nak kqawn amiyihna awm nyng," tina hy. 12 Khawsoih boeikhqi ingkaw a hqamcakhqi ing thawlth amik puk awh, awi khangoet awm am hlat hy. 13 Cawh Pilat ing a venawh, "Nangawh thawlth ami nik puk am nang za nawh aw? tina hy. 14 Cehlai anih ing awi khangoet awm am hlat goe qoe hy, cedawngawh qam ukkung taw ak kawpoek kyi hy. 15 Poi awh thlang kqeng ing ak tyh thawk tla thlang pynoet ce qam ukkung ing a lhah peek khawi na awm hy. 16 Cawh ang ming ak thang thawk tla thlang pynoet, Barabbas a mi tice thawngim khuiawh awm hy. 17 Thlang kqeng kutoet na aming cun awh, "U nu lhah sak aham nami ni ngaih: Barabbas nu, am awhtaw Khrin a mi ti Jesu ve nu?" tinawh Pilat ing doet khqi hy. 18 Jesu ce ami yt a dawngawh ni a venna ami law pyi, tice a sim a dawngawh. 19 Pilat ce awidengnaak ngawihdoelh awh ang ngawih awh a zu ing vawhkaw awi ve a venawh pat pehy: "Cawhkaw thawlhaak amak ta thlang ce kaw awm koeh ti law na, anih a dawngawh cimthan kang mang awh khuikhak nyng," tinawh awi cah hy. 20 Cehlai khawsoeh boeikhqi ingkaw a hqamcakhqi ing, Barabbas ce lhah nawh Jesu ce him sak aham thlang kqeng ce zoek khqi uhy. 21 Ram ukkung boei ing, "Thlang pakhih ak khuiawh u nu ka ni lhah peek khqi kaw tinawh doet hy. A mingmih ing, "Barabbas," tina uhy. 22 "Cawhtaw Khrin a mi ti Jesu vetaw ikawmyihna ka tinaak kaw?" tinawh Pilat ing doet khqi hy. Cekkhqi boeih ing, "Thinglam awh taai!" tina uhy. 23 Pilat ing, "Kawtinawh nu? Ikaw thawlhaak a sai a dawngawh nu?" tinawh doet khqi hy. Cehlai cekkhqi ing khawteh khqoet na, "Thinglam awh taai! Thinglam awh taai!" tinawh khy khqoet khqoet uhy. 24 Kawmyihna awm saithainaak am awm voel hawh nawh, thlang kqeng ing saai hlyk khqoet khqoet uhy, tice Pilat ing a huh awh, tui lo nawh thlang kqeng a haaiawh a kut ce sil hy. "Ve thlak dyng a thi awhkawng kai taw caih nyng. Na mimah

a hut hawh ni, nami ngaihnaa a myihna sai uh," tinak khqi hy. 25 Cawkaw amik awm thlangkhqi boeih ing, "Anih a thi ce ka mimah ingkaw ka mi cakhqi ing hawi mai bit kawng unyng," tina uhy. 26 Cedawngawh Barabbas ce tlaih pek khqi hy. Cehlai Jesu taw a vyk coengawh, thinglam awh taai aham a mingmih a kut awh pehy. 27 Cekcoengawh qam ukkungkhqi a qalkapkhqi ing Jesu boeih a ipkhuina khyn uhy, cawk qalkapkhqi boeih boeih ce anih a venawh cun uhy. 28 Ahi ce suh pe unawh hik thim ce bai sak uhy, 29 hleng ing ami tah lumyk ce a lu awh myk sak uhy. Sawmghqawl ce ak tang benawh amik pawm sak coengawh a haaiawh khuk sym pe unawh thekha na uhy. "Juda sangpahrang na hqinglung kyi seh!" tina uhy. 30 Cimtui ing sawh, a sawmghqawl ce lawh pe unawh a lu awh vyk uhy. 31 A mi thekhanaa coengawh, hi ce suh pe tlaih bai unawh amah a hi ce bai sak tlaih bai uhy. Cekcoengawh thinglam awh taai aham cephyi uhy. 32 A mi ceh awh, Cyqene khaw awhkaw Simon ak mingnaak tlhang pynoet ce hu unawh, thinglam ce anaa na kawh sak uhy. 33 Golgotha a mi ti hyn ce pha uhy (luqawng hyn tinaak ni). 34 Misur tui ak thui ce ik-oeih ak kha ing kqit unawh aawk sak uhy; am tan coengawh aawk aham tha na hy. 35 Thinglam awh ami taai coengawh a hi ce taicung zyk unawh tei uhy. Cetaw "Ka hi ce taicung zyk unawh qek kawn uh," tinawh tawngtha ing anak kqawn hyt awi ce a soepnaa aham ni. 36 Ngawi unawh anih ce qeh uhy. 37 A luk khan awh: VE TAW JUDA SANGPAHRANG JESU NI, tinawh thawlh amik pukenkaa ca ce qee unawh taai pe uhy. 38 Quk-ak pakhih awm, pynoet ce ak tang benawh pynoet ce ak cawng benawh anih ingqawi thinglam awh taai qen uhy. 39 Cawkawak ak cekkhqi ing anih ce kaa na unawh the a kha na uhy, ami lu khyp sih unawh 40 "Nang tempul hqe nawh khawngthi thum voei khuiawh ak sa tlaih, namah ingkaw namah ce hul qu lah thoeih ti! Khawsa Capa na na awm awhtaw thinglam awhkawng nuk kqum law lah thoeih ti!" tina uhy. 41 Cemyih lawtna, khawsoeih boeikhqi anaa awi cawngpyikungkhqi ingkaw a hqamcakhqi ingawm the a kha na uhy. 42 "Thlak chang taw hul hlai hy, amah ingkaw amah taw am hul qu thai hy! Isarel sangpahrang na awm hlai hy! Tuh thinglam awhkawng nuk kqum law lah seh, cawhtaw anih ce cangna kawng unyng. 43 Khawsa ce a ypnaka koenoek; Khawsa ing a ngaih awhtaw tuh hul lah seh nyng, 'Khawsa Capa na awm nyng,' a ti koenoek," tina uhy. 44 Cemyih lawtna amah ingqawi thinglam awh a mi taai hainh qukai qawi ingawm kaa na hy ni. 45 Khawnoek paquk awhkawng pakow dy dek awh khaw than hy. 46 Khawnoek pakow tluk awh Jesu ing khawteh na, "Eloi, Eloi, Lama sabachthani" tinawh khy hy. (Cetaw, "Ka Khawsa, ka Khawsa, kawth nani cehtaak?" tinaak ni.) 47 Cawkaw amik dyi tlhang vangkhqi ing a ming zaak awh, "Elijah ni ak khy hy," ti uhy. 48 A mingmih anglakawhkaw tlhang pynoet ing tui ak dawp thai ik-oeih ce lo nawh misur tui ak thuuw awh ce a nauk coengawh cungkuw awh tlet nawh Jesu ce awk sak hy. 49 Cawkaw amik awm thlangkhqi ing, "Amah poek awh awm na lah seh. Elijah law nawh ak hul hly nu, toek lah usih, tina uhy. 50 Cawh Jesu ce khawteh na khy nawh kawn zip hy. 51 Amah cek phoeih awh ce tempul ak khuina kaw hizan ce a saw awhkawng ak kai dy pakhih na teek qu hy. Khawmdek tlai nawh lungkhqi ce kqek hy. 52 Phyikhqi awng qu nawh tlhak ciim ak thikhqi pum awm khawzah tho hy. 53 Phyih khui awhkawng tho unawh, Jesu a thawh tlaih coengawh khawk bau ciim khuina ce lut unawh tlhang khawzah a venawh dang pe uhy. 54 Qalkap zakhat ak ukkung ingkaw a venawh ak awm phyi ak qehkhqi ing liipi ang tlaii ingkaw cawkaw ik-oeikhqi boeih ce a mi hul awh kqih unawh, "Anih ve Khawsa Capa tang tang ni, ti uhy. 55 Cawh ce Kalili nakawng Jesu a hu awh bat nawh ak dodan nukhqi khawzah awm lawt uhy, khawsang nakawng anih ce qeh unawh dan uhy. 56 Cekkhqi taw Meri Magdalene, Jakob ingkaw Joses a nu Meri ingkaw Zebedi

a cakhqi nu tloek ce awm uhy. 57 Khawmy ben a pha awhtaw Arimathai khaw awhkaw tlhang boei pynoet, Jesu a hubat pynoet na ak awm Joseph ce law hy. 58 Pilat a venna cet nawh, Jesu a qawk ce thoeih hy, Pilat ing Jesu a qawk ce peek aham awi pehy. 59 Joseph ing Jesu a qawk ce a lawh coengawh, hi ak caihca ing zawl hy, 60 a phyi ak thai, thel a suk hqeeet ak khuiawh ce ta hy. Phyih chawmkeng ce lung ak bau soeih ing tleng nawh cehta hy. 61 Meri Magdalene ingkaw ak chang Meri ce phyi a haai benawh ngawi hy ni. 62 A khawngawi, coek qoeknaak khawnghi a boeih coeng, awh khawsoeih boeikhqi ingkaw Farasikhqi kutoet na Pilat a venna cet uhy. 63 "Bawipa amah a hqing tloek awh, tlhang qaai kqawnkhqi ing, 'Am thum nyn awh tho tlaih kawng,' a ti amik kqawn ce za u nyng. 64 Cedawngawh am thum nyn dy awh phyi ce ak leek na a mi qehnaak aham awi pe lah. Cemih am awhtaw, cimthan awh a hubatkqi law unawh a qawk ce a mim quuk coengawh, tlhangkhqi venna anih taw thihnaak awhkawng tho tlaih hawh hy, tinawh kqawn kawn uh. Cawhtaw ahu nakaw thainaak ahi ce ak cyk awhkawng lak awh nauh khqoet kaw," tina uhy. 65 Pilat ing, "Ak qeh hly kawi qalkapkhqi ta u tiksaw kaw. Cet unawh phyi ce nami saithainaak khuiawh ak khoeng na qeh law sak khqi uh," tinak khqi hy. 66 Cekkhqi ce cet unawh lung awh hatnaak a mi deeng coengawh, phyi ce ak khoeng na qalkapkhqi qeh sak uhy.

28 Sabath nyn boeih nawh, khaw khqih nyn ak khuiawh lamma cyk khaw a dai tawm ca awh, Meri Magdalene ingkaw ak chang Meri ce phyi ak toek na cet hy ni. 2 Cawh liipi khawteh na tlaii nawh, Bawipa khan ceityih pynoet ce khawk khan nakawng kqum law nawh, phyi na ce cet hy, lung ce thoeng nawh ak khan awh ce ngawi hy. 3 A mi taw khawphlamylhna awm nawh, a hi taw ywl amyihna baawk hy. 4 Phyih ak qehkhqi ing a mik kqih aih awh thyn unawh tlhak thi amyihna awm hoqeng uhy. 5 Khan ceityih ing nu qawi a venawh, "Koeh khqih ni, thinglam awhkaw ami taai, Jesu sui hy nihk ti tice sim nyng. 6 Vawh am awm voel hy; ak kqawn amyihna tho hawh hy. Law nih nawh ang zaihnaak a hyn ce toek lah ni. 7 Ang tawnna cet nih nawh a hubatkqi venawh kqawn pe nih: 'thihnaak awhkawng anih taw tho hawh nawh nangmih a haaiawh Kalili na cet hawh hy. Cawh anih ce hu kawn uk ti,' tina nih. Nik kqawn pek kqawi hawh nyng," tina qawi hy. 8 Cawkaw nu qawi ing anik kqih doena zeelnaak ing a hubatkqi venawh kqawn peek aham dawng hy ni. 9 Cawh Jesu ing cekqawi ce hqum qawi pahoei hy. "Nani sa dip seh," tina qawi hy. A venna cet nih nawh, a khaw awh a ni kaawp coengawh bawk hy ni. 10 Cekcoengawh Jesu ing cekqawi a venawh, "Koeh khqih ni, ka koeinaakhqi ce Kalili awh ceh aham kqawn law pe nih; cawh ce kai ni hu kawn uh," tina qawi hy. 11 Cawkaw nu qawi ce a ni ceh hui tloek awh, phyi amik qeh tlhang vang tloek ce khawk bau khuina cet unawh khawsoeih boeikhqi venawh cawkaw ik-oeikhqi ce kqawn pe uhy. 12 Khawsoi boeikhqi ing a hqamcakhqi mi kutoet na ngawi unawh doet qu uhy, cekcoengawh qalkapkhqi ce tangka khawzah pe uhy, 13 ""A hubatkqi cimthan awh law unawh ka mi ih tloek awn a nam qu uhy, tinawh kqawn uh. 14 Ve ak awi ve qam ukkung ing ang zaak hau awhtaw, kaimih ing hloep kawng unyng saw nangmih ce loet bit kawm uk ti," tinak khqi uhy. 15 Cedawngawh qalkapkhqi ing tangka ce do unawh cekkhqi ak awi yn amyihna kqawn uhy. Ce ak awi ce tuhdy awh Judah khqing lak awh kqawn uhy. 16 Cekcoengawh hubat tlhangqa hlaioet tloek ce Kalili qam awhkaw, Jesu ing ak kqawn peek khqi tlhang na ce cet uhy. 17 Amah ce hu unawh bawk uhy; cehlai tlhang vang ingtaw upvoet uhy. 18 Jesu ing a mingmih a venna cet nawh, "Khawk khan ingkaw khawmdek awh saithainaak boeih boeih ce ka venawh peek na awm hawh hy. 19 Cedawngawh cet unawh

thlang phyn boeih ce ka hubat na sai law unawh, Pa, Capa ingkaw Ciim Myihla ang ming awh Baptisma pe law uh. **20** Kai ing awi ka ni peek khqi boeih ve a mi hquutnaak aham cawng law pyi uh. Ngai lah uh, khawmdtek a dyt dyna, nangmih a venawh awm loet kawng nyng," tinak khqi hy. (**aiōn g165**)

Marka

1 Khawsa Capa, Jesu Khrih awithang leek ak qkannaak taw ve myihna awm hy. **2** Tawngha Isaiah ing: "Ka ceityih ce na haiawh tyi law kawng nyngsaw, anih ing na lam ce qoek abah law kaw. **3** Ramkoh awh ak khy awi ing, 'Bawipa a lam ce qoek abah unawh, a lamkhqi ce dyng sak lah uh, a tice. **4** Johan ce law nawh thawlq qeenkhaw ngainaak aham zutnaak baptisma akawng ce kqawn nawh qamkoh awh baptisma ce pehy. **5** Judah qam awhkaw thlangkhqi boeih ingkaw Jerusalem awhkaw thlangkhqi boeih ce anih a venna cet uhy. Ami thawlhaakkhqi ce kqawn unawh, cekkhqi ce Johan ing Jordan long awh baptisma peh kqhi hy. **6** Johan ing calauk myi hina bai nawh, ak cawi ce savyn ing zeen hy, khamkhawk ingkaw khawtuiti ce buh a an na ai hy. **7** Anih ing vemyihna kqawn hy: "Kai ahu na kai anglakawh ak bau khqoet thlang law hyn kaw, kai taw koep doena anih a khawmyk qui ak hlam peek aham awm am kawih nyng. **8** Kai ing nangmih ve tui ing baptisma ni pek khqi nyng, cehlai anih ingtaw Ciim Myihla ing baptisma ni pek khqi kaw," tinawh kqawn hy. **9** Cawh Jesu taw Kalili qam Nazareth khaw awhkawng law nawh Johan ing Jordan tui awh baptisma pehy. **10** Jesu tui awhkawng a hang law awh, khan ce awng qz nuawh Myihla ce ak khan awh kqukkku amyihna ak khan awh cuuk pehy. **11** "Khan nakaw ing: 'Nang taw ka ni lungnaak ka Capa ni, nak khan awh zeel soeih nyng,' tinawh awi ce law hy. **12** A koein phoeih awh Myihla ing anih ce qamkoh na tyi pahoei hy. **13** Qamkoh awh ce khawngi sawmli awm nawh, Setan ing sykzoek hy. Qamsakhi mi awm hiah unawh khan ceityihkhqi ing anih ce cuncah uhy. **14** Johan ce thawng na amik thlak coengawh, Jesu taw Kalili qam na cet nawh, Khawsak awithang leek ce kqawn hy. **15** "A tym khoek hawh hy, Khawsa ram taw zoe hawh hy, zut unawh awithang leek ve cangna lah uh!" tinak khqi hy. **16** Jesu ing Kalili tui keng na a ceh awh, Simon ingkaw ana Andrew lawk anik khawng ce hu qawi hy, cekqawi taw ngakhawikung na awm hy nh. **17** Cekqawi a venawh, "Ka hu awh bat law lah nh, thlang ak tukung na ni tak qawi vang," tina hy. **18** Cekkqawi ing lawkkhqi ce cehta nihih nawh anih a hu awh bat pahoei hy nh. **19** Cawhkhawng va cet kqoep saw, Zebadi a caqawi Jakop ingkaw ana Johan, lawng ak khuiawh lawk anik bu ce hu hy. **20** Cekkqawi ce khy saw, a ningnih ingawm a ni pa ingkaw anik thlang ceeikhqi ce lawng khuiawh cehta nihih nawh anih a hu awh bat pahoei hy nh. **21** Kaperanaum khaw na cet unawh, Sabbathyn awh sinakawk khuina thlang cawngpyi hy. **22** Anih ingtaw anaa awi cawngpyikungkhqi a cawngpyinaak a myihna a cawngpyi kaana saithainaak ak ta thlang a cawngpyinaak a myihna a cawngpyi a dawngawh a cawngpyinaak awh thlangkhqi ce a ming ngaih kyi hy. **23** Cawh sinakawk khuina qaih che ak ta thlang pynoet ing ak khy doena, **24** "Nazareth Jesu, kaimih ve ikaw ni ti nak khqi vang na ti? Kaimih hqe aham nak law nu? Nang ve Khawsa ak thlang ciim ni tice ni sim nyng!" tina hy. **25** Cawh Jesu ing, "Sit nawh! Thlang ak kawk khui awhkawng cawn lah," tina hy. **26** Qaaiche ing ce ak thlang ce khawtuh na thyn sak nawh ak kawk khui awhkawng khy doena cawn hy. **27** Cawh ce cawhkhawng awh thlangkhqi boeih boeih ce amik kawpoek kyi hy, "A u mih nu ve? Saithainaak ingkaw cawngpyinaak ak thaai vam haw ve! Qaaichekhqi awm awi pe saw ngai pe u tik maw ve," tina hy. **28** Kawlkalh awh anih akawng ce Kalili ram pum awm thlang khawngkhak hy. **29** Sinakawk ce ami cehtaka coengawh, Simon ingkaw Andrew a im awh Jakop ingkaw Johan ce ceh pyi hy. **30** Cawh Simon a senu ce a sa tlo nawh zaih hy, ce akawng ce Jesu a venawh kqawn pe uhy. **31** Jesu ing cet nawh a kut awh tu nawh thawh hy. Cawh anih ce a sa tlawh ing hlah pahoei nawh

cekkhqi ce dodan hy. **32** Khamwya ben khaw angtlaak coengawh, tlawhnaak soepkep ak ta thlangkhqi ing qaaai ing amtu thlangkhqi ce a venawh law pyi uhy, **33** chawmkeng awh vangpum na ngawi kyng uhy, **34** cawh tlawhnaak soepkep ak takhqi ce Jesu ing qoei sak hy. Qaaikhqi awm khawzah hqek hy, anih ce u nu ti ami sim a dawngawh, qaaikhqi ce awi khangoet awh ap kqawn sak khqi hy. **35** A ngawi mymcang hqijit khaw a dai hlanawh Jesu taw tho nawh, a dingypnaak a hun na cet nawh cykcah hy. **36** Simon ingkaw a pyikhqi ing anih ce sui uhy, **37** ami huh awhtaw, "Thlangkhqi ing nang ni sui uhy!" tina uhy. **38** Jesu ing, "Ak chang na khawceng khawcawi na cet hlah usih, cawh ni awi kak kqawn hly thai. Ve aham ni ka law," tinak khqi hy. **39** Cedawngawh Kalili ram pum awh cet nawh, sinakawkkhqi awh awi ce kqawn hy, qaaikhqi ce hqek hy. **40** Mynrai ak neh thlang pynoet ce a venawh law nawh khuk sym doena queenkaa thoeh hy, "Na ngaih awhtaw ni qoei sak thai hy ti," tina hy. **41** Anih ing am queen soeih a dawngawh, a baan ce zyng nawh bi hy. "Ngaih nyng ciimcaih hlah!" tina hy. **42** Kawlkalh phoeih awh mynqaai ce ciimcaih nawh qoei tlang hy. **43** Awi yn ceet ceet nawh tyi hy. **44** "U a venawh awm koeh kqawn qoe qoe. Cehlai cet nawh a mingmih a venawh diyhthing na na awmnaak aham khawsoeih a venawh namah ingkaw namah ce van huu qu lah, nang silh qunaak aham Mosi ak awipeek myihna ik-oehi ce suum lah," tina hy. **45** Cehlai anih ing cet nawh kqawn lat hy, cedawngawh ce ak awi ce thang khawngkhak hy. Cedawngawh Jesu taw khawk khuiawh ang dang pyng na am cet that voel nawh khawcengkhqi awh thlang a sitnaak kqang ce awm hy. Cehlai hun chang chang nakawng thlangkhqi ce a venna law uhy.

2 Khawngi iqyt nu a di coengawh Kaperanaum a pha law tlaih awh, imawh anih awm hy tice thlangkhqi ing za uhy. **2** Imawh chawmkeng dyna awmnaak amak hoengna be law koep usaw, cawhce ami venawh awi kqawn pekkhqi hy. **3** Cawh thlang pupthliing, ak khawn thlang pynoet ce lawypyi uhy. **4** Thlang a thet aih awh Jesu venna am law pyi thai usaw anih a awmnaak tawng awh iptih phen unawh thlang ak khawn ce amik kawhnaak hiphaih mahna nuk thla uhy. **5** Jesu ing amik cangnaak ce a huh awh, thlak tlo ak khawn a venna, "Ka capa, na thawlq qeenna awm hawh hyti," tina hy. **6** Cawh cawngpyikungkhqi thlang vang awm cawhce ngawi lawt unawh amik kawk khuiawh, **7** "Ikawthi ve ak thlang ing vemyihna awi ak kqawn hy voe? Khawsa ni ak kqawnseet law! Khawsa doeng kaa taw u ing nu thawlham aqeen thai?" tina hy. **8** Amik kawlung awh cemiyihna poek uhy ti Jesu ing sim nawh, ami venawh, "Ikawthi cemiyihna kaw namik poek? **9** Ak khawn a venawh, 'Na thawlhaak qeenna awm hawh hy,' ti aw, 'Na ihphak lo nawh na khaw ing cet hlah,' ti han nu kqawn ak zoei bet? **10** Cehlai thlanghqing capa ing ve khawmdek awh thawlq qeennaak tathai hy tice nami sim naak ham, tinawh, ak khawn thlang venawh, **11** "Tho nawh, na ihphak lo nawh, na im na cet, ni tina nyng," tina hy. **12** Anih ce tho the nawh, a ihphak ce lo nawh, thlang khawzah mik huh na cet saw; thlang boeih a ming ngaih a kyi doena, "Vemyihve amni hu man hy," ti unawh Khawsa ce kyihcah uhy. **13** Jesu taw cawn nawh tulii kengna cet tlaih bai hy. Cawh thlang khawzah ing a ven pan usaw, cawngpyi khqi hy. **14** A ceh doena mangmu cawinaak hynawh ak awm Alphai capa, Levi ce hu nawh, a venawh, "Ka hu awh bat lah," tina hy. Tho nawh a hu awh bat pahoei hy. **15** Jesu ing Levi a im awh buh vel unawh, mangmu ak cawi thlang khawzah ingkaw a hubatkhqi mi buh vel hiah uhy. A hu ak batkhqi awm thlang khawzah ni. **16** Thlak thawlkhqi ingkaw mangmu ak cawikhqi venawh buh a vel ce Farasikhqi ing ami huh awh, a hubatkhqi venawh, "Ikawthi mangmu ak cawikhqi ingkaw thlak thawlkhqi venawh buh a vel?" tina uhy. **17** Cek awi ce Jesu ing ang zaak awh, "Sak dip thlang ing siboei am ngoe nawh thlak tlo ing ni siboei a ngoe. Thlak dyngkhqi khy

ham am law nyng, thlak thawlhkhqi khy ham ni ka law," tinak khqi hy. **18** Johan a hubatkqi ingkaw Farasikhqi ingtaw buh zeih uhy. Cedawngawh cet unawh Jesu venna, "Ikawtih Johan a hubatkqi ingkaw Farasikhqi ingtaw buh zeih usaw na hubatkqi ingtaw a awm hyn awh zulawh poei ak pankhqi ing buh ami zeih kaw? Anih a awm khui awhtaw buh am zeih kawm uh. **20** Cehlai zuk lokung ce a mingmih a ven awhkawng ak chang na khyn valhnaak a tym ce pha law kaw, cawh buh zeih dam bit kawm uh. **21** U ingawm hi ak kqym ce hi ak thai ing am bu man na. A bunaak mantaw, hi ak thai ing hi ak kqym ce dawk kawmsaw sek khqoet kaw. **22** U ingawm misur tui ak thai ce cikthlyng ak kqym khuiawh am than khawi hy. A than mantaw misur tui ing cikthlyng ce seet kawmsaw misur tui ingkaw cikthlyng ce se haih kaw. Amni, misur tui ak thai taw cikthlyng ak thai awh n mi ami than," tinak khqi hy. **23** Sabbath nyn khaw hypoet awh, Jesu taw lo awhkawng cet hy, a hubatkqi ing ami ceh awh cang a vui ce dy uhy. **24** Farasikhqi ing a venawh, "Toek lah, kawtih Sabbath nyn awh sai aham amak thym ce na hubatkqi ing ami sai?" tina uhy. **25** Anih ing, "David ing a pyikhqi mi amik phoen a cawih awh a ngoe dawngawh ik-oieih a sai ce am nami noet khawi nahn nu? **26** Abiathar khawsoeih boeikhny na a awm awh, David ing Khawsa im khuiuna kun nahn, khawsoeikhqi doeng ing ai aham ak tyng phaihpi ami nahn a ai ce ti. A pyikhqi awm pe sawkaw," tinak khqi hy. **27** Cekcoengawh a mingmih a venawh, "Thlang aham ni Sabbath ve a sai, Sabbath aham thlang am sai hy. **28** Cedawngawh thlanghqing Capa ve Sabbath a boei na awm awm hy," tinak khqi hy.

3 Sinakawk na ce cet bai nahn, cawhce a kut ak khem thlang pynoet a na awm hy. **2** Amah thawl amik puknaak hamna Sabbath nyn awh thlang a qoei ingkaw ama qoei sak hly qym uhy. **3** Jesu ing kut khem venawh, "Thlang boeih a haiawh dyl lah," tina hy. **4** A mingmih a venawh, "Sabbath nyn awh them leek sai nu a leek, them amak leek sai nu, hqjinggaak thaawng nu a leek, him nu?" tinak khqi hy. Cehlai a ming hqi phah uhy. **5** Amim thin a sah awh ak kaw am law nahn, kawso doena a mingmih ce toek khqi nahn, cawhawh thlang a venawh, "Na kut ce zyng lah," tina hy. Anih ing a kut ce zyng saw, a kut ce leek pahoei hy. **6** Cawh Farasikhqi ce cawn unawh Jesu ce ikawmyiha ni him thai lah voei, ti unawh Herod ak thlangkhqi mi doet qu uhy. **7** Jesu taw a hubatkqi mi tulii benna ce cet uhy, cawh Kalili ben nakaw thlang khawzah ing a hu hqout law uhy. **8** A them saikhqi boeih ce aming zaak awh Judah nakaw, Jerusalem nakaw, Idumea nakaw, Jordan long caqai benina kaw thlangkhqi, Tura ingkaw Sidon khaw keng awhkaw thlangkhqi ce a venna law uhy. **9** Thlang doem aih nahn Amah ama mi netnaak hamna a hubatkqi ce lawng pynoet taak pek ham tinak khqi hy. **10** Thlang khawzah a qoei sak hawh a dawngawh, thlak tlokhqi ing Amah a mi bi ngaih awh den qu boeih uhy. **11** Qaihchekhqi ing anih ce ami huh ahaaina koep unawh, "Nang ve Khawsa Capa ni," tinawh khy uhy. **12** Cehlai anih u aw tice ama mik kqawn aham cekkkhqi ce awi pehy. **13** Jesu ing tlang na kaai nahn amah ing a ngaih thlangkhqi ce khy hy, cekkhqi ce a venna law uhy. **14** A venawh ami awmnaak tham ham ingkaw awi kqawn ham, **15** sungqaikhqi hqei hamna a tyih khqi hamna, paahqa hlaihii ce tyih khqi hy. **16** Cekkhih taw: Simon (Piter tinawh ming sui); **17** Zebedi a caqawi Jakop ingkaw ana Johan (vekkqawi ve Boaneges tinawh ming sui, khawhuum capa qawi tinaak); **18** Andru, Philip, Bartholomu, Mathai, Thomas, Alphaeus capa Jakop, Thadaeus, Zealot ami ti Simon ingkaw **19** amah ak zawkung Judah Isakariot vetloek ve tyih hy. **20** Cekcoengawh Jesu taw ipkhui na lut hy, cawh thlang khawzah cun law tlaih bai unawh, cedawngawh buh kangna awm am ai thai uhy. **21** A cakawkhqi ing ce ak awi aming zaak awh, "A cyih am awm voel

hy," ami tinaak dawngawh anih ce tu aham cet uhy. **22** Jerusalem nakawng a nuk law anaa awi cawngpyikungkhqi ing, "Beelzebub ta ti maw ve! Qaai sangpahrang capa ak caming ni qaaikhqi a hqek," tina uhy. **23** Cedawngawh Jesu ing cekkhqi ce khy nahn nyhtahaak awi kqawn pehy: "ikawmyiha Setan ing Setan ce a hqeknaak thai kaw? **24** Qam awm aming pek qu mantaw am dyi thai tikaw. **25** Ipkhuikaw awm aming pek qu awhtaw am dyi thai ti kawm uh. **26** Setan awm amah ingkaw amah pek qu unawh aming tuk qu mantaw, am dyi thai ti kawm uh; plal hqoeng hawh kaw. **27** U ingawm ip takung thak awm soeih ce ama pin lamma awhtaw, a ipkhui na kun nahn a ik-oieikhqi ce am lawh pe thai tikaw. A pin coengawh ni a im ce a muk hly peek thai. **28** Awitak ka nik kqawn peek khqi, thlangkhqi a thawlhaak boeih ingkaw Khawsa thekhanaak awh ce queenkaw ngainaak awm kaw. **29** Cehlai u awm Ciim Myihla ce a thekhanaak awhtaw ityk awh awm queenkaw ngainaak am awm tikaw; kumqui thawlhaak ce sai hawn hy," tinak khqi hy. (aiōn g165, aiōnios g166) **30** A mingmih ing, "Qaaiche tahi," ami tinaak dawngawh ve ak awi ve kqawn pek khqi hy. **31** Cawh Jesu anu ingkaw a koeinaakhqi ce law uhy. A leng na dyi unawh anih ce khy sak uhy. **32** Thlang kqeng ing ak chung koep awh a venna, "Na nu ingkaw na koeinaakhqi ing a leng na ni sui uhy," tina uhy. **33** Jesu ing, "Ka nu ingkaw ka koeinaakhqi ce a u nu?" tinak khqi hy. **34** A venawh ak ngawi thlangkhqi ce toek nahn, "Ka nu ingkaw ka koeinaakhqi taw vekkhqi hawn ni! **35** U awm Khawsa ka kawngaih ak saikhqi taw kai a koeinu koeinaa ingkaw ka nu na awm hy," tinak khqi hy.

4 Cekcoengawh Jesu ing tulii kengawh thlang cawngpyi tliai bai hy. A venawh ak cun thlang kqeng ce a kqeng soeih a dawngawh lawng khuiuna kun nahn ngawi hy, cawh thlangkeng taw tulii kengawh awm uhy. **2** Nyhtahaak awi ing cekkhqi ce ik-oieih khawzah cawngpyi khqi hy, a cawngpyinaak awh ce a mingmih a venawh: **3** "Ngai lah uh! Io ak toenkung thlang pynoet taw camci ak saw na cet hy. **4** Camci ce a saw awh a vang taw lam awh tla nahn phakhqi ing cung hloep uhy. **5** A vang taw deklai khawzah ama awmnaak lung ak khan awh tla hy. Deklai a pam a dawngawh, kawhkhali awh cawt tleng hy. **6** Cehlai khaw a thoeng law awhtaw ak kqa ama cak a dawngawh khawbe ing tau nahn reu hy. **7** Camci a vang taw hling anglakawh tla nahn, hling a thing ce a bau law awhtaw cang ce zawl malh hy, cedawngawh am vui thai hy. **8** Camci a vang taw deklai ak leek awh tla hy. Cawt law, taai law nahn, vui hy, a pyh thumkip, kqukkip, zakhat dyna ak thaih vui hy," tinak khqi hy. **9** Cekcoengawh Jesu ing, "Zaaknaak haa ak ta ingtaw za seh nyng," tinak khqi hy. **10** Amah doeng a awm awh, thlanghqa hlaihii tloek ingkaw thlak changkhqi ce a venna law unawh nyhtahaak awi ce doet uhy. **11** A mingmih a venawh, "Khawk khan nakaw awihyp ce nangmih a venawh ni pek khqi hawn hy. Cehlai a ceng na ak awmkhqi aham ik-oieih soekkep ce nyhtahaak awi ing kqawn pe nyng. **12** cawh ni, "hu taw hu hlai kawm uh, am toek thai ti kawm uh, za taw za hlai kawm uh, am zasim thai qoei kawm uh, cemih am mantaw hlai tliai kawm usaw, queenkaw ngai na awm hau kawm uh!" a ti myihna," tinak khqi hy. **13** Cekcoengawh Jesu ing a mingmih a venawh, "Wavhkaw nyhtahaak awi ve amna ming zasim nahn nu? Cawhtaw ikawmyihaa nyhtahaak awikhqi boeih ce naming zaak sim hly pai? **14** Lo ak takung ing awi ce theh hy. **15** Thlang vang taw awi ce ak theh awh, camci ang tlaaknaak lam amyihna awm uhy. Awi ce aming zaak awh Setan ce law nahn a mingmih ak khuiawh theh na ak awm awi ce lo valh hy. **16** Ak changkhqi bai taw, lunghqawng awh ak tla camci amyihna awm bai hy, awi ce aming zaak awh zeel doena do pahoei uhy. **17** Cehlai ak kqa ama cak a dawngawh, kawhkhali ca doeng awm hy. Awi awh kyinaak

ingkaw thekhanaakkhoi a law awh, ang tawnna tluk tleng uhy. 18 Ak changkhqi bai taw hling anglakawhkaw ak tla camci ing myih uhy, awi ce za hy; 19 cehlai ve khawmdek hqing khawsakaak awh lynaakkhoi, boeinaak, qaaq kqawnnaak khqi ingkaw ak chang ik-oieh ngaihnaakkhoi law nawk awi ce zawl malh uhy, cedawngawh a vui am qah thai hy. (aiōn g165) 20 Ak chang bai taw, laitak awh ak tla camci ing myih hy, awi ce ang zaak awh, do hy, a vui qah nawk - a pyh thumkip, kqukkip ingkaw zakhat dyna ak thaikh vui hy," tinak khqi hy. 21 A mingmih a venawh, "Maiim ce dawn ing myk unawh, am awhtaw caboei ak kaina ta khawi unawh nu?" Maiim amim hawihnaak khawi awh ni amim hawih ka ti my? 22 Cawh ni amak dangkhqi boeih awm dang kawmsaw ang hyp na ak awmkhqi awm aming dang hly boeih hy. 23 Zaaknaak haa ak ta ingtaw za seh. 24 Na ming zaak ve ak leek na poek lah uh. Thilang aham na loeknaak awh ce nang aham awm loek law lawt kaw. 25 U awm ak ta ce sap pekhgoet kawmsaw; u awm amak ta cetafaw, ta taak ang cang awm lawh pe kaw," tinak khqi hy. 26 A mingmih a venawh, "Khawsa qam taw vemyihna awm hy. Thilang pynoet ing camci ce a lo awh theh hy. 27 Khawmthan ingkaw khawkdai ip nawk hang tho law seiawm camci ce pawk nawk cawt law hy. Ikawmyihna a hang cawt law tice am sim hy. 28 Amah poek awh deklai ing vui a qah sak hy - a kung hak cawt law hy, cekcoengawh vui nawk ak thaikh qah law hy. 29 Cang ce a hin awhtaw, cang ah aham a khoek hawh a dangawh, vin ce lo nawk aat hy," tinak khqi hy. 30 Cawhtaw, "Khawk khan qam ve kaw ing nu ka nythah lah voei, am awhtaw i ikawmyih nythahnaak awi nu ka hawnaak lah voei? 31 Khan qam taw khawmdek awh ak zawi soeih antlam cii ing myih hy. 32 Cehlai antlam cii ce cawt nawk a hang taaif law awhtaw dum khui awhkawh a thing boeih boeih anglakawh bau khqoet hy, a baai ak bau na cawn nawk khan nakaw phakhqii ing a hlip awh cu uhy," tinak khqi hy. 33 A mingmih ing aming zaak simnaak thai aham, cemiyh nythahnaak awikhqi ing awi kqawn pek khqi hy. 34 Nythahnaak awi hawnaak kaana ikawmyih awi awm ap kqawn pek khqi hy. Cehlai a hubatkhoi mi amah doeng ami awm awh, cawhkaw ik-oeihkhqi ce kqawncaih pek khqi hy. 35 Amah ce nyn khawmy ben awh a hubatkhoi venawh, "Vang ben caqai na cet usih," tinak khqi hy. 36 Thlang kqeng ce cehtaak unawh, anih ce lawng khuiawh a awmnaak man na ceh pyi pahoei uhy. 37 Cawh khaw hli khung nawk tulibak ce lawng khuiawh kun saw lawng ce cum hlo hlo hy. 38 Jesu taw lawng ang mai benna a lu doelh nawk ip hy. A hubatkhoi ing thawh unawh, a venawh, "Cawngpyikung kaimih tui awh ka ming cum hly ve kawna am nak poek nawk nu?" tina uhy. 39 Tho nawk, khawhli ce, "Sit nawk dym hlai!" tina hy. Cawh khawhli ce sit nawk a sitdik na awm boeih hy. 40 A hubatkhoi venawh, "Ikawthi vemyihna namik kqih lawnha aih? Cangnaak am nami ta hlan nawk nu?" tinak khqi hy. 41 Cawh kqih unawh, "Ve ve a tu ti ve? Khawhli ingkaw tulibak ingawm ak awi ngai pe zap hy!" ti uhy.

5 Cecoengawh, tuili caqai benna kaw Gerasin khawna ce cet uhy. 2 Lawng khui awhkawng Jesu ak cawn lawawh, ak kawk khuiawh qaaq ak be thlang pynoet ing phyi nakawng anih ce hqum ham law hy. 3 Anih taw phyi awh awm nawk, u ingawm anih ce am pin thai qoe uhy. Thiqui ingawm am pin thai uhy. 4 A kut a khaw thiqui ing khit hlai uhy, thiquikhqi awm phu kyk kyk hy. U ingawm anih ce am noeng hy. 5 Khawmthan khawdai phyi ingkaw tleng kqang khy nawk amah ingkaw amah ce lung ing aat qu hy. 6 Ak hla nakawng Jesu a huh awh, dawng nawk a haina khuk sym pehy. 7 Khawteh na khy nawk, "Kai ve ikaw ni tina vang na ti, Jesu sawsang soeih Khawsa Capa? Qeennaak ing kai ve kyinaak koeh ni huh sak mai!" tina hy. 8 Jesu ing, "Nang qaihche! Ve thlang ak kawk khui awhkawng cawn hlai," ana tinaak hawh a

dawngawh. 9 "Nang ming u nu?" tinawh Jesu ing doet hy. Anih ing, "Khawzah kami law a dawngawh, Legion ming na nyng," tina hy. 10 Ak hla soeih na cekkhqi ce ama tyihnaak aham Jesu a venawh anih ing qeennaak thoeh hy. 11 Ce a hun awhkawng a zoenaak baang kqoep awh vawk cahnaak awm hy. 12 Qaaikhqi ing Jesu a venawh, "Vawk a venna ni tyi khqi mai, vawk khqik khuina kun mai vang u nyng," tinawh qeennaak thoeh uhy. 13 Anih ing kun sak hy, cedawngawh qaaikhqi ce cawn unawh vawk ak kawk khuiawh kun uhy. Cawhkaw vawk taw thawngih tluk law hy, vawkkhqi boeih ce tuili a awmnaak ben kqang cen unawh tui awh amik cawn coengawh thi boeh boeh uhy. 14 Vawk ak cahkhoi ce dawng unawh khawk bau ingkaw vangcakhqi awh cawhkaw ik-oeihkhqi ce kqawn uhy, cedawngawh cawhkaw ik-oeihce ak toek na thlangkhqi ce tet uhy. 15 Jesu a ven am pha law awh, qaaq ing am tu ak thlang ce hu uhy, anih ce ak leek caana a nang ngawi hy; cawhkaw thlangkhqi ing ce kqih uhy. 16 Qaaq ing am tu thlang ingkaw vawk ak khan awhkawh ik-oeih ak awm law ce ak hukhqii ing thlangkhqi venawh kqawn pe uhy. 17 Cedawngawh thlangkhqi ing ce a qam ce cehtaak aham Jesu a venawh qeennaak thoeh uhy. 18 Jesu ing lawng khuiawh kun vang a ti awh, qaaq ing amtu a qoei sak thlang ing a hu awh bat lawt aham qeennaak thoeh hy. 19 Cehlai Jesu ing am bat sak hy, "Na cakawkhqi venna im na cet nawk Bawipa ing nak khan awh kawmih dyna ik-oeih a sai law nawk qeennaak a taak law tice kqawn pek khqi," tina hy. 20 Cedawngawh ce ak thlang ing cet nawk Jesu ing ak khan awh ikawmyih ik-oeih a sai pek tice Dekapolis awh kqawn hy. Cedawngawh thlang boeih amik kawpoek kyi hy. 21 Jesu taw tuili caqai na lawng ing cet nawk, tui kengawh a awm awh thlang kqeng khawzah ce a venna cun uhy. 22 Cawh sinakawk ukkung thlang pynoet, Jairu ak mingnaak ce law hy. Jesu ce a huh awh a khawkung awh koep doena qeennaak thoeh hy. 23 "Ka canu ca thi tawm hawh hy. Qeennaak ing law nawk ak khan awh na kut tloeng pe cang, cawhtaw qoei nawk hqing tlaih kaw," tina hy. 24 Cedawngawh Jesu taw anih a hu awh cet hy. Thlang kqeng khawzah ce a hu awh bat unawh ang net na net qu uhy. 25 Cawh kumhqa hlaihiai a thi na ak tla nu pynoet ce awm lawt hy. 26 Siboei khawzah a venawh a ceh hawh a dangawh tangka awm khawk hawh hy, cehlai am hawih khang nawk nauh khqoet khqoet hy. 27 Jesu a thang ce ang zaak awh thlang kqeng mi Jesu a hu awh bat lawt hy. 28 A hi mah ka bi man qoei ngai voei nyng, tinawh ak poek dawngawh a hi ce bi pehy. 29 Cawh a thi ce dym nawk a pum awh a tlawhnaak qoei hawh hy tice sim pahoei hy. 30 Cawh a pum awhkawng saithainaak cawn hy tice Jesu ing sim pahoei hy. Thlang kqeng benna ce mang nawk, "U nu ka hi ak bi?" tinawh doet khqi hy. 31 A hubatkhoi ing, "Thlang kqeng ing ni net usaw na huh a loei awh, 'U ing a ni bi? ce nak ti nu,' tina uhy. 32 Cehlai Jesu ing amah ak bikung benna mang nawk toek hy. 33 Cawh cawhkaw nu ing ak khan awh ik-oeih ak awm law ce a sim doena, a khawkung awh koep nawk kqih thyn doena ak thym caana kqawn pe boeih hy. 34 Jesu ing a venawh, "Ka canu nak cangnaak ing ni qoei sak hawh hy. Ngaihding caana cet hlai, na tlawhnaak qoei hlaih seh," tina hy. 35 Ce myihna Jesu ing awi ak kqawn huiawh, sinakawk ukkung Jairu a im awhkawng thlang vang ce law uhy. "Na canu thi hawh hy, kaw hamna cawngpyikung ce na toeh na oeih khing kaw?" tina hy. 36 A mingmih ak awih kqawn ce kawna awm am ngai nawk, sinakawk ukkung a venawh, "Koeh kqih, ak cang namah cangna lah," tina hy. 37 Piter, Jakob ingkaw Jakob a na Johan doeng ce khy nawk cet uhy. 38 Sinakawk ukkung a im amphi awh ak khy ak kokhqi ingkaw ak kqangkhqi ce Jesu ing hu hy. 39 Ipkhui na cet nawk a mingmih a venawh, "Kawthi ve myihna khy a ko unawh naming kqang aih? Naasen ve am thi hy, ak ip ni," tinak khqi hy.

40 Cawh a mingmih ing qaih na uhy. Cawkaw ak awm thlangkhqi ce a leng na cawn sak khqi nawh naasen a nu a pa ingkaw a hubat a ven awhkaw ak awmkhqi ce naasen ami soeinaak na ceh pyi khqi hy. **41** Naasen ce a kut awh tu nawh, "Talitha kumi!" tina hy, (ccee, "Nulaa ca, ka nik kqawn peek, tho lah!" tinak ni). **42** Cawh nuca ce tho pahoei nawh cet hyhy hy (cawkaw nuca taw kumhqa hlaih law hy). Cawh cawkaw amik awm thlangkhqi boeih ce amik kawpoek kyi hy. **43** Cawhaw ik-oeih ce u a venawh awm amak kqawn aham cekkhqi ce awi yn khqi ceet ceet hy, cekoengawh nuca ce ai kawi pynoet oet peek aham kqawn pehy.

6 Ce hun awhkawng Jesu taw cawn nawh amah a awmnaak khaw ce pha hy; a hubatkqi ing a hu awh hquut uhy. **2** Sabbath nyn a pha awh, sinakawk khuiawh thlang cawngpyi hy, a cawngpyinaak ak zakhqi boeih ing aming ngaihna kyi sak uhy. "Ve ak thlang ing hana kaw nu ve ak awikhqi ve a huh hy voei? Hana kaw cyilmaak nu hu nawh vemyih kawpoek kyi ik-oeihkhqi a sai hy voei! **3** A nih ve Meri capa, Jakob, Joseph, Juda ingkaw Simon ak taipa, letama awm am nu?" ti uhy. Cedawngawh ak khan awh amik kaw am law hy. **4** Jesu ing a mingmih a venawh, "Tawngtha taw amah a khaw, amah a cakawkhqi ingkaw amah a im awh kyilcahna am awm khawi na," ti hy. **5** Thlak tlo a kheoh ca doeng ak khanawh kut tloeng nawh a tloei sak ti kaana taw ce a hun awh kawpoek kyi ik-oeih am sai thai hy. **6** A mamik cangnaak a dawngawh ang ngaih kyi hy. Cekoengawh Jesu ing cet nawh khaw pynoet coeng awh pynoet cawngpyi khqi hy. **7** Thlanghqa hlaihiloek ce khy nawh, thlang pakhih pakhih awh a tyih coengawi qaacieh khqi ak khanawh saithainaak ce pek khqi hy. **8** Cecoengawh khawlawng nami ceh naak awh sawnghqawh doeng am kaa taw - phaihipi awm, sawngsa awm, taisawm awh tangka awm koeh kel hamna ti nak khqi hy. **9** Khawmyk taw myk sak khqi nawh," angki pakkhih koeh khyn uh," tinak khqi hy. **10** Cekoengawh ami venawh, "Nami pahnaak im hawh taw cawkawng namik cawn hla dy ak changna koeh cawn ta uh. **11** Han a khaw ingawm nangmih ce am ni do khqi nawh namik awi awm ama ming ngai awhtaw, ce a khaw ce nami cehtaak awh ami simnaak aham nami khaw awhkaw dekvai ce khawk sih uh," tinak khqi hy. **12** Thlangkhqi ing thawlh aming zutnaak aham a mingmih ing cet unawh awi ce khypyi uhy. **13** Qaaikhqi khawzah ami hqek coengawh thlak tlo khawzah ce sitiu hiluk unawh qoei sak uhy. **14** Jesu ang ming ce thang hawh nawh, Herod sangpahrang ingawm awithang ce za hy. Thlang vang ing, "Baptisma ak pekung Johan ce thihnaak awhkawng tho tlaih hy, cawhni anih awh kawpoek kyi them saithainaakkhqi a awm hy," ti uhy. **15** Thlang vang ingtaw, "Elijah ni," ti uhy. Thlang vang ingtaw, "Anih ce tawngtha pynoet lawt ni, syn awhkaw tawngtha pynoet myihna ni a awm lawt," ti uhy. **16** Cehlai Herod ing ang zaak awh, "Kai ing a haawng ka hlyng peek Johan ni thihnaak awhkawng a thawh tlaih hawh hy ce!" tihy. **17** Herod amah ing Johan ce tu sak nawh ak khhil coengawh thawngim na thla hy. A na Philip a zu Herodi a zunaak a dawngawh cemiyihna ce sai hy. **18** Johan ing Herod na ce, "Na naa a zu na lawh ce am thym hy," tinaak a dawngawh. **19** Cedawngawh Herodi ing Johan ce myihqyt na nawh him aham ngaih hy, cehlai am him thai hy. **20** Herod ing Johan ce thlak dylng thlak ciimcaih ni tice a sim a dawngawh kqih nawh hlip a dah hy. Herod ing Johan ak awi ang zaak awh ak kawpoekna kyi sak hy; cehlai zeel doena ak awi ce ngai pehy. **21** A hukhit natawa a tym leek ce pha law hy. Amah a thangnaak nyn awh Herod ing a boeikhqi, a qaal boeikhqi ing Kalili qam ukkunkhqi aham poei buh veelnaak sai pehy. **22** Cawh Herodi a canu ce law nawh laam hy, anih ing Herod ingkaw ak khinkhqi boeih ce amik kaw zeel sak hy. Sangpahrang ing nuca venawh, "Na ngaih boeih thoeh lah, ni pe vang nyng," tina hy. **23** Nuca venawh ce awi kam hy, "Na thoeh

boeih ni pe vang nyng, ka qam ak keek vang dy awm" tina hy. **24** Cawh nuca ing a nu a venna cet nawh, "Ikaw nu ka thoeh kaw?" tina hy. A nu ing, "Baptisma ak pekung Johan a lu," tina hy. **25** Cawh nuca ce sangpahrang a venna ang tawnna dawng nawh, "Tuh Baptisma ak pekung Johan a lu ce beihdung awh nani peek aham ngaih nyng," tina hy. **26** Cawhaw sangpahrang ak kaw se hy, cehlai ak khinkhqi haiawh awi a kam hawh a dawngawh, nuca a thoehnaak ce am oelh pe voel hy. **27** Cedawngawh thlang ak himkung ce ang tawnna tyi nawh Johan a lu ce khyn peek aham awi pehy. **28** Ce ak thlang ing thawngim khuina cet nawh, Johan a hawng ce a hlyng coeng awh, a lu ce beihdung awh tloeng nawh pehy. Anih ing nuca venawh pehy, nuca ing a nu pe patoe hy. **29** Ce ak awi ce aming zaak awh Johan a hubatkqi ce law unawh a pum ce lo unawh phyina that uhy. **30** Ceityikhqi ing Jesu vena cun law unawh ik-oeih ami saikhqi ingkaw thlang ami cawngpyinaak akawng khqi boeih ce kqawn pe uhy. **31** Thlang ak law ingkaw ak voeikhqi a kqeng aih a dawngawh buh a an awm am ai thai uhy, cedawngawh a hubatkqi venawh, "Na mimah doeng ka hu awh law unawh thlang a sitnaak hun awh dyn cang uh," tinak khqi hy. **32** Cedawngawh thlang a sitnaak hunna lawng ing a mimah doeng cet uhy. **33** A mingmih a ceh ce thlangkhqi ing ami huh awh khaw boeih boeih awhkawng dawng unawh a mingmih a haina ana pha ma uhy. **34** Jesu ing kawngceng a pha awh thlang kqeng khawzah ce hu hy, khoemkung amak awm tuukhqi myihna ami awm a dawngawh a mingmih ce queen khqi hy. Cedawngawh a mingmih ce awi khawzah cawngpyi khqi hy. **35** Khaw a my hawh a dawngawh a hubatkqi ce a venna law unawh, "Ve a hun ve kqawng na awm nawh, khaw awm my hawh hy. **36** Thlang kqeng ve ceh sak hlah, khawceng khaw cawi hqang cet u seitaw a mimah ing buh a ankhqi sui useh," tina uhy. **37** Cehlai a mingmih a venawh, "Nangmih ing ai kawi pe uh," tinak khqi hy. Cekkhqi ing, "A mingmih boeih a ai tat ham taw thlang pynoet a hlak kqee thaphu man ni a khoek kaw! Tangka ce zah ing phaihipi thlai unawh a mingmih kami pe hly nawh nu?" tina uhy. **38** Anih ing, "Phaihipi izah nami taak? Cet unawh toek lah uh," tina uhy. **39** Cawh Jesu ing thlang kqeng ce taitin awh aming ngawih ham awi pek khqi uhy. **40** Cedawngawh thlang kqeng ce zekhat zekhat ingkaw hakip hakip na ngawih sak khqi hloep hloep hy. **41** Jesu ing phaihipi cun nga ingkaw nga lunghih ce lo nawh khan benna mang ing zoseennaak a pek coengawh phaihipi ce thek nawh, thlangkhqi haiawh toen peek ham a hubatkqi venawh pek khqi hy. Nga lunghih awm a mingmih boeih a venawh qek sak khqi bai hy. **42** A micu boeih ing ai unawh phyi boeih uhy. **43** Phaihipi ingkaw nga ak ngenkhqi ce a hubatkqi ing ami cawi awh vawh hqa hlaihinh law hy. **44** Cawhaw buh ak aikhqi ce pa thak awm hqoeng thongnya law hy. **45** Jesu ing a hubatkqi ce lawng khuiuna kun sak khqi pahoei nawh Bethsaida khaw na tyi khqi hy. **46** A mingmih ce a cehtaak khqi coengawh cyckah aham tlang na cet hy. **47** Khaw a my law awh, lawng ce tui ang lung na awm nawh, amah doeng ce kawngceng na awm hy. **48** Khawhli ing lawng ce mam khoep nawh a hubatkqi ing lawng ce kaih tloei uhy. Khawmthan khawnoek pali tluk awh a mingmih a venna Jesu taw tui ak khan awh cet nawh cekkhqi venna ceh aham cai hy, **49** cehlai tui ak khan awh a ceh ce ami huh awh, Myihla ni ti unawh poek uhy. **50** A mingmih ing ami huh awh kqih unawh khy uhy. Cawh a mingmih a venawh, "Na ming ngaih qep sak uh! Kai ni koeh kqih uh," tinak khqi hy. **51** Cekoengawh a mingmih a venna lawng awh ce hang kaai hy, cawhaw khawhli ce dyn hy. Cekkhqi amik kawpoekna kyi hy, **52** amik kaw a tiing soeih a dawngawh, phaihipi akawng awm am zasim qoe uhy. **53** Vang ben caqai sa na cet unawh, Genesaret ce pha unawh, cawh ce dyn uhy. **54** Lawng khui awhkawng amik cawn awh, thlangkhqi ing Jesu ce hat uhy.

55 Ce a qam khui awhkaw thlangkhqi boeih ce dawng unawh phak awh thlak tlokhqi ce anih a awmnaak hun a hoiw awh kawt law uhy. 56 Anih a cehnaka hoiw awh vangca vangnu ingkaw lokhqi na awm, ik-oehi ami zawihaak hunkhqi na awm thlak tlokhqi ce law pyi uhy. A himawng ca awm bi thainaak aham a venawh qeenaka thoeih uhy, ak bikhqi boeih ing qoeinaak hu uhy.

7 Farasikhqi ingkaw Jerusalem awhkawng ak law caqeekung thlang pynoet ce Jesu a venawh cun uhy, 2 Cawh a hubatkhqi ing kut silh kaana buh ami ai ce hu uhy. 3 (Farasikhqi ingkaw Judahkhqi boeih ingtaw a mimah a phung amyihna kut a mami silh awhtaw buh am ai uhy. A hqamcakhqi ak awi ce tu khak uhy. 4 Ik-oehi ami zawihaak hun awhkaw ik-oehikhqi ce a mami silh ma awhtaw am ai uhy. Ak chang awi a mik pawm khawzah awm nawh boet silh khqi, um am silh khqi ingkaw qawhnum silh khqi awm sai uhy.) 5 Cedawngawh Farasikhqi ingkaw anaa awi caungpyikungkhqi ing doet uhy, "Kawtih na hubatkhqi ing a hqamcakhqi ak awi hqut kaana, kut 'my'n' na buh ami ai uh?" tina uhy. 6 Jesu ing, "Isaiah ing nangmih qaai kqawnkhqi akawng anak kqawn ce thym zawk hy ve: 'Ve ak thlangkhqi ing a mim kha ingtaw ni zoeksang hlai uhy, amik kawlung ing ni lak hla uhy. 7 Phu amak tana ni bawk unawh; ami caung pyinaak awm thlanghqing a caung pyinaak mailai na awm hy,' tinawh anak kqawn ce. 8 Khawsa awipeekkhqi ce qoek unawh thlanghqing ak awipeekkhqi ce ak cak na tu lat uhyuk ti," tinak khqi hy. 9 Cekcoengawh a mingmih a venawh: Na mimah ak awipeekkhqi nami sainaak thai ham Khawsak awipeek qoek unawh khaw sim khoem uhyuk ti! 10 Mosi ing, 'Na nu ingkaw na pa zoeksang lah, u awm a nu am awh a pa ham seet ak phoei sih taw thiik sak aham awm hy; tinawh anak kqawn hy. 11 Cehlai nangmih ingtaw, u ingawm a nu venawh am awhtaw a pa venawh; 'Kai a ven awhkawng ikawmyih bawmnaak awm na huuhet cetaw Korban ni' (cece 'Khawsa venawh pek,' tinaak ni), tina uhy, 12 a nu aham am awhtaw a pa ham bi am bi sak qoe uhyuk ti. 13 Cemyihna na mimah ak awipek ing Khawsa ak awi ce hqe uhyuk ti. Vemih ik-oehi ak chang khawzah sai uhyuk ti," tinak khqi hy. 14 Jesu ing thlang kqeng ce a venna khy nawh a mingmih a venawh, "Nangmih boeih ing ngai unawh zasim lah uh. 15 Thlang ak kawk khuina anuk lut ik-oehi ikawmyih aawk-ai ingawm thlang tuih am cuk sak hy. Cehlai thlang ak kawk khuina kawng ak cawn law ing ni thlang tuih ang cuk sak. 16 U awm zaksimnaak haa ak ta ingtaw za seh nyng," tinak khqi hy. 17 Thlang kqeng ce a cehtaak coengawh ipkhui na lut nawh, cawh a hubatkhqi ing cawhkwang nythahnakawi ce doet uhy. 18 A mingmih a venawh, "Nangmih ingawm am naming zasim nawh nu? A leng nakawng thlang ak kawk khuina ak lut ikawmyih awk-ai ingawm thlang 'tyih' am cuk sak hy, tice am nami sim nawh nu? 19 Ce ik-oehi ce thlang ak kawlung khuina am lut nawh ak phoen khuina ni a luh, cawhkwang awh naat na cawn tlaih hy," tinak khqi hy. (Ve ak awi ak kqawnnaak awh ve, awk-ai boeih ve "ciimcaih hy" tinawh Jesu ing kqawn hy.) 20 Cekcoengawh, "Thlang ak kawlung khui awhkawng ak cawn law ing ni thlang tuih ang cuk sak hy. 21 Cehlai kawlung khui nakaw, thlanghqing kawlung nakawng poeknaak amak thymkhqi cawn hy; kapoek sangnaak, quuksnaak, thlang himnaak, 22 samphaihaak, ytnaak, thawlhaak, thailatnaak, yy thawhnnaak, nainaak, tengkamaak, oequnaak ingkaw qawnaakkhqi ce law hy. 23 Vawhkaw thawlhaakkhqi boeih boeih ve thlang ak kawlung khui nakawng law nawh thlang ce tuh cuk sak hy," tinak khqi hy. 24 Jesu ing ce a hun ce cehta nawh Tura khaw benna ce cet hy. Thlang ing ni hu kaw a ti awh im pynoet ak khuina lut hy; cehlai am thuh qu thai hy. 25 Cawh a canu qaaing am tu peek nu pynoet ing, anih law hy tice ang zaak awh, law nawh a haiawh khuk sym doena qeenaka thoeih hy. 26 Cawhkaw nu cetaw Syria Phonicaia

awh ak thang Greek nu na awm hy. A canu ak kawkhui awhkawng qaaing peek aham Jesu a venawh qeenaak thoeih hy. 27 Cawh Jesu ing, "Naasenkhqi ing ak phyi na ai cang useh, naasenkhqi buh ce lawh penawh uikhqi ni peek peek am nep hy," tina hy. 28 Cawhkaw nu ing, "Oeih, Bawipa, thym hy, cehlai naasenkhqi a ai hawi caboei ak kaina ak bawi ce uikhqi ingawm lym lawt u sawkaw," tina hy. 29 Cawh cawhkaw nu a venawh, "Cemyihna kak awi na nim hlat a dawngawh, voei lhlah, qaaing na canu cawn ta hawh hy," tina hy. 30 Im na ang voei awhtaw ihkhun awhkaw ak zaih a canu ce hu hy, qaaing anih ce cawn ta hawh hy. 31 Jesu ing Tura qam ce cehta nawh Sidon khaw awhkawng Kalili tulii ingkaw Dekapolis qam na ce nu cet hy. 32 Ce a hun awh ang ha pang nawh awi amak pau thai thlang pynoet ce law pyi uhy, ak khan awh kuit loeng peek aham qeenaak thoeih hy. 33 Jesu ing anih ce thlang kqeng anglakawhkawng ak chang na a ceypyi coengawh, ang ha ce a kut ing piyh pehy. Cimtui a sa coengawh am lai ce bi pe bai hy. 34 Khan benna mang nawh a hyi coengawh, "Ephphata!" ("Awng qu lhlah" tinaak) tina hy. 35 Cawh thlang ang ha ce khui nawh am lai awm zai hy, ak leek caana awi pau thai pahoei hy. 36 U a venawh awm amak kqawn aham cekkhqi ce awi yn khqi hy. Cehlai cekkhqi ing kqawn khqoet uhy. 37 Anih ing ik-oehi boeih ak leekna sai nawh, hakpangkhqi haa khui sak nawh, pau aakhqi awm pau sak khqi hy," ti unawh, amik kawpoekna kyi sak uhy.

8 Ce khawngi awh thlang khawzah cun law bai unawh ai kawi ikawwm ama mi taak awh bubatkhqi ce khy khqi nawh, a mi venawh, 2 "Vawhkaw thlang kqengkhqi ve khaw thum voei ni venawh awm hawh unawh, buh ai hly ikawiawm am ta usaw queen khqi hy nyng, 3 buh hyh na imna a ming voei awhtaw lamna nawk kawm uh, thlang vang khqoet taw khawk hla nakawng a mik lawna awm bai nawh," tinak khqi hy. 4 A hubatkhqi ing, "Thlang ing vemyih kqawng lakna ami aikhoek buh ni huu thai kaw?" ti unawh amah awhlath uhy. 5 Jesu ing, "Phaihipi izah nami taak?" tinawh doet khqi hy. A mingmih ing, "Cun khqi" tina uhy. 6 Cawh anih ing thlang kqengkhqi ce dek awh ngawih ham awi pek khqi hy. Phaihipi cun khqi ce lo nawh zeel awi ak kqawn coengawh thek nawh thlangkhqi venawh tei peek ahamna a hubatkhqi pekkhqi hy, a hubatkhqi ing thlang kqengkhqi ce tei peek khqi uhy. 7 Nga a kohew ca ami taak ce awm bai nawh, zeel awi ak kqawn coengawh, thlang kqeng a venawh tei aham a hubatkhqi venawh kqawn pehy. 8 Thlangkhqi ing ami a awh phyi boeih uhy. Ami ai ngenkhqi ce a hubatkhqi ing vawh khqih na kawi uhy. 9 Cawhkaw buh ak aikhqi taw pa thak awm hqoeng thlang thawngli law uhy. Thlang kqeng ce a ceh sak coengawh, 10 a hubatkhqi mi lawng khuina lut unawh Dalmanutha khaw benna ce cet hy. 11 Farasikhqi law unawh Jesu ce awi doet uhy. Noek adak ham ngaih unawh khan ben nakaw hatnaak ce doet uhy. 12 Cehlai ak kawlung ing ak tlona hyi nawh a mingmih a venawh, "Kawtih vawhkaw cadilkhqi ing kawpoek kyi hatnaak ce ami sui hy voei? Awitak ka nik kqawn peek khqi, kawmih hatnaak awm peek na am awm kaw," tinak khqi hy. 13 A mingmih ce cehta nawh lawng khuina a luh coengawh vang ben caqai na ce cet hy. 14 A hubatkhqi ing phaihipi khyn aham hilh uhy, phaihipi pynoet doeng ce lawng khuina ta uhy. 15 Jesu ing, "Ralriing lah uh, Farasikhqi ingkaw Herod a venawh ce nomi cyih ta uh," tinak khqi hy. 16 A mimah ingtaw, "Phaihipi amni taak a dawngawh ni," tina poek uhy. 17 Cekkhqi ak awih kqawn ce Jesu ing za nawh doet khqi hy: "Ikaw hamna phaihipi am nami taak akawng ce namik kqawn? Tuh dy namik kawlung awh am na ming zasim bak bak nawh nu? Namik kawlung na mi tiing sak hyn nawh nu? 18 Mik ta loei unawh am na ming hu nawh nu? Haa ta loei unawh am na ming za nawh nu? Na mim

hilh hawh nawh nu? **19** Thlang thongnga aham phaihpi cun nga kang tei awh, ak ngen vawh izah nu nami kawih ce? tinak khqi hy. Cekkhqi ing, "Vawh hqa lhaih," tina uhy. **20** Thlang thongli aham phaihpi cun khqi khang tei awh, ak ngen vawh izah nu nami kawih ce? tinak khqi bai hy. Cekkhqi ing, "Vawh khqi," tina uhy. **21** A mingmih a venawh, "Am na ming zasim hlan bak bak nawh nu?" tinak khqi hy. **22** Bethsaida khaw ce ami pha awh thlang vang ing mikhyp pynoet ce lawpyi unawh, anih ce bi aham Jesu a venawh qeennaak thoeh uhy. **23** Mikhyp ce tu nawh khawceng na ceh pyi hy. Amik awh cimtui sa pe nawh ak khan awh a kut tloeng pehy, cekcoengawh, "Nak hu thai hawh aw? tina hy. **24** Hang mang law nawh, "Thlangkhqi ce thingkhqi ak cet myihna hu nyng," tina hy. **25** Cekcoengawh ce ak thlang amik awh Jesu ing a kut tloeng pe tlaih bai hy. Cawh amik ce dai tlaih nawh ik-oeihkhqi ce ak caih pheng na hu hy. **26** "Khawk khuina koeh cet moe," tina nawh im na tyi hy. **27** Kaiserea Philipi khaw ceng khaw cawikhqi awh Jesu ingkaw a hubatkqi taw cet uhy. Cawh lam awh a mingmih ce doet khqi hy, "Kai ve thlangkhqi ing u nu ami ti?" tinak khqi hy. **28** A mingmih ing, "Thlang vang ing Baptisma ak pekung Johan; thlang vang ing Elijah; thlang vang bai ingtaw tawngtha pynoet oet ni ti uhy," tina uhy. **29** "Nangmih ingtaw kai ve u nu nami ti?" tinak khqi hy. Cawh Piter ing, "Nang taw Khrin ni," tina hy. **30** Jesu ing amah akawng ce u venawh awm amak kqawn aham cekkhqi ce yn khqi hy. **31** Thlanghqing Capa ing khuikha hu kawmsaw, a hqamcakhqi, khawsoei boekhqi ingkaw anaa awi cawngpyikungkhqi ing hoet kawm uh, anih ce him kawm usaw am thum nyn awh tho tlaih kaw, tinawh cekkhqi ce cawngppi hy. **32** Ve akawng ve ak caih caana kqawn pehy, cedawngawh Piter ing ak changna khy nawh kaa na hy. **33** Cehlai Jesu ing a hubatkqi benna mang nawh Piter ce zyi hy. "Setan! Ka huna thoeih lah, Khawsa a kawnglam ak poek kaana, thlanghqing a kawnglam doeng ni nak poek hy," tina hy. **34** Cekcoengawh thlang kqeng ce a hubatkqi mi a venna khy nawh: "U ingawm ka hu awh bat law ham a ngaih awthaw amah ingkaw amah ce hoet qu seh, amah a thinglam ce kawh doena ka hu awh bat seh. **35** U awm a hqingnaak thaawng ham ak ngaih ingtaw a hqingnaak ce hlawng kaw. **36** Thlang ing khawmdek ve a pum boeih na ham mai seiawm, a hqingnaak a hlawng awthaw anih ham ikaw phu ak taak? **37** Thlang ing a hqingnaak lakawh ikaw a pek thai kaw? **38** U ingawm ve samphaih ingkaw thawl dung khuiawh kai ingkaw kak awi ak chahn pyi thlang taw, thlanghqing Capa ing Pa boeimangaaka ing ak khan ceityikhqi mi a law awh anih ce chah pyi lawt kaw," tina hy.

9 Cekcoengawh a mingmih a venawh, "Awitak ka nik kqawn peek khqi, thaawrnnaak ing Khawsa qam a law ce ami huh hlyand vawh amik dyi thlang vangkhqi lakawh thihnaak amak tan hly kawi thlang awm hy," tinak khqi hy. **2** Ak kquk nyn coengawh Jesu ing Piter, Jakob ingkaw Johan ce khy nawh tlang sang na kaai pyi khqi hy, cawh ce a mimah doeng awm uhy. Cawh a mimah a haiawh a myi thaw pek khqi hy. **3** A hi ce a baawk phung na vang hy, khawmdek awh ce anglakawh albaawk am awm hy ti tluk na baawh hy. **4** Cekkhqi haiawh Elijah ingkaw Mosi awm dang pe nawh Jesu mi awi kqawn uhy. **5** Piter ing Jesu a venawh, "Cawngpyikung vawh awm ve nep soeih hy. Bok pakthum awh chuh usih - pynoet ce nang aham, pynoet ce Mosi aham seitaw pynoet ce Elijah aham seh," tina hy. **6** (Amik kqjh aih awh ikaw amik kqawn hly awm am sim lat uhy.) **7** Cawh cingmai ing zawl khqi khoep nawh, khawk khan nakawng: "Vetaw ka lungnaak ka Capa ni. Ak awi ngaih pe uh," tinawh awi ce law hy. **8** Kawlkhalkh awh, mang usaw Jesu doeng am taw ak chang u am hu qoe uhy. **9** Tlang nakawng ami nuk kqum awh, Thlanghqing Capa thihnaak awhkawng a thawh hlan dy cawhkaw ik-oeih ami huhkhqi ce u a-

venawh awm amak kqawn aham cekkhqi ce awi pek khqi hy. **10** Cawh a mimah ingkaw a mimah ce, "Thihnaak awhkawng thawh tlaihnaak" tive ikawmyih nu?" tinawh doet qu uhy. **11** "Kawthi anaaw awi cawngpyikungkhqi ing Elijah ve lamma na law kaw, ami ti bai hy voei?" tinawh doet uhy. **12** Jesu ing, "Elijah ve lamma na law tang hy, anih ing ik-oeihkhqi boeih qoek abah kaw. Cawhtaw kawthi thlanghqing Capa ing khuikha zaawk kawmsaw hoet kawm uh, tinawh a na qee hyt hy voei? **13** Cehlai ka nik kqawn peek khqi, Elijah taw law hawh nawh akawnglam ami qee hawh a myihna ak khanawh ami ngaih ngaih amyihna sai hawh uhy," tinak khqi hy. **14** A hubatkqi ven a nuk pha awh, thlang kqeng khawzah anglakawh anaa awi cawngpyikungkhqi mi ami nang oelh qu ce hu uhy. **15** Thlang kqengkhqi ing Jesu ami huh awh, amik kawpoekna kyi nawh anih ak do na ce dawng uhy. **16** Cawh anih ing a mi venawh, "A mingmih mi ikaw nu naming oelh qu?", tinawh doet khqi hy. **17** Cawh thlang kqeng ak khui awhkaw thlang pynoet ing, "Cawngpyikung, ka capa, qaaii ing am tu nawh awi amak pau thai law pyi nyng. **18** A pha pha awh dek na tlu hoeih hy. Am kha awh a cimtui pem nawh, a ha ak taak nawh ak thang ing dawk poepa hy. Na hubatkqi venawh qaaii ce hqek aham kqawn pek khqi hlai nyng, am sai thai uhy," tina hy. **19** Jesu ing, "Aw cangnaak amak ta cadil tloek, nangmih a venawh iqyt dy nu ka awm kaw? I qyt dy nu kang yh hly bak bak? Naasen ce ka venna law pyi lah uh," tinak khqi hy. **20** Naasen ce a venna law pyi uhy. Qaaii ing Jesu ce a huh awh, cawhkaw naasen ce phep khqoet nawh am kha awh cimtui pem nawh dek awh zeet khoeng khoeng hy. **21** "Ve myihna iqyt nu a awm hawh?" tinawh naasen a pa ce doet hy. Anih ing, "A naasen ca awhkawng hawh ni," tina hy. **22** "Mai awh awm tui awh awm a thihnaak aham buuk poepa hy. Nang ing na sai thai awhtaw nim qeen nawh nik pyi lah," tina hy. **23** "Na sai thai awhtaw e! ak cangnaak ham taw ik-oeih boeih boeih coeng thai hy," tinawh Jesu ing tina hy. **24** Cawh naasen a pa ing, "Cang na nyng, am kak cangnaak ka noengaak ham nik pyi lah!" tina hy. **25** Cawhkaw ik-oeih ak toek na thlangkhqi amik law ce Jesu ing a huh awh, qaihcce ce zyi nawh a venawh, "Nang qaii pau aa ingkaw hak pang, awi ni pe nyng, ak khui awhkawng cawn nawh, koeh lut qoe voel," tina hy. **26** Cawh qaaii eng cawhkaw naasen ce thyn sak nawh dek awh ang zeet sak tlyp tlyp coengawh khy nawh cawn hy. Cawhkaw naasen taw thlik thi amyihna awm hqoeng nawh thlangkhqi ingtaw, "Thi hawh hy," ti uhy. **27** Cehlai Jesu ing anih ce a kut awh tu nawh thawh saw anih ce dyi pahoei hy. **28** Ipkhui na a lut awh a hubatkqi ing, "Ikawthi kaimih ingtaw am kami hqek thai hy voei? ti unawh ang hyp na doet uhy. **29** Jesu ing, "Vemih taw cykcahnaak doeng ing ni ak cawn thai," tinak khqi hy. **30** Ce a hun ce cehta unawh Kalili qam awhkawng cet phat unawh thlang ing a mi awmnaak a sim ham Jesu ing am ngaih hy. **31** A hubatkqi ce a cawngpyi khqi a dawngawh, ami venawh, "Thlanghqing Capa ve thlang a kut awh tu sakna awm kawm saw, himna awm kawm usaw, cawh a mi him am thum nyn awh tho tlaih kaw," tinak khqi hy. **32** Cehlai ak awih kqawn a konglam ce am zaak pe sim thai qoe uhy, ami doet hly nu kqjh koek uhy. **33** Kaperanuan khaw ce pha law uhy. Ipkhui na ami awm awh, a hubatkqi ce doet hy. "Lam awh kawmih akawng nu a ming oelh qu?" tinak khqi hy. **34** "U nu ak bau khyt," tice lam awh a ming oelh qu a dawngawh a ming hoi phah uhy. **35** Nung ngawi nawh a hubat thlanghqa lhaihlih tloek ce ak khy coengawh, "U awm maa ham ak ngaih ingtaw thlang boeih a hukhit na awm seitaw thlang boeih a tyihzoeih na awm seh," tinak khqi hy. **36** Naasen pynoet ce lo nawh cekkhqi anglakawh diyh sak hy. Cawhkaw naasen ce pawm nawh, a mingmih a venawh, **37** "U awm vawhkaw naasen khqik khuiawh pynoet awm kang ming ing ak do thlang taw kai anik do na awm hy; U awm kai a nik

do thlang taw kai amni do nawk kai anik tyikung ni a do," tinak khqi hy. 38 Johan ing, "Cawngpyikung, thlang pynoet ing nang ang ming ing qaa'i a hqek ce hu u nyngsaw, ningnih ak khui awhkaw thlang na ama awm a dawngawh kham pe u nyng," tina uhy. 39 Jesu ing, "Koeh kham pe uh, kai ang ming ing kawpoek kyi ik-oeih ak sai ing kai a seetnaak ap kqawn tikaw, 40 ningnih ama nik oelh thlang taw ningnih ben thlang ni. 41 Awitak ka nik kqawn pek khqi, Khrh a koe na nami awm a dawngawh kai ang ming ing tui boet oet awm ak pe taw ityk awh awm kutdo ce am zyng tikaw. 42 "U ingawm kai anik cangnaak ve naasen khqik khuiawh pynoet awm a thawl sak mantaw, anih ce a hawng awh sang neetaaka lung ak bau ce awi sak nawk tui na nik khawng man anih aham nep bet hy. 43 Na kut ing a ni thawl sak awhtaw tlyk boet mai. Na kut pakkhiih ak soep na amak thi que hell mai khuiawh sang tlaak anglakawhtaw kut amak soep na hqingnaak khuiawh na lut ce nang ham nep bet hy. (Geenna g1067) 44 Cawkaw hell mai khui awhtaw mehkqit awm am thi thai nawk mai awm am thi thai que hy. 45 Na khaw ing a ni thawl sak awhtaw, tlyk boet mai, khaw pakkhiih ak soep na hell khuiawh nang tlaak anglakawhtaw khaw ngun na hqingnaak ak khuiawh na lut ce nang ham nep bet hy. (Geenna g1067) 46 Cawkaw hell mai khuiawh taw mehkqit awm am thi thai nawk mai awm am thi thai que hy. 47 Na mik ing a ni thawl sak awhtaw, koeih mai. Mik pakhhiih ak soep na hell khuiawh tlaak anglakawhtaw milang doeng ing Khawsa ram khuiawh a lut ce nep bet hy. (Geenna g1067) 48 Cawkaw hell khui awhtaw 'mehkqit awm am thi thai nawk mai awm am thi thai que hy'. 49 Thlang boeih mai awh ci ing alna awm kaw. 50 "Ci ve nep hy, cehlai a alnaak ve a pahit mantaw, ikawmyihna na al sak thai tlaih kaw? Ci a myihna al unawh, thlang boeih mi qoep ang qui na awm lauh uh," tinak khqi hy.

10 Cekcoengawh Jesu ing ce a hun ce cehta nawk Jordan long caqai Judah qam benna cet hy. Cawk thlang kqeng ing a ven pan law tlaih bai uhy, a sai khawi amyihna cekkhqi ce cawngpyi khqi hy. 2 Farasi thlang vangkhqi ce law unawh noek a dak naakna awi doet uhy, "Thlang ing zu ak tlak ham ak thyu hly nu?" tina uhy. 3 Anih ing, "Mosi ing ikawk awi nu a na peek khqi?" tinawh doet khqi hy. 4 Cekkhqi ing, "Mosi ingtaw zu tlak thainaak caa qee nawk zu tlak thainaak pehy," tina uhy. 5 Jesu ing, "Na mik kawlung a hqam soeih a dawngawh cemyihna anaa awi a na qee mai ni. 6 Cehlai ak cyk caawh Khawsa ing pa ingkaw nu a na sai hy. 7 Ve akawngawh pa ing a nu ingkaw a pa ce cehta nawk a zu tu lawm saw; 8 pakhhiih ce pum pynoet na awm kawm nih," tina hy. Cedawngawh pakkhiih na am awm voel nih nawk, pumoet na awm hawh ny nih. 9 Cedawngawh Khawsa ing a tawm ce hawh taw thlanghqing ing koeh hqe seh," tinak khqi hy. 10 Ipkhui na ami awm awh, ve akawng ve a hubatkhqi ing doet tlaih bai uhy. 11 A mingmih a venawh, "U ingawm a zu ce thla nawk nuk chang ce a zu naak tlaih awhtaw a zu ak khanawh sam ak phaikh ni. 12 Nu ingawm a va ma nawk tlak chang a va naak awhtaw anih awm sam ak phaikh ni," tinak khqi hy. 13 Jesu ing a bi hamna naasen cakhqi ce law pyi khqi uhy, cehlai a hubatkhqi ing kaa nak khqi uhy. 14 Cehlai Jesu ing cece a huh awh, ak kaw am law nawk, a hubatkhqi venawh, "Naasen cakhqi ce ka venna law pyi khqi lah unawh, koeh hqek khqi uh, kawtih khan qam taw vemyihna ak awm thlangkhqi aham na ni. 15 Awitak ka nik kqawn peek khqi, u awm Khawsa ram ce naasen ca myihna amak do taw ityk awh awm ak khuiawh am lut tikaw," tinak khqi hy. 16 Naasenkhqi ce lo nawk ak pawn coengawh, a mingmih ak khan awh a kut tloeng nawk zoseennaak pek khqi hy. 17 Lam na a ceh awh, thlang pynoet ce a venna dawng law nawk a haiawh khuk sym doena, "Cawngpyikung leek, kumqui hqingnaak ka huhnaak thai

ham ikaw ka sai hly?" tina hy. (aiōnios g166) 18 Jesu ing, "Ikawthi leek hy" tinawh na nik khy? Khawsa doeng tikaaw u awm am leek hy. 19 Awipeekkhqi sim tik sawkaw: "Thlang koeh him, koeh samphaih, koeh qu, amak thyu diything na koeh dyi, thlang koai na, na nu ingkaw na pa kqjchhah lah,' a tice," tina hy. 20 Anih ing, "Cawngpyikung, vekkhqi boeih ve ka naasen awhkawng ni ka sai hawh hy," tina hy. 21 Jesu ing anih ce toek nawk lungna soeih nawk, "Ik-oeih pynoet voet hyn hy," tina hy. "Cet nawk na kawththemkhqi boeih ce zawi nawk khawdeng hahqakhqi ce pe, cawhtaw khawk khanna qo ta kawp ti; cekcoengawh law nawk ka hu awh bat law," tina hy. 22 Cehlai a hai ta malh nawk, ik-oeih khawzah a taak a dawngawh kawseet doena valh tlaih hy. 23 Jesu ing hawi ang mang nawk, a hubatkhqi venawh "Bawikhqi ing Khawsa ram awh a luhnaka aham kyi soeih mah hly" tina hy. 24 Ak awih kqawnnaak awh a hubatkhqi taw aming ngaih na kyi hy. Cehlai Jesu ing, "Naasenkhqi, boei ak ypnak thlangkhqi ham Khawsa qam khuiawh lut ve kyi soeih mah hy. 25 Bawi ak thlang ing Khawsa ram khuiawh a lut anglakawh Kalauk ing kqym ak khuiawh a lut zoei bet hy," tinak khqi hy. 26 A hubatkhqi ce amik kawpoek kyi khqoet nawk, "Cawhtaw u nu hul na ak awm hly hy voei?" ti uhy. 27 Jesu ing a mingmih ce toek khqi nawk, "Thlanghqing aham taw am coeng thai hy, cehlai Khawsa ham taw ik-oeih boeih boeih ve coeng thai hy," tina hy. 28 Piter ing, "Kaiming ik-oeih boeih boeih cehta unawh na hu ka ming bat law ve!" tinawh doet hy. 29 Jesu ing, "Awitak ka nik kqawn peek khqi, u ingkaw kai ingkaw awithang leek ak caming a im a lo, a koeinaa, a koeinanu, a nu apa, a canaanakhqi ingkaw a lokhqi a cehtaak awhtaw 30 tuh a khuk que awh a pyh zakhat dyna (imkhqi, a koeinaakhqi, a koeinukhqi, a nu a pakhqi, a canaanakhqi ingkaw a lokhqi - cekkhqi ingkaw thekhanaakkhqi) ingkaw ak law hly a khuk awh, kumqui hqingnaak ce hu kaw. (aiōn g165, aiōnios g166) 31 Cehlai ak maakhqi ce huu khng kawm usaw huu ak khngkhqi ce maa lat kawm uh," tinak khqi hy. 32 Jerusalem benna ami hang ceh awh, Jesu taw a mingmih a haiawh lamma na cet hy, cawh a hubatkhqi taw amik kawpoek kyi hy. Thlanghqa hlaihiloek ce ak chang na cehpyi nawk a khan awh ik-oeih ak pha law hly ce kqawn pek khqi hy. 33 "Tuh Jerusalem na ni hang cet kawm usaw, thlanghqing Capa ve khawsawh boeikhqi ingkaw anaaawi cawngpyikungkhqi kut awh peekna awm kaw. A mingmih ing thihamna ak khanawh awi tlukk sak kawm usaw Gentelkhqi kut awh pe kawm uh, 34 Cekkhqi ing anih ce the a kha na kawm usaw him kawm uh. Cehlai am thum nyn awh tho tlaih kaw," tinak khqi hy. 35 Zebedi a caqawi, Jakob ingkaw Johan ce a venna law hy nih. Cekkqawi ing, "Cawngpyikung, ka ni thoeh law a hoei boeih ve na sai hamna ngaih hlai nih nyng," tina hy nih. 36 Anih ing, "Ikaw saik ham nu nani ngaih?" tinak khqawi hy. 37 Cekkqawi ing, "Na boeimangnaak khuiawh na awm awh pynoet tang benna pynoet cawng benna na ning ngawih sak aham ngaih nih nyng," tina hy nih. 38 Cawk Jesu ing, "Ik-oeih nani thoeh ve am sim hy nik ti. Ka aawk hly kawi boet ve nami aw hly thai nawk nu?" Baptisma ka huh hly kawi ve nani hu hly thai nawk nu?" tina qawi hy. 39 Cekkqawi ing, "Oeih, hu thai lawt kawng nih nyng," tina hy nih. Jesu ing, "Kai ing ka aawk hly kawi boet ce aw thai kawm nih tiksaw ka huh hly kawi baptisma awm hu thai kawm nik ti, 40 Cehlai kak tang ben ingkaw kak cawng benawh ngawih thainaak taw kai ak cam amni, a hoop peek ak thlangkhqi ham ni," tina qawi hy. 41 Ce ak awi ce thlanghqa tloek ing aming zaak awh Jakob ingkaw Johan a khan awh amik kaw am law hy. 42 Jesu ing a mingmih ce kutoet na khy khqi nawk, "Gentel ukkungkhqi ing a mimah Gentelkhqi ak khan awh boeina ami awm ce sim u hyk ti, diyh hun ak sang na ak awmkhqi ing a mingmih ce a ngaihnaak a myihna uk uhy. 43 Cehlai nangmih taw

cemyihna am awm kawm uk ti. Nangmih anglakawh u ingawm ak bau khyt na awm a ngaih awhtaw nangmih a tyihzoeih na awm seh. 44 U awm lamma na awm ak ngaih ingtaw nangmih boeh a tamnaa na awm seh. 45 Ikawthi thlanghqing Capa ing za thlang bibi sak aham am law nawh, thlang a bi ak bi ham ni a law, thlang khawzah hulnaak aham a hqinqnaak ak pe aham nani a law," tinak khqi hy. 46 Cekcoengawh Jeriko khaw na ce pha uhy. Jesu ing a hubatkqi, thlang kqeng mi khawk bau awhkawng ami ceh hui awh, mikhyp pynoet, Timai a capa. Bertimai ak mingnaak, taw lam keng awh ngawi nawh a kut dun hy. 47 Nazareth khaw awhkaw Jesu ni ak cet tice ang zaak awh, "David Capa, Jesu, kai nim qeen lah!" tinawh khy hy. 48 Thlanghqi ing awm dyn aham zyi uhy, cehlai anih ing, "David Capa kai nim qeen lah!" tinawh khy hy. 49 Jesu ing dyi nawh, "Anih ce khy lah uh," tinak khqi hy. Cedawngawh cawkhaw mikhyp ce khy uhy, "Nang ngaih qep sak nawh dyi lah, nik khy nyng," tina hy. 50 Anih ing a hi ce khawng nawh ang peh doena Jesu a venna cet hy. 51 Jesu ing, "Nak khanawh ikaw sai pek ham na ngaih?" tina hy. Cawh, mikhyp ing a venawh, "Rabboni, huh thai ngaih hy nyng," tina hy. 52 Jesu ing a venawh, "Cet hlah, nak cangnaak ing ni qoei sak hawh hy," tina hy. Bawbet awh amik ce dai nawh Jesu a hu awh bat pahoei hy.

11 Jerusalem ce pha law tawm unawh Bethphage ingkaw Bethani khaw awhkaw Olive tleng ce ami pha law awh, a hubat thlang pakhih ce haina tyi nawh, 2 ani venawh, "Nani haa i awhkaw khaw ak awmna cet nih nawh khawk khuina nani lut awh, u ingawm a mang ngawihnaak hlan, laa ca amik pai ce hu kawm nik ti. Suut nih nawh sawi law nih. 3 U ingawm, "Ikaw hamna nani sai?" a ti awhtaw, 'Bawipa ing ngoe hy, thak law sak tlaih bit kaw,' tina nih," tina qawi hy. 4 Cekkqawi ce cet nih nawh vawng chawmkeng a venna, laa ca amik pai ce hu yi nih. Laa ca ce a ni hlan awh, 5 cawkhaw ak dyikhqij ing, "ikaw hamna laa ce nani hlam?" tina uhy. 6 Jesu ing a yn aymiyhna kqawn pe nih nawh cekkhqi ing ceh sak uhy. 7 Laa ca ce Jesu venna sawi hy nih, cawh hikhqij ce laa ca ak khan awh phaikh unawh, ak khanawh ngawi hy. 8 Thlanghqi ing hi ce lam awh phaikh pe uhy, thlang vang ing thingbupkhqi ce chawm unawh lam awh phaikh pe uhy. 9 Haina ak cekkhqi ingkaw hu benna ak lawkhqi ing, "Hosanna!" "Bawipang ming ing ak law taw a zoseen seh!" 10 "Ak law hly kawi ni pa David a qam taw zoeksang na awm seh!" "Sawsang soeih awh Hosanna!" tinawh khy uhy. 11 Jerusalem khawk khuina Jesu taw cet nawh bawkim ak khuina lut hy. Ik-oeihkhqi ce teok nawh khaw a my hawk a dawngawh, thlanghqa lhlaih tloek mi Bathani khaw na cet tlaih uhy. 12 A khawngawi awh Bathani khaw awhkawng ami law tlaih awh, Jesu taw ak phoen cawi hy. 13 Ak hla nakawng a hawk hoeng na ak awm thai thing ce hu hy, ak thaik awh ym voei nu tinawh a kung na pan hy. Cehlai a pha awh, thai a qahnaak tym na ama awm dawngawh a hah hqoeng ce hu hy. 14 Cawh thai thing na ce, "Itykawm nak thaikh ve u ingawm koeh ai voel seh," tina hy. Ce ak awi ce a hubatkqi ingawm za lawt uhy. (aiōn g165) 15 Jerusalem ami pha awh Jesu ing bawkim khuina lut nawh ik-oeih ak zawikhqi ingkaw ak thlaikhqi ce hqek khqi hy. Tangka ak thungkhqi a caboeikhqi ce khuphlet pe nawh kqukku ak zawikhqi ang ngawihnaak khqi awm khuphlet pek khqi hy. 16 Ik-oeihkhqi ce bawkim khui awhkawng am khyt sak khqi hy. 17 Ami venawh: 'Ka im ve pilnam thlanghqi a cykahnaak im na awm kaw,' tinawh geena am awm nawh nu? Nangmih ingtaw qukaikhqi ak khui ak kawh na nami sai," tinak khqi hy. 18 Khawsawih boeikhqi ingkaw anaa awi cawngpyikungkhqi ing ce akawng aming zaak awh amah ami himnaak thai ham lam ce sui uhy, anih a cawngpyinaak awh thlang kqeng ak kawpoek a kyi a dawngawh, anih ce kqjih uhy. 19 Khaw a my law awhtaw khawk bau ce cehta

uh. 20 A khawngawi mymcang ami ceh tlaih awhtaw, thai thing ak kqa dyna a koh ce hu uhy. 21 Piter ing poek hqoet nawh Jesu a venawh, "Cawngpyikung, toek lah! thai thing nang ing na zyh ce thi hawh hy cel" tina hy. 22 Jesu ing, "Khawsa awh ce cangnaak ta lah uh. 23 Awitak ka nik kqawn peek khqi, u ingawm vawhkaw tleng na ce 'Thoeih nawh tulii na khawng qu lah' tinawh upvoetaak taak kaana ak kqawn ce coeng ngai ngai kaw, tinawh ak cangnaak awhtaw, a ti amyihna awm pekaw. 24 Cedawngawh ka nik kqawn peek khqi, nangmih ing cykcahnaak ing ik-oeih nami thoeh awh hu hawh nying tinawh cangna uh, cawhtaw hu kawm uk ti. 25 Cykcah aham naming diyh awh nak khan awh ik-oeih ak sai thawlh a awm awhtaw geen lamma sang uh, cawh ni khawk khan nakaw ak awm nangmih a Pa ing nangmih a thawlhnakkqi a nim qeen hly khqi lawt. 26 Cehlai am namim qeen awhtaw khawk khan nakaw ak awm nami Pa ingawm nangmih a thawlhnakkqi ce am nim queenkqi lawt kaw," tinak khqi hy. 27 Jerusalem pha law unawh, Jesu ing bawkim khuina a ceh awh, khawsoeih boeikhqi, anaa awi cawngpyikungkhqi ingkaw a hqamcakhqi ce a venna law uhy. 28 "Hanakaw saithainaak ing vawhkaw ik-oeihkhqi ve na sai? U ing vemyih ik-oeihkhqi ve a ni sai sak?" tinawh doet uhy. 29 Jesu ing, "Awi pynoet awh ni doet khqi cang vang. Nim hlat lah uh, cawh ni hanakaw saithainaak ing kai ing vawhkaw ik-oeihkhqi ka sai, tice kak kqawn hly lawt hy. 30 Johan a Baptisma ve - khan benna kaw nu, am awhtaw thlanghqing benna kaw nu? Kqawn law lah uhl" tinak khqi hy. 31 Cawh a mimah ingkaw a mimah ce doet qu uhy." Khan benna kaw ni tinaak mantaw, 'Cawhtaw kawthi amna mik cangnaak?' niti nak khqi kawh. 32 'Thlanghqing benna kaw ni,' ni tinaak bai mantaw," ti uhy. Cehlai thlang kqeng ce kqjih khqi bai uhy, thlang boeikhing Johan taw tawngtha ni, ami ti a dawngawh. 33 Cedawngawh Jesu a venawh ce, "Am sim unyng," tina uhy. Cawh Jesu ing, "Cawhtaw hanakaw saithainaak ing kai ing vawhkaw ik-oeihkhqi ka sai, tice ap kqawn lawt kawng," tinak khqi hy.

12 A mingmih a venawh nytahnaak ing awi kqawn pek khqi tlaih bai hy: "Thlang pynoet ing misur dum ta hy. Vawng a sung boeikh coengawh, misur suinaak aham dek co nawh a gehnaak im sa hy. Cekcoengawh misur dum khuiawh bi ak bi aham thlang vat nawh amah ce khawk hla na cet hy. 2 Misur qah bih tym a pha awhtaw a dum khuiawh kaw misur qah bih aham a tamnaa thlang pynoet dum khuiawh kaw bibikungkhqi venna tyi hy. 3 Cehlai cekkhqi ing tu unawh ami vyk coengawh kut hqawng na tyi uhy. 4 Cekkoeng bai awh tamnaa ak chang pynoet ce cekkhqi venna tyi bai hy; anih ce a lu awh vyk unawh chahqai na sai uhy. 5 Ak chang tamnaa ce tyi tlaih bai hy, cehlai cekkhqi ing anih ce him uhy. Cekcoengawh tamnaa khawzah tyi hlai hy, cekkhqi ing a vang ce vyk unawh a vang ce him uhy. 6 Cawhtaw tyih aham a lungnaak soeih a capa pynoet doeng ni a awm hawh. A hukhit natawa a capa ce tyi hy, 'Ka capa taw kqihchah na kawm uh,' tinawh poek hy. 7 Cehlai dum bibikungkhqi ing, "Anih ce qo ak pangkung ni ve. Law uh, him unawh a qokhqi ce ningnih aham awm seh," ti uhy. 8 Cedawngawh anih ce tu unawh ami him coengawh vawng ak ceng na khawng uhy. 9 "Cawhtaw misur dum ak takung ing cekkhqi ce ikawmyihna a tinaak khqi kaw? Law kawm usaw dum bibikungkhqi boeikhing ce a him coengawh misur dum ce tlak chang kut awh pe kaw. 10 Vawhkaw khaw cabu awi ve am nami noet nawh nu? 'Im ak sakunkhqi ing ami qoeng lung ce, a kil awhkaw phu ak awm soeih na awm hawh hy; 11 ve ve Bawipa ing a sai ni, nimik huh awh kawpoek kyi na awm hy, a tive," tinak khqi hy. 12 A mingmih ni ak kqawn sih khqi tice ami sim awh amah ce tu thai aham a tym leek ce sui uhy. Cehlai thlang kqeng ce amik kqjih a dawngawh anih ce cehta uhy. 13

Cekcoengawh ak awih kqawn awh a thawlhnak tu peek aham Farasikhqi ingkaw Herod ak tlhang pynoet ce Jesu a venna tyi uhy. 14 Cekkhqi ing a venawh. "Cawngpyikung, nang ing ak thym ni nak kqawn tice ni sim unyng. U a haa awm am toek hyk ti, tlhang pek a bonaak am na toek a dawngawh; Khawsa alam ce awitak na tlhang cawngpyi hyk ti. Kaisar a venawh mangmu peek aham ak thum nu? amak thym nu? 15 Ka nik pe hly nu, am ka nik pe hly nu? tina uhy. Cehlai Jesu ing a mingmih a qaai kqawn ce sim hqet nawh, "Ikaw hamna kai a thawlhnak ce nami sui uh? Denari ce hawlaw lah uh, toek lah vang," tinak khqi hy. 16 A mingmih ing Denari ce pe uhy, cawh, "Vawhkaw myihlip ve u ang myihlip nu ve? U ang ming nu ve?" tinak khqi hy. Cekkhqi ing, "Kaisar," tina uhy. 17 Jesu ing a mingmih a venawh, "Kaisar a them ce Kaisar a venawh pe uh, Khawsa a them taw Khawsa venawh pe uh," tinak khqi hy. Cawh anih ak khan awh amik kawpoek kyi soeih hy. 18 Cawh thawh tlaihnak am awm hy, amik ti Sadusikhqi ingawi doet aham a venna law uhy. 19 "Cawngpyikung, Mosi ingtaw, tlhang ing a zu lo hlai hy, ca a taak kaana a thihi taak awhtaw a naa ing a zu ce pang kawmsaw ak taipa aham ca taak pekaw, tinawh qee law hy. 20 Cingnahqui tlhang khqih awm uhy. A hqamkhit ing a zu lo moe ca taak kaana a zu ce thihi tahi, 21 A pakkhih naak ing cawhkaw nu ce pang hy, ca taak kaana thihi ta bai hy. Ceamyihna a pakthum naak ingawm zu ce thihi ta bai hy. 22 Cingnahqui tlhang khqih tloek ing cawhkaw nu ce zu na boehi hlai uhy, ca taak kaana thihi ta boehi uhy. A hukhit na taw nu ce awm thi lawt hy. 23 Thawh tlaihnak khawngi awh cawhkaw nu ce a u a zu na a awm kaw, tlhang khqih ing zu na boehi bai usaw?" tina uhy. 24 Jesu ing ami venawh, "Ve ak caming ni ka ti naming poeknaak a hqee hy, Khawsa cauk ciim ingkaw Khawsa ak thaawmnaak am nami sim ak camawh? 25 Thlak thikhqi ami thawh tlaih awhtaw nupa chungvaanaak am awm voel kawm saw, khan nakaw khan tlhangkhqi amyihna awm hawh kawm uh. 26 Thlak thi thawh tlaihnak awh - Mosi ak cabu khuiawh, thingbup akawng caqee ce am nami noet khawi nawh nu? Khawsa ing Mosi a venawh, "Kai taw Abraham Khawsa, Isak Khawsa ingkaw Jakob Khawsa na awm nyn," a ti ce? 27 Anih cetaw thlak thikhqi a Khawsa na am awm nawh, thlak hqjngkhqi a Khawsa nani a awm. Nangmih ing poek thawlhi soeih hyk ti," tinak khqi hy. 28 Caqeebung tlhang pynoet ce law nawh awi aming oelh qu ce hu hy. Jesu ing awi ak leek caana hlat pehy tice a huh awh, "Awipeek boeih boeih ak khuiawh han ak awipeek nu awihtung soeih? tinawh doet hy. 29 Jesu ing, "Awipeek awihtung soeih taw veni: 'Ngai lah uh, Aw Israaelkhqi, ningnih a Bawipa Khawsa taw pynoet doeng ni. 30 Bawipa na Khawsa ce nak kawlung boeih ing, na hqjngnaak boeih ing, na myihla boeih ing, nak kawpoek boeih ing, nak thaawmnaak boeih ing lungna. 31 A pakhiih naak taw veni: 'Na imceng ce namah a pum myihna lungna lawt kawp ti, a tive. Vekkqawi anglakawh ak bau khqoet awipeek am awm voel hy," tina uhy. 32 Ce ak tlhang ing, "Cawngpyikung, nak kqawn ce nep hy. Khawsa pynoet doeng ni a awm, na tice thym hy. 33 Nak kawlung boeih, nang zaaksimnaak boeih ingkaw nak thaawmnaak boeih ing lungna nawh, imceng awm nimah a pum myihna lungnaak ve hyih phumnaak boeih ingkaw bulnaak sainaak boeih boeih anglakawh awm awihtung khqoet ni," tina uhy. 34 Anih ing cyihnaak ing awi hlat pehy tice Jesu ing a huh awh ce a venawh, "Nang ve Khawsa ram ing hla hyk ti," tina hy. Cawhkaw ingtaw u ingawm am doet hqa voel hawh hy. 35 Bawkim khuiawh Jesu ing a cawngpyi awh, vemyihna awi doet hy, "ikawmyihna anaa awi cawngpyikungkhqi ing Khrish ve David capa ami ti hy voei? 36 David amah ing Ciim Myihla ak caming: "Bawipa ing a boeipa a venawh: "Na qaalkhqi ce na khawk kaina ka taak hlan dy kak tang ben awh ngawi lah," tina hy. 37 David amah qoe ing, 'Bawipa' tinawh khy hy. Cawhtaw

ikawmyihna a capa na a awmnaak bai hy voei?" tinawh doet khqi hy. Thlang kgeng khawzah ing ak awi ce zeel doena ngai pe uhy. 38 A cawngpyinaak awh Jesu ing, "Anaa awi cawngpyikungkhqi awh ce nami cyih ta lah uh. Amingmih ing hikkidung a nawinawk na bai ngaih unawh ik-oeih zawihnaak hqang tlhang ing kqjchahnaak a peek ce ngaih uhy. 39 Sinakawk na ngawih hun ak nep nep awh aming ngawih ce lungna unawh buh veelnaak kung awh a qyp ak awm ngawihnaakkhqi awh aming ngawih ce lungna uhy. 40 Nuhaikhqi a im ce qawt pe unawh tlhang a huh awh ak dung soeih na cykcah uhy. Vemih ak tlhangkhqi ve ak tio soeih na toelhaak hu kawm uh," tinak khqi hy. 41 Tangka amik channaak bawm a haikep awh Jesu ce ngawi nawh tlhangkhqi ing bawkim tangka bawm khuiawh tangka amik chan ce toek hy. Boei tlhang khawzah ing tangka khawzah zah chan uhy. 42 Cawh nuhai hahqah ca pynoet ce law nawh qawhnum tangka pakkhih ce chan lawt hy, cetaw penny pynoet ing myih hy. 43 A hubatkhqi ce a venna khy nawh a mingmih a venawh, "Awitak ka nik kqawn peek khqi, vawhkaw nuhai hahqah ca ing tlhang boeih anglakawh bawkim awhkaw tangka bawm khuiawh khawzah khqoet chan hy. 44 Cekkhqi ingtaw ami taak ngen ce pe uhy; cehlai anih ingtaw a haqahnaak ak khui awhkawng - a hqjingnaak aham a taak dyt ce pe boeih hy," tinak khqi hy.

13 Bawkim awhkawng ak cawn awh, a hubat tlhang pynoet ing a venna, "Cawngpyikung, toek lah! Lung ingkaw im a leek aih awm!" tina hy. 2 Jesu ing, "Vawhkaw im ak bau soeih soeih khqi my? Cehlai vawhkaw lung ami khoengkhqi pynoet ca awm a sim kaana ak awm pynoet awm am awm kaw," tina hy. 3 Bawkim a dan awh Olive tlhang awh ang ngawih awh, Piter, Jakob, Johan ingkaw Andru miikhqi ing ang hyp na doet uhy, 4 "Vawhkaw ve ityk awh a awm kaw? Cekkhqi boeih a cup tawm awh ikawmyih a hatnaakkhqi nu a awm kaw? tina uhy. 5 Jesu ing a mingmih a venawh: "Thlang ing a mami thailatnaak khqi ham ngaih ta lah uh. 6 Kai ang ming ing tlhang khawzah law kawm usaw, 'Kai ve anih hawh ni,' tinawh tlhang khawzah thailat na kawm uh. 7 Qaal tuksnaak ingkaw qaal tuksnaak awithang na ming zaak awh, koeh cat uh. Cemyihkhqi ce ak awm hly kawi qoe ni, cehlai a dytnaak ce law hyn kaw. 8 Peng ingkaw peng tuk qu kawm nih saw qam ingkaw qam tuk qu kawm nih. Hun ak chang chang kqang lipii tlai kaw, khaw se kaw. Vemyihkhqi ve naa awm tlawh ak qkannaak hyn ni. 9 Cedawngawh ngaihla lah uh. Nangmih ce awih kqawmnnaak a hun awh ni tukkhqi kawm usaw, sinakawk awh ni vyk nik paai khqi kaw. Kai a dawngawh qam ukkungkhqi ingkaw sangpahrangkhqi hiaiw simpikung na nami awmnaak thai aham dyi kawm uk ti. 10 Awithang leek ve penglum tlhang a venawh kqawn lamma na awm hyn kaw. 11 Thlang ing nim tuk khqi nawh awidengnaak a ni khyn khqi awh, "Ikawnu kak kqawn hly?" tinawh ngaih koeh kyi sak uh; cawh a ni sim sakkhqi ce kqawn kawm uk ti; ak kqawnkung taw nangmih am nawh, Ciim Myihla ni. 12 "Him qu hamna a koeinaa pa ing a koeinaa pa nawn, a pa ing a ca nawn ce tlhang a kut awh pe kawm uh, cakhqi ing ami nu ingkaw ami pakhqi ce qaal na kawm usaw thihi sak aham tlhang a kut awh pe kawm uh. 13 Kang ming ak camawh tlhang boeih ing ni sawh nak khqi kaw, cehlai a dytnaak dy ak yh ing thaawngnaak hu kaw. 14 "Amang dyihnaak man awh ak dyi, 'Tuih ak cu, tlhang ak hqe,' ce nami hu awh - ca ak noetkung ing zasim seh - Judah awh ak awm tlhangkhqi ce tlhang na cen useh. 15 Iptih na ak awm ing ipkhui nakaw ik-oeih lawh aham koeh nuk kqum seh. 16 Lo na ak awm ing hi ak lo na imna koeh hlat voel seh. 17 Ak phyihsukhqi ingkaw naaca ak takhqi ham ce a tym ce ikawmyihna nu a kyi hly hy voei! 18 Ce a tym ce chikca awh ama pha lawnaak aham cykcah lah uh, 19 Ikawthihsukhqi awh kqawn kyinaak ce ak cyk ca

awhkawng tuhdy amak awm man kyinaak na awm kaw - cemiyih ce ityk awh awm am awm hly voel qoe bai hy. **20** Bawipa ing ce a khawngi ce ama tawi sak mantaw, u awm am loet tikaw. Cehlai ak tykhqi, amah ak tykhqi ak caming ce a khawngi ce tawi sak hy. **21** Cawh u ingawm nangmih a venawh, "Toek lah uh, vawh ni Khrih a awm hy!" am awhtaw, "Toek lah cawh ni a awm hy ce!" a ni tinaak khqi awh ce koeh cangna uh. **22** Ikawtih Khrih-na ak sa qu ingkaw tawngka qawlkhqi ce awm kawmsaw kawpoek kyi ik-oeikhqi ingkaw hatnaakkhqi ce sai kawm uh, ang coeng thai man, ak tyh thlangkhqi awm qaa'i na kawm uh. **23** Cedawngawh nami cyih ta lah uh; a soep a kep nik kqawn peek khqi oet oet hawh nying. **24** Cehlai cemiyih kyinaakkhqi ce a law coengawh, "Khawmik ce than kawmsaw, pihla ingawm am vang voel kaw; **25** aihchikhqi ce khan nakawng tla kawm usaw, khan nakaw saithainaakkhqi ce tyn kaw;". **26** "Cawh thlanghqing Capa ing boeimang thaawmnnaak ing myi ak khan awh a law ce thlangkhqi ing hu kawm uh. **27** Anih ing ak khan ceityihkhqi ce tyi kawmsaw khawmdek kili awhkaw ak tyh thlangkhqi ce khawmdek a dytnaak awhkawng khawk khan a dytnaak dyna cawi sak kaw. **28** "Thai thing awhkaw nytahnaak ve cawng lah uh: a baai keh nawh a hahno ang cawn law awhtaw, khawhqa tym zoe hawh hy, tice sim uhk ti. **29** Cemiyih lawtna, ve ik-oeikhqi ve a awm law awh ce, anih a lawnaak taw zoe hawh nawh, chawmkeng awn dyi hawh hy tinawh sim uh. **30** Awitak ka nik kqawn peek khqi, Vawhkaw ik-oeikhqi a pha hlan dy taw, ve a khuk awhkaw thlangkhqi ve am khum tikaw. **31** Khawk khan ingkaw khawmdek taw khum hly hlai hy, kak awi taw ityk awh awm am qeng tikaw. **32** "Ce khawngi ce u ingawm am sim hy, khawk khan nakaw khan ceityihkhqi ingawm, Capa ingawm am sim hy, Pa doeng ing ni a sim. **33** A tym ce am nami sim a dawngawh, naming ngaih ta unawh a hylthal na awm lah uh. **34** Ce a tym taw thlang pynoet khaw lawng hla na ak cet ing myih kaw: Anih ing a im ce a tyihzawikhqi venawh cehta nawh, thlang pynoet boeih a venawh ami sai hly kawi ce pek khqi qip qip hy, cekcoengawh chawmkeng ak qehkung a venawh ang ngaih ta nawh qeh phaat aham kqawn pehy. **35** "Imkung ityk awh a law kaw, tice am nami sim a dawngawh ngaitaak doena qeh lah uh - khawm ben awh nu, thanlung awh nu, aikhwang awh nu, khawdai tawn awh nu a law kaw, tice am sim uhk ti. **36** Anih ce a pha law awh, nangmih nami ih ce koeh hu seh. **37** Nangmih a venawh kak kqawn law ve, thlang boeih a venawh kak kqawn hawh ni: 'ngaithaak doena qeh lah uh," tinak khqi hy.

14 Ak law hly khawngi a hihvoeinaak awh loentaak poei ingkaw hen amak boei phaihpi poei ce awm hly nawh, khawsoeih boeikhqi ingkaw anaa awi cawngpyikungkhqi ing Jesu ce tu unawh him aham a tym leek ce sui uhy. **2** Cehlai, "poei a awm khui awhtaw am seh, thlang kgeng awipungnaak awm hau kaw," ti uhy. **3** Bethani khaw awhkaw mynqai ak neh Simon a im awh buh ami ai awh, nu pynoet ing a phu ak tlo soeih bawktui ce a uum mahna lawpyi nawh law hy. A uum ce khoeng kqek nawh Jesu a lu ce syp pehy. **4** Cawhkaw ak awm thlangkhqi ing amik kaw ama law doena, 'Ikaw hamna bawktui cemiyihna ak plak? **5** Tangka denari zathum na awm zawi nawh khawdeng hahqahkhqi pe mai thaw voei? ti uhy. Cawhkaw nu ak khan awh ce vung uhy. **6** Cawh Jesu ing, "Sai seh nyng. Ikaw hamna nami lawlh plak? Anih ing kai aham ik-oeih leek sai law saw. **7** Khawdeng hahqahkhqi taw nangmih a venawh awm quiqah kawm uh, cedawngawh nami ngaihnaak awh a mingmih ce do a dan thai uhk ti. **8** Vawhkaw nu ing a sai thai ang cang ca ce sai hawh hy. Ka qawk a khoemnaak aham anih ing bawktui ing ni syp oepchoeh hawh hy. **9** Awitak ka nik kqawn peek khqi, ve khawmdek awh awithang leek amik kqawnnaak a hoih awh anih a ik-oeih sai ve amah simpoenaak

aham kqawn kawm uh," tinak khqi hy. **10** Cawh thlanghqa hlaihik ak khui awhkaw thlang pynoet, Juda Iskariot ce Jesu tu sak aham khawsoeih boeikhqi venna cet hy. **11** Anih ak awi ce khawsoeih boeikhqi ing aming zaak awh ym unawh tangka peek aham awi ta uhy. Cedawngawh anih ing tu sak thainaak aham a tym leek ce sui hy. **12** Hen amak boei Phaihpi poei ak cyk nyn, loentaak poei tuuca nawnnaak khawngi awh, a hubatkhiq ing a hu awh, "Loentaak poei buh veelnaak aham han a hun awh nu sai sak ham na ngaih?" tina uhy. **13** Cedawngawh a hubat thlang pakkih ce tyi hy, "Khawk bau khuina cet nih nawh, tuiam awh tui ak doeng ce hu kawm nik ti. Anih a hu ce hqutu nih. **14** Ipkhui na a lut awh imkung a venawh, "Cawngpyikung ing, 'ka hubatkhiq mi loentaak poei buh veelnaak aham ka pahnaak hly im ce hana a awm? tihy,' tina nih. **15** Anih ing ipkhan ak kau soeih, a qoek abah hqeet ce nih hum qawi bit kaw. Amah cawh myubuh ce sai kawm nik ti," tina qawi hy. **16** A hubat qawi ce khawk bau khuina cet nih nawh Jesu ing ak kqawn peek a myihna hu hy nih. Amah cawh loentaak poei buh veelnaak ce toen hy nih. **17** Khaw a my law awhtaw a hubat thlanghqa hlaihik ingkaw Jesu ce law uhy. **18** Caboei awh buh ami veel awh, a mingmih a venawh, "Awitak ka nik kqawn peek khqi, nangmih ak khui awhkaw thlang pynoet, kai mi buh ak vel hiah ing - kai ve ni zawi kaw," tinak khqi hy. **19** Cawh a mingmih ing kawseet doena pynoet coeng pynoet a venawh, "Kai amni my?" tina uhy. **20** A mingmih a venawh, "Thlanghqa hlaihik ak khui awhkaw thlang pynoet, kai inggawi buh beeik al zoep haif ceni. **21** Thlanghqing Capa ve amah akawng ami na qee hyt amiyihna a awm aham awm hy. Cehlai thlanghqing Capa thlang a kut awh ak pekung ce khaw na map hy! Anih ce ama thang mantaw nep bet hlai voei,"tinak khqi hy. **22** Buh ami vel huiawh Jesu ing phaihpi ce lo nawh, zeelhaak awi ak kqawn coengawh ek nawh, a hubatkhiq ce pehy, "Lo lah uh, ve ve ka sa ni," tinak khqi hy. **23** Cekcoengawh boet ce lo bai nawh, zeelnaak awi ak kqawn coengawh a mingmih a venawh pekkhqi bai hy, a mingmih ing aw bai uhy. **24** A mingmih a venawh, "Ve ve ka thi thlang khawzah aham ka hawk awikamnaak ni. **25** Ka nik kqawn peek khqi, misur tui ve Khawsa ram khuiawh ak thai na nangmih mi ni aawk hlan dy taw am aw voel tikawng," tinak khqi hy. **26** Laa ami sak coengawh Olive tlang na cet uhy. **27** Jesu ing a mingmih a venawh "Tuudoenkung ce vyk kawm usaw, tuukhqi ce kqeng sak zak zak kawm uh," tinawh qee sut a myihna nangmih boeih tlu kawm uk ti. **28** Cehlai ka thawh tlaih coengawh nangmih a haiawh Kalili na ana cet kawng," tinak khqi hy. **29** Piter ing, "Thlangkhqi boeih ing tlu bai u seiawm, kai taw cemiyihna am awm tikawng. **30** Jesu ing, "Awitak ka nik kqawn peek khqi, tuhngawi awh, oeih, tuhngawi am than awh, aai hihvoe ang khawng hlanawh namah goe qoe ing thumvoe nik khawng kawp ti," tina hy. **31** Cehlai Piter ing ak tlo khgoet na, "Nang ing thihi hiah aham awm nyng seiawm, am nik khawng qoe qoe tikawng," tina hy. Ak changkhqi ingawm cemiyihna tina lawt uhy. **32** Cekcoengawh Gethsemane ami ti a hun na ce cet uhy, cawh Jesu ing a hubatkhiq venawh, "Kak cykah huiauh vawh a nang ngawi uh," tinak khqi hy. **33** Piter, Jakob ingkaw Johan ce ceh pyi nawh, amah ce ly soeih nawh ngaih kyi doena awm hy. **34** A mingmih a venawh, "Kak kawlung ve thihaak khoek dy awh kak kaw se soeih hy. Vawh awm unawh qalqing caana awm kawm uk ti," tinak khqi hy. **35** Ak hla bet awh ua cet nawh, ang coeng thai awhtaw a tym ing ang khum taak naak thai aham dek awh koep doena cykah hy. **36** "Abba, Kapa, nang aham taw ik-oeih boeih boeih ve coeng thai hy. Vawhkaw boet ve ka venawh kawng khoe law lah. Cehlai kai ak Kawngaih na koeh awm seitaw nang ak Kawngaih myihna awm seh nyng," tina hy. **37** A hubatkhiq venna ang voei awh a mingmih ami na ih ce hu hy. Piter a venawh, "Simon nami ip nawh nu? khawnoek

pakhat khui kangna awm am nami qeh thai nawh nu? **38** Syknaak ak khuiawh amna ming tluuknaa thai aham qeh unawh cykcah lah uh. Myihla ingtaw ngaih lhai hy, pumsa ingtaw zai hqoeng hy," tinak khqi hy. **39** Cekcoengawh cet tlaih bai nawh ak kqawn hawh amyihna cykcah tlaih bai hy. **40** Ang voei tlaih bai awhtaw miikuung a naa khqi a dawngawh, ami na ih tlaih ce huk khqi bai hy. **41** A thumvoei naak awh ang voei tlaih bai awhtaw, a mingmih a venawh, "Tuhdy awh ip unawh naming dym hyn nawh nu? Khoek hawh hy! A tym pha law hawh hy. Toek lah uh, thlanghqing Capa taw tlak thawlhkhqi kut awh peek na awm hawh hy. **42** Tho uhl Cet hlah usih! Thlang a kut awh kai anik pekung ve vawh awm hawh hy!" tinak khqi hy. **43** Cemyilhna awi ak kqawn huili awh, thlanghqa lhaihik ak khui awhkaw thlang pynoet, Juda ce law hy. Anih ing thingboeng ingkaw zawzi ak pawm thlang kqeng ce khawsoeih boeikhqi, anaa awi cawngpyikungkhqi ingkaw a hqamcakhqi venawh kawng law pyi hy. **44** Thlang a kut awh amah ak pekung ing cekkhqi venawh huh simmaak ce sai pehy: "Kai ing ka mawk thlang ce hawh ni; tu unawh ak leek caana khy uh," tinak khqi hy. **45** Cekcoengawh Jesu a venna cet pahoei nawh, "Cawngpyikung" a tinaak coengawh mawk hy. **46** Cawh thlangkhqi ing Jesu ce tu unawh khyn uhy. **47** A mingmih a venawh ak dyi thlang pynoet ing zawzi ce phlawng nawh, khawsoeih boei a tyihzawih ang haa ce zek pe hlak hy. **48** "Kai ve quk-ai na ka awm nawh nu, zawzi ing thingboeng ing kai tu aham nami law?" **49** Myngwai nangmih a venawh awm nawh, tempul khuiawh ka ni cawngpyi khqi awh, am na mim tu. Cehlai Ca ciim awi ve a soep aham awm hy," tinak khqi hy. **50** Cawh a hubatkhqi ing lhah hyt unawh cehta boeh boeh uhy. **51** Hi doeng ak bai cadawng pynoet ing Jesu ce a huhu awh qym hy. Anih ce tu uhy, **52** Cehlai a hi bang nawh, ak pum kawlawng na cen valh hy. **53** Jesu ce khawsoeih boei khyt a venna khyn uhy, cawh khawsoeih boei khyt, a hqamcakhqi ingkaw anaa awi cawngpyikungkhqi boeih boeih ce kutoet na cun kyang uhy. **54** Piter ing ak hla nakawng khawsoeih boei khyt a vawng dyna qym hy. Cawh im ak qekhqi mi ngawi hiah lawt nawh mai awm lawt hy. **55** Khawsoihih boeikhqi ingkaw Sanhedrin awi kqawnkhqi boeih boeih ing Jesu ce ami thihs sak naak thai aham a thawlhaak ce sui pe uhy, cehlai ikaw am hum pe uhy. **56** Thlang kawhzah ing amak thym na thawl puk uhy, cehlai thawl amik puknaak awm am myih qu hy. **57** Cawh thlang pynoet ing dyi unawh vawhkaw amak thym sausi ce deng uhy: **58** "Thlang a kut ing a sak vawhkaw tempul ve hqe nyng khaw thumvoei khuiawh kut ing ama sak ak chang tempul sa tlaih kawng nyng, tinawh kqawn hy," tina uhy. **59** Cehlai a mimah a dyihthing awm am myih qu hy. **60** Cawh a mimah boeih a haiawh khawsoeih boei khyt ce dyi nawh Jesu ce doet hy, "A mingmih ak kqawn ve am nam hlat hly nawh nu? Vekkhqi ing nang thawl amik puk ve ikaw myihna a awmnaak?" tina hy. **61** Cehlai Jesu ing awm taak dym nawh kaw awm ap kqawn hy. Cawh khawsoeih boei khyt ing, "Nang ve Khrith, Zoseennaak Capa nu?" tinawh doet tlaih bai hy. **62** Jesu ing, "Oeih, thlanghqing Capa ing Bawimang thak awm tang ben awh ngawi nawh khan myi ak khan awh a law awh hu bit kawp ti," tina hy. **63** Cawh khawsoeih boei khyt ing a hi ce phleuh nawh, "Ikaw hamna dyihthing ak chang ni ngoe hly qee?" **64** Khawsa ak thekhanaak awi za hawh u tksaw kaw: Kawmyihna namik poek? tinak khqi hy. Cekkhqi ing thihs aham tyng na thawl sak boeih uhy. **65** Cawh thlang vang ing sawh uhy; amik ce zeen pe unawh, ami kuthlym ing thawng uhy, "Kqawn lahi!" tina uhy. Qaltoengkhqi ing sawi unawh vyk uhy. **66** Piter ce ipkai kawngma na a awm awh, khawsoeih boei khyt a tyihzawih nuca pynoet ce law hy. **67** Piter mai ak awm ce hu nawh, toek ceet hy. "Nang awm Nazareth Jesu ing awm hiah lawt hy nihk ti," tina hy. **68** Cehlai anih ing ciim hy. "Na ti ce am sim nyng ang zaak na awm am

zasim nyng" a tinaak coengawh chawmkeng benna ce cet hy. **69** Anih ce tyihzoeih nu ing amah cawh hu tlaih bai nawh, cawhkaw ak dyikhqi venawh, "Anih ve awm a mingmih khqjeng lak awh paa lawt hy," tinak khqi hy. **70** Cawh Piter ing hoet tlaih bai hy. A khoeh a awm coengawh, cawhkaw ak dyikhqi ing Piter a venawh, "Nang ve a mingmih ak khui awhkaw thlang qoe qoe lawt ni Kalili thlang na awm awm bai hyk ti," tina uhy. **71** Amah ing amah seet lo nawh, a mingmih a venawh, "Ve ak thlang namik kqawn ve am sim qoe qoe nyng," tinak khqi hy. **72** Cawh aai ce a hihvoeinaa khawng hy. Cawh Piter ing, Jesu ing a venawh, "Ai hihvoei ang khawng hlanawh thumvoei nik khawng kawp ti," a tinaak awi ce sim hqoet hy. Cedawngawh ak ak kaw se nawh kqang hy.

15 A ngawi mymcang hqit awh, khawsoeih boeikhqi, a hqamcakhqi, anaa awi geekunkhqi ingkaw Sanhedrin awi ak kqawnkungkhqi boeikhqi ing awi ce tlyk uhy. Jesuh ce pin unawh, Pilat a venna khyn uhy. **2** Pilat ing, "Nang ve Judakhqi a sangpahrang aw?" tinawh doet hy. Jesu ing, Oeih, nak kqawn a myihna awm hy," tina hy. **3** Khawsoihih boeikhqi ing thawlkhawzah puk uhy. **4** Cedawngawh Pilat ing doet tlaih hy, "Am nam hlat hly nawh nu? Ve zah thawl amik nik puk ve toek lah," tina hy. **5** Cehlai Jesu ing awi am am hlat hy, cedawngawh Pilat taw ak kawpoekna kyi hy. **6** Poei a awm hoei awh thawk tla pynoet ce ana hlah man uhy. **7** Cawh quk-ai thlang ak him Barabbas ak mingnaa thlang pynoet ce thawngim na awm hy. **8** Thlang kqeng ing Pilat a venawh a sai khawi amyihna sai peek aham thoeh uhy. **9** Pilat ing, "Juda sangpahrang ve lhah namik ngaih nu?" tinawh doet khqi hy. **10** Khawsoihih boeikhqi ing ami yyt a dawngawh a venna law pyi uhy tice anih ing sim hy. **11** Cehlai Pilat ing Barabbas ce a hlah thainaak aham khawsoeih boeikhqi ing thlang kqeng ce syk uhy. **12** "Cawhtaw Judah sangpahrang, ami ti vetaw ikawmyihna ka sai kyan?" tinawh Pilat ing doet khqi hy. **13** Cekkhqi ing, "Thinglam awh taai!" tinawh khy uhy. **14** Pilat ing, "Kawti nawh nu? Ikaw thawlhaak a sai awh nu?" tinawh doet khqi hy. Cehlai cekkhqi ing khawthekhqaet na, "Thinglam awh taai!" tinawh khy bai uhy. **15** Thlang kqeng kawzeel sak a ngaih awh, Pilat ing Barabbas ce hlah pek khqi hy. Jesu taw a vyk coengawh, thinglam awh taai aham cekkhqi kui awh pehy. **16** Qalkapkhqi ing Jesu ce praetorium ami ti boei a ipkhui na sawi uhy; qaalkapkhqi boeikhqi ce kutoet na khy uhy. **17** Hik thim ce bai sak uhy, hling ce lumyk na sai pe unawh myk sak uhy. **18** Cekcoengawh, "Juda sangpahrang a hqinglu kyi seh!" tina uhy. **19** A lu awh sawngqawh ing vyk unawh sawh a phih uhy. A haiawh khuk sym doena koep pe unawh bawk uhy. **20** Ami thekhanaak coengawh, hik thim ce suh pe unawh amah a hi ce bai sak tlaih uhy. Cekcoengawh thinglam awh taai aham cekhpuy uhy. **21** Cygene khaw awhkaw thlang pynoet, Alexander ingkaw Rufus a pa Simon, kqawng nakaw ak law ce tu unawh, thinglam ce kawh sak ngah ngah uhy. **22** Jesu ce Golgotha ami ti hun benna ceh pyi uhy (cece "luquh hun," tinaak ni). **23** Murra ing amik kqit misur tui ce pe uhy, cehlai am aw hy. **24** Cekcoengawh thinglam awh taai uhy. Taicung zyk unawh a hi ce tei uhy. **25** Khawnoek pakthum awh thinglam awh taai uhy. **26** Thawl amik puknaak ca ce: JUDA KHRIH SANGPAHRANG, tinawh qee pe uhy. **27** Thlak thawlq wawi pakkhiih awm thinglam awh pynoet ce ak tang ben awh pynoet ce ak cawng ben awh taai hiah uhy. **28** Thlak thawlkhqi inggawi noet sih hiah uhy," ti ak awi ce soep hy. **29** Cawhkaw ak thoek cawnkhhqi ing ami lu khyp sih unawh, "Aw za! Nang tempul hqe nawh am thum nyn awh ak sa tlaih, **30** thinglam awhkawng kqum nawh namah ingkaw namah hul qu lah thaw vohie titi" tina uhy. **31** Cemyih lawtna khawsoeih boeikhqi ingkaw anaa awi cawngpyikung khqi ingkaw a mimah ingkaw a mimah anglakawh anih ce, "Thlak chang taw thaawng hlai hy, amah

ingkaw amah taw am thaawng qu thai hy! **32** Khril Israelkhqi a sangpahrang, ti unawh kami nik cangnaak aham, tuh thinglam awhkawng nuk kqum law lah thoeih ti," tina uh. Amah ingqawi thinglam awh ami taai thlang pynoet ingawm anih ce the kha na hy. **33** Khawnoek paquk awhkawng pakow dy dek pum awh khaw than hy. **34** Khawnoek pakow awh ce Jesu ing khawteh na, "Eloi, Eloi, Lama sabachthani" tinawh khy hy, (cece "Ka Khawsa, ka Khawsa, kawthi nani cehtaak?" tinaak ni.) **35** Cawkaw amik dyikhqi ing aming zaak awh, "Ngai lah uh, Elijah khy hy ce," ti uh. **36** Thlang pynoet ce dawng nawh hlapawt ce misur tui ak thui awh a hluk coengawh cungkui awh tlet nawh Jesu ce awk sak hy, "Toek poek poek lah usih nyng. Elijah law nawh ak lo law hly nu?" anih ing thi. **37** Cawh Jesu taw khawteh na khy nawh kawn zip hy. **38** Tempul awhkaw hizan ce a saw nakawng ak kai dy pakkhih na teek hy. **39** Cawh Jesu a haiawh ak dyi, qalkap zakhat ak ukkung ing ak khy doena. Jesu a thiit ce a huh awh, "Ve ak thlang ve Khawsa Capa tak ni!" tinawh kqawn hy. **40** Nukhqi ingawm ak hla nakawng qeh lawt uh. Cawkaw nukhqi taw Meri Magdalene, ang no Jakob ingkaw Joses anu Meri ingkaw Salome, vetloek ve. **41** Kalili qam na vawhkaw nukhqi ve a hu awh bat unawh a ngaihnaak awh ak dodankungkhqi na awm uh. Amah ingqawi Jerusalem na amik law hiah nukhqi awm khawzah awm uh. **42** Ce nyn taw coekqoeknaak nyn (Sabbath than khawng) na awm hy. Khawmy ben a pha awh. **43** Arimathai khaw awhkaw khawksimkung kqjihchah kap thlang pynoet, Khawsa qam ak qeh Joseph ce Pilat a venna qaal leeknaak ing cet nawh, Jesu a qawk ce thoeh hy. **44** Anih thi hawh hy, tice Pilat ing ang zaak awh ak kawpoek na kyi hy. Qalkap zakhat ak ukkung ce khy nawh, Jesu ak thi hawh tang nu, tinawh doet hy. **45** Qalkap zakhat ukkung a ven awhkawng thi tang hawh hy tice ang zaak awh, Jesu a qawk ce Joseph a venawh pehy. **46** Joseph ing hi thlai nawh qawk ce lo hy, a zawl coengawh thel ak cawh hqeeq phyi khuina pup hy. Cekcoengawh phyi chawmkeng ce lungpei ak bau soeih hlum nawh tieng hy. **47** Meri Magdalene ingkaw Joses a nu Meri ingawm ak pupnaak a hun ce sim lawt hy nih.

16 Sabbath nyn a boeih coengawh, Meri Madalene, Jakob a nu Meri ingkaw Salome ing bawktui tlhai nih nawh Jesu hluk hamna cet hy nih. **2** Khaw khqih nyn khui awhkaw khawngi lamma cyk mymcang hqit khaw a law kqoeng awh, phyi na ce cet uh, **3** cawh, "U ing nu lung a hlum law lah voei?" ti uh. **4** Cehlai ami toek awh, cawkaw lung ak bau soeih ak thoeh quce na hu uh. **5** Phyi ak khuina ce lut nawh, cawh cadawng pynoet hik bawk bai nawh tang ben awh ak ngawi ce hu unawh cat uh. **6** Anih ing, "Koeh ly uh. Thinglam awh ami taai, Nazareth Jesu ni nami sui hy, tho tlhai hawh hy! Vawh am awm voel hy. Ami tloengaak ve toek lah uh. **7** Cehlai cet unawh a hubatkqi ingkaw Piter a venawh kqawn pe uh, 'Nangmih a haina Kalili awh cet hawh hy. Amah ing ak kqawn a myihna amah cawh ce hu kawm uk ti,' tina uh," tinak khqi hy. **8** Thyn unawh kawpoek kyi doena, cawkaw nukhqi ce phyi awhkawng dawng uh. Amik kqih a dawngawh u a venawh awm ap kqawn uh. **9** (note: The most reliable and earliest manuscripts do not include Mark 16:9-20.) Khaw khqih nyn khui awhkaw khawngi lamma cyk awh Jesu ing a thawh coengawh, lamma cyk awh ak kawh khui awhkaw qaaikhqi a hqek peek Meri Madalene a venawh dang pehy. **10** Anih ce cet nawh Jesu ingqawi kutoet na amik awm khawikhqi ingkaw lungnat za nawh ak kqangkhqi venawh kqawn pehy. **11** Jesu taw hqing nawh Meri Madalene ing hu hawh hy tice a mingmih ing a ming zaak awh ap cangna uh. **12** Cekcoengawh amingmih khuiawh thlang pakkhih ani khaw benna a ni ceh huiawh myime ak lawhana dang pe qawi hy. **13** Cekkqawi ing awm a hubat

ak changkhqi venna kqawn pe hy nih, cehlai a ningnih ak awi awm ap cangna uh. **14** Cekcoengawh thlanghqa hlaioet a venna buh ami ai huiawh dang pek khqi bai hy, a thawh tlhai coengawh amah ak hu khqik awi ce upvoet unawh ama mik cangnaak qoe qoe a dawngawh a mingmih ce zyi khqi hy. **15** A mingmih a venawh, "Khawmdek penglum awh cet unawh a sai ik-oeh boeih a venawh awithang leek ve kqawn law lah uh. **16** U ingawm cangna nawh Baptisma ak hu ingtaw thaawngnaak hu kaw, cehlai amak cangnaak ak thlang taw thawlak sak na awm kaw. **17** Ak cangnaak thlangkhqi taw vawhkaw hatnaakkhqi ing hqut phaat kaw: kang ming ing qaaikhqi hqek kawni uh; awih thai ing pau kawm uh, **18** ami kut ing khquikhqi ce tu kawn uh; thihnaak sykhqi ce aw mai useiawm, ikaw am tikaw; tlak tlo ak khan awh kut tloeng kawn usaw qoei kawn uh," tinak khqi hy. **19** Bawipa Jesu ing a mingmih a venawh awi ak kqawn coengawh, khawk khan na zoek qu hqui nawh Khawsa ak tang ben awh ce ngawi hy. **20** Cekcoengawh a hubatkqi ce cet unawh penglum awh awithang leek ce kqawn uh, Bawipa ing a mingmih hawnaak ing bibi nawh, ik-oeh saithainaakkhqi ing ak awi ce caksak hy.

Luke

1 Cawhkaw ik-oeh ningnih anglakawh ak soep ce thlang khawzah ing qee aham hlah hawh uhy, 2 ak cyk ca awhkaw ing dyihting na awm nawh ce ak awi dawngawh bi ak bikhqi ing nangmih a venawh amik kqawn law patoe lawt amyihna. 3 Cedawngawh cawhkaw ik-oeh ce akung awhkawng kamah qoe ing ak nep nanym a nai nawh, ka qee law patoe mantaw nep voei tinawh poek nyng, ak leek soeih Theophilus. 4 cawh ni thlang ing a ni pyinaak awi ce ak nep caana nami sim hly thai. 5 Judea sangpahrang Herod chan awh, Abijah cakaw khawsoeih pynoet, ang mingna Zekarih ce awm nawh Elizabeth ak mingnaak Aaron cahlah ce zu na hy. 6 Khawsa mik huh awh thlak dyng na awm nih nawh, Bawipa ak awipeekhqj ingkaw sai hly kawi boeih boeih ce coet amak kapna sai hy nih. 7 Cehlai Elizabeth taw cieng nawh ca am ta hy nih; ani kum awm pacawng hawh hy nih. 8 Zekariah a poek ben ing Khawsa haiawh Khawsa bibinaak tym a pha a dawngawh, 9 anih ing khawsoeihkhqi a sai khawi amyihna, Bawipa a bawkim khuiawh bawktui phum aham a tym ing pha hy. 10 Bawktui phumnaak a tym a pha awh, Khawsa ak bawkkhqi boeih boeih ce a lengna cyckah uhy. 11 Cawh Bawipa ak khan ceityih ce bawktui phumnaak bawkthang tang benawh dyih pehy. 12 Zekariah ing a huh awh ang ngaih kyi nawh ak kqjih na awm kqjih hy. 13 Cehlai khan ceityih ing a venawh: "Zekariah, koeh kqjih; nak cykcahaak ce Khawsa ing za hawh hy. Na zu Elizabeth ing cakpa ni taak pe Kawmsaw, Johan tinawh ang ming sui kawp ti. 14 Nang kaw anik zeel sak ingkaw a nik awmhly sak na awm kaw, anih a thang awh thlang khawzah zeel kawm uh, 15 kawtih anih taw Bawipa a mik huh awh thlak bau na awm kaw. Misur tui, am awhtaw ak chang qui kawi ik-oehi qoe am aw kaw, a thang awhkawng anih taw Ciim Myihla ing be kaw. 16 Anih ing Israel thlang khawzah ce a mimah a Bawipa Khawsa venna sawi tlaiah kaw. 17 Pakhqi ak kawlung ce cakhqi benna hawi sak ham, awi amak zakhqi ce thlak dyngkhqi cyihnaak benna mang sak ham, Bawipa ham lammana thlang ak toen hamna Elijah ang myihla ingkaw ak thaawmnaak taak ing Bawipa haiawh a na cet kaw," tina hy. 18 Zekariah ing khan ceityih a venawh, "Ve ve ikawmyihna ka simnaak kaw? Kamah awm pacawng nyng ka zu awm nucawng hawh hy," tina hy. 19 Khan ceityih ing a venawh, "Kai ve Khawsa haiawh ak dyi Gabriel ni, nang a venawh awi kqawn aham ingkaw vawhkaw awithang leek kqawn aham tyihna kak awm ni. 20 Cehlai nang ing, a tym a khoek awh ak pha law hly kawi kak kqawn law ve am nak cangnaak a dawngawh, cawhakw ik-oehi a pha hlan dy awimyh kawp ti," tina hy. 21 Cawh thlangkhqi ingtaw a leng nakawng Zekariah ce qeh uhy, kawtih bawkim khuiawh a awm khing hy voei, ti unawh a ming ngaih kyi hy. 22 Anih ce a law awhtaw, awi am pau thai voel hy. Awi ak kqawn kaana a kut ing a veah a dawngawh, a mingmih ing bawkim ak khuina mik hatnaak hu pakaa hy ti uhy. Cedawngawh Zekariah ing amingmih venawh kut ing zavaih nawh awimyh na awm hy. 23 A bibinaak tym a boeih coengawh taw im na hlat hy. 24 Cekcoengawh taw a zu Elizabeth ce phyihsu nawh hla nga khui thlang a venawh am dang hy. 25 Elizabeth ing, "Thlang venna kang ming seetnaak thoeng hamna Bawipa ing thlang huh awh vemyihna ni sai pe hy," tihy. 26 Elizabeth a pumqihnaak hlak kquk a law awh, Khawsa ing khan ceityih Gabriel ce, Kalili qam Nazareth khaw awhkaw, 27 David cadil na ak awm, Joseph ak mingnaak ing zunaak aham am kang nulak cym a venna tyi hy. Cawhkaw nulak cym taw Meri ming na hy. 28 Khan ceityih ing a venawh, "Na zoseen hy, nang, Khawsak kaw ak tawng! Bawipa taw na venawh awm hy," tina hy. 29 Ce ak awi awh Meri taw ak ngaihna kyi nawh, "ikawmyih ak awi hy voei

nu," tinawh poek qu hy. 30 Cehlai, khan ceityih ing a venawh, "Meri, koeh kqjih, Khawsa ak kawngaihnaak hu hawh hyk ti. 31 Phyihsu kawm tiksaw cakpa ta kawp ti. 32 Anih taw thlak bau na awm Kawmsaw, Sawsang soeih Cakpa ti kawm uh; Bawipa Khawsa ing a pa David a ngawihdoelh ce pe Kawmsaw, 33 Jakob cadil lakawh kumqui dyna boei loet kawsaw, a ram ing am dyt voel tikaw," tina hy. (aiōn g165) 34 Cawh Meri ing khan ceityih a venawh, "Cece ikawmyihna ang coeng naak thai kaw? Pa am ka taak ak kaa?" tina hy. 35 Khan ceityih ing, "Ciim Myihla ce nak khan awh awm Kawmsaw, sawsang soeih a saithainaak ing ni siing khoep kaw; cedawngawh thlak ciim ak thang law hly ce Khawsa Capa tinawh khy kawm uh. 36 Na cakaw Elizabeth awm a nucawng hunu phyihsu nawh; tuhawh hlak kquk law hawh hy. 37 Kawkit Khawsak awi ak cawn boeih ing them a saithai kaana am awm kaw," tina hy. 38 Cawh Meri ing, "Kai taw Bawipa a tamnaa ni, nak kqawn amyihna kah khan awh awm seh nyng," tina hy. 39 Cawh Meri ce tho nawh Judah qam tlang na ak awm khaw pynoet awh ce ang tawnna cet hy. 40 Zekariah a ipkhui na ce lut nawh Elizabeth ce voem hy. 41 Elizabeth ing Meri ak awi ce ang zaak awh, ak phoen khui nakaw naaca ce tat hy, cawh Elizah ce Ciim Myihla ing be hy. 42 Anih ing khawteh na: "Nang taw nukhqi boeih anglakawh thlang zoseen nu ni, nak khui awhkaw na ca awm a zoseen hy. 43 Ka Bawipa a nu, ka venna na law ve ikawmyihna hvoei?" 44 Ngaih lah, Nani voemnaak awi kang zaak awhkawng kak phoen khui nakaw naaca ve a zeel aih awh tat hy. 45 Cedawngawh a venawh Bawipa ing ak kqawn peek ce soep kaw, tinawh ak cangnaak nu taw a zoseen hy," tina hy. 46 Meri ing: "Ka hqingnaak ing Bawipa kyihcawh nawh, 47 kang myihla awm ak hulkung Khawsa venawh zeel soeih hy. 48 A tamnaa nu a dungvoengnaak qeen nawh; Ngaih lah, tuhawhawng cadil boeih ing thlang zoseen nu tinawh nik khy kawm uh. 49 Kawtih tha ak awm soeih ing kak khan awh ik-oehi ak bau soeih sai hawh hy, ang ming awm cimcaih soeih hy. 50 Amah ak kqjihchahkhqi cetaw cadil dyna awm qeen khqi hy. 51 A baan ing ak thaawmnaak ce dang sak nawh, thlak oek qu khqi taw a mik poek qunaak ing theeh khqi hy. 52 Ukkungkhqi ce a mi ngawihdoelh awhkawng kqum sak khqi nawh dungvoeng na ak awmkhqi ce zoeksang khqi hy. 53 Ak phoen ak cawi khqi ce them leek ing phyi sak khqi nawh, boeikhqi ce kut hqawng na tyi khqi hy. 54 A lungqeennaaak ce poek khak nawh a tyihzoeih Israelkhqi ce bawm hamna, 55 Abraham ingkaw a cadil a venawh qeennaak ce ta poeja hy," tihy. (aiōn g165) 56 Meri ce Elizabeth a venawh hla thum tluk a awm coengawh a im na hlat hy. 57 Naa a thangnaak tym a pha awh, Elizabeth ing cakpa ce ta hy. 58 A imcengkhqi ingkaw a cakaw paqengkhqi ing Bawipa ing anih ak khan awh geennaak soep sak tice a ming sim awh, zeel pyi uhy. 59 Ak kqheet nyn awh chahhui geet aham naaca ce khyn hy nih, cawh a pa ang ming Zekariah ce sui aham cai hlai uhy, 60 a nu ing, "Amni! Johan tinawh ni sui aham awm hy, tinak khqi hy. 61 Cekkhqi ing, "Cemyih ang ming ce na cakaw paqeng ak khuiawh am awm man hy," tina uhy. 62 Naa ang ming ce ikawmyihna nu a sui law kaw ti unawh, a pa a venawh a mi kut veah unawh doet uhy. 63 Anih ing caa geennaak aham calung ce theoh nawh, "Ang ming taw Johan," tinawh qee saw thlang boeih a mik kawpoek kyi hy. 64 Cawh am kha ce awng qu pahoei nawh am lai awm zai law pahoei hy, awi kqawn nawh Khawsa ce kyihcawh hy. 65 A imcengkhqi taw amik kawpoek kyi hy. Judah qam khawmcung pum awh thlangkhqi ing cawhkaw ce kqawn uhy. 66 Bawipa a kut ce anih ak khan awh a awm a dawngawh, ce ak awi ak zakhqi boeih ing amik kawpoek kyi nawh, "Cawhtaw cawhkaw naasen ce ikawmyihna nu a awm law kaw?" ti uhy. 67 A pa Zekariah ce Ciim Myihla ing be nawh awi kqawn hy: 68 "Israelkhqi a Khawsa, Bawipa venawh thangleeknaak awm

seh nyng, kawtih ak thlangkhqi ce hqip nawh tian hawh hy. 69 A tyihzawih David a ipkhui awh, nangmih thaawngnaak kii pynoet cawn sak hawh hy. 70 (Syn awh amah a tawnga ciimkhqi venawh anak kqawn amyihna), (aiōn g165) 71 Qaalkhqi ven awhkawng thaawngnaa, ningnih anik sawhnaakkhqi qam ak khui awhkawng 72 pakdamkhqi venawh am qeennaak dang sak aham ingkawg amah a paipi ciim a sai ce sim poe aham, 73 ni pa Abraham a venawh awi a na kam ce: 74 Ni qaalkhqi kut khui awhkawng ni loet sak aham ingkawg kqih kaana amah a bi ce ni binaak thai aham 75 ni hqing khui amah a haiawh ni ciim ingkaw ni dyngnaak ham ni. 76 Ce, nang ka ca, sawsang soeih a tawnga pynoet tinawh nik khy kawm uh; kawtih Bawipa haiawh a lam goek abah peek aham na ceh hly awh; 77 Ni Khawsa a thawlh qeennaak ak caming nak thlangkhqi venawh thaawngnaak sim sak aham, 78 kawtih nangmih a Khawsa am qeennaak ak caming, khawk khan nakawng ningnih a venawh, 79 than khuiawh ak awmkhqi ingkaw thiinhaak ak kaiawh ak ngawikhqi ceei aham, ningnih a khawkhqi ce qoeppnaak lam benna hqui aham khawkdai ce law kaw," tinawh laa ce sa hy. 80 Naasen ce bau law hqui nawh Myihla ben awh ak tha awm hqui hy; Israelkhqi venawh ang dang hlan dy kqawng na ce awm hy.

2 Ce tolok awh Rom qam khui boeih boeih awhkaw thlanghqing thlangmi noet aham Kaisar Augustus ing awi pehy. 2 (Vetaw Siria qam awh Quirinius ce qam ukkung boei na a awm awh thlangmi noetnaak lamma cyk na awm hy.) 3 Cedawngawh thlang boeih ing ming cazin peek aham a mimah a khaw na cet boeih boeih uhy. 4 Cedawngawh Joseph awm David cahlah na a awm a dawngawh, Kalili qam Nazareth awhkawng Judah qam David a khaw Bethlehem na cet hy. 5 Ming cazin pek a hamna a zu am kang, phyihsu nawh naa ak awm tawm Meri ingqawi cet hy nih. 6 Cawh a ni awm awh, naa a thangnaak hly khawngchi ce nawh, 7 Cehlai a cakyk pa ca ce ta nawh, khin pahaanak im aha hoeng a dawngawh hi ing zawl nawh vaitaw aihkawng awh soei hy. 8 Cawh a qam khuiawh tuu ak khaikhqi ce kqawng na awm unawh, khawmthan awh tuukhqi ce qeh uhy. 9 Bawipa ak khan ceityih phynoet ce a mingmih a venawh dang pe nawh, Bawipa a boemangnaak ing a mingmih a kengsam ce coei qungtheng saw, cedawngawh a mingmih ing kqih uhy. 10 Cehlai khan ceityih ing a mingmih a venawh, "Koeh kqih uh. Nangmih a venawh thlang boeih aham ym ak awm soeih awithang leek ka kqawn law ni. 11 Tuhngawi David a khawk khuiawh thawngkung ce nangmih aham thang hawh hy; anih cetaw Khrin Bawipa ni. 12 Ve ve nangmih aham hatnaak na awm kaw: Naasen hi ing zawl unawh aihkawng awh ami soei ce hu kawm uk ti," tinak khqi hy. 13 Kawlkhalka ca awh khan benna kaw thlang kqeng ce khan ceityikhqi mi dang law unawh, Khawsa ce kyihkah uhy. 14 "Sawsang soeih awh Khawsa boemang seitaw, khawmdek awh amah kaw ak tawng khqik khan awh qoeppnaak awm seh," tinawh kyihcah uhy. 15 Khan ceityikhqi ing a mingmih ce cehta khqi nawh khawk khan na a mi ceh coengawh, tuukhaikhqi ing, "Bethlehem na cet unawh Bawipa ing ak kqawn law ce toek lah usih," ti uhy. 16 Cedawngawh ang tawnga cet unawh, Meri, Joseph ingkaw aihkawng awhkaw ami soei naaca ce hu uhy. 17 Naaca ce a mi huh awh, ve naaca akawng cekkhqi venawh kqawn peek na ak awm ce thlangkhqi venawh kqawn pe uhy, 18 tuukhaikhqi ing amik kqawn peek awi ak zakhqi boeih ing amik kawpoek kyi hy. 19 Cehlai Meri ingtaw cawhkaw ik-oeikhqi boeih ce ak kawlung khuiawh khoem nawh poek hy. 20 A mingmih a venawh ak kqawn peek amyihna ik-oeikhqi boeih ce hu unawh a ming zaak a dawngawh Khawsa ang ming zoeksang nawh kyihcah doena tuukhaikhqi ce voei uhy. 21 Ak kqeeet nyn, chahhui qeetnaak tym a pha awh, a nu ing a

phyihsu hlanawh khan ceityih ing ak kqawn peek amyihna Jesu tinawh ang ming sui hy. 22 Mosi a anaa awi amyihna ciimcaih sak naak khawngchi ce a pha awh, Joseph ingkaw Meri ing Jesu ce Bawipa venawh suum aham Jerusalem na ceh pyi hy nih, 23 (Bawipa a anaa awi awh, "Ak cyckah capa taw Bawipa aham hoop a hamna awm hy," tinawh qee na a awm a dawngawh), 24 Bawipa a anaa awi awh ak kqawn amyihna: kqawng kqukkkup phqek hih am awhtaw im kqukkqu phqek hih ce bulnaak sainaak aham khyn hy nih. 25 Cawh Jerusalem khawk khuiawh Simon ak mingnaak thlang pynoet ce awm hy, anih cetaw thlak dyng ingkaw Khawsa ak kqijchah thlang na awm hy. Anih ing Israel thlangkhqi ngalhding saklung ce a na qeh nawh, Ciim Myihla ing awm pyi hy. 26 Bawipa a Khrin ce a huh hlan dy am thi kawp ti, tinawh Ciim Myihla ing a na sim sak hawh hy. 27 Ciim Myihla a hqui sawinaak ak caming bawkim khuiawh ce cet hy. Anaa awi ing a ngoe amyihna naaca Jesu ak khan awh sai hly kawi sai sak aham a nu ingkaw a pa ing a ni law pyi awh, 28 Simon ing lo nawh a kut awh ak pawm coengawh Khawsa ce kyihcah hy: 29 "Boeimang Bawipa, nak awitaak amyihna, na tyihzawih ve ngaihqep na ceh sak hawh kawp ti. 30 Ikawtih na hulnaak awi ce ka mik ing hu hawh nyng, 31 thlang boeih a mik huh awh nang ing nang dang sak ce, 32 Gentelkhqi venawh vangnaak ak dang hly kawi ingkaw nak thlang Israelkhqi boeimangnaak hly kawi ce," tinawh kqawn hy. 33 Naasen awh anih ing cemyihna awi ak kqawn ce a nu ingkaw a pa ing a ning zaak awh a ning naih na kyi hy. 34 Cekcoengawh cekkhqi ce Simeon ing zoseennaak a peek coengawh a nu Meri a venawh: "Vawhkaw naasen ve Israel khqik khuiawh thlang khawzah ang tluuknaak ingkaw a thawhnaak na awm kaw, thlang ing amak nep na ak kqawnnaak aham hatnaak ingkaw, 35 thlang khawzah a lingbyi poeknaak ce ang dang thainaak hamna awm kaw. Na lingbyi awm zawzi ing sun law poelh hyn kawm uh," tina hy. 36 Cawh Asher pilnam ak khui awhkaw Phanelu a canu Anna ak mingnaak nu tawnga pynoet ce awm lawt hy. Anih cetaw nucawng hawh hy; a va ingqawi kum khqiqi doeng ni anik chungvaa, 37 cekcoengawh a kum kqeetkip hlaihphli dy nuhai na awm hy. Bawkim ce a cehtaak kaa qoe na buh zeih cikcagnaak ing khawthian khawdai Khawsa ce bawk hy. 38 Cawh anih ce cekkhqi venna cet nawh, Khawsa venawh zeelnaak awi ak kqawn coengawh Jerusalem hulnaak ak ngaihukhqi boeih a venawh cawhkaw naasen akawng ce kqawn pek khqi hy. 39 Bawipa a anaa awi ing a kykkhqi boeih ce Joseph ingkaw Meri ing a ni sai boeih coengawh, Kalili qam awhkaw a nimah a khaw Nazareth na ce voei hy nih. 40 Naasen ce bau law hqui nawh ak tha awm law hy; cyihnaak ing be law nawh, Khawsa am qeennaak ce ak khan awh awm hy. 41 Loentaak poei pan aham Jerusalem na a nu ingkaw a pa taw kum goek awh cet poepe hy nih. 42 A kum hlaihah a law awh, a mi ceh khawi amyihna, cawhkaw poei ak pan na cet uhy. 43 Poei ang poeng coeng khawna a ming voei awh naasen Jesu taw awm hy saw a nu ingkaw a pa ing am sim hy nih. 44 Thlang ak voekhqi anglakawh awm lawt hy voei tinawh poek nih nawh, khawngchi hypoet a ni ceh coengawh, ami cakawkhqi ingkaw ami pyikhqi venawh sui hy nih. 45 A mani huh law voel awhtaw, anih ak sui na Jerusalem na hlat tlaih hy nih. 46 Khaw thum voei a ni sui coengawh bawkim khuiawh hu hy nih, cawngpyikung khqiqing lak awh ngawi nawh a mingmin ak awih kqawnkhqi ce ngai nawh awikhqi a na doet khqi hui awh hu hy nih. 47 Anih a simnaak ingkaw am hlatnaak awi ak zakhqi boeih ce amik kawpoek kyi hy. 48 A nu ingkaw a pa ing a ni huh awh, a nik kawpoek kyi hy. A nu ing, "Ka capa, kawtih vemyihna nani sai hy?" Na pa ingkaw kai ingtaw ly doena ni sui nih nyng," tina hy. 49 Anih ing, "Ikaw hamna nani sui nih? Ka pa im awh awm kaw ti amna ni sim nawh

nu?" tina qawi hy. 50 Cehlai a ningnih a venawh ak kqawn peek awi ce am zasim hy nih. 51 A ningnih a hu awh Nazareth khaw na cet nawk anik awi ce ngaih pe qawi hy. Cehlai a nu ingtaw cawkaw ik-oehkhqi boeih ce ak kawlung khuiawh koem hy. 52 Jesu taw cyihnaak ing taaí khqoet khqoet nawk, Khawsa ingkaw thlanghqing a mik cuuk kawtaak na awm khqoet khqoet hy.

3 Tiberius Kaisar a boeinaak kum hlainga a law awh (Pontius Pilat taw Judah qam ukkung boei a awm hy, a na Philip ce Iturea ingkaw Tracinitis qam ukkung na awm nawk, Lysinias taw Abilene qam ukkung na awm hy. 2 Anna ingkaw Kaliapha khawsoeih boei khyt na a ni awm awh,) kqawng na ak awm Zekariah capa Johan a venawh Khawsak awi ce law hy. 3 Anih ing ce Jordan long keng qam boeih awh cet nawk thawlq qeenaaak ham zutnaak baptisma awi ce kqawn hy. 4 Tawngtha Isaiah ak awi cabu awh a na qee hyt myihna: "Ramkoh awhkaw ak khy awi ing, 'Bawipa a lam ce qoek a bah unawh, a lamkhqi ce qui sak lah uh, 5 Lawk-kqawngkhqi ce be kawn usaw, tlangkhqi ce neem sak kawm uh; Lam ak kawikhqi ce dyng kawn usaw, lam ak kawkkhqi ce qui sakna awm kaw. 6 Cawhtaw thlang boeih ing Khawsa a hulnaak ce hu kawn uh' tinawh," kqawn hy. 7 A venawh baptisma huh aham ak law thlang kqeng a venawh, "Namgih khqui a cadikhqi! Ak law hly kawi kawsonaak ce ceataal aham u ing a nik kqawn peek khqi? 8 Zutnaak ing ak tinga thaiah qah lah uh. Na mimah ingkaw na mimah, "Abraham cahlah ni," koeh ti uh. Ka nik kqawn peek khqi, vawhkaw lungkhqi za Khawsa ing Abraham a cakhqi na dyih sak thai hy. 9 Tuhkawng taw thing kung boeih awh hqaica toen na awm hawh hy, thing ikawmih awm ak thaiah leek amak qah taw hlu unawh mai awh phum khawi uhy," tinak khqi hy. 10 Cawh thlang kqeng ing, "Cawhtaw ikaw ka mi sai kaw?" tinawh doet uhy. 11 Johan ing, "Angki zunghih ak ta ing amak ta ce pe seitaw, awk-ai ak ta ing amak ta a venawh cemyihna sai lawh set," tinak khqi hy. 12 Mangmu ak cawikungkhqi awm baptisma huh aham law lawt unawh a venawh, "Cawngpyikung ikaw ka mi sai kaw?" tinawh doet uhy. 13 Cek khqi venawh, "A ngoe anglakawh ak doem na koeh cawi law uh," tinak khqi hy. 14 Qalkap a vangkhqi ce law unawh a venawh, "Kaimih taw ikaw ka mi sai kaw?" tina uhy. A mingmih a venawh, "Amak thym na tangka koeh lo unawh, amak thym na thlang thawlq koeh puk uh; nami huh namiit thaphu ing naming ngaih qep sak uh," tinak khqi hy. 15 Thlangkhqi ing amik kawlung na Johan ve Khrish hawh mai hy voei aw? tinawh poek uhy. 16 Cehlai Johan ing cekkhqi boeih a venawh, "Kai ingtaw tui ing baptisma ni pek khqi nyng. Cehlai kai anglakawh ak bau khqoet thlang law hyn kaw, kai taw anih a khawmyk qui ak suh peek aham naza am kawih nyng. 17 Cang zahnaak ce a kut awh pawm nawk cantakkhqi ce tep ak khuina thlak aham zaap kaw, cehlai ang hi cetaw amak thi thai qoe mahl khuina phum kaw," tinak khqi hy. 18 Awih chang khawzah ing cekkhqi ce a yn coengawh awithang leek ce kqawn pek khqi hy. 19 Cehlai ram ukkung boei Herod ing ik-oehi che a saikhqi boeih ingkaw, a na a zu Herodi ce a zunaak a dawngawh, Johan ing ak kaanaak awh, 20 Herod ing ce miikhqi boeih ce cun nawk: Johan ce am tu coengawh thawng khuina thla hy. 21 Cawhce, vemyihna awm hy, thlangkhqi boeih baptisma a mi huh awh, Jesu awm hu lawt hy. Ak cykah huiawh, khan ce awng qu nawk 22 Ciim Myihla ce kqukkju myihna ak khan awh cuuk hy. Khawk khan nakawng awi ing: Nang taw ka lungnaak ka Capa ni; nak khan awh zeel soeih soeih nyng," tina hy. 23 Jesu ing bibinaak ak kqawn awh a kum sawmthum tluk law hawh hy. Thlanghqing ak poeknaak awhtaw anih ce Joseph a capa na awm hy, Joseph taw Heli a capa, 24 Heli taw Matthath a capa, Matthath taw Levi a capa, Levi taw Melki a capa, Melki taw Jannai a capa, Jannai taw Joseph a

capa, 25 Joseph taw Mattathias a capa, Mattathias taw Amos a capa, Amos taw Nahum a capa, Nahum taw taw Esli a capa, Esli taw Naggai a capa, 26 Naggai taw Maath a capa, Maath taw Mattathias a capa, Mattathias taw Semein a capa, Semein taw Joseeh a capa, Joseeh taw Joda a capa, 27 Joda taw Joanan a capa, Joanan taw Rhesa a capa, Rhesa taw Zerubbabel a capa, Zerubbabel taw Shealtiel a capa, Shealtiel taw Neri a capa, 28 Neri taw Melki a capa, Melki taw Addi a capa, Addi taw Kosam a capa, Kosam taw Elmadam a capa, Elmadam taw Er a capa, 29 Er taw Josua a capa, Josua taw Eleizer a capa, Eleizer taw Jorim a capa, Jorim taw Maathat a capa, Matthath taw Levi a capa, 30 Levi taw Simeon a capa, Simeon taw Judah a capa, Judah taw Joseph a capa, Joseph taw Jonam a capa, Jonam taw Eliakim a capa, 31 Eliakim taw Melea a capa, Melea taw Menna a capa, Menna taw Mattatha a capa, Mattatha taw Nathan a capa, Nathan taw David a capa, 32 David taw Jesse a capa, Jesse taw Obed a capa, Obed taw Boaz a capa, Boaz taw Salmon a capa, Salmon taw Nahshon a capa. 33 Nahshon taw Amminadab a capa, Amminadab taw Qam a capa, Qam taw Hezqon a capa, Hezqon taw Perez a capa, Perez taw Judah a capa, 34 Judah taw Jakob a capa, Jakob taw Isaak a capa, Isaak taw Abraham a capa, Abraham taw Terah a capa, Terah taw Nahor a capa, 35 Nahor taw Serug a capa, Serug taw Reu a capa, Reu taw Peleg a capa, Peleg taw Eber a capa, Eber taw Shelah a capa, 36 Shelah taw Kainan a capa, Kainan taw Arphaxad a capa, Arphaxad taw Shem a capa, Shem taw Noah a capa, Noah taw Lamech a capa, 37 Lamech taw Methuselah a capa, Methuselah taw Enoch a capa, Enoch taw Jared a capa, Jared taw Mahalalel a capa, Mahalalel taw Kenan a capa, 38 Kenan taw Enosh a capa, Enosh taw Seth a capa, Seth taw Adam a capa, Adam taw Khawsa capa na awm hy.

4 Jesu taw Ciim Myihla ing be doena, Jordan awhkawng hlat law hawh sykzoekaak huh aham Myihla ing qamkoh na hqui hy, 2 Ce a hun awh khawnghi phlikip khuiawh qaaí ing sykzoek hy. Ce a khawnghi khuiawh ikaw ca awm am ai hy, cedawngawh a hukhit na taw ak phoen cawi hy. 3 Qaai ing a venawh, "Khawsa Capa na na awm awhtaw, vawhkaw lung ve phaihipi na coeng sak lah," tina hy. 4 Jesu ing, "Thlang ve phaihipi doeng ing ak hqing am ni, tinawh qee na awm hy," tina hy. 5 Qaai ing hun a sangaaka na ceh pyi nawh khawmdek awhkaw qam boeih boeih ce huh hy. 6 Cekoengawh a venawh, "Vawhkaw saithainaak ingkaw boeimangnaak boeih boeih ve ni pe vang nyng, vekkhqi boeih ve ka venawh peekna ak awm ni, kai ing ka ngaih ak thlang venawh pe thai nyng. 7 Kai ve ni beek nawh, a cu boeih ve nang aham seh nyng," tina hy. 8 Jesu ing, "Bawipa na Khawsa doeng ce beek nawk anih a bi doeng ce bi lah, tinawh qeena ak awm ni," tina hy. 9 Qaai ing Jerusalem na ceh pyi nawh bawkim iptih a sangaaka awh dyih sak hy. "Khawsa Capa na na awm awhtaw vawhkawng nuk cawn lah. 10 Kawtih ve myihna qeena a awm myihna: "Nang anik khoem ham ak khan ceityihkhqi ce awi pe kawmsaw; 11 a mingmih ing nang ce ami kut ing ni dawm kawm uh, lung awh am nak khoeng qunaak aham," tina hy. 12 Jesu ing, "Bawipa na Khawsa ce koeh noek koeh dak," tinawh ak awm ni," tina hy. 13 Qaai ing a sykzoek coengawh, a tym leek a awm hlan dy cehta hy. 14 Jesu taw Myihla thaawmnaak ing Kalili na hlat hy, cawh anih ak awithang ce ce a qam ak khuiawh thang boei hy. 15 Sinakawk kqang cawngpyi poe nawh, thlang boeih ing kyihcaw uhy. 16 A baunaak khaw Nazareth ce pha nawh, Sabbath nyawh a ceh khawi amyihna sinakawk na ce cet nawk, cawh cauk noet a hamna dyi hy. 17 Tawngtha Isaiah ak cazawl ce pe uhy. Hlam nawh vemyihna a qee ce hu hy: 18 "Khawsa ang Myihla taw kak khan awh awm nawh, khawdengkhqi venawh awithang

leek kqawn aham kai ve ni caksak hawh hy. Thawng ak tlakhqi venawh loetnaak awi ingkaw mikhyphkqi venawh mik dainaak awi khypyi aham, phep qeena ak awmkhqi loet sak ham ingkaw, 19 Bawi awmhly kum awi kqawn aham kai ve ni tyi hy,” a ti ce. 20 Cekcoengawh cazawl ce zawl tlaiah nawh cawkaw bibikung a venawh a peek coengawh ngawi hy. Sinakawk khuiawh amik awm thlangkhqi boeih a mik ce anih awh cun boeih hy, 21 cawh a mingmih a venawh, “Tuhngawi nangmih ang zaak awh ve cabu awi ve soep hawh hy,” tinak khqi hy. 22 Am kha awhkawng ak cawn law am qeennaak awi awh thlang boeih ing anih ce kyihcrah uhy. “Anih ce Joseph a capa am nu ve? ti uhy. 23 Jesu ing a mingmih a venawh, “Vawhkaw Awicylih awi ve kqawn hlaib hy voei uk ti: ‘Siboei, namah ingkaw namah qoei qu sak lah! Kaperanuam khaw awh na sai ka ming zaak ce namah a khaw vawh awm sai lawt lah,’ a mi tice,” tinak khqi hy. 24 Awitak ka nik kqawn peek khqi, tawngtha a u awm amah a khaw awh am do khawi uhy. 25 Elijah chan awh Israel ram khuiawh nuhai khawzah awm hy, kum thum coengawh hla quk khui khan chawmkeng khaih na a awm awh ram pum awh khaw se hy. 26 Cehlai Sidon ram khuiawh ak awm Zarephath khaw awhkaw nuhai a ven doeng awh am awhtaw Elijah ce u a venawh awm tyih na am awm hy. 27 Tawngtha Elisha chan awh Israel ram khuiawh mynqai ak neh thlang khawzah awm hlaib hy, Siria phyn Naman doeng am awhtaw u awm am qoei hy,” tinak khqi hy. 28 Sinakawk khuiawh ak awm boeikhqi ing ce ak awi ce a ming zaak awh amik kaw so hy. 29 Dyi unawh, khawk khuiawh kawng anih ce khawceng na ceh pyi unawh, hqeng na buk hoek aham qyt uhy, cawkaw khaw taw minpoeng ak chei ca awh awm hy. 30 Cehlai thlang kqeng anglakawhkawng kit qu pluk nawh cen valh hy. 31 Cekcoengawh Kalili qam Kaperanuam khaw na nu cet nawh, Sabbath yn awh thlang cawngpyi hy. 32 Ak awih kqawnnaak awh saithainaak a awm a dawngawh, a cawngpyinaak awh amik kawpoek kyi hy. 33 Sinakawk khuiawh qaaiche ak ta thlang pynoet awm hy. Anih ing khawteh na khy nawh, 34 “Ai Nazareth Jesu, kaimil inggawi ikaw ning laknaak a awm? Anik hqe khqi hamna nak law nanawh nu? Nang ve Khawsa ak thlang ciim ni tice ni sim nyng,” tina hy. 35 Jesu ing, “Awm poek! Anih ak khuiawh kawng cawn hlah,” tinawh zyi hy. Cawh qaaing a mingmih a haiawh dek na ang tlukku sak coengawh ikaw awm myn a maa a peek kaana anih a pum khui awhkawng cawn hy. 36 Thlang boeih amik kawpoek kyi nawh, “Kawmih cawngpyinaak hy voei aw? Saithainaak thaawmnaak ing qaih chekhqi awi pe nawh ak cawn sak hy voei!” ti uhy. 37 Anih ak awithang ce a kengsam qam kqang thang khawngkhay hy. 38 Jesu ing sinakawk ce a cehtaak coengawh, Simon a im na ce cet hy. Cawh Simon a senu ce a sa tlo nawh, cedawngawh Jesu a venna qeennaak thoeh pehy. 39 Cawh a kengawh dyi nawh satlawhnaak ce zyi hy, cawh a satlawh ce qeoi tlang hy. Cawkaw nu ce the nawh a mingmih ce do a dan khqi hy. 40 Khaw a my law awhtaw, tlawh a nat soepepk ak takhqi ce Jesu a venna law pyi usaw, a mingmih ak khan awh a kut tloeng pe nawh, cekkhqi ce qoei sak khqi hy. 41 Qaaikhqi ce thlang ak kawk khui awhkawng cawn unawh, “Nang ve Khawsa Capa ni!” tinawh khy uhy. Cekkhqi ce zyi khqi saw, Khril ni tice a mi sim a dawngawh am pau uhy. 42 Khaw a dai law awhtaw, a dingsykaak hun cet pan hy. Thlangkhqi ing anih ce sui uawnh, a mi huh awhtaw a mingmih a ven awhkawng ama ceh naak aham tu ham cai uhy. 43 Cehlai a mingmih a venawh, “Khawsa awithang leek ve khawk chang kqang awm kak kqawn aham awm hy, ve aham nani tyih na ka awm hy,” tinak khqi hy. 44 Cedawngawh Judah awh awm nawh Sinakawk awh awithang leek kqawn hy.

5 Hypoet taw Bawipa Jesu ce thlang kqeng mi Genesaret tulii keng awh dyi hy, cawh thlang kqeng ing Khawsak awi ce ngai

uh, 2 tui keng awh ngak hawikhqi ing a mi taak hyt lawng pakkhil ce hu hy, ngak hawikhqi taw a mi lawk chuk uhy. 3 Lawng pynoet ak khuiawh ce lut hy, cawkaw lawng cetaw Simon a lawng na awm hy. Lawng ce tui benna tun bet aham Simon ce kqawn pehy. Cekcoengawh lawng awh ce ngawi nawh thlangkhqi ce cawngpyi hy. 4 Awi ak kqawn boeih coengawh, Simon venawh, “Tuili dung na thoeih nawh lawk ce khawng lah,” tina hy. 5 Simon ing, “Bawipa than oet pyt khawng hawh hlai u nying ikawawm am hu u nying. Cehlai nak awi awh khawng lah vang nying,” tina hy. 6 Lawk ce amik khawng awhtaw, nga khawzah tu unawh lawk ce teek pit pit hy. 7 Cedawngawh lawng ak chang nakaw a mi pyikhqi ce ak bawm aham a mi kut ing vah uhy, cekkhqi ce law unawh lawng ang cum pit pit dyna ng ce ak be na tu uhy. 8 Simon Piter ing a huh awh, Jesu a khawkung awh khuk sym doena, “Bawipa, ni cehtaak mai, tlhak thawlhw na awm nying,” tina hy. 9 Nga a mim tu awh Piter ingkaw a pyikhqi ce a mik kawpoek kyi hy. 10 Simon a pyi, Zebedee a caqawi Jakob ingkaw Johan awm anik kawpoek kyi hy. Cekcoengawh Jesu ing Simon a venawh, “Koeh kqjih; tuh awhkawng thlang ak tukung na awm hawh kawp ti,” tina hy. 11 Lawng ce kawngceng na amik dawh coengawh, ik-oeih boeih ce cehta unawh a hu awh bat uhy. 12 Khaw pynoet awh a awm awh, mynqai ak neh thlang pynoet ce law hy. Jesu ce a huh awh, dek na koep nawh qeennaak thoeh hy, “Bawipa, na ngaih awhtaw ni ciimcaih sak lah,” tina hy. 13 Jesu ing a kut zyng nawh bi hy. “Ngaih nying, qoei hlah!” tina hy. Cawh a mynqai ce caih pahoei hy. 14 Jesu ing a venawh, “U a venawh awm koh kqawn, cet nawh khawsoeih a venna na pum ce nam huh coengawh, na qoeinaak a dawngawh Mosi ak awipeek a myihna, a mingmih ing a mi simnaak aham bulnaak ce sai lah,” tina hy. 15 Cehlai anih akawng ce thang khqoet hy, cedawngawh ak awi ngai ham ingkaw tlawhnaak qoei sak aham thlangkhqi ce law uhy. 16 Cehlai Jesu taw a dingnaak na amah doeng cet poepa nawh cykah hy. 17 Hypoet taw thlang a cawngpyi awh, Kalili qam, Judah qam ingkaw Jerusalem khaw awhkaw Farasikhqi ingkaw anaa awi cawngpyikungkhqi ce amah cawh ngawi uhy. Cawh tlak tlo qoei sak aham Bawipa ak thaawmnaak ce a venawh awm hy. 18 Thlang vang ing ak khawn thlang pynoet ce a hiphaih awh kawt law uhy, ipkhui na khy phaat unawh a haiawh tloeng peek aham ngaih uhy. 19 Cehlai thlang a be aih a dawngawh ipkhui na am khyn thai uhy, cedawngawh iptih na kaai unawh qui ing thlang anglak li awh, Jesu a haiawh hiphaih mah na nuk tlhaak pe uhy. 20 A mingmih ak cangnaak ce Jesu ing a huh awh, “Thlang pa aw, na thawlhnnaak ce qeenna awm hawh hy,” tina hy. 21 Cawh Farasikhqi ingkaw anaa awi cawngpyikungkhqi ing, “U nu Khawsa ak the ak khanaak ve? Khawsa doeng am awhtaw u ing nu thawlhw qeenkhaw ang ngai thai?” ti uhy. 22 A mingmih ak kawpoek ce Jesu ing sim pe khqi nawh, “Ikawthi cemiyinha namik kawlung khuiawh namik poek uh? 23 Han nu ak zoei bet: ‘Na thawlhw qeenna awm hawh hy,’ tive nu, am awhtaw ‘Tho nawh cet lhlah,’ tive nu? 24 Cehlai thlanghqing Capa ing khawmdek awh thawlhw qeennaak tahi, tice nami simnaak aham,” tinak khqi hy. Ak khawn na ce, “Ka nik kqawn peek, tho, na hiphaih ce lo nawh imna voei hlah,” tina hy. 25 A mingmih haiawh ce dyi pahoei nawh, a hiphaih ce a lawh coengawh Khawsa kyihcrah doena im na ce cet hy. 26 Thlang boeih a milk kawpoek kyi nawh Khawsa ce kyihcrah uhy. Ngaih kyi doena, “Tuhngawi awi kawpoek kyi ik-oeih nu hu uhy,” ti uhy. 27 Cekcoengawh Jesu ce cet nawh mangmu cawinaak awh ak ngawi mangmu ak cawikung Levi ak mingnaak thlang pynoet ce hu hy. A venawh, “Ka hu awh bat lah,” tina hy. 28 Levi ce tho nawh ik-oeikhqi ce a cehtaak coengawh a hu awh bat hy. 29 Cekcoengawh Levi ing amah a im awh Jesu aham buh veelnaak poei ak bau soeih sai pehy. Mangmu ak cawikungkhqi

ingkaw tlak changkhqi thlang khawzah ce Jesu mi buh ai hiah hy. 30 Cehlai Farasikhqi ingkaw anaa awi cawngpyikungkhqi ing a mi huh awh ce a hubatkqi venawh saai bi uhy, "Kawtihi mangmu ak cawking 'Thlak thawlkhqi' mi buh a mi ai hiah?" tinak khqi uhy. 31 Jesu ing, "Sakdip thlang ing siboei am ngoe hy, cehlai tlak tlo ing ni a ngoe. 32 Thlak dyng khy aham am law nyng, tlak thawl a zutnaak aham ni ka law," tinak khqi hy. 33 A mingmih ing a venawh, "Johan a hubatkqi ingtaw buh zeih poepa unawh cykcah uhy, Farasikhqi a hubatkqi ingawm, cehlai nang a hubatkqi ingtaw aw a ai uhy," tina uh. 34 Jesu ing, "Zuk lokung a awm khuiawh ak khinkhqi buh namik zeih hly sak nu? 35 Cehlai zuk lokung lawh peek vahnnaak a tym ce pha kaw; cawh buh zeih bit kawm uh," tinak khqi hy. 36 A mingmih a venawh vawhkaw nyhtahnaak awi ve kqawn pehy: "U ingawm hi ak thai ce teek nawk hi ak kqym ap bu na khawi hy. Ak bunaak man, hi ak thai ce awm teek kaw, cekcoengawh hi ak kqym ingawm am oqep laklaw kaw. 37 U ingawm misur tui ak thai ce cikthlyng ak kqym awh am thun khawi hy. A thun mai mantaw, misur tui ak thai ing cikthlyng ak kqym ce hqeq kawmsaw, misur tui ingkaw cikthlyng ce plawci bawk kaw. 38 Cedawngawh misur tui ak thai taw cikthlyng ak thai awh thun aham awm hy. 39 Misur tui ak kqym ce tui khqoet hy a mi ti a dawngawh, u ingawm misur tui ak kqym a awk coengawh misur tui ak thai ce am ngaih khawi hy," tinak khqi hy.

6 Sabbath nyn awh Jesu taw lo lamawh cet hy, cawh a hubatkqi ing cangvui ce dy unawh, a mi kut ing a mi nawi coengawh ak cang ce baai uhy. 2 Cedawngawh Farasi thlang vangkhqi ing doet uhy, "Kawtihi Sabbath nyn awh sai aham amak ciim nami sai?" tina uh. 3 Jesu ing a mingmih a venawh, "David ing a pyikhqi mi amik phoen a cawi awh a sai ce am nami noet khawi nawh nu? 4 Khawsa ipkhu na lut nawh, khawsoeikhqi doeng ing ai aham ak caih phaihipi a mi hoel ce lo nawh ai nawh a pyikhqi awm a pek khqi ak awi ce," tinak khqi hy. 5 Cekcoengawh Jesu ing a mingmih a venawh, "Thlanghqing Capa ve Sabbath boei na awm hy," tinak khqi hy. 6 Ak chang sabbath nyn bai awh sinakawk khuina cet nawh thlang cawngpyi hy, cawh a kut tang ben ak khem thlang pynoet ce awm hy. 7 Farasikhqi ingkaw anaa awi cawngpyikungkhqi ing Jesu thawl amik puknaak lam ce sui uhy, cedawngawh sabbath nyn awh thlang ak qoei law hly sak nu ti unawh gym uhy. 8 Cehlai Jesu ing cekkhqi ak kawpoek ce sim nawk a kut ak khem a venawh, "Tho nawh thlang boeih a haiawh dyi lah," tina hy. Cedawngawh ce ak thlang ce the nawh dyi hy. 9 Cekcoengawh Jesu ing cekkhqi venawh, "Ni doet khqi lah vang nyng, Sabbath nyn awh kawmih nu sai aham ak thy: them leek sai aw, am awhtaw them che sai aw; hqeqnagaak thaawng aw, am awhtaw him aw?" tinak khqi hy. 10 Cekkhqi ce toek khqi nawk, cawkaw thlang a venawh, "Na kut ce zyng lah," tina hy. Anih ing a kut ce zyng saw, cawh a kut ce leek pahoei hy. 11 Cehlai cekkhqi taw amik kaw so nawh, Jesu ce ikawmyihna ni sai lah voei, ti unawh doet qu uhy. 12 Khaw hypoet awh Jesu taw cykcah aham tlang na cet hy, than oet pyt Khawsa venawh cykcah hy. 13 A khawngawi mymcang awhtaw a hubatkqi ce a venna khy khqi nawh thlanghqa hlaihiih tloek ce tyk hy, a mingmih a venawh ceiyih a bibi ce pek khqi hy. 14 Simon (Piter tinawh ming sui); anih a na Andru, Jakob, Johan, Philip, Bartholomu, 15 Mathai, Thomas, Alphaeus capa Jakob, Zealat a mik khy Simon 16 Jakob a capa Judas ingkaw amah ak zawikung Judah Isakariot vetloek ve tyk hy. 17 A mingmih mi tlang nakawng nuk kqum law unawh a hun a zawaikaak awh ce dyi hy. A hu awh amik bat thlang khawzah ingkaw Judah qam awhkaw, Jerusalem khaw awhkaw, Tura ingkaw Sidon tui keng awhkaw thlangkhqi ce, 18 ak awi ngaih aham ingkaw tlawhnaak qoei sak aham law uhy. Qaaiche ing

a thekhanaak thlangkhqi awm qoei sak khqi hy, 19 a venawh kawng saithainaak ce cawn nawh thlang boeih ce a qoei sak a dawngawh thlangkhqi boeih ing amah ce bi aham ngaih uhy. 20 A hubatkqi ce a toek coengawh cekkhqi venawh: "Nangmih hahqah ak thlangkhqi taw nami zoseen hy, Khawsa qam taw nangmih a koe ni. 21 Nangmih tuh phoen ak cawikhqi nami zoseen hy, namik phoen phyi kaw. Nangmih tuh ak kqangkhqi nami zoseen hy, qaaigai kawm uk ti. 22 Thlanghqing Capa ak camawh nangmih ce thlang ing ni sawh nak khqi, a ni hoet khqi, a ni ziyh khqi, naming ming ce ak che na anik kqawn khqi awh nami zoseen hy. 23 Cemyihna a ni tinaak khqi awh zeel unawh lam uh, nangmih aham khawh khan na kutdo ak bau soeih awm hy. Cemyihna ni nami pakhqi ingawm tawngkhakhqi ce a mina sai hawh hy. 24 "Cehlai nangmih boeikhqi khaw map u hyk ti, na mimah a ngaihdinggaak ce hu hawh u hyk ti. 25 Tuh nangmih phoen ak phyikhqi, khaw map u hyk ti, namik phoen cawi kaw. Nangmih tuh ak qaaikhqi, khaw map u hyk ti, lungnat za kawm u tiksaw kqang kawm uk ti. 26 Thlang boeih ing am kyih nangmih, khaw map u hyk ti, cemyihna maw a mi pakhqi ing tawngkhakhqi ce a mim kyih lawt hy. 27 "Cehlai kak awi ak ngai nangmih a venawh ka nik kqawn peek khqi: nami qaalkhqi ce lungna uh, nangmih a nik sawhnaak thlangkhqi ce lungna uh, nangmih a nik sawhnaak thlangkhqi ham them leek sai pe uh, 28 seet anih loh pekkhqi ham zoseennaak pe unawh, a nik the khanaak khqi ce cykcah pe uh. 29 Thlang ing na beeng lang benawh a nik beh awhtaw, ak chang ben ce duun pe bai; na hi a ni lawh peek venawh angki awm koeh hlawh na. 30 Ak thoekhqi venawh ce pe, thlang ing na them a ni lawh peek awh koeh lat pe voel. 31 Thlang ing nak khanawh sai sak ham na ngaih lawt a myihna thlang ak khan awh awm sai lawt. 32 "Nangmih a nik lungnaak khqi doeng nami lungnaak man, nami ham ikaw hoeihkhangaak a awm kaw? 'Thlak thawlkhqi ing za amah ak lungnaak taw lungna lawt uhy. 33 Nak khan awh them leek a saikhqi doeng a venawh them leek nami sai awhtaw, ikawnu hoeihkhangaak a awm kaw? 'Thlak thawlkhqi ing za cemyih ce sai lawt u saw. 34 Ak sah thai hly thlang a ven doengawh them namik pu awhtaw, ikaw hoeihkhangaak a awm kaw? 'Thlak thawlkhqi ingawm tlak thawlkhqi venawh pu sak lawt u saw. 35 Cehlai nangmih ingtaw nami qaalkhqi ce lungna uh, them leek sai pe uh, huh hly tlaikh kawi ngaih-u voel kaana pu law uh. Cawhtaw nangmih aham kutdo ak bau soeih awm kaw, sawsang soeih a cakhqi na awm kawm uk ti, anih ingtaw zeelhaak awi amak kqawn thaikhqi ingkaw tlak thawlkhqi za qeen uhy. 36 Nangmih a Pa thlang qeenkhaw ak ngai na a awm lawt amyihna nangmih awm thlang qeenkhaw ngai lawt lah uh. 37 "Awideng na amna awmnaak aham, thlang awi koeh deng. Thlang thawl koeh puk, cawhtaw thawl puk na am awm lawt kawp ti. Qeen lah, cawhtaw qeenava awm lawt kawp ti. 38 Pe lah, cawhtaw peek na awm lawt kawp ti. Ak bena loeng nawh, det nawh, ak be poeng na, na phai awh ni hawk sih kaw. Nang ing na loengnaak awh ce nang aham awm loeng lawt na awm kaw," tinak khqi hy. 39 Ami venawh nyhtahawi awm kqawn pek khqi bai nawh, "Mikhyp ing myikhyp ak hqui hly thai nu? A ni pakhii na lawk-kqawng khuina am tla hly nih nawh nu? 40 Sengcamoe ing cawngpyikung ak khan awh am awm hy, cehlai u awm cawng sak hqeeet na ak awm taw cawngpyikung a myihna awm lawt kaw. 41 "Namah a mik awhkaw myn ce ak poek kaana, ikaw hamna na koeinaa a mik awhkaw myn a dik ce na toek? 42 Namah a mik awhkaw myn za amna huu awhtaw ikaw hamna na koeinaa a venawh, 'koeinaa nang, na mik awhkaw myn a dik ce lo law vang nyng,' na tinaak thai kaw? Nang thlang qaaik qawn, namah a mik awhkaw myn ce lo cang, cawh ni na mik ce ak caih na dang kawmsaw, na koeinaa a mik awhkaw myn dik ce na lawh hly peek thai. 43 "Thing ak leek

awh thikthaih ak che am qah khawi nawk, thik che awh thikthaih leek am qah bai hy. **44** Thing boeih taw ak thaith awh hat thai na awm hy. Hling a thing awhkawng thlang ing thai ak thaith am bit khawi nawk, hling dum awhkawng u ing misur thaih am bit khawi hy. **45** Thlang leek ing ak kawlung khui awhkaw them leek ce cawn sak nawk, thlang amak leek ingawm ak kawlung khui awhkawng them amak leek ce cawn sak lawt hy. Kawlung khui awhkawng ak be ngen ni kha ing ak qkawn hy. **46** "Nangmih ikaw hamna kak awi qkawn ve a sai kaana, 'Bawipa, Bawipa,' nami ni tinaak? **47** Ka venawh law nawk kak awi ngai nawk ak sai ak thlang taw ikawmyihna a awm tice nim huh khqi vang nyng. **48** Anih taw tung ak dungna co nawk, lung ak khanawh ak ling ing myih hy, tuliu law nawk, tuih tha ing de seiawm ap tat hy. Tung ang ling ce a cak a dawnngawh im ce am tlu thai hy. **49** Kak awi ve za hlai moe amak sai thlang taw dek amak cak awh iptong ak ling ing myih hy. Tuuh tung ing im ce a buuk awh tlu pahoei nawk qeeng boeih hy.

7 Thlangkhqi ang zaak na ve ak awi ve Jesu ing ak qkawn boeih coengawh. Kaperanuam khaw na cet hy. **2** Qalkap zakhhat ak ukkung thlang pynoet a tyihzawih, a boeipa ing a lungnaak soeih ce, tlo nawk thi tawm hy. **3** Cawkaw qalkap zakhhat ak ukkung ing Jesu akawng ce ang zaak awh Juda a hqamca thlang vang ce tyi nawk, a tyihzawih ce qoei sak ham doet sak hy. **4** Jesu a ven a mi pha awh geennaak thoeh uhy, "Ve ak thlang vetaw a ni ngoenaak ce na sai peek aham tyng hy, **5** anih ing ka mi ram a lungnaak awh sinakaww pynoet ni sak pek khqi hy," tina uhy. **6** Cedawngawh Jesu a mi huawh ce nawk, im ami pha tawm ca awh qalkap zakhhat ak ukkung ing a pyikhqi ce tyi nawk, "Bawipa, kyi kaa, ka ipkhui awh na law aham am kawih nyng. **7** Ceamyihna awmsaw na venna law ham awm am tyng ti nyng, awi doeng mah qkawn nawk, ka tyihzawih qoei bit kaw. **8** Kai awm ukknaeng ak kai awh ak awm thlang pynoet na awm hlai nyng, kak kaiawh qalkap khawzah awm lawt hy. Thlang pynoet a venawh, 'Cet' ka tinaak awhtaw cet nawk; ak chang pynoet a venawh, 'Law', ka tinaak awhtaw law nawk, 'Ve sei,' ka tinaak awhtaw sai hy," tina hy. **9** Jesu ing anih ak awi ce ang zaak awh ak kawpoek na kyi nawk, a hu awh ak bat thlangkhqi benna hawi nawk, "Ka nik qkawn peek khqi, Israelkhqi chung lakawh vemyihna cangnaak ak bau am hu nyng," tinak khqi hy. **10** Thlang a tyihkhqi ce im na hlat uhy, cawh tyihzoeih thlang ce sadip caana ana awm tlaih hy. **11** Cekcoengawh Jesu taw Nain a mi ti khaw na cet hy, a hubatkhqi mi thlang khawzah a hu awh bat uhy. **12** Khaw awhkaw vawng chawmkeng a mi pha tawm awh, nuhai ca ing a taak chyn a capa ce thihe pe nawk a qawk ce kawt law uhy. Thlang khawzah nuhai a venawh awm uhy. **13** Bawipa ing cawkaw nuhai ce a huh awh, queen soeih nawk a venawh, "Koeh kqang," tina hy. **14** Cekcoengawh cet nawk qeep ce bi nawk, cawh qeep ak kawtkhqi awm dyi uhy. "Cadawng, ka nik qkawn peek, tho lah," tina hy. **15** Cawh ak thi ce tho nawk awi pau hy. Jesu ing a nu venawh pe tlaih hy. **16** Cawkaw amik awmkhqi boeih ing kqih unawh Khawsa ce kyihcah unawh, "Ni venna tawngtha ak boeimang soeih dang law hawh pai hy," ti unawh, "Khawsa ing ak thlangkhqi hqip lawk khqi hy," ti bai uhy. **17** Jesu akawng taw Judah qam ingkaw a kengsam qam boeih awh thang khawngħak hy. **18** John a hubatkhqi ing vawhkaw ik-oeikhqi boeih ve a venawh qkawn pe uhy. A hubat thlang pakhih ce khy nawk, **19** Bawipa ce doet aham tiy hy, "Nang ve ak law hly kawi ce hawh nu, am awhtaw thlak chang kamik qeh hly hyn nu? tinawh doet sak hy. **20** Cawkaw thlangkhqi ce Jesu a venna cet unawh, "Baptisma ak pekung Johan ing nang a venawh awi doet aham kaimih ve ni tyi khqi hy, 'Nang ve ak law hly kawi ce hawh nu, am awhtaw thlak chang kamik qeh hly hyn nu? tinawh ni doet sak khqi hy," tina uhy. **21** Cawh Jesu ing tlawhnat soepkep ak takhqi, thlak tlokhqi ce

qoei sak nawk, qaaichekhqi ce hqek hy, mikhypkhqi ce mik dang sak hy. **22** Cedawngawh ami venawh, "Johan a venna hlat tlaih unawh nami huukhqi ingkaw naming zaakkhqi ce kqawn pe uh: Mikhyp ing khaw hu thai hawh nawk, khawkkhem ing cet thai hawh hy, mynqaikhqi ing ciimcaih hawh unawh, hakpangkhqi ing a mingha khui hawh hy, thlak thikhqi ing the unawh, hahqahkhqi ing awithang leek za hawh uhy. **23** U awm kai ak camawh amak tlu taw a zoseen hy," tinak khqi hy. **24** Johan ak thlang tyihkhqi a ming hlat coengawh, thlang kqeng a venawh Jesu ing Johan akawng kqawn pek khqi hy: "Ikaw huh aham nami ngaih awh nu kqawng na nami ceh? Paipoeng zilh ing a zawn toek nami ngaih awh nu? **25** Am awhtaw, ikaw huh nami ngaih awh nami ceh? Angki hinaak ak nep nepl ing ak thoeihcam qukhqi toek nami ngaih awh nu? Amni, angki hinaak a phu ak tlo tlo ing thoeihcam qu nawk awkai aki tui tui ak aikhqi taw boeikhqi im awm ni a mi awm hy. **26** Cawhtaw ikaw huh ngaih awh nami ceh ce? Tawngħa huh nami ngaih awh nu, Oeih, ka nik qkawn peek khqi, tawngħa anglakawh tawngħa khqoet ceni. **27** Anih akawng vemyihna a na qee hawh uhy: "Na haiahwa ka dyihthing tyi law kawng nyngsaw, anih ing na haai awhkaw lam ce qoek abah law kaw," a ti ce. **28** Ka nik qkawn peek khqi, nu ing a taak ak khui awhtaw Johan anglakawh ak bau khqoet awm hlan hy; cehlai Khawsa ram khuiawh ak zawi soeih na a awm ce anih anglakawh bau khqoet hy," tinak khqi hy. **29** (Thlang boeih ingkaw mangmu ak cawlkungkhqi ing za Jesu ak awi ce a ming zaak awh, a mingmih ce Johan ing baptisma a na peek khqi hawh a dawnngawh, Khawsa lam taw dyng hy tice dyih pyi uhy. **30** Cehlai Farasikhqi ingkaw anaa aki al simkhqi ingtaw a mimah ak poek awh Khawsa ang cainaak ce oelh uhy, Johan a baptism a awm am hu uhy.) **31** Jesu ing, "Cawhtaw ve a chan awhkaw thlangkhqi ve ikaw ing nu ka nytaħħi laħ voei? Ikaw ing nu vekkhqi ve a ming lawh qu? **32** Vekkhqi ve ik-oeih a mi zawihnaa hun awh amik ngawi naasenkħqi ing a mi pyikhqi a mik khy ing myih uhy: "Khungum tum law hlai unyng, am lam uhyt ti; kqahlung ka mi sauh law awh awm, am kqang phoeħi bai uhyt ti," a ti ing myih hy. **33** Johan law nawk buħi awm am ai hy, misur tui awm am aw hy, 'Qaai tahi,' tina uhyt ti. **34** Thlang Capa law nawk awi hy, 'Ai maw, aawk maw, misur tui ak sawk, mangmu ak cawlkungkhqi ingkaw thlak thawlkhqi pyi,' tina uhyt ti. **35** Cehlai ciyħnaak taw a cakhqi boeih ak caming dang sak na awm hy," tinak khqi hy. **36** Farasi thlang pynoet ing Jesu ce buh veel pyi aham khy hy, cedawngawh cawkaw Farasi a im na cet nawk my buh veel pyi hy. **37** Ce a khawk khui awhkaw ak awm thlak thawlħu nynoet ing Farasi a im awh Jesu ing buh pan hy tice ang zaak awh, alabaster bawktui pynoet ce haw law nawk law hy. **38** Jesu a hu benna a khawlkaw awh ce dyi nawk kqang hy, a mikphli tui ing a khaw sui nawk, a lusam ing huhi hy, a khaw ce mawk nawk, bawktui ing syp bai hy. **39** Buħ aħi na ak khykung Farasi thlang ing a huh awh, "Ve ak thlang ve tawngħa mantaw, anih ak bikug ce a u u, tice sim hlai voei, anih ve thlak thawlħi hlai ni," tinawh ak kawlung khuiawh poek hy. **40** Jesu ing a venawh, "Simon, aki qkawn law laħ vang nyng," tina hy. Anih ing, "Kqawn law laħ thaw, cawngħpiķi," tina hy. **41** Cawh Jesu ing, "Thlang pakkhih ing tangka ak pu sakkung a venawh tangka pu hajh hy ni. Pynoet ing tangka denari zanga pu nawk, pynoet ingtaw tangka denari hakip pu hy. **42** A ni pakkhih na tangka pu ce am thung thai hy ni, cedawngawh tangka ak pu sakkung ing zoe sak kqawwi hajh hy. Cawhtaw han ak thlang ing nu anih ce a lungnaak khqoet kaw?" tina hy. **43** Simon ing, "Tangka khawzah bet ak pu peek thlang ing lungna khqoet kaw, tinawh poek nyng," tina hy. Jesu ing, "Ak thym ni nak qkawn phek hy," tina hy. **44** Cekcoengawh nu benna ce mang nawk Simon a venawh, "Vawhkaw thlang ve nak hu nu? Na im na ka law awh, ka khaw silh tui amni pe hyt ti. Cehlai anih

ingtaw a mikphli tui ing ka khaw sui nawk a lusam ing huuh hy. **45** Nang ingtaw amni mawk man hyk ti, cehlai ve nu ingtaw ka lut law cyk awhkawng ka khaw ve ang dym kaana mawk hy. **46** Nang ingtaw ka lu awh situi am ni sypp man hyk ti, cehlai anih ingtaw ka khaw awh bawktui ing ni syp hy. **47** Cedawngawh ka nik kqawn peek, a thawlhaak khawzah ce qeenna awm hawh hy; anih ingawm a lungnaak bau soeih hy; cehlai qeennaak azawiing, a lungnaak zawi khawi hy," tina hy. **48** Cekoengawh Jesu ing nu a venawh, "Na thawlhaak qeenna awm hawh hy," tina hy. **49** Cawh buh ak vel pyikhqi ing, "Thlang a thawlhaak qeenna awm hawh hy," tina hy. **50** Jesu ing nu a venawh, "Nak cangnaak ing ni thaawng hawh hy, ngaihqep cana cet hlah," tina hy.

8 Cekoengawh Jesu taw khawk bau ingkaw vangcakhqi awh cet nawk, khawsa qam awithang leek ce kqawn hy. A hubat thlanghaq hlanihil tloek awm a venawh awm uhy, **2** cekoengawh amah ing qaihche ingkaw tlawnatnaak awhkawng a qoei sak nu thlang vang tloek awm a venawh awm lawt uhy: ak kawk khui awhkawng qaaikhqi ak cawn Meri (Magdalene ak mingnaak); **3** Herod a ipkhui ak khoemkung Chuza a zu Joanna; Susanna ingkaw ak chang nukhqi khawzah awm uhy. Vawhkaw nukhqi ing a mimah a ik-oehi ing Jesu ingkaw a hubatkqi ce do a dan uhy. **4** Cawh thlang khawzah cun law unawh, khaw hoei awhkaw thlang boeih awm a venna law usaw, nyttahnaak ahi hawnak ing ahi kqawn pek khqi hy. **5** "Lo ak toenkung thlang pynoet taw camci ak theh na cet hy. Camci ce ak theh awh, camci a vang taw lam awh tla nawk; thlang ing leh nawk phakhqi ing cung hloep uhy. **6** A vang taw lung awh tla nawk, hang cawt law hlai hy, ak qqa am cak nawk qeu pahoei hy. **7** Camci a vang taw hling anglak na tla nawk, hling ing zawi kheop saw qeen zip hy. **8** Camci a vang taw ang laih leek awh tla hy, cawt nawk vui thaih hy, a pyh zakhat dyna ak thaih thawt hy," tina khqi hy. Vawhkaw nyttahnaak ahi ak kqawn coengawh, "Zaakaak haa ak ta ingtaw za seh nyng," tina khqi hy. **9** A hubatkqi ing cawhkaw nyttahnaak ahi ak kqawn ngaihnaak ce doet uhy. **10** A mingmih a venawh, "Khawsa ram simnaak awihyp ce ngamnigh a venawh taw peek na awm hawh hy, cehlai thlak chang a venawh taw nyttahnaak ahi ing kqawn pe nyng, "Hu hlai kawm uh, a mami hatnaak aham ingkaw za hlai kawm uh, a maming zaksimnaak aham," tina khqi hy. **11** Nyttahnaak ahi ing ak kqawn ngaihnaak taw vemiyhna awm hy: Camci cetaw Khawsak ahi ni. **12** Lam awh ak tla camci taw thlang ing awithang leek ce za hlai hy; qaaing law nawk, ap cangna unawh, thaawngna ama mi awm naak ham amik kawlung khui awhkaw ce loh pek khqi hy. **13** Lung awh ak tla camci cetaw ahi ce ang zaak awh zeelnaak ing do pahoei hy, cehlai ak qqa am awm hy. Kawlhkah awhkaw ham doeng cangna unawh, sykzoeknaak a law awhtaw naung taak uhy. **14** Hling lakawh ak tla camci cetaw ahi ce za nawk do hy, cehlai ce ak ahi ce khawmdek khawsaknaak awh lylapnaakkhqi, boeinaak ingkaw awmhlynaakkhqi ing a zawl kheop adawngawh am taai thai hy. **15** Cehlai ang laih leek awh ak tla camci cetaw: kawlung dyngnaak ingkaw leeknaak ing ahi za unawh, kym unawh, thaih qui qah uhy. **16** U ingawm mai a vang awh dawn ing am myk unawh, iihkun ak kaina am tahi; ipkhui awh ak awm thlangkhqi ing vangnaak ce a mi huh thainaak ham, maihvang a mim hawihnaak awh ni a mim hawih. **17** Kawtih a mang dangnaak thai ham thuh ak phah khawi pynoet ca awm am awm kaw, amak dang hly kawi ang hyp na ak awm ik-oehi pynoet ca awm am awm kaw. **18** Cedawngawh ikawmyihna ahi naming ngai tice ak nep cana poek uh. U awm ak ta cetaw sap pek khqoet kawm usaw, cehlai u awm amak ta cetaw, a taak chyn lawh pekna awm kaw," tina khqi hy. **19** Jesu a ni ingkaw a naakhqi ce a venna law uhy, cehlai thlang a kqeng

aih awh a venna am cet thai uhy. **20** Cedawngawh, "Na nu ingkaw na koeinaakhqi ce a leng na dyi unawh, nang ni huh ham ngaih uhy," tina uhy. **21** Cawh anih ing, "Ve Khawsak ahi za nawk ak saikhqi taw ka nu ingkaw ka koeinaakhqi ni," tinak khqi hy. **22** Hypoet awh Jesu ing a hubatkqi venawh, "Tuiqla na cet usih," tinak khqi hy. Cedawngawh lawng khuina lut unawh cet uhy. **23** A mi ceh huili awh anih taw ip hy. Tuiawh ce khaw hli lawnawh lawng ce tui kehoep saw ly unawh awm uhy. **24** A venna cet unawh thawh uhy, a venawh, "Bawipa, Bawipa, kaimih tui awh cum hly hawh u nyng vel!" tina uhy. Cawh anih ce tho lawnawh khawhli ingkaw tuiphu ce zyi hy; cawh khawhli ce dym nawk a sitdik na awm tlaah hy. **25** Cekoengawh amingmih ce, "Hana namik cangnaak?" tinak khqi hy. Cekkhqi ing kqih ingkaw kawpoek kyi doena, "Ve e nu u ve? Khawhli ingkaw tui ce ahi pe saw ak ahi aming ngai pek hy," ti qu uhy. **26** Galili caqai ben nakaw Gerasenes ben ce pha uhy. **27** Ce hun ami pha awh, ce a hawk khuiawh ak awm qaaing am tu thlang pynoet ing pan law hy. Ce ak thlang taw khawqyt khuiawh angki hinaak a bai kaana im awm am awm nawk, phyi khqang awm poepa hy. **28** Anih ing Jesu ce a huh awh, khy nawk a khawlung awh khukzym pehy, ak tha yy nawk, "Jesu, sawsang soeih Khawsa Capa, ikaw ni tina vang na ti? Koeh ni khuihka sak mai, qeennaak ni thoeh nyng," tina hy. **29** Jesu ing qaihche a venawh thlang ak kawk khuiawh awm aham ahi a na pe khaw hawh hy, a kut a khaw ce thiqliq ing pin unawh thlang awm qeh sak hlai uhy, thiqlikhqi phu kyk kyk nawk qaaing anih ce kqawp chyp na sawi poepa hy. **30** Jesu ing "U nu nang ming naak?" tina hy. Anih ing, "Legion," ni, (ak kawk khuiawh qaaing khawzah a awm a dawngawh) tina hy. **31** Lawkkqawg ak dung soeih awh a mingmih ce amak thlaak naak aham a venawh qeennaak thoeh uhy. (*Abyssos g12*) **32** Cawh tlang awh vawk sawng khawzah awm usaw, vawkkhqi ak kawk khuiawh mah lut sak khqi aham qeennaak thoeh uhy, ce a dawngawh anih ing lut sak khqi hy. **33** Qaaikhqi taw thlang ak kawk khuiawh awhkawng cawn unawh, vawk ak kawk khuiawh ce lut uhy; cawh vawkkhqi ce hqeeng nakawng tuili na cawn unawh thi boei huy. **34** Cemyihna ik-oehi ak awm ce vawk ak cahkhqi ing a mi huh awh dawng unawh khawk bau ingkaw vangcakhqi na ce kqawn usaw, **35** cedawngawh cawhkaw ik-oehi ce ak toek aham thlangkhqi ce cet uhy. Jesu a ven a mi pha awh, ak kawk khuiawh kawng qaaing ahi ce cawt thlang, hi bai nawk sangthingna Jesu a khawlung awh ak ngawi ce hu unawh kqih uhy. **36** Ak hukhqi boeih ing qaaing am tu thlang ikawmyihna a qoeinaak tice thlangkhqi venawh kqawn pe uhy. **37** Cedawngawh Gerasenes qam khuiawh ak awm thlangkhqi boeih ing a mi kqih soeih a dawngawh cekkhqi ce cehtaah aham qeennaak thoeh uhy. Cedawngawh lawng khuina ce lut tlaah unawh cet hy. **38** Ak kawk khuiawh kawng qaaing ahi ce cawt thlang a hu awh bat lawt aham qeennaak thoeh hy, cehlai Jesu ing voei sak tlaah hy. **39** Na im na voei nawhtaw Khawsa ing ikawmyihna nak khan awh ik-oehi a sai tice val kqawn" tina hy. Cedawngawh ce ak thlang ing cet nawk Jesu ing ikawmyihna ik-oehi a sai peek tice khawk khuiawh kqawn hy. **40** Jesu ce ang voei tlaah awh, thlang boeih ing anih ce a ming ngaih-u a dawngawh thlangkhqi ing ym uhy. **41** Cawh Jairu ak mingnaak, Sinakawk ukkung thlang pynoet ce law nawk Jesu a khawlung awh khuksum nawk a im na ceh aham qeennaak thoeh hy. **42** Canu a taak dyn, kum hqa hlanihil ak law ce tlo nawk thi hlo hlo hy. Lam a ceh huiawh, thlang kqeng ing anih ce nen uhy. **43** Cawh kum hqa hlanihil a thi na ak kqam nu pynoet ce awm hy, a iugawm anih ce am qoei sak thai hy. **44** Anih ce a hu awh cet nawk a hidawng ca ce bi pehy, cawh a thi ce dym hy. **45** Jesu ing, "U nu kai anik bi?" tinak khqi hy. Thlang boeih ing, "Am sim nyng," a mi tinaak awh Piter ing, "Bawipa, thlang a doem aih awh ni nen

unawh ni," tina hy. 46 Cehlai Jesu ing, "Thlang pynoet oet ing ni bi hy; saithainaak ka venawh kawng cawn hy ti sim nyng," tinak khqi hy. 47 Cawkaw nu ing thuh thai na am awm voel hy ti a sim awh, thyn doena a venna cet nawk a hawkung awh koep pehy. Thlang boeih a haiawh kawthi bi nawk ikawmyihna a qoei tlang tice kqawn pehy. 48 Cekcoengawh cawkaw nu a venawh, "Ka canu, nak cangnaak ing ni qoei sak hawh hy. Ngaihding caana cet hlah" tina hy. 49 Jesu ing cemyihna awi ak kqawn huiawh, Sinakawk ukkung Jairu a im nakawng thlang pynoet ce law hy. Anih ing, "Na canu ce thi hawh hy, cawngpyikung ce koeh lawn voel," tina hy. 50 Jesu ing ce akawi ang zaak awh Jairu a venawh, "Koeh ly; cang mah cangna lah, na canu ce qoei tlaih bit kaw," tina hy. 51 Jairu a im ce a mi pha awh, Piter, Johan, Jakob ingkaw a nu a pa doeng ce ip khuina ceh pyi hy. 52 Cawkaw thlangkhqi boeih taw ko ang kqang uhy. Jesu ing, "Koeh kqang voel uh, ak thi am ni, ak ip ni," tinak khqi hy. 53 Cawkaw ce khqi ing nuca taw thi hawh hy tice a mi sim a dawngawh qaih na uhy. 54 Nuca ce a kut awh am tu coengawh, "Ka ca tho hlah," tina hy. 55 Cawkaw ang Myihla ce voei tlaih nawh, tho pahoei hy. Jesu ing ai kawi pynoet oet peek aham kqawn pehy. 56 A nu ingkaw a pa taw a ning ngaih kyi soeih hy, cehlai cawkaw ik-oehi ce u a venawh awm amak kqawn aham awi pehy.

9 A hubat thlanghqa hlaihieh ce ak khy coengawh, qaaikhqi hqek thainak ingkaw thlak tlo qoei sak thainaak ce pek khqi nawh, 2 Khawsa awithang leek kqawn aham ingkaw thlak tlokhqi qoei sak aham tyi khqi hy. 3 A mingmih a venawh: "Lam awhkaw aham ikaw awm koeh khyn uh - sawngqawl, sawngsa, phaihpi, tangka ingkaw angki zunghih koeh khyn uh. 4 Nami pahnaak im a hoih awh, ce a khaw ce nami cehtaak hlan dy awm poe uh. 5 Thlang ing a ma ni do khqi awithaw, ce a khaw ce nami cehtaak awh nami khawpha awhkaw dekvai ce khawk sih uh," tinak khqi hy. 6 Cedawngawh, cet unawh khaw pynoet coeng pynoet awh awithang leek kqawn unawh thlak tlokhqi ce qoei sak uhy. 7 Herod boei ing cawkaw awithang ce za hy. Thlang vang ing, "Johan ce tho tlaih nawh ni," ti uhy, 8 thlang vang ingtaw, "Elijah dang law tlaih nawh ni," ti bai uhy, thlang vang bai ingtaw, "Syn awhkaw tawngtha pynoet oet hqing tlaih nawh ni," tinawh kqawn uhy. 9 Cehlai Herod ingtaw, "Johan ce a hawng tlyk hawh hlai nyng; vawhkaw awithang kang zaak ve a u bai hy voei nu?" ti hy. Cedawngawh anih ce huh aham ngaih hy. 10 Ceityihkhqi a mingvoei tlaih coengawh, ik-oehi a mi saikhqi ce Jesu a venawh kqawn pe uhy. Cekkhqi ce Bethsaida a mi ti khaw na ce celi pyi khqi hy. 11 Cehlai thlang kqeng ing sim nawh a hu awh hqut uhy. Cekkhqi ce ym nawh a mingmih a venawh Khawsa qam akawng ce kqawn pek khqi nawh, cekcoengawh thlak tlokhqi awm qoei sak khqi hy. 12 Khaw a nung keeng awthaw thlanghqa hlaihieh tloek ce a venna law unawh, "vawhkaw thlang kqeng ve khaw ceng khaw cawi awh tyi khqi hlah, buh a an ingkaw ih a awmnaak sui na u seh, ningnih ce kqawng lakna nik awm uni," tina hy. 13 Anih ing, "Nangmih ing ai kawi ce pe uh," tinak khqi hy. A mingmih ing, thlang vezah aham buh a an am nik tlaih peek mantaw - phaihpi cun nga ingkaw nga pakhih doeng ni a awm hy," tina hy. 14 (Vawh thlang thongnga awm uhy.) Cehlai a hubatkqi na ce, "Thlang hakip hakip awh ngawih sak hloep hloep uh," tinak khqi hy. 15 A hubatkqi ing thlang kqeng ce ngawih sak khqi hy. 16 Phaihpi cun nga ingkaw nga pakhih ce lo nawh khan benna hang mang nawh, zeelawi ak kqawn coengawh ek hy. Thlang kqeng a haiawh toen peek aham a hubatkqi venawh pehy. 17 A mingmih ing ai unawh a mi phyi coengawh ak ngen ce vawh hqa hlaihieh na kawi uhy. 18 Hypoet taw Jesu ing amah doeng ak cykcah awh, a hubatkqi ce a venawh awm usaw doet khqi hy, "Thlangkhqi ing kai ve u nu a mi ti?" tinak khqi hy. 19 Cekkhqi ing, "Thlang vang ing 'Baptisma

ak pekung Johan,' ti unawh, thlang vang ing, 'Elijah,' ti uhy, thlang vang bai ingtaw, 'Syn awhkaw tawngtha pynoet oet ak tho tlaih ni,' ti uhy," tina hy. 20 Cawkaw, ami venawh, "Nangmih ingtaw kai ve u nu nami ti?" tinak khqi hy. Piter ing, "Nang taw Khawsa a Khrhi ni," tina hy. 21 Ce akawng ce u aven awh awm amamik kqawn aham cekkhqi ce yn khqi hy. 22 Thlanghqeing Capa ing khuikhanaak hu kawmsaw a hqamcakhqi, khawsoeih boeikhqi ingkaw anaa awi cawngpyikungkhqi ing hoet kawm uh, him kawm usaw am thum nyn awh tho tlaih kaw," tinak khqi hy. 23 Cekcoengawh a mingmih boeih a venawh, "U ingawm ka hu awh bat ham a ngaih awthaw, amah ingkaw amah ce hoet qu seitaw, myngawi na amah a thinglam ce kawh doena ka hu awh bat law seh. 24 Ikawthi, u awm a hqingnaak hul ham ak ngaih ingtaw hlawng seitaw, u awm kai ak camawh a hqingnaak aq hlawng ingtaw a hqingnaak ce hul kaw. 25 Thlang ing khawmdek pum ve ham mai seiawm a hqingnaak a hlawng awthaw anih ham ikaw phu a taak? 26 U awm kai ingkaw kak awi ak chah pyi taw, Thlanghqeing Capa ing amah a boeimangnaak, a Pa a boeimangnaak ingkaw khan ceityih ciimcakhqi a boeimangnaak ing ami law awh anih ce chah pyi lawt kaw. 27 Awitak ka nik kqawn peek khqi, vawh ak dyi thlang vangkhqi ing Khawsa qam a huh hlan dy thihnaak amak tan hly awm uhy," tinak khqi hy. 28 Ve ak awi ak kqawn coeng ak kqeeet nyn awh, Jesu ing Piter, Johan ingkaw Jakob ce khy nawh tlang na cykcah aham van pyi khqi hy. 29 Ak cykcah awh a hai ce thaw qu nawh, a hi ce khawkphlomyihna vang hy. 30 Cawkaw thlang pakhih Mosi ingkaw Elijah, 31 ce boeimangsoeih na dang nih nawh Jesu ingqawi awi pau uhy. Jesu a lam ce Jerusalem awh a soep naak hly ce kqawn uhy. 32 Piter ingkaw a pyi qawi taw ip uhy, a ming hqyng law awthaw a boeimangnaak ing a venawh thlang pakhih ak dyi ce hu uhy. 33 Cawkaw thlang qawi ing Jesu ceh taak hlah sih a ni ti awh, Piter ing, "Bawipa, vawh awmnaak ham hyn leek soeih hy, buk pakthum awh heen sih - pynoet ce nang aham seh, pynoet ce Mosi aham seitaw pynoet bai ce Elijah aham seh," tina hy. (Kaw ak kqawn ti awm am sim hy.) 34 Awi ak kqawn hulii awh, myi than law nawh a mingmih ce zawl khqi kheop hy, myi ak khuiawh a mi lut awh khqi uhy. 35 Myi ak khuiawh kawng awi law nawh, "Vetaw ka Capa kak tyh ni; ak awi ngai pe uh," tihy. 36 Cawkaw awi ce a sit coengawh, Jesu amah doeng caa ce hu uhy. A hubatkqi ing cawkaw ik-oehi ce khoem dym unawh a mi huh ik-oehi ce a u a venawh awm ap kqawn pe uhy. 37 A khawngawi awh tlang nakawng a mi kqum lawawh, thlang khawzah ing amih ce do uhy. 38 Thlang kqeng ak khuiawh kaw thlang pynoet ing, "Cawngpyi kung, ka capa na toek law ham ni ngaih na nyng, ka capa ka taak dyn na awm nawh. 39 Ngai lah, qaai ing tu nawh, khy hoeih hoeih hy, a cimtui ang tlaak doena deh awh tluuk sak nawh a phep qee coengawh ceh taak hoeih hoeih hy. 40 Na hubatkqi venawh hqek pek a hamma thoeh hlai nyng, am hqek thai uhy," tina hy. 41 Jesu ing, "Aw cangnaak amak takhiq ingkaw amthim amak cak cadil tloek, iqtyt nu ka ni awm pyi khqi nawh ka ning yh pyi khqi kaw? Na capa ce vena law pyi lah," tina hy. 42 Naasen ce a law pyi hui awh qaai ing dek awh tluuk sak nawh ak tlo na phep qee hy. Cehlai Jesu ing qaai ce zyi nawh, naasen ce a qoei sak coengawh a pa a venawh pe tlaih hy. 43 Thlang boeih ing Khawsa a boeimangnaak ce kawpoek na kyi sak uhy. Jesu a them saithainaak awh a milk kawpoek a kyi hui awh, Jesu ing a hubatkqi venawh, 44 Awi kqawn law vang nyng, ak nep na ngai lah uh: "Thlanghqeing Capa ve thlang a kut awh tu sak kawm uh," tinak khqi hy. 45 Cehlai ak kqawn ngaihnaak ce am zaksim pe uhy. A mingmih ang zaksim kawi na a ma awm a dawngawh, am khoem thai uhy, amah ce doet aham awm kqih koek uhy. 46 A mingmih ak khuiawh u nu ak bau soeih na ak awm kaw, tinawh a hubatkqi ak khuiawh oelh qu uhy. 47 Jesu ing a

mingmih ak kawpoek ce a sim a dawngawh naasen ce lo nawh a venawh dyih sak hy. **48** Cekcoengawh a mingmih a venawh, "U awm vawhkaw naasen ve kai ang ming ing ak ym taw kai a nik tyukung ce ak ym na awm hy. Nangmih boeih ak khuiaiwah ak zawi soeih na ak awm ce ak bau soeih na awm hy," tinak khqi hy. **49** Johan ing, "Bawipa, thlang pynoet ngawh nang ang ming ing qai a hqek ce hu u nyngsaw kham pe u nyng, kaimih ak khuiaiwah kaw thlang na a ma awm a dawngawh," tina uh. **50** Jesu ing, "Koeh kham pe uh, nangmih a ma nik oelh thlang cetaw nangmih ben thlang ni," tinak khqi hy. **51** Khawk khan na amah ceh pyi aham a tym a zoe law awh, Jesu taw Jerusalem na cet hy. **52** Laipaikhqi ce haina tyi hy, ik-oeihkhqi quek a bah aham a mingmih ce Samari khawk khui pynoet awh cet uh, **53** cehlai Jerusalem khaw na ceh phaat aham ang cai a dawngawh cawkaw a mik awm thlangkhqi ing anih ce am do uhy. **54** A hubat qawi Jakob ingkaw Johan ing cemiyhna a mi awm ce a ni huh awh, "Bawipa, a mingmih ve hqe aham khawk khan nakaw mai (Elijah ing ak khy myihna) khy sih aw?" tina hy nih. **55** Cehlai Jesu ing cekqawi ce hawi sih nawh zyi qawi hy. (Kawmih ak kawpoek nu nani taak tice am sim hy nik ti). **56** (Thlanghqing Capa ve thlang a hqingnaak hqe aham am law nawh, hqingnaak hul aham nani a law, tina qawi hy.) Cekcoengawh khawk chang na cet pahoei uh. **57** Lam na a mi ceh awh thlang pynoet ing a venawh, "Na cehnaak a hoei awh bat lawt vang nyng," tina hy. **58** Jesu ing a venawh, "Ngentangkhqi ing a mik kawk ta unawh phakhqij ingawm a ming bu ta uh, cehlai Thlanghqing Capa ingtaw a lu a tloengaak hun kangna awm am ta hy," tina hy. **59** Thlak chang a venawh, "Ka hu awh bat law," tina hy. Cehlai cawkaw thlang ing, "Ka pa a qawk khoem cang vang," tina hy. **60** Cehlai Jesu ing a venawh, "Thlak thi cetaw ak thi khqi ing khoem ngoen seh, nang taw cet nawh Khawsa ram ce kqawn lah," tina hy. **61** Thlak chang pynoet bai ing, "Na hu awh bat bit kawng nyng, cehlai ka cakaw pagengkhqi phih a qaa cang vang nyng," tina hy. **62** Jesu ing a venawh, "U awm laikawk thawlnaak awh a kut ta nawh hu benna ak mang taw Khawsa qam thlang nih amn tlaak hy," tina hy.

10 Cekcoengawh Bawipa ing ak chang thlang khqijkip coengawh pakkhih ce caksak nawh amah a cehnaak hly kawi khaw boeih awh lamma na tyi khqi hy. **2** A mingmih a venawh, "Caang ah ham taw khawzah hlai, bibikung taw zawica hy. Lo khuiaiwah ce bibikung thlang khawzah a tihnaak aham, loh toenkung Bawi a venawh thoeh lah uh. **3** Cet lah uh! Ngentang anglakawh tuu myihna ni tih khqi nyng. **4** Tangka bawm awm sawngsa awm khawmyk awm koeh khyn uh; lam awh thlang nami huh awh awm koeh voem uh. **5** Ipkhui na nami lut awh, lamma cyk awh, 'Ve ipkhui awh ngaihdinggaak awm seh,' tina uh. **6** Ngaihdinggaak a awm awhtaw naming ngaihdinggaak awi ak khanawh awm poe kaw; a ma awm awhtaw nangmih a venna voei law tlaih kaw. **7** Ce a ipkhui awh awm unawh taw, a mingmih ing ami peek saqui ce aw a ai uh, kawthi bibikung taw a bibi phu ce a huh ham tyng hy. Nami im pahaaka koeh chawt uh. **8** Khaw pynoet ak khuiaiwah nami lut awh nangmih ce a ni do khqi awhtaw, nangmih a haiawh ami toen law saqui ce aii uh. **9** Cawh ak awm thlak tlokhqi ce qoei law sak unawh taw 'Khawsa qam taw nangmih a venawh zoe law hawh hy,' tina uh. **10** Cehlai khaw pynoet ak khuina nami lut awh a mani do khqi awhtaw, lam hqang cet unawh taw. **11** 'Nami khaw awhkaw dekvai ka khawpha awh ak kap awm namik khanawh nik khawk sih khqi nyng; cehlai Khawsa ram nami venawh pha law hawh hy tice sim kawm uk ti,' tikawm uk ti. **12** Ka nik kqawn peek khqi, ce a khawngi awh Sodom khaw taw ce a khaw anglakawh ana hawih khang bet kaw. **13** Korazin nang, khaw map hyk ti! Bethsaida nang, khaw map hyk ti! Kawthi nangmih ak khuiaiwah sai

na ak awm kawpoek kyinaak ik-oeihkhqi ce Tura ingkaw Sidon khaw awh sai na ana awm mantaw, tlamhi byng doena vyt ak khan awh ngawi unawh syn deng awh ni a mi nang zut hly hawh hlai hy. **14** Awidengnaak khawngi awh Tura ingkaw Sidon khaw ce nangmih anglakawh ana hawih khang bet kaw. **15** Ce, nang Kaperanuam, khan na na hak zoek qu hly tang nu? Kaw ce, hell na man na nung tlaak kaw. (**Hadēs g86**) **16** U awm nangmih ak awi ak ngai taw kai ak awi ak ngai na awm hy; u awm nangmih a nik hoet khqi taw kai a nik hoet na awm hy; u awm kai a nik hoet cetaw kai a nik tyukung ce ak hoet na awm hy," tinak khqi hy. **17** Thlang khqijkip coengawh pakkhih taw zeel doena voei law unawh, "Bawipa, qqaikhqi ingawm nang ming ak caming kaimih ak awi ngai uh," tina uh. **18** Anih ing, "Khawphlamiyhna khan nakawng Setan a nuk tla law ce hu nyng. **19** Nangmih a venawh khqi ingkaw cengta-al leh thainaak ingkaw qaal ak thaawmnaak noeng thainaak ce ni pek khqi hawh nyng; ikaw ingawm nangmih ce amni tlawh sak khqi thai kaw. **20** Cehlai qaakikhqi ing nangmih ak awi ang ngai a dawngawh koeh zeel uh, khawk khan na nangmih ang ming qee na a awm hawh a dawngawh zeel bet uh," tinak khqi hy. **21** Cawh Jesu taw Ciim Myihla ak caming zeelnaak ing be nawh, "Ka Pa khawk khan ingkaw khawmdek Bawipa, thlakcyi ingkaw thlakthoemkhqi venawh vawhkaw ik-oeih ve phah pe nawh, naasenkhhqi venawh nang dang sak a dawngawh nang ming nim nyih nyng. Oeih, ka Pa ve ve nang a koe ak leek zeelnaak na awm hy. **22** Ik-oeih boeih ve ka Pa ing ka venawh ni pe hawh hy. Pa am kaa taw u ingawm Capa ce am sim hy, ang daang naak aham Capa ing ak tyk thlangkhqi doeng ingkaw Capa am kaa taw u ingawm Pa ce am sim hy," tinak khqi hy. **23** Cekcoengawh a hubatkhi benna mang nawh, "Nangmih ing nami huh ak hu taw a zoseen hy! **24** Ikwitih ka nik kqawn peek khqi, tawngtha khawzah ingkaw sangpahrang khawzah ngawh nangmih ing nami huh ve huh aham ngaih hlai uh, amna hu uh, nangmih ing naming zaak ve zaak aham ngaih hlai uh, am za uh," tinak khqi hy. **25** Cawh anaa awi ak thoem thlang pynoet ing Jesu noek adak aham dyl nawh doet hy. "Cawngpyikung kumquj hqingnaak ka taaknaak aham ikaw ka sai kaw?" tina hy. (**aiōnios g166**) **26** Jesu ing, "Anaa awi awh ikaw a qee? ikawmyihna na noet naak?" tina hy. **27** Anih ing ve myihna hlat pehy. Bawipa na Khawsa ce nak kawlung boeih, na hqingnaak boeih, nak thaawmnaak boeih, nak kawpoek boeih ing lungna kawp ti.' Cekcoengawh, 'Na imceng ce namah a pum a myihna lungna lawt kawp ti' tihy," tina hy. **28** Jesu ing, "Ak thymna nim hlat hyk ti ce; vemihkhqi ve sai lah, cawhtaw hqing kawp ti," tina hy. **29** Cehlai cawkaw thlang ing ak cang a ngaih a dawngawh Jesu ce doet hy, "Ka imceng ce a u nu?" tina hy. **30** Jesu ing ak awi am hlatnaak aham vemiyhna tina hy; "Thlang pynoet taw Jerusalem awhkawng Jeriko khaw na a nu ceh awh lam awh thlak chekhhqi mi hqum qu uh. A angki hinaak suh pe unawh ak thi tawna vyk unawh cehta uh. **31** Cawh khawsoeih pynoet ce cawkaw lam awh nu cet lawt hy, cawkaw thlang ce a huh awh, ak cheng benna qei nawh cehta hy. **32** Cemyih bai lawtna, Levi thlang pynoet cawkaw lam awh ce law bai hy, ce a hun ce pha law nawh thlang ce a huh awh qei nawh cehta bai hy. **33** Cehlai Samari thlang pynoet ce, ce ak thlang a awmnaak hun pha law hy, ce ak thlang a huh awh qeen nawh, **34** a venna cet nawh, a mynnakhqi ce misur tui ingkaw sitiu ing a hluk peek coengawh zeen pehy. Cekcoengawh cawkaw thlang ce amah a meqang awh ngawih sak nawh, ak nep caana a khut a hlep thainaak aham khin pahaaka im na cehpyi hy. **35** A khawngiawh awhtaw amah a tangka denari pakkhih ce lo nawh khin pahaaka im ak qehkung a venawh pehy. 'Ak nep na ana toek cang, cang voei law tlaih awh, tangka na hawnaak boeih ce ni thung tlaih bit kawng," tina hy. **36** Cawhtaw vawhkaw thlang pakthum ak khuiaiwah a umi ak thlang

nu ami vyyk a imceng na ak awm kaw," tina hy. 37 Cawkaw anaa awi ak thoem thlang ing, "Ak khan awh qeenakaak ta thlang ce," tina hy. Jesu ing, "Cet naws cemyihna ce sai lawt," tina hy. 38 Lam ami ceh huili awh, vangca pynoet ce pha uhy, ce a khawk khuiawh kaw ak awm Marta ing anih ce a im awh pah sak hy. 39 Marta ing Meri ak mingnaak a na pynoet tahi, anih ingtaw Bawipa ak awih kqawn ce ngai aham a khawkung awh ngawi pehy. 40 Cehlai Marta taw buh an ang thaawng awh am hoeng hy. Cedawngawh Jesu a venna law naws, "Bawipa, ka na ing kamah doeng bibi aham a ni hlah phlam ve kawna awm am nak poek hly naws nu? Kai ani bawm aham kqawn pe lah," tina hy. 41 Bawipa ing, "Marta, Marta ik-oeih khawzah nak poek aih awh ngaihsa hyk ti. 42 Ik-oeih pynoet doeng ni a ngoe, Meri ingtaw ak nep khqoet ce tyk hawh, cece u ingawm am qawt pe thai hy," tina hy.

11 Hypoet taw Bawipa Jesu amah doeng hun oet awh cykcah hy. Ak cykcah coengawh, a hubatkhqi cykcahnaak a cawngpyi a myihna cykcahnaak ni cawngpyi lawt lah," tina hy. 2 Cedawngawh a mingmih a venawh, "Namik cykcah awh vemiyihna cykcah uh, "Kaimih a Pa, nang ming kqjihchahaak awm seh, 3 Myngawi ai tat buh ni pek khqi lah. 4 Thlakthawh ak khan awh queenkaw ha ming ngai a myihna, kaimih a thawlhnaka awh queenkawh ngai law lah. Sykzoeknaak awh koeh ni sawi khqi," tinak khqi hy. 5 Cekcoengawh a mingmih a venawh, "Nangmih ak khuiawh thlang pynoet ing pyi pynoet ta mai lah seh, thanlung awh cawkaw a pyi pynoet a venawh cet naws, 'Ka pyi, phaihipi cun thum awh nik pu cang lah, 6 khawlawng nakaw ka pyi law naws, ka toen peek ham ikaw am ta nyng,' tina hy. 7 Cawh ipkhui na ab awm thlang ing, 'koeh ni negeu koeh ni lawn; chawh khai hawh nyng, ka cakhqi awm ip boeih hawh uhy, tho naws am ni pe hly thai voel nyng,' tina hy. 8 Ka nik kqawn peek khqi, anih ce am tho naws phaihipi ce am pe thai hy, thoeh khak saw a pyi na a awm a dawngawh the thawksaw a ngaih zah pe kaw. 9 Cedawngawh ka nik kqawn peek khqi: Thoeh lah ni pe kaw; sui lah hu kawp ti; khoek lah nang aham awngna awm kaw. 10 Ak thoeh ingtaw dang naws; ak sui ingtaw hu hy; ak khoek thlang aham chawh ce awng pe kaw. 11 Nangmih pa na namik awmkhqi ak khuiawh, na ca ing phaihipi a thoeh mantaw lung ak pe namik awm hly nu? Nga a thoeh awh khqui namik pe hly nu? 12 Aihtui a thoeh mantaw ceita-ai namik pe hly nu? 13 Nangmih thlak leek am khqi ing za, nami cakhqi aham ik-oeih leek peek aham nami sim awhtaw, khawk khan nakaw ak awm pa ing ak thoehkhqi venawh Ciim Myihla ce izah nu a peek khqoet kaw!" tinak khqi hy. 14 Jesu ing awi amak pau thai thlang ak kawk khui awhkawng qaa'i ce hqek pehy. Qaa'i ing anih ce a cehtaak coengawh, awi ak myh thlang ce pau hy, cedawngawh thlang kgeng amik kawpoek kyi hy. 15 Cehlai thlang kgeng ingtaw, "Beelzebub" qaaikhqi ak caming ni qaa'i a hqek," tina uhy. 16 Ak chang tloek bai ingtaw, khan benna kaw hatnaak huh sak aham noek a dak uhy. 17 Jesu ing a mingmih ak kawpoek ce a sim dawngawh a mingmih a venawh: "Qam awm a ming phek bo qu awhtaw qeeng kaw; ipkhui awm aming phek bo qu awhtaw thu kaw. 18 Setan awm a ming phek bo qu mantaw, ikawmyihna a qam ang diyh thai kaw? Kai ing Beelzebub ak caming qaaikhqi hqek hy namiti a dawngawh ve ak awi ka nik kqawn peek khqi. 19 Kai ing qaaikhqi ce Beelzebub ak caming ka hqek khqi awhtaw u ak caming nu nangmih a hubatkhqi ing qaaikhqi ami hqek lawt? Cawhtaw a mingmih ce nangmih awi anik dengkungkhqi na awm hawh kawm uh ce. 20 Cehlai qaaikhqi ce Khawsa kutply ing ka hqek awhtaw, Khawsa qam taw nangmih a venawh pha hawh hy. 21 Ak thamah thlang ing, ak cimsu pala toen naws a im ce a qeh awhtaw a khawkhamkhqi ce syng hy."

22 Cehlai ak thamah khqoet thlang ing anih ce tu naws a noeng awhtaw, anih ing a ypnak cimsu pala ce a lawh peek coengawh a khawkhamkhqi ce plam pe kaw. 23 U awm kai ama nik dyih pyi taw kai anik qaalaak na awm naws, u awm kai ama nik cawi pyi taw ak theh thlang na awm hy. 24 Qaaiche pynoet ce thlang ak kawk khuiawh kawng ak cawn coengawh, cet hyhy naws dymnaak ce sui hlai hy am hu hy. Cekcoengawh taw, 'ka cehtaak im na ce cet tlaih mai vang nyng,' tiyh. 25 Voei tlaih naws a toek awh, im nawt qu hqeeet naws ak cimcaih na ak awm ce hu hy. 26 Cawhtaw amah anglakawh ak se khqoet qaa'i khqi ce law pyi naws ami lut coengawh awm uhy. Cawh cawkaw thlang ce ak cyk awhkawng lakawh nauh khqoet hy," tinak khqi hy. 27 Ve ak awi ve Jesu ing ak kqawn awh, thlang kgeng ak khuiawh kaw nu pynoet ing, "Nang anik takung ingkaw suk anik awb sakkung nu taw a zoseen soeih hy," tina hy. 28 Jesu ing, "Khawsa ak awi za naws ak ngaikhqi ce ami zoseen khqoet hy," tina hy. 29 Thlang a doem law khqoet khqoet awh, Jesu ing, "Tuhawkaw cadilkhqi ve cadil chekhqi ni. Kawpoek kyi hatnaak ce sui hlai uhy, Jonah a hatnaak doeng am awhtaw ak chang hatnaak am hu kawm uh. 30 Jonah taw Nenivi thlangkhqi hatnaak na a awm myihna, Thlanghqing Capa awm tuhawhaw cadilkhqi hamna hatnaak na awm lawt kaw. 31 Awi dengaak khawngi awh kham benna kaw Sangphrang nu taw ve a cadil awhkaw thlangkhqi mi dyi hiah kawmsaw a mingmih ce thawl sak kaw; kawtih anih cetaw Solomon a cyihnaak ak ngai na law hy, tuh Solomon anglakawh ak bau khqoet awm hy. 32 Nenivi awhkaw thlangkhqi ce awidengnaak nyn awh ve a cadil awhkaw thlangkhqi ing boe hly sak uhy; kawtih a mingmih cetaw Jonah awh kqawnnaak awh zut uhy, Jonah anglakawh ak bau khqoet ce vawh awm hy. 33 U ingawm mai a vang awh ik-oeih ing a hlipnaak awh am ta khawi hy, dawn ingawm am myk khawi hy. Ipkhui awh amik law thlangkhqi ing vangnaak ce ami huh thainaak aham, maih vang a mim hawhihaak awh ni a mim hawhi hy. 34 Mik taw pum a maivang na awm hy. Na mik a leek mantaw na pum boeih ce dang hy. 35 Na pum awhkaw maivang ak awm ce amam thannaak aham ngaih ta lah uh. 36 Cedawngawh, na pum boeih ce dang naws, am thannaak ve tehca awm ama awm awhtaw, na pum ce maivang ing ak coei amyihna dang boeih kaw," tinaak khqi hy. 37 Ve ak awikhqi ak kqawn boeih coengawh, Farasi thlang pynoet ing a im awh buh ab pan na Jesu ce khy hy; cedawngawh anih a im na buh ak pan na cet hy. 38 Cehlai Jesu ing kut a silh kaana buh a ai ce Farasi thlang ing a huh awh ang ngaih na kyi hy. 39 Cawh Bawipa ing a venawh, "Nangmih Farasikhqi ing boet awm, beeii awm a leng ben taw sil pai hlai uhyk ti, ak khui benna taw ak pyh ngaihnaak ingkaw thawlhaak ing be uhy. 40 Nangmih thlakqawkhqi! Ak khan ben ak silkung ing ak khui ben awm am sil naws nu? 41 Beei ak khuiawh ak awmkhqi ce hqahqakhqi venawh pe lah uh, cawhtaw nangmih aham ik-oeihkhqi boeih ce caih kaw. 42 Nangmih Farasi tloek, khaw map uhyk ti, nangmih ing sawngsing paiboeng ingkaw tawi a an soepk dyt awh paoha pynoet pe pai hlai uhyk ti, dyngnaak ingkaw Khawsa a lungnaak ce dalqa na uhyk ti. A hu awh kawk khqi ve a hlah phlam kaana lamma awhkaw khqi ce awm nami sai aham awm hy. 43 Nangmih Farasi tloek, khaw map uhyk ti, sinakawh awh ngawihnaak ak leek leek awh na ming ngawih lungna unawh ik-oeih zawihihaak hun awh thlang ing kqjihchahaak anii peekkhqi ce ngaih uhyk ti. 44 Nangmih khaw map uhyk ti, nangmih taw mik hatnaak amak awm phyi, thlang ing a leh mailai ing myih uhyk ti," tinak khqi hy. 45 Anaa awi ak lah ing Jesu ak awi ce hlat pehy, "Cawngpyikung, ve a ik-oeihkhqi ve nak kqawn awh kaimih awm ni zyi khqi pahoei hawh uhyk ti," tina hy. 46 Jesu ing, "Nangmih anaa awi ak sim tloek, khaw map uhyk ti, thlang ing a noeng tloei phyih ce phyih sak uhyk ti, cehlai na mimah ingtaw nami kutply pynoet ca ingawm

bi aham am ngaih uhyk ti. **47** Nangmih khaw map uhyk ti, nami pakhqı ing ami na him tawngkhakhqı ak phyi imkhpqı ce sak pe uhyk ti. **48** Cedawngawh nami pakhqı ing ami na sai ce nangmih ing caksak hawh uhyk ti; nami pakhqı ing tawngkhakhqı ce ana him uhy, nangmih ing tawngkhakhqı ak phyi im ce sak pe uhyk ti. **49** Ve a dawngawh, Khawsa ing a cyihnaak ing, 'Tawngkhakhqı ingkaw ceityihkhqı ce a mingmih a venawh tyih pe kawng nyng saw, thlang vang ce a mingmih ing him kawm uh, thlang vang ce the a kha na kawm uh,' tina hy. **50** Cedawngawh khawmdeak a syn cyk awhkawng tawngkhakhqı boeih a thi ak lawng ce ve a khuk awhkaw thlangkhqı a hut na awm hawh hy. **51** A bel a thi awhkawng bawkthang ingkaw beecknaak a hun anglak law awh ami him Zekariah a thi dyna. Oeih, ka nik kqawn peek khqı, vemyihkhqı boeih ve ve a khuk awhkaw thlangkhqı hut na awm kaw. **52** Anaa avi ak sim nangmih tloek, khaw map uhyk ti, nangmih ing cyihnaak cabi ce ak chang na ta valh uhyk ti. Na mimah awm am kun uhyk ti, kun aham ak ngaih thlangkhqı aham awm kham pe lak law uhyk ti,' tinak khqı hy. **53** Jesu ing ce a hun ce a ceetaak coengawh, Farasikhqı ingkaw anaa awi cawngpyikungkhqı ing anih ak khanawh amik kaw am law hawh awi khawzah doet uhy, **54** awi ak kqawnnaak awh a thawlhaak tu peek aham doen uhy.

12 Thlang kqeng cun unawh, pynoet ingkaw pynoet a ming leh qu nawk nawk awh, Jesu ing a hubatkhpı venawh: "Thailatnaak ing amik awm Farasikhqı awh ce naming ngaih ta lah uh. **2** Amang dangnaak aham ikaw awm thuh am awm kawmsaw, amni sim kawi ang hyp ikawawm am awm kaw. **3** Thannaak awh na mik kqawn ce khawkdai awh thlang ing za kaw, ipkhui awh a khoeih cana thlang ang haa keng awh na mik kqawn ce iptih nakawng khypyi kawm uh. **4** Ka pyikhqı, ka nik kqawn peek khqı, 'pum him thai unawh, cekcoengawh ikawawm amak sai thai que voelkhqı ce koeh kqjh uh. **5** Cehlai na mik kqjh hly kawi ce nim huh khqı vang nyng: A him coengawh hell khuinna thlakaak that ak ta ce kqjh uh. Oeih, ka nik kqawn peek khqı, anih ce kqjh uh. (**Geenna g1067**) **6** Hqit ca pumba ce tangka pia pakkhhı na zawi u hy? Cehlai Khawsa ing cekkhqı khuiawh pynoet ca awm am hilh hy. **7** Na lu awhkaw lusam za noet boeihna ak awm ni. Cedawngawh koeh kqjh uh; nangmih taw hqit anglakawh nami phu awm khqoet hy. **8** Ka nik kqawn peek khqı, thlang a haiawh kai anik dyihpyi taw Khawsa ak khan ceityihkhqı a haiawh Thlanghqing Capa ing anih ce dyihpyi lawt kaw. **9** Cehlai u awm thlang a haiawh kai anik hoet taw Khawsa ak khan ceityihkhqı haiawh anih ce hoet lawt kawng nyng. **10** U awm Thlanghqing Capa ing ak kahn na awi ak kqawn taw queenkhaw ngainaak hu kaw, cehlai u awm Ciim Myihla ak kqawn seet ak thlang taw queenkhaw ngainaak am hu voel kaw. **11** Sinakawk, ukkung khqı ingkaw boeikhqı haiawh a ni khyn khqı awh, cangnaak hulnaak hly kawi ingkaw awi nak kqawnnaak hly kawi awh koeh ngaih sa uh, **12** Cawh nak kqawn hly kawi ce Ciim Myihla ing ni cawngpyi khqı bit kaw," tinak khqı hy. **13** Thlang kqeng ak khui awhkaw thlang pynoet oet ing, "Cawngpyikung, ka naa ing qo aning paa pyi aham kqawn pe leh," tina hy. **14** Jesu ing a venawh, "U ing nangnih anglak law awh awidengkung am awhtaw lai ak kqawnkungna ani taak?" tina hy. **15** Thlangkhqı venawh, "Ngaih ta lah uh! Ak kamvaanaak awh ce naming ngaih ta uh; thlanghqing a hqingnaak ve qo khawzah taaknaak awhkawng sai na am awm hy," tina hy. **16** Cekcoengawh vawhkaw nyhtahnaak awi ve kqawn pehy: "Thlang boei pynoet a lo taw cang daw soeih hy. **17** Cedawngawh vemyihna ak kaw poek hy, 'ikaw ka sai lah voei? Cang ka taaknaak aham khai am khoek voel hy,' tiyh. **18** Cekcoengawh vemyihna tiyh, 'Vemyihna sai vang nyng. Khaikhqı ve hqe nyng saw ak bau khqoet na sa vang nyng, cawh ce cang ingkaw ka themkhqı boeih ta vang nyng.

19 Cekcoengawh kamah ingkaw kamah ce, 'kum khawqyt awh na hawnak aham khawh khawzah ta hawh hyk ti. Ai nawhtaw, aw nawk ngaihding hlah,' ti vang nyng," tiyh. **20** Cehlai Khawsa ing a venawh, 'Nang thlakqw pa, tawh than qoe awh na hqinglu ce ni lawh pe kaw; tuhawhkaw na khawhthemkhqı boeih ve u ing nu a pang kaw?' tina hy. **21** U awm amah ham doeng khawh cun nawh Khawsa benawh ak khawdeng taw, vemyihna awm uhy," tinak khqı hy. **22** Cekoengawh Jesu ing a hubatkhpı venawh: "Cedawngawh ka nik kqawn peek khqı, 'Ikaw ka ai kaw?' 'Ikaw ka bai ka naak kaw?' tinawh nami hqingnaak awh koeh ngaisa uh. **23** Awk ai anglakawh hqingnaak ce awipyi bet hy, suibai anglakawh pum ve awipyi bet hy. **24** Vangaakkhpı ce poek lah uh: quk am saw uhy, cang awm am aat uhy, khai awm am ta unawh tep awm am ta hilai uhy; cehlai Khawsa ing a mingmih ce cah khqı hy. Nangmih taw pha khqing lakawh nami phu tlo khqoet saw kaw! **25** U ing nu a ngaisaknaak ak caming a hqingnaak khawnoek pynoet kangna awm a cawng thai? **26** Vemih ik-oeih ak zawica zani am nami sai thai awh, ikaw ham ak changkhqı awh ce naming ngaisak? **27** Lili khqı ve ikawmyihna a taainaak tice poek lah uh. Bi am bi unawh hla awm am bi uhy. Cehlai ka nik kqawn peek khqı, Solomon ing zani a boeimangnaak boeih ing ang thoei cam qu awh vawhkaw lili khqı pynoet ca kangna awm am pha hy. **28** Khawsa ing lo awhkaw lili khqı, tuhngawi awh awm hlai hy a khawngawi awh mai awh phum a aham ak awm zani cemiyh dyna a thawi a cam awhtaw, Aw cangnaak ak zawikhqı, nangmih ak khqoet taw ikawmyihdyna nu ani thawi ani cam khqı kaw! **29** Awk ai awh namik kawlung koeh ta law uh; ve a dawngawh koeh ngaisa uh. **30** Ikwatih Khawsa amak sim lukikhqı ing ni vemyih ik-oeih amik poek hy, vemyihkhqı ngoe uhyk ti tice nami Pa ing sim hy. **31** A qam ce sui cang uh, vemyihkhqı boeih awm ni sap law sih khqı bit kaw. **32** Tuu a khoehca khqı aw, koeh kqjh uh, kawtih nami Pa ing nangmih a venawh qam peek aham ngaih hy. **33** Nami khawhthemkhqı ce zawi unawh taw hahqakhqı venawh pe lah uh. Quk-ai ama ceh thainaak ingkaw laihqı ing ama hqawg thainaak, amak boeih thai khawh a awmnaak hawkh khan awh, khawh ce nami mah aham cun lah uh. **34** Ikwatih nami khawh a awmnaak awh, namik kawlung awm lawt kaw. **35** A coekpoek na thoeih ang cam qu unawh taw nami mai-imkhqı ce a oepchoe cana dawi uh, **36** zu lawh poei nakawng ak voei law hly Bawipa ce a na qeh unawh chawh ak khoek law awh a mim awng peek aham ami qeh amyihna qeh lah uh. **37** Ami Bawipa a law awh ih kaa na amik qeh tyihzawikhqı ham nep kaw. Awitak ka nik kqawn peek khqı, anih ing thoei ang cam qu kawmsaw, cekkhqı ce caboei awh buh a veel sak khqı coengawh, a mingmih ce qeh kaw. **38** Khawmthan khawnoek pakkhhı awh nu pakthum awh nu, a Bawipa a law awh oepchoe na ak awm tyihzawikhqı aham nep kaw. **39** Cehlai ve si um ih: imkung ing ityk awh nu quk-ai a law kaw, tice a sim mantaw, ityk awh awm quk-ai ce a ipkhui na am luh sak kaw. **40** Cemyih lawtna nangmih awm a ngaihtaak ing awm uh, am namik poeknaak a tym awh thlanghqing Capa ce law kaw," tinak khqı hy. **41** Piter ing, "Bawipa, vawhkaw nyhtahnaak awi ve kaimh aham nu nak kqawn, thlakchang aham nu nak kqawn peek?" tina hy. **42** Bawipa ing, "Khawh ak khoemkung yipawm, ak cyi, a boei ing a tym a khoeih awh buh an ak qekna imkhui awh ukkungna ak tyh hly ce a u nu? **43** A pa ang voei tlaih awh cemiyhna bi ak bi tyihzawikhqı ham nep kaw. **44** Awitak ka nik kqawn peek khqı, cemiyh ak thlang ce a khawhthemkhqı boeih ak khan awh ak khawng kungna ta kaw. **45** Cehlai cawhkaw thlang ing, 'ka Bawipa ve am law tang,' tinawh tyihzawikhqı Pa ingkaw nukhqi ce a vyk ak pai coengawh zuk qui ing awm mai lah seh. **46** Amak poek a khawngi ingkaw ama sim a khawngi awh a Bawipa ce pha law plak kaw. Anih ce ak tlyh poet poet coengawh, amak cangnaak thlangkhqı ang dyih

hun ce anih ing pang lawt kaw. **47** A Bawipa ak Kawngaih ce sim hlai hy a hylthal na amak awm, am awhtaw a Bawipa ing sai sak aham a ngaih ce amak sai tyihzawih cetaw vyk plak cal kaw. **48** Cehlai ama sim dawngawh ik-oeih amak sai ingkaw coet kawi na ik-oeih ak sai cetaw a vyk boe bet kaw. Khawzah a peek thlang a venawh, khawzah noge Kawmsaw khawzah a khoem sak thlang a venawh khawzah thoeh lawt kaw. **49** Khawmdek awh ve mai ni ka haw law hy, tuh awm ui hlai mai thaw voei! **50** Cehlai baptismal ka huh hly kawi ce awm hyn hy, ce a soep hlan dy taw khuikha mah nyng! **51** Khawmdek awh qoeppaak awm sak aham law hy, tinawh namik poek nawh nu? Amni, ka nik kqawn peek khqi, pek ang bonaak ni ka haw law hy. **52** Tuh Kawng kai a dawngawh, ipkuikaw pynoet awh hleng pumha a awm mai mantaw, pek qu kawn usaw pakthum ingkaw pakkhih ce qaal qu kawm uh, pakkhih ingkaw pakthum ce awm qaal qu kawm uh. **53** Pa ingkaw Capa, Capa ingkaw a pa pek qu kawm uh, a nu ingkaw a canu, a canu ingkaw a nu pek qu kawm uh, a cii ingkaw a langa, a langa ingkaw a cii pek qu kawm uh," tinak khqi hy. **54** Cekcoeng thlang kqeng a venawh, "Khaw tlaaknaak benna myi ang zam law awhtaw, 'khaw aa kaw,' ti uhyk ti, khaw awm aa tangak hy. **55** Thlung benna kaw zilh a law awhtaw, 'khaw ling kaw,' ti uhyk ti, khaw ling tangak hy. **56** Thlak thaikhqi! Khaw ingkaw khawmdek taw hat thai zawk hlai uhyuk ti ce. Ikwamyiha tuh awhkaw a tym vetaw am namit hat thai? **57** "Ikwatih ik-oeih ak thym ce am namit hqimhqha thai? **58** Na qaall mi awidengnaak hy na lam awh nani ceh hui awh, qoeppaak ce sai uh, cemyih am awhtaw na qaall ing awidengkung a venna ni sawi kaw, cekcoengawh awidengkung ing boei a venna ni khyn kaw, boei ing nang ce thawngim khui na nik thla kaw. **59** Ka nik kqawn peek khqi, laiba na ki hlan dy taw am loet kawp ti," tina hy.

13 Cawh, ce nyn awh thlang vang law unawh, cekkhqi ing Galili qam thlang, Pilat ing thi, ami Khawsa bawknaak awh khqi himnaak awh a pa sak khqi awithang ce Jesu theen uhy. **2** Jesu ing, "Cawhkaw Kalili thlangkhqi ce ak chang Kalili thlang khqi anglakawh ami thawl bet dawngawh ni cemyihna ami zawk hy, tinawh namik poek nawh nu? **3** Ka nik kqawn peek khqi, cekkhqi ce am thawl bet uhy! Cehlai nangmih awm am naming zut awhtaw, plawci lawt kawm uk ti. **4** Am awhtaw, Siloam ip sang ang tluk awh thlang hlaihket a kyih qen ce, Jerusalem awhkaw thlang khqing lak awh ami thawl bet dawngawh vani hy voei tinawh namik poek nawh nu? **5** Ka nik kqawn peek khqi, cekkhqi ce am thawl bet uhy! Cehlai nangmih awm am naming zut awhtaw plawci lawt kawm uk ti," tinak khqi hy. **6** Cekcoengawh vawhkaw nythahnak awi ve kqawn pehy: "Thlang pynoet ing a misur dum khuiawh thai thing ce ling hy. Hypoet awhtaw thai ak thaib ce bit aham cet moe seinu, ak thaib pynoet ca awm am hu hy. **7** Cedawngawh misur dum ak qehkung a venawh cet nawh, 'kup thum khuiawh thai qah bih aham law hawh hlai nyng ak thaib pynoet awm am hu nyng. Hlu mai hlai! Dek ak kang qung,' tina hy. **8** Misur dum ak qehkung ing, "Bawipa, kum oet taw ta mai sang, a kengsankhqi cawh pe nyng seitaw, dek ak leek ing viyh sang vang nyng. **9** Cawhkawng a kum voel awh a qah awhtaw nep bit kaw! Cehlai ama qah bai vik awhtaw hlu dam bit kawp ti," tina hy, tinak khqi hy. **10** Sabbath nyn hypoet awh Jesu ing sinakaw pynoet ak khuiawh thlang cawngypyi hy, **11** cawh kum hlaihket ak khawn nu pynoet ce cawh awm hy. Am ting khun qapsat nawh am dyng na am dyi thi hy. **12** Jesu ing cawhkaw nu ce a hui awh, hai na khy nawh, "Nang nu, thawlhaak awhkawng loet hawh hyk ti," tina hy. **13** Ak khan awh a kut tloeng pehy, cawh cawhkaw nu ce am dyng na dyi pahoei nawh Khawsa ce kyiicah hy. **14** Sabbath nyn awh Jesu ing thlak tlo a qoei sak dawngawh, sinakawp ukkung ce kawso doena thlang kqeng a venawh, "Bibinaak aham khaw

kuk nyn awm hy. Cawh law unawh taw nami tlawhnaakkhqi ce qoei sak uh, Sabbath nyn awhtaw koeh qoei sak uh," tina hy. **15** Bawipa ing cawhkaw sinakawp ukkung a venawh, "Nangmih thlak thaikhqi! Nangmih ing Sabbath nyn awh nami vaitaw mai aw, am awhtaw meqang mai aw a qui hlam pe unawh tui am nami awk sak nawh nu? **16** Cawhtaw vawhkaw nu, Abraham a canu pynoet na ak awm, qaaing khaw kum hqa hlaihkhqet khuiawh a pin ce Sabbath nyn awh amni hlam pe hly unawh nu? tinak khqi hy. **17** Ve ak awi ak kqawn awh, a qalkhqi boeih taw chak uhy, cehlai anih a ik-oeih sainaak awh ce thlangkhqi taw zeel uhy. **18** Jesu ing vemyihna doet hy, "Khawsa qam ve ikaw ing nu a ning myih hy voei? Ikawng nu ka nythah lah voei? **19** Khawsa qam taw thlang ing antlam cii lo nawh dum khuiawh ak theh ing myih hy. Cawhkaw antlam cii ce cawt nawh a thing na dyi law hy, khan nakaw phakhqi law unawh a pang awh ce ngawi uhy," tinak khqi hy. **20** Cekcoengawh vemyihna doet thlaih bai hy, "Ikawng nu Khawsa qam ve ka nythah lah voei? **21** Khawsa qam taw nu ing vaidam dawn khuiawh thum ak khuiawh hen a zammaak boeih aham a phul ing myih hy," tinak khqi hy. **22** Cekcoengawh Jesu ing Jerusalem na a ceh awh khawk bau ingkaw vangcakhqi awh ce thlang cawngypyi noe noe hy. **23** Thlang pynoet ing "Bawipa, thlang a khoechka doeng ing nu thawngnaak a hui kaw?" tinawh doet hy. **24** Cekkhqi venawh, "Chawmkeng ak ceek khuiawh kun ngah ngah lauh, kawthi thlang khawhing kun aham tha lo hly hlai uhy am kun thai kawm uh. **25** Imkung ing tho nawh chawh ce a khaih coengawh taw, a leng na dyi kawm utik saw chawh ce khoek kawm uk ti, 'Bawipa chawh awng law lah,' tina kawm uk ti. "Cehlai anih ing, 'Amni sim khqi nyng, hana kawng nu nami law hy,' ni tinak khqi kaw. **26** Cawh nangmih ing, "Nang ing buh a an ni aw ni ai haih saw kaw, lam awh awm ni cawngypyi tik saw kaw," tina kawm uk ti. **27** Cehlai anih ing, 'Amni sim khqi nyng, hana kawng nu nami law hy. Nangmih thawlhaak ak saikhqi, ak chang na cet uh!' ni tinak khqi kaw. **28** Abraham, Isaak, Jakob ingkaw tawngkhaki boeih Khawsa qam khuiawh ami awm ce nami huh awh, nangmih taw a leng na kqangnaak ingkaw hatahnaak a hun awh awm kawm uk ti. **29** Khaw law khawtlak, a sip a hawt benna kawng thlangkhqi law kawm usaw, Khawsa qam khuiawh buh veelhaak kung awh ngawi kawm uh. **30** Hu ak khyngkhqi ce ma kawm usaw, ak makhqi ce hu khyng lat kawm uh," tinak khqi hy. **31** Cawh Farasi thlang a vangkhqi ce Jesu a venna law unawh a venawh, "Ve a hun ve cehta nawh ak chang na cet lhah. Herod ing nang him aham ngaih hy," tina uhy. **32** Jesu ing, "Cet unawh taw ak thai ngentang ce kqawn pe uh, "Tuhngawi awm khawngawi awm awm qaakhiq hqek kawng nyng saw thlak tlokhqi qoei sak kawng, am thum nyn awh kang cainaak ce coeng kawg nyng' thi tina uh. **33** Kwmih awm awl, tuhngawi, khawngawi ingkaw tuktuh di ka ceh qoe aham awm hy, tawnggia ikawngim awm Jerusalem khawceng awh am thi thai hy! **34** Aw Jerusalem, Jerusalem, tawngkhaki ak himkung ingkaw na venawh a tyih lawkhqi lung ing ak khawngkung, ai nu ing a cakhqi ang hlak khui awh ang koep sih amyihna, na cakhqi izah nu hqui sawi aham, ka ngaih ce, nang ingtaw am ngaih hyk ti! **35** Toek lah, na im ve a sit qak nani ami cehtaak hyt hawh hy. Ka nik kqawn peek, 'Bawipa ming ing ak law taw a zoseen hy,' tinawh nak kqawn hlan dy taw kai ve amni hu qoe voel kawp ti," tina hy.

14 Sabbath nyn hypoet awh, Jesu taw Farasi a hqamca thlang pynoet a im awh buh ai na cet hy, cawh Jesu ce ngaihaak doena doen uhy. **2** Ce a hun awh a haiawh ak phoen tawng nawh ak hling thlang pynoet ce awm hy. **3** Jesu ing Farasikhqi ingkaw anaaw aui ak sim thlangkhqi ce doet khqi hy, "Sabbath nyn awh thlak tlo qoei sak ve ak ciim nu, amak ciim nu?" tinak khqi hy. **4** Cehlai cekkhqi ing ikaw awm ap kqawn pe uhy. Cedawngawh

Jesu ing cawhkaw tlak tlo ce tu naws a qoei sak coengawh tyi hy. 5 Cekcoengawh cekkhqi venawh, "Nangmih ak khuiawh kaw tlang pynoet oet a ca aw, vaitaw mai aw Sabbath nyn awh lawkkawng khuiua ang tlaak mantaw, am namik dawk hly nawh nu?" tinak khqi hy. 6 Cawh ikaw awm ap kqawn uhy. 7 Buh veelnaak kungawh tlhangkhqi ing ngawihdoelh ak sang sang amik tyk ce a huh awh, vawhkaw nytahnaakawi e kqawn pehy. 8 Thlang ing buh ai na anik khy khqi awh, ngawihdoelh sang ce koeh tyk uh, nangmih anglakawh tlhang qypawm ngai ce buh ai na khy hly mai hy. 9 Cemyihna a awm mai mantaw, imkung na venawh, 'Nang ngawihnaak awh ve ak tlhang ve ngawih sak' ni tina kaw. Cawhtaw chah doena ngawihnaak ak nem awh ngawi zawk ka kawp ti. 10 Cedawngawh tlhang ing buh ai na anik khy awh, ngawihnaak ak nem soeih awh ngawi mai, cawh ni imkung ce a law awh na venawh, "Ka pyi ngawihnaak ak leek awh ngawi," a haiawh kqjihchhahaak ce na huh hly. Cawh buh ai na ak lawkhqi boeih a haiawh kqjihchhahaak ce na huh hly. 11 U awm amah ingkaw amah ak zoeksang qu taw ak kaina nung tla kaw, cehlai ak kaina ak awmkhqi ing zoeksangnaak ce hu kawm uh," tinak khqi hy. 12 Jesu ing imkung a venawh, "Khawnghyp awh aw, am awhtaw khawmy ben awh aw tlhang buh ai na nak khy awhtaw, na pyikhqi, na naakhoi ingkaw na cakaw paqengkhqi koeh khy; nak khy mantaw, cekkhqi ingawm buh ai na nik khy lawt kawm usaw ni thung hlyk tlang uhy. 13 Cedawngawh tlhang buh ai na nak khy awh, hahqahkhqi, khawk khem khqi, khawzui khqi ingkaw mikhypkhqi ce khy kawp ti, 14 cawhtaw zoseennak hu kawm uk ti. A mingmih ing amni thung lawk khqi qoe seiawm, tlakdyingkhqi thawh tlaihnaak khawngghi awh ni thung law tlaih kaw," tina hy. 15 Cawhkaw awi ce amah cawh amah ing anik ngawi hahih tlhang pynoet ing ang zaak awh Jesu a venawh, "Khawsa qam khuiawh poei buh veelnaak kung awh ak pa kawi tlhang taw a zoseen hy," tina hy. 16 Jesu ing, "Thlang pynoet ing poei ak bau soeih sai naws buh ak ai na tlhang khawzawh ce khy hy. 17 buh ainaak tynn a pha awh imkung ing buh ai na ak khy tlhangkhqi venawh a tyihzawih tlhang ce tyl naws khy sak hy, 'law lah uh, ik-oeihkhqi coeng boeih hawh hy,' tinak khqi hy. 18 Cehlai cekkhqi boeih ing ami peelnakaak lam ce sui boeih uhy. Lamma cyk tlhang ing, 'lo tlhai thai nyng saw, toek lah vang nyng. Ni hlah mai cang,' tina hy. 19 Ak chang pynoet bai ing, 'Vaitaw bawh nga tlhai nyng saw, noek a dak lah vang nyng. Ni hlah mai cang,' tina bai hy. 20 Pynoet bai ing, 'kai zu lo thai nyng saw, am law hly thai nyng,' tina hy. 21 A tyihzawih ce law naws a boeipa a venawh ce miikhqi boeih ce kqawn pehy. Cawh imkung ce ak kaw so naws a tyihzawih a venawh 'Khawmdiek khuiua kaw lampi ingkaw lamkel awh ang tawnawh cet nawhtaw khawdeng hahqahkhqi, khawk khemkhqi, mikhyp khqi ingkaw khawzui khqi ce law pyi,' tina hy. 22 A tyihzawih ing, 'Bawipa, awi nani peek amyihnya sai hawh hla nyng, a hun hoeng toeng toeng hyn hy,' tina hy. 23 Cawh Bawipa ing a tyihzawih a venawh, 'lampi ak bau ingkaw lam ak cawng ak kekhqi na ce cet nawhtaw na huh a saqui ce lawpyi kawp ti, cawh ni ka im awh a be hly hy. 24 Ka nik kqawn peek, kak tlhang ceikhqi ak khuiawh kaw tlhang pynoet ca ingawm ka poei buh ve am tan kaw,' tina hy. 25 Thlang khawzawh Jesu a hu awh bat unawh khin na cet hahih uhy, cekkhqi venawh Jesu ing: 26 U awm ka venawh law naws a nu ingkaw a Pa, a zucakhqi, a koeinu koeinaakhqi boeih, amah a hqingnaak ha awm – a mak sawhnaak tlhang taw kai a hubat na am awn thai kaw. 27 U awm amah a thinglam ce kawt naws kai a hu awh amak bat taw kai a hubat na am coeng thai hy. 28 Nangmih ak khuiawh tlhang pynoet ing ip sang sak aham ngaih lah seh. Anih ing ngawi lamma sang naws a saknaak khoek tangka a taak ingkaw ama taak amnym am nai hly ma naws nu? 29 Ak poek ma kaana tung ce ling sawhqtat bai seiawm im ce amak coeng lawk awhtaw, ak

hu saqui ing qaih na kawm uh, 30 'Ve ak tlhang ing im taw sa mylyk lawt naws, ak coeng na awm ap coeng lak law hy,' tina kawm uh. 31 Kqawnnaak mai awh sangpahrang pynoet taw a qaal sangpahrang ing tuk qu aham cai lah seh. Ngawi lamma cang naws, a qaal ben awhkaw tlhang thongkul amah ben awhkaw tlhang thongqua ing a tuk thai hly ingkaw ama tuk thai hly ce poek lamma kaana awm kawm nu? 32 Ama tuk thai hly mantaw, a qalkhqi lam na ami law hui awh, dyihting tyi naws qoepnaak ce sai kaw. 33 Cemyih lawtna, u awm ik-oeih soepkep amak cehtaak thai taw kai a hubat na am kawih hy. 34 Ci taw leek hy, cehlai alnaak ce a paikh mantaw ikawmyihna nu a alnaak thai tlaih kaw? 35 Dek leek na awm am awm naws, vaitaw pana a ek anglakawh za am leek kaw; khawng aham doeng na ni a awm hawh hy. U awm zaaknaak haa ak ta ingtaw za seh," tinak khqi hy.

15 Mangmu ak cawikungkhqi ingkaw tlakthawlhkhqi ing ak awi ak ngaina a venawh law uhy. 2 Cehlai Farasikhqi ingkaw anaa awi cawngpyikungkhqi taw sai bi uhy, Ve ak tlhang ing tlak thawlhkhqi ym naws buh ai pyi khqi hahih hy, ti uhy. 3 Cawh Jesu ing vawhkaw nytahnaakawi ve kqawn pek khqi hy: 4 nangmih ak khuiawh tlhang pynoet ing tuu zakhat a taak ak khuiawh pynoet ce qeng lah seh, sawmkow pakow ce a cehtaak coengawh ak pynoet ce a hul hlan dy taw am sui kawm nu? 5 A hul tlaih awhtaw, ak phleng awh kawt naws, 6 im na ceh pyi hy. A imcengkhqi ingkaw a pyikhqi ce ak khy coengawh, Ni zeel pyi lawt lah uh; tuu ak qeng ce hu tlaih hawh nyng,' tinak khqi hy. 7 Ka nik kqawn peek khqi, cemyih lawtna zut aham amak ngoe tlakdying sawmkow pakow anglakawh tlakthawlh pynoet ang zutnaak awh ce khawk khan awh zeelnaak doem khqoet kaw. 8 Nu pynoet ing tangka phoeksa paqhqa lai hly pynoet ce qeng sak valh hy. Mai vang naws, im ce ak leek na a nawt coengawh a hul hlan dy taw phoeksa ak qeng ce am sui kawm nu? 9 A hul tlaih awhtaw, a pyikhqi ingkaw a imceng locengkhqi ce khy naws, Ni zeel pyi khqi hy. 10 Cemyih lawtna, ka nik kqawn peek khqi, tlakthawlh pynoet ang zutnaak awh Khawsa ak khan ceityikhqi haiawh zeelnaak ce awm kaw," tinak khqi hy. 11 Jesu ing nytahnaakawi kqawn pe tlaih bai hy: Thlang pynoet ing cakpa pakkhih tahi. 12 A capa ang no ing a pa venawh, ka pa ka hul hly kawi qo ce ni pe hlai,' tina hy. Cedawngawh a pa ing qo ce bo pehy. 13 Cekcoengawh taw, a capa ang no ing amah a ik-oeihkhqi boeih ce lo naws khawk hla soeih na cet hy, ce a qam awh a khawhthemkhqi ce plak boeh boeh hy. 14 A khawhthemkhqi ce ak plak boeh coengawh, cawhkaw a awmnaak qam awh ce khawseet khawkhanaak pha law hy, cawh anih ce voet a hlauh law hy. 15 Cedawngawh ce a qam awhkaw tlhang pynoet a bi ce bi pehy, cawhkaw tlhang ing anih ce lo awh vawk ak cah aham na tyl hy. 16 Ak phoen cawi aih naws vawk ing a ai lyian kawikhqi ce ai aham nai hy, cehlai u ingawm ai aham ikaw awm am pehy. 17 Cawh poek qu naws, 'Ka pa ak tlhangvatkhqi ing zani awk lek ai naa na awk ai ta hlai uhy, kai taw vawh lum tawm hawh nyng! 18 Tho naws ka pa venna hlat tlhai mai vang nyng, a venawh: Ka pa, khan ingkaw nang a haiawh tlawlh hawh nyng. 19 Na ca na awm khy aham am kawih voel nyng; nak tlhangvat pynoet na awm ni ta lawt mai, tina vang nyng,' tihy. 20 Cedawngawh tho naws a pa venna cet hy. Ak hla na a law awh, a pa ing hu hqoet naws queen hy, a capa venna dawng naws kawp hqoet naws mawh hy. 21 A capa ing a pa venawh, 'Ka pa, khan ingkaw nang a haiawh tlawlh hawh nyng. Na ca na khy aham am kawih voel nyng,' tina hy. 22 Cehlai a pa ing a tyihzawihkhqi venawh, 'Ang tawnna! Angki ak leek soeih ce haw law unawh taw bai sak uh. A kut awh kutcabyn byn sak unawh, a khaw awh khawmyk myk law sak uh. 23 Vaitaw ak tha soeih ce haw law unawh taw him uh. Awmhly zeelnaak ing buh

veelnaak sai lau sih. 24 Vawhkaw ka capa ve thi hawh hlai hy hqing tlaih hawh hy, qeng hawh hlai hy hu tlaih hawh nyng,' tinak khqi hy. Cedawngawh buh veelnaak ce sai uhy. 25 Cedawngawh a capa a hqam taw lo na awm hy. Im a pha law tawm awh ce, laa sak awi ingkaw lamnaak awi ce zahy. 26 Cedawngawh tyihzawih pynoet ce khy nawh doet hy. 27 Anih ing, 'Na naa ce hlat law tlaih nawh, sadip cana im a pha law tlaih dawngawh, na pa ing vaitaw ak tha soeih ce him pehy,' tina hy. 28 Cedawngawh a hqamca ce ak kaw so nawk ipkhui na a kun ham awm am ngaih voel hy. Cedawngawh a pa ce cet nawh a capa a hqam ce hloep hy. 29 Cehlai anih ing a pa venawh, 'Toek lah! Kum vegt nang a tamnaa na awm nyng saw nak awi awm am eek khawi nyng. Cehlai ka pyikhqi mi zeelnaak aham me ca pynoet kangna awm am ni pe hyk ti. 30 Vawhkaw na capa, a pum ak zawikhqi mi ik-oeih ak poeih ak lak thlang ce a law awh, vaitaw ak tha soeih him pe hyk ti' tina hy. 31 A pa ing a venawh, 'Ka capa, nang taw ka venawh awm poepa hyk ti, kai ing ka taak boeih boeih ve nang a koe nani a awm hy. 32 Buh veelnaak ni sai nawk ni zeel aham awm hy, vawhkaw na naa ve thi hawh hlai hy, hqing law tlaih hawh hy; anih taw qeng hawh hlai hy ni hu tlaih hawh hy,' tina hy," tinak khqi hy.

16 Jesu ing a hubatkhqi venawh: "Thlang boei pynoet awm nawk anih a tangka ak khoemkung ing tangka poeih pe kang hy tinawh amik kqawn ce zahy. 2 Cedawngawh a boei ing khy nawh doet hy, 'Na kawng kang zaak ve ikawmyihna a awmnaak? Tangka na khoem ce ninh huh lah, ka tangka ak koemkung na am awm hly voel hyk ti,' tina hy. 3 Cedawngawh tangka ak khoemkung ing 'ikawmyihna nu ka ti lah kaw? Ka boeipa ing ka bibi awm ni qoek hly sak hawh hy. Dek deng aham awm kak tha am awm koek, thlang a venawh kut dun aham awm chak koek bai nyng. 4 Ka sai hly taw sim hawh nyng, cawh ni bibi anih phawh awhtaw thlangkhqi ing kai ve ami im awh ami ni do hly hy,' tihy. 5 Cedawngawh a boeipa a ik-oeih ak pukhqi ce khy hy. Lamma cyk awhkaw thlang ce khy nawh, 'Ka boeipa a koe ik-oeih izah nu nak pu peek?' tina hy. 6 Anih ing, 'Olive situi boet zaqet,' tina hy. Law lah, ang tawnna ngawi nawhtaw zali na sai mai,' tina hy. 7 Cekcoengawh a pak khihnaak awhkaw thlang ce doet tlaih bai hy, 'Nang law izah nak pu?' tina hy. 'Anih ing, 'Canghum sum thongkhat,' tina hy. Tangka ak pukung ing, 'Nak punaaak cahawn ce lo nawhtaw sum zaqet na sai mai,' tina hy. 8 Amak thym na bi ak bi tangka ak khoemkung ing cyihnaak ing bi a bi dawngawh a boeipa ing kyih am cah hy. Ve khawmdek thlangkhqi ing a mimah a ik-oeih ami sai awhtaw vangnaak khuiawh ak awmkhqi anglakawh awm cyi ngai uhy. (aiōn g165) 9 Nangmih a venawh ka nik kqawn peek khqi, pyi sainaak aham khawmdek boeinaak ce hawna lah uh, cawh ni ce mihkhqi boeih a boeih coengawh, a mingmih ing kumqui awmnaak hun awh nangmih ce anio dlo hly khqi hy. (aiōnios g166) 10 U awm ik-oeih a khoehca awh ypawm na ak awm taw ik-oeih khawzah awh awm ypawm na awm hy, cehlai ik-oeih a khoehca awh ypawm na amak awm taw ik-oeih khawzah awh awm upvoet na awm hy. 11 Khawmdek boeinaak awh zani ama ypawm awhtaw, u ing nu boeimangaak tang tang ce anio khoem sak kaw? 12 Thlang a ik-oeih awh ypoet na na awm coengawh taw, u ing nu nang ce ik-oeih a ni peek kaw? 13 Tyihzoeih thlang pynoet ing boei pakkhii a bi pakkhii am bawk thai hy. Pynoet ce sawh na kawmsaw pynoet ce lungna kaw, am awhtaw pynoet ce ypnaw kawmsaw pynoet taw hep kaw. Khawsa bi ingkaw tangka bi am bawk hly thaai gen hyk ti,' tinak khqi hy. 14 Tangka amik thintlawnaak Farasikhqi ing ce ak awi ce a ming zaak awh Jesu ce qaih na uhy. 15 Jesu ing a mingmih a venawh, "Thlang amik huh awh nangmih ing thlakdyng na sa qu uhyk ti, cehlai Khawsa ing nangmih ak kawlung ce sim hy. Thlang ing a phu ak tlo soeih

na a taak ce Khawsa mik huh awhtaw tyih cu hy. 16 Johan a khuk dy ni anaa awi ingkaw tangkakhqi ca qee ce amik khypyi hy. Cekcoengawh kawng Khawsa ram awithang ce khypyi hawh uhy, thlang boeih ing ce ak khuiawh kun aham tha lo uhy. 17 Anaa awi awhkaw a dek zet ce ang qeng anglakawhtaw khawk khan ingkaw khawmdek ang qeng zoei bet kaw. 18 U ingawm a zu thla nawk nuk chang a lawh awhtaw samphaih hy, thlang a zuk thlik ak zunaak awm samphaih toeng toeng hy. 19 Kuiqiang thlang pynoet awm nawk hik thim ingkaw hi ak leek leek ing myngawi ang thoelhcam qu coengawh awm hly poepa hy. 20 Ak chawmkeng a keng awh Lazaru ak mingnaak kut ak dun thlang pynoet ce awm hy, a pum boeih na phoei ing bawm nawk, 21 kuiqiang a caboei awhkaw ak tla awkdik aidik ce ai aham ngaih hy. Ulkhqi ing ak phoei ce leek pe uhy. 22 Cawhkaw kut ak dun thlang ce thi nawk khan ceityikhqi ing Abraham a venna khyn uhy. Kuiqiang thlang awm thi lawt nawk pup uhy. 23 Hell khuina kuihka a sim cilh cilh awh ak hla nakawng Abraham ingkaw a venawh Lazaru ak awm ce hu hy. (Hadēs g86) 24 Ak khy doe na, 'Ka pa Abraham, qeenaaak ing Lazaru ce tyi nawhtaw tui awh a kutply pui seitaw kam lai ve ci law sak lah seh, vawhkaw mai awh ve kuihka cip cip hawh nyng ve,' tina hy. 25 Cehlai Abraham ing, 'Ka capa, na hqing khui pyt awh ik-oeih ak leek leek hu tiksaw, Lazaru taw ik-oeih che a huh ce poek lah, cehlai tui awhtaw anih ing ngaihdhinggaak hu nawk nang taw kuihka hyk ti. 26 Vekkhqi boeih coengawh, nang ingkaw kaimih anglakawh lawk-kqawng ak dung soeih awm hy, cedawngawh vawhkawng nang a venna u awm am cet thai hy, nang a venna kawng vena u awm am law thai bai hy,' tina hy. 27 Cawh anih ing, 'cawhtaw ka pa Abraham, qeenaaak thoeh law nyng, Lazaru ce Ka pa im na tyi cang lah, 28 Ka naa thlang pumha awm hyn hy. Vawhkaw kuihka simnaak a hun awh a mami lawnaak thai aham anih ing kqawn law pe cang lah seh nyng,' tina hy. 29 Abraham ing, 'Mosi ingkaw tawngkhakhqi ta hawh usaw ti a; cekkhqi akawi ce ngai mai u seh,' tina hy. 30 Anih ing, 'Amni, ka pa Abraham, thlak thi ak khuiawh kawng thlang pynoet oet a mingmih a venna a ceh mantaw thawlh zut kawm uh,' tina hy. 31 Abraham ing a venawh, 'Mosi ingkaw tawngkhakhqi akawi ce a maming ngai awhtaw, thihnaak ak khuiawh kawng thlang thao nawk kqawn pe bai seiawm am ngai hly uhy,' tina hy," tinak khqi hy.

17 Jesu ing a hubatkhqi venawh: "Thlang ak thawlh sak ik-oeih taw awm hly ngai ngai hy, cehlai thawlhnaak aham ce a ik-oeih ak awm sakkungkhqi ce khaw na map uhy. 2 Vawhkaw naasenkhhqi thawlh sak anglakawhtaw cawhkaw thlang ce a hawng awh cang neetaak lung awi sak nawk tulik khuiawh nik khawng man anih aham leek hly bet hy. 3 Cedawngawh ak leek na qalqing uh. Na koeinaa a thawlh awhtaw, anih ce toel lah, ang zut awhtaw, ak khan awh geenkhwang ngai law. 4 Nak khan awh khaw hypoet awh ak khqih dy awh thawlh nawk, ak khqih dy bai lawt na venawh, 'Zut nyng' a ti awhtaw qeenkhaw ngai law pe," tinak khqi hy. 5 Ceityikhqi ing Bawipa venawh, "Kaimih ak cangnaak ve taai law sak lah! tina uhy. 6 A mingmih a venawh, "Antlam ak ui teh mah cangnaak nami taak mantaw, vawhkaw thaithing a venawh, 'Nak kqa mah na phu qu nawhtaw tuicunli na khawng qu lah,' nami tinaak awh ce, nami tinaak amyihna namik awi ce ngai law kaw. 7 Nangmih ak khuiawh kaw thlang pynoet ing, laikawk ak nawk, am awhtaw tui ak khai tyihzawih pynoet ta mai lah seh. Cawhkaw tyihzawih ce laikawk nakaw a pha law kqoeng awh, 8 Buh lo lhah, leng qu nawhtaw buh ka ai boeih hlan dy ni qeh; cekcoengawh aw a ai bit kapw ti,' am namik tinaak hly nu? 9 A sai hly kawi ik-oeih ce a sai dawngawh a tyihzawih ak khan awh zeelnaak awi ak kqawn hly re aw? 10 Cemyih lawtna nangmih awm nami sai hly kawi ik-oeih boeih nami sai coengawh, 'Amak kawikhka tyihzawih

na ni ka mi awm hy; ka sai hly kawi qoe ni ka mi sai hy, 'ti uh," tinak khqi hy. **11** Jerusalem khaw benna, Samari ingkaw Kalili khawqi benna kawng cet hy. **12** Vangca pynoet ak khuiawh, a kun awh, mynqaaí ak neh thlang thlanghqa ing pan law uhy. Ak hla nakawng dyi unawh, **13** khawteh na, Bawipa Jesu, kaimih ve nim queen khqi lah! tinawh qeennaak thoeh uhy. **14** Cekkkqi ce a huh awh, "Cet unawh taw, khawsoeih a venawh nami pum ce huh uh," tinak khqi hy. A ming voei awh ce a mingmih ce qoei boeih uhy. **15** A mingmih ak khuiawh kaw thlang pynoet ing, mynqaaí a qoei ce a huh awh, hlat law tlaih nawh, khawteh na khy nawh Khawsa ce kyihcah hy. **16** Jesu a khawlung awh ce ang tluk doena zeelnaak awi kqawn hy; anih taw Samari thlang na awm hy. **17** Jesu ing, Thlanghqa na qoei boeih uhy tk ti my? Thlang kow tloek tawhana nu ami awm? **18** Vawhkaw khaw lawk thlang ti kaa taw ak chang tloek ak khuiawh Khawsa kyihcah aham ak voei law pynoet ca awm am awm nawh nu? tinawh doet law pynoet ca awm am awm nawh nu? tinawh doet khqi hy. **19** Ce ak thlang a venawh, "Tho nawhtaw cet hlah, nak cangnaak ing ni qoei sak hawh hy," tina hy. **20** Hypoet taw, Khawsa qam a lawnaak hly akawng ce Farasikhqi ing doet uhy. Jesu ing, "Khawsa qam taw nangmih a mikhuu awh am law hy, **21** 'Vawh ni a awm,' am awhtaw, 'Cawh ni a awm,' tinawh u ing awm ap kqawn thai hy. Khawsa ram taw nangmih ak khuiawh ni a awm," tinak khqi hy. **22** Cekcoengawh a hubatkhqi venawh, "Thlanghqing Capa a khawngi hypoet ca awm huh aham nami ngaihnaak a khawngi ce law kaw, cehlai am hu kawm uk ti. **23** thlangkhqi ing, 'cawh ni a awm hy ce!' am awhtaw, 'Vawh ni a awm hy vel' ni tinak khqi kaw. Cekkhqi hu awh koeh cet uh. **24** Thlanghqing Capa a khawngi taw khaw phla balh balh nawh khan ak kqannaak awhkawng a dytnaak dyna ak coei amyihna awm kaw. **25** Cehlai anih ing khuikhanaak ce hu ma kaw, ve a khuk awhkaw thlangkhqi ing hoet kawm uh. **26** Novah khuk awhkaw myihna, Thlanghqing Capa a khawngi ce awm lawt kaw. **27** Novah ing lawng khuina a kun dy, thlangkhqi ing ai uhy, aw uhy, zu lo unawh vaa ta uhy. Cehlai tuliu ce law nawh a mingmih ce liu khqi boeih hy. **28** Lot a khuk awh awm cemiyihna ce awm hy. Cawhkaw thlangkhqi ing ai uhy, aw uhy, ik-oehi zawi uhy, tlhai uhy, ik-oehi leing uhy, imkhqi sa uhy. **29** Cehlai Lot ing Sodom khaw a cehtaakaak a khawngi awhtaw, khan nakawng kat mai tla law nawh a mingmih boeih ce ui hy. **30** Thlanghqing Capa a lawnaak khawngi ce cemiyihna awm lawt kaw. **31** Ce a khawngi a pha awh u awm iptih na ak awm ing, ipkhui nakaw ik-oehi ak lo na koeh nuk kqum voel seh. Lo na ak awm ing ik-oehi ak lo na im na koeh hlat tlaih voel seh. **32** Lot a zu ce poek uh! **33** U awm a hqingnaak thawng aham ak ngaih ing a hqingnaak ce hlawng kawmsaw, u awm a hqingnaak ak hlawng ingtaw hu lat kaw. **34** Ce am than awh, ikhun awh thlang pakkhii ip kaw; pynoet ce lo kawnsaw, pynoet ce cehta kaw. **35** Nu pakkhii ing sum su kaw; pynoet ce lo kawnsaw, pynoet ce cehta kaw," tinak khqi hy. **36** Cekcoengawh, "Lo awh thlang pakkhii awm kaw; pynoet ce lawh na awm kawnsaw pynoet cetaw cehtaak na awm kaw," tinak khqi hy. **37** A mingmih ing, Bawipa, ce han awh a awm kaw? tinawh doet uhy. Anih ing, "Meh qawk a awmnaak awh, langtakhqi awm kawm uh," tinak khqi hy.

18 Kawboet kaana cykcah poepa aham awm hy tice ami simnaak aham Jesu ing a hubatkhqi venawh nyhtahnaak awi pynoet kqawn peek khqi hy. **2** A mingmih a venawh: "Khaw pynoet awh Khawsa awm amak kqih, thlanghqing awm kawna amak ngai awidengkung thlang pynoet ce awm hy. **3** Ce a hawk khuiawh nuhai pynoet awm nawh, cawhkaw awidengkung a venawh, 'Ka qaal ingkaw kai anglakawhkaw awi ve am dyng na kqawn law lah,' tinawh cet poepa nawh qeennaak thoeh hy. **4** Iqyt num taw am ngai am loek na hy. Cehlai a hu na taw poek quhy, 'Khawsa awm

ap kqjih nyng saw thlanghqing awm kawna am ngai pai hlai nyng, 5 vawhkaw nuhai ing ni ngeu ni lawn khing kaw ve, awihdyng kqawn pe hla mai vang nyng, cawh ni am law qoe voel kawmsaw a mani ngeu ama ni lawn hly hy; 'tihy' tinak khqi hy. **6** Cekcoengawh Bawipa ing, "Amak thym awidengkung ak awi ve ngai lah uh. **7** A venawh khawmthan khawdai ko ang kqang doena ak cykcah, amah ing ak tyh thlangkhqi aham Khawsa ing am dyng na awi am deng kawm nu? A mingmih ce awm hly taak dym nawh nu? **8** Ka nik kqawn peek khqi, anih ing awi ang tawnna deng kaw. Cehlai thlanghqing Capa a law awh, khawmdek awh cangnaak ak hu hly hyh ny voei nu? tihy. **9** Amah am dyngnaak ypna nawh thlang ak husitkhqi venawh, vawhkaw nyhtahnaak awi ve kqawn pehy: **10** Thlang pakkhii taw cykcah aham bawkim na cet hy nih. Pynoet taw Farasi thlang na awm nawh pynoet taw mangmu ak cawikung na awm hy. **11** Farasi thlang taw dyi nawh vemyihna cykcah hy: "Khawsa, kai taw quk-aikhqi, thawlhaak ak saikhqi, samphaiikhqi ingkaw vawhkaw mangmu ak cawikung amyihna awm am ka awm a dawngawh, na venawh zeel nyng. **12** Khaw khqi hy nyn khuiawh buh hih voei ka zeih coengawh ka huh boeih ak khuiawh paqha pynoet ak thym cana pe nyng; tihy. **13** Cehlai mangmu ak cawikung taw ak hla na dyi hoer nawh, khan benna awm am mang hqa hy, ak kqang pung nawh, 'Bawipa, kai thlakthawlh ve nim queen lah,' tinawh cykcah hy. **14** Ka nik kqawn peek khqi, cawhkaw thlang ing Khawsa haiawh dyngnaak ce hu nawh im na voei hy. U awm amah ingkaw amah ak zoeksang qaw taw ak kaina nung tla kaw, cehlai ak kaina ak awm ing ce zoeksangnaak hu kaw," tinak khqi hy. **15** Thlangkhqi ing naasenkhqi ce Jesu ing a bi aham a venawh law pyi uhy. A hubatkhqi ing ami huh awh, thlangkhqi ce zyi uhy. **16** Cehlai Jesu ing naasenkhqi ce a venna ak khy coengawh, "Naasenkhqi, ka venna law sak uh, koeh hqek u, kawtih Khawsa qam taw vemyih ak thlangkhqi ham ni. **17** Awitak ka nik kqawn peek khqi, u ingawm Khawsa qam ce naasen amyihna amak do taw ak khuiawh am kun thai kaw," tinak khqi hy. **18** Ulkung thlang pynoet ing, "Cawngpulkung leek, kumqui hqingnaak ka pangnaak thai aham ikaw ka sai hly," tina hy. (*aiōnios g166*) **19** Jesu ing, "Ikwatih leek hy nani tinaak? Khawsa doeng am taw u awm am leek hy. **20** Awipeekkhqi sim tiksaw kaw: 'Koeh samphaih, thlang koeh him, koeh qh, amak thym diyihitung na koeh dyi, na nu ingkaw na pa zoeksang lah,' a tice ti," tina hy. **21** Anih ing, "Vemihkhqi boeih ve ka naasen awhkawng ni ka sai hawh," tina hy. **22** Ce ak awi ce Jesu ing ang zaak awh, a venawh, "Pynoet voet hun hyk ti. Na taakkhqi boeih ce zawi nawhtaw hahqakhqi venawh pe, cawhtaw hawk khan awh them ta kawpti. Cekcoengawh ka hu awh bat law," tina hy. **23** Ce ak awi ce ang zaak awh, anih ce boei thlang na a awm dawng awh, ak kaw a boe na se hy. **24** Jesu ing anih ce toek nawh, "Boei thlangkhqi ing Khawsa qam khuiawh a kunnaak aham ikawmyih aih na a kyinaak ve! **25** Boei thlang ing Khawsa qam khuiawh a kunnaak anglakawhtaw kalauk ing kqym ak khuiawh a kun mantaw zoei bet kaw," tinak khqi hy. **26** Ce ak awi ak zakhqi ing, "U ing nu thawngnaak a huh hly lawk hy voei?" ti uhy. **27** Jesu ing, "Thlanghqing aham amak coeng thai ce Khawsa ham taw coeng thai hy," tinak khqi hy. **28** Piter ing a venawh, "Kaimih ingtaw ik-oehikhqi boeih cehta unyng saw na hu awh bat unyng ve!" tina hy. **29** Jesu ing a mingmih na ce, "Awitaak ka nik kqawn peek khqi, u ingawm Khawsa qam dawngawh a im aw, a zu aw, a koeinaa aw, a cakhqi aw ama cehtaak awhtaw **30** Ve a khuk qoe awh khawzah na a hlawng coengawh, ak law hly kawi a khuk awhkaw kumqui hqingnaak awm hlawng bai kaw," tinak khqi hy. (*aiōnios g165*, *aiōnios g166*) **31** Jesu ing a hubat Thlanghqa lhaihih ce ak chang na cephyi nawh, "Tawngha khqi ing, Thlanghqing Capa akawng ami na qeekhqi boeih ce a soepnaak aham, ningnih ve Jerusalem

na ni cet kawm uh. 32 Anih ce Gentelkhqi kut awh pe kawm uh. Raih na kawm uh, the a kha na kawm uh, sawh a phih kawm uh, vyk kawm usaw him kawm uh. 33 Cehlai am thum nyn awh tho tlaih kaw," tinak khqi hy. 34 Vawkaw awi ak kqawnkhqi ve a hubatkhqi ing pynoet ca awm am zasim uhy. Ak kqawn ngaihnaak ce a thuh hyn dawngawh, ikawk awi aw ak kqawn hy voei, ti awm am sim uhy. 35 Jeriko khaw ce Jesu ing a pha tawm awh, mikhyp thlang pynoet taw lam a keng awh ngawi nawh kut dun hy. 36 Thlangkhqi a ceh tyn awi ce ang zaak awh, thlangkhqi ce doet hy. 37 Thlangkhqi ing, Nazareth khaw awhkaw Jesu law hy, tina hy. 38 Cawh anilh ing, "David Capa, Jesu, kai ve nim qeen lah," tinawh khy hy. 39 Lam ak khul kungkhqi ing awm dym aham kaa na uhy, cehlai, David Capa, kai ve nim qeen lah, tinawh khy khqoet hy. 40 Cawh Jesu ing dyi cat nawh, cawhkaw thlang ce a venna sawi aham kqawn pehy. Jesu a ven a pha awh, 41 "Kaw sai sak aham nu na ni ngaih?" tina hy. Anih ing, "Bawipa, ka mik a dai aham ngaih nyng," tina hy. 42 Jesu ing a venawh, "Na mik dang hlah seh, nak cangnaak ing ni qoei sak hawh hy," tina hy. 43 Cawh a mik ce dai pe pahoei hy, Jesu a hu awh bat nawh Khawsa ce kyihcah hy. Thlangkhqi ing ami huh awh, Khawsa ce kyihcah uhy.

19 Jesu taw Jeriko khaw awh lut nawh cawhkawng cet phaat hy. 2 Ce a khawk khuiawh Zakea ak mingnaak thlang pynoet awm hy; anih taw mangmu ak cawikhqi ak ukkung na awm nawh boei hy. 3 Jesu ve ikawmyih ak thlang hy voei nu tice huh aham ngaih hy; cehlai thlak nem na a awm dawngawh, thlang kqeng anglakawh Jesu ce am hu thai hy. 4 Cedawngawh Jesu a lawnaak kawi lam a hai benna a nang dawng nawh Jesu huh aham thai thing a saw na kaai hy. 5 Jesu ing ce a hun ce a pha awh, hang mang nawh toek hy, "Zakea, nuk kqum law hlah, tuhngawi na im awh pah hly nyng," tina hy. 6 Zakea ing angtawn na nuk kqum nawh zeel doena Jesu ce a im awh pah sak hy. 7 Thlang boeih ing ami huh awh sai bi uhy, Thlakthawlh im awh pah vang a ti, ti uhy. 8 Cehlai Zakea ing dyi nawh Bawipa venawh, "Bawipa, toek lah! Tuh ka khawhthem ik-oehik ak kengveng ce hahqakhqi pe vang nyng, thlang thai na nawh ik-oehik ka lawh peek awhtaw, a pyh pupthli na sah tlaih vang nyng," tina hy. 9 Jesu ing a venawh, "Tuhngawi awh ve a ipkhui awh thaawngnaak pha law hawh hy, ve ak thlang awm Abraham a capa lawt ni. 10 Ak qeengkhqi thaawng aham ni Thlanghqing Capa ve a law," tinak khqi hy. 11 Ve ak awi ve a ming ngai hui awh, Jerusalem khaw ce zoe hawh nawh, thlangkhqi ing Khawsa qam ce dang hly pahoei hawh hy tinawh amik peek dawngawh, cekkhqi venawh nytahnaak awi pynoet kqawn pek khqi hy. 12 A mingmih a venawh, "Boei na ak awm thlang pynoet saw Sangpahrang na awm nawh ak voei law tlaih na khawk hla soeih na ce cet hy. 13 Cedawngawh a tyihzawih thlang paqqa tloek ce khy nawh tangka mina paqqa ce pehy. Ka law tlaih hilan dy vawhkaw tangka ing bi ana bi uh," tinak khqi hy. 14 Cehlai anih amak ngaih thlangkhqi ing anih a huawh thlang tyl unawh, "Ve ak thlang ve kaimih a Sangpahrang na awm aham am ngaih unyng," tinawh awi pat uhy. 15 Cehlai anih ce Sanpahrang na a awm coengawh taw a im na ce voei hy. Cawhkaw tangka ing ikawmyihna a meek ami huh hy voei, tice sim a ngaih dawngawh a tyihzawikhqi ce khy nawh tangka a peek thlangkhqi venna tyl hy. 16 Lamma cyk thlang ce law nawh a venawh, 'Bawipa, nang a tangka mina ce a pyh paqqa na meek hy,' tina hy. 17 Cawh a boei ing, 'Ka tyihzawih thlak leek, lah hyk ti. Ik-oehik ak zawica awm yawpaw na awm hyk ti, khawk bau paqqa ce uk lah,' tina hy. 18 A tyihzawih pakkhihaak thlang ce law bai nawh, 'Bawipa, na tangka mina a pyh pumha na meek hy,' tina bai hy. 19 A boeipa ing, 'Khawk bau pumha ce uk lah,' tina hy. 20 Cekcoengawh tyihzawih thlak chang pynoet bai ce law nawh,

'Bawipa na mina ve; hikche ing cun nawh pup nyng. 21 Nang taw thlak ciit ngat na awm tiksaw, nik kqijh nyng. Amna taaknaak hun awh lo tiksaw, amna sawnaak awh at hyk ti,' tina hy. 22 Cawh a boeipa ing, 'Nang tyihzawih thlakche, namah ak awi kqawn amyihna awi ni deng kawng! Kai ve thlak ciit ngat na awm nyng, am ka taaknaak awh lo nyng saw am ka sawnaak awh ka ah ce sim zawk hyk ti my? 23 Cawh man ni ka tangka ce tangka ak thungkhqi kut awh pe tiksaw, ka law tlaih awh, a ca ing ka huhnaak bawk voei?' tina hy. 24 Cekcoengawh cawhkaw ak dyi thlangkhqi venawh, 'A venawh kaw tangka mina pynoet ce lawh pe unawh taw tangka mina paqqa ak ta venawh pe uh,' tinak khqi hy. 25 Cekkhqi ing, 'Bawipa, tangka mina paqqa ta hawh saw kaw! tina uhy. 26 Cehlai anih ing ak ta ak thlang a venawh sap pek khqoet kawmsaw, amak ta ak thlang ce taw, a taak ang cang awm lawh pe kaw. 27 Cehlai kai a qaalkhqi, a mingmih ak khan awh Sangpahrang na kai ama nik ngaih thlangkhqi ce vawh lawh unawh taw ka haiaawh him lah uh,' tinak khqi hy" tinak khqi hy. 28 Jesu ing ve ak awi ak kqawn coengawh, Jerusalem khaw benna cet oepchoe hy. 29 Bethphage ingkaw Bethani khaw ce pha tawm nawh Olive ami ti Tlang ce a pha awh, a hubat thlang pakkhih ce haina tyl nawh cekqwai a venawh, 30 Nani hai awhkaw khaw na ce cet nih nawhtaw, khawk khuina nani kun awh, u ingawm amang ngawihnaak khawi meqang ca amik pai ce huikawm nik ti. Sut nih nawhtaw vena hawh law nih. 31 U ingawm, ikaw ham nani suh? a ti awhtaw 'Bawipa ing ngoe hy,' ti nanih," tina qawi hy. 32 A tyl qawi ce cet nih nawh anih ing ak kqawn peek amyihna hu hy nih. 33 Mirang ca ce a ni suh li awh, ak takung ing, 'Ikaw ham meqang ca ce nani suh? tina qawi hy. 34 Cekkqawi ing, Bawipa ing ngoe hy, tina hy nih. 35 Jesu a venna ani haw law coengawh, meqang ca ak khan awh hi phaiah pe unawh Jesu ce ngawih sak uhy. 36 Anih a cehnaak lam awh ce thlangkhqi ing hi phaiah pe uhy. 37 Olive Tlang awhkawng lam a nuk kqumnaak hun ce a pha tawm awh, a hu awh ak bat thlang kqeng ing kawpoek kyi ik-oehikhqi ce ami hu awh zeelmang doena khy uhy. 38 Bawipa ming ing ak law taw zoseennaak awm seh!" 'Khawk khan awh quoepnaak awm seitaw sungsang khyt awh boeinang seh!' tinawh Khawsa ce kyihcah uhy. 39 Thlang kqeng anglakawhkw Farasi thlang vang ing Jesu a venawh, "Cawngpyikung, na hubatkhqi ce kaa na lah," tina uhy. 40 Cehlai anih ing, "Ka nik kqawn peek khqi, a mingmih ama mik khy awhtaw, lungkhqi awm khy kaw," tinak khqi hy. 41 Jerusalem pha tawm nawh khawk bau ce a huh awh, kqah hy, 42 "Nang, nang ing tuh tloek awh nang aham ngaihqeptaak ak haw lawkung ve na sim mantaw – cehlai tuh awhtaw namik ni thuh pe hawh hy. 43 Na qaalkhqi ing nik chung khoep kawm usaw hu hai nakawng ani teeknaak khawnghi ce pha law kaw. 44 Na vawng khuiawh namah ingkaw na canaakhqi dek khawng law na kawm uh. Na venawh Khawsa a lawnaak tym ce am na hat dawngawh, vawhkaw lung ak poeng qu pe pynoet ca awm am hang kawm uh," tina hy. 45 Cekcoengawh bawkim vawng khuina ce kun nawh ik-oehik ak zawikhqi ce hqejk hy. 46 A mingmih na ce, "Ka im ve cykcahnaak im na awm kaw," tinawh qee na awm hy; cehlai nangmih ingtaw, quk-aikhqi awmnaak a hun,' na sai uhy ti," tinak khqi hy. 47 Myngawi bawkim awh thlang cawngpyi hy. Cehlai khawsoeih boeikhqi, anaa awi cawngpyi kungkhqi ingkaw thlang kqeng ak sawikungkhqi ingtaw anih ce him aham ngaih uhy. 48 Cehlai ak awi kqawn ce thlang boeih ing a ming ngaih peek dawngawh a tym leek ce am hu thai uhy.

20 Hypoet taw bawkim awh thlang cawngpyi nawh awithang leek ak khypyi li awh, khawsoeih boeikhqi ingkaw anaa awi cawngpyikungkhqi ce a hqamcakhqi mi a venawh law uhy. 2 Hana kaw saithainaak ing nu vawhkaw ik-oehikhqi ve na sai? Anik

pekung u aw? kqawn lah," tina uhy. 3 Anih ing, "Cawhtaw awi pynoet awh ni doet khqi lah vang nyng; kqawn law lah uh, 4 Johan a baptism ve khan ben na kaw nu, am awhtaw thlanghqing beh awhkaw nu?" tinak khqi hy. 5 Cawh a mimah ce doet qu uhy, Khan benna kaw," ni ti man, 'cawhtaw kawtih amna milc cangaak,' tina hlyk khqi vik. 6 Thlanghqing benna kaw ni,' ni tinaak bai mantaw, Johan ve tawngtha ni tinawh thlanghqij ing ami sim hawh dawngawh, lung ing nik khawng khqi kaw,' ti uhy. 7 Cedawngawh a mingmih ing, "Han benna kaw hy voei nu, am sim unyng," tina uhy. 8 Jesu ing, "Cawhtaw hana kaw saithainaak ing vawhkaw ik-oeikhqi ka sai tice ap kqawn hly lawt nyng," tinak khqi hy. 9 Cekcoengawh vawhkaw nythahnaak awi ve thlanghqij venawh kqawn per khqi poehoei hy. "Thlang pynoet ing misur dum tahi, a dum ce bibikung thlanghqij venawh vat nawh amah taw khawk hla na cet val hy. 10 Misur bit tym a pha law awhtaw a tyihzawih thlang pynoet ce misur thaith bit aham dum bibikungkhqi venna tyi hy. Cehlai dum bibikungkhqi ing anih ce vyk unawh kut hqawng na tyi uhy. 11 Cekcoengawh tyihzawih ak chang ce tyi bai hy, anih ce awm vyk bai unawh, chahqai phyihkawt na ami thekhanaak coengawh kut hqawng na tyi bai uhy. 12 A tyizoeih a pakthumnaak ce tyi bai hy, anih ce awm a leem kqoengna khawng bai uhy. 13 Cawh misur dum akt a kung ing, 'Kaw ka sai lah voei? Kalung naak ka capa man ka tyih hawh kaw; anih taw kqihchah na kawm uh,' ti hy. 14 Cehlai dum bibikungkhqi ing ami huw awh, a mimah ingkaw a mimah ce kqawn uhy. 'Anih ve qo ak pang hly kawi ni; him unawh taw a qo ce ningnih aham awm seh nyng,' ti uhy. 15 Cedawngawh anih ce misur dum a ceng na sawi unawh him uhy. Cawhtaw misur dum ak takung ing a mingmih ce ikawmyihna a saikhqi kaw? 16 Dum bibikungkhqi boeih ce a him coengawh misur dum ce thlak chang a kut awh pe kaw," tinak khqi hy. Ve ak awi ve thlanghqij ing a ming zaak awh, "Ve myihna koeh awm seh," ti uhy. 17 Jesu ing a mingmih ce toek khqi nawh, "Cawhtaw vawhkaw kqawn hyt awi: "Ip sakungkhqi ing ami hoet lung ce a kil awh lung ak leek soeih a khoengna awm hy;" a tive kaw ak kqawn ngaihnaak hy voei aw? 18 U awm ce alung awh ak tlu taw kqek kawm saw, a namkhoi khqoet taw a dik a huina coeng kaw," tinak khqi hy. 19 Vawhkaw nythahnaak awi ve a mingmih ni ak kqawn sih hy tice ami sim dawngawh, anaa awi cawngpyikung khqi ingkaw khawsoeih boeikhqi ing anih ce tu paoeih aham a lam ce sui uhy. Cehlai thlang kqeeng ce kqjh uhy. 20 Ak zoei cana qym nawh a thawlhaak tu peek thainaak aham, thlak leek na ak sa qu, qymkungkhqi ce a venawh tyi uhy. Jesu ak awi kqawnnaak awh a thawlhaak tu pe nawh saithainaak ak ta qam ukkung a venawh peek thainaak aham teng uhy. 21 Cedawngawh amah ak qymkungkhqi ing doet uhy: "Cawngpyikung, ak thym kqawn nawh thlang cawngpyi hyk ti, u a hai awm a toek kaana awitak ing Khawsa a lam cawngpyi hyk ti tice sim unyng. 22 Kaisar a venawh mangmu peek ve ak thym nu, amak thym nu?" tina uhy. 23 A mingmih a thainaak ce a sim oel oel a dawngawh, 24 Ami venawh, "Tangka denari ce nim huh lah uh; uang myihlip ingkaw ming nu ak awm?" tinak khqi hy. 25 Cekkhqi ing, Karsar, tina uhy. Cekkhqi venawh, "Cawhtaw Kaisar a koe ce Kaisar a venawh pe unawh taw, Khawsa a koe ce Khawsa venawh pe uh," tinak khqi hy. 26 Thlang kqeng a haiawh awi ak kqawnnaak awh a thawlhaak am tu pe thai uhy. Cekkhqi awi am hlataak awh ce amik kawpoek kyi nawh, awm hqoeng uhy. 27 Thawhthlaihnaak am awm hy amik ti Sadusi thlang vang toek ing Jesu doet aham law uhy. 28 A venawh, "Cawngpyi kung, Mosi ing taw ve myihna ca qee hy, 'thlang ing cataaka kaana a zu ce a thihi taak mai mantaw ana ing anih ce lo kawmsaw ak taa aham ca taak pe kaw,' tihy. 29 Cingnahqui thlang khqih awm uhy. Lamma cyk ing zu lo hlai hy, ca a taak kaana thihi tahi. 30 A pakkhiihnaak ing zuna tlaih

nawh, 31 cekcoengawh a pakthumnaak ing zuna tlaih bai hy; ca pynoet awm a taak kaana ak khqihna ce thi boeih uhy. 32 A hukhit nataw cawhkaw nu awm thi lawt hy. 33 Cawhtaw, thawh tlaihnaak khawngi awh cawhkaw nu ce a u mih a zuna nu a awm kaw, khqih ing zuna boeih u saw?" tina uhy. 34 Jesu ing, "Ve khawmdtek thlangkhqi ing zu lo va ta uh; (aiōn g165) 35 Cehlai ce a hun awh ak awm kawikhqi taw thlak thi thawh tlaihnaak khawngi awh zu loh va taak, chungvaa am awm voel hawh kaw, (aiōn g165) 36 thi awm am thi voel kawm uh; khan ceityihkhqi amyihna awm kawm usaw; ak tho tlaih cakhqi na ami awm hawh dawngawh Khawsa cakhqi na awm hawh kawm uh. 37 Thlak thi thawhthlaihnaa a awmnaak hly Mosi ingawm, thingbup akawng lamawh ce, Bawipa ce, 'Abraham a Khawsa, Isak a Khawsa, Jakob a Khawsa,' a tinaak awh dang sak hy. 38 Anih taw thlak thi Khawsa na am awm nawh, thlak hqingjia Khawsa nani a awm, amah awh thlang boeih ce hqing hy," tinak khqi hy. 39 Anaa awi cawngpyikung thlang vang ing, "Cawngpyikung, nak kqawn ce thym hy," tina uhy. 40 Cekcoengawh kawng taw u ingawm awi am doet voel uhy. 41 Cekcoengawh Jesu ing cekkhqi venawh, "Ikawmyihna a mingmih ing Khrih ve David Capa tinawh amik kqawn hy voei? 42 David amah ingtaw Saam cabu awh: Bawipa ing ka Bawipa a venawh: 43 Na qaalkhqi ce na khawtoeng na ka sai hlan dy taw, kak tang benawh ngawi lah," tinawh kqawn hy. 44 David ing anih ce 'Bawipa,' tinawh khy hy. Cawhtaw ikawmyihna a capa na a awm hly thai?" tinak khqi hy. 45 Thlangkhqi ing ak awih kqawn ce a ming ngai huiauh, Jesu ing a hubatkhqi venawh, 46 Anaa awi cawngpyikungkhqi awh ce ngaihitaak lah uh; A mingmih ingtaw hik dung bai unawh khawlakawh aming van lungna uhy, thlang ing ik-oeih a zawihaak hun awh kqihchahnaak peekkhqi lungna unawh sinakawh awh ngawihnaak ak leek leek ingkaw buh veelnaak kung awh a qyp ak awm ngawihnaakkhqi ce lungna uhy. 47 Hqahqahkhqi im ce hul pe unawh thlang amik huh awh ak dung soeih na cykcah uhy. Vemih ak thlangkhqi ing ve zawk khqoet kqoet kawm uh," tinak khqi hy.

21 A hak toek awh ce, thlang boeikhqi ing bawkim tangka channaak bawm ak khuiawh tangka ak chankhqi ce hu hy. 2 Cawh nuhai khawdeng pynoet ing qawhum tangka pia pakkhih ak chan ce awm hu bai hy. 3 Cekkhqi venawh, "Awitak ak nil kqawn peek khqi, vawhkaw nuhai khawdeng ing thlangkhqi boeih anglakawh khawzah khqoet chan hawh hy. 4 Ak changkhqi boeih ingtaw ami khawhthem khawzah ak khuiawh kawng ni ami peek hy; cehlai anih ingtaw a hahgahnauh ak khuiawh kawng a hqingnaak aham a taak chyn ce pe hloep hawh hy," tinak khqi hy. 5 A hubat ak khui awhkaw thlang vang ing lung ak leek leek ingkaw Khawsa venawh ik-oeih peek ingkaw bawkim thoeihcam na a awmnaak akawng ce kqawn uhy. Cehlai Jesu ing cekkhqi na ce, 6 Vawhkaw nami huhkhqi boeih ve, "Pynoet ca awm am hang kaana, amik khawngnaak boeh boeh a khawngi ce pha law kaw," tinak khqi hy. 7 Cekkhqi ing, Cawngpyikung, cawhkaw ik-oeih ce ityk awh a awm kaw? Ce mihkhqi a awm tawm awh ce i ikawmyihnaakkhqi nu a awm kaw?" tinawh doet uhy. 8 Anih ing, "Thlang ing a mani thainaak khqi aham ngaihita uh. Kai ang ming ing thlang khawzah law kawm usaw, 'Anih ce kai hawh ni, A tym zoe hawh hy,' tinawh khy hly pyi uhy. Cekkhqi hu awh ce koei bat uh. 9 Qaal tuakaak ingkaw qaaltuk awithang na ming zaak awh koeh kqjh uh. Vemiykhqi ve lamma na ak awm hly qoe ni, cehlai a tym a dytnaak nyn taw pha law hlyk tlaih hlan hy," tinak khqi hy. 10 Cekcoengawh a mingmih a venawh: "Nam ingkaw nam tuk qu kawm nih saw, qam ingkaw qam tuk qu kawm uh. 11 Hun boeih awh Lipi khawteh na tlai kaw, khawse khawkha ingkaw tlawhnaakkhqi ce awm kaw, khan sang na kqjh ak awm ik-

oeihkhqi ingkaw kawpoek kyi ik-oeihkhqi ce awm kaw. **12** Cehlai menyihkhqi a awm hlanawh nangmih ve nim tuk khqi kawm usaw ni the ni kha nak khqi kaw. Kai ang ming awh sinakawk ingkaw thawngimkhqi, Sangpahrang ingkaw qam ukkung boeikhqi venna ni khyn khqi kawm uh. **13** Nangmih ing a mingmih a venawh simpyikung na nami awmnaak thai aham ce a ik-oeih ce awm kaw. **14** Cehlai ikawmyihna awi kak kqawnnaak kaw, tice am namik poek oepchoehnaak aham namim thin caksak uh. **15** Nami qaal ikawmyih ingawm nangmih ak awi ce ama oelh thainaak aham ingkaw ama ni kalhnaak thai aham awi ingkaw cyihnaak ce kai ing ni pek khqi bit kawng nyng. **16** Nangmih ce nami nu nami pa, nami koeinaa, nami cakaw paqeng ingkaw nami pyi nawmkhqi ingawm thlang a kut awh ni thak khqi kawm uh, thlang vang ce him kawm uh. **17** Kai a dawngawh thlangkhqi ing nangmih ce ni sawh na kawm uh. **18** Cehlai nami lu awhkaw nami lusum pynoet ca awm am tla kaw. **19** Ak cak na naming dyihnaak a kaming hqjngnaak ce hu kawm uk ti. **20** Qaalkhqi ing Jerusalem ami veel khoep ce nami huh awh, a sitrak na a awmnaak tym ce zoe hawh hy tice sim kawm uk ti. **21** Cawh Judah qam awh ak awmkhqi ing tlang na cen u seh, khawk bau khuiawh ak awmkhqi ing co u seitaw, kqawng na kaw ak awmkhqi ing khawk bau khuiina koeh kun u seh. **22** Ce a khawngi ce qee hyt na ak awmkhqi boeih boeih a soepnaak toelnaak a tym na awm kaw. **23** Ce a khawngi awh ce nu ak phyihskhqi ingkaw naa ak pawmkhqi aham ikawmyih aih na nu a kyinaak hly cel! Cawh kawpoek kyinaak ak bau soeih ce qam awh awm kawmsaw ve ak thlangkhqi khan awh kawsonaak ce pha kaw. **24** Zawzi ing tlyk kawm usaw qam tawm awh tamnaa na khyn na awm kawm uh. Gentelkhqi ing leh kawm uh. **25** Khawmik, pihla ingkaw aihchi awh ce kawpoek kyi mik hatnaakkhqi ce awm kaw. Tuicunli awhkaw tuibak ak awi awh khawmdek awhkaw penglum thlangkhqi kawpoek kyi kawseet ngai hang ing awm kawm uh. **26** Khawmdek awh ak law hly kawi ik-oeih kqih awm ce ami sim awh, amik tha na hoet hoeng kaw, khan khawngi ce tlaik kaw. **27** Cawh Thlanghqing Capa ing boeinang thaawmnaak ak bau soeih ing myi awhkawng a law ce hu kawm uh. **28** Vemih ik-oeihkhqi a awm awh nangmih a thaawmnaak ce a zoe hawh dawngawh, dyi unawh taw toeopoek lah uh," tinak khqi hy. **29** Cekcoengawh vawhkaw nyhtahnaak awi ve kqawn pek khqi hy: "Thai thing ingkaw thing boeih boeih ce toek lah uh. **30** A hah thai ak caww awhtaw, khawhqa tye zoe hawh hy tice sim uh yk ti. **31** Cemyih lawtna, cemyih ik-oeihkhqi a awm ce nami huh awh, Khawsa qam taw zoe hawh hy tice sim uh. **32** Awitak ka nik kqawn peek khqi, ve a ik-oeihkhqi boeih a soep hlan dy taw vawhkaw cadilkhqi ve am khum qoe qoe kawm uh. **33** Khan ingkaw khawmdek taw khum hly hlai hy, kak awi taw am khum qoe qoe kaw. **34** Ak leek na ngaihta uh, cemyih am mantaw awmhlynaak, zuu awknaak ingkaw khawsakaak awh ce nim thin hlyp hlyp a tinaak ing namik kawlung be law sak hau kawmsaw thang awh ak awk amyihna am namik poek a tym awh ce a khawngi ce pha law plak hau kaw. **35** Ce a ik-oeih ce khawmdek khan awh ak awm thlangkhqi boeih ak khan awh pha law kaw. **36** Cedawngawh vawhkaw ak awm hly kawi ik-oeih awhkawng loet kawm u tik saw Thlanghqing Capa haiawh na ming dyihnaak thai aham ngahtaak doena qeh unawh cykcah lah uh," tinak khqi hy. **37** Khawngi hoei awh Jesu ing bawkim awh thlangkhqi ce cawngpyi hy, khawmy ben qoek awh Olive Tlang na than oet pyt awm aham cet hy. **38** Mymcang hqit awh thlangkhqi ce ak awi ak ngai na bawkim na cet uh.

22 Loentaak poei ami ti uh, hen amak boei phaihpi poei taw zoe ca hawh hy, **2** Khawsoih boeikhqi ingkaw anaa awi cawngpyikungkhqi ing thlang kqeng ce amik kqih dawngawh Jesu ce him thainaak aham a lam ce sui uh. **3** Cawh thlanghqa hlaihii

ak khuiawh kaw Iskariot ami ti Judah ak kawk khuiawh Setan ce kun hy. **4** Judah ce khawsoeh boeikhqi ingkaw bawkim ak ukkung boeikhqi venna cet nawh ikawmyihna Jesu ce a mingmih a venawh ka zawihsnaa lah voei, tice doet qu uh. **5** Cekkhqi ce amik kaw zeel nawh tangka peek aham awi ta uh. **6** Cekkhqi venawh awi ce ta nawh thlang kqeng ama awm awh Jesu ce a mingmih a venawh peek thainaak aham a tym leek ce sui hy. **7** Cehtaak poei Tuuca hyih phumnaak hen amak boei phaihpi khawngi ce pha law hy. **8** Jesu ing Piter ingkaw Johan ce tyi nawh, "Cet nih nawhtaw Cehtaak poei buh ainaak aham qoek a bah nih," tina qawi hy. **9** Cekkqawi ing, Han awh nu sai sak aham na ngaih? tina hy nih. **10** Cekkqawi na ce, "Khawl bau khuiina nani lut kqoeng awh, tui pumawh tui ak doeng thlang pynoet ing ning hqum qawi kaw. Anih a cehnaak im na ce cet nih nawh, **11** imkung a venawh, "Cawngpyikung ing: ka hubatkhqi mi cehtaak poei buh ka mi veelaak aham a hun ce han nawh nu a awm?" tihy, tina nih. **12** Cawh anih ing ipkhui ak kau soeih a ciimcaih ce nim huh qawi bit kaw. Amah cawh ce qoek a bah law nih moe," tina qawi hy. **13** Cekkqawi ce cet nih nawh Jesu ing ak kqawn peek qawi myihna hu hy nih. Amah cawh ce cehtaak poei buh ce qoek a bah hy nih. **14** A tym a khoeih awh, Jesu ingkaw a hubatkhqi ce buh ak vel na caboei awh ngawi uh. **15** Cawh a mingmih a venawh, "Khuikhanaak ka huh hlan awh vawhkaw cehtaak poei buh ve nangmih mi vel hiah aham ngaih nyng. **16** Kawtih ka nik kqawn peek khqi, Khawsa ram awh a soepnaak a awm hlan dy awhtaw, ve a buh ve am ai voel kawng nyng," tinak khqi hy. **17** Phaihpi ce lo nawh, zeelawi ak kqawn coengnawh, "Ve ve lo unawh pe qu lah uh. **18** Khawsa ram a pha hlan dy taw misur tui ve am aw voel qoe kawng nyng," tinak khqi hy. **19** Cekcoengawh phaihpi ce lo nawh zeelnaak awi ak kqawn coengnawh thek nawh, a mingmih ce pek khqi hy, "Ve ve ka sa, nangmih aham peekna ak awm hly ce ni; nami ni simnaak poe aham sai law uh," tinak khqi hy. **20** Cemih lawtna boet ce lo nawh zeelnaak awi ak kqawn coengnawh, "Ve ak boet taw nangmih aham ka hawk ka thi awhkaw avikamn thai ni. **21** Cehlai kai anik zawi hlykung a kut taw kai a kut ingqawi ve caboei awh awm hiah hy. **22** Thlanghqing Capa taw awitaik ce amyihna cet kaw, cehlai anih ak zawikung cetaw a haikaw map hy," tinak khqi hy. **23** U ing nu cemih ik-oeih ce a sai kaw, tinawh a mimah ce doet qu uh. **24** A mimah tloek ak khuiawh u nu ak bau soeih tice oelh qu bai uh. **25** Jesu ing, "Gentelkhqi a Sangpahrangkhqi ing ni thlangkhqi ak khan awh uknaak ce ami taak uh; cemyihna thlang ak khan awh uknaak ak takungkhqi ce ik-oeih leek ak sai peekkungkhqi na ngai uh. **26** Cehlai nangmih taw cemyihna am awm kawm uk ti. Nangmih anglakawh ak bau khyt ing ce ak zawi khyt myihna a awm aham awm hy, ukkung ing bibikung myihna a awm ham awm hy. **27** U nu ak bau bet, buh ai aham caboei awh ak ngawi nu, am awhtaw, buh ak lokung nu? Cehlai kai taw nangmih anglakawh bibikung na awm nyng. **28** Nangmih taw sykzoeknaak ka huh awh ka venawh awm poe uh yk ti. **29** Ka pa ing qam ce ka venawh ani peek amyihna, nangmih a venawh ni pek khqi lawt nyng, **30** nangmih ing ka ram awh buh a an aw a ai unawh Israel thlang hlaihii ce awi nami dengaak thai aham ngawihdoelh awh ce ngawi kawm uk ti. **31** Simon, Simon, Setan ing nang ce cang vam amyihna vam aham ni ngaih hy. **32** Cehlai, Simon, nak cangnaak amang tluknaak aham nang aham cykcah hawh nyng. Na hu na nang voei tlaih awh ce na koeinaakhqi tha awm sak lah," tina hy. **33** Cehlai anih ing, "Bawipa, nang ing thawng tlak hiah ham ingkaw thi hiah aham awm oepchoeh na awm nyng," tina hy. **34** Jesu ing, "Piter, ka nik kqawn peek, tuhngawi ai ang khawng hlan awh, thum voei nik khawng kawp ti," tina hy. **35** Cekcoengawh Jesu ing cekkhqi venawh, "Kai ing tangka bawm, sawngsa ingkaw khawmyk kaana

ka ni tyih khqi awh nami voet hlauhnaak ak awm nu? tinak khqi hy. A mingmih ing, "Am awm hy," tina uhy. **36** Cekkhqi na ce, "Cehlai tuh awhtaw tangka bawm nami taak awhtaw khyn uh, sawngsa awm, zawzi am nami taak awhtaw nami angki ce zawi unawh thlai uh. **37** Anih ce thlak thawlkhqi mi noet sih hain uhy, tinawh qee sut ce awm hy: ka nik kqawn peek khqi ve ak awi ve kai awh a soep aham awm hy. Oeih, kai akawng qee ce na ak awm ce soep tawm ca hawh hy," tinak khqi hy. **38** A hubat khqi ing, Toek lah, Bawipa, vawh zawzi pakkhih awm hy ve, tina uhy. Anih ing, "Ce zah mah, khoek hawh hy," tinak khqi hy. **39** A ceh khawi amyihsa Jesu taw Olive tlang na ce cet hy, a hubatkqi ing a hu awh hqut uhy. **40** Ami pha awh, cekkhqi venawh, "Syknaak a khuiawh am naming tluknaak aham cykcah lah uh," tinak khqi hy. **41** Amah taw lung nik khawng choet a hlanaak na cet nawh, khuk sym doena cykcah hy. **42** "Ka pa nak kawngaih awhtaw vawhkaw boet ve khoe law mai lah; cehlai kai ak kawngaih am seitaw, nang ak kawngaihnaak myihna awm hawn seh," tina hy. **43** Cawh khan ceityih ce a venawh dang pe nawh anih ce tha pehy. **44** Kawpoek kyi ingkaw khawsi ak dung soeih ing cykcah hy, am hlan tui ce thi amyihsa dek na dyh cawp cawp hy. **45** A cykcah boet coengawh tho nawh a hubatkqi venna cet hy, cekkhqi taw amik kaw a set aih awh qoei unawh ami ih ce hu hy. **46** "Ikawith nam i hqoeng? Sykzoeknaak khuiawh am naming tluknaak aham cykcah lah uh," tinak khqi hy. **47** Awi ak kqawn hui awh thlang kqeng ce law hy, thlanghqha lhaihik ak khuiawh kaw thlang pynoet, Judah ami ti ing cekkhqi ce lawpyi khqi hy. Jesu ce mawk aham a venna law hy, **48** cehlai Jesu ing, "Judah, nang ing Thlanghqing Capa ve mawknaak ing na zawi nawh nu? tina hy. **49** Cawhkaw ik-oeih ce Jesu a hubatkqi ing ami huh awh, Zawzi ing ka mik boeng hly mai nu? tina uhy. **50** Thlang pynoet ing khawsoeih boei a tyihzawih ce boeng hy, ang haa ce sek pe hlak hy. **51** Jesu ing, "Ce tloek mah," tina hy. Cawhkaw thlang ang haa ce bi pe nawh qoei sak tlaih hy. **52** Cekcoengawh Jesu ing khawsoeih boeikhqi, bawkim ak ukkungkhqi, a hqamcakhqi ingkaw a venawh ak law thlangkhqi boeih a venawh, "Kai ve quk-ai na ka awm awh nu, zawzi ingkaw thingboeng ing nami ni law sih?" **53** Myngawi tempul kawngma awh nangmih ing ni awm hain awh, am nim tu uhyk ti. Cehlai ve ve nangmih a tym ni, thannaak ing a uk hui awh ve," tinak khqi hy. **54** Anih ce tu unawh, khawsoeih boei khyt a im na khyn uhy. Cawh Piter ing ak hla nakawng qym hy. **55** Cehlai im kawngma ang lung awh ce kutoet na ngawi unawh mai ami awm awh, Piter awm cekkhqi anglakawh ce ngawi lawt hy. **56** Maikung awh ang ngawih ce nu tyihzoeih pynoet ing uhy. Toek ceet nawh, Ve ak thlang awm anih ingqawi awm hain lawt hy," tina hy. **57** Cehlai oelh hy Nang nu, anih ce am sim nyng, tina hy. **58** A khoeah a awm coengawh thlak chang pynoet ing hu bai nawh a venawh, Nang awm a mingmih ak khuiawh kaw thlang lawt ni, tina hy. Cawh Piter ing, Kai amni," tina hy. **59** Khawnoek pynoet tluk a dii coengawh thlang pynoet bai ing, Ve ak thlang awm anih ingqawi awm hain meqee hy ni, Kalili thlang na awm awm bai hy, tina hy. **60** Piter ing, Nak kqawn ce a sim na am sim qoe nyng!" tina bai hy. Ce myihna awi ak kqawn coeng kqoeng awh ai khawng poehoi hy. **61** Bawipa ing hawi nawh Piter ce toek hy. Bawipa ing awi ak kqawn peek ce Piter ing: "Tuhngawi awh ai ang khawng hlan awh, thum voei nik khawng kapw ti," a tinaak awi ce poek hqoet hy. **62** Cekcoengawh a leng benna cet nawh khawteh na kqang hy. **63** Jesu ak sawikung qalkapkhqi ing the a kha na unawh vyk uhy. **64** A mik ce zen pe kheop unawh doet uhy, U ing nu a ni vyk ce kqawn lah?" tina uhy. **65** Thekhanaak awi khawzah ing tlai am tlekh uhy. **66** A khawngawi khaw a dai awh ce thlang kqeng a hqamcakhqi, khawsoeih boeikhqi ingkaw anaa awi cawngpyikungkhqi ce kutoet na hu qu uhy, cawh Jesu ce sawi

law pe uhy. **67** Nang ve Khrish aw, kqawn lah? tina uhy. Jesu ing, "Kqawn law bai nyng seiawm, am nik cangna hly uhyk ti, **68** ni doet khqi nyng seiawm am nim hlat kawm uk ti. **69** Cehlai tuh awhkawng, Thlanghqing Capa ing Khawsa thak awm tang benawh ngawi bit kaw," tinak khqi hy. **70** Cawh cekkhqi boeih ing, Cawhtaw nang ve Khawsa capa aw?" tina uhy. Anih ing, "Namik kqawn a myihna kai zawk ni," tinak khqi hy. **71** Cawh cekkhqi ing, Ikaw ham simpyikung ni kyk qee hly bai? Amah am kha awhkawng ak awi ning za qi hawh saw kaw ve," ti uhy.

23 Cekcoengawh cawh ak awm thlang kqeng ce tho unawh Jesu ce Pilat a venna cehpyi uhy. **2** Amah ce thawluk puk uhy. "Ve ak thlang ing pilnam hqeh sak nawh, Kaisar a venawh mangmu ama peek aham kqawn nawh amah ingkaw amah Khrish Sangpahrang tinawh kqawn qu hy," tina uhy. **3** Cedawngawh Pilat ing Jesu ce doet hy, "Nang ve Judakhqi a Sangpahrang aw? tina hy. Jesu ing, "Nak kqawn amyihsa awm nyng," tina hy. **4** Cekcoengawh Pilat ing khawsoeih boeikhqi ingkaw thlang kqeng a venawh, "Ve ak thlang a thawlhnak am hu nyng," tinak khqi hy. **5** Cehlai cekkhqi ing, "Galilee awhkawng kqan nawh, ve hun dy, Judah khaw boeih awh cawngpyinawh thlang kqeng sak boeih hy," tina uhy. **6** Ce ak awi ce ang zaak awh, Pilat ing anih ce Kalil thlang na a awm ama awm doet hy. **7** Jesu ce Herod uknaak khuiawh kaw thlang ni tice a sim awh, anih ce Herod a venna tyi hy, Herod awm Jerusalem khaw awh awm hy. **8** Herod ing Jesu ce a hui awh, zeel soeih hy, anih ce huh aham lamtoen khing hawh hy. Anih akawng ang zaaknaak awh, kawpoek kyi them a sai ce huh aham ngaih hy. **9** Anih ing awi khawzah doet hy, cehlai Jesu ing khangoet awm am hlat hy. **10** Khawsoeih boeikhqi ingkaw anaa awi queekungkhqi cawh dyi unawh, thawluk buh uhy. **11** Cawh Herod ingkaw a qalkapkhqi ing Jesu ce the a kha na unawh qaih am qin na uhy. Hi ak leek soeih soeih bai sak unawh Pilat a venna tyi tlaih uhy. **12** Ce a nyn awhtaw Herod ingkaw Pilat ce quoep hy nih, ce hlan awhtaw cekgawi ce qaal na awm hy nih. **13** Pilat ing khawsoeih boeikhqi, ukkungkhqi ingkaw pilnam boeih ce khy nawh, **14** Ve ak thlang ing 'Pilnam hqeh sak hy,' ti unawh ka venna law pyi uhyk ti. Nami haiawh awi deng hawh hlai nyng. Nangmih ing thawluk namik puk amyihsa kawmyih a thawlhnaka awm am hu nyng; **15** Herod ingkaw a thawlhnaka am hu hy; cedawngawh venna tyi law tlaih hy, nangmih ing nami huh amyihsa, thihnaak dy awh ikawmyih a thawlhnak awm am sai hy. **16** Cedawngawh vyk nyng seitaw hlah mai vang nyng," tinak khqi hy. **17** Poei ak khuiawh cekkhqi aham thlang pynoet oet hlak pek aham awm hy. **18** Cawh, Ve ak thlang ve him! Barabbas ce hlah law! Tinawh khy uhy. **19** (Barabbas taw khawk bau awh qaal na tho nawh thlang a him dawngawh thawngim awh thla uhy.) **20** Pilat ing Jesu ce hlah aham a ngaih awh cekkhqi venna awi kqawn tlaih hy. **21** Cehlai a mingmih ing, "Thinglam awh tai, thinglam awh tai," tinawh khy uhy. **22** Am thumnaak awh a mingmih ce: "Ikawith ikaw thawlhnaka nu ve ak thlang ing a sai? A thih ham kawi ikaw thawlhnaka ak khan awh am hu nyng. Cedawngawh vyk nyng seitaw hlah mai vang nyng," tinak khqi hy. **23** Cehlai anih ce thinglam awh tai aham khawteh khqoet na khy unawh, amik khy awi ing amingmih ce khuk malh hy. **24** Cedawngawh Pilat ing ami thoehnaak ce qawi pekkhqi hy. **25** A mingmih ing hlah aham ami thoeh, qaal na tho nawh thlang a him dawngawh thawngim awh a mik thlak Barabbas ce hlah pek khqi nawh, Jesu cetaw a mimah ak kawngaih na sai aham a mingmih a venawh pekkhqi hy. **26** Anih ce cehpyi uhy, lamlak awh kqawng nakaw ak law Cyqene khaw awhkaw Simon ce tu unawh Jesu a hu awh thinglam tung ce kawh sak uhy. **27** Thlang khawzah ing a hu awh hqut uhy, ak kqung ak kqap nukhqi awm bat lawt uhy. **28** Jesu ing a mingmih a ven benna mang nawh, "Jerusalem canukhqi,

kai aham koeh kqang uh, na mimah ingkaw nami cakhqi ham kqang law uh. **29** Nangmih ing, ‘Nu cak kaa khqi, pumqih amak sim khawikhqi ingkaw a suk naaca amak awk sak khawi nukhqi taw a mi zoseen hy! Nami tinaak a khawngi ce pha law kaw. **30** Cawh, A mingmih ing thlangkhqi venawh, ‘Kaimih ve nik et khqi lah!’ ti kawm usaw, cungkhqi venawh, ‘Kaimih ve ni hlip khqi lah!’ tina kawm uh.’ **31** Thlang ing thinghqing za vemyih na ami sai awhtaw thingkoh ak khqoet taw ikawmyihna nu ami sai kaw?’ tinak khqi hy. **32** Ak chang thlak thawl qawi pakkhih awm thinglam awh tai aham anih ing kutoet na cehpyi uhy. **33** Luquh ami ti hun ce ami pha awh, anih ce thinglam awh tai uhy, thlakthawl qawi awm – pynoet ce tang benawh, pynoet ce cawngben awh tai uhy. **34** Jesu ing, ‘Kapa, a mingmih ak khan awh queenkhwang ngai lah, ikaw kami sai ti am sim unawh ni,’ tina hy. A hi ce taicung zyk unawh tei uhy. **35** Thlangkhqi ing dyi unawh toek uhy, cawh ukkungkhqi ing qaih na uhy. ‘Thlakchang taw a hul bai, Khawsa ak tyh Khrin na a awm awhtaw amah ingkaw amah hul qu lah seh,’ tina uhy. **36** Qalkapkhqi awm law unawh the a kha na uhy. Misu tui ak thui ce pe uhy, **37** ‘Juda Sangpahrang na awm awhtaw namah ingkaw namah hul qu lah thaw voeih ti,’ tina uhy. **38** ‘VETAW JUDA KHRIH SANGPAHRANG NI,’ tinawh a sawawh ca tai pe uhy. **39** Cawhkaw ami tai thlak thawl pynoet ingawm anih ce kaa na hy, ‘Nang ve Khrin am aw? Namah ingkaw namah hul qu nawhtaw kainih awm ni hul qawi lah thoeih ti,’ tina hy. **40** Cehlai thlak thawl pynoet ingtaw anih ce hlat nawh, ‘Khawsa awm am nak kqjih nawh nu? Nang ing anih ingqawi ang amyihna awidengnaak na huh ve? **41** Ningnih taw awideng kawina nik awm qoe ni; ni sai phu ni zawk qoe ni; cehlai ve ak thlang ingtaw ikawmyih a thawlhnak awm am sai hy,’ tina hy. **42** Cekcoengawh anih ing, ‘Jesu, na qam na pha awh kai koeh nim hilh law moe,’ tina hy. **43** Jesu ing avenawh, ‘Awitak ka nik kqawn peek, tuhngawi awh paradise awh kavenawh awm lawt kawp ti,’ tina hy. **44** Khawneok kquk tluk a law awh, khawndeck pum boeih thannaak ing zioing kheop nawh khawneek ko dy khawthan kheop hy. **45** khawkdai qeng nawh; cawh Bakwim awhkaw hizan ce pakkhih na teek hy. **46** Cawh Jesu ing khawteh na, ‘Kapa, na kut awh kang Myihla ni pe nyng,’ tina hy. Ceamyihna ak kqawn coeng kqoeng awh ang hqj zi zip hy. **47** Qalkap zakhat ak ukkung ing cawhkaw a kawnglam ce a huh awh, Khawsa ce kylighan nawh, ‘Ve ak thlang ve thlakdyng pai ni,’ tihy. **48** Cawhkaw ik-oeih ak toekna ak cun law thlangkhqi ing ce a kawnglam ce ami huh awh amik kqang pung unawh voei uhy. **49** Cehlai amah ak simkhqi boeih ingkaw, Kalili awhkawng a hu awh a mik bat law nukhqi ing ak hla na dyi unawh, cawhkaw ce dan uhy. **50** Awi tykkung pynoet, Joseph ak mingnaak thlak leek ingkaw thlak dyng pynoet ce awm hy. **51** A mingmih ak awitlynaak ingkaw them ami sainaak awh anih taw ang haa am tla qoe hy. Judah qam Arimathea khaw awhkawng ak law na awm nawh Khawsa qam ak lamtoenkung na awm hy. **52** Pilat a venna cet nawh, Jesu a qawk ce thoeih hy, **53** Cekcoengawh qawk ce lo nawh, hi ing a zawl coengawh u awm amak pupnaak hlan phyilung ak khuiawh ce soei hy. **54** Ce nyn taw Coekqoek Nyn na awm nawh, Sabbath kqan tawmca hawh uhy. **55** Jesu ing Kalili awhkawng amik law hahih nukhqi ce Joseph a hu awh bat unawh phyi ingkaw qawk ce ikawmyihna ami soei tice hu uhy. **56** Cekcoengawh im na cet unawh bawktui ce qoek a bah uhy. Cehlai anaa awi peek amyihna Sabbath nyn awhtaw dyn uhy.

24 Khaw khqih nyn ak khuiawh kaw khawngi lamma cyk, mymcang hqit awh, nukhqi ing bawktui ce khyn unawh phyi na cet uhy. **2** Phyi awhkaw lung ak chang na ang thoeih qu ce hu uhy, **3** ak khuiina ami lut awh, Bawipa Jesu a qaawk ce am hu uhy. **4** Ngaih kyi doena ami awm awh, a hi khawphlomyihna ak

vang thlang pakkhih ce cekkhqi venawh dyih pehy. **5** Amik kqjih aih awh, nukhqi ce dek awh koep uhy, cehlai cawhkaw thlang qawi ing, ‘Ikaw hamna thlak thi anglakawh ak hqjeng ce nami sui?’ **6** Anih ce vawh am awm voel hy, tho hawh hy! Kalili awh nami awm awh awi ak nik kqawn peek khqi ce poek lah uh: ‘**7** Thlanghqeing Capa taw thlak thawlkhqi kut awh pe kawm usaw, thinglam awh ami tai coengawh, am thum nyn awh tho tlaiah kaw,’ a tice,’ tinak khqi hy. **8** Cawh awi ak kqawn peek khqi ce sim tlaiah uhy. **9** Phyti awhkawng a ming hlat tlaiah awh, cawhkaw a kawnglamkhqi boeih ce thlanghqa hlaioet ingkaw ak changkhqi boeih a venawh kqawn pe uhy. **10** Cawhkaw nukhqi cetaw Meri Magadalene, Joanna, Jakob a nu Meri ingkaw cawhkaw ak awm nukhqi ing ceityihkhqi venawh kqawn pe uhy. **11** Cehlai nukhqi awi ce a hqawng na poek unawh, cekkhqi ing ap cangna uhy. **12** Cehlai Piter taw tho nawh, hlanna dawng hy. Hlan ce kuunawh toek hy, cehlai a zawlhaa hi doeng ce a huh awh kawpoek a kyi doena voei tlaiah hy. **13** Ce nyn awh ce a mingmih awhkaw thlang pakkhih taw Jerusalem awhkawng meng khqih ak hla Emmau ami ti khaw na cet hy nih. **14** Lam awh ani ceh hui awh cawhkaw ik-oeih a kawnglamkhqi ce kqawn hy nih. **15** Ceamyihna cawhkaw a kawnglamkhqi ce anik kqawn hui awh, Jesu amah qoe qoe ce law nawh cekqawi mi cet hahih uhy; **16** cehlai cekqawi ing ama ni hatnaa aham cekqawi a mik ce bym pe qawi hy. **17** Cekqawi a venawh, ‘Ikaw nu ti nani ceh doena na nik kqawn?’ tina qawi hy. Cekkqawi taw ak byi na dyi khak hy nih. **18** Thlang pynoet, Kleopa ak mingnaak ing, ‘Jerusalem na ak cetkhqi ak khuiawh, tuhtloek awhkaw ik-oeih amak sim na nang doeng va ni hy voei?’ tina hy nih. **19** Anih ing, ‘Ikaw nanik kqawn? tina qawi hy. Cekqawi ing, ‘Nazareth Jesu akawng ti. Anih taw tawngtha a haiawh thaawmnaak ing awi kqawn nawh ik-oeih sai hy. **20** Khawsoih boeikhqi ingkaw kaimih anik ukkungkhqi ing anih ce thih sak aham thlang a kut awh pe unawh, thinglam awh tai uhy; **21** cehlai kaimih ingtaw anih ce Israelkhqi ak hulkung aham a nang ngaih-u unyng. Ceamyihna a awmnaak ce, tuhngawi ve am thum nyn hawh ni. **22** Cekcoeng bai awh, kaimih ak khuiawh kaw nu thlang vang tloek ing ka ming ngaih ni kyi sak khqi bai hy. Cik mymcang hqit awh phyi na cet hlaih uhy, **23** a qawk ce am hu voel uhy. Cekkqhi ce kami venna law unawh, anih ce hqjeng tlaiah hawh hy, tinawh ak kqawn peekkung khan ceityihkhqi hu unyng, tinawh kqawn law uhy. **24** Kaming lak awhkaw thlang vang tloek ce phyi na cet bai hlaih uhy, nukhqi ing amik kqawn peek amyihna hu uhy, cehlai amah ce am hu uhy.’ tina hy nih. **25** Cekkqawi a venawh, ‘Ikawmyih aih na nu nami qaw nawh, tawngkhakhiq ing ami nak kqawn hyt ce awm am namik cangnaak hy voei?’ **26** Khrin ing vemyih kyinaakkhqi a huh coengawh a boemangnaak khuiawh am lut hly nawh nu?’ tina hy. **27** Mosi awhkawng kqan nawh tawngkhakhiq boeih ing, cauk ciimkhqi boeih awh amah akawng ak kqawnkhqi ce kqawn caih pe qawi hy. **28** A ni cehnaak hly khaw ce a ni pha tawm awh, Jesu taw loen phat hamna cai hy. **29** Cehlai cekqawi ing, ‘Kani venawh awm mai, khaw awm my hawh nawh khaw tla tawm hawh hy,’ ti nih nawh hlawh hy nih. Cedawngawh cekqawi a venawh awm aham cet hy. **30** Cekqawi ing mybuh ai aham ang ngawih awh, phaihpi ce lo nawh zeel awi ak kqawn coengawh thek nawh pe qawi hy. **31** Cawhkawng ani mik dai nawh anih ce hat hy nih, cehlai qeng pe qawi valh hy. **32** ‘Lam awh ni pau unawh, cauk ciim ak kqawn caih law awh ce nik kawlung mai amyihna kqawng saw kaw my?’ ti hy nih. **33** Tho nih nawh Jerusalem na hlat tlaiah hy nih. Cawh Thlanghqa hlaioet ingkaw ak changkhqi kutoet na aming cun ce hu hy nih. **34** Cekkqhi ing, ‘Bawipa taw tho tang tang hy, Simon a venna awm dang qu hy,’ ti uhy. **35** A ningnih ingawm lam awh ik-oeih ani hukhqi, Jesu ing phaihpi ak eh awh ani hat qunaakkhqi ce kqawn

pek khqi hy nih. **36** Ce akawng ce amik kqawn hui awh, Jesu ing, "Naming khanawh ngaihdinggaak awm seh," tinak khqi hy. **37** Cemoeseinu, a mingmih ing ly unawh kqjh uhy, myihla ak huna ngai qu uhy. **38** Anih ing cekkhqi venawh, "Ikawtih naming ngaih a kyi? Ikawtih namik kawlung awh upvoetnaak nami taak? **39** Ka kut ingkaw ka khaw khqi ve toek lah uh. Kai kamah qoe qoe ni! Ni bi unawh, toek lah uh; myihla ingtaw quh ingkaw sa am tahi, cehlai kai taw ta nyng," tinak khqi hy. **40** Ve ak awi ak kqawn coengawh, a kut ingkaw a khaw ce huh khqi hy. **41** Cekkhqi ing zeelmang ingkaw ngaih kyi doena am cangna bak bak uhy tice a huh awh, cekkhqi venawh, "Ai kawi namik ta aw?" tinak khqi hy. **42** Cekkhqi ing nga a ming sai ce pe uhy. **43** Nga ce lo nawh cekkhqi amik hui awh ai pek khqi hy. **44** A mingmih a venawh, "Ve maw nangmih a venawh ka awm awh kanik kqawn peek khqi hy: Mosi a cawngpyinaak cauk, Tawngtha cauk ingkaw Saam cauk awhkaw kai akawng qee na ak awmkhqi boeih ce a soepnaak aham ni, ka tice," tinak khqi hy. **45** Cekcoengawh cauk awi ce aming zaksimnaak aham cekkhqi ak kawlung ce awng pek khqi hy. **46** A mingmih a venawh, "Vemyihna qee hyt ce awm hy: Khrih ing khuikhanaak zaawk kawmsaw, am thum nyn awh thlakthi anglak awhkawng tho tlaih kaw, **47** Jerusalem awhkawng kqan kawmsaw, penglum boeih venawh ang ming awh zutnaak ingkaw thawlh qeenkhaw ngainaak ce khypyi kawm uh. **48** Ve a kawnglam boeih ak simpyikung na awm uhyk ti. **49** Ka pa ak awikam ce nangmih aham tyi law kawng nyng; cehlai khan benna kawng thaawmnaak ing thoeicam na nami awm hlan dy taw ve khawk bau khuiawh ana awm kawm uk ti," tinak khqi hy. **50** A mingmih ce Bethani khaw benna cehpyi khqi nawh, a kut soeng nawh zosennaak ce pek khqi hy. **51** A mingmih ce zosennaak a peek khqi coengawh khan benna pawm quna ce awm hy. **52** Cawh amah ce bawk unawh zeelmang doena Jerusalem na ce hlaih tlaih uhy. **53** Bawkim awm ce awm poe unawh, Khawsa ce kyihcah uhy.

Johan

1 Ak cykca awh awi ce awm hy, Awi ce Khawsa ing awm haih hy nih, ce awi taw Khawsa ni. **2** Anih ce ak cykca awh Khawsa ing awm haih hy nih. **3** Anih ak caming ik-oeih boeih boeih ve sai na awm nawk; anih kaana taw ik-oeih sai pynoet ca awm am awm hy. **4** Anih ak khuiawh hqingnaak ce awm nawh, cawhkaw hqingnaak cetaw thlanghqing aham vangnaak na awm hy. **5** Cawhkaw vangnaak ce than ak khuiawh vang hy, cehlai thannaak ing anih ce am sim hy. **6** Khawsa venawh kawng a tyih law thlang pynoet ce awm hy; anih taw Johan mingna hy. **7** Anih ak caming thlang boeih ing amik cangnaak tha aham anih taw cawhkaw vangnaak ak sim sakkuung simplynaak na awm hy. **8** Amah taw vangnaak amni; cehlai cawhkaw vangnaak ak dyih pyi simplynaak na awm hy. **9** Thlang boeih ak coekung vangnaak tang tang ce khawmdekk awh law hy. **10** Anih taw khawmdekk awh awm hawh hy; amah ing khawmdekk ve sai hlai hy, khawmdekk ing amah ce am hat hy. **11** Ak thlangkhqi venna law hlai hy, ak thlangkhqi ing anih ce am do uhy. **12** Cehlai amah ce ak dokhqi boeih, ang ming ak cangnaak thlangkhqi boeih a venawh, Khawsa cakhqi na awm thainaak ce pehy. **13** Pumsa ben kaana, 'Khawsa a ngaihnaak amyihna ak thang thlangkhqi na awm uhy. **14** Awi ce pumsa na coeng nawh, ningnih a venawh awm hy. Pynoet ingkaw taak chyn na ak awm a boemangnaak, qeenakaq ingkaw awitak ing ak be, Pa a venna kawng ak law, amah a boemangnaak ce ni hu hawh uhy. **15** Johan ing anih akawng ce thlang a venawh sim sak hy. "Anih akawng maw kak kqawn mah, 'Anih taw kai anglakawh lamma na a awm hawh dawngawh, kai a hu awh ak law cetaw kai anglakawh bau khqoet hy,' ka tice," tihy. **16** Am qeenakaq ak be pyr awhkawng ningnih ing zoseennaak pynoet coeng pynoet ni hu boeih uhy. **17** Mosi a venawh kawng anaa awi ce a na pe nawh, qeenakaq ingkaw awitak taw Jesu Khrish awhkawng law hy. **18** Ingawm Khawsa ce am hu khawi hlai hy, pynoet doek khoeih a taak chyn na ak awm Khawsa, Pa a venawh ak awm ing anih ce dang law sak hawh hy. **19** Jerusalem awhkaw Judakhqi ing anih ce doet aham khawsoiekhqi ingkaw Levikhqi ce a venna a tyih khqi awh Johan ing a simplynaak taw vemyihna awm hy. **20** Anih ce simply kaana am awm hy, "Kai ve Khrish amni," tinawh kqawn hy. **21** Cekkhqi ing, Cawhtaw nang ve a u nu? Nang ve Elijah aw?" tinawh doet uhy. Anih ing, "Amni," tinak khqi hy. "Nang ve Tawngha aw?" tina bai uhy. Anih ing, "Amni, tinak khqi bai hy. **22** A hukhit na taw cekkhqi ing, Nang ve a u nu? Kaimih anik tyikhqi venawh ka mik kqawnnaak aham nang ve a u nu tice kqawn lah. Namah ingkaw namah ce ikawmyihna nak kqawnnaak?" tina uhy. **23** Johan ing tawngha Isaiah akawiing hlat pek khqi hy, Kai taw, 'Bawipa aham lam ce dyng sak lah uhy,' tinawh qamkoh awh ak khypyi ce ni," tinak khqi hy. **24** Cawh ami tyikhqi Farasi thlang vang tloek ing, **25** doet uhy, Khrish na awm am awm hyk ti, Elijah na awm am awm nawh tawngha na awm am awm loei tiksaw, ikaw ham nu baptismi nani peek khqi bai?" tina uhy. **26** Johan ing, "Kai ing tui ing baptisma ni peek khqi nyng, cehlai naming lakawh am nami sim thlang pynoet dyi hy. **27** Anih cetaw kai a hu awhkaw ak law ce ni, anih a khawmyk qui ak suh peek aham awm kai taw am kawih nyng," tinak khqi hy. **28** Vawhkaw ik-oeihkhqi boeih taw Johan ing baptisma a peeknaak Jordan tui caqai Bethani khawh awk awh na awm hy. **29** A khawngawi nyn awh Jesu a venna a law ce Johan ing a hu awh, "Khawmdekk thawlhaak aphylikung, Khawsa a tuuca, toek lah uhy! **30** Anih ni, 'Kai a hu awh ak law taw kai anglakawh bau khqoet hy, kawtih anih taw kai ka awm hlanawh awm hawh hy,' ka ti ce. **31** Kai kamah ingawm anih ce am sim nyng, cehlai kai ing tui ing baptisma ka ni peeknaak khqi vetaw,

anih ce Israel thlangkhqi venawh ang dangnaak aham ni," tihy. **32** Cekcoengawh Johan ing vemyihna sim pyi hy: "Khan nakawh Myihla kqukkqu amyihna kqum law nawh ak khanawh ang cuk ce hu nyng. **33** Ak khanawh Myihla kqum nawh ak cu thlang ing Ciim Myihla ing baptisma ni pe khqi kaw," tinawh tui ing baptisma peck aham anik tyikung ing amak kqawn law man kai ingawm amna sim kawng. **34** Kai ing ka huh hawh dawngawh anih ve Khawsa Capa ni, tice sim pyi nyng," tihy. **35** A khawngawi nyn awh Johan taw a hubat thlang pakkhih ingqawi ce a hun awh awm tlaih bai uhy. **36** Jesu a ceh ce a huh awh, "Khawsa a tuuca ce, toek lah uh," tinak khqi hy. **37** Cawhkaw awi ce a hubat thlang pakkhih ing a ning zaak awh, Jesu a hu awh ce bat hy nih. **38** Cekqawi ing a hu awh ani hqout ce Jesu ing a huh awh, hawi nawh, "Ikaw na ni ngaib? tina qawi hy. Cekqawi ing, "Cawngpyi kung, hanawh na awm?" tina hy nih. **39** Anih ing, "Vena law nih, hu bit kawn nik ti," tina qawi hy. Cedawngawh cekqawi ce cet nih nawh anih a awmnaak ce hu hy nih, ce a nyn awh ce anih a venawh awm pyt hy nih. Ce a tym taw khawnoek paqhqa tluk law hy. **40** Simon Piter a na Andru taw, cekqawi ak khuiawh Johan ak awi za nawh Jesu a hu awh ak bat thlang pynoet na awm hy. **41** Lamma cyk na Andru ing a sai taw ak tai Simon ce sui nawh, Mesiah (Khrish, tinaak) hu hawh nyng, tinawh kqawn peek aham sui hy. **42** Cekcoengawh ak tai ce Jesu a venna law pyi hy. Jesu ing anih ce toek nawh, "Nang taw Johan a capa Simon ni, Cepha (ve ve Piter tinaak ni) ming na hawh kawp ti," tina hy. **43** A khawngawi nyn awh Jesu taw Kalili na ceh aham cai hy. Philip ce hu nawh, "Ka hu awb bat lah," tina hy. **44** Andru ingkaw Piter amyihna Philip awm Bethsaida khaw awhkaw thlang na awm hy. **45** Philip ing Nathanel ce hu nawh kqawn pehy, "Mosi a anaa awi awh qee nawh tawngkhqi ingawm ami na qee – Nazareth Jesu, Joseph a capa ce, hu hawh nyng," tina hy. **46** Nathanel ing, Nazareth e! Cawhkawng ik-oeih leek law hly thai nawh nu ti?" tinawh doet hy. Philip ing, "Law nawh taw toek mah toek sang lah," tina hy. **47** Nathanel a law ce Jesu ing a hu awh, "Coet amak kap, Israel thlang tang tang vawh awm hy ve," tina hy. **48** Nathanel ing, "Ikawmyihna nani simnaak?" tina hy. Jeush ing, "Philip ing anik khy hlanawh thaikung awh nang ngawh awh ni hu hawh nyng," tina hy. **49** Cawh Nathanel ing, "Cawngpyikung, nang ve Khawsa Capa; Israel Sangphrang na awm hyk ti," tina hy. **50** Jesu ing, "Thaikung awh na awm awh ni hu nyng, ka ni tinaak dawngawh nik cangna hyk ti. Ce anglakawh ik-oeih ak bau khqoet hu hyn kawp ti," tina hy. **51** Cekcoengawh, "Awitak ka nik kqawn peek khawk khan ak awng qu ce hu kawm tiksaw, Thlang Capa ak camawh, Khawsa ak khan ceityikhqi a hak kai ingkaw a nuk kqum ce hu kawp ti," tina hy.

2 Am thum nyn awh Kalili qam Kana khaw awh zulawh poei ce awm hy. Jesu a nu awm cawh ce awm lawt hy. **2** Jesu ingkaw a hubatkhqi ce zulawh poei pan aham khy lawt uhy. **3** Misur tui a boehi dawngawh, Jesu a nu ing a venawh, "Misur tui am ta voel uhy," tina hy. **4** Jesu ing, "Aw nang nu, ikaw ham nu kai awh ce na nang qawhl qee? Ka tym pha hlan hy," tina hy. **5** A nu ing tyihzawikhqi venawh, "Ak kqawn amyihna sai pe uh," tinak khqi hy. **6** Judakhqi phung silhiciimnaak awhkaw ham, tui kalan a thong awhkawng thumkip ak lut qip, lung cikthlyng kquk ce hawih uhy. **7** Jesu ing tyihzawikhqi venawh, "Cikthlyng khuiawh tui hloen lah uhy," tinak khqi hy; a mingmih ing tui ce hloen uhy. **8** Cekcoengawh a mingmih ing venawh, "Tui ce dyk unawh taw poei a hqamcakhqj venawh khyn pe uh" tinak khqi hy. A ti amyihna ce sai pe uhy. **9** Poei awhkaw a hqamca ing misur tui na ak coeng tui ce am tan awh hana kaw hy voei nu tice am sim hlai hy, tui amik than tyihzawikhqi ingtaw sim uhy. Cekcoengawhawh zuk lokung ce a venna khy nawh **10** a venawh, Thlang ing misur tui ak kqym ce

lamma na toen nawh thlang ing a awk khyk coengawh ni misur tui ak du ce ami toen hlai; nang ingtaw ak kqym ta bak bak hyn hyk ti ve," tina hy. 11 Ve kawpoek kyi ik-oehi ve, Kalili qam Kanan khaw awh Jesu ing a sainaak cyk na awm hy. Vemyihna amah a boeimangnaak ce dang sak nawh, a hubatkhqi ing amah awh ce cangnaak ta uhy. 12 Cekcoengawh a nu, a koeinaakhqi, a hubatkhqi mi Kapernaum khaw na nu cet uhy, cawh ce khawngħi a khoehca awm uhy. 13 Judakhqi a ceħħaq poei a pha tawmcia awħ, Jesu taw Jerusaleм na cet hy. 14 Bawkim kawt awħ ce vaitaw, tuu ingkaw kqikklu ami zawih khqi, thlang vang ing caboei awħ tangka ak thung qukħqi ce hu hy. 15 Cedawngawh quiboeng pawm nawħ, cawhkaw ak awm thlangħkqi ce bawkim awħkawng hqek khqi hy, vaitawkhqi ingkaw tħu khqi awm hqut pek khqi hy, tangka ak thung qukħqi a tangakħqi awm hawk pek khqi nawħ caboeikhqi ce khup plhet pehy. 16 Kqikklu ak zawikhqi venawħ, "Vemyihħkji ve ak chang na kħyn uħ! Ikaw hamma ka Pa im ve nangmih ing ik-oēħi zawihhaak im na naming coeng sak!" tina khqi hy. 17 Na im aham kak thahlynak ing ni ai hawħ kaw ve, tinawħ ca qee ak awm ce a hubatkhqi ing sim hqoet uhy. 18 Cawħ Judakhqi ing a venawħ, "Vemyihna ik-oēħħkħqi na sai ve hana kaw saithainaak ing nu na sai tice simmaak aham i ikawmyih kawpoek kyi ik-oēħi nu nang dang sak thai?" tina uhy. 19 Jesu ing, "Vawħħaw bawkim ve hqe laħ uh, khaw thumvoei khuiawħ kai ing thawħ tlaħiħ kawng nyng," tina khqi hy. 20 Judakhqi ing vawħkaw bawkim ve kum philip koeng kum kqgħi khuiawħ sa uhy, nang ing khaw thumvoei khuiawħ nam thawħ hly tang nawħ nu? tina uhy. 21 Cehlai anih ingtaw amah a pum bawkim ce ni ak kqawn ngaiħħaak hy. 22 Thihnaak khuiawħ kawng a thawħ coengawh a hubatkhqi ing anih ak awi kqawn ce sim tlaħiħ uhy. Cedawngawh Cakciim awi ingkaw Jesu ing ak kqawn awi ce cangna uhy. 23 Jerusalem khaw awh Ceħħaq poei nyn awħ a awm awħ, thlang khawzah ing kawpoek kyi ik-oēħi a saikhqi ce hu unawħ ang ming ce cang na uhy. 24 Cehlai thlang boeih ce Jesu ing a sim dawngawh, Jesu ing cekkhqi ce ap cang na hy. 25 Thlangħqinqi ak kawħ khuiawħ ikaw a awm tice amah ing a sim dawngawh, thlangħqinqi akawng ce sim pyi aham thlangħqinqi ce anih ing am ngoe qee hy.

3 Juda ukkunkħqi ak khuiawħ kaw Nikodemu ak mingnaak Farasi thlang pynoet awm hy. 2 Anih ce khawmthan awħ Jesu a venna law nawħ, "Cawngpyikung, nang ve Khawsa venna kawng ak law cawngpyikung ni tice ni sim nyng. Nang ing na sai kawpoek kyi ik-oēħħkħqi ve Khawsa ing ama awm pyi mantaw u ingawm sam ai tai ti kaw," tina hy. 3 Jesu ing anih ak awi ce hlat pe nawħ, "Awitak ka nik kqawn peek, u awm ama thang tlaħiħ awħtaw Khawsa ram ce am hu thai tikaw," tina hy. 4 Nikodemu ing, "Ikawmyihna thlang ing a pacawng a hu na a thang tħalihaak thai kaw? A nu pukkhi na a hih voeinak na am lut hly thai saw!" tina hy. 5 Jesu ing, "Awitak ka nik kqawn peek, u awm tui ingkaw Myiħla ing ama thang tlaħiħ awħtaw Khawsa qam khuiawħ am lut thai kaw. 6 Pumsa awħ ak thang taw pumsa na awm hy, cehlai Myiħla awħ ak thang taw Myiħla na awm hy. 7 Na thang tħaliħ aham awm hy; ka ti dawngawħ nang ngaiħ a kyi aham am awm hy. 8 Khaw ing a ngaiħħaak naħi hy. Khaw hli awi taw za uhyk ti, 'hana kaww law nawħ hana a ceh, tice am sim uhyk ti. Cemiyihna ni Myiħla awħ ak thangħkqi ce a awm hy," tina hy. 9 Nikodemu ing, "Ve ve ikawmyihna nu ang coengnaak hly thai?" tina hy. 10 Jesu ing, "Nang ve Israelkhqi cawngpyi kung pynoet na awm hlai hyk ti, vemyihħkqi ve am nang zasim nawħ nu? 11 Awitak ka nik kqawn peek, ni sim ve ni nik kqawn nawħ, ni huh ceni ni sim pyi, cehlai nangmih ingtaw kaimih a simpyinaak ve am do uhyk ti. 12 Khawmdek them akawng kak kqawn zani am zasim thai utik saw; ikawmyihna khan benna kaw themkhqi ce naming zaksim naak pai kaw? 13 Khan benna kawng ak law Thlangħqinqi

Capa ti kaana taw, u awm khawk khan na am kai hy. 14 Mosi ing kqawng na khqui a tai myihna, Thlangħqinqi Capa awm tai na awm lawt kaw, 15 amah ce ak cangnaak thlang boeih ing kumqu hqingnaak ce ami taaknaak thai aham. (aiōnios g166) 16 U awm amah ak cangnaak boeih am qeeng kawmsaw kumqu hqingnaak a taaknaak thai aham, Khawsa ing khawmdek a lungnaak awħ a Capa a taak dyn ce pehy. (aiōnios g166) 17 Khawmdek thawl sak aham Khawsa ing a Capa ce am tyi law nawħ, anih ak caming khawmdek thaawngħna a awmnaak aham ni a tyiħi law hy. 18 U awm anih ce ak cangnaak thlang boeih taw thawlħ awideng na am awm kaw, cehlai amak cangnaak thlang boeih taw Khawsa Capa a taak dyn ang ming ce ama mik cangnaak dawngawh thawlħ awideng na awm kaw. 19 Ve ve thawlħ awidengnaak na awm hy: Vangnaak ce khawmdek awħ law hawħ hy, cehlai thlang ing a ik-oēħi saikhqi a set dawngawh, vangnaak anglakawħ thannaak ce lungna uhy. 20 U awm them che ak sai boeih ingtaw vangnaak ce sawħ na uhy, ami them saikhqi ce dang hau kaw ti unawħ vangnaak ak khuiawħ lut aham am ngaiħ uhy. 21 Cehlai awitak ing ak hqingħkqi boeih taw vangnaak ak khuiawħ ce law uhy, ami them saikhqi ce Khawsa ak caming ni a sai tice ang dangnaak thai aham," tina hy. 22 Cekcoengawh Jesu ingkaw a hubatkhqi ce Judah qam na cet uhy, ce a hun awħ cekkhqi ce awm pyi nawħ, baptisma ce pehy. 23 Cawħ Johān ingawm Salim a venawħ kaw Aenon awħ baptisma pe lawt hy, cawħ tui khawzah a awm dawngħaw, thlangħkqi ce baptisma huh aham a venawħ law uhy. 24 Ve ve Johān thawngim na ang tħlaħ hlan awħkaw hawħ ni. 25 Cawħ tui ing silħnaak awħ Johān a hubatkhqi ingkaw Juda thlang pynoet mi oelħi qu uhy. 26 Cawħ Johān a venna law unawħ, "Cawngpyikung, Jordan tui caqaj aħw nang ing nanik awm hajh thlang nang diyh pyi ce, anih ing baptisma pek khqi nawħ thlangħkqi a venna cet uhy," tina uhy. 27 Joħan ing cekkhqi venawħ, "Khawk khan nakawng a peek doeng ce ni thlang ing a hu hly hy; ka tice nangmih ingawm ni sim pyi thai uhyk ti. 28 Kai ve Kħrihi amni, anih a hajaw a tyiħi thlang na ni ka awm hy; ka tice nangmih ingawm ni sim pyi thai uhyk ti. 29 Nula be cee na ak awm taw anih ak bekung cadawng a koe hawħ ni. Zuk lokung cadawng a pyi ing anih ce qeq nawħ akawi ce ngaiħ pehy, Zuk lokung akawi ce ang zaak awħ zeel soeħi hy. Cawkaw zeelnaak ce kai a zeelnaak ni, tuh awħtaw ce ce soep hawħ hy. 30 Anih cetaw hang bau hlyk khqoet khqoet hy, cehlai kai taw zawi hly hqiqi khqoet khqoet nyng. 31 U awm khan benna kawng ak law taw khan ben thlang na awm nawħ; khawmdek benna kawng ak law cetaw khawmdek a koe na awm hy. Khawmdek awħkawng ak law cetaw ik-oēħi boeih ak khanawħ awm hy. 32 Anih ing a huu ingkaw ang zaak ce dyihpi hy, cehlai u ingawm ak awiħ kqawn ce am do pehy. 33 Ak do ingtaw, "Khawsa taw ak thymni," tice dyihpi hy. 34 Khawsa ing awi ce kqawn hy, kawtih Khawsa ing a qjì a mawng a awm kaana Myiħla ce pehy. 35 Pa ing Capa ce lungna nawħ a kut awħ ik-oēħi soepkep ce pehy. 36 U awm Capa ak cangnaak thlang ingtaw kumqu hqingnaak ce ta hy, cehlai u awm Capa ak oelħi ingtaw hqingnaak ce am hu nawħ, Khawsa ak kawsonaak ce ak khanawħ awm loet hy," tina khqi hy. (aiōnios g166)

4 Jesu ing Johan anglakawħ hubat khawzah khqoet hu nawħ baptisma awm khawzah pehy tice Farasikhqi ing za uhy, 2 Jesu amah ingtaw baptisma ce am pehy, a hubatkhqi ing ni ami peek hy. 3 Bawipa ing ce ce a sim awħ, Judah ce ħeħta nawħ Kalili na cet tħaliħ hy. 4 Cawħ Samari qam awħkawng ceh aham ce awm hy. 5 Cedawngawh Jakob ing a capa Joseph a venawħ a peek lo a venawħ ak awm, Sikar ak mingnaak Samari khaw ce pha hy. 6 Cawħ Jakob ing tui ak cawħ tuikuk awm hy, lam a cehnaak awħ ce hoet nawħ, Jesu taw cawħkaw tuikuk a venawħ ce ngawi hy.

Khawnoek kquk tluk law hawh hy. 7 Cawh Samari nu pynoet ce tui ak than na law hy, Jesu ing a venawh, "Tui awk ahamni pe lah," tina hy. 8 A hubatkhqi taw buh ak thlai aham khawk khuina cet hawh uhy. 9 Samari nu ing a venawh, "Nang taw Juda thlang, kai ve Samari nu ni. Ikwawmyihna tui awk aham kai a venna na thoeh law?" tina hy. (Judakhqi ing Samarkhqi ve am pawlheng qu khawi uhy.) 10 Jesu ing a venawh, "Khawsa a kutdo ce sim nawh na venawh tui ak thoeh lawkung ve na sim mantaw, nang ing thoeh kawm tiksaw anih ing hqingnaak tui ce ni pe hlai voei," tina hy. 11 Cawh cawkaw nu ing, "Bawipa, cawftaw tui awm na than aham am ngeoe voel hy, tuikuk awm dung soeih hy. Cawkaw hqingnaak tui ce hana kaw nu na huh thai kaw? 12 Nang ve kaimih a pa Jocob anglakawh na bau khqoet nawh nu? Anih ing vawhkaw tuikuk ve kaimih a venawh ni ceh pe taak khqj hy, amah ingawm ve a tui ve a na aw hy, a canaakhqi ingkaw ak khqj a taakkhqi ingawm a na aw uhy," tina hy. 13 Jesu ing a venawh, "U awm vawhkaw tui ak awkhqi boeih taw tui ngaih tlhai kaw, 14 cehlai u awm kai ing ka peek tui ak aw taw tui am ngaih voel kaw. Kai ing ka peek tui ce ak kawk khuiawh tuibym a myihna kumqui hqingnaak dyna lawng poepa hy," tina hy. (aiōnios g165, aiōnios g166)

15 Nu ing a venawh, "Bawipa, tui am ka ngaihnaak voel aham cawkawh tui ce ni pe lah, vawhkaw tui awm am ka thannaak voel aham," tina hy. 16 Jesu ing, "Cet nawh na vaa ce vak khy nawhtaw voei law tlaih," tina hy. 17 Anih ing, "Vaa am ta nyng," tina hy. Jesu ing a venawh, "Vaa am ta nyng, na ti ce thym hy. 18 Cehlai vaa pumha ta hawh hyk ti, tuhkaw pa na taak ce awm na vaa amni. Tuhkaw nak kqawn ce thym hy," tina hy. 19 Nu ing, "Bawipa, nang ve tawngtha ni tice ni sim nyng. 20 Ka pakhqi ing ve a tlang awh Khawsa ana beek uhy, cehlai nangmih Judakhqi ingtaw Jerusalem awh ni Khawsa beek aham a awm hy, ti uhyk ti," tina hy. 21 Jesu ing, "Nang nu, nik cangna lah, ve tleng ingkaw Jerusalem kqawn kaana. Pa bawknaak a tym ce law hawh kaw. 22 Nangmih Samari thlangkhqi ing am nami sim ce bawk uhyk ti; cehlai thaawngnaak ce Judakhqi venawh kawng a law dawngawh, kaimih ingtaw ka mi sim ce bawk unyng. 23 Cehlai Khawsa ak bawkkhqi ing Pa ce Myihla ingkaw awitak ing bawknaak a tym ce law kaw, tuh awm law hawh hy, cemyihna Khawsa ak bawk thlangkhqi ce Pa ing sui hy. 24 Khawsa tavi Myihla na a awm dawngawh amah ak beek thlangkhqi ing Myihla ingkaw awitak ing a beek aham awm hy," tina hy. 25 Nu ing, "Messiah law kaw tice sim nyng. Anih a law aw, ik-oeih boeih boeih ce kqawn caih law kaw," tina hy. 26 Cawh Jesu ing, "Nang a venawh awi ak kqawn kai ve anih hawh ni," tina hy. 27 Cekcoengawh a hubatkhqi ce voei law tlaih uhy, nu ing awi anik kqawn ce ami huh awh amik kawpoek kyi hy. Cehlai u ingawm "Kaw na ngaih? Ikawthi aw nu inggawi awi na nik kqawn?" tinawh am doet uhy. 28 Cawkaw nu ing a tuium ce cehta nawh khawk khuina ang dawng coengawh thlangkhqi venawh, 29 "Law unawh taw, ka them sai boeih boeih ak kqawn lawkung thlang ce toek law lah uh. Khrif hy leek nu?" tinak khqj hy. 30 Thlangkhqi ce khawk khui awhkawng law unawh anih ce ak toek na cet uhy. 31 Cawh a hubatkhqi ing, "Cawngpyikung, buh ai cang thoieh ti," tina uhy. 32 Cehlai a mingmih a venawh, "Nangmih ing am nami sim ai kawi buh ta nyng," tinak khqj hy. 33 A hubatkhqi ing, "Thlang pynoet oet ing ai kawi haw law pe nawh hy voei nu?" ti uhy. 34 Jesu ing, "Anik tyikung ak kawngaih sai aham ingkaw a bibi coeng peek aham ve ka buh ni. 35 Hlak phli coeng awhtaw caang ah khoek hawh kaw, ti uhyk ti ki ta my? Ka nik kqawn peek khqj, nami mik dai unawh lokhqi ce toek lah uh! Caang hin nawh aham khoek hawh hy. 36 Tuh za caang ak aatkung ing thaphu hu hawh hy, caang ak sawkung ingkaw caang ak aatkung ce anii zeelnaak thai aham, kumqui hqingnaak aham caang ce tuh aat hawh hy. (aiōnios g166) 37 Thlang pynoet ing saw nawh, pynoet

ing aat hy,' tinaak awi ve thym hy. 38 Nangmih ing am nami bi lo khuiawh cang ah ahamni tyi khqj nyng. Thlak chang ing bibi ak kyi ce ana bi hawh uhy, nangmih ing a mingmih a bibinaak ce aat uhyk ti," tinak khqj hy. 39 Cawkaw nu ing, "Ka ik-oeih sai boeih kqawn law hy," tinawh a simpypnaak awh ce a khawk khui awhkaw Samari thlang khawzah ing cangna uhy. 40 Samari thlangkhqi ce a ven ami pha law awh, a mingmih a venawh awm aham thoeh uhy, cedarngawh khaw hih voei a mingmih ce awm pyi hy. 41 Ak awih kqawn awh thlang khawzah ngai ing cangna uhy. 42 Cekkhqi ing cawkaw nu a venawh, "Nang ing nak kqawn awh ap cangna unyng saw; ka mimah qoe qoe ing za unawh ve ak thlang ve khawmdtek thaawngkung ni tice ka sim dawgawh, cangna hawh unyng," tina uhy. 43 Khaw hihvoei a awm coengawh Kalili na cet hy. 44 Tawngtha a u awm amah a ram awh zoeksang na am awm khawi hy, tinawh Jesu amah qoe ing ak kqawn hawh dawngawh. 45 Kalili ce a pha awh, Kalili thlangkhqi ing do uhy. Jerusalem khaw awh cehtaak poei awhkaw a them saikhqi boeih ce ami huh dawngawh, cawh cekkhqi ce cawh awm lawt uhy. 46 Cekcoengawh tui misur na ang coeng saknaak Kalili ram awhkaw Kana khaw na cet tlaih hy. Cawh Kapernaum khaw awh a capa ak tlo qalboei pynoet ce cawh awm hy. 47 Cawkaw boei ing Judah ram awhkawng Kalili ram na Jesu law hy tice ang zaak awh, a venna law nawh ak thi tawm a capa ce qoei sak aham qeenaa khoeih hy. 48 Jesu ing a venawh, "Nangmih ing kawpoek kyi ik-oeih ingkaw hatnaakkhqi am nami huh awhtaw ityk awh awm ap cangna hly uhyk ti," tina hy. 49 Cawkaw boei ing, "Bawipa, ka capa a thih hlanawh law cang lah," tina hy. 50 Jesu ing, "Cet lhah, na capa ce qoei hawh hy," tina hy. Jesu ak awi ce cangna nawh cet hy. 51 Lam awh a ceh awh, a tyihzawikhqi ing a capa ce leek tlaih hawh hy ti awithang leek ing ana do law uhy. 52 Han a tym awh nu a capa a leek tlaih tice a doet awh, a venawh, "Zan awh khawnoek khqjih awh a tlawhnaak ing lhah law hy," tina uhy. 53 Ce a tym ce Jesu ing a venawh, "Na capa ce qoei hawh hy," a tinak a tym na awm hy tice a pa ing sim hy. Cedawngawh amah ingkaw a ipkuikaw boeih ing cangna uhy. 54 Vawhkaw kawpoek kyi hatnaak ik-oeih ve Jesu ing Judah qam awhkawng Kalili qam na a law coengawh a sai hih voeinaak na awm hy.

5 Khawngi iqyt awm a dii hlanawh, Judakhqi poei bul aham Jesu taw Jerusalem na cet hy. 2 Jerusalem khaw awhkaw Thu chawmkeng a venawh tulii pynoet awm hy, Aqamaic awi na Bethesdatina khy uhy, ce tulii ce tung pumha ing chung unawh tih uhy. 3 Cawh ak tlo ak naa thlang khawzah zaih uhy, mikhyp, khawkhem, khawk zuikhqi ce awm uhy, cekkhqi ing tui ak phyl ce geh uhy. 4 A tym tym awh Bawipa ak khan ceityih ce nu law hoeih hoeih nawh tui ce phyl sak hy. A u awm lamma cyk na tui a phyl huili awh ak cawn taw ikawmyih a tlawhnaak awm qoei hy. 5 Amah cawh kum thumkip kumkhet ak zaih hawh thlaktlo pynoet awm hy. 6 Jesu ing cawkaw thlaktlo kum khawqyt cawh awm hawh hy tice a sim dawngawh, doet hy, "Roei nak ngaih aw?" tina hy. 7 Cawkaw thlaktlo ing, "Bawipa, tui a phyl awh tui na anik khawng hly thlang am awm hy. Tho lawt hlai nyng, nik khai boeih uhy," tina hy. 8 Jesu ing a venawh, "Tho nawh na hiphaih ce lo nawh cet lhah!" tina hy. 9 Cawh cawkaw thlang ce qoei pahoei hy; a hiphaih ce lo nawh cet hy. Ce nyn tawi Sabbath nyn na awm hy. 10 Cedawngawh Judakhqi ing cawkaw ak qoei thlang a venawh, "Tuhngawi ve Sabbath nyn ni; anaa awi ing hiphaih doeng aham kham hy," tina uhy. 11 Cehlai anih ing, "Kai anik qoei sak thlang ing, 'Na hiphaih ce lo nawh cet lhah,' ni tina hy," tinak khqj hy. 12 Na hiphaih doeng nawh ce haham anik kqawn peekkung ce a u nu?" tinawh doet uhy. 13 Cawh ak awm thlang kqeng khuina a lut taak valh hawh a dawngawh, cawkaw ak qoei thlang ing a u hy voei nu tice am sim hy. 14 A huna Jesu

ing anih ce bawkim khuiawh hu nawh a venawh, "Toek lah, na sa dip hawh hy. Thawlhaak koeh sai voel, cemyih am awhtaw nak khanawh ik-oehi amak leek khqoet pha law kaw," tina hy. 15 Ce ak thlang ce cet nawh anih ak qoei sakkung taw Jesu ni, tice Judakhqi venawh kqawn pehy. 16 Ceamyihna Sabbath nyn awh Jesu ing vemyih ik-oehikhqi a sai dawngawh, Judakhqi ing the a kha na uhy. 17 Jesu ing a mingmih a venawh, "Ka pa ing a poepa na tuhngawi dy awh bibi hy, cedawngawh kai ingawm bibi nyng," tinak khqi hy. 18 Sabbath nyn ama zeih doeng am nawh, Khawsa awm Ka pa tinawh khy hy, Khawsa ingkaw amah ce ang myihna a taak ak caming, Judakhqi ing anih ce him aham cai khqoet uhy. 19 Jesu ing cekkhqi ce vemyihna awi blat hy: "Awitak ka nik kqawn peek khqi. Capa ing amah poek ikaw awm am sai thai hy, a Pa ing a sai boeih boeih ce Capa ingawm sai law hy. 20 Pa ing Capa a lungnaq dawngawh a ik-oehi sai boeih boeih ce huh hy. Oeih, nangmih naming ngaih a kyinaak aham ve anglakawh ik-oehi ak bau khqoet ce nim huh khqi hyn bai kaw. 21 Pa ing thlakthikhqi thawh nawh hqinqnaak a peek amyihna, Capa ingawm amah ing a ngaih thlangkhqi venawh hqinqnaak ce pehy. 22 Cekcoengawh, Pa ing u awm awi am deng hy, cehlai awi deng thainaak ce Capa a venawh pe boeih hy, 23 Pa ce amik kqjihchah a myihna Capa ce thlang boeih ing aik kqjihchahnaak tha aham cemyihna pehy. U awm Capa ce amak kqjihchahnaak taw, Capa ak tyikung Pa awm anih ing ap kqjihchah hy. 24 Awitak ka nik kqawn peek khqi, u awm kak awi ce za nawh ak tyikung ce ak cangnaak thlang taw kumqui hqinqnaak ce ta hawh hy, anih ce thawlak sak na am awm voel kaw: thiinnaak awhkawng hqinqnaak ak khuiawh lut hawh hy. (aiōnios g166) 25 Awitak ka nik kqawn peek khqi, thlakthikhqi ing Thlanghqing Capa ak awi aming zaaknaak tym ce law kaw, tuh awm law hawh hy, ak zakhqi boeih ce hqing kawm uh. 26 Pa ing amah awh hqinqnaak a taak amyihna, Capa ingawm amah awh hqinqnaak a taaknaak lawt aham pe hawh hy. 27 Anih ce Thlanghqing Capa na a awm dawngawh awideng thainaak ce pehy. 28 Ve ak camawh naming ngaih koeh kyi sak uh, phyi ak khuiawh ak awmkhqi boeih ing anih ak awi aming zaaknaak tym ce law kaw, 29 them leek ak saikhqi taw hqinqnaak pang aham tho kawm usaw, them che ak saikhqi awm awidengnaak pang aham tho lawt kawm uh. 30 Kamah ak caming ikaw awm am sai thai nyng; kang zaak amyihna awi deng nyng, kamah ak kawngaih ce am sui nyng saw, kai anik tyikung Pa ak kawngaih ce ka sui dawngawh, kak awidengnaak awm dyng hy. 31 Kamah akawng ve kamah ha ing dyihthing na kang diyh pyi mantaw, dyihthing na kang dyihpyinaak ve am thym kaw. 32 Cehlai kai dyihthing na anik diyh pyikung thlang pynoet awm hy, anih ing kai a ning dyihpyinaak ce thym hy. 33 Nangmih ing Johan a venna thlang tyi u tiksaw anih ing awitak dyihthing ce dyihpyi hy. 34 Thlanghqing a simpyinaak ce am do nyng; thaawngnaak namiuh thainaak ahamni kak kqawn hy. 35 Johan taw vangaak ak pekung mai-in na awm hy, nangmih ing anih a vangaak khuiawh zeel aham kawlhkahl awhtaw tyk uhyk ti. 36 Kai a simpyinaak ve Johan a simpyinaak anglakawh bau khqoet hy. Kai ing kak coeng aham Pa ing ka venawh ani peek bibi, tuhkaw ka bibi ing, Pa ing kai ni tyi hy, tice dyih pyi hy. 37 Kai anik tyikung Pa ing kai awh ce simpyinaak tahi. Nanngmih ing anih ak awi ce am za khawi uhyk ti, a myi awm am hu khawi uhyk ti, 38 anih ing a tyih ak thlang ce nangmih ing am namik cangnaak dawngawh, ak awi ce nangmih ak khuiawh awm am awm hy. 39 Cabu Ciim ak caming kumqui hqinqnaak ak ta thlang na namik poek dawngawh, Cakciim taw ak leek cana toek uhyk ti. Vawhkaw Cakciim ing kai ve ning dyihpyi hla ti maw, (aiōnios g166) 40 kumqui hqinqnaak huh aham ka venawh law aham taw am ngaih lak law bai uhyk ti. 41 Thlanghqing am kyihcahnaak awi ce am do nyng, 42 cehlai

nangmih ce ni sim khqi nyng. Nangmih ing Khawsa a lungnaak namik kawlung khuiawh am ta uhyk ti, tice sim nyng. 43 Kapa ang ming ing kai taw law nyng, cehlai nangmih ing amni do uhyk ti; thlakchang a u awm amah ang ming ing a law mantaw, do hlaivoei uk ti. 44 Khawsa a ven doeng awhkawng ak law kyihcahnaak ce huh aham a sui kaana, pynoet ingkaw pynoet am kyihcahnaak ak suikhqi ing ikawmyihna namik cangnaak pai kaw? 45 Cehlai kai ing Pa a haiawh thawlak nik puk kaw, tinawh koeh poek uh. Nangmih thawlak anik pukkhqikung taw nangmih ing naming ngaih-u Mosi ce ni. 46 Mosi ce namik cangnaak mantaw, anih ing kai akawng ce ana qee dawngawh, kai awm nik cangnaak hlai voei uk ti. 47 Cehlai anih a qee ce am namik cangnaak hawh awhtaw, ikawmyihna nu ak awi ve namik cangnaak pai kaw?" tinak khqi hy.

6 Cekcoengawh, Jesu ing Kalili tulii caqai ben (Tiberia tulii ami ti) na ce cet hy. 2 Thlaktock a khanawh kawpoek kyi hatnaak a sai ce ami huh awh thlang kqeng ing a hu awh hqut uhy. 3 Cawh Jesu taw tlang na van nawh a hubatkhqi mi ngawi uhy. 4 Judakhqi a cehtaak Poei taw zoe hawh hy. 5 Thlang kqeng a venna ak law ce Jesu ing a huh awh, Philip a venawh, "Vawhkaw thlang kqeng ing ami ai aham hana kaw phaihipi nu nik thlaih peek lai voei?" tina hy. 6 A sai hly kawi ce sim hawh hlai hy, a noek a daknaak na ve ak awi ve doet hy. 7 Philip ing, "Hlak kqet thaphung ing ve thlangkhqi aham phaihipi nik thlaih seiawm khangoet qip awh ami ai aham za am khoek ti kaw!" tina hy. 8 A hubat thlakchang pynoet, Simon Piter a naa Andru ing vemyihna kqawn pehy. 9 "Vawh ve phaihipi cun nga ingkaw nga pakkhak ak ta naasen pynoet taw awm hlai hy, thlang ve zah aham taw vemyihkhqi ce kaw na am coeng hly hy?" tina hy. 10 Jesu ing, "Thlangkhqi ce ngawih sak khqi," tina hy. Ce a hun awh ce taitin awm nawh, ce ak khanawh thlang thongnga ce ngawi uhy. 11 Jesu ing phaihipi ce lo nawh zeelnaak awi ak kqawn coengawh, cawhkaw ak ngawikhqi veunwam ami phyi khyk na pe uhy. Ceamyihna nga awm ami phyi naak dy te bai uhy. 12 Thlang boeih ing ak phyi na ami ai coengawh, a hubatkhqi venawh, "Ami ai ngenkhqi ce cawi lai uh. Koeh baw koeh hqet sak uh," tinak khqi hy. 13 Phaihipi ce ak phyi na ai unawh, ami ai ngen ce ami kawih awh vawh hqa hlaihah awh be hy. 14 Cawhkaw kawpoek kyi hatnaak Jesu ing a sai ce thlangkhqi ing ami huh awh, "Ve ak thlang ve khawmdek awh ak law hly kawi tawngtha tang tang ni," ti uhy. 15 A mingmih ing law unawh amah ce Sangpahrang na sai ngah ngah kawm uh, tice Jesu ing a sim awh, tlang na amah doeng ceh taak khqi valh hy. 16 Khaw a my law awhtaw, a hubat khqi ce tulii na nu cet uhy. 17 Lawng awh ngawi unawh Kapernaum khaw na ce cet uhy. Khaw thanh hawh hlai hy, Jesu taw a mingmih a venna cet hlan hy. 18 Cawh khaw hli khungdeng nawh tuilet tho hy. 19 Meng thum am awhtaw meng thum hlai tluk lawng ce ami kaih coengawh, a mingmih a lawng a awmnaak benna tui awh a khaw ing cet nawh ak law Jesu ce hu uhy; cawh a mingmih ing kqjih uhy. 20 Cehlai a mingmih a venawh, "Kai ni; koeh kqjih uh," tinak khqi hy. 21 A mingmih ing lawng khuiawh lut sak uhy, amah cawh aming cainaa hun ce pha uhy. 22 A khawngawi awhtaw vang ben long caqai awh thlang kqeng ak dyihkhqi ing, lawng pynoet doeng tikaa taw lawng ak chang am awm nawh, Jesu taw a hubatkhqi mi kutoet na lawng awh am cet hain unawh, a hubatkhqi amimah doeng ni ami ceh tice sim uhy. 23 Cekcoengawh Tiberia ben awhkaw lawng a vang ce Bawipa ing zeelnaak awi ak kqawn coengawh thlang kqeng ing phaihipi ami ainaak hun awh ce dyn uhy. 24 Jesu ingkaw a hubatkhqi cawh am awm voel uhy tice thlang kqeng ing ami sim awh, lawng khuiawh lut unawh Kapernaum benna ce Jesu ak sui na cet uhy. 25 Tuili vang benna amah ce ami huh awh, doet uhy, "Cawngpyikung, ityk awh vena na pha?" tina uhy. 26

Jesu ing, "Awitak ka nik kqawn peek khqi, nangmih ing kai ni sui uhyk ti, kawpoek kyi hatnaakkhqi nami huh awh amni, phaihipi ak phyi na nami ai awh ni. **27** Thlanghqing Capa ing ani peek hly khqi kumqui hqingnaak buh huh aham bibi lah uh. Anih awh ce Pa Khawsa ing noeknaak deeng hawh hy," tinak khqi hy. (**aiōnios g166**) **28** Cekkhqi ing, "Khawsa ing a ngoe ikaw bi nu ka mi bi kaw?" tina uhy. **29** Jesu ing, "Khawsa bibi taw veni: amah ing a tyih cangnaak ce," tinak khqi hy. **30** Cedawngawh doet uhy, Hu unawh kamik cangnaak aham i ikawmyih ak kawpoek kyi hatnaak nu na nim huh khqi kaw? Ikaw na sai kaw? **31** Pakdamkhqi ing mana ce qamkoh awh ana ai uhy, 'A mingmih ing ami ai aham khan nakawng phaihipi ce pek khqi hy' tinawh a qee amyihna, tina uhy. **32** Jesu ing a mingmih a venawh, "Awitak ka nik kqawn peek khqi, khawk khan nakaw phaihipi nangmih anik pe khqikung ce Mosi amni, Ka pa ing ni khawk khan nakaw phaihipi tang ce nangmih ani peek khqi. **33** Khawsa a phaihipi taw khawmdek a venawh hqingnaak ak pekung khawk khan nakawng anuk law thlang ce ni," tinak khqi hy. **34** A mingmih ing, "Bawipa, tuhkawng vawhkaw phaihipi ce ni pek khqi lah," tina uhy. **35** Cawh Jesu ing, "Kai taw hqingnaak phaihipi na awm nyng. U awm ka venna ak law taw ak phoen am cawi kaw, kai anik cangnaak thlang taw ityik awm tui am ngaih voel kaw. **36** Cehlai ka nik kqawn peek khqi hawh amyihna, kai ve ni hu hawh hlai uhyk ti, amnik cangna hlan bak bak uhyk ti. **37** Ka pa ing ani peekkhqi boeih boeih taw ka venna law kaw, u awm kai a venawh ak lawkhqi boeih taw am maa kawng nyng. **38** Kamah ak kawngah bi aham am nawh kai anik tyikung ak kawngah bi ahammi khawk khan nakawng ka law hy. **39** Amah ing ani peek khqi boeih boeih ce pynoet ca awm ang qeng sak kaana, khawngghi a dyt awh ka thawh sak tlaih ham ce kai anik tyikung ak kawngah na awm hy. **40** Kapa ak kawngah taw, u awm Capa ce ak toekkhqi boeih ing cangna unawh kumqui hqingnaak a taaknaak ham ingkaw, khawngghi a dyt awh kai ing ka thawh sak tlaih ham ce ni," tinak khqi hy. (**aiōnios g166**) **41** "Kai taw khawk khan nakawng ak law phaihipi na awm nyng," a ti dawngawh Judahkhqi ce sai bi uhy. **42** A mingmih ing, "Ve ve Joseph a capa Jesu am nu ve?" A pa ingkaw a nu awm ni sim u saw kaw. Ikawmyihna, "Khawk khan nakaw ka nuk law," a ti hy voei," ti uhy. **43** Jesu ing, "Koeh sai bi voel uh. **44** Kai anik tyikung Pa ing ama ceh sah awhtaw u awm kai a venna am law thai kaw, anih ce khawngghi a dyt awh kai ing thawh tlaih kawng nyng. **45** Tawngkhakhi cauk awh, 'A mingmih boeih ce Khawsa ing cawngpyi kaw, tinawh awm hy. A u awm Pa ak awi ce ngai nawh anih a venawh ak cawng taw kai a venawh law hy. **46** Khawsa venawh kawng ak law doeng am kaa ingtaw u ingawm Pa ce hu hlan hy; anih doeng ing ni Pa ce a huh hy. **47** Awitak ka nik kqawn peek khqi, u awm ak cangnaak ingtaw kumqui hqingnaak ce ta hawh hy. (**aiōnios g166**) **48** Kai taw hqingnaak phaihipi na awm nyng. **49** Nami pakhqing qamkoh awh mana ce ai uhy, cehlai thi uhy. **50** Cehlai khawk khan nakawng anuk law phaihipi ce vawh awm hy; ce ce u ingawm a ai awhtaw am thi kaw. **51** Kai taw khawk khan nakawng anuk law hqingnaak phaihipi na awm nyng. U ingawm vawhkaw phaihipi ve a ai awhtaw, kumqui dyna hqing kaw. Cawhawh phaihipi cetaw, khawmdek ing hqingnaak a taaknaak aham ka peek hly kawi ka sa veni," tinak khqi hy. (**aiōnios g165**) **52** Cawh Judahkhqi taw amimah ingkaw amimah khqi ce oelh qu unawh," Ikawmyihna ve ak thlang ing amah a sa ce ai aham ani peek naak khqi kaw?" ti uhy. **53** Jesu ing a mingmih a venawh, "Awitak ka nik kqawn peek khqi, thlanghqing Capa a sa ce am ai unawh a thi ce am nami awk awhtaw hqingnaak am ta kawm uk ti. **54** Ka sa ce ai nawh ka thi ce ak aw ingtaw kumqui hqingnaak ce tahi, khawngghi a dyt awh ce anih ce kai ing thawh kawng nyng. (**aiōnios g166**) **55** Ka sa ve buh tang tang na awm

nawh ka thi ve awk ham tang tang na awm hy. **56** U awm ka sa ai nawh ka thi ak aw taw kai awh awm poe kawm saw, kai awm anih awm poe kawng nyng. **57** Ak hqing Pa ing kai ani tyih amyihna Pa ak caming kai awm hqing nyng, cemyih lawt na kai anik ai taw kai ak caming hqing lawt kaw. **58** Ve ve khawk khan nakaw ak law hqingnaak phaihipi ni. Nami pakhqing ing mana ana ai unawh thi uhy, cehlai vawhkaw phaihipi ak ai taw ang loet na hqing kaw," tinak khqi hy. (**aiōnios g165**) **59** Ve ak awi ve Kapernawum khaw awhkaw sinakawk awh a cawngpyi awh kqawn pekhy. **60** Ce ak awi ce a ming zaak awh a hubat thlang khawzah ing, Vawhkaw cawngpyinaak ve kyi aih hy. U ing nu a do tho kaw?" ti uhy. **61** Ce ak awi awi a hubatkhi sai bi uhy tice a sim awh, "Ve ak awi awh namik kaw am law nawh nu?" **62** Thlanghqing Capa ing a awmnaak kqym na a kai ce nami huh mantaw ikaw nu nami ti voei! **63** Myihla ing hqingnaak ce pehy; pumsa taw kawna am coeng nyng. Nangmih a venawh awi kak kqawn lawkhqi ve Myihla awi na a awm a dawngawh hqingnaak na awm hy. **64** Cehlai nangmih anglakawh amak cangnaak thlang vang awm uhyk ti," tinak khqi hy. Jesu ing ak cykca awhkawng amak cangnaak thlangkhqi ce sim nawh amah thlang a kut awh ak zawi hly awm sim hawh hy. **65** Cekcoengawh a mingmih a venawh, "Cawh mah maw, Ka pa ing ama tyih law taw u awm ka venna am law thai kaw, ka ti hy," tinak khqi hy. **66** Cawhawh taw a hubat thlang khawzah ing voei taak unawh a hu awh am bat voel uhy. **67** Thlanghqa hlaihii a venawh, "Nangmih taw voei aham am nami ngaih lawt nawh aw?" ti nak khqi hy. **68** Simon Piter ing, "Bawipa a u venna nu ka mi ceh kaw? Nang awh ni kumqui hqingnaak a awm hy. (**aiōnios g166**) **69** Nang ve Khawsa ak Thlang Ciim ni tice cang na unawh sim unyng," tina hy. **70** Jesu ing, "Nangmih thlanghqa hlaihii ve kai ing ni ka nik tyih khqi my? Cehlai nangmih ak khuiawh qaai pynoet awm hy," tinak khqi hy. **71** (Simon a capa Judah Iskariot ce ak kqawn ngaihnaak, anih ce thlanghqa hlaihii ak khuiawh kaw thlang na awm hlai hy, a hu na taw amah ce thlang a kut awh akzawikungna awm hy.)

7 Cekcoengawh, Jesu taw Kalili qam kqang cet nawh, Judahkhqi ce amih him aham ami teng adawngawh Judah qam ce cehta hy. **2** Cehlai Judahkhqi a hi im poei ce a zoe law awhtaw, **3** Jesu a koeinaakhqi ing a venawh, "Ve a hun awhkawng Judah qam na na ceh kawp ti, na hubatkhi ing kawpoek kyi ik-oeih na saikhqi ce ami huh naak aham. **4** U awm thlang kqeng a huh awh dang aham ak ngaih taw ik-oeih ang hyp na am sai khawi hy. Vemyih ik-oeihkhqi na sai hawh dawngawh namah ingkaw namah ce khawmdek thlangkhqi venawh huh qu sak," tina uhy. **5** A koeinaa nawnkhqi ingawm amah ce ap cangna uhy. **6** cedawngawh Jesu ing, "Kai aham a tym pha law hlan hy; nangmih aham taw a tym ve awm poeapa hy. **7** Khawmdek ing nangmih ce amni sawh nak khqi thai hy, cehlai ami them sai amak leekkhqi ce kak kqawn peek khqi camawh kai ni sawh na uhy. **8** Nangmih mah poeikung na cet uh. Cehlai ka tym a pha hlan dawngawh kai taw ce a poei na cet hly hlan nyng," tinak khqi hy. **9** Ce ak awi ak kqawn boeih coengawh Kalili awh ce awm hy. **10** Cehlai a koeinaakhqi poei na ami ceh boeih coengawh, anih cet lawt hy, cehlai thlang a sim na am cet nawh ang hyp na cet hy. **11** Poei khuiawh Judahkhqi ing doen unawh sui uhy, "Hana nu ce ak thlang ce a awm hy voei?" ti uhy. **12** Thlang kqeng ak khuiawh anih akawng ce kqawn sap sap uhy. Thlang vang ing, "Thlak leek ni ka ti koe noek," ti uhy. Ak chang tloek bai ingtaw, "Amni, thlang ni a thainaak hy," ti uhy. **13** Cehlai Judahkhqi ce amik kqjih awh u ingawm ang dang qoeng na anih akawng ce ap kqawn uhy. **14** Poei a awm hui awh, Jesu ing bawkim na cet nawh thlang cawngpyi hy. **15** Juda thlangkhqi aming ngaih kyi nawh, "Ve ak thlang ing ca am cawng loei nawh, hana kaw vemyih saithainaakkhqi a hu hly voei?" ti uhy. **16** Jesu

ing, "Ka cawngpyinaak ve kamah a koe amni. Kai anik tyikung a venawh kaw ni. 17 U ingawm Khawsa ak Kawngaih ce sai aham ak tyh awhtaw, ka cawngpyinaak ve Khawsa a venawh kaw nu, am awhtaw kamah a cawngpyinaak mai nu, tice sim kaw. 18 Amah poek awh awi ak kqawn taw amah zoeksang qunaak ahamni ak kqawn hy, cehlai anih ak tyikung zoeksangnaak aham bi ak bikung taw awitak ak thlang ni; amah awh ce amak thym ikaw awm am awm hy. 19 Mosi ing anaa awi am ni pek khqi nawh nu? Cehlai nangmih ak khuiawh pynoet kangna ingawm am hqut uhyk ti. Tinak khqi hy. 20 Cawh thlang kqeng ing, "Nang ve qaa ti ha yk ti ve. U ing nu nang him aham ani sui?" tina uhy. 21 Jesu ing a mingmih a venawh, "Kai ing kawpoek kyi them pynoet sai nyng, cawh nangmih naming ngaih na kyi hy. 22 Cehlai Mosi ing chahhui queetaak ani peek khqi dawngawh (Mosi ing am pe nawh pakdamkhqi ing ni ami na peek hlai hy). Sabbath nyn awh nangmih ing naasen chahhui queetaak sai uhyk ti. 23 Naasen ce Sabbath nyn awh chahhui queet pe hlai uhyk ti, Mosi a anaa awi ce eek na ama awm awhtaw, kawthi kai ing Sabbath nyn awh thlaklo ka qoei sak awh nangmih namik kaw a so? 24 Ak khan toek nawh awi koeh tlyk uh, ak thym na awi tlyk uh," tinak khqi hy. 25 Cawh Jerusalem khaw awhkaw thlang vang tloek ing, "Him aham ami sui ak thlang ce anih am nu ve? 26 Toek lah uh, ang dang qoenga awi ak kqawn awh, u ingawm a venawh ikaw am kqawn hqa uhy. Ukkungkhqi ing anih ve Khrin ni tinawh amik poek tang hy voei nu aw? 27 Cehlai ningnih ingtaw anih ve hana kaw thlang nu tice ni sim uhy, Khrin a law awhtaw hana kawng nu a law tice u ingawm am sim hly hlai hy," tina uhy. 28 Cawh, Jesu ing bawkim awh a cawngpyi doena khy nawh, "Oeih, kai ve ni sim uhyk ti, kai ve hana kaw nu tice ni sim uhyk ti. Kai kamah poek ing vawh am law nyng, cehlai kai anik tyikung ce thym hy. Anih ce nangmih ing am sim uhyk ti, 29 cehlai anih ing ni tyi nawh, anih a venawh kawng ka law dawngawh kai ingtaw sim nyng," tinak khqi hy. 30 Cawh anih ce tu pahoei aham ngaih uhy, cehlai anih a tym ce a pha hlan dawngawh, u ingawm am tulhy. 31 Cehlai, thlang khawzah ing anih awh ce cangnaak ta uhy. Cekkhqi ing, "Khrin a law awh, ve ak thlang anglawk anih ing kawpoek kyi them khawzah ngai ak sai hly nu?" tina uhy. 32 Thlangkhqi ing anih akawng cemyihna amik kqawn sap cap ce Farasikhqi ing za uhy. Cawh khawsoeih boeikhqi ingkaw Farasikhqi ing anih ce tu aham bawkim ukkungkhqi ce tyi uhy. 33 Jesu ing, "Nangmih a venawh a khoechca ni ka awm hly, cekcoengawh taw kai anik tyikung a venna cet hly hawh nyng. 34 Nangmih ing kai ce ni sui kawm uk ti, cehlai amni hu kawm uk ti; kai ka awmnaak awh nangmih am law thai kawm uk ti," tinak khqi hy. 35 Cawh Judahkhqi ing, "Amni huh thainaak aham hana nu cet valh vang a ti hy voei? Nimah thlangkhqi ing poeng unawh aming kqeng aming thainaak Greekkhqi anglak na cet nawh Greekkhqi cawngpyi khqi nyng, tinawh hy voei aw? 36 'Nangmih ing ni sui hly hlai uhyk ti, amni hu kawm uk ti, kai ka awmnaak awh nangmih am law thai kawm uk ti,' a ti hy voei?" tina uhy. 37 Poei a dytnaak ingkaw a pui khyt a khawngi awh, Jesu ing dyi nawh kawteh na, "U awm tui ak ngaih taw ka venna law seitaw, tui aw seh. 38 U awm kai anik cangnaak thlang taw, cak ciim ing ak kqawn amyihna, ak kawk khui nakawng hqinqnaak tui ce lawng kaw," tinawh khy hy. 39 Ce ak awi ak kqawn ngaihnaak taw, amah ce ak cangnaak thlang boehing a hu na ami huh hly Myihla ce ak kqawn ngaihnaak ni. Jesu ce zoeksang na a awm hlan dawngawh, ce a nyn dy awhtaw Myihla ce pe hlan hyn hy. 40 Ak awi ce aming zaak awh, thlang vang ing, "Ve ak thlang ve tawngtha tang ni," tina uhy. 41 Thlang vang bai ingtaw, "Ve ak thlang ve Khrin ni," tina uhy. Thlak changkhqi bai ing taw, "Ikawmyihna Khrin ce Kalili awhkawng a law thai kaw? 42 Cakciim ing, "Khrin taw David ipkhui awhkawng law kaw,

David a awmnaak khaw Bethlehem awhkawng law kaw," tihy ka ti koe noek?" tina uhy. 43 Jesu ak camawh thlang kqeng ce pek ang bo qu uhy. 44 Thlang vang ing anih ce tu aham ngaih uhy, cehlai u ingawm am tuhy. 45 A hunu taw bawkim temkungkhqi ce khawsoeih boeikhqi ingkaw Farasikhqi venna hlat tlaih uhy, cekkhqi ing, "Ikawthi anih ce am nami law pyi? tina uhy. 46 Bawkim teemkungkhqi ing, "U ingawm anih amyihna awi ap kqawn khawi hlan hy, tina uhy. 47 Farasikhqi ing, "Nangmih awm ni thai nak khqi hawh lawt hy my ce? 48 Ukkung am awhtaw Farasi pynoet oet ing anih ak awi ce cangna hawh nawh leek nu? 49 Amni! Vawhkaw thlang kqeng ing anaa awi ikaw awm am sim uhy, a mingmih ak khanawh awihka awm hawh hy," tina uhy. 50 A mingmih anglakawh pynoet na awm nawh ak cyk awh Jesu a venna ak cet Nekodemus ing, 51 "Nangmih anaa awi ing thlang a ik-oeih sai lamma na ang zaak hlanawh thawlak sak paqap qap nawh nu? tinak khqi hy. 52 A mingmih ing, "Nang awm Kalili ben awhkaw thlang lawt aw? Sui nawh toek lah thaw voeih ti, Kalili awhkawng tawngtha ap cawn khawi hy," tina uhy. 53 Cekcoengawh, im na voei boeih uhy.

8 Cehlai Jesu taw Olive thlang na ce kai hy. 2 A khawngawi khaw a dai awh bawkim lut hy. Cawh thlang boeih a venna cun law bai usaw, ngawi nawh cekkhqi ce cawngpyi khqi hy. 3 Cawh caqeukungkhqi ingkaw Farasikhqi ing nu pynoet a samphaih huiawh tu unawh law pyi uhy. Thlangkhqi haiawh nu ce dyih sak unawh, 4 Jesu a venawh, "Cawngpyikung, vawhkaw nu ve a samphaih huiawh tu unyng. 5 Mosi a anaa awi ingtaw vemyih a nu ve lung ing thlak mat aham ni a awm hy. Nang ingtaw ikawmyihna nak poek?" tina uhy. 6 Ce awidoetnaak ve amah thawlak amik puknaak thai aham cainaak ta unawh a mi doet ni. Cehlai Jesu ing koep nawh a kut ply ing dek awh ca qee hy. 7 Cekkhqi ing ami doet khing awh tho the nawh a mingmih a venawh, "Nangmih ak khuiawh amak thawlak khawi quee ing vawhkaw nu ve lung ing thlak ma seh," tinak khqi hy. 8 Cekcoengawh nung koep tlaih nawh dek awh ca qee tlaih bai hy. 9 Ce ak awi ce aming zaak awh a hqamca awhkawng kqan nawh pynoet coeng pynoet cen bet bet uhy, a hunu taw Jesu ingkaw cawh ak dyi nu doeng ce taang hy nih. 10 Jesu ing dyi nawh nu a venawh, "Nu, hana nu ami ceh boeih? U ingawm amni thawlak sak nawh nu?" tina uhy. 11 Nu ing, "Bawipa, u ingawm amni thawlak sak hy," tina uhy. Cawh Jesu ing, "Cawhtaw kai ingawm amni thawlak sak lawt nyng. Cet nawhtaw thawlhaak koeh sai voel moe," tina uhy. 12 Thlangkhqi venawh Jesu ing awi kqawn pek tlaih hy, "Kai taw khawmdek vangnaak na awm nyng. U awm ka hu awk ak law taw ityk awm thannaak ak khuiawh am cet kaw, cehlai hqinqnaak ce ta kaw," tinak khqi hy. 13 Farasikhqi ing, "Nang ing namah ingkaw namah ni dyihthing na na awm hy; nang dyihpyinaak ve am thym hy," tina uhy. 14 Jesu ing cekkhqi ak awi ce vemyihna hlat khqi hy, "Kamah ingkaw kamah dyih qu pyi nyng seiawm, kang dyih qu pyinaak ve thym hy; kai taw hana kawng ka law nawh hana ka ceh hly tice sim nyng; cehlai nangmih ingtaw ka lawnaak ingkaw ka cehnaak hly am sim uhy ti. 15 Nangmih ing thlanghqeong pumsa ing awideng uhyk ti; cehlai kai ingtaw a awm awi am deng nyng. 16 Awideng bai nyng seiawm, kamah doengna am ka awm awh kak awi tlypnaka ve thym hy. Kai anik tyikung Pa ingqawi kai taw dyi hain nyng. 17 Na mimah a anaa awi awm thlang pakhih ing a sin pyi awthaw cawhkaw a simpyinaak ce thym hy tina awm hy. 18 Kai ing kamah ce dyih qu pyi nyng; kai anik tyikung ak chang simpyikung taw Pa ni," tinak khqi hy. 19 Cawh cekkhqi ing doet uhy, "Na pa ce hana nu a awm?" tina uhy. Jesu ing, "Nangmih ing kai amni sim u tiksaw ka Pa awm am sim utyk ti. Kai mahnami ni sim mantaw, ka Pa awm sim hly hlai uhyk ti," tinak khqi hy. 20 Bawkim awh tangka amik channaak bawm a venawh a cawngpyi khqi awh ve ak awi ve kqawn pek khqi hy. A tym a pha hlan dawngawh u ingawm

am tu hy. 21 Jesu ing a mingmih a venawh awi kqawn pek khqi tlaib bai hy, "Kai taw cet hly hawh nyng, nangmih ing kai ce ni sui kawm uk ti, cehlai nami thawlhaak awh ce thi kawm uk ti. Kai ka cehnaak awh nangmih am law thai kawm uk ti," tinak khqi hy. 22 Cedawngawh Judahkhqi ce doet qu uhy, "Amah ingkaw amah him qu vang tinawh hy voei aw? Cawh aw, 'Kai ka cehnaak awh nangmih am law thai kawm uk ti, a ti hy voei?' ti uhy. 23 Cehlai anih ing, "Ningmih taw ak kai nakawng ni nami law hy, kai taw khan benna kawng law nyng. Nangmih taw ve khawmdek a koena awm uhyk ti; kai taw ve khawmdek a koe na am awm nyng. 24 Nami thawlhaak awh nangmih taw thi kawm uk ti, tice nik kqawn pek khqi hawh nyng; kai ve anih hawh ni, tinawh kak khypyi ve am namik cangnaak awhtaw nami thawlhaak awh ce thi tang tang kawm uk ti," tinak khqi hy. 25 Cekkhqi ing, "Nang ve a u nu?" tina uhy. Jesu ing, "Nik kqawn pek khqi khing hawh nyng kaw. 26 Nangmih awi ka ni dengaak khqi awh ve awi khawzah kqawn ham ta nyng. Cehlai kai anik tylikung taw ypawn hy, anih a ven awhkaw, kang zaak ce ni khawmdek a venawh kak kqawn," tinak khqi hy. 27 A Pa akawng ak kqawn peekkhqi ce a mingmih ing am zasim uhy. 28 Cedawngawh Jesu ing, "Nangmih ing Thlanghqing Capa ce nami tai awh, kai ve anih hawh ni, tice sim kawm u tiksaw, kamah poek awh ik-oehi am sai nyng saw Pa ing ani cawngpyi amyihna niawi kak kqawn, tice sim kawm uk ti. 29 Kai a nik tylikung ce kai ak khuiawh awm hy; kamah doeng amni cehta hy, anih ak kawngaih ce ni kai ing ka sai poepa," tinak khqi hy. 30 Ve ak awikhqi ak kqawn awh thlang khawzah ing ak khanawh cangnaak ta uhy. 31 Amah ak cangnaak Judahkhqi venawh Jesu ing, "Ka cawngpyinaak ve namin tu awhtaw, nangmih taw kai a hubat tang tang na awm uhyk ti. 32 Cawhtaw awitak ce sim kawm uk ti, Awitak ing nangmih ce ni loet sak khqi kaw," tinak khqi hy. 33 A mingmih ing, "Kaimih ve Abraham a cadil na awm unyng saw, u a tamnaa na awm am awm khawi unyng. Ikawmyihna nang ing loet kawm uk ti, na ti?" tina uhy. 34 Jesu ing, "Awitak ka nik kqawn peek khqi, u awm thawlhaaka ak sai taw thawlhaaka a tamnaa na awm hy. 35 Tamnaa ing ipkhui awh am awm poe thai hy, cehlai capa taw ang qui na ipkhui awh awm hy. (aiōn g165) 36 Cedawngawh Capa ing nangmih ce ari loet sak khqi awhtaw, loet tang tang kawm uk ti. 37 Nangmih Abraham a cadil na awm uhyk ti tice sim nyng. Cehlai nangmih ak khuiawh kak awi ama awm dawngawh, nangmih ing kai ce him aham ni ngaih uhyk ti," tinak khqi hy. 38 Kai ing ka Pa haiawh ka huh ce nangmih a venawh kqawn law nyng, nangmih ingawm nami pa a venawh kaw naming zaak ce ni nami sai lawt hy," tinak khqi hy. 39 Cekkhqi ing, "Abraham taw kaimih a Pa ni," tina uhy. Jesu ing, "Abraham a ca khqi na nami awm awhtaw, Abraham ing a sae ce nami sai aham awm hlai ti maw. 40 Kai ing Khawsa venawh kaw kang zaak awitak ce nangmih a venawh kqawn law hlai nyng, nangmih ingtaw kai ve him ahamni teng uhyk ti. Abraham ingtaw cemiyh ik-oehi ce am sai hy. 41 Nangmih ingtaw nami pakhqi ing ami sai ceni nami sai hy," tinak khqi hy. Cekkhqi ing, "Kaimih ve caquk caqaikhqi amni. Pynoet doeng kami taak cetaw Khawsa amah ni," tina uhy. 42 Jesu ing a mingmih a venawh, "Khawsa ce nangmih a Pa na a awm mantaw, kai ve ni lungna hly hlai uhyk ti, kai taw Khawsa venna kawng law nyng saw tuh vawh awm nyng. Kai kamah poek awh am law nyng; anih ing ni ani tyih hy. 43 Ikawtih kak awi ve nangmih a venawh ama caih hy voei? Kak kqawn ve am naming zaak thai dawngawh ni. 44 Nangmih ve nami pa qaii ak thlangkhqi ni. Cedawngawh nami pa ak kawngaih ce sai aham ngaih uhyk ti. Anih ce ak cyka awhkawng thlang ak him na awm nawh amah awh awitak ce ama awm dawngawh awitak ce am tuhy. Qaii awi ak kqawn awh, amah ingkaw amah ni ak kqawn qu kqoeng hy, qaii awi ak kqawn thlang na awm nawh qaii awi ak

kqawn thlangkhqi a pa na awm lawt hy. 45 Cehlai awitak ka nik kqawn peek khqi dawngawh, nangmih ing amnik cangna uhyk ti! 46 Nangmih ak khuiawh u ing nu kai a thawlhaak am tu law thai? Awitak ka nik kqawn peek khqi taw, Ikawtih am nami nik cangnaak? 47 U awm Khawsa ak thlang ingtaw Khawsa ak awi ce za hy. Khawsa koe na am nami awm dawngawh ni ak awi awm am naming zaak thai hy," tinak khqi hy. 48 Judahkhqi ing, "Nang ve Samari thlang qaii ak ta ni, ka mi tive thym hy my?" tina uhy. 49 Jesu ing, "Qaii am ta nyng, kai ing ka Pa ni ka zoeksang, cehlai nangmih ing amni zoeksang uhyk ti. 50 Kamah a zoeksangaak am sui nyng; ce ak sui thlang pynoet awm hy, anih cetaw awi ak dengkung na awm hy. 51 Awitak ka nik kqawn peek khqi, u ingawm kak awi ve a khoem awhtaw, ityk awh awm anih ce am thi voel kaw," tina hy. (aiōn g165) 52 Cawh Judahkhqi ing, "Tuh qaii ta khyl ti tice ni sim hawh unyng! Abraham ce thi hawh hy, cemiyh lawt na tawngkhakhqi awm thi hawh uh, cehlai nang ingtaw, 'U awm kai ak awi ak khoem taw thihnaak am tan kaw,' ti hyk ti. (aiōn g165) 53 Nang ve kaimih a Pa Abraham anglakawh na bau khqoet nawh nu? Anih ce thi hawh hy, cemiyh lawt na tawngkhakhqi awm thi hawh uh. Namah ingkaw namah ve ikaw na nu nang ngaih qu?" tina uhy. 54 Jesu ing, "Kamah ingkaw kamah ka zoeksang qu awhtaw, ka zoeksang qunaak ve kawna awm am awm kaw. Ka pa, nangmih ing nami Khawsa na nami taak ce, anih ing ni kai ve an zoeksang hy. 55 Nangmih ing anih ce am sim hlai uhyk ti, kai ingtaw sim nyng. Am sim nyng ka ti mantaw kai awm nangmih amyihna a qaii ak kqawn na awm nyng, cehlai anih ce kai ing sim nyng saw, ak awi ce khoem nyng. 56 Nangmih a pa Abraham ing kai a khawngi ve huh aham anak poek nawh ana zeel hy; hu nawh ak kaw zeel hy," tinak khqi hy. 57 Judahkhqi ing, "Kum hakip za na law hlanawh, Abraham hu nyng el!" tina uhy. 58 Jesu ing, "Awitak ka nik kqawn peek khqi, Abraham a thang hlanawh kai awm hawh nyng," tinak khqi hy. 59 Cawh, a mingmih ing khawng aham lung cung uh, cehlai Jesu ing thuk taak khqi hy, bawkim kawngma awhkawng ceakkhi ce ak changna cehtaak khqi hy.

9 A va ceh awh, a thang thai awhkawng a mik ak hyp thlang pynoet ce hu hy. 2 A hubatkhqi ing, "Cawngpyikung, a u a thawlhaak nu, amah nu, am awhtaw a nu a pa a thawlhaak camawh nu, ve ak thlang ve mikhyp na a thang?" tina uhy. 3 Jesu ing, "Amah a thawlhaak awh am nawh a nu a pa a thawlhaak camawh nu, amah a thawlhaak amni, Khawsa a bibinaak ce ve ak thlang a hqjinggaak awh ang dangnaak aham ni. 4 Khaw a dai tloek awh ve, kai anik tylikung a bi ve bi aham awm hy. U ingawm bi aama binaak thai khawmthan ce law kaw. 5 Khawmdek awh ka awm tloek awh, kai taw khawmdek vangnaak na awm nyng," tinak khqi hy. 6 Ve ak awi ak kqawn boeih coengawh, dek awh cimtui ce sa hy, am cimtui ing dekvai ce cawh nawh, Cekcoengawh mikhyp amik awh ce thut pehy. 7 "Cet nawhtaw Siloam Tuili awh sil," tina hy. (Siloan taw "Ty" tinaak ni) Ce ak thlang ing cet nawh amik ce sil hy, cawh amik ce dai pahoei hy. 8 A imceng lovaikhqi ingkaw amah ak hukhqi ing anih ve kut ak dun thlang ni, tice ami sim awh, "Anih ve ngawi nawh kut ak dun thlang am nu ve?" tina uhy. 9 Thlang vang tloek ing, "Anih ni," tina uhy. Thlang vang tloek bai ing, "Am ni, amah ak myih pyi ni," tina uhy. Cehlai amah ing, "Ce ak thlang ce kai ni," tinak khqi hy. 10 Cekkhqi ing, "Cawhtaw ikawmyihna nu na mik ang dangnaak?" tina uhy. 11 Anih ing, "Jesu ami ti thlang ing dekvai sai nawh, ka mik awh that law hy, 'siloam na cet nawhtaw sil,' ni tina hy. Cet nawh ka va silh awh, ka mik dai pahoei hy," tinak khqi hy. 12 Cekkhqi ing, "Ce ak thlang ce hana nu a awm?" tina uhy. Anih ing, "Am sim nyng" tinak khqi hy. 13 Cawhawng mikhyp thlang ce Farasi thlangkhqi venna khyn uh. 14 Jesu ing dekvai ing amik that pe nawh a qoei saknaak a khawngi

ce Sabbath nyn na awm hy. 15 Cedawngawh Farasikhqi ingawm ikawmyihna nu amik ang dainaak, tice doet uhy. Anih ing, "Ka mik awh devkai that law nawh, sil nyng saw dang pahoei hy," tinak khqi hy. 16 Farasi thlang pynoet ing, "Sabbath nyn ama zeih dawngawh, ve ak thlang ve Khawsa a venawh kaw thlang amni," ti uhy. Cehlai thlak chang tloek bai ingtaw, "Ikawmyihna thlak thawlh ing vemyih them a sai thai kaw?" ti uhy. Cedawngawh, pakkhii na pek qu uhy. 17 A hukhit na mikhyp a venawh, "Namik ak dang sakkung thlang ce, ikawmyihna aw nak poek?" tina uhy. Ce ak thlang ing, "Anih ce tawngha ni," tinak khqi hy. 18 A nu ingkaw a pa a mik khy hlan dy taw ce ak thlang ce ni hu awh amilk hyp hlai hy, tuhtaw amik dang tlaib hy, tice Judahkhqi ing ap cangna uhy. 19 Anih ve nangmih a capa aw? Anih ve aw a thang thai awhkawng a mik ak hyp, na ti ce? Ikawmyihna aw tuh amik ang dangnaak?" tina a nu ingkaw a pa ce doet uhy. 20 A nu ingkaw a pa ing, Anih ve kai nih a capa ni, a thang thai awhkawng a mik hyp hy. 21 Cehlai ikawmyihna aw a mik a dainaak, u ing aw amik a qoei sak, am sim nih nyng, amah doet thaw voei uk ti, a kum hqam hawh saw. Amah akawng ce amah ing kqawn hly ti maw," tinak khqi hy nih. 22 A nu ingkaw a pa ing Judahkhqi ce kqjih nih nawh cemyihna ce kqawn hy nih, Judahkhqi ing u awm Jesu Khrin ni, tinawh ak dyihpyi taw sinakawk khuiawh kawng hqek u sih," tinawh anak kqawn paicai hawh uhy. 23 Cedawngawh a nu ingkaw a pa ing, "A kum hqam hawh saw, amah doet thaw voei uk ti," tinak khqi hy nih. 24 Cekcoengawh a hih voei naak na cawkawm mikhyp ce khy tlaib unawh a venawh, "Khawsa ce kyihcah uh, ve ak thlang ve thlak thawlh ni tice sim unyng," tina uhy. 25 Anih ing, "Anih ce thlak thawlh aw, thlak thawlh am aw, am sim nyng. Ik-oehi pynoet taw sim nyng. Ni hu awhtaw ka mik ve hyp hlai hy, tuhtaw kamik ve dang hawh hy," tinak khqi hy. 26 Cawh a mingmih ing, "Nak khanawh ikaw a sai law?" Ikawmyihna aw na mik a dai law sak?" tina uhy. 27 Anih ing, "Nik kqawn pek khqi hawh hlai nyng, am ngai uhyk ti. Kaw ham aw naming zaak tlaib tlaib nami ngaih? Nangmih awm anih a hubat na coeng aham nami ngaih lawt nawh aw?" tinak khqi hy. 28 Cawhtaw anih ce zyi unawh, "Nang ve anih a hubat na awm hyk ti ve! Kaimih taw Mosi a hubat na ni kami awm hy!" 29 Khawsa ing Mosi a venawh awi kqawn hy, tice sim unyng. Cehlai ve ak thlang ve hana kawng a law ti awm am sim unyng," tina uhy. 30 Ce ak thlang ing, Amah ce qoe ni kawpoek kyi ham ak awm ti ce, hana kaw a law ti am sim thai kana kamik a dai sak ce. 31 Khawsa ing thlak thawlh ak awi am ngai pehy tice ni sim uhy; cehlai u awm Khawsa lungna nawh a ngaihawi a sai awhtaw Khawsa ing anih ak awi ce ngai pe hy. 32 Mik hyp na ak thang amik dai tlaib hy tice khawsyn awhkawng am ning khawi hy. (aiōn g165) 33 Ve ak thlang ve Khawsa venawh kaw am mantaw, ikaw awm am sai hly thai hy," tinak khqi hy. 34 Cawh cekkhqi ing, "Thawh doena na thang awh van hu nu; nang ing awi kqawn law qee lawt hyk ti!" tina uhy. Anih ce ak chang na hqek uhy. 35 Anih hqek uhy, tice Jesu ing ang zaak awh anih ce sui nawh a huh awh, "Thlanghqing Capa ve nak cangnaak aw?" tina hy. 36 Ce ak thlang ing, "Anih ce a u nu, Bawipa? Anih ce kak cangnaak aham kqawn law lah," tina hy. 37 Jesu ing, "Tu awh amah ce hu hawh hyk ti; nang a venawh awi ak kqawn ve anih hawh ni," tina hy. 38 Cawh ce ak thlang ing, "Bawipa, cangna nyng," tina nawh bawk hy. 39 Jesu ing a venawh, "Awideng aham khawndeik awih law nyng, mikhypkhqi mikdai sak ham ingkaw mikdaikhqi mikhyp sak hamna," tinak khqi hy. 40 Cawh amik awm Farasi thlang pynoet ing ce ak awi ce aming zaak awh, "Ikaw? Kaimih awm kami mik hyp lawt nawh aw?" tina uhy. 41 Jesu ing, "Nami mik a hyp mantaw thawlhnaak am ta hly hlai uhyk ti, cehlai ka mi mik dai hy namiti adawngawh nami thawlhnaak ce awm hun hy," tinak khqi hy.

10 Jesu ing, "Awitak ka nik kqawn peek khqi, tuu chawmkeng awh lut kaana, ak chang benna kawng ak kai thlang taw, quk-ai ingkaw damiah na awm hy. 2 Tuu chawmkeng khuiawh kawng ak lut thlang taw tuukhaikung na awm hy. 3 Vawng chawmkeng ak qehkung ing anih aham chawh ce awng pehy, tuukhqi ingawm ak awi ce ngai pe uhy. A tuukhqi ce aming ming ing khy khqi qip nawh ceh pyi hy. 4 A tuukhqi boeih ce a ceh pyi coengawh, ami hai na maa pek khqi hy, a tuukhqi ing ak awi ce hat unawh a hu awh hqut uhy. 5 Thlakchang a hu awh ityk awh awm am bat hly uhy; ak awi ce a mami hat dawngawh, cen taak lat kawm uh," tinak khqi hy. 6 Jesu ing vawhkaw nyhtahnnaak awi ve kqawn pe hlaib hy, ak kqawn peek khqi awi ce am zasim thai uhy. 7 Cedawngawh Jesu ing cekkhqi venawh, "Awitak kanik kqawn peek khqi, kai taw tuu chawmkeng na awm nyng. 8 Kai hlanawh ak lawkhqi boeih taw quk-ai ingkaw damiah na awm uhy, cekkhqi ak awi ce tuukhqi ing am ngai pe uhy. 9 Kai taw chawmkeng na awm nyng; a u awm kai awh ak lut taw thaawngnaak hu kaw. Lut nawh cawn kaw, qam sahim awm hu kaw. 10 Quk-ai ingtaw quuk aham, him aham ingkaw hqe aham doeng nani a law hy; kai taw a mingmih ing hqinggaak ami taaknaak aham, khawzah na ami taaknaak aham law nyng. 11 Kai taw tuukhaileek na awm nyng. Tuukhaileek ing a tuukhqi aham a hqinggaak ce pehy. 12 Thlangvat taw tuu ak takung amni. Cedawngawh ngentang a law awh, tuukhqi ce hlah hlyt nawh cen taak khqi hy. Ngentang ing tuukhqi ce cui nawh a thek a zak na tahi. 13 Thlangvat taw thlangvat na a awm dawngawh tuukhqi ce centa hy, tuukhqi ce ak leek na am khai hy. 14 Kai taw tuukhai leek na awm nyng; ka tuukhqi ce sim nyng saw ka tuukhqi ingawm kai ce ni sim uhy – 15 Pa ing kai ni sim nawh kai ingawm Pa ce ka sim lawt amyihna, kai ing ka tuukhqi aham ka hqinggaak ce pe nyng. 16 Vawhkaw tuu ak khuiawh amak pa tuu ak chang awm ta hyn nyng. Cekkhqi awm haw law hainh kawng. Cekkhqi ingawm kak awi ce ngai kawm usuu, tuu qui oet, tuukhaikung pynoet doeng awm kaw. 17 Ka hqinggaak ka peek ak camawh ka Pa ing kai ni lungna hy, lawh tlaib hamna ka hqinggaak ka pek hly ak camawh. 18 U ingawm am ni qawt thai kaw, kamah a ngaih awh ni ka hqinggaak ce ka peek. Peek thainaak ce ta nyng saw lawh thainaak awm ta bai nyng. Vawhkaw awipeek ve Ka pa venawh kawng ni ka huuh hy," tinak khqi hy. 19 Ve ak awi awh ve Judahkhqi ce pek qu tlaib bai uhy. 20 Thlang khawzah ing, "qaai ta nawh qaw hawh saw na huh. Ikaw ham ak awi naming ngai peek?" ti uhy. 21 Cehlai thlakchanghqi bai ingtaw, "Ve ak awikhqi ve qaai ak ta ak awi amni. Qaai ing thlang a mik dai hly sak nawh nu?" ti uhy. 22 Jerusalem khaw awh Pumpeek Poei khawnghi ce pha nawh cetaw chickca tym na awm hy. 23 Jesu ce bawkim awh, Solomon a im hlip awh thoek ang qoe hy. 24 Cawh Judahkhqi ing a venna cun unawh, "Kaimih ve igyt di nu ngaihang tumna na ni taak khqi kaw? Khrin na na awm awhtaw ak leek na nik kqawn pek khqi," tina uhy. 25 Jesu ing, "Nik kqawn pek khqi nyng, cehlai ap cangna uhyk ti. Ka Pa ming ing kawpoek them ka saikhqi ing ka kawnglam ni sim sak khqi hawh hy. 26 Cehlai ka tuu na am awm unawh, ap cangna uhyk ti. 27 Ka tuukhqi ingtaw kak awi ce ngai uhy; cekkhqi ce sim nyng saw, ka hu awh bat uhy. 28 Kumqui hqinggaak ce a mingmih a venawh pe nyng, ityk awhawm am qeeng kawm uh; ka kut awh kawng u ingawm amni qawt kaw. (aiōn g165, aiōnios g166) 29 Cekkhqi ce ka kut awih anik pekung ka Pa taw, ik-oehi boeih boeih anglakawh bau ngai hy; ka Pa a kut khuiawh kawng cekkhqi ce ingawm am ni qawt kaw. 30 Kai ingkaw ka Pa taw pynoet ni," tinak khqi hy. 31 Cawh Judahkhqi ing amik khawngnaak ham lung ce cung tlaib uhy. 32 Cehlai Jesu ing cekkhqi venawh, "Pa a venawh kawng kawpoek kyi ik-oehi khawzah dang sak hawh nyng. Cek khui awhkaw ikawmyih khawboe ing nu nik khawng

ham naming cai?" tinak khqi hy. 33 Cawkaw kawpoek kyi them na sai ak camawh nik khawng usih am ti unyng, cehlai Khawsa na thekhanaak camawh ni, thlanghqingna na awm loei awh Khawsana nang saa qu camawh," tina uhy. 34 Jesu ing, "Na mimah a anaaawi ak khuiawh, 'Nangmih ve khawsakhqi na awm uhyk ti; ti nighth am qee qai nighth aw?" 35 Cekkhqi ce 'Khawsakhqi' tinawh ak khy awhtaw, a u a venawh aw Khawsa awi ce a law, Cakciim awi ce hqe aham ama awm dawngawh, 36 Pa ing amah aham qoe qoe na hoep nighth khawmdek awh a tyih law ce ikawmyihna aw namik poek? Cawhtaw lkawtih kai ing, 'Kai Khawsa Capa ni,' ka ti awh Khawsa ak kqawnseet ni nami ti? 37 Ka Pa a bi ce am ka bi awhtaw koeh nik cangna uh, 38 Cehlai Ka Pa a bi ce ka bi awhtaw, nangmih ing amnik cangna u tik seiawm Pa ak khuiawh kai awm nyng saw, kai ak khuiawh Pa awm hy, tice naming zaksim thainaak aham, kawpoek kyi ik-oehkhqi vetaw cangna lah uh," tinak khqi hy. 39 Cawh amah ce tu aham cai uhy, cehlai cekkhqi a kut khui awhkawng loet hy. 40 Cekcoengawh Johan ing maa na baptisma a peeknaak Jordan tui caqai na Jesu taw cet tlah hy. Ce a hun awh ce awm nighth 41 a venawh thlang khawzah cun law uhy. Cekkhqi ing, "Johan ing kawpoek kyi them am sai man hlai hy, Johan ing anih akawng anak kqawnkhqi boeih ve thym hy," ti uhy. 42 Ce a hun awh thlang khawzah ing Jesu ce cangna uhy.

11 Lazaru ak mingnaak thlang pynoet taw tlo hy. Anih taw Meri ingkaw a naa Martha a awmnaak Bethani khaw awhkaw thlang na awm hy. 2 Vawhkaw Meri vetaw ak tlo Lazaru a nanu, bawktui ing Bawipa ce syp nighth a Lusam ing a khaw ak that peekkung ce ni. 3 Cedawngawh cekqwai cingna ing Jesu ce awi cah hy ni, "Bawipa, nang ing na lungnaak thlang ce tlo hy," tina hy nihi. 4 Ce ak awi ce Jesu ing ang zaak awh, "Vawhkaw tlawnnaak ve thihsaak hly kawi am ni. Ve a tlownnaak ak camping Khawsa Capa taw kyihcahna awm kaw," tina qawi hy. 5 Jesu ing Martha cingna ingkaw a napa ce lungna hy. 6 Cehlai Lazaru ce tlo hy ti ang zaak awh, ce a hun awh khaw hih voei awmtaak hun hy. 7 Cekcoengawh a hubatkhi venawh, "Jerusalem na cet tlahi lhah u sih nyng," tinak khqi hy. 8 Cekkhqi ing, "Ikawmyihna cawngpyikung, tihhin ca awh ni Judahkhqi ing lung ing khawng aham ami ni teng ka ti, ceh ham nang cai bai nighth nu?" tina uhy. 9 Jesu ing, "Khawngi hypoet awh khawnoek paqhqa hlaihawm hy ka ti my? Ve khawmdek vang na ce awm nighth khaw a huh thai dawngawh, khawdai awh ak cet thlang taw am bah kaw. 10 Khaw amang dang dawngawh, khawmthan awh ni thlang ang bah hy," tinak khqi hy. 11 Ve ak awi ak kqawn boeih coengawh cekkhqi venawh, "Ni pyi Lazaru taw ipi hawh hy; cehlai cet nyngsaw thlang tlahi kawng nyng," tinak khqi hy. 12 A hubatkhi ing, "Bawipa, anih ce a iah awhtaw leek lawt bit kaw," tina uhy. 13 Jesu ing a thihnaak akawng ni ak kqawn hlai hy, a hubatkhi ing taw ih mailai ni ak kqawn namih hy, tina poek uhy. 14 Cedawngawh cekkhqi venawh ak zoei cana kqawn pek khqi tlahi hy, "Lazaru taw thi hawh hy. 15 Cawh am ka awm nangmih aham zeel nyng, cawh ni nangmih ing namik cangnaak hly" tinak khqi hy. 16 Cawh Thomas ing hubat ak changkhqi venawh, "Anih ing thihsaak aham, ningnih awm cet lawt u sih cet uh," tinak khqi hy. 17 Ami pha awhtaw, Lazaru ce phyi khuiawh khaw phlinyn awm hawh hy, tice Jesu ing sim hy. 18 Bethani khaw taw Jerusalem khaw awhkawng meng hih am hla hy. 19 A napa a thihs dawngawh Meri ingkaw Martha ce hloep aham thlang khawzah law uhy. 20 Jesu law hy tice Martha ing ang zaak awh, ak do na ce cet hy, Meri taw im awh awm hy. 21 Martha ing Jesu a venawh, "Bawipa, nang mah na awm mantaw, ka napa am thi voei. 22 Cehlai tuh awm Khawsa avenawh na thoeh a saqui ce ni pe kaw, tice sim nyng," tina hy. 23 Jesu ing a venawh, "Na napa ce tho tlahi kaw," tina hy. 24 Martha ing, khawngi dyt

nighth thawn tlahnaak tym a pha awhtaw, tho tlahi kaw, tice sim nyng," tina hy. 25 Jesu ing a venawh, "Kai taw thawhtlahnaak ingkaw hqjingga na awm nyng. Kai anik cangnaak thlang taw thi seiawm hqjingga kaw. 26 U awm hqjingga nighth kai anik cangnaak taw ityk awm am thi voel kaw. Ve ve nak cangnaak aw?" tina hy. (a10n g165) 27 Anih ing, "Oeih, Bawipa, nang taw Khrir, khawmdek awh ak law hly kawi Khawsa Capa ni, tice nik cangna nyng," tina hy. 28 Ce ak awi ce ak kqawn coengawh, cet nighth a naa Meri ce a venna khy hy. "Cawngpyikung law hawh hy, nang nik thoem hy," tina hy. 29 Meri ing ce ak awi ce ang zaak awh, ang tawnna tho nighth a venna cet hy. 30 Cawh Jesu ce khawk khuina lut hlani hy, Martha ing ang hqumnaak a hun awh ni a awm hyn hy. 31 Im awh Meri amik hloep Judahkhqi ing, tho hqoet nighth a ceh ce ami huh awh hqut uhy, phyi na ak kqah na cet vang, tina mihih tina poek uhy. 32 Meri ing Jesu a awmnaak hun ce pha nighth anih ce a huh awh, a khawking awh koep nighth, "Bawipa, nang na awm mantaw ka napa amak thi hly," tina hy. 33 Anih ang kqang ingkaw anih mi amik law hahih Judahkhqi ang kqang ce a huh awh, ak khuina kqang nighth kawsee hy. 34 "Hana nami soei?" tinak khqi hy. Cekkhqi ing, "Bawipa, law nawhtaw toek lah," tina uhy. 35 Jesu kqang hy. 36 Judahkhqi ing, "Toek lah uh, i ikawmyih aih na nu a lungnaak cel!" ti uhy. 37 Cehlai thlang vang ing, "Mikhyp ak qoei sakkung ve ak thlang ing anih ve ama thihnaak aham am sai hly thihs nighth hy voei nu?" ti uhy. 38 Jesu taw ak kawkhuiawh ak kawseet doena phyi ce pha hy. Ce a phyi taw luk kaww na awm nighth lungpei ing tleeng uhy. 39 "Lungpei ce thoeng uh, tinak khqi hy. Cehlai thlak thi a nanu Martha ing, "Bawipa, tuhaw a baw khqim hawh hy voei, phlinyn di hawh nighth," tina hy. 40 Jesu ing, "Nak cangnaak awhtaw Khawsa a boemangnaak hu kawp tinawh am ka ti nighth aw?" tina hy. 41 Cedawngawh lungpei ce thoeng pe uhy. Cawh Jesu ing hak toek nighth, "Ka Pa, kak awi ning ngaih pe tik saw zeel nyng. 42 Kak awi ning ngaih pe poepa hyk ti tice sim nyng. Nang ing kai ni tyi hyk ti tice vawhkaw ak dyi thlangkhqi ing amik cangnaak thai aham ve ak awi ve kqawn nyng," tina hy. 43 Ve ak awi ak kqawn boet coengawh, Jesu ing khawteh na, "Lazaru cawh law lhah," tina hy. 44 Cawh thlak thi a kut a khaw hih ing a zeen doena cawh law nighth, a haai awm hih ing a zeen kheop na awm saw, Jesu ing, "Hi ce hlam pe unawh ceh sak uh," tinak khqi hy. 45 Meri ak hqjingga law Juda thlang khawzah ing, Jesu a them sai ce ami huh awh, ak khanawh cangnaak ce ta uhy. 46 Cehlai thlang vang tloek ce Farasikhqi venna cet unawh Jesu ing them a sai ce kqawn pe uhy. 47 Cawh khawsoeih boeikhqi ingkaw Farasikhqi ing Sanhedrin ngawihcunnaak ce sai uhy. "Ikwai ni sai lah voei uh? Ve ak thlang ing kawpoek kyi ik-oehkhqi khawzah sai hawh hy. 48 Vemyihna ni lhah mantaw, thlang boeih ing cangna hawh kawm uh, cawh Rom thlangkhqi law kawm usaw ni tui ni khaw ve lo law hawh kawm uh," ti uhy. 49 Cawh, a mingmih anglakawh Kaiapha ak mingnaak thlang pynoet, ce a kum awh khawsoeih boei khyt na ak awm ing, "Ikwai awm am sim uhyk ti! 50 Rumpamp thlang a plawci naak anglakawhawh thlang pynoet a thihs nep bet hy tice am sim uhyk ti," tinak khqi hy. 51 Ve ak awi ve amah poek awh ap kqawn hy, ce a kum awh khawsoeih boei khyt na a awm amyihna Juda thlangkhqi ham Jesu thi kaw tice lamnaa na ak kqawn hawh ni, 52 ce a qam doeng ham am nighth ak plam Khawsa cakhqi ce cawi boeih nighth pynoet na a taaknaak ahamni. 53 Cedawngawh ce a syn awhkawng him aham teng hawh uhy. 54 Cedawngawh Jesu taw Juda thlang kqeng anglakawh ang dang qoeng na am cet voel hy. Qamkoh a venawh kaw ak awm Ephraim khaw a venawh cet nighth, cawh ce a hubatkhi mi awm uhy. 55 Judahkhqi a Loentak Poei a pha tawn awhtaw cehtaak Poei hlanih silh qu aham thlang khawzah ing khaw a qam awhkawng Jerusalem na ce cet uhy. 56 Cawh Jesu ce sui unawh, bawkim khuiawh dyih

unawh doet qu uhy, "Ikawmyihna nak poek? Poei awh am law hly naws nu?" ti uhy. 57 Cehlai khawsoeih boeikhqi ingkaw Farasikhqi ing, u ngawm Jesu ce a huh awhtaw, a mingmih a venawh kqawn pe naws, tu aham awi pe hyt uhy.

12 Loentak Poei a phanaak aham khaw kquk nyn a ngaih awh, Lazaru a thihnaak awhkawng a thawhnaak khaw Bethani ce pha hy. 2 Ce a khaw awh Jesu zoeksangnaa aham buh veelnaak sai pe uhy. Martha ce plawng a tho naws, Lazaru taw caboei kung awh anih ing ngawi hahih lawt hy. 3 Cawh Meri ing a phu ak tlo soeih nard bawktau boet oet lo naws Jesu a khaw ce a hloen coengawh a lusam ing thuut pehy. Cawh ce bawktau baw ing ipkhui ce zing khoep hy. 4 Cehlai hubat ak khuiawh kaw Juda Iskariot ak mingnaak thlang pynoet, Jesu zawih ham ak cai ing, am ngaih naws, 5 "Ikawtih vawhkaw bawktau ve zawi naws khawdeng hahqakhqi ama peek? Kumoet thaphu zah qoe law moe," tihy. 6 (Anih ing hahqakhqi poek tang tang naws ak kqawn awm amni, amah ce quk-ai na a awm dawngawh ni; tangka ak khoemkung na awm naws amah aham cawhkaw tangka ce haw na poepa hy.) 7 Jesu ing, "Kai a qawk viyh naak hly khawnghi simnaak hamma sai mei seh. 8 Hahqakhqi taw nangmih a venawh awm poepa kaw, cehlai kai taw nangmih a venawh am awm poepa kawng nyng," tina hy. 9 Jesu cawh awm hy tice Judahkhqi ing aming zaak awh law unawh, Jesu doeng huh ngaih awh am naws, thihnaak awhkawng ak tho Lazaru awm huh si ngaih unawh law uhy. 10 Cedawngawh khawsoeih boeikhqi ing Lazaru awm him hamna teng uhy; 11 Judah thlang khawzah ing a nih ce cangna unawh Jesu venna a mi ceh ak camawh. 12 A khawngawi nyn awh Poei awh ak law thlang kqeng ing Jesu taw Jerusalem na law hy tice za uhy. 13 Samtoe khyn unawh ak do na cet uhy. "Hosanna!" "Bawipa ming ing ak law taw zoseennaak awm seh!" "Israel Sangpahrang taw a zoseen seh!" tinawh khy uhy. 14 Jesu ing meqang ca ce hunawh ak khanawh ce ngawi hy, 15 "Aw Zion canu, koeh kqjh; toek lah, na Sangpahrang ce meqang awh ngawi kawmsaw law kaw," tinawh qee ce amyihna. 16 Ak cyk awhtaw a hubatkqi ing vawhkaw ik-oeikhqi ve am zasin thai uhy. Jesu ce zoeksang na a awm coengawh ni, anih awh ce vawhkaw ik-oeikhqi ve qee hyt na awm naws ve a ik-oeikhqi ve ami na sai peek hy, tice a ming zaksim hyn hy. 17 Lazaru ce phyi khuiawh kawng khy naws thihnaak awhkawng am thawh awh cawhkaw amik awm thlang kqeng ing awi ce anak khypyi poe uhy. 18 Thlang khawzah ing, cawhkaw kawpoek kyi ik-oeilh a sai ce aming zaak awh anih ce hah aman cet uhy. 19 Cedawngawh Farasikhqi ing, "Ikaw amni ti thai voel hawh ye, toek lah uh, khawmdek ing amah a hu kqut hawh ye vel!" ti uhy. 20 Poei awh Khawsa bawk aham ak cethkoi anglakawh Greek thlangkhqi awm awm lawt uhy. 21 Cekkhqi ce Kalili qam Bethsaida khaw awhkaw Philip a venawh law unawh, qeenaka thoeh uhy. "Jesu huh aham ngaih hlai unyng," tina hy. 22 Philip ing Andru a venna cet naws kqawn pehy, Cekcoengawh Andru ingkaw Philip ing Jesu a venawh kqawn pehy nih. 23 Jesu ing, "Thlanghqing Capa zoeksang na a awmnaak tym taw pha hawh hy. 24 Awitak kanlik kqawn peek khqi, camci ce dek awh tla naws ama thiawtaw, ak khawi khawina kawm saw; a thih mantaw khawzah na vui thaith hy. 25 U awm amah a hqjinggaak ak lungnaak taw plam kaw, ve khawmdek awh a hqjinggaak ce ak sawhnaak ingtaw kumqui hqjinggaak ce khoom kaw. (aiōnios g166) 26 U awm ka bi ak bi ingtaw ka hu awh a ni hqut aham awm hy; kai ka awmnaak awh ka tyihzawih ce awm lawt kaw. 27 Tuh kak kawlung khuihka hy, kaw kak kqawn lah voei? 'Ka Pa, ve atym khuiawh kawng ni hul lah? Amni, ve a dawngawh ni ve atym awh ve ka law hy. 28 Ka Pa, nang ming ce zoeksang lah," tina hy. Cawh khan benna kaw awi ing, "Zoeksang hawh

nyng, zoeksang tlaibai kawng nyng," tina hy. 29 Cawhkaw amik awm thlang kqeng ing aming zaak awh khawhum awi ni, ti uhy; thlang vang ingtaw khan ceityih ing awi kqawn pehy, ti uhy. 30 Jesu ing, "Vawhkaw awi ve nangmih a leeknaak ahamni, kai aham amni. 31 Tuhtaw khawmdek ve awideng aham awm hawh hy; Khawmdek boei ve hqek na awm hawh kaw. 32 Cehlai Khawmdek awhkawng kai ve tai na ka awm awh, thlang boeih ce ka venna dawk kawng nyng," tina hy. 33 Vemyihna ak kqawnnaak taw amah a thihnaak hly ceni ak kqawn ngaihnaak hy. 34 Cawh thlang kqeng ing, "Anaa awi awhtaw Khrish taw a poepa na awm kaw, tinawh za unyng, ikawmyihna nang ingtaw, 'Thlanghqing Capa taw tai na awm kaw,' na ti bai? Thlanghqing Capa ve a u nu?" tina uhy. (aiōnios g165) 35 Cawh Jesu ing cekkhqi venawh, "Nangmih ing vangnaak ve kawlhkalh ca ni nami taak hly hy. Thannaak ing a ni pha khqi hlanawh, vangnaak ak khuiawh cet lah uh. Thannaak ak khuiawh ak cet ing hana nu ka ceh tice am sim hy. 36 Vangnaak a cakhhqi na nami awmnaak thai aham, vangnaak nami taak tloek awh ce vangnaak ce ypna lah uh," tinak khqi hy. Awi ak kqawn coengawh, Jesu ing cehta naws, cekkhqi ce thuk tak khqi hy. 37 Vawhkaw kawpoek kyi themkhqi boeih ve a mingmih amik huh awh a sai peek coengawh awm a mingmih ing ap cangna bak bak hyn uhy. 38 Vetaw tawngtha Isaiah ing a nak kqawn ce a soepnaak hly hawh ni: "Bawipa, kaimih ak awi ve u ing ak cangnaak, u a venawh nu Bawipa a kut ce ang dang?" a ti ce. 39 Ve a dawngawh cekkhqi ing am cangna thai hy, tawngtha Isaiah ing: 40 Ami mik ce hyp sak naws ami kawlung ce hqam sak hy, Cedawngawh ami mik ing am hu thai unawh, Amik kawlung ingawm am zasim thai uhy, Ang voei na awm am voei thai uhy, Cemyih am mantaw kai ing qoei sak khqi kawng," tinawh ana qee hawh hy. 41 Isaiah ing Jesu a boeimangaak ce ana huh dawngawh vemyihna anak kqawn hawh hy. 42 Cawh thlang khawzah ingkaw sawikungkhqi ingawm cangna uhy. Cehlai Farasikhqi ce kqjh unawh, sinakawh khuiawh kawng ni hqek hau kaw, ami ti dawngawh amik cangnaak ce ap kqawn uhy; 43 Khawsa am kylhnaak anglakawh thlanghqing am kylhnaak ce ngaih bet uhy. 44 Cawh Jesu ing khy doena, "Thlang ing kai anik cangnaak awh, kai doeng amnik cangna naws, kai anik tyikung ce awm cangna hy. 45 Kai ce anि toek awh kai anik tyikung ce hu hy. 46 U awm kai anik cangnaak thlang ce than khuiawh ama awmnaak aham, kai taw khawmdek vangnaak aham law nyng. 47 U awm kak awi za naws am haana mai seiawm awi am deng nyng. Khawmdek awideng aham am law nyng, ak hul ahamni ka law hy. 48 Kai ni oelh naws kak awi amak do ak thlang awi ak dengkung ce awm hy; kak kqawn awi ing anih ce khawngi a dyt awh thawl sak kaw. 49 Kamah poek awh awi ap kqawn nyng, cehlai kai anik tyikung ing kak kqawn hly kawi ce nik kqawn sak hy. 50 Ak awipeek ing kumqu hqinggaak benna sawi hy tice sim nyng. Cedawngawh Pa ing anik kqawn sak khqi boeih ve dyng hy," tinak khqi hy. (aiōnios g166)

13 Loentak Poei a pha tawm ca awh, ve khawmdek cehta naws Pa a venna cehnaka atym ing pha law hawh hy, tice Jesu ing sim hy. Ve khawmdek awh ak awm amah ak thlangkhqi a boetnaak dy lung naak khqi hy. 2 Mybuh ami veel huili awh, Jesu ce thlang a kut awh tusak aham, Simon a capa Juda Iskariot ak kawh khuiawh Setan ing bibi pe hy. 3 Jesu ing, Pa ing a kutawh ik-oeilh boeih a peek ingkawh Khawsa venna voei tlaibai aham awm hawh hy tice sim hy; 4 cedawngawh buh ainaak awhkawng thet naws, a hi bai ce suut hy. Cekcoengawh thuutqunaak hi ce lo naws ak cawi ce zeen hy. 5 Cekcoengawh beihthuk awh tui hloen naws a hubatkqi khaw ce silh pek khqi hy, ak cawi a zeennaak hi ing ce thuut pek khqi hy. 6 Simon Piter a ven a pha awh, anih ing, "Bawipa, ka khaw sil vang nati naws nu?" tina hy. 7 Jesu

ing, "Ka sai ve tuh zasim hlan hyk ti, cehlai tuh kawng zasim bit kawp ti," tina hy. **8** Piter ing, "Amni, ka khaw ve ityk awh awm am sil kawp ti" tina hy. Cawh Jesu ing, "Am ka silh awhtaw kai ingqawi tuqunaak am awm voel kaw," tina hy. (**aiōn g165**) **9** Simon Piter ing, "Cawhtaw, Bawipa, ka khaw doeng kaana ka kut ingkaw ka lu awm sil law taw thoeih ti! tina hy. **10** Jesu ing, "Tui ak hlu ce ingtaw khaw doeng ni silh a ngoe hy; a pum boeih ce caih hawh hy; nangmih taw caih uhyk ti - nami cu boeih na taw am caih uhyk ti," tina hy. **11** (Amah ak zawi hly a sim awh, 'Nami cu boeih am caih uhyk ti' tina hy.) **12** A mingmih a khaw ce a silh peek boeih coengawh, hi ce lo nawh ang ngawihnaak na cet tlaih hy. Cekkhqi venawh, "Ka sai law ce namik zasim hawnu?" **13** Nangmih ing kai ve, 'Cawngpyikung,' ingkaw 'Bawipa' ni tina uhyk ti, namik kqawn amyihna thym hy, cemiyihna awm nyng. **14** Tuh nami Bawipa ingkaw cawngpyikung ing nangmih a khaw ce ni silh law pek khqi nyng, nangmih ingawm pynoet ingkaw pynoet a khaw ce nami silh aham awm lawt hy. **15** Nangmih a venawh ka sai law hawh amyihna nangmih ing nami sai aham lam ce nim huh khqi hawh nyng. **16** Awitak ka nik kqawn peek khqi, boei anglakawh tyiizawih am bau hy, ak tyikung anglakawh ceityih awm am bau hy. **17** Tuh vemyihkhqi ve sim hawh uhyk ti, sai lah uh zoseennaak hu kawm uk ti. **18** Ve ve nangmih boeih kak kqawn amni; kak tyh thlangkhqi ce kamah ing sim nyng. Ve ak awi ve a soep aham awm hy: 'Ka buh anik ai pyi ing kak khan awh a khaw thlek law hawh hy,' a tice. **19** Vemyihkhqi a pha law hlan awh nik kqawn law pek khqi oepchoeh nyng, cawh ni vemyihkhqi a awm awh kai ve anih ni, tice na miik cangnaak hly. **20** Awitak kanik kqawn peek khqi, kai ing ka tyih thlang ak do taw kai anik do na awm nawh; kai anik do thlang taw kai anik tyikung ce ak do na awm hy," tinak khqi hy. **21** Ve ak awi ak kqawn boeih coengawh, Jesu ing ngaih kyi doena, "Awitak kanik kqawn peek khqi, nangmih ak khuiawh kaw thlang pynoet ing kai ve thlang nim tu sak kaw," tinak khqi hy. **22** A hubatkhqi ing, a u nu ak kqawn ngaihnaak hy voei, ti unawh pynoet ingkaw pynoet toek qu uhy. **23** A mingmih ak khuiawh kaw thlang pynoet, Jesu ing a lungnaak ce, a venawh caboei awh koep hy. **24** Simon Piter ing cawkaw ak koep hubat a venawh, "Kaw nu ak kqawn ngaihnaak, doet lah," tina hy. **25** Jesu a venawh ak koep ing, "Bawipa, a u nu?" tinawh doet hy. **26** Jesu ing, "Kai ing phaihpi beeii awh chum nawh ka peek ak thlang ce," tina hy. Cekcoengawh phaihpi ce beeii awh chum nawh, Simon a capa Juda Iskariot ce pehy. **27** Juda ing phaihpi ce a do awh ak kaw khuiawh Setan ce kun hy. Cawh Jesu ing, "Na sai hly kawi ce angtawn na sai," tina hy. **28** Buh ainaak awh ak ngawikhqi u pynoet ingawm, kawtih Jesu ing cemiyihna a tinaak hy voei, tice am sim uhy. **29** Judah ce tangka ak khoemkung na a awm dawngawh, Poei awhkaw aham ik-oeih pynoet oet tlaih aham kqawn pe namih hy, am awhitaw hahqakhqi venawh ik-oeih peek aham kqawn pe namih hy, tinawh a vang ingtaw poek uhy. **30** Judah ing phaihpi ce a lawh coengawh, cawn pahoei hy. Cawh khaw than hawh hy. **31** Anih ce a ceh coengawh, Jesu ing, "Tuh thlanghqing Capa taw zoeksang na awm hawh hy, Khawsa awm anih awh zoeksang na awm hy. **32** Khawsa ce anih awh zoeksang na a awm awhtaw, 'Khawsa ing Capa ce amah awh zoeksang lawi kaw, anih ce zoeksang pahoei kaw. **33** Ka cakhqi, nangmih a venawh khawqyt am awm voel hawh kawng nyng. Nangmih ing ni sui kawm uk ti, cehlai Judahkhqi venawh kak kqawn peek hawh amyihna, tuh nangmih a venawh nik kqawn pek khqi nyng: Kai ka cehnaak awh nangmih am law thi kawm uk ti. **34** Awipeek thai nangmih a venawh ni pek khqi nyng: Nangmih pynoet ingkaw pynoet lung qu na lah uh. **35** Nangmih pynoet ingkaw pynoet naming lung qunaak awh ni, thlang boeih ing kai a hubat tinawh a ni sim hly khqi hy," tinak khqi hy. **36** Simon Piter,

"Bawipa, hana nu na ceh kaw?" tina hy. Jesu ing, "Kai ka cehnaak awh am law hly thai hyk ti, cehlai a hu na law kawp ti," tina hy. **37** Piter ing, "Bawipa, Ikwatih tuh am ka law thai kaw? Nang aham ka hqingnaak awm pe nyng," tina hy. **38** Cawh Jesu ing, "Kai aham na hqingnaak nak pe hly tang nu? Awitak kanik kqawn peek, ai ang khawng hlan awh thum voei nik khaawng kawp ti," tina hy.

14 "Naming ngaih kohi kyi sak uh, Khawsa ypnua unawh taw kai awm ni ypnua uh. **2** Ka Pa awh awmnaak hun khawzah awm hy; ama awm mantaw nik kqawn hly pek khqi hawh nyng. Nangmih aham hun ak sai na cet hly nyng. **3** Nangmih aham hun ka sai coengawh ka awmnaak awh nangmih awm nami awmnaak thai ham, nangmih ak lo na voei law tlaih kawng nyng. **4** Ka cehnaak hly hun ce sim uhyk ti," tinak khqi hy. **5** Thomas ing a venawh, "Bawipa, hana nu na ceh hly, tice am sim unyng, ikawmyihna lam ce kami simnaak kaw?" tina hy. **6** Jesu ing, "Kai taw lam ingkaw awitak ingkaw hqingnaak na awm nyng. Kai am kaataw u awm Pa aven am cet thai kaw. **7** Kai nami ni sim mantaw, ka Pa awm sim voei uk ti. Tuhaw amah ce sim unawh, hu hawh uhyk ti," tina hy. **8** Philip ing, "Bawipa, Pa ce nim huh khqi lah, cawhtaw kaimih aham khoeck bit kaw," tina hy. **9** Jesu ing, "Philip, khawqyt ka ni awm pyi khqi coengawh awm, kai ve nani sim hlan nawh nu? U awm kai anik hu taw Pa ce hu hawh hy. Ikawmyihna, 'Pa ce nim huh lah,' na ti? **10** Pa ak khuiawh kai awm nyng saw, kai ak khuiawh Pa awm hy, tice am na sim nawh nu? Nangmih a venawh awi kak kqawn law ve kamah poek ing ap kqawn nyng. Kai ak khuiawh ak awm Pa, ing ni vemyihkhqi ve a sai hy. **11** Pa ak khuiawh kai awm nyng saw kai ak khuiawh Pa awm hy ka tive cangna lah uh; am awhtaw kawpoek kyi ik-oeihkhqi kangna awm cangna lah uh. **12** Awitak kanik kqawn peek khqi, u awm kaiawh cangnaak ak ta taw kai ing ik-oeih ka saikhqi ve sai lawt kaw. Pa venna kai ta ceh aham a awm hawh dawngawh, vemyihkhqi anglakawh ak bau ngaikhqi awm sai thai kawm uh. **13** Capa ing zoeksangnaak ce Pa a venna a khynnaak thai ham, kamp ming ing nami thoeh law saqui ce ni pek khqi kawng. **14** Kang ming ing ikaw awm nami thoeh law awhtaw, sai law kawng nyng. **15** Kai nami ni lungnaak awhtaw, kak awipeek ve ngai kawm uk ti. **16** Kai ing Pa doet kawng nyng saw, anih ing nangmih a venawh a poepa na ak awm hly ngaihqep sakkung- (**aiōn g165**) **17** awitak Myihla ce ni pek khqi kaw. Khawmdekk ingtaw anih ce am do thai hy, am hu nawh sim awm am sim hy. Cehlai nangmih ingtaw anih ce sim uhyk ti, nangmih a venawh anih ce awm nawh, nangmih ak khuiawh awm kaw. **18** Nangmih ce cadahkhqi amyihna amni ceeltaah khqi hyt kawng, nangmih a venawh kai law kawng nyng. **19** Loyt a awm hlanwan, khawmdekk ing kai ce amni hu voel qoe kaw, cehlai nangmih ingtaw kai ce ni hu kawm uk ti. Kai ka hqing ak caming nangmih awm hqing lawt kawm uk ti. **20** Ce nyn awhtaw ka Pa ak khuiawh kai awm nyng saw, kai ak khuiawh nangmih awm u hyk ti, nangmih ak khuiawh kai awm nyng, tice sim kawm uk ti. **21** U ingawm kak awipeek ce khoem nawh ang ngai awhtaw, anih cetaw kai anik lungnaak thlang ni. Kai anik lungnaak thlang cetaw ka Pa ingawm lungna lawt kaw, kai ingawm anih ce lungna kawng nyng saw a venawh dang pe kawng nyng," tina hy. **22** Cawh Juda (Iskariot amni) ing, "Bawipa, Ikwatih kaimih a venawh dang nawh khawmdekk a venna taw am nang dang kaw?" tina hy. **23** Jesu ing, "U ingawm kai ani lungnaak awhtaw, ka cawngpyinaak ve ngai kaw. Ka Pa ing anih ce lungna kaw, law kawng nih nyng saw anih ce awmnaak im na hawna kawng nih nyng. **24** U awm kai ama nik lungnaak ingtaw, ka cawngpyinaak ve am ngai ti kaw. Vawhkaw awi nangmih ing naming zaak ve kamah a koe amni, kai anik tyikung Pa ak awi ni. **25** Nangmih mi ka awm hui awh vawh ve awi kqawn law nyng. **26** Cehlai ka

Pa ing kai ang ming ing a tyih law hly kawi ngaihqep sakkung, Ciim Myihla ing nangmih ce ik-oehi boeih ni cawngpyi khqi kaw, nangmih a venawh kak kqawn lawkhqi boeih ce ni sim sak khqi tlahi kaw. 27 Ngaihqepnaak nami venawh ceh ta nying, kamah a ngaihqepnaak ni pek khqi nying; khawmdtek ing anii peek khqi amyihsna amni pek khqi nying. Namik kawlung koeh ly uh, kqih awm koeh kqih uh. 28 'Cet nying saw nami venna voei law tlaih kawng' ka tice za hawh uhyt ti. Kai nami ni lungnaak awhtaw, Ka Pa a venna ka ceh hly ve nami ym ham awm hy, Pa taw kai anglakawh bau khpoet hy. 29 Ce ik-oehi a law hlanawh lammaan na nik kqawn pek khqi nying, cawh ni a law awh namik cangnaak hly. 30 Nangmih a venawh awi khawzah ap kqawn hly voel nying, kawthi ve khawmdtek boei ve law hawh kaw. Anih ing kai ikawpna awm amni tina thati ti kaw. 31 Cehlai kai ing Pa lungna nying saw ka Pa ing awi ani peek amyihsna ni ik-oehi ka sai tice khawmdtek ing a sim ham awm hy. "Law uh, cet hlah u sih," timak khqi hy.

15 Kai taw misur kung tang tang na awm nying saw, ka Pa taw dum ak takung na awm hy. 2 Kai awh ak thaih amak qah a baaikhqi boeih ce hlek hy, kai awh ak thaih ak qahkhqi boeih cetaw, qahnaak khpoet aham, a baai ak changkhqi ce hlyn pehy. 3 Nami venawh kak kqawn awi ak caming nangmih taw ciim hawh uhyt ti. 4 Kai awh awm poe lah uh, nangmih awh awm poe lawt kawng nying. A baai ce a kungawh ama awm awhtaw amah awh amang qah thai amyihsna, nangmih awm kai awh amna mi awm awhtaw am qah thai kawm uk ti. 5 Kai taw misur kung na awm nying; nangmih taw a baaikhqi na awm uhyt ti. U awm kai awh awm poe nawh anih awh kai awm ka awm awhtaw, ak thaih khawzah qah kaw; kai am kaa taw na mimah poek awh ikawm am sai thai kawm uk ti. 6 Uawm kaiawh ama awm awhtaw, anih cetaw a baai amyihsna khawngna awm kawmsaw, koh kawmsaw, maiawh phum kawm usaw mai ing ui kaw. 7 Kaiawh awm unawh kak awikhqi ve nangmih aw awm awhtaw, nami ngaihkhqi boeih ce thoeh lah uh, nami ham sei peekna awm kaw. 8 Ak thaih khawzah qah unawh ka hubatna nami awmnaak ak caming Pa ce zoeksangnaakna awm hy. 9 Pa ing kai ani lungnaak amyihsna, nangmih ce ni lungnak khqi lawt nying. Kai a lungnaak awh awm poe lah uh. 10 Kak awipeekkhqi ve naming ngai awhtaw, kai ing Pa ak awipeekkhqi ngai nying saw a lungnaak awh ka awm poe lawt amyihsna, kai a lungnaak awh awm poe lawt kawm uk ti. 11 Nangmih awh ka zeelnaak ce awm nawh nangmih a zeelnaak ce a soepnaak aham, ve ve ka nik kqawn peek khqi. 12 Kai ak awipeek taw ve ni: kai ing ka ni lungnaak khqi amyihsna nangmih pynoet ingkaw pynoet lungqu na lah uh. 13 Thlang ing a pyikhqi hamna a hqingnaak dy a peek lungnaak anglakawh ak bau lungnaak am awm voel hy. 14 Kak awipeek ve nami sai awhtaw, nangmih taw kai a pyikhqi na awm uhyt ti. 15 Tyihzoeihkhqi amni tinak khqi voel qoe kawng, tyihzawih ingtaw a boeipa a bibi ce am sim hy. Cedawngawh kai ing ka pyikhqi ni tinak khqi hawh nying, kawthi ka Pa a venawh dang law sak hawh nying. 16 Nangmih ing kai amnik tyk uhyt ti, kai ing ni nangmih ka nik tyk khqi, cet u tiksaw – a poepana ak cak ak thaih nami qahnaak ahamni caksak khqi nying. Cawh nangmih ing kai ang ming ing nami thoeh saqui ce Pa ing ni pek khqi bit kaw. 17 Ve e kai ak awipeek ni: pynoet ingkaw pynoet lung qu na lah uh. 18 Khawmdtek ing nangmih ce anii sawhnaak khqi awhtaw, kai ni lammana ani sawhnaak tice na mik kawh khuiawh sim uh. 19 Khawmdtek a koe na nami awm mantaw, a koe na nami awm a dawngawh, ni lungnak khqi kaw. Cehlai khawmdtek a koe na am awm uhyt ti, khawmdtek awhkawng ka nik ty khqi na awm utik saw khawmdtek ing nangmih ce ni sawhnaak khqi hy. 20 Nangmih a venawh kak kqawn law awi ce sim uh; 'A boei anglakawh tyihzawih am bau hy,' a ti ce. Cekkhqi ing kai a

mini thenaak awhtaw, nangmih awm ni thekhanak khqi kaw. Kai a cawngpyinaak ami hqut awhtaw, nangmih a cawngpyi naak awm hqut lawt kawm uh. 21 Kai ang ming awh cemiyhna nangmih ce ni thekha nak khqi kaw, kawthi a mingmih ing kai anik tykung ce am sim uhy. 22 Cekkhqi venna am cet nying saw ve ak awi ve am kak kqawn peek mai mantaw, am thawlhlai voei uh. Cehlai, tuh taw a thawlhnaka awh loet na am awm voel hy. 23 Kai anik sawhnaak thlang taw, ka Pa awm ak sawhnaak thlang na awm hy. 24 U ingawm ama sai khawi ce kai ingawm am ka sai mai mantaw, am thawlhlai voei uh. Cehlai kawpoek kyi ik-oehi ak saikhqi ce ami huh awh awm, kai ingkaw ka Pa ve ni sawh na uhy. 25 Cehlai ningnih a anaa awi awh a qee amyihsna, 'Ikaw kawng am mai awh kai ni sawh na uhy,' tice a soepnaak ham ni. 26 Pa a venawh kawng nangmih a venawh ka tyih hly kawi, ngaihqep sakkung, Pa a venawh kawng ak cawn law awitak Myihla ce a law awh, anih ing kai akawng ce ni sim sak khqi kaw. 27 Nangmih awm ak cyk ca awhkawng kai a venawh nami awm poe a dawngawh, kai akawng ce thlang sim sak lawt kawm uk ti.

16 Am namik thaseethaak aham, ve ak awi ve kqawn law nying. 2 Sinakawk khuiawh kawng nangmih ce ni hqek khqi kaw; Khawsa bibinaak aham nani nangmih ve ka ni him khqi, tinawh ak poek thlangkhqi a tym pa law kaw. 3 Pa ingkaw kai ce a mami sim ak camawh cemiyhna ce sai kawm uh. 4 Ce a tym a pha lawawh nangmih ing, kai ing nik kqawn law pekkhqi hawh hy, tice nami simnaak aham kqawn nying. Nami venawh ka awm hyn a dawngawh, ak cykca awh vek awi ve amnik kqawn pek khqi nying. 5 Tuh taw kai anik tykung a venna cet hly hawh nying, u ingawm, 'Hana na ceh kaw?' amni tina uhyt ti. 6 Vemyihkhqi kak kqawn ak camawh namik kaw seet sak mat uhyt ti. 7 Cehlai awitak ka nik kqawn peek khqi: nangmih nami leeknaak ahamni kai ka ceh hly. Kai am ka ceh mai mantaw ngaihqep sakkung ce nangmih a venna am law ti kaw; cehlai kai ka ceh mantaw anih ce nangmih a venna tyi law kawng nying. 8 Anih a law awh, anih ing ve khawmdtek thawlhnaka, dyngnaak ing awiceknak ce ni sim sak khqi kaw. 9 thawlhnaka awh, thlangkhqi ing kai ve amnik cangsui uhy; 10 dyngnaak benawh, Pa a venna ka ceh aham awm hy; cawh nangmih ing kai ve amni hu voel qoe kawm uk ti; 11 awidengnaak benawh, ve khawmdtek boei taw tuh awm bo sak na awm hawh hy. 12 Nami venawh awi kqawn kai kawhzaah ta hyng, cehlai tuhawh noeng hly thai hlan utik saw khawzah ap kqawn nying. 13 Cehlai anih, Myihla awitak, a law awh, awitak boeih ak khuina nangmih ce ni sawi khqi kaw. Anih ing amah poek awh awi ap kqawn ti kaw; ang zaak doeng ce ni ak kqawn law hly, ak law hly kawi ce awm kqawn law kaw. 14 Anih ing kai ni zoeksang kaw; ka hamna thlang lo kawm saw, nangmih ce ni sim sak khqi kaw. 15 Pa ing a taakkhqi boeih boeih taw kai a koe hawh ni. Ceni, 'Ka hamna thlang lo kawm saw, nangmih ce ni sim sak khqi kaw,' ti nawh kak kqawn hy. 16 Kawlkhalka a awm coeng awhtaw amni hu qoe voel kawm uk ti, cehlai kawlkhalka a awm coengawh ni hu tlaih kawm uk ti," tina hy. 17 A hubat ak khui awhkawh thlang a vang ing, 'Ikaw ham nu, 'kawlkhalka a awm coengawh amni hu qoe voel kawm uk ti, cehlai kawlkhalka a awm coengawh ni hu tlaih kawm uk ti, Pa a venna ka ceh aham a awm a dawngawh,' a ti hy voei? 18 "Kawlkhalka," a tice ikaw a ti ngaihnaak hy voei nu? Ak kqawn ve am zasim unyng," ti uhy. 19 Ve ak awi ve sim aham ngaih uhy tice Jesu ing a sim awh, cekkhqi venawh, "Kawlkhalka a awm coengawh amni hu voel kawm uk ti, cehlai kawlkhalka a awm coengawh ni hu tlaih kawm uk ti," ti nawh kak kqawn ce namiamah doet qu uhyt ti my? 20 Awitak ka nik kqawn peek khqi, khawmdtek ve a zeel awh, nangmih taw qung ang kqap kawm u tiksaw khy ang kqang kawm uk ti. Namik kaw se kaw, cehlai nangmih ak sawseethaak

ce zeelnaak na thoeng kaw. **21** Nu ing ca a taak awh, a tym ing a pha ak camawh tlawh pehy, cehlai naaca a awm coengawh taw, khawmdek awh naasen pynoet a thang hawh a dawngawh a zeel aih awh a khuikhanaakkhqi ce hilh boehi hy. **22** Ceamyihna nangmih awm lawt kawm uk ti: tuh nangmih namiik kaw se hy, cehlai nangmih ce ni huk khqi tlaih bit kawng, cawh zeel kawm uk ti, nangmih a zeelnaak ce u ingawm am ni qawt khqi kaw. **23** Cawh ka venawh ikaw awm am thoeh law qoe voel kawm uk ti. Awitak ka nik kqawn peek khqi, kang ming ing nami thoeh saqui ce ka Pa ing ni pek khqi kaw. **24** Tuh dy kai ang ming ing ikawh awm thoeh hlan uhk ti. Thoeh lah uh, hu kawm uk ti, nami zeelnaak ce soep kaw. **25** Nyhtahnaak ing awi kqawn law hlai nyng, vemyih ak awi hawnnaak voel kaana zaksim zoei na Pa akawng kqawnnaak a tym ce pha law hawh hy. **26** Cawh nangmih ing kai ang ming ing ik-oeih thoeh kawm uk ti. Nangmih ang zyng na Pa a venna thoeh law kawng nyng, ti kqawn ngaihnaak amni. **27** Cemiyh amni, kai ni lungna unawh, kai ve Khawsa venawh kawng law hy tinawh nami nik cangnaak ak camawh Pa amah qoe ing, nangmih ce ni lungnak khqi hy. **28** Kai taw Pa a venawh kawng ve khawmdek awh law nyng; tuh khawmdek ve cehta kawng nyng saw Pa a venna voei tlaih kawng nyng," tina hy. **29** Cawh Jesu a hubatkhqi ing, "Nyhtahnaak a paa kaana awi ak caih kqawn law hawh hyk ti. **30** Nang ing lk-oeih boeih boeih sim hyk ti, u ingawm awi doet aham am ngoe voel ti kaw, tice sim hawh unyng. Ve ak caming Khawsa venna kawng law hy, tice nik sang sak khqi hawh hy," tina uh. **31** Jesu ing hlat khqi nawh, "Tuhtaw cangna hawh uhk ti my? **32** Ngai lah uh, a tym pha law kaw, tuh pha law hui hly, ce hyn a pha lawawh tav nami im imna cet boeih kawm uk ti saw, kamah doeng ni hlah kawm uk ti; cehlai Pa ka venawh a awm ak camawh kamah doeng am awm nyng. **33** Kai awh ngaihqepnaak nami taaknaak thai aham, vekkhqi ve nik kqawn pekkhqi hawh nyng. Ve khawmdek awh kyinaak hu kawm uk ti. Cehlai na mím thin caksak uh! Kai ing khawmdek noeng hawh nyng," tina hy.

17 Jesu ing ve ak awi ak kqawn coengawh, khan benna mang nawh cykcah hy: "Ka Pa, a tym ing pha law hawh hy. Na Capa zoeksang lah, Capa ing nang ani zoeksangnaak a ham. **2** Ceamyihna thlang boeih boeih ak khanawh saithainaak na peek ce, a venawh na peek thlang boeih kumqui hqinqnaak a peek naak thai ham. (aiōnios g166) **3** Ve ve kumqui hqinqnaak ni: nang Khawsa doeng ingkaw na tyih Jesu Khrish sim ve. (aiōnios g166) **4** Nang ing sai ham nani peek bi bi ce kak coengnaak ak caming khawmdek awh nang ming ce zoeksang hawh nyng. **5** Aw ka Pa, khawmdek a syn hlanawh na venawh zoeksangnaakna ka awm ce, tuhawh namah qoe ing ni zoeksang lah. **6** Nang ing khawmdek khui awhkawng ak cawn nani peek khqi venawh nang ming dangsak hawh nyng; amingmih taw na koe na awm unawh, nang ing nani peekkhqi na awm uh; amingmih ing nak awipek ngaih uh. **7** lk-oeih nani peekkhqi boeih ce nang a venawh kaw ni tice tuh sim hawh uh. **8** Nang ing nani peek awikhqi ce cekkhqi venawh pe nyng saw a mingmih ing do uh. Kai ve nang a venawh kawng ni a law, tice ak ceet cana sim hawh uh, nang ing ni a tyih ti awm cangna hawh uh. **9** A mingmih aham cykcah nyng. Khawmdek aham am cykcah nyng, cehlai nang ing nani peek thlangkhqi hamna ni kak cykcah, na koena awm unawh. **10** Kai ing ka taakkhqi boeih ce nang a koe ni, nang ing na taakkhqi boeih awm nang a koe ni. A mingmih awh zoeksangnaak ce ka venawh awm hy. **11** Khawmdek awh khawqyt am awm voel kawng, cehlai a mingmih taw khawmdek awh awm hyn kawm uh, kai taw nang a venna law hawh kawng nyng. Ka Pa Ciimcaih, nang ming saithainaak ing a mingmih ce chungdah khqi lah – ningnih pynoet na ni awm amyihna a mingmih awm pynoet na

ami awmnaak thai aham. **12** Vekkhqi mi ka awm awh, nang ing nani peek ming ing a mingmih ce chung ak dah khqi nyng saw a nep cana khoem nyng. Cak Ciim a soepnaak aham, ak qeng thlang pynoet ti kaa taw, pynoet awm am qeng ti kawm uh. **13** Tuh nang a venna law hly hawh nyng, cehlai ve khawmdek awh ka awm hyn awh, kai a zeelnaak ce a mingmih ak khuiawh ak be na ami taaknaak thai aham, vekkhqi ve kqawn nyng. **14** Nak awi ce a mingmih a venawh pe hawh nyng, kai khawmdek a koena am ka awm amyihna, a mingmih awm khawmdek a koena a mami awm a dawngawh, khawmdek ing a mingmih ce sawh nak khqi hawh hy. **15** Khawmdek awhkawng ak chang na a mingmih ce khyn valh aham am cykcah nyng, cehlai them che ak khuiawh kawng a mingmih ce chungdah ahamni kak cykcah. **16** Kai khawmdek a koena am ka awm lawt amyihna, a mingmih awm khawmdek a koena am awm uh. **17** Awitak ing a mingmih ce ciimcaih sak lah; nak awi taw awitak ni. **18** Khawmdek na nang ing nani tyih amyihna, kai ingawm a mingmih ce khawmdek awh tyi khqi nyng. **19** A mingmih aham kamah ingkaw kamah ciim qunyng, a mingmih awm ami ciim lawt ham awm hy. **20** A mingmih aham doeng am cykcah nyng. A mingmih ing awi amik khypyi ak camawh ak cangnaak hly kawi thlangkhqi ham awm cykcah nyng. **21** Ka Pa, kai ak khuiawh nang awm tiksaw, nang ak khuiawh kai ka awm amyihna, a mingmih pynoet na ami awmnaak thai aham cykcah nyng. Nang ing kai ni tyi hyk ti tice khawmdek ing cangna thai hawh ningnih kak khuiawh a mingmih ami awmnaak thai aham cykcah nyng. **22** Nyngnih pynoet na ni awm amyihna a mingmih awm pynoet na ami awmnaak aham, nang ing nani peek zoeksangnaak ce a mingmih a venawh pe khqi nyng. **23** A mingmih ak khuiawh kai awm nyng kai ak khuiawh nang awm hy. Nang ing kai ni tyi hawh kai nani lungnaak amyihna a mingmih awm lungna hyk ti tice khawmdek sim sak aham a mingmih ce pynoet na coeng sak lah. **24** Ka Pa, nang ing nani peekkhqi ve, nang ing khawmdek a syn hlanawh ni lungna hawh nani peek kai a boeimangnaa ce huh sak aham, kamah ka awmnaak awm awm sak lawt aham ngaih nyng. **25** Ak dyng ka Pa, khawmdek ing nang ce amni sim seiawm, kai ing nang ce ni sim nyng, nang ing ni tyi hyk ti tice a mingmih ing sim hawh uh. **26** A mingmih a venawh nang ming ce khypyi hawh nyng, nang ing kai nani lungnaak ce a mingmih a venawh awm hawh kamah qoe ce a mingmih a venawh ka awm thainaak aham, nang ming ce khypyi hyn kawng nyng," tinawh cykcah hy.

18 Jesu ing ak cykcah boet coengawh, a hubatkhqi mi Kidron zawi vang benna cet uh. Zawi vang benna olive dum awm nawh, ce ak khuiuna a hubatkhqi mi lut uh. **2** Ce a hun awh Jesu ing a hubatkhqi mi ami ceh khawi a dawngawh, amah thlang a kut awh ak peekung Juda ing a hun ce sim hy. **3** Cedawngawh Juda ing khawsoeih boeikhqi ingkaw Farasikhqi venawh kawng qalkapkhqi ingkaw ukkung thlang vang ce dum khuiuna law pyi khqi hy. Cekkhqi ing maihchoei, mai-im ingkaw caikhqi ce pawm unawh law uh. **4** A venna ak pha law hly kawi them khqi ce a sim a dawngawh, Jesu ing cet hawh cekkhqi ce doet hy, "U aw nami sui?" tinak khqi hy. **5** Cekkhqi ing, "Nazareth Jesu" tina uh. Jesu ing, "Kai ni," tinak khqi hy. (Cawh thlang a kut awh amah ak peekung Juda awm cawh dyi hy. **6** Jesu ing, "Kai ni," a tiaak khqi awh ami hu na theohi unawh dek na khoep uh. **7** Cekcoengawh, "U aw nami sui?" tinak khqi tlaih bai hy. Cekkhqi ing, "Nazareth Jesu," tina bai uh. **8** Jesu ing, "Kai ni ni tinak khqi hawh nyng. Kai nami ni sui awhtaw vekkhqi ve ceh sak khqi," tinak khqi hy. **9** Nang ing nani peekkhqi pynoet awm am qeng sak nyng," tinawh ak kqawn awi ce a soepnaak aham vemyihna tina hy. **10** Cawh Simon Piter ing, ak cimca ce lo hawh, khawsoeih boei soeih a tyihzawih

ang haa ce zek pe hlak hy. (Ce a tyihzawih thlang ang ming taw Malka ming na hy. 11 Jesu ing Piter nace, "Nak cimca ce sapang khuiawh chan; Ka Pa ing ani peek boet ce am ka aw hly nawh nu," tina hy. 12 Cawh qalkapkhqi, qalkap boeikhqi ingkaw Juda ukkungkhqi a tyihzawihkhqi ing Jesu ce tu uhy. Ami pin coengawh, 13 Anna venna ceh pyi lamma uhy, anih cetaw ce a kum awh khawsoeih boei khyt na ak awm, Kaiapha a se na awm hy. 14 Kaiapha cetaw, thlang khawzah thihi anglakawh thlang pynoet a thihi nep bet hy, tinawh Judakhqi venawh ak kqawn peekkung ceni. 15 Simon Piter ingkaw ak chang hubat pynoet ing Jesu ce a hu awh hquy hy nih. Cawhkaw hubat cetaw khawsoeih boei khyt ing sim qu hy nih, cedawngawh anih cetaw Jesu ing khawsoeih boei khyt a ipkhui kawngmana lut hy nih. 16 Cehlai Piter cetaw vawng chawmkeng awh awm hyt hy. Ak chang hubat, khawsoeih boei khyt ing anik sim qu ce hlat law tlaih nawh, vawng chawmkeng aq qehkung nuca ing ce voem qu hy nih, cawh Piter awm vawng khuiua lut lawt hy. 17 Chawmkeng qehkung nuca ing Piter nace, "Nang awm a mingmih a venawh paa lawt hyk ti?" tina hy. Anih ing, "Kai amni," tina hy. 18 Khaw a ding a dawngawh, ukkungkhqi a tyihzawihkhqi ing mai tih unawh mai ce aawm uhy. 19 Cawh khawsoeih boei khyt ing Jesu ce a hubatkhy mi a cawngpyinaak akawngkhqi ce doet hy. 20 Jesu ing awi hlat pe nawh, "Kai ing khawmdek a venawh a samphang na awi kqawn nyng. Judakhqi ang cunnaak sinakawk ingkaw bawkim awh cawngpyi poepa nyng. Ang hyp na ikawh awi awm ap kqawn nyng. 21 Ikaw hamna hani doet? Kai ak awih kqawn ak zakhqi ce doet thaw. Kak awikqawn ce cekkhqi ing sim u hy," tinak khqi hy. 22 Ceamyihna awi ak kqawn awh, cawhkaw ukkung thlang pynoet ing Jesu a haa awh bee hy. "Vemyihna aw khawsoeih boei khyt ak awi nam hlat peek? tina hy. 23 Jesu ing, "Kak kqawn ve ama thym awhtaw, ama thymnaak ce kqawn law. Cehlai ak thym kak kqawn awhawm kawtih nanik beih? tina hy. 24 Cekcoengawh Anna ing, a pin doena, khawsoeih boei khyt Kaiapha venna tyi hy. 25 Simon Piter ce mai a aawm huili awh doet uhy, "Nang awm anih a hubat pynoet lawt ni my?" tina uhy. Cekkhqi venawh, "Amni", tinak khqi hy. 26 Khawsoi boei khyt a tyihzawih thlang pynoet, Piter ing yang haa a zeek peek a tyihzawih a cakaw na ak awm ing, "Nang ve olive dum ak khuiawh ni hu zawh nyng?" tina hy. 27 Cehlai Piter ing oelh tlaih bai hy, cawh aai khawng pahoei hy. 28 Cekcoengawh Judakhqi ing Kaiapha a im awhkawng Rom ukkung Pilat a im na Jesu ce ceh pyi uhy. Mymcang hiina awm nawh boei imna am lut uhy. A mi lut awhtaw am ciimcaih nawh Loentaak poei buh am ai thai kawm uh. 29 Ce a dawngawh Pilat ce a mingmih a venna cet nawh doet hy, "Ikaw thawlhaak awh nu ve ak thlang ve nami law pyi? tinak khqi hy. 30 Cekkhqi ing, "Ve ak thlang ve thawlhaak ama taak man nang a venawh am law hly pyi unyng," tina hy. 31 Pilat ing, "Khyn unawh na mimah a cawngpyinaak awi amyihna awi cek uh," tinak khqi hy. Cehlai Judakhqi ing, "Thlang him thainaak am ta unyng," tina uhy. 32 Vemyihna a awmnaak vetaw, Jesu ing ikawmyih thihnaak kawi ing a thihi kaw, tinawh ak kqawn ce a soepnaak ahamni. 33 Cawh Pilat ce ipkhui na cet tlaih nawh, Jesu ce ak khy coengawh doet hy, "Nang ve Judakhqi a sangpahrang nu? tina hy. 34 Jesu ing, "Namah ak poek aw nak kqawn, am awhtaw thlang ing nu kai akawng na venawh ak kqawn law?" tina hy. 35 Pilat ing, "Kai ve Juda pa na ti nawh nu? Nak thlangkhqi ingkaw na khawsoeih boeikhqi ing ni nang ve kai a venna ami haw law ka ti. Ikaw na sai hy voei? tina hy. 36 Jesu ing, "Kai a qam taw ve khawmdek amni. Ve khawmdek qam mantaw, Judakhqi ing kai ami min tunaak thai amah ka tyihzawihkhqi ing tu hawh kawm uh. Cehlai kai a qam taw ak chang nakaw ni," tina hy. 37 "Cawhtaw nang ve sangpahrang vam haw?" tina hy. Jesu ing, "Kai ve sangpahrang na tice thym hy. Ve a ham nani awitak ak kqawn

aham thang law nyng saw, khawmdek awh ka law. Uawm awitak benna ak awm ingtaw kak awi ngai hy," tina hy. 38 Cawh Pilat ing, "Awitak ce ikaw nu? tina hy. Ce ak awi a doet coengawh Judakhqi venna cet tlaih nawh, "Ve ak thlang a thawlhaak am hu nyng. 39 Cehlai cehtaa khawngi awh nangmih ing thawngtla pynoet oet ni hlah sak uhyk ti. 'Juda sangpahrang' venu ka hlah law hly?" tinak khqi hy. 40 Cekkhqi ing, "Amni, anih amni! Banabas ce hlah law," tina uhy. Banabas cetaw quk-ai thlang pynoet na awm hy.

19 Cawh Pilat ing Jesu ce khyn nawh vyk hy. 2 Qalkapkhqi ing hling ce lumyuk na sai unawh a lu awh myk sak unawh hik them ce bai sak uhy; 3 cekcoengawh, a venna pan unawh, "Juda sangpahrang na zoseen seh!" tina uhy. A haiauh bee hy. 4 Pilat ing Judakhqi venna cet nawh, "Toek lah uh, a thawlhaak am hu nyng, tice nami simnaak aham nangmih a venawh law pyi tlaih nyng," tinak khqi hy. 5 Jesu taw hling lumyuk myk nawh hik them a bai doena cawn law hy. Pilat ing, "Anih ve toek lah uh," tinak khqi hy. 6 Khawsoi boeikhqi ingkaw ukkungkhqi ing ami huh awh, "Thinglam awh tai! Thinglam awh tai!" tinawh khy uhy. Cehlai Pilat ing, "Khyn unawh, tai uh. Kai ingtaw a thawlhaak am hu nyng," tinak khqi hy. 7 Cawh Judakhqi ing, "Ka mimah a cawngpyinaak awipeek pynoet awm hy. Cek awipeek amyihna Khawsa Capa na ak kqawn qu ak cawmawh a thihi aham awm hy," ti uhy. 8 Ce ak awi ce Pilat ing ang zaak awh kqih khpoet nawh, 9 ipkhui na cet tlaih hy. "Hana kawng na law?" tinawh Jesu ce doet hy, cehlai Jesu ing awi khangoet awm am hlat pehy. 10 Pilat ing, "Kai a venawh awikqawn aham amna ngaih nawh nu? Nang loet sak thainaak ingkaw thinglam awh tai thainaak ta nyng ti amna sim nawh nu?" tina hy. 11 Jesu ing, "Khan benna kawng ama ni peek awhtaw kak khanawh saithainaak am ta kawp ti. Cedawngawh nangmih a venna kai anik peekung a thawlhaak ve bau khpoet hy," tina hy. 12 Cawh Pilat ing Jesu ce hlah aham ngaih hy, cehlai Judakhqi ing, "Ve ak thlang ve na loet sak awhtaw, nang taw Kaisarar a pyi am voel hawh ni. U awm amah ing sangpahrang na ak sai qu taw Kaisarar ak oelh ak thlang ni," tina uhy. 13 Ce ak awi ce Pilat ing ang zaak awh, Jesu ce law pyi nawh awidengaak Lung Ngawihdoelh (Aqamaic awi na Gabbatha) awh ngawi sak hy. 14 Cenyin taw loentaak khawngi coekcqek nyn na awm hy, khawnoek kquk tiuk pha hawh hy. Pilat ing Judakhqi venawh, "Nami sangpahrang ve toek lah uh!" tinak khqi hy. 15 Cehlai cekkhqi ing, "Anih ce him! Anih ce him! Thinglam awh tai!" tinawh khy uhy. Pilat ing, "Nangmih a sangpahrang ve thinglam awh kak tai hy nu?" tinak khqi hy. Cawh khawsoeih boeikhqi ing, "Kaisarar am awhtaw sangpahrang am ta unyng," tina uhy. 16 A hukhit na taw thinglam awh tai aham Jesu ce a mingmih a kut awh Pilat ing pek khqi hy. Cedawngawh qalkapkhqi ing Jesu ce ceh pyi uhy. 17 Amah a thinglam ce kawt nawh luqawk hun (Aqamaic awi na Golgotha ti uhy) na ce cet hy. 18 Ce hun awh anih ce thlang pakkihi mi thinglam awh tai haih uhy – tang ben cawng benawh cekqwai ce tai unawh cekqwai anglak lung awh Jesu ce tai uhy. 19 Pilat ing, "Nazareth Jesu Judakhqi sangpahrang," tinawh ami qee coengawh thinglam awh taih pe uhy. 20 Thinglam awh Jesu ami tainaak hun ce khaw bau awhkawng zoe hy, cawhkaw caa ce Aqamaic, Latin ingkaw Greek awina a qee a dawngawh, Juda thlang khawzah ing qeel uhy. 21 Juda khawsoeih boeikhqi ing Pilat a venawh, 'Juda sangpahrang' tinawh koeh qee, ve ak thlang ing Juda sangpahrang na awm nyng, ti hy, tinawh qee," tina uhy. 22 Pilat ing, ka qee cetaw, ka qee nani a awm hawh," tina hy. 23 Qalkapkhqi ing Jesu ce thinglam awh ami tai coengawh, a hi ce lawh pe unawh, thlang pynoet qip aham, pupthli na paa qu uhy. A angki awm lo uhy. Ce angki taw ak khqui kaana awm nawh, a haawng awhkawng a pum dy ang tah qu ni. 24 Ceamyihna awm

saw amingmih ing, "Vawhkaw hi vetaw koeh teek u sih. U ing nu a huh kaw, taicung na zyk u sih," ti uhy. "Ka hi ve teei unawh ka angki ce taicung zyk sih kawm uh," tinawh qee hy na ak awm ce a soepnaak aham vemyihkhqi ve ak awm ni. Ceamyihna qalkapkhqi ing sai uhy. **25** Jesu a thinglam a kingawh a nu, a nu a naa, Klopia zu Meri ingkaw Meri Magdalene mi ce awm uhy. **26** Jesu ing cawh ak awm a nu ingkaw, amah ing a lungnaak hubat thlang pynoet cawh ak dyi ce a huh awh, a nu a venawh, "Nu, na capa ve toek lah," tina hy. **27** Cekcoengawh a hubat thlang a venawh, "Na nu ve toek lah," tina bai hy. Cawh kawng awhtaw cawhkaw a hubat ing a nu ce im na ceh piy hy. **28** Cak Ciimawi a soepnaak aham ik-oieh boehl coeng hawh hy tice a sim awh, Jesu ing, "Tui ngaih nyng," ti hy. **29** Cawh misur tui ak thui ce am awh hawh uhy, cawhkaw misur tui ak thui ce hlapawt ing hluk unawh, cawhkaw hlapawt ce hyssop thing awh ami tlet coengawh Jesu a hui awh tuh uhy. **30** Misur tui ak thui ce amii hluk coengawh, Jesu ing, "Coeng Hawh hy," ti hy. Cekcoengawh a hawng tlep nawh a mal pat pahoei hy. **31** Ce nyn taw coekqoek nyn na awm nawh, a khawngawi taw Sabbath nyn na awm hy. Sabbath nyn awh thinglam awh thlang a qawk a bat ce Judakhqi ing a mami ngaih a dawngawh, Pilat a venna cet unawh thinglam awhkaw ami tai thlangkhqi khaw ce hqem pe nawh thinglam awhkawng qawk ce lawh aham thoeh uhy. **32** Cedawngawh qalkapkhqi ce law unawh Jesu ingqawi thinglam awh ami tai haih thlhy pynoet a khaw ce hqem pe uhy, cekcoengawh ak chang pynoet a khaw ce awm hqem pe bai uhy. **33** Cehlai Jesu a ven a mi pha awh anih cetaw a qawka na hu uhy, cedawngawh a khaw ce am hqem pe voel uhy. **34** Qalkap pynoet ing Jesu ce cai ing a vei awh sun hy, cawh thi ingkaw tui ce lawng law pahoei hy. **35** Ak hukung ing ni sim sak hawh hy, (a ni sim sak ahi ce thym hy; ak kqawn thym hy ti sim qu hy,) namgih ingawm namik cangnaak lawt hamna. **36** Cakciimawi awh am, "A quh pynoet awm am ek tikaw," ti ce a soepnaak ahamma vekkhqi ve ak awm law ni. **37** Cawh Cakciim ak chang bai awhawm, "A mingmih ing cai ing ami sun ce toek kawm uh," tinawh awm bai hy. **38** A hu na, Arimathea khaw awhkaw Joseph ing Pilat a venawh Jesu a qawk ce thoeh hy. Joseph taw Jesu a hubat pynoet na awm lawt hy. Judakhqi ak kqijah a dawngawh ang hyp na awm hy. Pilat ak caming, cet nawh Jesu a qawk ce lo hy. **39** Khamthian awh Jesu a venna ak cet Nekodemu ing anih ce pyi hy. Nikodemu ing myrrh ing ak kqit bawktui, khqijhkip pawngnga tluk ce haw law hy. **40** Jesu a pum lo nih nawh bawktui ing ani hluk coengawh hi ing zawl hy nih. Judakhqi a singyoe amyihna cemiyihna sai hy nih. **41** Jesu thinglam ami tainaak awh dum pynoet awm hy, ce a dum khuiawh phyi ak thai pynoet awm hy, ce a phyi khuiawh a u awm vui hlan uhy. **42** Ce nyn ce Judakhqi coekqoek nyn na awm nawh phyi a zoe a dawngawh Jesu ce pup hy nih.

20 Khaw khqijah nyn khui awhkaw khawnghi lamma cyk mymcang hqit awh, Meri Magdalene ce, khaw than hun saw phyi na cet hy, cawh phyi chawmkeng awhkaw lung ak thoeng qu ce hu hy. **2** Cedawngawh Simon Piter ingkaw Jesu ing a lungnaak ak chang hubat thlang a venna dawng nawh, "Phyi khui awhkawng Bawipa ce hana nu ta valh hawh uhy, hana nu ami taak hy voei am sim nyng," tina hy. **3** Cedawngawh Piter ingkaw ak chang hubat thlang ce phyi na cet hy nih. **4** Dawng haih hy nih, cehlai ak chang hubat ing Piter ce dawng ta nawh phyi ce lamma na pha hy. **5** Anih ce nung koep nawh phyi ce a toek awh hi doeng a awm ce hu hy, cehlai amah taw am nu lut hy. **6** Cawh a hu na a cehtaak Piter ce law nawh, phyi khui awh hi doeng a awm ce hu hy. **7** cekcoengawh Jesu a lu zennaak thlakthi hi awm hu bai hy. Cawhkaw hi ce amah doeng ak chang cana tum qu nawh awm hy. **8** Phyi ak pha ma hubat ak chang ce awm a hu na taw phyi khui awh hi doeng a awm ce hu hy. **9** (Ca Ciim awhkawng thihnaak awhkawng

Jesu a thawh tlaithnaak akawng ce am zasim hlan bak bak uhy.) **10** Cekcoengawh a hubat qawi ce im na voei hy nih, **11** cehlai Meri cetaw phyi a venawh dyi nawh kqang hy. Ang kqang doena koep nawh phyi ce toek hy. **12** Ak baawk phung khan ceityih pakkhhil ce Jesu a qawk ami soeinaak awh, pynoet ce a lu benawh pynoet ce a kaw benawh ngawi hy nih. **13** Cek kqawi ing, "Nu kawthi nang kqang?" tina hy nih. Anih ing, "Hana nu ka Bawipa khyn valh hawh uhy, hana nu ami taak hy voei am sim nyng," tina qawi hy. **14** Cawh, hu benna ang hawi awh ce, cawhkaw ak dyi Jesu ce hy hqoet hy, cehlai Jesu ni tina am hat hy. **15** Anih ing, "Nu kawthi nang kqang? Unu na sui?" tina hy. Dum ak qeh thlang amyih ni tina poek nawh, a venna, "Nang ing na khyn awhtaw na taaknaak hun nik kqawn pe lah, law na vang nyng," tina hy. **16** Cawh Jesu ing a venawh, "Meri," tina hy. Anih ce hawi qu nawh Aqamaic awi na, "Rabboni," ("Cawngpyikung," tinak ni) tina hy. **17** Jesu ing, "Pa a venna kang voei hilan a dawngawh, kai ve koeh nim tu voel moe. Ka koeinaakhqi venna mah cet nawhtaw, 'Ka Pa ingkaw nangmih a Pa, ka Khawsa ingkaw nangmih a Khawsa venna voei hly tlaiah hawh nyng, ti hy," tinawh kqawn law pek khqi," tina hy. **18** Meri Magdalene ing a hubatkhi venna cet nawh ve ak awithang ce kqawn pek khqi hy: "Bawipa taw hu hawh nyng!" tinak khqi hy. Bawhkaw ik-oiehkhqi ve anih ing a venawh kqawn pehy tice cekkhqi venawh kqawn pehy. **19** Ce a khawnghi, khqih nyn khui awhkaw lamma cyk khawnghi kawmhy benawh, hubatkhi ce pynoet na cun unawh awm uhy, Judakhqi amik kqijah a dawngawh chawh kahh kloep uhy, cawh Jesu ce law nawh cekkhqi anglak lung awh diyh pek khqi hy, "Nami venawh ngaihdingnaak awm seh!" tinak khqi hy. **20** Ve ak awi ak kqawn coengawh, a kut ingkaw a veei ce huh khqi hy. Bawipa ce ami huh awh zeel uhy. **21** Jesu ing, "Nami venawh ngaihdingnaak awm seh! Boei ing kai ani tyih amyihna, kai ing nangmih ce ni tyi khqi nyng," tinak khqi hy. **22** Ce ak awi ak kqawn coengawh ang hqijah chan nawh ami venawh, "Ciim Myihla hu lah uh. **23** U a thawlhaak awm namim queen boehl taw queenna awm kawm saw, u a thawlhaak awm am namim queen cetaw queenna am awm kaw," tinak khqi hy. **24** Thlangqha hlaihiah ak khui awhkaw thlang pynoet, (Didymas ami ti) Thomas ce, Jesu a law awh hubatkhi anglakawh am awm hy. **25** Cedawngawh hubat ak changkhqi ing, "Bawipa hu unwy," tina uhy. Cehlai cekkhqi venawh, "A kut awhkaw thicung ngaw ingkaw thicung ing ami hennaak a ngaw ce ka kut ing am kak pui nawh a vei ce ka kut ing am ka zam awhtaw ap cangna kawng nyng," tinak khqi hy. **26** Khaw khqijah nyn a awm coengawh, hubatkhi ce pynoet awh diyh pek khqi hy, "Nami venawh ngaihdingnaak awm seh," tinak khqi hy, **27** Cekcoengawh Thomas a venawh, "Na kut ing zam nawh, ka kut qawi ve toek lah. Na kut lo nawhtaw ka veei ve zam lah. Koeh upvoet voel nawhtaw cangna hlah," tina hy. **28** Thomas ing, "Ka Bawipa ingkaw ka Khawsa na awm hyk ti!" tina hy. **29** Cawh Jesu ing, "Nang ing nani huh deng awh nik cangna hyk ti, a huh kaana ak cangnaak thlangkhqi taw ami zoseen hy," tina hy. **30** Jesu ing a hubatkhi mik huh awh a sai peek, ve cauk khuiawh qee na amak awm ak chang kawpoek kyi ik-oieh khawzah awm hun hy. **31** Cehlai nangmih ing Jesu taw Khrish, Khawsa Capa ni, tice cangna unawh ang ming awh hqiqnaak ce nami taaknaak thai aham ve ak ca ve qee na awm hy.

21 Jesu ing, Tiberia Tuili awh a hubatkhi venawh dang pe tlaiah bai hy. Cawh vemyihna awm hy. **2** Simon Piter, (Didymas tinawh amik khy) Thomas, Kalili qam Kanan khaw awhkaw Nathanael, Zebedee a ca qawi hubat thlang pakkhhil ce awm uhy. **3** Simon Piter ing cekkhqi venawh, "Ngak tuna cet hly nyng," tina

khqi hy. Cekkhqi ing, "Kaimih awm law hly lawt unyng," tina uhy. Cedawngawh cekkhqi awm cet unawh, lawng awh ngawi uhy, cehlai than oet khuiawh ikaw ca awm am tu uhy. 4 Mymcang hqit awh Jesu taw tui keng awh dyi hy, cehlai a hubatkhqi ing Jesu na am sin uhy. 5 Anih ing, "Ka pyikhqi, nga amna min tu nawh aw?" tinak khqi hy. Cekkhqi ing, "Am tu unyng," tina uhy. 6 Anih ing, "Lawng keeng tang benawh lawk ce khawng lah uh, nga tu bit kawm uk ti," tinak khqi hy. Lawk ce amik khawng awhtaw, nga khawzah tu unawh, lawk ce naa tloei uhy. 7 Cawh Jesu a lungnaak hubat ing, Piter a venawh, "Anih ve Bawipa ni," tina hy. Anih ing, "Anih ve Bawipa ni," a tice Simon Piter ing ang zaak awh, a hi ing ven qu nawh tui na cawn hy. 8 Hubat ak chang khqi taw a hu awh lawng ing hqut uhy, lawk awh ak be nga ce kawngceng na dawk uhy, (kawngceng awhkawng dawng hakip tluk ni a hla hy.) 9 Kawngceng ami pha awhtaw, mai tih unawh nga ang sai qu ce hu uhy, phaihpi awm cawh awm hy. 10 Jesu ing a mingmih a venawh, "Nga namim tu ce avang haw law lah uh," tinak khqi hy. 11 Simon Piter ce lawng awh kai nawh lawk ce kawngceng na dawk hy. Nga ak bau hqoeng zakhat sawmnga pathum law hy, nga ce zah law hlai hy lawk ce am se qoe hy. 12 Jesu ing, "Law lah uh, mymcang buh ai hlaan u sih," tinak khqi hy. Bawipa ni tice ami sim a dawngawh, a hubat ak khuiawh kaw u ingawm, "Nang ve a u nu?" am tina qoe uhy. 13 Jesu ce law nawh, phaihpi ce lo nawh cekkhqi ce pehy, nga awm lo nawh pek khqi bai hy. 14 Ve ve thihnaak awhkawng a thawh coengawh a hubatkhqi venawh ang dangnaak thum voei naak na awm hy. 15 Buh ami ai coengawh, Jesu ing Simon Piter a venawh, "Johan capa Simon, vekkhqi boeih anglakawh nanik lungnaak tang tang aw?" tina hy. Piter ing, "Oeih, Bawipa, ni lungna nyng tice nang ing sim hyk ti," tina hy. Jesu ing, "Ka tuukhqi ce cawmciah khqi," tina hy. 16 Jesu ing, "Johan a capa Simon, na nik lungnaak tang tang aw?" tina bai hy. Anih ing, "Oeih, Bawipa, ni lungna nyng tice sim hyk ti," tina hy. Jesu ing, "Ka tuukhqi ce khoem a doen khqi," tina hy. 17 Am thumnaak awh, "Johan capa Simon, na nik lungnaak aw?" tina bai hy. Jesu ing Piter a venawh thum voei dy, "Nanik lungnaak aw?" a tinaak awh Piter taw ak kaw se nawh a venawh, "Bawipa nang ing ik-oeih boeih sim tik saw, ka ni lungnaak awm sim hyk ti," tina hy. Jesu ing, "Ka tuukhqi cawmciah khqi. 18 Awitak ka nik kqawn peek, na naasen awhtaw namah poek awh nak cawi khit nawh namah a ngaihnaak na cet hyk ti, cehlai na pacawng law awhtaw na kut zyng kawm tiksaw, thlang ing ni pin kawm saw am na ngaihnaak benna ni sawi kawm uh," tina hy. 19 Thihnaak ikawmyih ing nu Piter ing Khawsa a zoeksang kaw, tice sim sak ham Jesu ing ak kqawn ni. Cekoengawh a venawh, "Ka hu awh bat lah," tina hy. 20 Piter ing hawi qu nawh a toek awh, Jesu ing a lungnaak hubat thlang ing a mingmih a hu awh ang bat ce huhy. Vawhkaw thlang vetaw mybuh ami veel awh Jesu a venawh koep nawh, "Bawipa u ing nu nang ce thlang a kut awh ani zawihi kaw?" tinawh ak doetkung ceni. 21 Piter ing anih ce a huh awh, "Bawipa anih ce ikawmyihna nu a awm kaw?" tinawh doet hy. 22 Jesu ing, "Kang voei law tlaih hlan dyy anih ve ak hqing na ta mai nyng seiawm ikawnu tina vang nati? Ka hu awh mah bat law," tina hy. 23 Ve a dawngawh, koeinaakhqi khuiawh, 'cawhkaw hubat ce am thi kaw,' tinawh poek uhy. Cehlai, "Kang voei law tlaih hlan dyy anih ve a hqing na ta mai nyng seiawm ikaw tina vang na tinawh nu?" a tinaak hlai ni. 24 Cawhkaw hubat taw vawhkaw ik-oeihkhqi ak kqawnkung ingkaw ak geekung veni. Vawhkaw simpynaak ve thyh tice sim uh. 25 Jesu ing ak chang them khawzah sai hy. Cemyihkhqi ce qee boeih sih ni ti mai mantaw, khawmdekk pum awh cawhkaw caukkhqi ce am khoek qoe qoe kaw, tinawh poek nyng.

1 Theophila, maa nakaw cauk lamma awh, Jesu a them saikhqi ingkaw a cawngpyinaak, **2** amah ing ak tyh ceityihkhqi venawh Ciim Myihla ak caming awi yyn nawh, khawk khana kaaina a awm hlan dy awhkaw awi ak kqawn peek khqi ce qee law hawh nyng. **3** Khuikhanaak a huh coengawh, vawhkaw thlangkhqi venawh hatnaak khawzah ing amah tawh hqing hy tice dang sak hy. Khawngghi phlikip khuiawh dang pe nawh a mingmih a venawh Khawsa qam akawng ce kqawn pehy. **4** Hypboet taw a mingmih mi buh ami ai hain awh vawhkaw awi ve pehy: "Kai ing kak kqawn law za uhky ti, Pa ak awikam ce qeh unawh taw Jerusalem ve koeh cehtaak kawm uk ti. **5** Ikawtih Johan ingtaw tui ing baptismata ce pehy, cehlai khawngghi iqt a dii hlanawh nangmih ing Cii Myihla ing baptismata ce hu kawm uk ti," tinak khqi hy. **6** Cedawngawh kutoet na ami awm awh doet uhy, "Bawipa, Israel qam ce tuh nang dyih hly sak hawh nawh nu?" tina uhy. **7** Cekkhqi venawh: "Pa ing amah ak caming a taak atym ingkaw khawngghi ce nangmih nami sim am ngaih hy. **8** Cehlai Clim Myihla ce nangmih ak khanawh a pha law awhtaw thaawmnaak ta kawm uk ti; cawh nangmih taw Jerusalem, Judah qam boeih ingkaw Samari qam khawmdiek a dytnaak dyna kai a dyihthing na awm kawm uk ti," tinak khqi hy. **9** Ve akawi a kqawn coengawh, a mingmih a miluh awh khawk khan na zoek nace awm nawh, a mami huh thainaak dyna myi ing khyn zip hy. **10** Ceamyihna zoehna a awm ce a mi toek huiawh thlang pakkhih, hik baawk bai ing, ami venawh dyi law hy. **11** Cekkqawi ing, "Kiliil thlangkhqi, ikawtih khanna mang unawh naming dyih khing? Khanna a kaai nami huh amyihna amah qoe a hu voei law tlaih kaw," tinak khqi hy. **12** Cekcoengawh, Olive tlang ami ti awhkawng Jerusalem khawna voei uhy; ce tlang taw Jerusalem khaw kengawh awm nawh, Sabbath nynawh khin cehaak knoek ni a hla hy. **13** Ami pha awh, ami awmnaak khawi ipkhan na ce kaai uhy. Cawkawh ak awmkhqi taw, Piter, Johan, Jakob ingkaw Mathai, Alpheaus a capa Jakob ingkaw Zealot tinawh amik khy Simon, Jakob a capa Juda, vetloek ve awm uhy. **14** Cekkhoi ingkaw nukhqi, Jesu a nu Meri ingkaw a naakhqi mi kawlung kutoetna thahlynaak ing cykcah unawh kutoetna awm uhy. **15** Ce nyn awh ak cangnaak thlangkhqi ak khuiawh Piter taw dyi nighth, (ami cu boeihna siim ingkaw a thong law uhy), **16** "Koeinaakhqi, thlang a kut awh Jesu ak peekung Juda akawng awh, syn awh Ciim Myihla ing David am khaawh anak kqawn Cakciimawi ce a soep aham awm hy- **17** anih ce ningnih anglakawh paa lawt nawh ve a bibi awm ana bi lawt hy," tinak khqi hy. **18** (Cek thlang ing a khawboe see phu a huh ing lo hun ce tlhai hy; cawh ce ak chut tling na tla nawh, ak phoen ce pawk nawh ak khqikhqi awm a lengna cawn boeih hy. **19** Jerusalem awh ak awmkhqi boeih ing ce awithang ce za unawh, ce a lo hun ce a mimah ak awi na, 'Akeldama,' ti unawh, cetaw, 'Thi khawhun, tinaak ni.) **20** Saam cauk awh vemyihna qeena awm hy, 'Anih a awmnaak ce thlang ing cehta seitaw ak khuiawh uawm koeh awm seh nyng,' ti ingkaw, 'Sawikung anihnaak thlang chang ing ham seh nyng,' ti ce. **21** Cedawngawh Bawipa Jesu ning lakawh a ceh a awm khuiawh, **22** Johan a baptismata ak qananaak awhkawng Jesu khawk khan na a kaai dy nangmih anglakawh ak awm poeap a khui awhkawh a thawhthaihaak anik sim pyi khqi hamna thlang pynoet a awm ngaih hy,' tihy. **23** Cedawngawh thlang pakkhih: Joseph ami ti Barsabbas (Justa tinawh awm khy bai uhy) ingkaw Matthia, ce hoep uhy. **24** Cekcoengawh, "Bawipa, nang, thlak kawlung boeih ak simkung, ve ak thlang pakkhih ak khuiawh nang ing nak tyh ce nim huh khqi lah, **25** Juda ing a cehtaak vawhkaw ceityih bibi ak bi hamna," tinawh cykcah uhy. **26** Cekcoengawh

cekqawi ing taicung ce zyk nih saw Matthia ak khanawh tla hy; cedawngawh anih ce ceityih thlanghqa hlaioet ak noet sih uhy.

2 Pentecost nyn a pha awh hun pynoet awh kutoet na awm boeih uhy. **2** Kawlhalkh awh khawhli awi amyihna khan nakawng awi ce law nawh a mingmih ang ngawihnaak ipkhui ce be khyp hy. **3** Cawh thlang pynoet qip ak khanawh lai amyihna ak awm mai ce hu uhy. **4** Cekkhqi boeih ce Ciim Myihla ing be unawh Myihla ing a pau sak amyihna awihchang na pau uhy. **5** Cawh khawngghi ak kai awh ak awm Khawsa ak kqjih Juda thlangkhqi boeih boeih ce Jerusalem awh awm uhy. **6** Cek awi ce a ming zaak awh thlang khawzah cur law unawh, thlang boeih ing ce amik awi pau ce amimah ak awina aming zaak awh amik kawpoekna kyi hy. **7** Thlang boeih ing kapwoek kyi ngaihang doena, "Toek lah uh, vawhkaw awikhqi ve Galili awi boeih am nu?" **8** Ikawtinawh ni thangpyi awi amyihna ning zaak hy voei? **9** Thlang vang Parthia khaw, Media ingkaw Elam khaw awhkaw ak awmkhqi; thlang vang taw Mesopotamia, Judah ingkaw Kapadocia, Pontus ingkaw Asia qamawh ak awmkhqi, **10** Thlang vang bai taw Phrygia ingkaw Pamphylia, Izip ingkaw Libya qam Cygene khaw keng awhkaw thlangkhqi, Rom khawwah ak awmkhqi ingkaw **11** (Judakhqi ingkaw Juda phung ak hqutkhqi), Crete ingkaw Arab thlangkhqi na ni awm hlai uhy - Khawsa ak kapwoek kyi ik-oehi sai ve nimah ak awi na ning za boeih thai vel!" ti uhy. **12** Thlang boeih amik kawpoek kyi ing, a kawnglam am zasim thai unawh, "Veve ikawmyih hly hy voei nu?" ti unawh doet qu uhy. **13** Cawh thlang vang ingtaw qaihnakkhoi unawh, "Misur zuk thai ak quikhqi ni," ti uhy. **14** Cehlai Piter taw thlanghqa hlaioet khqi mi dyi unawh, anih ing khatwah na ak awi y nawh awi kqawn hy, "Nangmih Juda khawkthlangkhqi ingkaw Jerusalem awh ak awm thlangkhqi boeih aw, ve ve sim unawh kak kqawn ve ngai lah uh. **15** Vekkhqi ve nangmih ing namik poek amyihna, zu am qui uhy. Tuhawh mymcang khawnoek kow ni a law hun hy! **16** Vetaw tawngtha Joel ing anak kqawn ceni: **17** "Khawngghi a dyt tym awh ce, Khawsa ing, thlang boeih ce kang Myihla ing syp kawng nyng saw, nami capakhqii ingkaw nami canukhqi ing awi khypyi kawm uh. Cadawngkhqi ing hatnaak hu kawm usaw, pacawngkhqi ing mang han kawm uh. **18** Ka tamnaa pakhqi ingkaw ka tamnaa nukhqi ak khan awhawm kang Myihla syp kawng nyng saw, ka awi kqawn kawm uh. **19** Khawhii awh kawpoek kyi themkhhqi ingkaw, deklai kaiawh hatnaakkhoi ce nim huh kawng nyng; Thi, mai ingkaw maikhui ing dang sak kawng nyng. **20** Bawipa a khawngghi bau ingkaw boeimangnaak ce a pha hlanawh, Khawmilk ce than kawmsaw, pihla ce thi na thoeng kaw. **21** Cawh u awm Bawipang ming ak khy boeih taw hulna awm kaw,' a tice ni. **22** "Nangmih Israel thlangkhqi aw, ve ve ngai lah uh: Nazareth Jesu ce Khawsa ing dyihpyi nawh nangmih a venawh kawpoek kyi them ing hatnaakkhoi ce sai law sak hy, namimah ingawm sim uhyt ti. **23** Anih ce Khawsa ing khaw khan oepchoeh nawh a sim oepchoeh hawh amyihna, nangmih a kut awh peek nace awm hy; cawh nangmih ing thlakchekhqi ak bawngnaak ing anih ce thinglam awh khing nighth him uhyt ti. **24** Cehlai anih ce Khawsa ing thihnaak awhkawng thawh sak tlaih nawh, thihnaak ingkaw khy am kqangnaak ak khuiawh kawng loet sak hawh hy, kawtih thihnaak ing anih ce am tu khak thai hy. **25** David ing ak awi kqawn nawh, "Ka haiawh Bawipa ce hu poeap nyng. Ka ngai ama hanngaa ahom kak tang benawh awm hy. **26** Cedawngawh kak kawlung ve zeel nawh kam lai ve ak kaw zeel hy; Ka pum awm ngaih-unaak ing hqing kaw, **27** Ikawtih nang ing phyi khuiawh am nik khawng hyt kawm tiksaw, Nak thlang ciim ce thuh zip aham am ngaih kawp ti. (**Hadès g86**) **28** Nang ing hqingnaak lam ce nani sim sak hawh a dawngawh; Na haiawh zeelaak ing ni be sak kawp ti," tinawh kqawn hy. **29** Koeinaakhqi, pakdam David a

kawng ve ak kqjh kanaa nami venawh kqawn law nyng; anih ce thi nawh, phyi khui byihna awm hawh hy, ak phyi awm tuhdy ni venawh awm poe hy. **30** Anih taw tawngtha na awm nawh, Khawsa ing a venawh awikam nawh amah a ngawihdoelh awh a cadil thlang pynoet ngawih sak kawi tinawh awi a taak ce sim hy. **31** Ni hai benawh ak awm law hly kawi ik-oehi ce a sim oepchoeh a dawngawh, anih ce phyi khuiawh am khawng hyt kawmsaw, a pum awm am thu kaw, tinawh Khrirh a thawh tlaihnaa akawng ce anak kqawn oepchoeh hawh hy. (**Hadēs g86**) **32** Cawkaw Jesu ce Khawsa ing thawsak tlaih nawh, cawkaw ik-oehi ak simpyikung dyihting na kaimih ve awm unyng. **33** Pa ak tang benawh zoeksangna awm nawh, Pa ing awi ataak Ciim Myihla ce hu hawh hy, nami huh naming zaak ve ing syypna awm nawh ni. **34** David ce khawk khan na am kaai hy, anih qoe ing, "Bawipa ing ka Bawipa venawh: 'Kak tang benawh ngawi lah. **35** Na qaalkhi ce na khawtloeng na ka taak hlan dy,' tinawh anak kqawn hy. **36** Cedawngawh Israel thlangkhqi boeih ing ve se sim lah uh: Nangmih ing thinglam awh nami taaí Jesu ce Khawsa ing Boei ingkaw Khrirh na sai hawh hy," tinak khqi hy. **37** Thlangkhqi ing ce ak awi ce a ming zaak awh, amik kawlung awh sun amyihna za unawh, Piter ingkaw ceityihkhqi venawh, "Koeinaakhqi ikawmyihna nu ka mi ti kaw?" tinawh doet uhy. **38** Piter ing, "Thawh zut unawh taw, thawlh queenkaw ngainaak aham, Jesu Khrirh ang ming awh baptisma hu boeih uh. Cawkaw Ciim Myihla themzoe peek ce hu kawm uk ti. **39** Vawhkaw awikamnaak vetaw na mimah aham, nami cakhqi ham ingkaw ak hla nakaw ak awm thlangkhqi boeih – Bawipa nangmih a Khawsa ing ak khy thlangkhqi boeih aham ni," tinak khqi hy. **40** Awih chang khawzah ing a mingmih a venawh ngaihtaaknaak awi kqawn pek khqi hy; a mingmih a venawh, "Vawhkaw ak plam cadilkhiq anglak awhkawng na mimah ingkaw na mimah ce hul qu lah uh," tinawh kqawncaih pek khqi hy. **41** Anih ak awih kqawn ak dokhqi boeih ing baptisma ce hu uhy, ce a nyn awh ce thlang thongh thumng sap khqi hy. **42** Ceityihkhqi a cawngpyinaak awi ce ngai unawh pawhngenaak ce ta uhy, phaihipi thek unawh cykcanh uhy. **43** Thlang boeih kqihnaak ing be unawh ceityihkhqi ing kapwoek kyi hatnaakkhqi ce sai uhy. **44** Ak cangnaak thlangkhqi boeih them pynoet na cuut uhy. **45** Ami khawththemkhqi ce zawi unawh, ak voethlauh thlangkhqi ce pe uhy. **46** Myngawi na bawkim awh cun poepa uhy. Im awh phaihipi ce teei unawh kawlung kutoet cana zeelnaak ing ai hiah uhy, **47** Khawsa ce a mim kyihcrah coengawh thlang boeih ak kawngaih na khaw sa uhy. Hulnaak ak hukhqi ing Bawipa ing a mingmih ce myngawi na sap khqi hy.

3 Khaw hypoet awhtaw Piter ingkaw Johan taw khawben by khawnoek pakthum, cykcah tym a pha awh bawkim na cet hy nih. **2** Cawk a nu ak phoen khui awhkawng ak kheemna ak thang thlang pynoet ce bawkim na kawt unawh ak leek soeih chawmkeng a keng awh ta uhy, anih ing ce myngawi bawkim khuina ak cekthqi venawh kut dun poepa hy. **3** Anih ing Piter ingkaw Johan bawkim khui ani lut tawm awh ce hu qawi nawh, cekqawi a venna tangka thoeih hy. **4** Piter ingkaw Johan ing anih ce toek ceet nih nawh Piter ing, "Kainih ve ni toek qawi lah!" tina hy. **5** Ce ak thlang ing ik-oehi ani pek hly ngaih-uu doena hak toek hy. **6** Cehlai Piter ing, "Sui ingkaw tangka am ta nyng, cehlai ka taak dyn ve ni pe vang nyng: Nazareth Jesu ang ming ing na khaw ing cet," tina hy. **7** Cawk ak tang ben kutawh tu nawh thawh saw a khaw ingkaw am khuk ce nep pahoei hy. **8** A khaw ing pet nawh cet pahoei hy. Cekqawi mi bawkim khuina ang pet doena Khawsa ce kyihcrah nawh lut pahoei hy. **9** A ceh doena Khawsa am kyihcrah ce thlang boeih ing ami huh awh, **10** ak leek chawmkeng a kengawh ngawi nawh kut ak dun thlang ni, tice sim

unawh, ak khan awh them ak pha law ce ami huh awh kawpoek kyi sak unawh aming ngaihna aa sak uhy. **11** Cawkaw kut ak dun thlang ing Piter ingkaw Johan ce am tu huili awh, thlang boeih amik kawpoek kyi nawh, Solomon Imhloei benna kawng dawng law uhy. **12** Cekkhqi ce Piter ing a huh awh, a mingmih a venawh, "Israel thlangkhqi aw, kawtih naming ngaih a kyi hy voei? Kainih ing ka nimah a saithainaak, am awhtaw, Khawsak thlang na kani awm a dawngawh, vawhkaw thlang ve ak ceh sak thai amyihna nami ni toek uh? **13** Abraham, Isaak, Jakob ingkaw pakdamkhqi a Khawsa ing a tyihzawih Jesu ce zoeksang hawh hy. Nangmih ing anih ce him aham nami peek, Pilat ing anih ce hlah aham ngaih hlaí hy, nangmih ing anih a haiawh maa uhyt ti. **14** Thlak cim ingkaw thlak dyng ce qoeng unawh, thlang ak him ce hlah aham thoeh lat uhyt ti. **15** Hqingnaak kung ce him hlaí uhyt ti, Khawsa ing anih ce thihnaak khui awhkawng thawh tlaih hawh hy. Kaimih ve dyihting na awm unyng. **16** Ang ming cangnaak ak caming, vawhkaw thlang nangmih ing nami huh nawh nami sim ve qoei hawh hy. Jesu ang ming ing amah a venawh kawng ak law cangnaak ak caming ing ve ak thlang ve, nangmih boeih ing nami huh amyihna, qoei hawh hy. **17** Koeinaakhqi, nangmih anik hquikungkhqi ing am sim unawh ami sai amyihna, nangmih ingawm a sim kaana sai uhyt ti, tice sim nyng. **18** Cehlai Khawsa ing a tawnghakhqi boeih a venawh anak kqawn hyt, Khrirh ing khuikhanaak hu kaw, tice vemyihna soep sak hy. **19** Cedawngawh nami thawlhaak a ciimmaa a hamna zut unawh taw, Khawsa benna hlat lah uh, cawk ni Khawsa ven nakaw simqunaak ce pha law thai kawm saw, **20** Jesu Khrirh, nangmih aham a hoep ce awm a tyih law hly thai hy. **21** Syn awh a tawngtha ciimkhqi venawh awi ataak ce hawh amyihna, Khawsa ing ik-oehikhqi boeih a sai pangnaak a tym a pha hlan dy taw, anih ce khawk khan awh awm hyn kaw. (**aīōn g165**) **22** Ikawtih Mosi ing, "Bawipa nangmih a Khawsa ing nangmih aham kai amyihna ak awm tawngtha pynoet ce nangmih anglak awhkawng awm law sak kaw; anih ing ak kqawn law boeih ce ngai pe kawm uk ti. **23** U awm anih ak awm amag ngai ak thlang taw ak thlangkhqi ak khui awhkawng qoeng bat kaw," tinawh anak kqawn hy. **24** Oeih, Samuel awhkawng kqan nawh tawnghakhqi boeih ing, ami nak kqawn hawh amyihna, tuh tloek awhkaw ik-oehi ve anak kqawn oepchoeih hawh uhy. **25** Nangmih ve Khawsa ing tawnghakhqi ingkaw nami pakdamkhqi mi ami na sai awikamnaak qo ak pangkungkhqi na awm uhyt ti. Abraham a venawh, 'Nang a cadikhqi ak caming khawmekh thlang boeih ing zoseennaak hu kawm uh,' ana tina hy. **26** Khawsa ing a bibikung ce am thawh tlaih awh, thawlh lam awhkawng nangmih ce ning hlat sak khqi nawh zoseennaak peek aham lamma cyk na nangmih a venawh tyi law hy," tinak khqi hy.

4 Piter ingkaw Johan ing thlangkhqi venawh awi anik kqawn hui awh, khawsoeikhqi, bawkim temkungkhqi ingkaw Sadusikhqi ce law uhy. **2** Thihnaak awhkawng ak tho tlaih Jesu ak caming ceityih qawi ing thlang cawngpyi nih nawh awi anik khypy ce am ngaih uhy. **3** Cedawngawh Piter ingkaw Johan ce tu unawh, khaw a my hawh adawngawh a khawngawi mymang dy thawngim khuina thla qawi uhy. **4** Cehlai awi amak ngai thlang khawzah ak khuiawh ak kuum ngai ing cangna unawh; thlang mi na thongnga tluk pung uhy. **5** A khawngawi awh ukkunkhqi, a hgamacakhqi ingkaw anaak awi geekungkhqi ce Jerusalem awh cun uhy. **6** Khawsoeih boei khyt Ana, Kaiapha, Johan, Alexander ingkaw khawsoeih boei khyt a cakaw paqeng thlak changkhqi awm cawk awm lawt uhy. **7** Piter ingkaw Johan ce khy sak unawh doet uhy: "Hana kaw saithainaak, a u ang ming ing nu ve a themkhqi ve na ni sai?" tina uhy. **8** Cawk Piter taw Ciim Myihla ing be nawh: "Ukkunkhqi ingkaw a hgamacakhqi! **9** Tuhngawi awh khawkkhem a venawh qeennaak sainaak awh ikawmyihna a qoeinaak tice

kqawn aham nami nik khy awhtaw, **10** nangmih ingkaw Israel thlangkhqi boeih ing sim lah uh: Nangmih ing thinglam awh tai hlai uhk ti, Khawsa ing thiinhaak awhkawng am thawh tlaih, Nazareth Jesu Khrish ang ming ing, nangmih a hai awhkaw ak dyi ve qoei hy. **11** Anih taw, nangmih im ak sakungkhqi ing nami qoeng lung ce, a kil awhkaw lung khoeng a phu tlo soeihna coeng hy,” a tici. **12** “Hulnaak ve hana awm am awm qoe qoe hy, khawngħi ak kaiawh nangmih hul thainaak aham thlangħeqing anglakawh ming qoe qoe am awm hy,” tina hy. **13** Piter ingkaw Johan a qaal leeknaak ce amiuh awħ, ca amanik sim, thlang mailai ni, tice ami sim awħ amik Kawpoekna kyi hy, cehlai cekqawi ce Jesu venawħ anik awm ni, tice sim uhy. **14** Cehlai khawkħhem ak qoel thlang cawħ ak dyi ce amiuh awħ ikaw awi awm ap kqawn uhy. **15** Cekqawi ce Sunedrin ak khui awhkawng amī ceh sak coengawħ, a mimah ce doet qu uhy. **16** “Vekqawi ve ikawmyihha nu ni sa ħali voei? Jerusalem khawk khuiawħ ak awmkhqi boeih ing vawhkaw Kawpoek kyi them ani sai ve sim hawl uhy, ningmih ingawm amni oelh thai hy. **17** Cehlai ve ak awi a thang khawngħak hlanawħ, ve ang ming ing awi ama nik kqawnnaak voel aham kham pe u sih,” ti uhy. **18** Cekcoengawħ cekqawi ce khy tlaih unawħ, Jesu ang ming ing awi kqawn nawħ thlang ama cawngħpi voel aham kqawn pe uhy. **19** Cehlai Piter ingkaw Johan ing, “Khawsak awi ngai anglakawħ nangmih ak awi ngai ve nu Khawsa haiawħ a thym bet kaw, nangmih ing poek laħ uh. **20** Kainih ingtaw ka ni huu ingkaw ka ning zaakkħqi ve ak kqawn kaana am awm thai ti kawng niħi nyng,” tina hy. **21** Cekkqawi ce kqih am hqin unawħ hħlaħ uhy. Ce akawngħlam ak camawħ thlang boeih ing Khawsa ce a mim kiċċiħaħ dawngawħ, cekqawi ce ikawm a tina qawi uhy. **22** Cawħkaw khawkħhem ak qoel thlang ce kum philkip hlai law hawl hy. **23** Cekqawi ce ami hħlaħ coengawħ, Piter ingkaw Johan taw ani pyikkqi venna cet tlaih niħi nawħ Khawsoiħ boeikhqi ingkaw a hqamcakhqi ing amik kqawn peek ce zaak sak khqi hy niħ. **24** Cekkħqi ing a ming zaak awh awi pynoet na y unawħ Khawsa venawħ cykah uhy. ‘Sawsaq soeih Bawipa, nang ing khawk khan, khawmdek, tuċunli ingkaw ak khuiawħ ak awmkhqi boeih ve sai hyk ti. **25** Namah a tyihzawih, kaimih a pa David am kha awhkawng, Ciim Myihla ing nang ingawħ: ‘Ikawt thlangħphyn aħoei amik kaw so nawħ, phu amak awmna kħaw ammi khan hy voei? **26** Khawmdek sangpahrang khqi ingkaw ukkunkħqi ing kutoet na Bawipa ingkaw Khrish ce kah uhy,’ tinawħ awi kqawn hyk ti. **27** Herod ingkaw Pontia Pilat ing Gentelkhqi, Israel thlangħkqi mi kutoet na nang a tyihzawih tlak ciim Jesu, nang ing situi na syp ce him aħam ve khawk bau khuiawħ hqum unawħ teng uhy. **28** Ak awm hly kawi nang a sai thainaak ingkaw ngaiħnaak ak awm oepchoeħ ce cekkħqi ing sai uhy. **29** Tuħ Bawipa, a mingmih am kqih am hqinnaakkħqi ce poek nawħtaw, qaal leek doena nak awi ka mik kqawnnaħħa thaħam na tyihzawihkhqi ve bawng lah. **30** Namah a tyihzawih tlak ciim Jesu ing thlaktlo qoel sak thainaak, Kawpoek kyi ik-oēihkhqi ingkaw hatnaakkħqi saithainaak aham na kut ce zyng law laħ,” tinawħ cykah uhy. **31** Cejmeyħha ami cykcaħ coengawħ, a mingmih a awmnaak hun ce tlai lyk lyk hy. Ciim Myihla ing be unawħ, Khawsa ak awi ce qaal leeknaak ing kqawn uhy. **32** Ak cangnaak thlangħkqi ing kawlung pynoet na ta uhy. U ingawm a taak them ce amah doeng a koena am poek voel unawħ ami taakkħqi boeih ce pynoet na qup uhy. **33** Thaawmnaak ak bau soeih ing ceityihkhqi ing Bawipa Jesu a thawnhaak akawng ce kqawn uhy, qeen-naaka khawzaħ ce a mingmih ak khan awh awm hy. **34** A mingmih anglakawħ ak voet qal hlaħu thlang am awm hy. Im a lo ak tħakħqi ing zawi unawħ, a phu tangka ce amī ħaw coengawħ, **35** ceityihkhqi a khawk kajawħ tloeng uhy. Cawħkaw themkhqi ce a ngoei ngaiħnaak amyihha thlang a venawħ tei ang paa uhy. **36** Kupra qam awhkaw Levi thlang Joseph, ceityihkhqi

ing Barnaba tinawħ amik khy (ak kqawn ngaiħnaak taw Thapeek capa, tinaak) ing, **37** lo a taak ce zawi nawħ a huu tangka ce ceityihkhqi a khawkung awh haw law hy.

5 Ananias ak mingnaak thlang pynoet ing a zu Sapphira ingqawi khawħun ani taak ce zawi hy niħ. **2** A zu a simpypnaak ing tangka a vang ce amah aħam a taak coengawħ, a vang ce ceityihkhqi a khawkung awh tloegħ hy niħ. **3** Piter ing, “Ananias, kawtih setan nak kawlung khuiawħ be sak nawħ Ciim Myihla ce na thai na latnaak? Khawħun phu tangka a vang ce namah aħam ta hyk ti. **4** Na zawiħ hlanawħ awm namah a koena ni a awm ka ti koenoek? Na zawiħ coeng bai awħ awm tangka ce namah a ngaiħnaak amyihha hawna thai tik saw kaw? Ikaw ing nu vemixha nak kawlung awh bi a bi? Thlang am thaina tiksaw Khawsa ni na thainaak hy,” tina hy. **5** Ananias ing ce ak awi ce ang zaak aħaw, tlu nawħ thi hy. Ce akawng ak zakħqi boeih ing kqih uhy. **6** Cawħ cadawngħkqi law unawħ, a qawk ce ami lawħ coengawħ, kawt unawħ pup uhy. **7** Khawnoek pathum tluk a awm coengawħ a zu cawħkaw akawng ce am sim kana lut lawt hy. **8** Piter ing, “Nim then laħ, khawħun ce tangka ve zah doeng na nu nani zawiħ tang?” tina hy. Anih ing, “Oeħi, ve zah doeng ni,” tina hy. **9** Piter ing a venawħ, “Ikawmyihha Bawipa ang Myihla noek adak aħam naning zaak qu? Toek laħ ce! na va amik pukkħqi a khaw ce chawmkeng awh ni a awm hyn ce, nang awm nik kawt pahoei lawt kawm uħ,” tina hy. **10** Cawħ Piter a khawkung awh tlu nawħ thi pahoei hy. Cadawngħkqi law unawħ, a qawk ce ami huu awħ kawt unawħ a va ak phyi keng awh pup uhy. **11** Ce akawng ce thlangboel ingkaw ak zakħqi boeih ing kqih uhy. **12** Ceityihkhqi ing Kawpoek kyi themkhqi ingkaw hatnaakkħqi sai uhy. Ak cangnaak thlangħkqi boeih ce Solomon Imħloeħiħ aħw cun hoieħ hoieħ uhy. **13** Thlangħkqi ing a mingmih ce kiyi am cah khqi hlai uhy, bawng aħam taw kqih iklaw uhy. **14** Cehlai, pa ingkaw nu thlang khawħaz ing Bawipa ce cang nax khqoet khqoet unawħ thlang pung a tai khqoet khqoet hy. **15** Piter a ceh awħ ang myiħlip ding daħħ na seħi ti unawħ, thlaktlokhqi ce lam na law pyi unawħ hiphha Ingkaw phakħkqi awh zaiħ sak uhy. **16** Jerusalem khaw a kengsam awħkaw khawkħqi awħkawng thlang kqeng law unawħ thlaktlokhqi ingkaw qaai ing am tukħqi ce law pyi uhy, cekkħqi boeih ing qoeinaak hu uhy. **17** Cawħ khawsoeih boeih ak hqam soeih ingkaw a pyikkqi, Sadusi anglakawħkaw thlangħkqi ce tlai se uhy. **18** Ceityihkhqi ce tu unawħ thawngim khuiħa thlak khqi uhy. **19** Cehlai khawmthan awħ Bawipa ak kħan ceityih ing thawngim chawmkeng ce awng nawħ a mingmih ce a leng na sawi khqi hy. **20** “Cet unawħ taw bawkim awh dyi unawħ thlang boeih venawħ ve hqinqaak awi ve vak kqawn uħ,” tinak khqi hy. **21** Khaw a dai law awħtaw bawkim ak khuiħa lut tlaiħ unawħ, kħan ceityih ing ak kqawn peek amyihha, thlangħkqi ce cawngħpi uhy. Khawsoiħ boeih ak hqam soeih ingkaw a pyikkqi ce ami pha awħtaw Israel a hqamcakhqi ngawħi cunnaak – Sanhedrin ce khy unawħ thawngim khuiħa kaw ceityihkhqi ce lawħ sak khqi ham thlang tħi uhy. **22** Cehlai thawngim ce ami pha awħ, thawnguk boeih ing cekkħqi ce am hu voel hy. Hlat tlaiħ unawħ, **23** “Thawngim awm ak nep na khai qu nawħ, thawngim ak qeqħkqi awm chawmkeng aħw ak nep cana awm uhy; cehlai chawħ ka mimm awng law awħtaw ak khuiħa awm am awm voel hy,” tina uhy. **24** Ce ak awi ce a ming zaak aħaw, bawkim ak temkung qaal boeih ingkaw khawsoeih boeikhqi ce a mingħajnejha na kyi hy, “Ikawmyihha a awmnaak hy voei?” ti uhy. **25** Cawħ thlang pynoet ce law nawħ, “Toek laħ uħ,” Nangmih ing thawng namik tlak ce bawkim awh dyi unawħ thlang cawngħpi uhy,” tinak khqi hy. **26** Cawħ qaal boeih ce a bibikungħkqi mi cet unawħ ceityihkhqi ce lawpyi uhy. Thlangħkqi ing lung ing nik khawng khqi hau kaw ti unawħ awħiħ zoei cana lawpyi dym uhy. **27**

Ceityihkhqi ce ami lawpyi coengawh, khawsoeih boei ak hqam soeih ing a doet ham Sanhedrin haiawh khy uhy. **28** “Ve ang ming am nami cawngpyi aham ni yn khqi ceet ceet hawh unyng. Cehlai ve cawngpyinaak ing Jerusalem nami be sak coengawh ve ak thlang a thi awh kaimih ve thawluk puk aham cai uhk ti,” tina uhy. **29** Piter ingkaw ak chang ceityihkhqi ing: “Thlanghqing ak awi anglakawh Khawsak awi ni ka ming ngai hly bet hy! **30** Nangmih a pa a Khawsa ing, nangmih ing thing awh tai unawh nami him Jesu ce, thihnaak awhkawng thawh tlaah hawh hy. **31** Zutnaak ing thawluk qeenkhaw ngainaak ce Israelkhqi venawh a peeknaak thai aham Khawsa ing anih ce ak tang benawh boei ingkaw hulkung na zoeksang hawh hy. **32** Ve a kawnglam awh ve kaimih taw simpyikung na awm unyng, amah ak awi ak ngaikhqi venawh Khawsa ing a peek Ciim Myihla awm simpyikung na awm hy,” tinak khqi uhy. **33** Ce ak awi ce a ming zaak awh, amik Kaw so nawk cekkhqi ce him aham ngaih uhy. **34** Cehlai Gamaliel ak mingnaak Farasi thlang pynoet, anaa awi cawngpyikung, thlang boein ing ak kqihchah, ce Sanhedrin anglakawh dyi nawh cawhkaw ceityihkhqi ce a leng na ceh sak aham awi pehy. **35** Cekcoengawh cekkhqi venawh: “Israel thlangkhqi aw, ve ak thlangkhqik khan awh sai aham naming cai ve ak nep na poek lah uhy. **36** Ma awh Theuda ak mingnaak thlang pynoet ing, thlang mailai am amyihna kqawn qu nawh, thlang zali ing hqout uhy. Cehlai anih ce ami him coengawh taw a hubatkhqi awm plal a tham unawh, ikaw na awm am awm cawh uhy. **37** Anih a awm coeng bai awh, Juda ak mingnaak Kalili phyn thlang pynoet ce thlangmi noetnaak a awm tloek awh awm bai nawh thlang pynoet ce qaal na thawh sali hy. Anih awm him bai unawh a hubatkhqi ce plam boeh boeh uhy. **38** Cedawngawh, ve a kawnglam awh ve awi kqawn law lah vang nyng: Ve ak thlangkhqi ve ta dym mai uhy! Ceh sak khqi mai uhy! A mingmih ang cainaak ingkaw ami bibinaak ve thlanghqing a sai na a awm awhtaw plal bit kaw. **39** Cehlai Khawsa a sai na a awm awhtaw, am hqee thai kawn uk ti; Khawsa ak oelh na ni awm kqoeng hau kawm uh,” tinak khqi hy. **40** Anih ak awih kqawn ing cekkhqi ce noeng khqi hy. Cekcoengawh ceityihkhqi ce ak khuiha khy khqi tlaah unawh vyk khqi uhy. Jesu ang ming ing awi ama mik kqawn voel aham awi amik kqawn peek coengawh lhal khqi tlaah uhy. **41** Sanhedrin ce ceityihkhqi ing cehta unawh, ce ang ming awh khuiha kyinaak ami huh aham tyng qoe na a awm a dawngawh zeel uhy. **42** Khawnghi hypoet coengawh hypoet, bawkim awh, im pynoet coeng pynoet awh ang dym kaana thlang cawngpyi unawh Jesu taw Khrish ni ti awithang leek ce khypyi uhy.

6 Ce tloek awh hubat a pung a tai hqui voe voe awh, them aming paa awh nuhaikhqi ami hlah phlam adawngawh Greek awi na amik pau Judakhqi ing Hebrai awi na ak pau Judakhqi ak khan awh sai bi uhy. **2** Cedawngawh thlangqa hlaihik tloek ing hubatkhqi boein ce khy unawh, “Khawsa ak awikqawn plal nawh aawk ai cabawi awh bi ni bi awhtaw am thym kaw. **3** Ceamyihna awmsaw, koeinaakhqi aw, na mimah ak khui awhkaw Myihla ingkaw cyihnaak ing ak be thlang khqih awh tyk uh. Vawhkaw bibi ve cekkhqi venawh pe u sih, **4** cawh ni cykcahnaak ingkaw awikqawn bibinaak benawh ni ngaih hqytnaak hly thai uhy,” tinak khqi uhy. **5** Ce ak awi aming zaak awh thlangkhqi amik Kaw zeel hy. Cedawngawh cangnaak ingkaw Ciim Myihla ing ak be Stephen, cekcoengawh Philip, Ppqkorus, Nikanor, Timon, Parmenas ingkaw Antiock khaw awhkaw Juda phung na ak hawi qu Nikola ce tyk uhy. **6** Ce ak thlangkhqi ce ceityihkhqi venna khyn uhy, ceityihkhqi ing ami lu ak khan awh kut tloeng unawh cykcah pek khqi uhy. **7** Ceamyihna Khawsak awi ce pung a tai hqui nawh Jerusalem khaw awh hubat thlang thlangmi awm pung hqui khqoet khqoet inawh, khawsoeikhqi ingawm cangnaak awi ce ngaih uhy. **8** Khawsa

geennaak saithainaak ing ak be Stephen ing, thlangkhqi anglakawh kawpoek kyi themkhqi ingkaw hatnaakkhqi ce sai hy. **9** Cehlai, anih amak ngaih thlangkhqi Tamnaa Loetkhqi, Cyqene ingkaw Alexandria khaw awhkaw khqi, Kilikia ingkaw Asia qam awhkaw Juda thlangkhqi ing Stephen ce oelh uhy. **10** Cehlai cekkhqi ing a ciyhaak ingkaw awi ak kqawn sakkung Myihla cetaw am oelh thai uhy. **11** Cedawngawh thlang pynoet venawh, “Stephen ing Mosi ingkaw Khawsa a kqawn seetnaak awi za unyng,” tinawh kqawn aham ang hypna awi yn uhy. **12** Ceamyihna thlang kqeng ingkaw a hqamcakhqi, anaa awi qeekungkhqi venawh kqawn pe uhy. Stephen ce tu unawh Sanhedrin a haina sawi uhy. **13** Simipyikung amak thym ta unawh, cekkhqi ing, “Ve ak thlang ing vawhkaw hun ciim ingkaw anaa awi ce ak che che na kqawn hy. **14** Vawhkaw Nazareth Jesu ing ve im ve hqe Kawmsaw Mosi ing a cehta phung alamkhqi awm hqe kaw, tinawh ve ak thlang ing ak kqawn awh za unyng,” tina uhy. **15** Sanhedrin awh ak ngawikhqi boein ing Stephen ce toek ceet uhy, cawh khan ceityih a haai amyihna a haai ce hu uhy.

7 Cawh khawsoeih boei ak hqam soeih ing doet hy, “A mingmih a thawluk puknaak ve ak thym aw? tina hy. **2** Cawh Stephen ing, “Koeinaakhqi ingkaw pakhqii aw, kak awi ve ngai lah uhy! Ningmih a pa Abraham ce Haran awh a awm hlan Mesopotemia awh a awm awh, a venawh boeimang Khawsa ce dang pehy. **3** Khawsa ing, ‘Na qam ingkaw nak thlangkhqi ce cehta nawhtaw kai ing ka ni pek hly qam na ce cet lah,’ tina hy. **4** Cedawngawh anih ing Khaldea qam ce cehta nawh Haran awh ce awm hy. Apa a thiho coengawh, tuh nami awmnaak qam awh ve Khawsa ing tyi hy. **5** Khawsa ing anih ce qo amna pehy, khawlehaak tat zani am pehy. Cawh Abraham ing ca kangna zani ta hlan hlii hy, amah ingkaw a cadilkhqi ing qam ve pang kawm uh, tinawh Khawsa ing awi tahi. **6** Khawsa ing vemyihna awi kqawn pehy: ‘Na cadilkhqi ing thlang a qam awh plam kawm usaw, thlang ing tamnaa na kum zali khuiawh hawna kaw. **7** Cehlai a mingmih tamnaa na ak hawnnaq qam ce kai ing toel kawng nyng saw, ce a qam khuiawh kawng ami loet coengawh ve a hun awh kai ve ni bawk kawm uh,’ tihy. **8** Cekcoengawh Abraham ce chahhui queetaak paipi awikamnaak ce ana sai pyi hy. Abraham ing a ca Isaak ta nawh a thang coeng ak kqeeet nyng awh chahhui queet pehy. Cekcoengawh Isaak ing Jakob tahi, Jakob ing ca paqha hlanihik tloek ce ana tahi. **9** Pakdamkhqi ing Joseph ce ana yt unawh, Izip qam na tamnaa na ana zawi uhy. Cehlai Khawsa ce anih a venawh awm nawh, **10** a kyinaak soeepkak ak khuiawh kawng hul hy. Joseph a venawh ciyhaak pe nawh Izip sangpahrang Pharaoh a lungnaak ce huh sak hy; cedawngawh Pharaoh ing Izip qam ingkaw a ipkhui boein ak khan awh ukkung na tahi. **11** Cawh Izip qam pum ingkaw Kanaan qam pum awh khawseet khawkhanaak ce pha hy, kyinaak ak bau soeih a pha dawngawh, ni pakhqii ing ai am uhy. **12** Izip qam awhtaw cang awm hy tice Jakob ing ang zaak awh, ni pakhqii ce Izip qam na lamma cyk awh tyi hy. **13** A hih voeinaak ami ceh awh, Joseph ing a koeinaakhqi venawh amah ce u nuc, tice kqawn pek khqi hy, cawhkawng Pharaoh ing Joseph ipkhui kaw ce sim hy. **14** Cekcoengawh, Joseph ing a pa Jakob ingkaw a cakaw paqengkhqi boein ce lawh sak nawh, thlang khqihkip coengawh pumha law uhy. **15** Cedawngawh Jakob ce Izip qam na cet nawh cawh anih ingkaw ni pakhqii ce thi uhy. **16** Ami qawkkhqi ce Shqekem awh Hamor cakhqi venawh tangka ing ak thlaah phyi awh ce pup uhy. **17** Khawsa ing Abraham a venawh awi a taaknaak tym ce a soep law tawm awhtaw, Izip qam awh nik thlangkhqi ce ana pung ana tai uhy. **18** Cawh Joseph akawng amak sim thlang ce sangpahrang na awm nawh, anih ing Izip qam ce uk hy. **19** Anih ing nik thlangkhqi ce a ngaih ngaih na ana haw nak khqi nawh, naasen khqi ce ami thihnaak aham ni

pakhqi ce khawng sak khqi ngah ngah uhy. **20** Ce tloek awh Mosi ce thang hy, anih taw naasen mailai na am awm hy. Hla thum doeng ni a pa a im awh ami khuut hy. **21** Anih ce a leng na ami taaknaak kungawh, Pharaoh a canu ing lo nawk amah a capa na hqin hy. **22** Mosi ce Izipkhqi a cyihnaak boeih ce a cawng sak a dawngawh, awikqawn thai nawk saithainaak awm ta hy. **23** Mosi kum phlikip a law awh, amah a pyi Israelkhqi hqip aham cai hy. **24** Thlang pynoet ce Izip thlang ing a the a khanaak ce a huh awh, ce ak thlang ce hul nawk Izip thlang ce him pehy. **25** Khawsa ing anih hawna nawk cekkhqi hul hy tice ak thlangkhqi ing sim kaw tinawh Mosi ing poek hy, cehlai cekkhqi ing am sim uhy. **26** A khawngawi nyu awn Israel phyn qawi thlang pakkhih anik kqak qu ce hu hy. Cekqawi ce qoep qu sak aham a ngaih a dawngawh, 'Nangnih ve koei a naa nani nani awm hy; kawthi manik kqah qu?' tina qawi hy. **27** Cehlai a pyi ak khan awh a khawboe ak se ing Mosi ce buk nawk, 'U ing nu kainih ahan awh ukkung ingkaw awidengkung na ani taak? **28** Zan awh Izip phyn na him amyihna kai awm ni him vang nati nawk aw? tina hy. **29** Ce ak awi ce Mosi ing ang zaak awh, Midian qam na cen hy, cawh khin na awm khing nawk cakpa pakkhih tahi. **30** Kum phlikip a loet coengawh, Sinai Tlang a venawh kaw kqawng awh thingbup mai na ak kqawng awhkawng khan ceityih ing Mosi a venawh dang pehy. **31** Mosi ing a huh awh, ce a huh ce ang ngaihna kyi hy. Ak zoe awhkawng toek vang, tinawh a pan awh, Bawipa ak awi ce zahy; **32** 'Kai taw na pakhqi a Khawsa, Abraham Khawsa, Isaak Khawsa ingkaw Jakob Khawsa na awm nyng,' tina hy. Mosi ing kqih nawk am toek voel hy. **33** Cekcoengawh Bawipa ing a venawh, 'Na khawmyk ce suut; nang diyhnaak a hun ce hun ciim ni. **34** Izip qam awh kak thlangkhqi ing khuihka ami huh ce hu hawh nyng. A mingmih ang ko ang kqangnaak awi ce za nyng saw a mingmih loet sak aham law nyng. Law lah, Izip qam na ni tyi tlaih vang nyng,' tina hy. **35** Vawhkaw Mosi zani cekkhqi ing, 'U ing nu nang ukkung ingkaw awidengkung na ani taak?' tina unawh ana oehl uhy. Cehlai anih ce thingbup awh ak dang peek khan ceityih hawnaak ing Khawsa amah qoe ing a mingmih ukkung ingkaw hulkung aham tyi hy. **36** Anih ing Izip qamawh, Tuili Sen ingkaw qamkoh awh kum phlikip khui kawpoekki them sainaak ingkaw hatnaakkhi ce huh sak khqi nawk amingmih ce sawikhqi hy. **37** Vawhkaw Mosi ing Israelkhqi venawh, 'Nangmih ak khui awhkawng kai amyihna ak awm tawngtha ce Khawsa ing tyi law kaw,' ana tina hy. **38** Anih ce qamkoh awh thlang kqeng anglakawh, Sinai Tlang awh a venna awi ak qkawn peekkung khan ceityih ingqawi awm haih hy nih, ni pakhqi mi awm haih uhy; ningnih a venawh kqawn peek patoe aham awih hqjng ce anih ing hu hy. **39** Cehlai ni pakhqi ing ak awi ce am ngai pe uhy. Anih ce oehl lat unawh amik kawlungkhqi ce Izip benna hawi sak uhy. **40** Aaron a venawh, ningnih a haiawh ak cet aham khawsakhi sai law. Izip qam awhkawng ningnih anik sawikung Mosi ve – ikawmyihna a awm hy voei amni sim voel hy! tina uhy. **41** Cawh waitaw ca myihlip ce ana sai uhy. A mimah a kut sai a venawh bulnaak sai unawh awmhlynaak ce sai uhy. **42** Cedawngawh Khawsa ing a mingmih ce hawi taak khqi nawk, khawngi nakaw ik-oeikhqi bawk aham cekkhqi ce pehy. Tawngkhakhi a cauk awh: 'Aw Israelkhqi aw, kum phlikip khui qamkoh awh kai a venawh bulnaak ingkaw them peek aham nami haw law nawk nu? **43** Nangmih ing bawk aham nami sai, Molek a bawkthang ingkaw na mimah a khawsa Rephah a alihci ceni nami zoeksang hy. Cedawngawh Babilon a voel benna tamnaa na ni tyi khqi kawng nyng, tinawh ana qee ingqawi cah qu boek hy. **44** Ni pakhqi ing qamkoh awh a mimah anglak lawawh simpyinaak hi im ce ana ta uhy. Cawhkhaw hi im taw Mosi a venawh Khawsa ing huh nawk am huh amyihna sa uhy. **45** Khawsa ing Josua sawinaak ak caming a haiawh kaw qam khuiawh ak awmkhqi ce ahqek peek

coengawh, hi im ce ni pakhqi ing khyn uhy. David khuk dyna ce hi im ce awm hyn hy. **46** Ce David taw Khawsak a huhlynaak hunawh Jakob Khawsa a awmnaak hun sak peek aham ana theoh hy. **47** Cehlai Solomon ing ni im ce a sak peek hy. **48** Cehlai sawsang soeilhawh ak awm Khawsa ce thlanghqing a kut sai im awh am awm hy. **49** Khawk khan ce ka ngawihdoelh na awm nawk, khawmdek ve ka khaw tloengnaak na awm hy. Ikwamyih im nu nang ing na sak law kaw? tinawh Bawipa ing' tihy. Am awhtaw kang dymnaak hun ce han awh nu a awm kaw? **50** Kai a kut ing ni vemyihkhqi boeih ve a sai ka ti my? tinawh tawngtha ing ak kqawn amyihna. **51** Nangmih thinsah, kawtikal hakpangkhqi! Nami pakhqi amyihna awm boek uhyk ti: Ciim Myihla ce oehl quiqah uhyk ti! **52** Nami pakhqi ing a mami thekhanaak tawngtha u nu a awm? Thlakdying ak law hly anak kqawn oepchoehkhqi ce awm ana him uhy. Nangmih ing anih ce thlang a kut awh thak unawh him uhyk ti. **53** Khan ceityihkhqi ak caming anaa awi ce hu toengloeng hla uhyk ti, am ngai sai laklaw uhyk ti," tinak khqi hy. **54** Ce ak awi ce a ming zaak awh amik kaw so nawk Stephen ce ami ha tah sih uhy. **55** Cehlai Stephen ce Ciim Myihla ing be nawk, khan ben ang mangawh Khawsa a boeimangnaak ingkaw Khawsa ak tang benawh ak dyi Jesu ce hu hy. **56** Stephen ing, "Toek lah, khawk khan awng qu nawk, Khawsa ak tang benawh ak dyi Thlanghqing Capa ce hu nyng," tinak khqi hy. **57** Cawh a mingha ce byp unawh, khawteh na amik khy coengawh, a venna ce dawng uhy. **58** Khaw voel na sawi unawh lung ing thlak uhy. Cawh diyhthing na ak awmkhqi ing cadawng Saul a hawkung awh a hibai khqi ce taak pe uhy. **59** Anih ce lung ing amik thlak awh, "Bawipa Jesu, kang myihla ve do lah," tinawh cykcah hy. **60** Cekcoengawh koep nawh, "Bawipa vekkhqi a thawlhaaka ve koeh thung kawp ti," tinawh khy hy. Ve ak awi ak kqawn coengawh ip pahoei hy.

8 Saul awm cawh awm nawk, anih a thihihnaak ce tyng hy ti pyi khqi lawt hy. Ce tloek awh Jerusalem khaw awhkaw thlangboel ce ami the ami khanaak a dawngawh, ceityihkhqi kqawn kaana thlang boeih ce Juda qam ingkaw Samaria qam na poeng boeih uhy. **2** Khawsak thlangkhqi ing Stephen ce pup unawh amik kaw se hy. **3** Cehlai Saul ingtaw thlangboel ce hqe hy. Im pynoet coengawh thawngim na thlak khqi hy. **4** Ak cenkhqi ing ami phanaak a hoei awh awi ce khypyi uhy. **5** Philip ing Samaria khaw pynoet awh cet nawk Khrirh akawng ce kqawn hy. **6** Thlang kqeng ing Philip ak awi ce za unawh kawpoek kyi them a sai ce ami huh awh, anih ak awih kqawn ce ak nep cana ngai pe uhy. **7** Khy doena qaachekhqi ce thlang ak kawk khuiawh kawng cawn uhy, ak khawnkhqi ingkaw khaw ak khemkhqi ing oeqi uhy. **8** Ce a dawngawh ce a hawk khuiawh kaw thlangkhqi ce zeel soeih uhy. **9** Ce a hawk khuiawh Simon ak mingnaak thlang pynoet ing miklet sai nawk Samaria thlangkhqi ce amik kawpoek ana kyi sak lawt hy. Amah ingkaw amah ce thlang mailai am amyihna kqawn qu hy. **10** cedawngawh thlang boeih, thlak nem thlang sang ing ak awi ce ngai pe unawh, "Ve ak thlang ve khawsa a saithainaak Bau ami ti, ceni ve," ti uhy. **11** Anih ing miklet ing cekkhqi ce a ming ngaih a kyi sak hawh a dawngawh cekkhqi ing a hu awh hqut uhy. **12** Cehlai Philip ing Khawsa qam ingkaw Jesu Khrirh ang ming ak khypyi ce a ming zaak awh cangna unawh nu na pa na pa baptismus ce hu uhy. **13** Simon amah ingawm cangna nawk baptismus ce hu lawt hy. Cedawngawh Philip a cehnaak a hoei awh ce bat nawk kawpoek kyi them a saikhqi a huh awh ak kawpoek kyi soeih hy. **14** Jerusalem awh amik awm ceityihkhqi ing Samari awhkaw thlangkhqi ingawm Khawsak awi ce cangna hawh lawt uhy tice a ming zaak awh Piter ingkaw Johan ce tyi uhy. **15** Cekqawi ce ani pha awh, **16** Ciim Myihla ce a mingmih ak khan awh pha hlan hy;

Bawipa Jesu ang ming awh baptisma doeng ni ami huh hyn hy. 17 Piter ingkaw Johan ing cekkhqiq khan awh kut tloeng pe nih nawh, cekkhqiq ing Ciim Myihla ce hu uhy. 18 Ceityihkhqi a kut tloengnaak ak caming Ciim Myihla ami huh ce Simon ing a huh awh, cekqwai a venawh tangka pe nawh, 19 Kai ing kut ka tloeng peek thlang ing Ciim Myihla a huhnaka lawt aham, cawkaw saithainaak ce kai a venawh ni pe lawt lah nih," tina qawi hy. 20 Piter ing, "Khawsa a kutdo ce tangka ing thlaih aham nak poek a dawngawh, na tangka ingqawi plam bawk nih! 21 Khawsa haiawh nak kawlung ama thym a dawngawh, ve a bibinaak awh ve nang a sai kawi ikaw awm am awm hy. 22 Vawhkaw them amak leek nak poeknaak ve zut nawhtaw Bawipa venawh cykcah lah. Ceamylhna nak kawlung nak poeknaak ce Bawipa ing queenkaw ang ngai law khoem awn hoeih doeng. 23 Nainaak kawlung ing be tiksaw thawlhnaak ing nim tu hawh tice hu nyng," tina hy. 24 Cawh Simon ing, "Nak kqawnkhqi ce kak khanawh a mang tlaaknaak aham, Bawipa venawh cykcahnaak ta law lah," tina hy. 25 Bawipak awi ce thlang a venawh sim sak nih nawh anik khypyi coengawh, Samari khaw khawzah awh awithang leek ce anik khypyi doena Piter ingkaw Johan ce Jerusalem na hlat hy nih. 26 Bawipa ak khan ceityih ing Philip a venawh, "Khan ben lam na ce cet lah - cetaw qamkoh lam na awm nawh – Jerusalem awhkawng Geza na cehnaak lam na awm hy," tina hy. 27 Cedawngawh anih ce cet hy, lam awh Ethiopia khawpa boei ingqawi hqum hy nih, anih taw Ethiopia sangpahraun nu Kandaki a khawthhem ak khoemkung na awm hy. Anih ce Jerusalem na Khawsa ak bawk aham cet hy, 28 im na ang hlat awh meqang awh ngawi nawh tawngtha Isaiah cauk ce noet hy. 29 Myihla ing Philip a venawh, "Cawkaw meqang a venna cet nawhtaw a venawh awm pe lah," tina hy. 30 Philip ce meqang leng a venna dawng hy, cawk ce ak thlang ing tawngtha Isaiah ak cauk a noet ce za hy. "Na noet ce nak zasim nu? tinawh Philip ing doet hy. 31 Anih ing, "U ing amak kqawn caih law ce ikawmyihna keng zaak simnaak thai kaw?" tina hy. Cedawngawh Philip ce khy nawh kutoet na ngawi hainh hy nih. 32 Cakciim a noet taw: "Him aham ak awm tuu amyihna sawi unawh, a myi ak vok peekkung a haiawh ak awm dym tuucamyihna, anih ing am kha am ang hy. 33 Chahqai na amak thym na awideng uhy. U ing nu a cadilkhqi kawng ce ak kqawn thai kaw? Khawmdek awhkawng a hqjngnaak ce ami lawh peek a dawngawh," a tive noet hy. 34 Ce boei ing Philip ce doet hy, "Qeenaaak ing kqawn law lah, tawngtha ing ve u akawng nu ak kqawn, thlang akawng nu ak kqawn?" tina hy. 35 Cekcoengawh Philip ing cawkaw cak ciim awi ing Jesu ak awithang leek ce kqawn pehy. 36 Lam ani ceh hainh awh ce, tui a awmnaak hun pha nih nawh ce a boei ing, "Toek lah tui vawh awm hy ve. Baptisma am ka hu hly thai nawh nu?" tina hy. 37 Philip ing, "Nak kawlung boeih ing nak cangnaak awhtaw hu hly thai hyk ti," tina hy. Cawk boei ing, "Jesu Khrish taw Khawsa Capa ni ti cangna nyng," tina hy. 38 Cedawngawh meqang ce dym sak hy. Cekcoengawh Philip ingkaw boei ce tui a awmnaak na cet nih nawh Philip ing baptisma ce pehy. 39 Tui a awmnaak awhkawng a ni hang law tlaih awh ce, Bawipa Myihla ing Philip ce ak chang na khyn valh hy, cedawngawh ce a boei ing anih ce am hu voel hy, cehlai zeel doena a khaw benna ce cet poe hy. 40 Philip ce Azota khaw awh dang tlaih nawh Si a khaw a pha hlan dy lam awhkaw khaw a hoi awh ce awithang leek khypyi hy.

9 Ce thoeck awh, Saul ing Bawipa a hubatkqi ce him aham teng poepa hy. Khawsoih boei khyt a venna cet nawh, 2 Damaska khaw awhkaw sinakawk na ceh thainaak ak ca ce thoeh hy, cawk lam awhkaw thlangkhqi ce a huh awthaw, nu awm pa awm tu nawh Jerusalem thawngim na khyn aham cai hy. 3 Damaska khaw a pha tawm lam awh, khaw khan nakaw vangnaak ak bau soeih ing anih ce coei qawngtheng hy. 4 Dek na tlu nawh awi ing,

"Saul, Saul ikaw tinawh nu kai nani thekhanaak?" tina hy. 5 Saul ing, Nang u nu, Bawipa? tina hy. Awi ing, "Na thekhanaak Jesu kai ni. 6 Tuh tho nawhtaw khawk khuina cet lah, cawk na sai hly kawi ce kqawn law bit kaw," tina hy. 7 Saul mi amik cet hainh thlangkhqi ce awimyh na dyi hqoeng uhy; awi taw za lawt hlai uhy, thlang taw am hu uhy. 8 Dek awhkawng Saul ce tho hy, cehlai a mik dai saw ikaw awm am hu thai hy. Cedawngawh anih ce a kut awh tu unawh Damaska khawk khuina sawi uhy. 9 Khaw thum voei a mik hyp nawh buh awm am ai hy. 10 Damaska khaw khuiawh Ananias ak mingnaak hubat thlang pynoet awm hy. Bawipa ing anih ce hui saknaak ing, "Ananias" tinawh khy hy. 11 Bawipa ing, "Lam dyng awh ak awm Juda a im na ce cet nawhtaw, Tarsu khaw awhkaw Saul ak mingnaak thlang ce doet lah, anih ce tuh cykcah hui hy. 12 Anih ing hui saknaak awh Ananias ak mingnaak thlang ing a mik ang dangnaak thai aham ak khan awh kut tloeng peek aham a law ce hu hawh hy," tina hy. 13 Ananias ing, "Bawipa, ve ak thlang ing Jerusalem khaw khuiawh nak thlak ciimkhqi a thekhanaak akawng a mik kqawn khawzah za nyng. 14 Khawsoih boeikhqi venawh kawng saithainaak ce lo nawh nang ming ak kqawnkhqi boeih ce tu aham vena law hy," tina hy. 15 Cehlai Bawipa ing Ananias a venawh, "Cet! ve ak thlang ve Gentelkhqi ingkaw a sangpahrangkhqi ingkaw Israel thlangkhqi haiawh kang ming ak khypyi aham tyk hawh nyng. 16 Kang ming ak camawh khuikhanaak iqyt nu a hui kaw, tice kai ing hui bit kawng nyng," tina hy. 17 Cekcoengawh taw Ananias ce im na cet nawh ipkhuu na lut hy. Saul ak khan awh a kut tloeng pe nawh, "Ka na Saul, vena na law awh lani na na venawh ak dang Bawipa Jesu ing – na mik ang dangnaak tlaih aham ingkaw Ciim Myihla ing na benaak aham kai ve ni tyi hy," tina hy. 18 Cawh Saul a mik awhkawng a khel amyihna tla nawh, a mik ce dang tlaih hy. Tho nawh baptisma hu pahoei hy. 19 Buh a ai coengawh, ak tha awm tlaih hy. Hubatkqi mi Saul ce Damaska khaw khuiawh khawqyt awm hy. 20 Jesu ve Khawsa Capa ni tinawh sinakakkhqi awh kqawn pahoei hy. 21 Anih ak awi a mik zakhhqi boeih ce a mik kawpoek kyi nawh, "Anih ve Jerusalem khaw khuiawh ve Jesu ang ming ak kqawnkhqi boeih ak thekhanaak thlang amyihna awm hlai hy ti? Cekkhqi ni khawsoih boeikhqi venawh thawng awh thlaak aham ni vena a law?" ti uhy. 22 Cehlai Saul taw ak tha awm hui kqhoet khqoet hy, Jesu taw Khrish ni tice dyihpyi nawh, Damaska khaw awh ak awm Judakhqi ce noeng khqi hy. 23 Khawngi khawqyt ca a awm coengawh, Judakhqi ing him aham teng uhy, 24 cehlai cekkhqi ang cainaak ce Saul ing sim hy. Khawmthan khawdai anih him thainaak aham vawng chawmkengkhqi awm mah uhy. 25 Cehlai a hubatkqi ing khawmthan awh ceh pyi unawh, vawng ak khan nakawng vaihqang awh nuk thla dym uhy. 26 Jerusalem a pha awh, hubatkqi mi huh qu aham sui hy, cehlai cekkhqi ing kqjh uhy, hubat am tang vani hy voei tinawh poek uhy. 27 Cehlai Barnaba ing ceh pyi nawh ceityihkhqi venna khyn hy. Saul ing lam awh Bawipa a huhnaka ingkaw Bawipa ing a venawh awi ak kqawn peek akawng ingkaw Damaska khaw awh kqjhnaak a taak kaana Bawipang ming ing awi ak kqawn akawng khqi ce kqawn pek khqi hy. 28 Cedawngawh Saul taw cekkhqi venawh awm nawh Jerusalem khaw khuiawh ngaihding na thoeck hy, Bawipang ming ing qaalleeknaak ing awi ce kqawn hy. 29 Greek awi na amik pau Judakhqi mi oell qu unawh awi ce kqawn pek khqi hy, cehlai cekkhqi ing anih ce him aham ngaih uhy. 30 Koeinaakhqi ing ce akawng ce ami sim awh, anih ce Kaiserea khaw na nu ceh pyi uhy, cekcoengawh Tarsu khaw na tyi uhy. 31 Cekcoengawh taw Juda qam, Kallli qam ingkaw Samari qam awh amik awm thlangboelkhqi ce ngaihding na awm uhy. Ciim Myihla ing a mingmih ce thaawm sak hy; tha pe nawh pung a tai khqoet khqoet uhy, Bawipa kqjhnaak ing khaw sa uhy. 32 Piter ce

khaw lawngkhqi na cet nawk, Lydda khaw awhkaw thlak ciimkhqi hqip aham cet hy. 33 Cawh ce Ainea ak mingnaak thlang pynoet, khaw kup kgeet amak tho thai khawkkhem ce hu hy. 34 Piter ing a venawh, "Ainea, Jesu Khrif ing ni qoei sak hawh hy. Tho nawhtaw na hi ce khyn hlah," tina hy. Cawh Ainea ce tho pahoei hy. 35 Lydda ingkaw Shaqon awh ak awm thlangkhqi boeih ing ami huh awh Bawipa benna hawi uhy. 36 Joppa khaw awh Tabitha ak mingnaak hubat thlang pynoet awm hy (ve ve Dorka tinawh leh uhy); anih taw ik-oeih leek ak sai ingkaw khawdeng khuikakhqi ak dawm ak hlaikung na awm hy. 37 Ce tloek awh anih ce tlo nawh thi hy, a pum ce ami silh coengawh ip khanna ta uhy. 38 Lydda khaw taw Joppa khaw awhkawng zoe ca hy; hubatkqi ing Lydda khaw awh Piter awm hy ti a ming zaak awh, thlang pakkhih tyi unawh, "Ang tawnna law cang lah!" tinawh qeenaaak thoeh sak uhy. 39 Cekkqawi a hu ce Piter ing hqut nawh, a pha awhtaw anih ce a khan ipkhui na ceh pyi uhy. Nuhaikhqi boeih ing anak chung unawh kqang uhy, Dorka ing cekkqqi mi ami awm haih awh a mingmih aham a sai peek quikhqi ingkaw hikhqi ce huh uhy. 40 Piter ing cekkqqi boeih ce ipkhui awhkawng ceh sak khqi hy; cekoengawh khuk sym nawh cykcah hy. Nu ak thi benna ce mang nawh, "Tabitha tho hlah," tina hy. Cawkaw nu ing a mik ce dai law hy, Piter ce ahuh awh tho nawh ngawi hy. 41 Piter ing a kut awh tu nawh thawh hy. Cekoengawh ak cangaak thlangkhqi ingkaw nuhaikhqi ce khy nawh cekkqqi a venawh ak hqjeng na pek khqi tlaih hy. 42 Ce ak awi ce Joppa khaw khuiawh thlang khawngkhak nawh thlang khawzah ing Bawipa ce cangna uhy. 43 Joppa khaw awh Piter taw mehvyn ak khqui Simon a im awh khawnghi iqtu nu awm hy.

10 Kaisarea khaw awhkaw thlang pynoet, Kornelia ak mingnaak ce awm nawh, anih taw Italy qalkap zakhat ak ukkung na awm hy. 2 Anih taw a ipkhui kaw boeih ing Khawsa kqijh unawh amik bawk thlangkhqi na awm uhy; ak voet ak hlauh thlangkhqi ce bawm khqi nawh. Khawsa venawh ak cykcah poepla thlang na awm hy. 3 Hypoet awhtaw khawngkeng khawnoek pakthum a pha awh hatnaak ik-oeih hu hy. Khawsa ak khan ceityih ce law nawh a venawh, "Kornelia!" tina hy. 4 Kornelia ing ak kqijh doena toek ceet hy. "Bawipa ikaw?" tinawh doet hy. Khan ceityih ing, "Nak cykcahnaak ingkaw khawdeng hahqakhqi na do na dannaak ce Khawsa haiawh simpoenaak ham pha hawh hy. 5 Piter tinawh amik khy Simon ce khy tlaih aham tuh Joppa khaw na thlang tyi lah. 6 Anih ce mehvyn ak khquikung Simon a im awh awm hy, anih a im taw tuicunli a keng awh awm hy, tina hy. 7 A venawh awi ak kqawnkung khan ceityih ce a ceh coengawh Kornelia ing a tyihzawih thlang pakkhih ingkaw a tyihzawih awi ak ngai qalkap pynoet ce khy hy. 8 Ik-oeih a huh ingkaw ang zaak khqi boeih ce ak kqawn peek coengawh Joppa khaw na cekkqqi ce tyi hy. 9 A khawngawi nyu awm cet unawh khawk bau ami pha tawn khawnghyp awh lam na ce, Piter taw ipthi na cykcah aham kai hy. 10 Cawh ak phoen cawi nawh ai kawi pynoet oet ai aham ngaih hy, buh ami lawh peek li awh, huh saknaak ik-oeih ce hu hy. 11 Khan ak awng qu ce hu nawh hi a kil pupthli awh khan nakawng ik-oeih anuk thlaak law peek ce hu hy. 12 Ce ak khuiawh ce khaw puthli ak law qamsa soepkep ce awm nawh, dek awh ak cawlak tat ingkaw khan nakaw ak ding phakhqj awm awm hy. 13 Cawh awi ing a venawh, "Piter tho, him nawhtaw ai," tina hy. 14 Piter ing, "Am ai hly nyng, Bawipa! Amak ciimcaih ingkaw tuih ak cu ikawm am ai khawi nyng," tina hy. 15 Awi ing a hih voeinaak awh, "Khawsa ing a ciim sak ce nang ing am ciim hy koeh ti," tina hy. 16 Vemyihna thum voei dy a awm coengawh, hi ce khawk khan na dawh pe hy. 17 Piter ing cawkaw ik-oeih a huh ce ikaw hy voei nu, tinawh ak poek huiahw, Kornelia ak thlang tyihkhqi ing Simon a im ce hu unawh vawng chawmkeng awh ce dyi uhy. 18 Piter

tinawh amik khy, Simon ce im awh ak awm nu tinawh doet uhy. 19 Piter ing a them huh ce anak poek huiahw, Myihla ing a venawh, "Simon, thlang pakthum ing nang ni sui uhy. 20 Cedawngawh tho nawhtaw ipkai na nuk kqum lah. Cekkqqi hu awh bat ahm koeh tawngaa, kai ing ni cekkqqi ce ka tyih law hy," tina hy. 21 Piter ce nuk kqum nawh cekkqqi venawh, "Nangmih ing nami sui ce kai ni. Ikaw cainaak ing nami aw?" tinak khqi hy. 22 Cekkqqi ing, "Kaimih ve qalkap zakhat ukkung Kornelia a im awhkawng law unyng. Anih taw thlakdyng ingkaw Khawsa ak kqijh thlang na awm hy, cedawngawh Juda thlangkhqi boeih ing anih ve kqijchah uhy. Nang ak awihkqawn ngai aham khan ceityih ciim pynoet ing nang khy aham kqawn pehy," tina hy. 23 Cawh Piter ing cekkqqi ce ipkhui na khy nawh pah sak hy. Cedawngawh a khawngawi nyu awh tho nawh cekkqqi mi cet hiah uhy, Joppa khaw awhkaw koeinaakhqi awm cet lawt uhy. 24 A khawngawi nyu awh Kaisarea khaw ce pha uhy. Kornelia ing anih ce a na lamtoen nawh a cakaw pagengkhqi ingkaw a pyipawkhqi boeih ce kutoet na khy khqi hy. 25 Piter ce ipkhui na a lut awh, Kornelia ing do nawh a khawkung awh kqijchahnaak ing khuksym pehy. 26 Cehlai Piter ing thawh sak tlaih nawh "Kai awm thlanghqing lawt ni," tina hy. 27 Awi anik kqawn coengawh Piter ce ipkhui na lut nawh cawkaw ipkhui na thlang khawzah ak awm ce hu hy. 28 Cekkqqi venawh: "Juda thlang ingkaw Gentel thlang awm haih aham am ciim hy tice sim uhyk ti; cehlai u awm ciimcaih hy, am ciimcaih hy, niti kawi am ni tice Khawsa ing ni sim sak hy. 29 Ce a dawngawh thlang na minik khy law sak awhkawng a oelh kana law nyng. Cehlai ni doet khqi nyng, ikaw ham nanu nami nik khy?" tinak khqi hy. 30 Cawh Korelia ing, "Ni hu hitphli awh ce, ve atym khawngkeng khawnoek pakthum awh ka mah a im awh cykcah nyng. Cawh hi ak vang soeih ak bai thlang pynoet ce ka haiawh dyi nawh, 31 ka venawh, "Kornelia, nak cyhcahnaak ce sim peekna awm nawh, thlang venawh na them peek awm Khawsa ing sim hawh hy. 32 Ceamyihna awmsaw Joppa khaw na thlang tyi nawhtaw Piter ak mingnaak Simon ce khy sak. Anih ce tuicunli a kengawh ak awm, mehvyn ak khquikung, Simon a im awh khin na awm hy," ni tina hy. 33 Cedawngawh thlang tyi lawk tlang nyng, law tiksaw leek soeih hy. Tuh Bawipa ing kaimih a venawh anik kqawn sak khqi boeih ce ngai aham Khawsa haiawh cun law boeih unyng," tina hy. 34 Cekoengawh taw Piter ing awih kqawnnaak ce kqan hy, "Khawsa ing u a hai awm am toek hy tice tuh sim hawh nyng, 35 amah ak kqijh ingkaw ak thymna bi ak sai qampum awhkaw thlang boeih ce do hy. 36 Israel thlangkhqi venawh Khawsa ing awi pehy, thlang boeih a boei, Jesu Khrif ak caming ngaihqepnaak awithang leek ak kqawn peek ce nangmih ing sim uhyk ti. 37 Johan ing baptisma ak khypri coengawh, Kalili qam awhkawng kqan nawh Judah qam pum awhkaw ik-oeih ak awm ce – 38 Khawsa ing Ciim Myihla thaawmaak ing Nazareth Jesu a synpaak akawng ingkaw Khawsa ingqawi a awm haih a dawngawh, qaaiche ak thaawmaak ak kaiawh ak awmkhqi ce qoei sak nawh them leek a saikhqi ce sim uhyk ti. 39 Judakhqi qam ingkaw Jerusalem khaw khuiawh a sai ik-oeihkhqi boeih ak simpyikung dyihting na kaimih ve awm unyng. Anih ce thing awh tai unawh him uhy, 40 cehlai Khawsa ing anih ce thihnaak awhkawng am thum nyu awh thawh sak tlaih nawh thlang a huh awh dang sak hy. 41 Thlang boeih ing anih ce am hu hy, cehlai Khawsa amah ing ak tyh oepchoeh dyihting na ak awm, thihnaak awhkawng a thawh coengawh amah ingqawi buh a an ak ai hiah kaimih ing hu unyng. 42 Thlak hqing ingkaw thlak thi awideng aham anih doeng ni Khawsa ing a caksak hy, tice khypri aham ingkaw sim sak aham kaimih ve awi ni pek khqi hy. 43 U awm amah ce ak cangaak thlang boeih ing amah ang ming ak caming thawlq qeenkhaw ngainaak hu kaw, tice tawngkhakhqi boeih ing anak kqawn hawh uhy," tinak

khqi hy. 44 Piter ing ve ak awikhqi ve ak kqawn li awh, awi ak zakhqi boeih ak khan awh Ciim Myihla ce law hy. 45 Gentelkhqi khan awh awm Ciim Myihla kutto ce syp sihna a awm awh Piter ingkaw amik law hahui ak qeet ak cangnaak thlangkhqi ce amik kawpoek kyi hy. 46 Cekkhqi ing amsim awi na pau unawh, Khawsa a min kyihcak ce a ming zaak awh a mingngaihna kyi hy. Cekcoengawh Piter ing, 47 "U ing nu vekkhqi ve tui ing baptisma ama peek aham a kham peek thai kaw? Kaimih ing ka mi huh lawt amyihna a mingmih ingawm Ciim Myihla ve hu hawh lawt uhy," tina hy. 48 Cekcoengawh cekkhqi ce Jesu Khrish ang ming ing baptisma huh aham awi pehy. Cekkhqi ce khawnghi iqyt nu awm pyi cang aham Piter a venawh thoeh uhy.

11 Ceityikhqi ingkaw Juda qam pum awh ak awm koeinaakhqi ing Gentelkhqi ingawm Khawsak awi do hawh lawt uhy tice za uhy. 2 Cedawngawh Piter ce Jerusalem na a ceh awh, chahhui qeet ak cangnaak thlangkhqi ing coet uhy, 3 "Chahhui amak qeet thlangkhqi venna cet nawk a awk a ai," tina uhy. 4 Piter ing cawkaw ik-oeih akawng ce cekkhqi venawh ak ceet cana kqawncaih pek khqi hy. 5 Joppa khaw awh awm nyng saw kak cykah huiawh, huhsaknaak ce hu nyng. Hi ak bau soeih amyihna ak awm a kil pupthli ak law ik-oeih pynoet ce, kai ka awmnaak hun awh khan nakawng tla law hy. 6 Ce ak khui ce ka toek awh dek awhkaw a khaw pupthli ak awm qamsa soekperek ingkaw ak cawlak tat qamsakhqi khan nakaw phakhqi ce hu nyng. 7 Cawh awi ing ka venawh, 'Piter, tho lah. Him nawhtaw ai,' ni tina hy. 8 Kai ing, "Am ai hly nyng! Amak ciim caih ingkaw tuih ak cu ikawm kam khak khuiawh am lut man hy," tina nyng. 9 Khawk khan nakaw awi ing a hih voeinaak awh, 'Khawsa ing a ciim sak ce, ce nang ing am ciim hy koeh ti,' ni tina hy. 10 Cemiylna thum voei dy a awm coengawh, cawkaw ik-oeih ce khan na lo law tlaib hy. 11 Cawhke Kaiserea khaw awhkawng a tyih law thlang pakthum ce ka awmnaak im awhkaw vawng chawmkeng awb dyi uhy. 12 Ciim Myihla ing kawhawha taak kaana cekkhqi hu awb bat aham kqawn hy. Vawhkaw koeinaakhqi thlang kquk awm law lawt uhy. Cekcoengawh amik khy law sakkung thlang a im awh ce lut unyng. 13 Ce ak thlang a im awh khan ceityih dang pe nawk, 'Joppa khaw awh Piter tinawh amik khy Simon ce khy sak. 14 Anih ing namah ingkaw na ipkuikaw boeih thlang na na awmnaak hly kawi awithang ce haw law bit kaw' a tinaak awi ce kaimih a venawh kqawn law hy. 15 Cawh, awi kak kqawn cyk awhkawng, Ciim Myihla nik khanawh a pha law cyk awhkaw amyihna amik khanawh pha law hy. 16 Cawh Bawipa ing, 'Johan ing tui ing baptisma ce ni pek khqi hlai hy, nangmih ingtaw Ciim Myihla baptisma hu kawm uk ti,' a tice poek lawt nyng. 17 Bawipa ing ningnih ani peek khqi lawt amyihna Bawipa Jesu Khrish ak cangnaak cekkhqi a venawh awm cawkaw kutto ce a peek awhtaw, kai ve a u na nu ka awm nawk Khawsa ce oelh aham kak poek kaw? tinak khqi hy. 18 Ce ak awi ce a ming zaak awh coetnaak taak voel kaana Khawsa ce kyihcak uhy, "Cawhtaw Khawsa ing Gentelkhqi awm hqingnaak huh aham zut sak khqi hawh lawt hy ce," ti uhy. 19 Stephen thekhanaak awhkawng amik pek qukhqi ce Phoenicia, Kupra ingkaw Antiok khawkhqi na cet unawh Juda thlangkhqi ven doeng awh awithang leek ce kqawn pe uhy. 20 Cehlai a mingmih anglakawhkaw Kupra ingkaw Cygene khaw awhkawng ak law thlang vang tloek ce Antiok khaw na cet unawh Greek thlangkhqi venawh awm Bawipa Jesu ak awithang ce kqawn pe uhy. 21 Bawipa a kut ce a mingmih a venawh a awm dawngawh, thlang khawzah ing cangna unawh Bawipa benna hawi uhy. 22 Amingmih ak awithang ce Jerusalem awh ak awm thlangboelkhqi ang haa awh awithang na za uhy. Cedawngawh Barnaba ce Antiok khaw dy na tyi uhy. 23 Anih ce pha nawk Khawsam qeenakaak ce a

huh awh, kawlung boeih ing ak cak cana Bawipa awh awm poe aham zeel doena cekkhqi ce tha pek khqi hy. 24 Barnaba taw thlak leek na awm nawk, Ciim Myihla ingkaw cangnaak ing ak be thlang na awm hy. Cedawngawh thlang khawzah ce Bawipa venna sawi khqi hy. 25 Cekcoengawh Saul sui aham Barnaba ce Tarsu khaw na cet hy, 26 anih ce a huh awh, Antiock khaw na ce law pyi hy. Cedawngawh kum oet khui Barnaba ingkaw Saul ing thlangboel khuiawh thlang khawzah ce cawngpyi hy nih. Hubatkhqi ce Antiock khawawh lammacyk na "Khrihakhi" tinawh khy uhy. 27 Ce tloek awh tawngtha thlang u tloek nu Jerusalem awhkawng Antiock khawna cet uhy. 28 Cekkhqik khuiawh kaw Agaba ak mingnaak thlang pynoet ce dyi nawk Myihla simsaknaak ing Rom uknaa qam boeih awh khawkhanaak pha law kaw, tinawh khypyi hy. (Cawhkaw khawkhanaak ce Klaudia a boei vengawh pha hy.) 29 Hubatkhqi ing a mimah a mina khoek awh Judah awh ak awm koeinaakhqi ce pyi khqi aham kqawn uhy. 30 Cawhkaw pyinaak kutto ce a hqamcakhqi ing Barnaba ingkaw Saul a kut awh pat pe uhy.

12 Ce tloek awh kut thlak aham a ngaih dawngawh, Herod sangpahrang ing thlangboel khuiawh kaw thlang pynoet ce tuhy. 2 Anih ing Johan a na Jokop ce cimca ing him hy. 3 Cemiylna a sai ak caming Judakhqi zeel sak hy tice a huh awh, Piter awm tu aham cai hy. Ce a tym taw hen amak boei phaihipi poei na awm hy. 4 Piter ce am tu coengawh thawngim na thla nawk, qalkap bu pupthli, qalkap pupthli pupthli ce qeh sak khqi hy. 5 Cedawngawh Piter ce thawngim na tahi, cehlai thlangboel ing Khawsa venawh ak dung soeih na cykah pe uhy. 6 Herod ing awideng aham ang cainaak a nyn a pha tawm a khawthan awh, Piter ce qalkap pakkhih anglik law awb ip hy; thiuii pakkhihing khit uhy; cekcoengawh chawmkeng awb awm qaltoek ce dyi bai hy. 7 Kawhkhalk awh khan ceityih ce a venawh dyih pe law thlangim khui ce vangnaak ing coei pheng hy. Piter ce ak pep awh beeii nawk thawh hy. "Ang tawnna tho," tina saw ak kut awhkaw thiuii tla pahoei hy. 8 Cawh khan ceityih ing, "Na hi bai nawhtaw na khawmyk ce myk lah," tina hy. Ak kqawn peek amyihna Piter ing sai hy. "Na hi ce bai nawhtaw ka hu awh law lah," tinawh khan ceityih ing tina hy. 9 Piter taw cawn nawk a huawh cet hy; khan ceityih a bibi ve a takna am ngai nawk, ang myimang na ngai hy. 10 Qaltoek pynoetnaak ingkaw pakkhihnaak ce hah poeng nih nawk khawk khuiawh cehnaka thi chawmkeng ce pha hy nih. Chawmkeng ce amah poek awb cekqwai aham awng qawh cet poe hy nih. Lam pynoet ce ani ceh phat coengawh, khan ceityih ing ceita hy. 11 Piter ing, "Herod a kut khui ingkaw Judakhqi ing kak khan awh ik-oeih soekperek ami sainaak ak khuiawh kawng hul a ham Bawipa ing ak khan ceityih tyi law hy, tice tuh taw ak caih na sim hawh nyng," tiyhy. 12 Khaw a dai awhtaw, Marka tinawh amik khy, Johan a nu Meri a im na ce cet hy, Cawh ce thlang khawzah a nang cun unawh a nak cykah uhy. 13 Piter ing a leng nakawng chawh ce khoek hy, cawh Rodi ak mingnaak tyihzawih nuca pynoet ce chawmkeng na va cet hy. 14 Piter ak awi ce hat nawk, a zeel aih awh a huma dawng lat nawk, "Piter chawmkeng awb dyi hy!" tinawh khy hy. 15 Cekkhqi ing, "Am cyi hy ti," tina uhy. Cehlai anih ing a mantang na a tinaak khqi awb, "Ak khan ceityih vani hy voei," tina uhy. 16 Cehlai Piter ing chawh ce khoek khing hy, chawh ce a mim awng peek awhtaw, anih ce hu unawh a mingngaih kyi hy. 17 Piter ing a kut ing cekkhqi ce ami awm dymnaak aham hathaak a peek khqi coengawh, Bawipa ing ikawmyihna thawngim khuiawh kawng a loet sak tice kqawn pek khqi hy. Cekkhqi venawh, "Jakob ingkaw koeinaakhqi venawh kqawn law pe uh," tinak khqi hy, cekcoengawh ak chang na cet poe hy. 18 Mymcang awh, Piter a loet a dawngawh thawngim amik qeh galkapkhqi ce awi pung uhy. 19 Herod ing anih ce ak leek cana

sui sak nawk ama huk voel awhtaw, thawnung ak qeh qalkapkhqi ce awideng nawk thiik sak aham awi pehy. Cekcoengawh Herod ce Judah awhkawng Kaiserea na cet nawk cawh ce awm hy. 20 Tura ingkaw Sidon khaw awhkaw thlangkhqi mi anih ce anang hqo qu khing hawh uhy; cekkhqi ce kutoet na bawng qu unawh thlang kqeng mi za qu uhy. Sangpahrang a ypaum tyihzawih Blasta ang dyihpyinaak ce lo unawh, cekkhqi ing sangpahrang a qam ce buh a an lawhnaak aham a ming hangnaak na a awm a dawngawh, qoeplaak sai aham thoeh uhy. 21 Khawngi ami taaknaak a nyn a pha awhtaw, Herod ing a boei suisak ing thoei ang cam qu nawk, boei ngawihdoelh awh ang ngawih coengawh a venawh awi kqawn hy. 22 Cawkaw thlangkhqi ing, "Vawhkaw awi ve Khawsak awi ni, thlanghqi awi amni," tinawh khy uhy. 23 Herod ing thang leek kyihcahnaak ce Khawska venawh ama peek a dawngawh, Bawipa ak khan ceityih ing anih ce vyk pahoei hy, cheng ing ai nawk thi hy. 24 Cehlai Khawsak awi ce pung a tai khqoet khqoet hy. 25 Saul ingkaw Barnaba ing bibi ce anih boeih coengawh taw, Marka tinawh awm amik khy, Johan ce ceh pyi nih nawk, Jerusalem awhkawng hlat hy nih.

13 Antiock khaw awhkaw thlangboel ak khuiawh tawngkhqi ingkaw cawngpylkungkhqi ce awm uhy; cekkhqi taw Barnaba, Niger tinawh amik khy Simeon, Cygene khaw awhkaw Lucius, Herod a koeina hly Manen ingkaw Saul vetloek ve awm uhy. 2 Cekkhqi ing Bawipa bibi unawh buh zeih cykcahnaak ami taak huiawh Ciim Myihla ing, "Kai aham Barnaba ingkaw Saul ce ka bi ak bi ham ka taak kqawi amyilhna ni hoep pe uh," tina hy. 3 Cedawngawh buh zeih unawh ami cykcah coengawh, cekqawi ak khan awh kut tloeng unawh amiik cykcah peek coengawh tyi uhy. 4 Cecoengawh Ciim Myihla ing a tyih qawi amyilhna Silucia na nu cet nih nawk cawkawng Kupra benna lawng ing cet hy nih. 5 Salamis khaw anih pha awh, Judakhqi a sinakawk awh Khawsak awi ce khypyi hy nih. Johan awm anih bi ak bina ceh pyi lawt hy nih. 6 Cawkaw tuilak cung awh ce cet phat nih nawk Paphos khaw ce pha uhy. Ce a khaw awh Juda phyn miklet ak thoem tawngwa qawl Bar - Jesu ak mingnaak thlang pynoet ce hu uhy. 7 Anih taw Rom qam ukkung Sergia Paula a venawh awm hy. Cawkaw qam ukkung cetaw thlacyi na awm nawk, Khawsak awi ce zaal aham a ngaih a dawngawh Barnaba ingkaw Saul ce thlang tyi nawk khy sak hy. 8 Cehlai Rom qam ukkung ing cangnaak ce ang hawi taak thainaak aham miklet ak thoem Elima (ce ce anih ang ming kqawn ngaihnaak ni) ing cekqawi ce ana oelh hy. 9 Cawk Paul tinawh awm amik khy Saul ce Ciim Myihla ing be nawk, Elima ce a toek hqeeet coengawh, 10 "Nang ve qaai a cana na awm a dawngawh ik-oehi ak thym boeih a qaal na awm hyk ti! Thailatnaak soepkep ingkaw qaaikqawnaak ing be hyk ti. Bawipa a lam ak thym na kawi sak ve amna qoeng hly nawk nu? 11 Bawipa a kut ce nak khan awh awm hawh hy. Na mik hyp kawmsaw, tuhkawng khawkbce ce am hu voel kawp ti," tina hy. Kawlkhalkh awh khawmai ingkaw thannaak ce ak khan awh pha pe saw, kutawh tu nawk ak sawi aham thlang thoem hyhy hy. 12 Qam ukkung ing cawkaw a them sai ce a huk awh, cangna hy, Bawipa akawng cawngpyinaak awh ak kawpoek na kyi hy. 13 Paphos khaw awhkawng Paul ingkaw a pyikhqi ce Pamphylia qam khuiawh kaw Perga khaw na ce lawng ing cet uhy, cawk Johan ing cekkhqi ce Jerusalem na hlat taak khqi hy. 14 Perga khaw awhkawng Pisidian Antiock khaw na ce cet uhy. 15 Anaa avi ingkaw tawngwa caukkhqi noetnaak a awm coengawh, sinakawk ukkungkhqi ing cekkhqi venawh, "Koeinaakhqi thapeek awi kqawn aham nami taak awhtaw, kqawn thai uhyk ti," tinak khqi hy. 16 Paul ing dyi nawk thlang boeih ce a kut ing zap khqi nawk: "Israel thlangkhqi ingkaw Khawska ak bawk nangmih Gentelkhqi aw, kak awi ve ngaih lah uh! 17 Israel thlangkhqi a Khawska ing

ningnih a pakhqi ce anak tyk hy; Izip qam awh ami awm awh cekkhqi ce boei a mang sak khqi hy, a boeinang thaawm kut ing cekkhqi ce qam khuiawh kawng sawi khqi tlaih hy, 18 a mingmih a khawboe qamlang ce qamkoh awh kum phlikip khuiawh yh hy, 19 anih Kanan qam khuiawh kaw qam khqih ce noeng pe nawk qam ce cekkhqi avenawh qo na pehy. 20 Vemyihkhqi ve kum zali coengawh hakip dii hy. Cekcoengawh Khawska ing cekkhqi ce tawngwa Samuel a awm hlan dy awidengkungkhqi ana pehy. 21 Cekcoeng awhkawng thlangkhqi ing sangpahrang ce ana thoeh unawh, cedawngawh Benjamin kaw ak khuiawh kaw Kish a capa Saul ce ana pek khqi hy, anih ing kum phlikip ak khuiawh ana uk khqi hy. 22 Saul ce a goeng coengawh, David ce sangpahrang na taak pek khqi hy. David awh ce anih ing: 'Kamah ak kawlung amyilhna ak awm Jesse a capa David ce hu hawh nyng; kai ing sai sak aham ka ngaih ce anih ing sai boeih kaw,' tiyh. 23 Ce ak thlang a cadil khui awhkawng Khawska ing Israelkhqi venawh awi a taaknaak amyilhna hulkung Jesu ce pehy. 24 Jesu a law hlanawh Joham ing zutnaak ing baptisma akawng ce Israelkhqi boeih a venawh anak khypyi hy. 25 Johan ing amah a bibi ak coeng tawm awh: 'Kai ve a u nu tinawh namik poek? Kai taw anih amni. Cehlai ka hu awh ni a law hly hyn hy, anih a khawmyk qui ak hlam peek aham zani am kawi hnyng,' tiyh. 26 Koeinaakhqi, Abraham a cakhqi ingkaw nangmih Khawska ak khqi Gentel thlangkhqi aw, cawkaw tulnaha awithang ce ningnih a venawh pat law hawh hy. 27 Jerusalem khaw awhkaw thlangkhqi ingkaw a mingmih ak ukkungkhqi ing Jesu ce am hat uhy, Sabbath a hoiawh ami noet tawngkhqik awi ce a soepnaak aham anih ce thawlak sak kuphlet uhy. 28 Thih sak thainaak aham a thawlhaak awm am hu hlai uhy, him thainaak aham Pilat a venawh thoeh uhy. 29 Anih akawng qee hyt na ak awmkhqi boeih ce ami sai peek coengawh, thing awhkawng lo unawh phyi awh pup uhy. 30 Cehlai thihnaak awhkawng Khawska ing anih ce thawh tlaih hy; 31 khawngi khawzah amah inggawi Kalili awhkawng Jerusalem na ak cekkhqi mi hu qu uhy. Cekkhqi ce ningnih thlangkhqi venawh simpylkung na awm uhy. 32 Cedawngawh awithang leek ve ka nik kqawn peek khqi: Ni pakhqi venawh Khawska ing awi ana taak ce, 33 Jesu a thawh tlaihnaak ak camping, ningnih a cakhqi venawh soap law sak hawh hy. Saam pakkhihaak: 'Nang taw ka capa na awm hyk ti; tuhgawi awh na pa na awm nyng,' tinawh ana qee amyilhna. 34 Khawska ing anih ce ama hawnaka zip qoe qoe aham, thihnaak ak khuiawh kawng am thawh tlaihnaak awh ce vemyilhna kqawn hy: 'David a venawh ak ciim ingkaw zoseennaak awikam ka taak ce ni pe kawng nyng,' tinawh. 35 Hun ak chang awh vemyilhna qee bai hy: 'Nak thlang ciim ce ityk awh awm am thu sak zip kawp ti,' ti bai hy. 36 David ing Khawska ang cainaak ce amah a khuk khuiawh a bi boeih coengawh thi hy; a pakhqi venawh pup unawh a pum ce thu zip hawh hy. 37 Thihnaak awhkawng Khawska ing am thawh tlaih thlang cetaw am thu zip kaw. 38 Cedawngawh ka koeinaakhqi, Jesu ak camping thawlak qeenkhawng ngainaak ce nangmih a venawh khypyi na awm hy tive sim sak aham ni ngaih khqi nyng. 39 Mosi a anaa awi ak camping am hu thai hlai uhyk ti, ak cangnaak thlangkhqi boeih taw anih ak camping dyngnaak ce hu hy. 40 Tawngwa ing anak kqawn hyt awi ce nangmih ak khan awh ama pha lawnaak aham ngaihla lah uh: 41 'Toek lah uh, nangmih thlang ak hepkhqi, namik kawpoek kyi sak unawh qeeng qeeng, thlang ing ak kqawn law awh awm, amna mik cangnaak qoe qoe aham, na hqiqing khuiawh ik-oehi sai law kawng nyng, tinawh ana qee hyt awi ve,' tinak khqi hy. 42 Paul ingkaw Barnaba ing sinakawk awhkawng anih ceh awh, ce akawng ce hai Sabbath nyn awh kqawn peek tlaih aham thlangkhqi ing ceeli uhy. 43 Thlang kqeng a ceh coengawh, Juda thlang khawzah ingkaw Juda phungna ak hawi qu Khawska ak khqi thlangkhqi ing Paul ingkaw

Barnaba a hu ce hqut uhy, cekqawi mi awikqawn unawh, cekkqi ce Khawsa qeenaaak ak khuiawh awm poe aham awikqawn pe hy nih. **44** Sabbath nyn a pha tlaih awh awm khawk khui awhkaw thlang ak kuum ngai taw Bawipa awi ak ngaih aham law uhy. **45** Judakhqi ing thlang kqeng ce ami huh awh tlai se unawh amak thym na Paul ak awih kqawn ce oelh pe uhy. **46** Cedawngawh Paul ingkaw Barnaba ing cekkqi ce qal leeknaak ing awi hlat pe hy nih: "Khawsak awi ve nangmih a venawh kak kqawn maa aham awm hy. Cehlai nangmih ing oelh u tiksaw na mimah ce kumqui hqingnaak ing ak kawih na amna mik poek a dawngawh tuh taw Gentelkhqi benna ni ka ming mang hly hawh hy. (*aiōnios g166*) **47** Ikawth Khawsa ing vemyihna awi ni pe qawi hy: 'Gentelkhqi vangnaak na nang ve ni sai hawh nyng, khawmdek a dynaak dyna hulnaak ce na khynnaak aham,' ti ak awi ve," tina hy nih. **48** Gentelkhqi ing ce ak awi ce a ming zaak awh, zeel unawh Bawipak awi ce zoeksang uhy; kumqui hqingnaak huh aham a hoep thlangkhqi ing cangna uhy. (*aiōnios g166*) **49** Bawipak awi ce ce a qam pum awh thang hy. **50** Cehlai Judakhqi ing Khawsa ak kqih dyih hun ak sang nukhqi ingkaw khawk khuiawh kaw ukkung thlangkhqi ce cuih uhy. Paul ingkaw Barnaba ce the a kha na unawh ce a qam khui awhkawng hqek uhy. **51** Cedawngawh cekqawi ing cekkqi a mami ngaih huh saknaak na ani khaw awhkaw dekpli ce khawk sih nih nawh Ikonium khaw na cehta hy nih. **52** Hubatkqi ce Ciim Myihla ing be unawh zeel soeih uhy.

14 Ikonium khaw ani pha awh Paul ingkaw Barnaba ce ani ceh khawi amyihna Judakhqi a sinakawk awh cet hy nih. Ce a khaw na awi anik kqawn awh Juda thlang ingkaw Gentel thlang khawzah ing ak awi cangna uhy. **2** Cehlai cangnaak aham amak ngaih Judakhqi ing Gentelkhqi ce cuuk khqi unawh, cekkqi ami sawhnaak aham ti pyikhqi uhy. **3** Cedawngawh Khawsa awh qaalleeknaak ing awikqawn nih nawh cawh khawqet awm hy nih. Noeknaak ingkaw kawpoekkyi them saithainaak khqi ani kuit awh pe qawi nawh, a lungnaak awi ce sim sak qawi hy. **4** Cawh khawk khuiawh kaw thlangkhqi ce pakkih na pek qu uhy; thlang vang ing Judakhqi bawng unawh, thlang vang ing ceityih qawi ce bawng uhy. **5** Gentelkhqi, Judakhqi ingkaw ukkungkhqi ing aningnih ce chah phyih sak ham ingkaw lung ing deem aham cai uhy. **6** Cehlai cekqawi ing sim nih awh Likonia khaw awhkaw Lustra khaw, Derbe khaw ingkaw a kengsam khawkhqi na cen hy nih, **7** ce a qam khuiawh awithang leek ce khypyi hy nih. **8** Lustra khawawh, a thang awhkawng a khaw khem nawh, khaw ing amak cet man, thlang pynoet awm hy. **9** Anih ing Paul ak awih kqawn ce ngai hy. Paul ing anih ce toek ceet ceet nawh, qoeinaak khoek cangnaak tahiye tice sim hy, **10** cedawngawh, "Na khaw ing dyi lah!" tina hy. Cawh ce pet nawh cet pahoei hy. **11** Paul a them sai ce thlang kqeng ing a huh awh, Likonia awi na, "Khawsa qawi ve thlanghqing amyihna ningnih a venawh law hawh hy!" ti unawh khy uhy. **12** Barnaba ce Zeus tina unawh, Paul ce awih kqawnkung na a awm a dawngawh Hermes tina uhy. **13** Khaw kengawh ak awm Zeus khawsoeih ingawm hyih phum ham a ngaih awh vaitaw ingkaw khqi aawi ce vawng chawmkeng awhkaw thlang kqeng ahaiaawh law pyi nawh, ce thlang kqengkhqi mi hyihphum hamna cai uhy. **14** Cehlai ceityih qawi Paul ingkaw Barnaba ing ce ak awi ce a ning zaak awh, ani hi tiik nih nawh thlang kqeng ak khuiina lut hy nih: **15** "Ikaw hamna veve sai usih nami ti? Kainih awm nangmih amyihna thlanghqing lawt ni ka ti, nangmih a venawh awithang leek ni ka ni haw law hy, vemyih a them ikaw na amak coengkhqi ve cehta unawh ak hqing Khwsa khawk khan ingkaw khawmdek, tuicunli ingkaw ak khuiawh ak awm a soep ak synkung benna naming hlat aham ni ka nik kqawn law hy. **16** Ni hu awh ce Khawsa ing, thlangphyn boehi ce amah ak kawngaihnaak amyihna ceh sak hy.

17 Cehlai ikaw simpyinaak a awm kaana amah doeng ce am awm hqoeng hy: Nangmih a venawh khawk khan nakawng khaw aa law sak hy, a tym a tang awh tawi a ankhqi ni pek khqi hy; awk-ai khawzah ni pek khqi nawh namik kawlung ngaih a qep saknaak ak caming am qeenaaak ce dang law sak hy," tinak khqi hy. **18** Vemyihna awi ak kqawn peek coengawh awm, thlang kqeng ing cekqawi a venawh hyih amak phumnaak aham kham pe tloei hy nih. **19** Cawh Antiock khaw awhkawng Judakhqi law unawh thlang kqeng ce noeng uhy. Paul ce lung ing khawng unawh, wavng a ceng na sawi uhy, thi hawh namih hy tina poek uhy. **20** Cehlai hubatkqi ing amik chung khoep awh, Paul taw tho nawh khawk khuiina cet tlaih hy. A khawngawi nyn aw Barnaba ingkawi Derbe khaw na cet hy nih. **21** Ce a khawk khuiawh awithang leek kqawn nih nawh hubat khawzah hu hy nih. Cekcoeng awhkawng Lustra, Ikonium ingkaw Antiock na hlat tlaih nih nawh, **22** hubatkqi ce tha ani peek coengawh cangnaak awh awm poe aham awi kqawn pe hy nih. "Khawsa qam khuiawh lut aham kyinaak soepkep ve ni huh aham awm qoe hy," tina hy nih. **23** Ami cehnaak thlangboel qip awh sawikung ce tyh pek khqi nih nawh, buh zeih cykahnaak ing ami cangnaak Bawipa venawh pe hy nih. **24** Pisidia qam ce ani poeng coengawh, Pamphylia qam khuina cet hy nih, **25** Perga khaw awh awithang leek anik kqawn coengawh, Attalia khaw na nu cet hy nih. **26** Bibi anik coeng hawh a dawngawh Attalia khaw awhkawng Khawsam qeenaaak khuiawh ani awmnaak, Antiock khaw na lawng ing cet tlaih hy nih. **27** Antiock khaw ani pha awh thlangboel ce khy nih nawh cekqawi hawnaak ing Khawsa ing ik-oeih a sainaak ingkaw Gentelkhqi venawh ikawmyihna cangnaak chawh am awng peek, tice kqawn pe hy nih. **28** Ce a khaw awh hubatkqi mi khawnghi khawqyt ca awm uhy.

15 Judah qam awhkawng thlang ak cawn law ing, "Mosi a cawngpyinaak amyihna chahhui am nami qeet awhtaw thlanghinggaan am hu kawm uk ti," anawh koeinaakhqi ce ana cawngpyi khqi uhy. **2** Ve a Kawnglamawh Paul, Barnaba ingkaw cekkqi ce ak tlona oelh qu uhy. Ve oelhqunaak ak camawh Jerusalem awh ak awm ceityihkhqi ingkaw a hqamcakhqy venna ak cet hamna Paul, Barnaba ingkaw aming laki awhkaw thlang chang thlang vang tloek ce tyk uhy. **3** Thlangboel ing cekkqi ce thak khqi unawh, Phinicia qam ingkaw Samaria qam khuina ami ceh awh, Gentelkhqi ikawmyihna amik kaw ami thaw ti akawng ce kqawn pek khqi uhy. Cawhkhaw awithang ing koeinaakhqi boehi ce zeel sak khqi hy. **4** Jerusalem khaw ami pha awh, cekkqi ce thlangboel, ceityihkhqi ingkaw a hqamcakhqy ing ana do khqi uhy, cekkqi hawnaak ing Khawsa ing them a saikhqi boehi ce kqawn pe uhy. **5** Cawh ak cangnaak thlang khuiawh Farasi benna ak awm thlang vang tloek ing dyi unawh, "Gentelkhqi ce chahhui qeet sak nawh, Mosi a anaa awi ce hqut aham cawngpyi ham awm hy," ti uhy. **6** Cedawngawh cawhkhaw awi kqawn aham Jerusalem khaw na ceityihkhqi ingkaw a hqamcakhqy ce cun uhy. **7** Awi amik kqawn coengawh Piter ce dyi nawh awi kqawn hy: "Koeinaakhqi, Gentelkhqi ing kai am kha awhkawng awithang leek ce za unawh amik cangnaak thai aham synawh Khawsa ing nangmih ak khuiawh kaw thlang vang ce tyk hy. **8** Kawlung ak simkung Khawsa ing, ningnih a venawh ani peek khqi lawt amyihna, cekkqi venawh Ciim Myihla a peeknaak ak caming cekkqi ce do hawh hy tice dang sak hawh hy. **9** Khawsa ing ningnih ingkaw a mingmih ce am pek am bo hy, cangnaak ak caming cekkqi ak kawlung ce ciimcaih sak hawh hy. **10** Cawhawt ikaw ham ningnih ingkaw ni pakhqi ing zani ni naa tloei phiyiqih ce hubatkqi a hawng awh tloeng pe nawh Khawsa ce noek a dak aham naming cai uh? **11** Amni! Ningmih a Bawipa Jesu am qeenaaak ak cam ing ni, a mingmih amyihna ningnih awm hul na

ni awm hy," tinak khqi hy. 12 Barnaba ingkaw Paul hawaak ak caming Khawsa ing Gentelkhqi venawh kawpoek kyi hatnaak ik-oeh a saikhqi ce cekqawi ing anik kqawn awh thlang kqeng ing ngai uhy. 13 Anik kqawn boeih coengawh, Jakob ing, "Koeinaakhqi ngai lah uh. 14 Khawsa ing ikawmyihna ak cyk awh amah aham Gentel thlangkhqi a lawhnaat akawng ce Simeon ing nik kqawn law pek khqi hawh hy. 15 Ve ak awi ingkaw tawngkhakhy ak awi awm qoep hy: 16 'Vek coengawh hlat kawng nyng saw, David a imca ak tlu ce sa tlaih kawng nyng. Ak seekhqi ce sa tlaih kawng nyng saw, thawh tlaih kawng nyng. 17 Thlak chang, kang ming ak phyi Gentelkhqi boeih ing Bawipa suinaak hamna ce im ce dyih tlaih kawng nyng,' ti ce. 18 Khawmard syncyk awhkawng ve ak awi aki simsakkung Bawipa ing tihy," tinawh ana qee amyihna. (aiōn g165) 19 Cedawngawh, Khawsa benna ak hlat Gentelkhqi ce kyinaak peek aham am awm hy, tinawh awi tlyk nyng. 20 Bulnaak sainaak buh a ankhqi ama ai aham, nupa amak thym na thawlh sainaakhqi, a hawng awh ak khak mat mehkhqi ingkaw a thikhqi a mami ai aham ca mah pat u sih ti nyng. 21 Ikawtih ak cykca awhkawng Mosi ing khaw boeih awh ak awi kqawnpyikung tyk khawi lawt nawh, Sabbath a hoesi awh anih ak awi ce sinakawk awh noet poepa uhy," tina hy. 22 Cekcoengawh ceityikhqi ingkaw a hqamcakhqi ing thlangboel ingkaw a mimah anglakawhaw thlang vang ce tyk unawh Antiock khaw na Paul ingkaw Barnaba mi tyi haih uhy. Judas (Barnabas a mi tinaak) ingkaw Sila ce tyk uhy, cekqawi ce koeinaakhqi ak sawikung na awm hy nih. 23 Cekqawi a kut awh ak kai awhkaw amyihna ca pat pe uhy. Ceityikhqi ingkaw a hqamcakhqi, nangmih a koeinaakhqi ing, Antiock khaw ingkaw Siria qam ingkaw Kililia qam awh ak awm cangnaak cakhqi venawh: Kut ni tlaih khqi unyng. 24 Kaimih a simpyinaak a awm kaana kaimih a venawh kawng thlang thlang vang nangmih a venawh law unawh nangmih ce kyinaak ni pek khqi uhy, cekkhqi ak awi awh naming ngaih kyi hy tinawh za unyng. 25 Cedawngawh thlang vang ce tyk unawh taw pyi qawi Paul ingkaw Barnaba mi nangmih a venna tyi haih u sih, tinawh ka ming ha tla boeih hy. 26 Cawhkaw thlangkhqi cetaw ningnih a Bawipa Jesu Khrish ang ming awh ami hqjinggaak amik pekhqi na awm uhy. 27 Cedawngawh kaimih ing ka qee law ce awi ing caksak aham Juda ingkaw Sila ve tyi law unyng. 28 Ak kai awhkaw ak ngoe ik-oehkhqi doeng kaa taw ak chang phiyihqin am ka mi phiyih sak aham Ciim Myihla ingkaw kaimih ing nep hy ti unyng. 29 Bulnaak sainaak buh a ankhqi, thikhqi, hawng khak mehkhqi koeh ai kawm uk ti, cekcoengawh amak ciim nupa thawlhnaka koeh sai kawm uk ti. Vemyikhqi amna mi sai awhtaw nep bit kaw. Nami sa dip seh," ti unawh pat uhy. 30 Cekkhqi ce ami tyih coengawh Antiock khaw na ce cet uhy, cawh thlangboel ce pynoet na cet unawh ca ce pe uhy. 31 Ca ce ami noet awh cawhkaw thapeekhaak awi awh ce zeel uhy. 32 Juda ingkaw Sila awm, tawngha na ani awm a dawngawh, koeinaakhqi ce tha pe nih nawh awi kqawn pe hy nih. 33 Khawngi iqyt nu cauh anii awm coengawh, koeinaakhqi ing cekqawi ce ngaihdingnaak awi ing cekqawi ak tyikungkhqi venna tyi tlaih uhy. 34 Cehlai Sila taw cawh ce awm aham cai hy. 35 Paul ingkaw Barnaba ce Antiock khaw awh awm poe hy nih, Bawipa ak awi ce thlang khawzah a venawh cawngpyi nawh kqawn hy nih. 36 Khawngi iqyt dy nu a dii coengawh Paul ing Barnaba na ce, "Bawipak awi nik kqawnnaak khaw a hoesi awh cet nih nawhtaw koeinaakkhqi ce hqip tlaih lah sih, ikawmyihna nu amri awm hy voei? tina hy. 37 Barnaba ing Marka tinawh awm amik khy Johan ce ceh pyi aham ngaih hy, 38 cehlai anih ing cekqawi ce Pamphylia khaw awh cehta nawh bibinaak awh amak bawng poe thai a dawngawh Paul ingtaw anih ce ceh pyi aham am nep hy tinawh poek hy. 39 Ce akawng awh ce oelh qu nih nawh kqeng hy nih. Barnaba ing Marka ce khyn nawh Kupra benna cet hy nih,

40 cehlai Paul ingtaw Sila ce tyk nawh koeinaakhqi ing Bawipa am qeennaak awh ami peek coengawh cet lawt hy nih. 41 Siria ingkaw Kililia qam benawh kawng cet nih nawh thlangboelkhqi ce thapeeknaak awi kqawn pe hy nih.

16 Cawhkawng Derbe ingkaw Lustra khaw ce pha hy. Ce a khaw awh a nu Juda nu, a pa Greek na ak awm hubat thlang pynoet Timote ce awm hy. 2 Anih taw Lustra ingkaw Ikonium khaw awhkaw koeinaakhqi ing a mim kyiil thlang pynoet na awm uhy. 3 Paul ing anih ce ceh pyi poe aham ngaih hy, cedawngawh cawh amik awm Judakhqi ak coetnaak aham awmnaak aham cekhqi ing a pa Greek pa ni tice ami sim boeih a dawngawh anih ce chahhui qeet pehy. 4 Khaw pynoet coeng pynoet ami ceh coengawh, thlangkhqi ing Jerusalem khaw awhkaw ceityikhqi ingkaw a hqamcakhqi ing awi amik tlyh ce ngaih aham kqawn pe uhy. 5 Cedawngawh thlangboelkhqi ce cangnaak awh tai unawh pung khqoet khqoet uhy. 6 Asia qam awh awi kqawn aham Ciim Myihla ing a kham peek a dawngawh, Paul ingkaw a pyikhqi ce Phrygia qam ingkaw Galatia qam na cet poe uhy. 7 Musia qam khawqi ce ami pha awh, Bithynia qam khuina ceh aham cai uhy, cehlai Jesu ang Myihla ing cekkhqi ce am ceh sak hy. 8 Cedawngawh Musia qam ce kan unawh Troas khaw na nu cet uhy. 9 Cawh a awm awh Paul ing ik-oehi huh saknaak awh Makedonia thlang pynoet ing dyi nawh a venawh, "Makedonia na law unawh taw kaimih ve ni bawm khqi lah." tinawh geennaak thoeh hy. 10 Cawhkaw ik-oehi huh saknaak ce Paul ing a huh coengawh, Makedonia na ceh aham cai pahoei unyng. Khawsa ing cekkhqi venawh awithang leek kqawn aham nik khy khqi hy tice sim unyng. 11 Troas khaw awhkawng tuicunli awh lawng ing Samothrace khaw na cet unyng, cawhkawng a khawngawi awh Neapolis na cet poe unyng. 12 Cawhkawng Rom a uknaak khui awhkaw qam Makedonia qam khuiawh kaw khawk bau na ak awm Philipi khaw na khaw ing cet unyng. Cawh ce khawngi khawqyt awm unyng. 13 Sabbath nyn awh cykcah aham khawk bau vawng chawmkeng a ceng benna kaw long na ce cet unyng. Cawhkaw amik cun nukhqi venawh awi kqawn pe unyng. 14 Cawhkaw awi ak ngaihkhqi khuiawh Thyatira khaw awhkaw Khawsa ak bawk hik thim ak zawi nu thlang pynoet Lydia ak mingnaak ce awm lawt hy. Paul ak awih kqawn do aham Bawipa ing anih ak kawlung ce awng pehy. 15 Amah ingkaw a ipkhuikaw boeih ing baptisma ami huh coengawh, kaimih ce a im na nik khy khqi hy. "Kai ve Bawipak awi ak cangnaak thlang na nami nik poek lawt awthaw ka imna pah law uh," ni tinak khqi hy. Anih ing kaimih ce ni hlawh khqi hy. 16 Hypoet taw cykcahnaak aham ka mi ceh awh, ni hai benna kaw ik-oehi ak kqawn thaai qaaai ta niu tamnaa pynoet ce hu unyng. Hailam ben ik-oehi ak kqawnnaak ak caming a boei ahama tangka huh pehy. 17 Cawhkaw nuca ing Paul ingkaw kaimih a hu awh law nawh, "Ve ak thlangkhqi ve nangmih hulnaak ak kqawn lawkung, sawsang khyt Khawsa a tyihzawikhqi ni," tinawh khy hy. 18 Khawngi cemiyihna ce kqawn khing hy. A hukhit na taw Paul ing ak kaw hul law nawh cawhkaw qaai na ce, "Jesu Khrish ang ming ing vawhkaw nuca ak kaww khuiawh kawng cawn hlah!" tina hy. Cawh qoe qoe awh ce qaaai ing cawhkaw nuca ce cehta hy. 19 Cawhkaw tamnaa nuca a boeikhqi ing tangka ami huhnaka am amb voel hy tice ami sim awh, Paul ingkaw Sila ce tu unawh, ik-oehi zawihnaak a hun awh ukkungkhqi venna sawi uhy. 20 Cekqawi ce awidengkung a venna sawi unawh, "Vekqawi ve Juda phyn qawi ni, ni khaw na law nih nawh awipungnaak sai hy nih, 21 ningmih Rom thlangkhqi ing sai hly kawi am ingkaw do hly kawi am phung alamkhqi sai sak aham kqawn hy nih," tina uhy. 22 Thlang kqeng ing Paul ingkaw Sila ce him aham za qu uhy, cawh awidengkungkhqi ing cekqawi a hi ce suh sak nawh vyk aham

awi pehy. 23 Cekqawi ce ak tlo na ami vyk coengawh, thawngim na thla uhy, ak nep na doen aham thawngim ak qehkung ce awi pe uhy. 24 Cawkaw awipeeknaak amyihsna anih ing cekqawi ce thawngim khui ak kaina ak thlak coengawh khawceh byn sak qawi bawh hy. 25 Thanlung awh Paul ingkaw Sila ing cycaknih naws Khawsa kyihcahna laa ce sa hy nih, cawh thlang thawng ang tlaak pyikhqi ing ngai pe uhy. 26 Cawh lipi thloek law naws thawngim ce tlaai law nyk nyk hy. Thawngim chawhkhqi boeih ce awng qu pheng naws, thlang boeih a thiqlikhqi awm hlam qu boeih hy. 27 Thawngim ak qehkung ce hyqng law naws thawngim chawh ak awng qu boeih ce a huu awh, thawng ak tlakhqi cen boeih hawh voei uh tinawh, ak cimca ce phlawng naws amah ingkaw amah sun qu aham cai hy. 28 Cehlai Paul ing, "Namah ingkaw namah koeh sai qu! Kaimih vawh awm boeih unyng!" tina hy. 29 Cawh thawngim ak qehkung ing mai a vang sak coengawh thawngim khuiina dawng naws Paul ingkaw Sila a haiauh thyndoen a khyk sym pehy. 30 Cekkqawi ce thawngim a ceng na a sawi qawi coengawh, "Bawipa qawi, hulna ka awmnaak aham ikaw ka sai kaw?" tina qawi hy. 31 Cekkqawi ing, "Bawipa Jesu ce cangna nawhtaw, cawhtaw namah ingkaw na ipkuikaw boeih hul na awm kawm uk ti," tina hy nih. 32 Cekkoengawh cekqawi ing Bawipa ak awi ce anih ingkaw a ipkuikaw boeih a venawh kqawn pe hy nih. 33 Cawh qoe qoe awh thawngim ak qehkung ing cekqawi ce ceh pyi naws anih maakkhiq ci silih pehy; cawh amah ingkaw a ipkuikaw boeih ing baptismu hu pahoei uhy. 34 Thawngim ak qehkung ing cekqawi ce amah a im na ceh pyi naws buh ai sak qawi hy; amah ingkaw a ipkuikaw boeih ing Khawsa ce amik cangnaak hawh a dawngawh anih ce zeelnaak ing be hy. 35 Khaw a dai awhtaw, awi ak tlykkungkhqi ing vawhkaw awipeek ing thawngim ak qehkng a venawh thlang tyi uhy: "Cekkqawi ce hlah hlah," tina uhy. 36 Thawngim ak qehkung ing Paul a venawh, "Awi tlykkungkhqi ing nang ingkaw Sila ve hlah awi ni pe hawh uhy. Cedawngawh cet thai hawh hy nik ti. Ngaihqep cana cet hlah nih," tina qawi hy. 37 Cehlai Paul ing cawhkw amik law thlangkhqi venawh: "Rom thlang na awm hlae nih nyng, awi anih deng hlawanaw thlang a haiauh ni vyk uhy, cekkoengawh thawngim awh nik thlak qawi bai hy. Tuh kainih ve ang hyp na tyi dym aham ngaih unawh nu? Amni! A mimah qoe qoe law u seitaw kainih ve ni hlah law u seh," tina hy. 38 Cawkaw thlangkhqi ing anih ak awi ce awi tlykkungkhqi venawh kqawn pe uhy. Paul ing Sila ce Rom thlang ni tice cekkhqi ing a ming zaak awh, kqjih uhy. 39 Law unawh cekqawi a venawh qeenakaam thoeh coengawh hlah uhy, ce a khaw ce cehtaak aham cekqawi a venawh qeenakaam thoeh uhy. 40 Paul ingkaw Sila ce thawngim awh kawng anih loet coengawh, Lydia a im na cet hy nih, cawh ce koeinaakhqi hqum nih naws thapeeknaak awi kqawn pe hy nih. Cekkoengawh ak chang na cet hy nih.

17 Amphipolis ingkaw Apollonia khaw ce ani poeng coengawh Thesalonika khaw ce pha hy nih, cawh ce Judahkhqi sinakawh pynoet awm hy. 2 A ceh khawi amyihsna, Paul taw sinakawh na cet hy, Sabbath thum voei khuiaka cekkhqi mi cauk awi ce kqawn uhy, 3 Khrir ing khuiaka kyinaak hu kawmsaw thihnaak awh kawng tho tlaah kaw, tice kqawn caih pehy. "Nangmih a venawh kai ing ka nik kqawn law peek khqi Jesu ve Khrir hawh hy," tinak khqi hy. 4 Juda thlang thlang vang ing cangna unawh Paul ingkaw Sila ce bawng uhy, Khawsa ak kqjih Greek thlang khawzah ingkaw nu qypawm khawzah ingawm bawng lawt uhy. 5 Cehlai Judahkhqi tlae se unawh, ik-oeih ami zawihaak hun awh thlak che pynoet ceh pyi uhy; thlang kqeng cun khqi unawh khawh khuiawh awipungnaak ce sai uhy. Jason a im ce muk unawh Paul ingkaw Sila ce thlang kqeng a haiauh sawi aham cai uhy. 6 Cehlai cekqawi ce a mami huh law awhtaw, Jason ingkaw koeinaa thlang vang tloek ce khawboei a venna sawi unawh, "Kawmdek seetnaak

ak sai qawi ce ve pha law hawh hy nih, 7 Jason ing cekqawi ce do naws a im awh pah sak hy. Cekqawi ing Kaisar ak awipeek oelh nih naws, sangpaohrang ak chang Jesu awm hy, tinawh kqawn hy nih," tinawh khy uhy. 8 Ce ak awi ce a ming zaak awh, thlang kqeng ingkaw khawboekhqi ce so khqoet uhy. 9 Jason ingkaw ak changkhqi ce ceh sak uhy. 10 Khaw am than awhtaw koeinaakhqi ing Paul ingkaw Sila ce Berea khaw na tyi uhy. Ce a khaw ce ani pha awh Judahkhqi a sinakawh na ce cet hy nih. 11 Berea khaw awhkaw thlangkhqi taw Thesalonika khaw awhkaw thlang khqing lak awh cyi khqoet uhy, a mingmih ingtaw Paul ak awih kqawn ce ak nep cana a ming ngai peek coengawh, anih ak awih kqawn ve ak thym tang hy voei nu ti unawh cauk awh ak nep cana sui uhy. 12 Juda thlang khawzah ing cangna unawh Greek thlak mang nunu papa khawzah ingawm cangna uhy. 13 Paul ing Berea khaw awh awithang leek kqawn hy tice Thesalonika khaw awhkaw thlangkhqi ing a ming zaak awh, ce na ce cet bai unawh thlang kqeng ce ami cuih coengawh awipungnaak sai bai uhy. 14 Koeinaakhqi ing Paul ce tuicunli a keng na thak pahoei uhy, Sila ingkaw Timote taw Berea khaw awh awm hy nih. 15 Paul ak thak thlangkhqi ing anih ce Atheni khaw na ceh pyi uhy, Sila ingkaw Timote ce a venawh law zy aham awi a yn coengawh cekkhqi ce hlat uhy. 16 Paul ing cekqawi ce Atheni khaw awh a qeh awh, khawk khui boeih myiqawl bawknaak ing be uhy tice a huh awh ak kawlung khuihka hy. 17 Cedawngawh sinakawh awh Judahkhqi, Khawsa ak kqjih Greekkhqi mi Khawsak awi kqawnnaak ce tahi, them ami zawihaak hun awh khaw hypoet coeng hypoet cawhawh amik awmkhqi mi Khawsak awi kqawn qu pe uhy. 18 Cawh Epikuria ingkaw Stoik thlakcyikhqi mi ce oelh qu uhy. Cekkhqi anglakawhawh thlang vang ing, "Vawhkaw ak so thlang ing ve ikaw nu ti ak kqawn lawt?" tina uhy. Thlang vang tloek ing, "Qap chang nakaw khawsa akawngkhqi ni ak kqawn namih hy ve," tina uhy. Paul ing Jesu ak awithang leek ingkaw thawh tlaithnaak akawng ak kqawn dawngawh cemiyhna ce tina uhy. 19 Areopaga ami ti cunnaak a hun na ceh pyi unawh a venawh, "Vawhkaw cawngpyinaak ak thai nak kqawn ve kaimih a venawh nak kqawn law hly thai nu? 20 Awi nak kqawn ve kaimih ang zaak awhtaw lang hy, cedawngawh zaksim aham ngaih unyng," tina uhy. 21 Cedawngawh Athenis khaw awhkaw thlangkhqi ingkaw khinkhqi boeih awm, ami hoeng tym awh a hoei awm awikqawnnaak ingkaw awi doetnaak na hawna uhy. 22 Areopagi cunnaak awh Paul ce dyi naws: "Athenis thlangkhqi! Ik-oeih soepkep awh bawknaak ak thin tlawhnaak thlang na awm uhyt ki tice sim nyng. 23 Cet naws nangmih ing nami bawkkhqi ce ka toek lah awh, "AMSIM KHAWSA HAMNA," tinawh nami qee ce hu nyng. Nangmih ing a sim kaana nami bawk ce ni, tuh kai ing kak kqawn law hy. 24 Khawmdek ingkaw ak khuiawh ak awm boeih ak saikung Khawsa ve khan ingkaw khawmdek boei na awm naws kut ing a sai bawkim awh ak awm am ni; 25 them amak sai thai amyihsna thlangkhqing ing a sai peek ak ngoe Khawsa am ni; amah ing a soep hoei boeih a venawh hqjinggaakkhqi, bibinaakkhqi ingkaw ik-oeih boeih ak pekung na awm hy. 26 Thlangkhqing ve khawmdek pum boeih awh pynoetha khawsak boeih hamna thlang phyn boeih ce sai naws, ami ham atym ingkaw amik khawsaknaak ham khawqi khan pek khqi hy. 27 Khawsa sui unawh, thoem unawh, ami huhnak hqet thai aham anih ing lak am ni hla khqi hy. 28 Amah ak caming ni hqjing, ning tat thai unawh ning plaa thai uhy; nangmih awh kawh hla ak phawh thai thlang pynoet ing awm, 'Ningnih awm a cadilkhqi na nik awm ni,' tinawh ak kqawn amyihsna. 29 Cedawngawh Khawsa a cadilkhqi na ni awm hawh kawng taw, Khawsa ve thlangkhqing ing sui ing aw, tangka ing aw, lung ing aw a sai myiqawl amyihsna peek aham am awm hy. 30 Khawsa ing am ni simnaakkhqi ce nim hilh pek khqi naws; cehlai tuawh ve qam boeih awhkaw thlang

boeih zyt aham awi pek hawh hy. **31** Ikawtih, amah ing ak tyh thlang ce hawna nawk khawmdek awideng aham khawngi ce hoep hawh hy. Thiihaak awhkawng anih ce a thawh saknaak a caming thlang boeih a venawh vawhkaw hatnaak ce dang sak hawh hy," tinak khqi hy. **32** Thlak thi thawhnaak akawng a ming zaak awh, thlang vang tloek ing qaih na uhy, cehlai thlang vang ingtaw, "Ve ak awi ve ka ming ngai tlaah aham ngaih unyng," tina uhy. **33** Cehlai Paul ing a miven awhkawng cehtak khqi hy. **34** Thlang a khoeih Paul a hu awh bat unawh ak awih qzawn ce cangna uhy. Cekhqi anglakawh Areopagi khuiawh kaw thlang pynoet Dionisia ingkaw Damari ak mingnaak nu pynoet ingkaw thlak changkhqi awm pa uhy.

18 Cekcoengawh, Paul ing Atheni khaw ce cehta nawh, Korin khaw na cet hy. **2** Ce a khaw awh, Akuila ak mingnaak Juda phyn pynoet ce hu hy, anih taw Pontus thlang na awm nawh, a zu Prikilla ingqawi Italy nakawng anik law thaai na awm hy nih. Klaudia ing Juda thlangkhqi boeih Rom awhkawng a hqek khqi dawngawh cekqawi awm law lawt hy nih. Cekgawi a venna Paul ce cet hy. **3** Cekqawi awm anih amyihna hi im ak khquikung na awm lawt hy nih, cekqawi a venawh awm nawn bibi hain uhy. **4** Sabbath nyn hoei awh sinakawk na cet nawk Khawsak awi ce qzawn hy, Juda thlangkhqi ingkaw Greek thlangkhqi ce ak dawh ngai aham ngaih hy. **5** Sila ingkaw Timote ce Makedonia awhkawng anih law awhtaw, Paul taw awithang leek doeng ni ak qzawn hawh hy. Juda thlangkhqi venawh Jesu taw Khril ni tinawh qzawncaih pek khqi hy. **6** Cehlai Judakhqi ing Paul ce oelh unawh ami the ami khanaak awhtaw a mingmih ce a hi khawk sih khqi nawh, "Na mimah a thi ce na mimah a luk khan awh tla seh! Kai taw ka sai hly kawi boeih ce sai hawh nyng. Tuhkawng taw Gentelkhqi venna ni ka ceh hly hawh hy," tinak khqi hy. **7** Paul ing sinakawk ce cehta nawh ce a venawh akih Khawsak a bawk Titia Justa a im na cet hy. **8** Sinakawk ak temkung Krispa, ing a ipkhuikaw boeih ing Bawipa ce cangna uhy; cekcoengawh ak awih qzawn za nawh akih cangnaak Korin thlang khawzah ing baptisma hu uhy. **9** Than oet awh huhsakaaknaa ing Bawipa ing Paul a venawh awi qzawn pehy: "Koeh kqih nawh, ang dym kaana awi ce qzawn poe. **10** Kai na venawh awm nyng, nak khanawh u ingawm kut am nik thlak kawm uh; ve a khawawh thlang khawzah ta nyng." ti hy. **11** Cedawngawh ce a khaw awh Paul taw kumoet awm nawh, Khawsak awi ce cawngpyi hy. **12** Akhaia qam ukkung Galio a awm awh, Judakhqi ing Paul ce cuuk sih unawh awidengkungkhqi venna sawi uhy. **13** "Ve ak thlang anaa awi ing ak kahn na Khawsa bawk aham thlang syk hy," tina uhy. **14** Paul ing awikqawn vang a ti awh, Gallio ing Judakhqi venawh, "Nangmih Judakhqi aw, veve amak thym awi mai aw thawlh saknaak mai aw na a awm man, a thanaka kana namik awi ve ning ngaih pek khqi voei nyng. **15** Cehlai namik awikhqi, mingkhqi ingkaw namik anaa awikhqi na a awm awhtaw namimah ing awitlyk uh; kai ing cemiyih awikhqi ce tlyk ham am ngaih hy nyng," ti hy. **16** Cedawngawh cekhqi ce awidengaak a hun awhkawng ceh sak khqi hy. **17** Cawh cekhqi ing sinakawk ak temkung Sosthen ce tu unawh, awidengaak a haiawh ce vyk uhy. Cehlai Gallio ing cekhqi ce am ngai am zaak nak khqi hy. **18** Paul taw Korin khaw awh khawngi iqyt nu awm hy. Cekcoengawh cawhkaw koeinaakhqi ce cehtaak khqi nawh Siria na ce lawng ing cet hy, Priskilla ingkaw Akuila ing bawng hy nih. Lawng ing a ceh hlanawh awi a taaknaak amyihna, Kenkrea khaw awh a lu ce voh hy. **19** Ephesa khaw a mi pha law awh Paul ing Priskilla ingkaw Akuila ce cehta hy. Amah taw sinakawk na cet nawk Judakhqi venawh khawsak awi qzawn pehy. **20** Cekhqi venawh khawqyt awm aham a mik qzawn peek awh, anih ing tha na hy. **21** Cekhqi ce a cehtaak khqi awm, "Khawsa ing tyng hy a ti awhtaw law tlaah

bit kawng nyng" tinak khqi hy. **22** Cekcoengawh Ephesa khaw awhkawng lawng ing cet poe hy. Siria khaw a pha awh, hang cet nawk thlangboel ce kut a hang tlaah khqi coengawh Antiock khaw na ce nu cet poe hy. **23** Antiock khaw awh khawngi iqyt nu a awm coengawh ce ahun awhkawng Galatia qam ingkaw Phrygia qam khaw awh hun pynoet pynoet awh cet nawk hubatkhqi boeih ce thapeeknaak awi qzawn pehy. **24** Cawh Apollo ak mingnaak Juda phyn pynoet Alexandria thlang ce Ephesa na law hy. Anih taw awih qzawn ak thoem na awm nawk, cauk awi ak nep na ak sim thlang na awm hy. **25** Anih taw Bawipa a lam awh cuuik na awm hawh hy, Johan baptisma doeng ni a sim hyn hlaah hy, thahly doena Jesu akawng ce ak cain na thlang cuuk am kikk hy. **26** Sinakawk awh qaal leek doena awi qzawn hy. Priskilla ingkaw Akuila ing anih ak awih qzawn ce a ning zaak awh anih ce im na khy nih nawk Khawsa a lam ce ak nep cana qzawn pe hy nih. **27** Apollo ce Akhaia qam na ceh a ngaih awh koeinaakhqi ing anih ce tha pe unawh, cawhkaw amik awm hubatkhqi ing anih ce ami donaak aham ca qee pe uhy. Anih a pha awh am qeenakaing akih cangnaak thlangkhqi aham anih taw tha ak pekung na awm hy. **28** Anih ingtaw a haiawh Judakhqi ce oelh khqi pheng pheng nawh, Jesu ce Khril ni tinawh qzawn caih pehy.

19 Apollo ce Korin khaw awh a awm awh, Paul ing tlang lam benna kawng Ephesa khaw na ce cet hy. Cawh hubat pynoet ce hu nawk, **2** doet khqi hy, Namik cangnaak awhkawng Ciim Myihla namik hu aw?" tinak khqi hy. Cekhqi ing, "Am hu unyng, Ciim Myihla awm hy ti awm am za khawi unyng," tina uhy. **3** Cawhtaw ikaw baptisma nu nami huh?" Paul ing tinak khqi hy. Cekhqi ing, "Johan a baptisma ni ka mi huh," tina uhy. **4** Cawh Paul ing, Johan baptisma taw zutnaak baptisma ni. Anih a hu awh ak law hly kawi ce cangnaak aham thlangkhqi venawh qzawn pehy, ak law hly kawi Jesu ce cangnaak aham," tina hy. **5** Ce ak awi ce a ming zaak awh, cekhqi ing Jesu Khril ang ming awh baptisma ce hu uhy. **6** Paul ing a mingmih akih awh a kut tloeng pek khqi nawh, Ciim Myihla ce a mingmih akih awh awh law hy, cekhqi ing amsim awi na pau unawh awi ce qzawn uhy. **7** Cawhkaw akih awm tloek ce pa thlangqha hlaahih law uhy. **8** Paul ing sinakawk na cet nawk hla thum khuiawh qaal leeknaak ing awi qzawn hy, Khawsa qam awithang leek benna thlangkhqi ce zoek khqi nawh awi qzawn pek khqi hy. **9** Cehlai thlang vang tloek taw a mim thin sah soeih nawh; ak awih qzawn ce ama mik cangnaak coengawh lam akawng ce qangpui a haiawh ak che na qzawn uhy. Cedawngawh Paul ing cekhqi ce cehtaak khqi hy. Hubatkhqi ce khy nawk Turanna ca cawngnaak im awh myngawi na awi qzawn hy. **10** Cemiyihna kum hih dih awh sai phat hy, cedawngawh Asia qam awh ak awm Judakhqi ingkaw Greekkhqi ingtaw Bawipak awi ce za uhy. **11** Khawsa ing Paul hawaak ing kawpoekki themkhqi sai hy, **12** cedawngawh Paul a pum awhkaw pavawh ingkaw a hi aawica pateng awm thlaktlokhqi venna khyn pe unawh, ak bikhqi boeih ing qoei unawh kawkkhui awhkaw qaaikhqi ing cawn uhy. **13** Juda thlang pynot ing Bawipa Jesu ang ming hawaak ing sungqaikhqi hqek aham sungqaai ing am tukhqi venna ce cet uhy. "Paul ing ak khypyi Jesu ang ming ing, cawn aham awi ni pe unyng," tina uhy. **14** Juda khawsoeih boei, Skeva ak thlang khqih tloek ing cemiyihna ce sai uhy. **15** Hypoet awhtaw qaacieh ing, "Jesu awm sim nyng, Paul akawng sim nyng, nang ve a u a myih nu?" tina hy. **16** Cawh qaacieh ak ta thlang ing cekhqi ce cuuk sih khqi nawh cekhqi ce noeng khqi hy. Cekhqi ce khqaak khqi doet hloet nawh ak pum a zal na ami thi ami hai ing cet uhy. **17** Ce ak awi ce Ephesa khaw awh amik awm Judakhqi ingkaw Greekkhqi ing a ming zaak awh kqih uhy, Bawipa Jesu ang ming ce zoeksang uhy. **18** Ak cangnaak thlang

khawzah ce law unawh a mimah ing them amak leek ami saikhqi ce pho qu uhy. **19** Kutlam ak toek thai thlangkhqi ingawm a mimah a caukkhqi ce haw law unawh thlang a haiaw caukkhqi ce mai awh phum uhy. Cawkaw cauk phu ce ami tawh awh tangka thawng sawmnga phu ting hy. **20** Ceamyihna Bawipak awi ce pung a tai nawh taanaak ta hqui hqui hy. **21** Vemyihna a awm coengawh, Paul ing Makedonia qam ingkaw Akhaia qam nakawng awh Jerusalem na ceh aham cai hy. "Ce ka pha coengawh Rom khaw na awm ka ceh aham awm hy," tiyh. **22** Amah ak bawmkung Timote ingkaw Erasta ce Makedonia qam na tyi hy, amah Asia qam awm awm hyn hy. **23** Cawh lam akawng awh awipungnaak awm hy. **24** Artemi bawkthang ak saikung, Demetria ak mingnaak, tangka thi ak deep ing bawkthang a sainaak ak camping tangka hu hy. **25** Anih ing a bibi phukhqi ing, ce bawkthang ak zawikhqi ce pynoet na khy khqi nawh, "Ve bibinaak awhkawng tangka ni hu uhy tice sim uhyk ti. **26** Cehlai vawhkaw Paul ing ve Ephesa khaw ingkaw Asia qam pum awhkaw thlangkhqi ce, 'Kut ing khawsakhqi ve khawsa tangkhqi am ni,' tinawh thlang khawzah zoek khqi nawh lam hang pyi khqi hawh hy tice za unawh sim hawh uhyk ti; **27** Cedawngawh ni bibi pho kaw tinawh kqijh a awm doeng am nawh, khawsanu Artim a bawkim ve awm ikawna am sui law voel kawm usaw, Asia qam awhkaw thlang boeih ingkaw khawmdiek thlangkhqi ing a mi bawk, ak boeimang soeih ve ikawna am sui kawm ut tive kqijh awm hy," tinak khqi hy. **28** Ce ak awi ce ang zaak awh, amik kaw so nawh, "Ephesa khaw awhkaw Artemi ve bau khyt hy!" tinawh khy uhy. **29** Kawlhkalh awh khawk khui pum ce awipungnaak ing be hy. Makedonia nakawng Paul anik bawng law Gaia ingkaw Aristarka ce tu unawh lam awh ipkhui na ceh pyi qawi uhy. **30** Paul ing tleng kqeng venna ceh aham ngaih hlai hy hubatkhqi ing am ceh sak uhy. **31** Ce a qam khuiawh kaw boei pynoet, Paul amah a pyikhqi ingawm lamnaak ipkhui na ama ceh aham awi yn uhy. **32** Cawkaw thlang kqeng ce ngaihang tum ing awm uhy: Thlang vang ing ak chang na amik khy awh, thlang vang bai ce ak chang na khy toek toek bai uhy. Thlang khawzah ngai ing kawthi ce a hun ami pha, ti awm am sim uhy. **33** Judakhqi ing Alexandria ce hai benna buuk uhy, cawkaw thlang vang ing anih ce khy sih noe noe uhy. Anih ing thlang kqeng ce awm sap aham a kut ing zap khqi hy. **34** Cehlai thlang kqeng ing anih ce Juda phyn ni, tinawh a mi sim awh khawnoek pakkhin khuiawh awi kutoet na, "Ephesakhqi a Artemi ve bau khyt hy!" tinawh khy uhy. **35** Khawk khuiawh kaw caqeekung ing thlang kqeng ce ang dym sak coengawh: "Nangmih Ephesa thlangkhqi aw, Ephesa khaw ve ak bau Artemi bawkim ingkaw khawk khan nakawng anuk hlai law a myi a mee ak khoemkung na awm hy, tice khawmdiek thlangkhqi boeih ing am sim uhy nami ti nawh nu? **36** Ve ak awi ve u ingawm ama oell thai a dawngawh ikaw awm ang tawn tawnna a sai paqaa kaana nami awm dym aham awm hy. **37** Vekqawi ing bawkim awhkaw them am qu hy nih, khawsanu awm am kqawn seet hlai hy nih vera sawi law uhyk ti. **38** Demetria ing a pyikhqi ing u ak khan awh awm amik kaw ama law awhtaw, awih kqawnnaak a hun ce awng hyt na awm nawh, awih kqawnkungkhqi awm awm uhy. Cawkaw ce amik kqawn aham awm hy. **39** Cawkawng kqawn tlaih aham nami ngaih bai awhtaw, cunnaak khawi awh ce kqawn aham awm hy. **40** Tuhngawi awhkaw awipungnaak ve, awipungnaak ak saikung amyihna awm nik puk hau kawm uk ti tive kqijh awm hy. Ve awipungnaak awn ve a kung a dawng awm am nik kqawn thai laklaw hy," tinak khqi hy. **41** Ve ak awi ak kqawn boeih coengawh thlang kqeng ce hlat sak khqi hy.

20 Awipungnaak a sit awh, Paul ing a hubatkhqi ce khy nawh thapeeknaak awi kqawn pehy, Cekoengawh cekkhqi ce kut tlaih nawh Makedonia qam na cet hy. **2** Ce a qam ce hqil

nawh, thlangkhqi venawh thapeeknaak awi kqawn pek khqi hy, cekcoengawh Greek qam ce pha hy, **3** cawh ce hlak thum awm hy. Siria qam na cet vang ti hlai hy, Judakhqi ing aghypna a mimah a dawngawh, Makedonia qam benna ceh aham cai hy. **4** Berea khaw awhkaw Pyrrha a capa Sopater, Aristarka ingkaw Thessalonika khaw awhkaw Sekumda, Derbe khaw awhkaw Gaia, Timote, Asia qam awhkaw Tykhika ingkaw Trophima mih khqi ing bawng uhy. **5** Vekkhqi ve lamma na haina a na cet unawh kaimih ce Troas khaw awh ni na qeh uhy. **6** Cehlai hen amak Boei Phaihipi Poei a boeih awh Philipi khaw benna kawng lawng ing cet unyng, hqanyn a di awh cekkhqi mi Troas khaw awh hqum qu unyng, ce a khaw awh khqi nyn awm unyng. **7** Kharwngi khqi nyn khui awhkaw lamma cyk a nyn awh phaihipi thek hah aham cet unyng. Paul ing thlangkhqi venawh awi kqawn pek khqi hy, a khawngawi nyn awh cet hlai vang a ti hawh dawngawh thanlung dy awh awi kqawn hy. **8** Ka ming cunnaak ip khan awh ce mai khawzah vang uhy. **9** Cawh Eutuka ak mingnaak cadawng pynoet taw hlalang awng awh ngawi hy. Paul ing awi khawqyt ak kqawn awhtaw anih ce ip hy. A mik ih a tui huili awh im dawt a pakthumnaak awhkawng dek na tla nawh a qaawk na cung uhy. **10** Paul ing nuk kqum nawh cadawng pa ce ak khan awh cuksih nawh a kut ing zuut hy. "Koeh ly uh. Hqing hyn hy!" tinak khqi hy. **11** Cekoengawh ip khanna kai tlaih nawh phaihipi ce thek unawh aih hy. Myncang khawdai dy awi ak kqawn awh cekkhqi ce cehta hy. **12** Thlangkhqi ing cadawng ce ak dip na im na ceh pyi unawh, a ming ngaih qep hy. **13** Kaimih taw lawng ing lamma na Asso Khaw na cet unyng, ce a khaw awhkawng Paul mi kutoet na lawng ing ceh aham cai unyng. Ce a khaw dy awh Paul amah taw khaw ing law aham cai hy. **14** Asso khaw awh ka ming hqum coengawh, Mitulene khaw na anih ce lawng ing ceh pyi unyng. **15** A khawngawi awh ce a khaw awhkawng cet unyng saw Kios tulak cung pha unyng. Cawkaw khawngawi nyn awh Samos tulak cung ce poeng unyng saw Miletta tulak cung ce pha unyng. **16** Asia qam awh a tym hawnaak ham ama ngaih a dawngawh, Paul ing Ephesa khaw ce cehtaak aham ngaih hy, ang coeng thai awhtaw, Pentekost nyn awh Jerusalem ce ang tawnna pha aham ngaih hy. **17** Miletta awhkawng Ephesa khaw awhkaw thlangboel a hqamcakhqi ce Paul ing khy sak hy. **18** Cekkhqi ami pha law awh, cekkhqi venawh: "Asia qam na ka law cyk awhkawng nangmih a venawh ikawmyihna khaw ka saknaak tice sim hawh uhyk ti. **19** Judakhqi ing him aham ni teng loet hlai uhy, kawdungaak ingkaw mikphili ing Bawipa bi ka bi ce sim uhyk ti. **20** Nangmih nami hawhkhangnaak aham kawmyih awm khypyi aham am tawngaa nyng, im pynoet coeng pynoet nangmih ce ni cawngpyi khqi nyng. **21** Khawsa venawh zutnaak kawlung ing voei unawh ningnih a Bawipa Jesu Khrishi awh cangnaak ami taaknaak aham Judakhqi ingkaw Greekkhqi venawh awm awithang leek ve khypyi nyng. **22** Ciim Myihla a ceeinaak amyihna, tuh Jerusalem na cet kawng nyng, ce ka pha awh kak khan awh ikaw a pha law kaw, tice sim hlai nyng. **23** Ka cehnaak khaw a hoei awh Ciim Myihla ing thawng tlaknaak ingkaw kyinaak ka huh hly kawi ce kqawn law loet nyng. **24** Cehlai, ka hqingnaak ve ikawna awm am sui voel nyng, vawhkaw bibi Khawsam qeenaaak awithang leek khypyi, teei qunaak bibi Bawipa Jesu ing ani peek ve kak coeng mak awhtaw ti doeng ni kak poek hy. **25** Qam awithang ak khypyi nangmih ak khui awhkaw u ingawm kai ve amni hu voel kawm uk ti, tice sim nyng. **26** Cedawngawh, thlang boeih a thi awh ce kai taw ciimcaih nyng, tice tuhngawi awh nangmih a venawh kqawn law nyng. **27** Kawtih Khawsa a ngaihnaak boeih ce nangmih a venawh khypyi aham am yih nyng. **28** Ngaihta unawh, Ciim Myihla ing ak khoemkung na ani taak khqi hawh amyihna nami tuukhqi ce ak nep na khoem law uh. A thi ing ak tlaih, Khawsa a thlangboel

ak khawl ak cuikung na awm law uh. **29** Kai ka ceh awh, nangmih anglakawh ngentangkhqi kun law kawm usaw tuukhqi ce am tak khqi poek kawm uh tice sim nyng. **30** Na mimah ak khuiawh zani amah benna hubatkhqi dawk aham awitak ak pleng pyikung thlangkhqi awm law kaw. **31** Cedawngawh naming ngaihtha uh; kum thum khuiawh khawmthan khawkdai mikphli tui ing nangmih ka ni cawngpyikhqi ce koeh hilh law uh. **32** Tuh nangmih ve Khawsa kut ingkaw am qeennaak awi ni khoem sak khqi nyng, ce ak awi ing nangmih ce ni taai sak khqi kawmsaw, a ciim sak thlangkhqi boeih a venawh qo ce ni pek khqi bit kaw. **33** Kai ing u a tangka awm, sui awm, suibai awm am nai nyng tice sim uhyk ti. **34** Vawhkaw ka kut qawi ing kamah a ngoenaak ingkaw ka pyikhqi a ngoe ngainhaak huh aham bibi hy tice na mimah ing sim uhyk ti. **35** Ik-oehi ka sai a hoesi awh, Bawipa Jesu amah qoeing, "Huhaak anglakawh peeknaak ing phu ta bet hy," tinawh ak kqawn ce poek doena, vemyih bi kyi binaak ing ak voethlauhkhqi bawm aham awm hy, tice nim huh khqi hawh nyng," tina hy. **36** Ve ak awi ak kqawn boeih awh, cekkhqi boeih mi khuk sym unawh cykcah uhy. **37** Cekkhqi ing kawp uhy, mawk unawh kqang uhy. **38** Ka haai am hu voel kawm uk ti, a tinaak khqi dawngawh amik kaw se hy. Cawh lawng a awmnaak na ce thak uhy.

21 A mingmih mi ka ming kqeng awh, Kos tuilak cung na tuicunli awh am dyng na cet poe unyng. A khawngawi awh Rhodes tulak cung na cet unyng, cawhkawng Patara na cet unyng. **2** Cawh Phoenicia benna ak cet lawng ce hu unyng saw, cawh ka ming ngawih coengawh cet pahoei unyng. **3** Cuprus tuilak cung ce haih dan hqoeng unyng saw ak kai benna kawng Siria qam na cet unyng. Tura khaw awh dyn unyng saw, cawh lawng awhkaw ik-oehikhqi chet unyng. **4** Cawh hubatkqi hu unyng saw, cekkhqi venawh khaw khqih nyn awm unyng. Myihla ak caming Paul ce Jerusalem na ama ceh ahám hlawh uhy. **5** Cehlai khawnghi ce a boeih awhtaw, cekkhqi ce cehtaak khqi unyng saw lamceh cawng thlaih unyng. Cawh amik awm hubatkqi ingkaw a mizu ami cakhoji ing ceng dyna ni thak khqi uhy, cekcoengawh tui keng awh khuk sym unawh cykcah unyng. **6** Sadip na boe, ti qu unawh kqeng unyng, kaimih taw lawngawh ngawi unyng saw a mingmih taw im na hlat uhy. **7** Tura khaw awhkawng lawng ing cet poe unyng, Ptolemai awh dyn unyng, cawhkaw amik awm koeinaakhqi ce kut tlaih unyng saw hypoet awm unyng. **8** A khawngawi nyn awh cet tlaih bai unyng saw, Kai khaw pha unyng, awithang leek ak khypyikung thlang khqih ak khui awhkaw pynoet Filip a im awh pah unyng. **9** Anih ing vaa ak ta hlan canu pupthil awi amik khypyikhqi tahi. **10** Cawh ce khawnghi igyt nu ka mi awm coengawh, Agaba ak mingnaak tawngtha pynoet ce Judith nakawng law hy. **11** Kaimih a venawh a law awh, Paul ing ak cawi a zeennaak ce lo nawk, amah a kut ingkaw a khaw ce pin hy, "Ciim Myihla ing, 'Jerusalem awhkaw Judakhqi ing vemyihna vawhkaw cawi zeennaak ak takung ve pin kawm usaw Gentelkhqi venawh pe kawm uh' thi," tina hy. **12** Ce ak awi ce ka ming zaak awh, kaimih ingkaw cawhkaw ak awmkhqi ing Paul ce Jerusalem na ama ceh ahám hlawh unyng. **13** Cawh Paul ing, "Ikaw ham kqang unawh namik kaw nami seet sak? Pin ham doeng am nawk, Bawipa Jesu ang ming awh athih ham dy awm a oepchoeh na awm nyng kaw," ni tinak khqi hy. **14** Anih ce hlawh na ama law awhtaw, plal unyng saw, "Bawipa ak kawngah seh nyng," ti unyng. **15** Cekcoengawh, tho unyng saw Jerusalem na cet unyng. **16** Kaiserea khaw awhkaw hubat thlang vang ing kaimih ce nik bawng khqi nawh ka mi pahnaak hly kawi Mason a im awh ce ni kai pyl khqi hy. Anih ce Kupra thlang na awm nawh maa awh ni hubat thlang na a awm hawh hy. **17** Jerusalem khaw ce ka mi pha awh, koeinaakhqi ing ni ym khqi uhy. **18** A khawngawi nyn awh Jakob a

venna Paul ingkaw kaimih ce cet unyng, a hqamcakhqi boeih ce cawh awm uhy. **19** Paul ing cekkhqi ce kut ami tlaih coengawh bi ami binaak awh Khawsa ing Gentelkhqi venawh ikawmyihna them a sainaak tice kqawn pek khqi hy. **20** Ce ak awi ce a ming zaak awh, Khawsa ce kyihcuh uhy. Cekcoengawh Paul a venawh: "Toek lah, Juda thlang a thawng a sang ing cangna hawh uhy ce, a mingmih boeih taw anaa awi ak lungnaak thlangkhqi nani ami awm hy. **21** Gentel khqi anglakawh amik awm Judakhqi ing Mosi ce hlat taak unawh, ami cakhqi chahhui ama qeet voel aham ingkaw nimah phung na khaw amni sak qoe voel aham nang ing cawngpyi hyk ti, tinawh a mingmih a venawh kqawn pe hawh uhy. **22** Ikawmyihna ni ti lah voei uh? Nang law hy tice za ngai hawh kawm uh, **23** cedawngawh kaimih ing ka mik kqawn law amyihna sai. Kaimih a venawh awi ak kam thlang pupthli awm hy. **24** Vekkhqi ve ceh pyi nawh ciimcainhaak ce sai lawt, a mingmih a lu voh phu ce peek pe. Cawhtaw thlangkhqi ing nang akawng amik kqawn ve a hqawng ni, ti bit kawm uh, cehlai namah ingawm anaa awi ing ak kqawn amyihna sai. **25** Khawsa ak cangnaak Gentelkhqi venawh bul qunaak buh a ankhqi ama ai aham, thi ama ai ham, hawng khak meh ama ai ham ingkaw amak ciim nupa thawlhaak ama sai aham awi tlykaak ca ce pat pe hawh uhy," tina uhy. **26** A khawngawi nyn awh Paul ing cekkhqi ce ceh pyi nawh cekkhqi mi ciimcainhaak ce sai hainh uhy. Cekcoengawh ciimcainhaak khawnghi boeih nawh cekkhqi boeih aham ciimsakaak tym ce sim aham bawkimma cet hy. **27** Khaw khqih nyn a boeih tawm awh, Asia qam awhkaw Juda thlangkhqi ing bawkim khuiawh Paul ce hu uhy. Cawhkaw thlang kqeng ce cuih unawh Paul ce tu uhy, **28** "Israel thlangkhqi aw, ni bawm lah uh! Ve ak thlang ing hun qoek awh nik thlangkhqi ingkaw anaa awi ing ve a hun ve kah nawh thlang cuk am kik hy. Cek coeng bai awh, Greekkhqi ce bawkim awh lut pyikhqi nawh vawhkaw hun ciim ve am caih sak hawh hy," tinawh khy uhy. **29** (Ephesa khaw awhkaw Trophima ce Paul inggawi lamma na khawk bau khuiawh hu hawh unawh, anih ce Paul ing bawkim ipkhui kawngma na ceh pyi namih hy, tinawh poek hau uhy.) **30** Cawh khawk bau pum awh awipiungnaak ce awm hy, cedawngawh hun boeih nakawng thlangkhqi ce dawng law uhy. Paul ce tu unawh, bawkim awhkawng amik dawk awh vawng chawh ce khai pahoei uhy. **31** Paul ce him ham na cai uhy, cawh khawk bau khui alic pum awh awipiungnaak awm hy tice Rom qaalboei ing za hy. **32** Anih ing qaalboei pynoet ingkaw qalkapkhqi ce ang tawnna khy nawh thlang kqeng a venna ce dawng uhy. Thlang kqeng ing qaalboei ingkaw qalkapkhqi ce ami huu awh, Paul ami vyk ce noen uhy. **33** Qaalboei ing cet nawh Paul ce am tu awh thi qui pakkhiih ing khih ahám awi pehy. U aw ang mingnaak, ikaw a sai dawngawh nu, tice doet hy. **34** Thlang kqeng ak khuiawh kaw thlang vangkhqi ing ak chang na khy toek toek uhy, cawhkaw awipiungnaak awh ce a qaalboei ing awitak ce am sim thai hy, cedawngawh Paul ce qalkapkhqi awmnaak im na ceh pyi aham awi pehy. **35** Paul ing thlaak kainaak a pha awh, thlang kqeng ing ami phawp ami seh aih awh qalkapkhqi ing Paul ce zoek unawh pawm uhy. **36** Cawh thlang kqeng ing a hu hu awh, "Him uh, him uh," tinawh khy uhy. **37** Qalkapkhqi ing Paul ce qalkapkhqi awmnaak na ami ceh pyi tawm awh, qaalboei a venawh, "Awi kak kqawn hly thai aw? tinak khqi hy. Anih ing, "Greek awi na aw na pau?" **38** Nang ve Izip pa maana thlang thongli kqawng damiah na ak ceh pyi ce aw? tina hy. **39** Paul ing, "Kai taw Kilikia qam Tarsu khaw awhkaw Juda thlang ni, khaw mailai awhkaw thlang am ni. Thlang kqeng a venawh awi nik kqawn sak sang," tina hy. **40** Qaalboei ing awi kqawn thainaak ce a peek awh, Paul ing thlaak awh dyi nawh thlang kqeng ce a kut ing zaap hy. Thlang boeih ami awm sap awhtaw, a mingmih a vanawh Agamaic awi na awi kqawn pek khqi hy.

22 Koeinaakhqi ingkaw ka pakhqi aw, kak cangnaak awi tuh kak kqawn ve ngai lah uh, tinak khqi hy. **2** Aqamaic awi na awi ak kqawn ce a ming zaak awh ngai sap uhy. Cawh Paul ing, **3** "Kai ve Kilikia qam Tarsu khaw awh ak thang Juda thlang pynoet na awm nyng, cehlai ve khawk khuiawh taa ni nyng. Gamaliel a kut khuiawh ni nu ni pa anaa awi ak leek na ana cawng nyng saw tuhngawi awhkaw nangmih amyihna Khawsa ak lungnaak thlang na awm lawt nyng. **4** Ve a lam awhkaw thlangkhqi ve ami thihaak aham the a kha na nyng, nu awm pa awm tunyng saw thawngim na thlak khqi nyng. **5** Khawsoih boei khyt ingkaw awi ak tlykkungkhqi ingawm ni sim uhy. Damaska khaw awh amak awm koeinaakhqi aham a mingmih a venawh ca ce lo nyng ve ak thlangkhqi ve thawng ak tlakhqi amyihna tu nawh Jerusalem awh toel aham cet nyng. **6** Khawnghyp awh Damaska khaw ka pha tawm awh, khan benna kawng vangnaak ing nik coei pheng hy. **7** Dek na kang tluk awh awi ing, "Saul! Ikawith nani thekhanaak," ni tina hy. **8** Kai ing, Bawipa, nang a u nu? tina nyng. Anih ing, "Kai taw nang ing na the na khanaak, Nazareth khaw awhkaw Jesu," ni tina hy. **9** Ka pyikhqi ing vangnaak ce hu hlai uhy, ka venawh kaw ak kqawn law avi cetaw am zasim uhy. **10** Kai ing, "Ikaw ka sai hly, Bawipa?" tina nyng. Cawh Bawipa ing, "Tho nawhtaw, Damaska khawk khui na cet. Na sai hly kawikhqi boeih cawh nim then bit kawn uh," ni tina hy. **11** Ak vang soeih ing ka mik ce a hyp law saw kxhoeip hawh a dawngawh, ka pyikhqi hy ka kut awh ni sawi unawh Damaska khaw na ni ceh pyi uhy. **12** Cawh Ananias ak minggaak thlang pynoet ce ka venna law hy. Anih taw anaa awi ak hqutu thlang ingkaw ce a khawk khuiawh ak awmkhqi Juda boeih ing amik kqjihchahnaak soeih thlang na awm hy. **13** Anih ce ka venawh dyi nawh, 'Ka naa Saul, na mik dai hlah seh!' ni tina hy. Cawh ka mik dai nawh anih ce hu pahoei nyng. **14** Anih ing, "Ni pakhqi a Khawsa ing amah ak kawngaih sim sak ham ingkaw Thlak Dyang ce huh sak nawh am kha awhkaw avi ce zaak sak aham nang ve nik tyk hawh hy. **15** Nang zaak ingkaw na huh ce thlangkhqi boeih a venawh simpylikung na awm kawp ti. **16** Kaw na qeh bak bak? Tho, batisma hu nawhtaw na thawlhnakkhi ce si lah, ang ming ce khy lah," ni tina hy. **17** Jerusalem na hlat tlah nyng saw bawkim awh kak cyckcah awh huhsaknaa ce hu nyng, **18** Bawipa ing awi ak kqawn law ce hu nyng. Anih ing, "Ang tawwna, Jerusalem ve cehta hlah; kak awithang nak kqawn hly ve do ham am ngaih uhy," ni tina uhy. **19** Kai ing, "Bawipa, nang anik cangnaak thlangkhqi ce thawng thlak aham ingkaw vyk aham sinakawk pynoet coeng pynoet awh cet nyng, tice vekkhqi ing sim uhy. **20** Na ceityih Stephen a thi ang lawngawh, cawh dyi nyng saw a mingmih ce dyih pyi nyng, anih a mik himkhqi a hi ce ana qeh pek khqi nyng," tina nyng. **21** Cawh Bawipa ing, "Cet; ak hla na Gentelkhqi venna ni tyi vang nyng," ni tina hy. **22** Ve ak awi ak kqawn by taw thlang kqeng ing ngai pe hlai uhy. Cekcoengawh taw, "Ve ak thlang ve Khawmdtek awh koeh hqing sak uh! A hqing aham am tyng hy," tinawh khy uhy. **23** Khy unawh ami hikhqci ce khan na ami khawng coengawh dek pli ce khan na theh uhy. **24** Cawh qaalboei ing Paul ce qalkap a awmnaak hun na ceh pyi aham awi pehy. Ikawith thlang kqeng ing vemyihna a mik khy sih tice sim aham a ngaih adawngawh quiboeng ing vyk nawh doet aham awi pehy. **25** Vyk aham hi ami suh peek awh, cawhkaw ak dyi qalkap zakhat ak ukkung a venawh Paul ing, "A thawlhnakk aham hluh awh Rom thlang ve vemyihna na vyk hly thai sawhqtaw nawh nu?" tina hy. **26** Qalkap zakhat ak ukkung ing ce ak awi ce ang zaak awh, qaalboei a venna cet nawh kqawn pehy. Anih ing, "Ikawmyihna sasi sang na ti? Ve ak thlang ve Rom thlang ni," tina hy. **27** Cawh qaalboei ce Paul a venna cet nawh doet hy, "Nang ve Rom thlang aw, kqawn lah?" tina hy. Paul ing, "Oeih, Rom thlang na awm nyng," tina hy. **28** Cawh qaalboei ing,

Kai ingtaw Rom thlang na awm thainaak ham tangka khawzah pe nyng," tina hy. Cehlai Paul ing, "Kai taw Rom thlang qoe que na thang nyng," tina hy. **29** Anih doet aham ak caikhqi ce thoeih bat uhy. Rom thlang na ak awm Paul ce thiqli ing ak khii dawngawh qaalboei awm ly hy. **30** A khawngawi nyn awh Judakhqi ing Paul ve thawlh puk uhy tice sim aham a ngaih dawngawh Paul ce a hlah awh khawsoieh boeikhqi ingkaw Sanhedrin ce khy sak hy. Cekcoengawh Paul ce khy nawh cekkhqi haiawh dyih sak hy.

23 Paul ing Sanhedrinkhqi ce toek khqi ceet ceet nawh, "Ka koeinaakhqi, tuhngawi dy awh kawpoek dyngnaak ing Khawsa bi ce bi nyng," tinak khqi hy. **2** Ce ak awi ce ang zaak awh khawsoih boeikhhyt Ananias ing Paul a venawh ak dyikhqi venawh Paul ce am kha awh vyk aham awi pehy. **3** Cawh Paul ing, "Nang ak baawkna amik thuut vawng, Khawsa ing namah ni vyk kaw! Anaa awi amyihna kai awideng aham cawh ngawi hyk ti, cehlai namah ing kai vyk aham awi pe tiksaw anaa awi ce hqe nawn hyk ti!" tina hy. **4** Paul a venawh ak dyikhqi ing, "Khawsa a khawsoieh boei khyt awm na ziyh hy? tina uhy. **5** Paul ing, "Koeinaakhqi, anih ve khawsoieh boei khyt tinawh am ka sim dawngawh ni; 'Nak thlangkhqi ak ukkung ce awih che ing koe zy,' tinawh a qee awm zawk hy," tinak khqi hy. **6** Cawkaw amik awmkhqi ak khuiawh thlang vang taw Sadusikhqi na awm nawh, thlang vang taw Farasikhqi na awm uhy, tice Paul ing a huh awh, cawkaw Sanhedrinkhqi venawh, "Koeinaa khqi, kai ve Farasi capa na ka awm dawngawh Farasi na awm nyng. Thlakthi thawh tlaiah ngaih-uunaak ka taak dawngawh tuh awidengnaak hun awh dyi nyng," tinak khqi hy. **7** Ce ak awi ce ak kqawn awh, Farasikhqi ingkaw Sadusikhqi ce oelh qu unawh, pakkhih na pak qu uhy. **8** (Sasusikhqi ingtaw, thlakthi thawh tlahnaak am awm hy, khan ceityih awm am awm nawh myihla awm am awm hy, ti uhy, cehlai Farasikhqi ingtaw vemyihkhqi boeih ve awm hy, ti uhy.) **9** Cawh a mimah ce hqe unawh, a mingmih anglak awhkaw anaa awi ak geekung Farasi thlang vang ce dyi unawh oelh uhy. Cekkhqi ing, "Ve ak thlang awh ve a thawlhnaka ikaw awm am awm hy. Myihla ing nu khan ceityih ing nu awi ak kqawn peek mai mantaw ikawmyihna ni ti hly?" ti uhy. **10** A ming oelh qu khqoet khqoet awh qaalboei ing Paul khqaak kawm uh a ti awh, qalkapkhqi ce tyi khqi nawh Paul ce a mingmih a venawh kawng qalkapkhqi awmnaak na lawh sak khqi hy. **11** Khawmthan awh Bawipa ing Paul a venawh dang pe nawh, "Nam thin cak sak! Jerusalem khawk khuiawh kai akawng nang dyih pyi amyih na, Rom awh awm kai ve ning dyih pyi hly bai hyk ti," tina hy. **12** A khawngawi mymcang awh Paul him hlan by taw buh a an ama ai aham Juda thlangkhqi ing awi kam uhy. **13** Vemyihna Paul him aham ak tengkhqi ce thlang phlikip hlai law uhy. **14** Cekkhqi ing khawsoieh boeikhqi ingkaw a hqamcakhqi venna cet unawh, "Paul am ka mi him hlan dy taw buh an am kami ai aham awi kam unyng. **15** Cedawngawh tuh nangmih ingkaw Sanhedrinkhqi ing ve akawng ve ak caih na sim thainaak aham anih ce nangmih a venawh ami tyih law tlahnaak aham qaalboei a venawh thoeih uh. Cawh ve a pha law hlan awh lam lakawh kaimih ing him van unyng," tinak khqi uhy. **16** Cehlai cawkaw awi ce Paul a koeinanu a capa ing za nawh, qalkapkhqi awmnaak na a ceh awh Paul a venawh kqawn pehy. **17** Cedawngawh Paul ing qalkap zakhat ak ukkung thlang pynoet ce khy nawh, "Vawhkaw cadawng ve qaalboei a venna ceh pyi lah; awi pynoet kqawn peek aham ngaih hy," tina hy. **18** Cedawngawh anih ing ce ceh pyi hy. Qalkap ukkung ing, "Thawngim ak tla Paul ing vawhkaw cadawng ve na venawh awi kqawn aham a ngaih dawngawh ceh pyi tinawh law pyi nyng," tina hy. **19** Qaalboei ing cadawng ca ce a kut awh tu nawh ak chang na sawi nawh doet hy, "Kawmyih ak awi nu kqawn aham na ngaih?" tina hy. **20** Anih ing,

"Khawngawi awh Judakhqi ing Paul ve Sanherdrin haiawh awi ak caih na doet aham tina unawh nang a ven awhkawng thoeh u sih, tinawh awi kqawn hawh uhy. 21 Cekkhqi venawh Paul ve koeh tyih pek khqi, ikawthi thlang phlikip hlai ing lam awh mah uhy. Paul a mami him hlan dy taw buh am ai aham awi kahn hawh uhy. Tuh nang ak awi ni ami lamtoen hawh," tina hy. 22 Qaalboei ing cawhkaw cadawng ca ce a ceh sak coeng awh, "Ve ak awi nak kqawn law ve u a venawh awm koeh kqawn moe," tina hy. 23 Anih ing qalkap zakhhat ak ukkung pakkhih ce khy nawh, "Qalkap zanhnh ingkaw, meqang awh ak ngawi thlang khqihkip ingkaw cai ak pawm thlang zanhnh ce tawh khanthan khawnoek pakow awh Kaiserea na ceh aham a oepchoe cana ta lah. 24 Qam ukkung Felix a venawh ak cym cana pha thainaak aham Paul ang ngawihnaak aham meqang ce hoep pe uh," tina hy. 25 Ak kai awhkaw amyihna ca qee pehy: 26 Klaudias Lisisas ing, Qam uk boei ak leek khyt Felix a venawh, "Kut ni tlaih nyng. 27 Ve ak thlang ve Judakhqi ing tu unawh him u sih ami ti awh, Rom thlang ni tice ka sim dawngawh, kai ing qalkapkhqi mi cet nawh hul nyng. 28 Ikawthi thawl amak puk hy voei tice sim aham ka ngaih dawngawh a mimah a Semhedrin a haiawh diyh sak nyng. 29 Cawkaw thawl amik puknaak ce a mimah a anaa awi ben ni tice sim nyng, cedawngawh thawng tlak aham ingkaw thiil hly kawi dyna a thawlhaak am awm hy, tinawh hu nyng. 30 Anih ce him aham ang hyp na mah uhy tice amik kqawn law dawngawh, nang a venna ang tawnna tyi law nyng. Anih thawl amik pukkhqi awm anih akawng kqawn aham tyi law pahoei nyng," tinawh. 31 Cedawngawh qalkapkhqi ing, awipeeknaak amyihna, khawmthan awh Paul ce Antipatris dyna ceh pyi uhy. 32 A khawngawi awh meqang awh ak ngawikhqi mi Paul ce ami ceh sak hahih awh, a mimah taw qalkap a awmnaak im na hlat tlaih uhy. 33 Meqang awh amik ngawikhqi ce Kaiserea khaw ami pha awh, qam uk boei venawh ca ce pe unawh, Paul ce ap uhy. 34 Qam uk boei ing ca ce a noet coengawh han benna kaw thlang hy voei ni tice doet hy. Kilikia qam awhkaw thlang ni, tice a sim awh, 35 a venawh, "Nang thawl anik pukkhqi ami pha law awh na kawng ve kqawn sin nyng," tina hy. Cekcoengawh Paul ce amah a awmnaak Herod a im awh ak nep na taak aham awi pehy.

24 Khaw hqa nyn a awm awh khawsoeih boei khyt Anarias ce a hqamca thlang pynoet mi awi kqawn ak thoem Tertulla ce law pyi unawh, qam uk boei a haiawh Paul ce thawl puk uhy. 2 Paul ce ak khuiu ak khy awh ce, Tertulla ing Felix a haiawh Paul akawng ce kqawn pehy. "Nang a uknaak ak khuiu ngaihqe cana awm poe unyng saw, nang a khawkhhan thainaak awh ve a qam awm tlaih a vawng na awm hy. 3 Ak leek khyt Felix, a hun hoei awh ikawmyihna a awm, nang a leeknaak ve zeelnaak ing ym unyng. 4 Cehlai nang huunaak kawina awm am ngaih unyng, kawdungnaak ing awi khangoet ca kamik kqawn law ve naming ning ngaih peek khqi ham qeennaka ni thoeh law unyng. 5 Khawmdeh pum awh Judakhqi ak hqee ingkaw, awipungnaak ak sai ak thlang na ve ak thlang ve awm hy tice sim hawh unyng. Anih ve Nazarethkhqi ak sawikung na awm nawh, 6 'bawkim amak ciim sak na awm hy; cedawngawh tu unyng saw, ka mimah a anaa awi amyihna awideng aham cai unyng. 7 Cawh qaalboei Lysia ing thaah hawna nawh kaimih a kut khui awhkawng anih ve qawt valh nawh, 8 anih thawl ak pukkhqi ce nang a venawh ceh aham awi pehy. Namah ing awi na deng awh cawhkaw ak thym anih ak khan awh kaimih ing ka mik kqawn ve hu noe noe bit kawp ti," tina uhy. 9 Judakhqi ing cawhkaw thawl puknaak ce bawng unawh, vawhkaw ve thym hy tinawh diyh pyi uhy. 10 Qamuk boei ing Paul ce awi kqawn aham hatnaak a peek awh Paul ing, "Kum khawqyt ve a qam ak ukkung na awm hawh hyk ti tice sim nyng; cedawngawh zeel doena kak cangnaak ce

kqawn law nyng. 11 Khawnghi pahqa hlaih zani a di hlanawh Jerusalem khaw na Khawsa bawk aham cet nyng tice ak zoei cana sim kawp ti. 12 Kai tuh thawl anik pukkhqi ing bawkim khuiawh u mi awi ka pung awm am hu uhy, sinakawkkhqi awi awi pungraak ka sai awm am hu unawh khawk bau khui han a hun awh awipungnaak ka sai awm am hu uhy. 13 Tuh nang a venawh han a hun awh nu awipungnaak ka sai magee tice ap kqawn thai uhy. 14 Cehlai kai taw ka mimah a pakhqi a Khawsa ak bawk lam ak hquktung pynoet na awm nyng, cehlai a mingmih ingtaw bawknaak chang na ak pleengkhqi tinawh kqawn uhy. Anaa awi awi ak awmkhqi boehi ingkaw tawngtha caukkhqi awi a qeekhqi boehi ce ak cangnaak thlang na awm nyng, 15 vekkhqi amyihna, thlakdyng ingkaw thlakthawl thawh tlaithnaak awm kaw, tinawh Khawsa awi ngaih-unaka ak ta thlang na awm lawt nyng. 16 Cedawngawh Khawsa ingkaw thlanghqing a haiawh vawhkaw kawlung ciimnaak ing tha y poepa nyng. 17 Kum khawzah a di awh, khawdeng hahqahkhqi aham kak thlangkhqi a do a dannaak them khyn aham ingkaw them peek aham Jerusalem na law nyng. 18 A mingmih ing bawkim khuiawh vemyihkhqi ka sai ami ni huh awh zeihnaak benawh kai taw ciim nyng. Thlang kqeng awm ka venawh am awm hy, ikawmyih awipungnaak awm am sai bai nyng. 19 Cehlai cawh Asia qam awhkaw Juda thlangkhqi ce awm uhy, a mingmih ce tuh nang a hai awhkaw kai thawl puk aham ami ngaih awhtaw ami law lat aham awm hlai hy. 20 Ce am bai awhtaw vekkhqi ing ve ikaw thawlhaak ni Sanhedrin a haiawh kang dyih awh ka sai, tice a mik kqawn aham awm hlai hy – 21 ve ak awi pynoet doeng ni a mingmih a haiawh khy doena kak kqawn hlai: 'Thlakthi thawh tlaithnaak a dawngawh ni tuhngawi nangmih a haiawh awidengnaak ka huh,' tinawh," tina hy. 22 Lam akawng ak leek cana sim nyng. Felix ing, cawkaw awih kqawnnaak ce thoeih pehy. "Qaalboei Lysia a law awm nang akawng ve kqawn bit kawng nyng," tina hy. 23 Qalkap zakhhat ak ukkung ce khy nawh Paul ce ak leek na ngaihdingnaak pe nawh doen aham ingkaw a pyikhqi ing a ngoengalhaak awm sai peek thai aham awi pehy. 24 Khawnghi iqyt nu a di awh Felix ce Juda nu a zu Jesu Khrish awh cangnaak akawng ce kqawn sak nawh ngaih pehy. 25 Paul ing dyngnaak, yh thainaak ingkaw ak law hly kawi awidengnaak akawng ak kqawn peek awhtaw, Felix ing kqjih nawh, "Ce tloek mai cang seh! Cet hlah. A tym leek ka huh awh nik khy law sak tlaih kawng," tina hy. 26 Paul ing kutbym ni pe ngai bit kaw, tinawh ang ngaih-uu a dawngawh Paul ce khy poepa nawh awi kqawn pyi hoeih hoeih hy. 27 Kum hihih a di awhtaw, Felix ce Porcius Festa ing thaw hy, cehlai Felix ing Judakhqi kaw a zeel sak aham a ngaih dawngawh Paul ce thawngim awh cehta hy.

25 Ce a qam khui a pha lawnnaa nyn thum voei a law awh, Kaiserea khaw awhkawng Jerusalem na Festa ce cet hy, 2 cawh khawsoeih boeikhqi ingkaw Juda a hqam cakhqi ce a haiawh cun unawh, Paul ami thawl saknaak akawng ce kqawn pe uhy. 3 Festa a venawh, a mingmih ak kawgaih sai pe nawh cekkhqi a kut awh Paul ce a hlah peek aham qeennaka thoeh khak uhy, kawthi cekkhqi ing Paul ce him aham lam awh thlang ana mah sak hawh uhy. 4 Festa ing, "Paul ve Kaiseresa khaw awh khaw na awm hy, a di hlanawh kai awm cena cet kawng nyng. 5 Na mimah anglakawhkaw a hqamca thlang pynoet ingawm nili bawng unawh cawhkaw thlang ce thawl naak a taak awhtaw nami oelh khak khak aham awm saw," tinak khqi hy. 6 Cekkhqi a venawh khaw kqet nyn nu hqa nyn nu a awm coengawh, Kaiserea khawna ce cet nawh a khawngawi nyn awh awidengnaak a taak awh Paul ce a haina khy sak hy. 7 Paul a law awh, Jerusalem nakawng anuk law Judakhqi ing chung unawh Paul ce thawl puk uhy, cehlai a thawlhaak am tu pe thai uhy. 8 Cekcoengawh Paul ing ak

cangnaak awi ce kqawn hy. "Judakhqi a anaa awi ing ak kah na bawkim ing ak kah na Kaisara ing ak kah na ikaw awm am sai nyng," tina hy. 9 Festa ing Judakhqi ak Kawngaih ce sai aham a ngaih awh, Paul a venawh, "Jerusalem na cet nawh vawhkaw thawl amik puknaak awh ve ka haiawh diyh aham nak ngaih nu?" tina hy. 10 Paul ing, "Awideng aham awm nyng seiawm Kaisara a haiawh ni diyh aham ka ngaih. Namah ing ak leek cana na sim hawh amyihna Judakhqi ak khan awh ikawmyih a thawlhaak awm am sai nyng. 11 Kai ing ni thihaak khoek dy awh thawlhaak ka sai vik awhtaw, thihi aham ap tha na nyng. Cehlai vawhkaw Judakhqi ing thawl amik puknaak ve ama thym awhtaw, u ingawm kai ve a mingmih a kut awh amni pe thai kaw. Kaisar a haai awh dyi vang nyng," tina hy. 12 Festa ing cawh kawawi ak kqawnkung khqi mi a ming doet qu coeng awh, "Kaisara a haiawh diyh aham thoeh hy ti. Cedawngawh Kaisara a venna cet kawp ti," tina hy. 13 Khawnghi kawlhkalh a di awh Festa hqip aham Agrippa sangpahrang ingkaw Bernice ce Kaiserea na law hy nih. 14 Khawnghi cawh a ni hawnaak hawh dawngawh, Festa ing Paul akawng ce sangpahrang a venawh kqawn pehy. "Vawh thawng akl tlaing pynoet Felix ing cehta hy. 15 Jerusalem khaw na ka ceh awh, Juda khawsoeih boeikhqi ingkaw a hqamcakhqi ing anih ce thawl sak unawh thihi aham thoeh law uhy. 16 Kai ing, thlang pynoet ing amah thawl ak pukkhqi mi hqum qu unawh ak cangnaak awi kak kqawn hlanlawh thlang a kut awh peek aham taw Rom phung amni. 17 Kai a venawh ami law awh, a mingmih awi ce yih a eng kaana a khawngawi nyn awh awidengnaak sai nyng saw cawhkaw thlang ce khy sak nyng. 18 Anih thawl amik pukkhqi ce dyi unawh thawl amik puk awh kak poeknaak amyihna ikaw thawlhaak ami thawl saknaak tang tang awm am awm hy. 19 A mimah a bawkaak awh awipungnaak ingkaw ak thi hawh Jesu ce Paul ing hqing tlahi hy a ti dawngawh a ming oelh qunaak na awm hy. 20 Cemyih awipungnaak ce ikawmyihna kqawn aham awm am sim nyng; cedawngawh Jerusalem na cet nawh cawh awideng aham ak ngaih hly nu tinawh doet nyng. 21 Cehlai paul ing Kaisara ak arii tlykaak ce a thoeh dawngawh, Kaisara a venna a ceh hlan dy ak nep na khoem aham awi pe nyng," tina hy. 22 Cawh Agrippa ing Festa a venawh, "Kamah qoe ing anih ce awi doet aham ngaih nyng," tina hy. Anih ing, "Khawngawi awh doet bit kawp ti," tina hy. 23 A khawngawi nyn awh Agrippa ingkaw Bernice ce ani sui ani sak ing theihi ang cam qu hqet nih nawh thlang kqeng anglakawh qam uk boeikhqi, khawk khui sawikung a hqamcakhqi mi lut hy nih. Cawh Festa ing awi pe nawh Paul ce law pyi uhy. 24 Festa ing, "Agrippa sangpahrang ingkaw vawhkaw ak awm thlangkhqi boeih, vawhkaw thlang ve hu uhyt ti, ve ak thlang ak camawh Jerusalem ingkaw Sisarea khaw awhkaw Juda thlangkhqi boeih ing ka venawh qeenahk thoeh law uhy, ve ak thlang ve a hqing aham am tyng hy ti unawh khy uhy. 25 Kai ingtaw a thihaak khoek ikaw thawlhaak am sai hy tice hu nyng, cehlai Kaisara boei a venawh ceh aham a thoeh dawngawh Rom na ceh sak aham kqawn hawh nyng. 26 Cehlai anih akawng Kaisara a venawh ikawmyihna ca ka qee peek hly tice ak leek na am sim hlan nyng. Cedawngawh tuh nangmih boeih a haiawh law pyi nyng, awipui khyt na, nang Agrippa sangpahrang a haiawh, vawh kawng qee hly kawi awm ak awm hly khoem hy voei nu ti nyng. 27 Ikwatih thawk tla thlang pynoet thawl amik puknaak akawng ak nep cana a sim kaana tyih sawhqt ham taw am nep hy tinawh poek nyng," tina hy.

26 Cekcoengawh Agrippa ing Paul a venawh, "Tuh awhtaw namah akawng kqawn thai hawh hyt ti," tina hy. Cedawngawh paul ing a kut ing vah khqi naws ak cangnaak awi ce kqawn hy. 2 "Agrippa sangpahrang, Judakhqi ing thawl amik puknaak

awh kak cangnaak awi kqawn aham na haiawh kang dyih thai dawngawh ka zoseen hy tinawh poek nyng. 3 Judakhqi phunglam ingkaw dum a lai ben awika na sim soeih adawngawh, kak awih kqawn ve kawdungnaak ing na ning ngai law peek aham queenna thoeh law nyng. 4 Judakhqi boeih ing ka naasen ca awhkawng ka khawsaknaak ce sim uhy, ka mik a keh cyk ca awhkawng ka qam khui ingkaw Jerusalem awh ka khawsaknaakkhqi sim uhy. 5 Kai ve khawqyt ami ni sim hawh dawngawh ami ngaih mai mantaw, kai akawng ve kqawn thai uhy, ka mimah bawkaak benawh ak kyi khyt, Farasi benna awm nyng. 6 Ka pakhqj venawh Khawsing awi a taaknaak amyihna ngaih-unaak ka taaknaak a dawnawh tuhngawi awh kai ing awidengnaak hu nyng. 7 Vawhkaw awkamnaak a soepnaak a tym ce lamtoen doena pilnam hlaihiih tloek ing khawthan khawkdai Khawsing bi ce bi uhy. Aw sangpahrang vawhkaw ngaih-unaak a dawngawh Judakhqi ing kai thawl nik puk uhy. 8 Ikwatih Khawsing ing thlakthi thawh sak tlahi hy tice ikwatih am namik cangnaak hy voei? 9 Kai ingawm Nazareth Jesu ang ming ve ang coengnaak thai khuina oelh aham anak poek nyng. 10 Cedawngawh Jerusalem khaw awh awm cemyihna ce ana sai nyng. Khawsoih boeikhqi a saithainaak ce haw na nyng saw thlakciim khawzah ce thawngim awh thla nyng, cekkhqi ce a thih sak awh, a mingmih ami thih ce ana ngaih pyi nyng. 11 A mingmih toel ahm sinakawh pynoet coeng pynoet awh cet nyng saw, Jesu ang ming ce kqawn seet sak ngah ngah nyng. Cekkhqi ak khan awh kak saw a so soeih dawngawh, cekkhqi thekhanaak aham qam chang dy dyna cet nyng. 12 Ceamyihna qam chang na ka ceh awh, hypoet taw khawsoeih boeikhqi a sathainaak haw na nyng saw Damaska khaw na cet nyng. 13 Khawnghyp awh, Aw sangpahrang, lam ka ceh huili awh, khan na kaw vangnaak ce hu nyng, cawhkaw vangnaak cetaw khawmik anglakawh awm vang khqoet hy, ce ing ce kamah ingkaw ka ceh pyikhqi ce nik coei pheng khqi hy. 14 Dek na tlus boeih unyng, cawh Aqamaic awi na awi ak kqawn law ce za nyng, 'Saul, Saul, kawtih nani the nani kha naak? Hling na suih ce namah aham ni a tlawh hy,' ni tina hy. 15 Cawh kai ing, 'Nang ve a u nu, Bawipa?' tina nyng. "Bawipa ing, 'Kai taw nang ing na the na khanaak Jesu ni. 16 Tuh tho nawhtaw dyi lah. Nang ve ka tyihzawh pynoet na caksak aham na venawh dang hawh nyng, kai ing na huh cekkhqi ingkaw tuh awhkawng kai ing ka nim huh hly kawikhqi ak dyih pyikung dyihting na awm kawp ti. 17 Nak thlangkhqi ingkaw Gentelkhqi kut khui awhkawng kai ing ni hul kawng nyng. 18 Cekkhqi amik dang sak nawh thannaak awhkawng vangnaak ak khuina hlat sak aham ingkaw, setan thaawmnaak kut khui awhkawng Khawsing benna hlat aham nang ve ni tyi kawng nyng, cawh ni cekkhqi ing thawl qeenkhaw ngainaak ingkaw kai ak khuiawh cangnaak awh ciimnaak as hukhqi anglakawh hun ce ami taak hly lawt,' ni tina hy. 19 Cedawngawh, sangpahrang Agrippa, khawk khan nakaw ik-oeih ka huh ce am oelh thai nyng. 20 Lamma cyk awh Damaska khaw awhkaw thlangkhqi venawh, cekcoengawh Jerusalem khaw awhkaw thlangkhqi ingkaw Juda qam awhkaw thlang boeih a venawh, Gentel thlangkhqi boeih a venawh awm, zutnaak ing Khawsing venna hlat unawh zutnaak ce them sainaak ing a ming dang sak thai aham awi kqawn pe nyng. 21 Vawh Judakhqi ing bawkim awh nim tu unawh him aham ni ngaih uhy. 22 Cehlai tuhngawi dy awh Khawsing ing nik pyi hy, cedawngawh tuhngawi awh tlak zawi tlak bau a haiawh avi kqawn aham dyi nyng. Tawngkhaki ingkaw Mosi ing ak law hly kawi ik-oeih anak kqawn ce ak pleeng na awi ap kqawn nyng- 23 Khrih ing a khuikhia awh thlakthi anglak awhkawng lammacyk na tho kaw, ak thlangkhqi ingkaw Gentel thlangkhqi venawh vangnaak awi kqawn pe kaw, ti ceni kak khypyi hy," tina hy. 24 Paul ing ak cangnaak awi ak kqawn huili awh Festa ing awi ce qawt pehy. "Paul, na cyih am

awm voel hy! Ak sang na cyihnaak na cawngnaak ing ni qaw sak hawh hy," tina hy. 25 Cawh paul ing, "Ak leek soeih Festa, am qaw nyng. Kak awih kqawn ve thym nawh a kung a dawng awm hy. 26 Sangpahrang ing vemyihkhqi ve sim hy, anih a venawh ngaihding na kqawn pe thai nyng. A kil awh ang hyp ik-oeih sai na ama awm adawngawh, vawhkaw kak kqawnkhqi boeih ve ama sim pynoet ca awm am awm hy tinawh sim nyng. 27 Agrippa sangpahrang, tawngtha khqi ve nak cangnaak nu? Cang na hyk ti tice sim nyng," tina hy. 28 Cawh Agrippa ing Paul na ce, "A tym ak tawica ak khuiawh kai ve Khrith tlhang na ning coeng sak vang tinawh nak poek nawh nu?" tina hy. 29 Paul ing, "A tym ak tawica awm khawk choet awm nang doeng kaana tuhngawi awh kai ak awi ak ngaikhqi boeih ing, vawhkaw thi qui kqawn kaana, kai amyihna nami awm thainaak aham Khawsa venawh cykcah nyng," tina hy. 30 Cawh sangpahrang ce tho hy, anih ak pyikung qam uk boei ingkaw Bernice ingkaw cawh ak ngawikhqi boeih ce tho uhy. 31 Ipkhui awhkawng ami ceh awh, "We ak tlhang ing ve thiham ingkaw thawngim tlaak aham kawi na ikaw awm am sai hlai hy," ti qu uhy. 32 Agrippa ing Festa a venawh, "Kaisara a venna ceh aham ama thoeh mantaw, ve ak tlhang ve hlah aham awm mai hawh hlai hy," tina hy.

27 Italy qam na kaimih ka mi ceh aham awm hy, tinawh awi amik tlyk awhtaw Paul ingkaw thawng ak tlakhqi tlhang vangkhqi ce Julia ak mingnaak, Augusta a qalkap zakhstan ak ukkung a venawh ni pek khqi uhy. 2 Adgammuttini khaw awhkawng lawng ing Asia qam awhkaw tuicunli a keng na ak awm khawkhqi benna ceh aham tuicunli awh cet unyng. Thesalonika khaw awh ak awm Makedonia pa pynoet ce kaimih a hu awh bat lawt hy. 3 A khawngawi nyn awh Sidon khaw awh dym unyng; Paul ing a ngoengainghaakkhqi a thoeh thainaak aham Julia ing qeennaak ing Paul ce a pyikhqi venna ceh sak hy. 4 Cawhkawng ce tuicunli awh cet tlaih bai unyng, khaw a hli dawngawh khawhli a dipnaak benna kawng Kupra tulak cung ce poeng unyng. 5 Kilikia ingkaw Pamphylia tuikeng tuicunli ce poeng unyng saw Kilikia qam awhkaw Mura khaw awh dym unyng. 6 Ce a hunawh qalkap zakhstan ukkung ing Italy qam benna ak cet Alexandria lawng ce hu nawh ce a lawng awh ce ngawi pahoei unyng. 7 Khawnghi ka mi di awh Kanidu khaw ce a kyinaak ak khuiawh kawng pha unyng. Khawhli ing ama ning dym sak thai khqi dawngawh Salmoni vang ben caqai awh ak awm khawhli a sitnaak Krete tulak cung benna cet unyng. 8 Tuikeng keng awh a kyinaak ak khuiawh kawng cet poe unyng saw, Lasea khaw venawh ak awm lawng dymnaak leek a mi ti a hun ce pha unyng. 9 Khawnghi a boein awh, Buhzeihnaak awm a boein hawh dawngawh lawng ing ceh ve kjih awm soeih soeih hawh hy. Cedawngawh Paul ing cekkhqi venawh ngaihtaakaak awi kqawn pek khqi hy. 10 "Koeinaakhqi, tuh ningeni ni cehnaak ve a kjih awm soeih hy, ni cehnaak lawng ingkaw ik-oeikhqi aham awm kjih awm nawh, nimah a hqjinggaak aham dy awm kjih awm hy," tinak khqi hy. 11 Cehlai paul ing ak kqawn peek awi ce qalkap zakhstan ukkung ing ang ngai peek kaana, lawng ak mawngkung ingkaw lawng ait takung ak awi ce ngai pe lat hy. 12 Chikca awh lawng dymnaak aham ama nep dawngawh, tlhang khawzah ing ceh poe aham ce ngaih uhy, Phoiniki khaw ce pha nawh cawh ce chikca hawnaka aham ngaih uhy. Cawhkaw lawng dymnaak cetaw Krete tulak cung khawtaak ben nakaw tlhung ingkaw kham benawh awm bawk hy. 13 Kham ben nakaw zilh ce ak heng cana a hli awh, ami ngaihnaak amyihna ce awm hawh hy, tinawh amik poek dawngawh lawng ami kingnaak qui ce hlam unawh Krete tuikeng awh ce cet poe unyng. 14 Iqyt awm a di hlanawh, tlhungben khaw law benna kaw khawhli ce tulak cung benna kawng hli law hy. 15 Lawng ce khawhli ing zawn nawh zilh

ce ak tha a awm dawngawh hai benna ce am cet thai voel hy; lawng ce hlah hqoeng unawh zilh ing a ngaih ngaih na zawn hy. 16 khawhli a sitnaak tulak cung ak zawi ca Kauda ami ti ce ka mi poeng awh, a kyinaak ak khuiawh kawng loetnaak lawng ak zawica ce tu thai unyng. 17 Cawhkaw lawng ak zawica ce lawng awh amik dawh awh, qui nuk thla unawh lawng awh king qap uhy. Syrtis dizui ce lawng ing su hau kaw ami ti dawngawh, hizan ce dawk uhy, cedawngawh lawng ce khawhli ing a ngaih ngaih na zawn hy. 18 Ceamyihna khawhli ing ani zawn khqi dawngawh, a khawngawi nyn awhtaw lawng awhkaw ik-oeih ak qikhqi ce tu na khawng uhy. 19 Am thum nyn awhtaw, a mimah a kut qoe qoe ing lawng awhkaw ik-oeikhqi ce tu na khawng uhy. 20 Khawnghi khawqyt awh khawmik aihchi awm am dang qoe nawh khaw a hli law khqoet khqoet awhtaw, loet kawng unyng tinawh poeknaak qoe qoe am ta voel unyng. 21 Buh a ai kaana khawnghi khawqyt ami awm awh, Paul ing cekkhqi a haiawh dyi nawh, "Koeinaakhqi, kai ing Krete benna kawng am ni ceh aham kak kqawn ce naming ngai mantaw vawhkaw khuihkhanaak ingkaw sungnaak ve amni hu hlai voei uh. 22 Cehlai tuh awhtaw naming ngaih qep sak hlah uh, u a ca pynoet awm am qeeng kawm uk ti, lawng vetaw see hawh kaw. 23 Zan khawmthan kang mang awh a bi ka bi peek ka Khawsa ak khan ceityh pynoet ce ka haiawh dyi nawh, 24 "Paul, koeh kqjih, Kaisara a haiawh awideng aham dyi ngai ngai bit kawp ti, nang mi lawng awh amik cekkhqi a hqjinggaak boeih ce Khawsa ing qeennaak ing nang a venawh ni pe hawh hy," ti tina hy. 25 Cedawngawh koeinaakhqi namik kaw caksak uh, Khawsa awh cangnaak ka taak dawngawh ak kqawn law amyihna awm ngaih ngaih bit kaw. 26 Han a tulak cung awh num taw ni taii lawk khqi ngaih ngaih bit kaw," tinak khqi hy. 27 Khawnghi hqanyin awh ak phlinaak khawmthan awh Adriatic Tuicunli awh khawhli ing ani zawn khqi hui awh, thanlung awh lawng ak mawngkungkhqi ing hanawh kaw ceng nu zoe law voe voe hawh hy tinawh sim uhy. 28 Tui tahnaak ing tui ce ami tui awh dawng kqetkip dung hy. A khoei a awm awh ami tui tlaih awh dawng khqulkkip dung bai hy. 29 lawng ing lungnu su hau kaw ami ti dawngawh, a kingnaak thi koeiloen pupthli ce thla unawh khawkdai ce cykcahnaka ing qeh unyng. 30 Lawng awhkawng loet aham ami ngaih dawngawh, lawng ak mawngkhqi ing lawng ce tui awh nuk thla uhy, lawng ami kingnaak thi koeiloen amik nuk thlak amyihna sa qu unawh nuk kqum uhy. 31 Cawh Paul ing qalkap zakhstan ukkung ingkaw qalkapkhqi venawh, "Ve ak tlhangkhqi ve lawng awh ama mi awm mai mantaw, am loet hly tang uhyt ti," tinak khqi hy. 32 Cedawngawh qalkapkhqi ing lawng ami kingnaak qui ce tlyk boet unawh lawng ce tui awh hlah hqoeng uhy. 33 Khaw a dai law tawn awhtaw Paul ing cekkhqi boeih ce buh ai aham kqawn pehy. "Ni hu khawnghi paqha hlaihphli khuiawh, buh a ai kaana ngaihkyi kawboet ing awm uhyt ti. 34 Tuh awhtaw buh ai hlah uh. Buh nami ai awh ni khawnghi nami kah hly. Nangmih ak khuiawh u ingawm nami lu awhkaw lusami pin pynoet zani am hqui kawm uk ti," tinak khqi hy. 35 Cemiyihna awi ak kqawn peek khqi coengawh, phaihpi ce lo nawh a mingmih boeih a haina Khawsa venawh zeelnaak awi kqawn hy. Cekcoengawh phaihpi ce thek nawh ai uhy. 36 Cawh aming ngaih ding boeih nawh tlhang vang ing buh ce ai uhy. 37 Lawng awh ak ngawikhqi boeih taw tlhang 276 law unyng. 38 Buh ak phyi na ami ai coeng awhtaw, lawng ce a zangaaka bet aham cang ce tui awh khawng uhy. 39 Khaw a dai law awhtaw, han a hun awhkaw dek hy voei nu tice am sim hlai uhy, dizui ce hu uhy. Cedawngawh ang coeng thai awhtaw cawhkaw ceng awh lawng ce dym sak aham cai uhy. 40 A kingnaak quikhqi tlyk unawh tuicunli awh cehta uhy, Cekcoengawh lawng ami kaihnaak quikhqi awm hlam boeh boeh uhy. Zilh a law hawi unawh lawng ce ceng benna zawn sak uhy. 41 Cehlai lawng ing ceng awhkaw dizui

ce su hy. Lawng a lu ing dizui ce a suk a dawngawh am tat thai voel hy, cehlai lawng a huben taw tuih tha a awm aih dawngawh ek boeh boeh hy. 42 Thawng ak tlakhqei boeih ce tui awh zo unawh cen kanglak kawm uh, ami ti dawngawh qalkapkhqi ing him boeh boeh aham cai uhy. 43 Cehlai qalkap zakhak ukkung ing Paul ce hlyn aham a ngaih dawngawh cekkhqi ing aming cainaak ce kham pek khqi hy. Cedawngawh u awm tui ak zo thai taw lawng awhkawng ceng na tui awh ami zo aham awi pek khqi hy. 44 Thlang vang tloek bai taw a vang thingpen ak khan ingkaw lawng ak keek awh awm aham awi pehy. Ceamiyihna sai unawh thlang boeih ing ak soep cana ceng ce pha uhy.

28 Ceng ami pha boeih awhtaw, cawkaw tuilak cung ce Malta tuilak cung ti uhy, tice sim unyng. 2 Ce a tuilak awh ak awmkhqi boeih ing kaimih ce ni toek ni teng khqi uhy. Kaimih aham mai tih law unawh aawm unyng, khaw a nawk khaw ding hy. 3 Paul ing thikkohkhqi ce boem nawk mai awh a tih awh ak chy ak ngan khqui ce maih hlawk ang zaak awh ce cawn law hy, Paul ce a kut awh cuk nawk bat hy. 4 Ce a tuilak cung awh ak awmkhqi ing Paul a kut awhkaw khqui ak bat ce ami huh awh, "Ve ak thlang ve thlang ak him vani hy voei, tui awhkawng taw loet hawh hlai hy, amak thym phu suinaak ing a hqing am ngaih nawk ni ve," ti uhy. 5 Cehlai Paul ing khqui ce mai awh phum nawk a tlawh am za qoe hy. 6 Thlangkhqi ingtaw a kut ce hling kaw, tlu law kawmsaw thik thlang kaw tinawh poek uhy, cehlai ami qeh khing awh awm Paul taw ikawmyihna awm am awm hy, cawhtaw amik kaw ce thaw unawh anih ve khawsa va ni hy voei tinawh poek uhy. 7 Ce a tuilak cung awh boei na ak awm Publiu a dum ce ce a venawh awm hy. Anih ing kaimih ce nik khy khqi nawk a im awh khaw thum voei ani awm sak khqi awh ak leek cana ni toek ni teng khqi hy. 8 A pa ce tlo nawk zaih hy, a sa tlo nawk tumthe awm tlo hy. Paul ing anih a venna cet hy, cykcahnaka taak pe nawk ak khan awh a kut a loeng peek awh qoei hy. 9 Cawkaw ik-oeih ce ami huh awh, ce tuilak cung awh amik awm tlak chang boeih awm law unawh qoeinaak hu uhy. 10 A mingmih ing kaimih ce nim kyihcah khqi uhy, cet hlai u sih ka mi ti awh kaimih a ngoengaihnaakkhqi boeih ce toen law uhy. 11 Hla thum a di coeng awhtaw, ang ming phir, Alexandria khaw awhkaw lawng, chikca awhkawng tuilak cungawh ak awm hawh, ce a lawng ing cet unyng. 12 Sirakuse khaw na thoeng unyng saw, cawk ce khaw thum voei awm unyng. 13 Ce a khaw awhkawng cet tlaih bai unyng saw Rhegium khaw pha bai unyng. A khawngawi nyn awh kham benna kaw khaw ce hli law nawk cawkaw a khawngawi nyn bai awh Puteoli khaw ce pha unyng. 14 Ce a khaw awh koeinaakkhqi thlang vang ce awm uhy, a mingmih ing khaw khqih nyn awm pyi aham kaimih ce nik khy khqi uhy. Cawkawng ce Rom khaw na cet unyng. 15 Cawkaw amik awm koeinaakkhqi ing kaimih law hy ti aming zaak cawk, Appia hun awhkaw ik-oeih zawihnaak ingkaw savang im pakthum a awmnaak hun dyna kaimih ce ni do khqi uhy. Cawkaw thlangkhqi ce Paul ing a huh awh Khawsa venawh zeelnaak awi kqawn nawk ang ngaih qep hy. 16 Rom khaw ka mi pha awh, Paul taw qalkap pynoet ing doen nawk amah poek awh awm thainaak ce pe uhy. 17 Khaw thum voei a awm coengawh Paul ing Juda thlang sawikungkhqi ce khy hy. Cekkhqi boeih ce ami law awh, Paul ing cekkhqi venawh: "Koeinaakkhqi, nik thlangkhqi ing ami nu pa a phung ak kah na ikaw awm am sai hlai nyng, Jerusalem khaw awh nim tu unawh Romkhqi kut awh ni pe uhy. 18 Cekkhqi ing awi a mini deng awh thihihaak khoeck na thawlhaak ikaw am ka sai dawngawh hlah aham ni ngaih uhy. 19 Cehlai Judakhqi ing am ngaih unawh, Kaisara a ven pha aham kai ing thoeh nyng. Kak thlangkhqi ak khan awh thawl puk aham amni. 20 Vawh nangmih mi hu qu unawh awi kqawn aham nik khy khqi nyng. Israelkhqi

ang ngaih-unaak awh ni kai ve thiqui ing khih na ka awm," tina hy. 21 Cekkhqi ing, Nang akawng awh ce Judah nakawng capat am hu unyng, cekoengawh ce nakawng amik law koeinaa u ingawm nang a seetnaak ikaw ap kqawn hlan uhy. 22 Cehlai nang a huunnaak ikawmyihna a awmnaak tice zaak aham ngaih unyng, a hun hoei awhkaw thlangkhqi ingtaw vawhkaw thlangboel ak thai na ak awm ve ak che ngai na kqawn uhy," tina uhy. 23 Khaw hypoet awh Paul ing hqum aham awi amik kqawn awh, Paul a awmnaak im awh thlang khawzah ce law uhy. Mymcang awhkawng khawmy dy na cekkhqi venawh Khawsa qam awithang leek ce ak kqawn peek awh Mosi a anaa awi ingkaw tawngkhqi ak cauk awhkawng Jesu akawng ce aming zaksimmaak aham kqawn pek khqi hy. 24 Ak awihkqawn awhkawng thlang a vang ingtaw am cang na uhy. 25 A mimah ce oelh qu unawh, a hukhit na Paul ing vawhkaw awei ve ak kqawn awhtaw voei uhy: "Ciim Myihla ing nami pakdamkhqi venawh Isaiah hawnaak ing awitak ce vemyihna anak kqawn hy: 26 Ve thlangkhqi venawh cet nawhtaw, Za hlai voei uk ti am zasim kawm uk ti; hu hlai voei uk ti, am hat kawm uk ti. 27 ikawthi vekkhqi ak kaw ve qep aih nawk; aming hakhqi ingawm am za thai uhy, ami mik ce him uhy. Cemyih am mantaw hu kawm usaw, za kawm uh, kawlung ing zasim kawm usaw hlat kawm uh, cawk kai ing qoei sak khqi hy kawng," tihy. 28 Cedawngawh Gentelkhqi venawh Khawsa a hulnaak ce pha hawh nawk, a mingmih ing ngaih kawm uh, tice nami sim aham ngaih unyng," tinak khqi hy. 29 Ve ak awi ak kqawn awh, Judakhqi ce a mimah ingkaw a mimah aming oelh qu doena cet uhy. 30 Khaw kum hih khui cawk ce Paul ing im vat nawk awm hy. A venna ak law thlangkhqi boeih ce ak nep cana do hy. 31 Qaal leeknaak ing ak kangkung a awm kaana Khawsa qam a kawng ce ak kqawn awh Jesu Khrih akawng ce cawngpyi hy.

Rom

1 Paul, Jesu Khril a tyihzawih, tyihzawih hamna ak khy, Khawsa Awithang leek kqawn hamna ak khy ing, **2** cawkaw awithang leek taw Cakciim awh amah a tawngkhakhi hawnak ing ak cyk ca awhkawng a taak hyt awi ceni, **3** pumsa ben awhtaw David a cadil na ak awm, amah a capa akawng ce, **4** thihnaak awhkawng a thawnnaak ak caming, ningnih a Bawipa Jesu Khril taw Khawsa capa ni tinawh thaawmnaak ing ciimcaihnaak Miylha ing kqawn hy. **5** Anih ak caming ang ming awh, cangnaak ak caming ak awingainaak ak khuiawh thlangkhqi ing a mi kun thainaak aham Gentel thlangkhqi khy aham am qeennaak ing cityih bibi ve ni hu uhy. **6** Nangmih awm Jesu Khril thlang na awm lawt aham ak khy khqi anglakawh paa lawt uhyk ti. **7** Khawsa ing lungna nawh thlak ciimcaih na awm hamna ak khy Rom khaw awhkaw thlangkhqi boeih a venawh: Pa Khawsa ingkaw Bawipa Jesu Khril a venawh kaw ngaihdingnaak ingkaw am qeennaak nangmih Rom khawawh ak awmkhqi boeih a venawh awm seh. **8** Lamma cyk awh, nangmih ak cangnaak akawng ce khawmdek pum awh amik kqawn dawngawh, nangmih boeih awh ce Jesu Khril ak caming Khawsa venawh zeelnaak ari kqawn nyng. **9** Kak kawlung boeih ing a Capa ak awithang leek khypyi nyng saw a bi ka bi peekkung, Khawsa ing cykcahnnaak ka taaknaak a hoei awh nangmih am nim hilh khqi qoe qoe nyng tice sim nyng, **10** a hukhit awh nangmih a venna ka lawnaak thai aham Khawsa ing chawh am awng lawnaak aham cykcah nyng. **11** Miylha kutdo a vang a phal awm ni pek khqi nawh namik tha a awmnaak thai aham nami huh aham ngaih soeih nyng; **12** pynoet ingkaw pynoet cangnaak benawh thaawmnaak ni taaknaak aham ngaih nyng. **13** Gentel thlangkhqi venawh ak thaith kak bih hawh amyihna, nangmih anglakawh awm kak bijnnaak thai aham, law aham cai khing hawh hlai nyng (tuhdy anik kangkung awm khak hy) tice, koeinaakhqi, a sim kaana awm ham am ni ngaih khqi nyng. **14** Greek thlangkhqi ingkaw Greek thlangkhqi am a venawh awm, thlakcyikhqi ingkaw thlakqawkhqi venawh awm sai hly kawi tka khak nyng. **15** Cedawngawh maw Rom khaw awh amik awm nangmih a venawh awm awithang leek kqawn aham ka ngaih khak lawt mah hy. **16** Awithang leek awh chahnnaak am ta nyng, ak cangnaak thlangkhqi boeih hulhaak a hamna Khawsa ak thaawmnaak na a awm dawngawh: lammacyk awh Judakhqi ahamna awm nawh cekoengawh Gentelkhqi ahamna awm hy. **17** Awithang leek awh Khawsa venawh kawng ak dyng pynoet ce dang hawh hy, "Thlakdyng taw cangnaak ing hqjng kaw," tinawh qee ce amyihna, ak cyk ca awhkawng a dytnaak dyna cangnaak ing dyngnaak ce awm hawh hy. **18** Khawsa amak simkhqi ingkaw khawboe seethnaak ing thlang ak thekhanaka thlakche khqik khanawh khan benna kawng Khawsa ak kawsonaak ce dang noe noe hawh hy, **19** Khawsa ing ak zoei cana a sai peek khqi dawngawh, a mingmih ing Khawsa a mi sim thainaak aham zoei cahy. **20** Ikawthi khawmdek a syn cyk ca awhkawng sim thai na amak awm Khawsa a saithainaa, kumqu thaawmnaak ingkaw a Khawsa nihnaak ce, ak ceet cana dang hawh hy, a them saikhqi awh zaaksim thainaak awm hawh nawh, thlanghqing ing oehl thainaak a lam am awm hy. (*aidios g126*) **21** Khawsa ce sim hlai uhy, Khawsa amyihna am kyihcawh unawh zeelnaak awm ap kqawn uhy, themche poeknaak ing amik kawlung be nawh, amik kawmnikha hyp hy. **22** Thlakcyi na ngai qu hlai uhy, thlakqawh na awm uhy, **23** amak see thai Khawsa a boemangnaak ce ak see thai thlanghqing, phakhqi, qamsakhqi ingkaw ak cawlththaikhqi a myi amyihna sai uhy. **24** Cedawngawh Khawsa ing a mimah thawlh ngaihnaak amyihna pynoet ingkaw pynoet a pum ce chahqai na a awmnaak aham nu

pa thawlh sainaak amak ciimcaih benna pehy. **25** Khawsa awitak ce a hqawng ah qapna coeng sak unawh, ak saikung anglakawh a sai them ce bawk unawh a bi ce bi pe uhy. Ak Saikung taw ang loetaa kyihcay tyng ni. Amen. (*aiōn g165*) **26** Cedawngawh Khawsa ce chahpyih hamna hyngaihnaak ing mang taak nawh; nukhqi ingawm ami thangpyi khawsaknaak ce amak leek khawsaknaak benna hawi pyi uhy; **27** cemiyh lawtna pakhqi ingawm nukhqi mi ih a awmnaak ce nawn unawh, pa ingkaw pa zaak amak leekna ip a awm unawh ami thawlh phu zaawk kawi ce amimah ing zaawk uhy. **28** Khawsa simnaak ve ikawna awm ama ming ngai dawngawh, a mimah ak kawlung seetnaak ing sai hly am kawi sainaak benna Khawsa ing a mingmih ce pek khqi hy. **29** Cekkhqi ce thawlhaak a soep a hoi, khawboe seetnaak, kamvanaak ingkaw seetnaak ing be unawh; ytnaak, thlang himnaak, hqonaak, thailatnaak, sawhnaak ing be uhy; thlang theetnaak, **30** kawsonaak, Khawsa sawhnaak, thlang kawna am huhnaak, thinsahnaak ingkaw oek qunaak ing be uhy; themche sainaak, nu pa ak awi am ngainaak; **31** kaw amak awmkhqi, cangnaak amak takhqi, lungnaak amak takhqi, qeemmaal amak takhqi na awm uhy. **32** Cemyih a them che ak saikhqi taw ami thiham awm hy ti Khawsak awipeek ak awm ce sim hlai uhyk ti, a mimah ing a mi sai doeng am khoek nawh, thlang chang ak saikhqi ce ym pyi uhy.

2 Cedawngawh, nangmih, thlang awi ak dengkhqi, na mimah awm ap cang lawk uhyk ti, thlang awi nami dengnaak ahoei awh, namah ni na thawlh khqoeng hy, thlang awi ak deng nang ingawm cemyih ni na sai lawt hy. **2** Cemyih them ak saikhqi ak khanawh Khawsa ak awidengaak taw awitak awh ni ang dyih hy tice ni sim uhy. **3** Cedawngawh, nang thlanghqing, namah ing cemyih ik-oeih ce na sai lawt dawngawh thlang awi na deng awh, Khawsa ak awidengaak khui awhkawng loet tloe kawng nyng, tinawh nak poek nawh nu? **4** Am awhtaw Khawsam qeennaak ing zutnaak benna ni sawi hy tice a sim kaana, am qeennaak, qeenkawh ang ngainaak ingkaw ang yh thainaakkhqi ce kawna a huu kaana na awm nawh nu? **5** Cehlai namik kawlung a hqamnaak ingkaw am nang zutnaakkhqi boeih ce, amah ak awidengaak ak dyng khawng hia pha awh, namah aham Khawsa ak kawsonaak ak cun nani na awm khqoeng hy. **6** Khawsa ing thlang boeih ing ami them sainaak amyihna a phu ce pe kaw. **7** Them leek sainaak a qoeng kaana boemangnaak, kqjhchah naak ingkaw amak see thai ik-oeih ak suikhqi venawh Khawsa ing kumqui hqjngnaak ce pe kaw. (*aiōnios g166*) **8** Cehlai amah ak kawngaih doeng sui nawh awitak ak oehlhkqi ingkaw them che ak sai thlangkhqi ham kawsonaak ce awm kaw: **9** Ik-oeih che ak sai thlangkhqi ham kawseetaak ingkaw khuiikhanaak awm kaw: Judakhqi aham awm maa kawmsaw cekoengawh Gentelkhqi aham awm kaw: **10** Cehlai boemangnaak, kqjhchahnaak ingkaw ngaihdingnaak ce ik-oeih leek ak saikhqi ham awm kaw: Judakhqi ham awm maa kawmsaw cekoengawh Gentelkhqi ham awm kaw. **11** Ikawthi Khawsa ing u a haai awm am toek hy. **12** Anaa awi kaana thawlhaak ak saikhqi boeih taw anaa awi kaana plawci lawt kawm uh, anaa awi ak khuiawh thawlhaak ak saikhqi boeih awm anaa awi ingawi deng lawt kaw. **13** Ikawthi anaa awi ak zakhqi taw Khawsa haiawh thlak dyng na am awm hy, cehlai anaa awi haiawh thlak dyng na am ta pai hlai uhy, **14** (Gentelkhqi ing Anaa awi ce am ta pai hlai uhy, a mimah poek awh anaa awi ing a ngoekhqi ce sai uhy, anaa awi am ta hlai uhy, cekkkhqi aham anaa awi na awm hawh hy, **15** anaa awi ing a ngoekhqi ce amik kawlung khuiawh qee hyt na awm hawh hy, a mimah a sim naak ingawm dyih pyi hy, amik poeknaak khqi ing thawl puk unawh ang dyih na awm dyih pyi bai uhy.) **16** Khawsa ing Jesu Khril ak caming kai ing awithang leek kak khypyinaak amyihna thlanghqing

awhkaw ang hyp kawpoekkhqi ce awi a deng awh ve ve awm bit kaw. **17** Tuh nangmih ing, Juda thlang na awm unyng ti uhyk ti; anaa awi awh hang unawh Khawsa mi tuqunaak awh nang oek qu awhtaw; **18** amah ak cawngaih ce sim u tiksaw anaa awi ing a ni cawngppi amyihna ak leek khqoet ik-oehi ce nami sim awhtaw; **19** mik hyp ak sawikung, thannaak ak khuiawh ak awmkhqi ham vangnaak na nami awm awhtaw; **20** thlakgawkhqi lam ak huhkung, naasenkhqi ak cawngpyikungkhoi ing namim qu nawn nu? **22** Thlang ing a samphain aham am awm hy tinawh ak kqawnkung ing, na sam na phaih nawn nu? Myiqawl bawknaak tyih nang ing, myiqawl bawknaak bawkimkhqi ce na muk nawn nu? **23** Anaa awi ak oek qu pyikhqi ing, anaa awi eeknaak ing Khawsa ce nak thekhanaak nu? **24** Nangmih awh Gentelkhqi anglakawh Khawsa'ng ming kqawn seet na awm hawh hy," tinawh a qee amyihna. **25** Anaa awi nami hqut awhtaw chahhui qeet ve phu tavy, cehlai anaa awi ce nami eek awhtaw, chahhui amak qeet thlang amih nani nami awm hy. **26** Chahhui amak qeet thlangkhqi ing anaa awi ing a ngoe ce a mi hqut awhtaw, chahhui ak qeet thlang amyihna am nik poek kawn nu? **27** Pumsa awh chahhui am qeet hlai hy anaa awi ak hqut ing nangmih ce ni thawlak sak khqi kaw, ca ing a qee anaa awi ta unawh chahhui ak qeet thlang na awm hlai uhyk ti, anaa awi ak eekkung na awm uhyk ti. **28** Ak khanben doeng ak dang ingkaw ak khan benawh pumsa chahhui ak qeet doek ak thlang ce Juda thlang amni. **29** Ak khui benawh ak awm; Myihla ingkaw lingbyi kawlung chahhui ak qeet ak thlang, ca doeng ing qee doek na amak awm ak thlang ce ni Juda thlang na a awm hy. Cemyih ak thlang ce thlanghqing ing am kiyh pai hlai hy Khawsa ing kiyh hy.

3 Cawhtaw Juda thlang na awmnaak ing ikaw hawihkhangnaak a awm, am awhtaw chahhui qeetaak awh a phu ikaw a awm?
2 Ik-oehi soepkep awh a leeknaak awm hy! Lamma cyk awh a leeknaak taw, Khawsa awi qoe qoe ce a mingmih a venawh khoem sak hy. **3** Thlang a vang ing cangnaak a ma taak mai mantaw ikawmyihna a awm kaw? A mingmih ak cangnaak a zawi dawngawh Khawsa a yapwmnaak ce hqee thai nawn nu? **4** Am hqee qoe qoe hy! Thlanghqing ing a qaai kqawn seiawm Khawsa taw am qaai hy: "Nak awih kqawn ing cangnaak ni pe nawn awi na deng awh noeng hyk ti," tinawh qee hyt amyihna. **5** Cehlai ningnih am ni dyngnaak ing Khawsa a dyngnaak ce ak caih khqoet na ang dang sak mantaw ikaw nik kqawn kaw? Khawsa ing thlang a phep man Khawsa ve amak dyngna awm hly nawn nu? (A thlanghqing kqawn amyihna ni kak kqawn hy.) **6** Cemyih amni! Cemyihna a awm mai mantaw, ikawmyihna nu Khawsa ing khawmdek ve awi a dengnaak kaw? **7** U ingawm, Kai a thawlhaak ing Khawsa a thymnaak ce ang dang sak khqoet awhtaw amah a boemangnaak na awm khqoet kaw, kawith thawlak dawk sak na ka awm bai kaw?" ti mai kaw. **8** Ikawith thlangkhqi ing kaimih ve nik kqawn seet unawh – "Ik-oehi leek a lawnaak aham ik-oehi che sai u sih," tinawh am ka mik kqawn ce a mi nik kqawn sak uh? Cemyihna ak kqawnkhqi taw a mi dawk aham tyng qoe hy. **9** Cawhtaw ikaw ing ni dyt sak kaw? Ningmih ve nik leek bet uh nu? Am ni leek qoe hy! Juda awm Gentel awm thawlhaak ak khuiawh ni awm boeih uhy tice nik kqawn caih law pek khqi hawh nyng. **10** U awm thlak dyng am awm hy, pynoet ca awm am awm hy; **11** ak zasim thlang pynoet awm am awm hy, Khawsa ak sui thlang pynoet awm am awm hy. **12** Thlang boeih lam hang unawh, hawnak amak taak thlang na awm hawh uhy; them leek ak sai u pynoet awm

am awm hy, pynoet ca awm am awm hy. **13** A mik awiqawng ce phyi amyihna awng qu nawn; a mim lai ing thlang thai na uhy. A mi uhi awh khqui ak chy ce awm hy. **14** A mim kha ce awi che ingkaw awi kha ing be uhy. **15** Thlang a thi lawng sak ham a mi khawkham ce ly sak uhy; **16** seetnaak ingkaw khuikhanaak ce a mingmih a cehnaak lam awh awm nawn, **17** ngaihdinggaak lam ce am sim uhy. **18** A mi mik awh Khawsa kqjhnaak qoe qoe am awm hy," tinawh qeena a awm amyihna. **19** Kha boeih ing cyyp nawh khawmdek pum ve Khawsa ak awidengaak khuiawh a awm thainaak aham, anaa awi ing ak kqawnkhqi boeih ce, anaa awi ak kaiawh ak awmkhqi ham ni ak kqawn hy, tice ni sim uhy. **20** Cedawngawh u awm anaa awi hqutnaak ak caming a mik huh awh thlakdyng na awm hy, anaa awi ing ni thawlhaak ce ni sim sak khqi hy. **21** Cehlai tuawh anaa awi ingkaw tawngthaakhqi a sim sak amyihna anaa awi kana Khawsa dyngnaak ce dang sak na awm hawh hy. **22** Jesu Khrhi awh cangnaak ak caming ak cangnaak thlang boeih a venawh dyngnaak ce Khawsa venna kawng law hy. A lawhanaak pynoet awm am awm hy, **23** thlang boeih ing thawlak nawn Khawsa a boemangnaak am pang thai voel uhy, **24** Cehlai Jesu Khrhi a thaawngnaak qeennaak ak caming a zoena dyng sak hy. **25** Khawsa ing a thi cangnaak ak caming anih ce hulnaak aham bulnaak na pehy. Ak dung na kawlung taaknaak ak caming ak cyk awhkaw thawlhaak awh a toel kaana am hlynnaak awh amah a dyngnaak ce dang sak aham vemiyihna sai hy; **26** tuh ve amah a dyngnaak ce dang sak hy, amah taw thlak dyng na awm nawn Jesu awh cangnaak ak takhqi ce awm dyng sak hy. **27** Cawhtaw oek qunaak ce hana nu a awm? Am awm voel hawh hy. I kawk caming nu oek qunaak ce a awm? Anaa awi hqutnaak ak caming ing nu? Am ni, cangnaak ak caming ni. **28** Thlang ing anaa awi hqutnaak ak caming am nawn cangnaak ak caming ni dyngnaak a huh tice nim tu khak hy. **29** Khawsa ve Judakhqi doeng a Khawsa nu? Gentelkhqi a Khawsa na awm am awm nawn nu? Oeih Gentelkhqi a Khawsa na awm awm hy, **30** Khawsa pynoet doeng a awm dawngawh, Anih ing chahhui ak qeet awm amak qeet awm cawhkaw cangnaak caming dyng sak qawi hahy. **31** Cawhtaw ve cangnaak ak caming anaa awi ce nik hqe nu? Am ni hqe hy! Anaa awi ce ni ni caksak hy.

4 Cemyih, pakdam Abraham akawng ce ikawmyihna nik kqawn lah voei? **2** Abraham ing bibinaak ak caming dyngnaak a na huh mantaw, ang oek qu aham awm hy; cehlai Khawsa haiawh taw am awm hy. **3** Cabu awi ing ikaw ak kqawn? "Abraham ing Khawsa cangnaak nawn, cawhkaw cangnaak ce dyngnaak na taak pehy," tiyh. **4** Thlang ing bibi nawn, a bibi phu a huh ce kutdo am ming na hy, a huh hly kawi ni a huh hy. **5** Bi am bi hlai hy, thlak che ak dyng sak Khawsa ak ypnaak thlang cetaw, ak cangnaak ak caming thlak dyng na awm hy. **6** Bibinaak a awm kaana Khawsa ing thlak dyng na a taak thlang a zoseennaak ce David ingawm a nak kqawn hy. **7** A khawboe seetnaak ak khanawh queenkaw ngai na ak awmkhqi, a thawlhaak hlip na ak awmkhqi taw a mi zoseen hy. **8** Bawipa ing a thawlhaak kawna amak sui peek thlangkhqi taw a mi zoseen hy, tinawh, **9** vawhkaw zoseennaak ve chahhui ak qeetkhqi doeng aham awm ak awm nu? "Abraham ak cangnaak ce am dyngnaak na taak pe hy," ni ti hawh hy. **10** Ikawmyihna a awm awh nu cemyihna a taak peek hy voei? Chahhui a qeet coengawh nu, a qeet hlanawh nu? A hu na am ni, lamma na hu hawh hy! **11** Chahhui a qeet hlanawh ni cangnaak ak caming thlak dyng na awmnaak hatnaak, chahhui qeet naak ce hu hawh hy. Cedawngawh, chahhui qeet kaana awm hlai u hy ak cangnaak thlangkhqi boeih ing dyngnaak ce a huhnaak thai aham anih ce cekkhqi a pa na awm hy. **12** Cekcoengawh chahhui qeet doeng kqawn kaana chahhui qeet hlanawh ni pa Abraham ing a taak cangnaak khawleh ak tut chahhui a mik qeet thlangkhqi a

pa na awm awm bai hy. **13** Khawmdek qona a awm thainaak aham awikam ce Abraham ingkaw a cakhqi ing anaa ak caming am hu uhy, cangnaak ak caming ak law dyngnaak ing ni a mi huhy. **14** Anaa awi ak caming ak hqingkhqi ing qo ce ami huh mantaw, cangnaak ce a phu am awm kawmsaw awikannaak awm a hqawng nani a awm hly hawh, **15** anaa awi ingtaw kawsonaak ni a haw law hy. Anaa awi a ma awmnaak awhtaw awi eeknaak awm am awm hy. **16** Cedawngawh, qeennaak ak caming Abraham a cadilkhqi boeih a venawh awi a na kam hy – anaa awi ing ak awmkhqi doeng kaana Abraham ak cangnaak ak takhqi boeih a venawh awm awi taaknaak taw cangnaak ing ni a law hy. Anih taw ningnih boeih a pa na awm hy. **17** "Thlangphyn boeih a pa na ni sai hawh nyng," tinawh a qee myihna. Anih ing ak cangnaak Khawsa mik huh awh anih taw ningnih a pa na awm hy, tlak thikhqi venawh hqingnaak ak pekung ingkaw amak awm ik-oeeihkhqi ak awm sakkung taw Khawsa ni. **18** Ngaih-u aham a ma awm awh awm Abraham ingtaw cangnaak ing ang ngaih-u dawngawh thlangphun boeih a pa na awm hy, "Na cadil ce zah law kaw," tinawh a venawh kqawn pehy. **19** Cangnaak awh tha seet kaana awm nawh, a pum ce ak thi hqoeng a myihna awm hawh hlai hy – cawh a kum zakhat tluk law hawh hy – Sarah awm cat kaa bai hy. **20** Cehlai Khawsa ak awikam awh upvoetnaak a khoeih ca awm am tahi, cangnaak awh tha awm sak nawh Khawsa venawh thangleeknaak ce pehy. **21** Khawsa ing ak awikannaak awh a hoih sai thai hy tice caangna khak hy. **22** Cedawngawh, "Anih ce tlak dyng na tahi." **23** Cehlai, "tlak dyng na tahi," tive anih aham doeng na am qee hy. **24** Bawipa Jesu thihnaak awhkawng ak thawhkung ce ak cangnaak ningnih boeih a hamna awm awm lawt hy. **25** Jesu taw ningnih a thawlhaak awh thihnaak yh nawh nim dyngnaak a hamna thoh sak tlaihna awm hawh hy.

5 Cedawngawh, cangnaak ak caming tlak dyng na ni awm hawh dawngawh, Jesu Khrish ak caming Khawsa inggawi qoeplaak ce ni ta hawh uhy. **2** cangnaak ak caming anih awh vawhkaw qeennaak dyih hun awh ve ning dyi uhy. Cedawngawh Khawsa a boeimang ngaih-unaaak awh zeelnaak ce ni ta uhy. **3** Cedoeng awm amni, kyinaak ni huhnaak awh awm ni zeel uhy, kyinaak ing yhnaak awm sak hy tice ni sim uhy; **4** yhnaak ing qaalleeknaak awm sak hy, qaalleeknaak ing ngaih-unaaak awm sak hy. **5** Ngaih-unaaak ing thaseetnaak amni pe voel hy, Khawsa ing ningnih a venawh a ni peek Ciim Myihla ak caming ningnih a kawlung ce lungnaak ing sypp law hy. **6** Ningmih tha amak awm na ni awm unawh a tym a khoei kqoeng awh, Khawsa amak sim thlangkhqi ham Khrish ce thi hy. **7** Thlak leek aham taw thlang ak thi aham awm hly mai hlai hy, tlak dyng aham thlang pynoet thi aham kyi soeih kaw. **8** Cehlai Khawsa ingtaw ve a ik-oeeih awh ve a lungnaak ce dang law sak hy; Ningmih tlak thawl na ni awm huiawh, Khrish ce ningnih aham thi hy. **9** A thi ing ningnih ce a ni dyng sak khqi hawh dawngawh, Anih ak caming Khawsa ak kawsonaak awhkawng iqyt nu a ni hul hly khqoet bai hy! **10** Ikawthi Khawsa a qaal na ni awm huiawh zani, a Capa a thihnaak ak caming tuqunaak a sai law tlaih awhtaw, ningnih tuqunaak ak awm cee ak khqoet taw, Anih a hqingnaak ak caming iqyt dy nu hulna ni awm hly khqoet hy! **11** Vedoeng am ni, ningnih a Bawipa Jesu Khrish ak caming Khawsa awh zeelnaak ni ta unawh, Anih ak caming Khawsa inggawi tuqunaak ce ningnih ing ni ta uhy. **12** Cedawngawh, thlang pynoet ak caming khawmdek awh thawlhaak lut nawh, thawlhaak ak caming thihnaak ce awm hy, thlang boeih a thawl tawngawh thihnaak ing thlang boeih sieng hy; **13** anaa awi peek na a awm hlanawh, thawlhaak ce ve khawmdek awh awm hawh hy. Cehlai anaa awi ama awm a dawngawh thawlhaak ce thawlhaak myihna am dang hy. **14**

Cehlai, Adam awhkawng Mosi dyna thihnaak ing bibi hy, Adam amyihna anaa awi a eek adawngawh amak thawl thlangkhqi a venawh awm, Adam taw ak law hly kawi huhsakaak na awm hy. **15** Cehlai kutdo ik-oeeih taw thawl sainaak amyihna am awm hy. Thlang pynoet a thawl sainaak ak caming zani thlang khawzah a thih awhtaw, Khawsa qeennaak ing thlang pynoet, Jesu Khrish am qeennaak awhkawng ak ngen hlai na ak lawng kutdo ce iqyt dy nu thlang khawzah ak khanawh a awm kaw! **16** Khawsa a zoe peek kutdo ik-oeeih taw thlang pynoet a thawlhaak ing am myih qu hy: thlang pynoet a thawlhaak awh awidengnaak awm nawh dawkaak ce awm hy, Cehlai zoe peek kutdo ik-oeeih ingtaw thawlhaak awhkawng dyngnaak ce haw law hy. **17** Thlang pynoet a thawl sainaak ak caming thihnaak ing bi a bi awhtaw, thlang pynoet Jesu Khrish ak caming Khawsa am qeennaak ak doem soeih dyngnaak themzoe pek ing iqyt dy nu bi a bi khqoet kaw. **18** Thlang pynoet a thawl sainaak awh thlang boeih ing thawlhaak a huh myihna, thlang pynoet ing dyngnaak a sainaak ak camawh hqingnaak na sawi lawt kaw. **19** Thlang pynoet awi a mang ngainaak ak caming thlang boeih tlak thawl na a awm amyihna, thlang pynoet ak awi ngainaak ak caming thlang boeih tlak dyng na awm lawt kaw. **20** Thawl ang dangnaak khqoet aham anaa awi ce awm law nawh, cehlai thawl a pungnaak awh, qeennaak awm pung khqoet hy. **21** Thawlhaak ing thihnaak dy bi a bi amyihna, ni Bawipa Jesu Khrish ak caming kumqui hqingnaak a awmnaak aham qeennaak ing dyngnaak dy bibi hy. (aiōnios g166)

6 Cawhtaw ikawmyihna ni ti lah voei? Qeennaak a pungnaak aham thawlhaak ni sai hlyk khqoet nawh nu? **2** Am ni! Ningnih thawl awh nik thi hawh thawl awh ikawmyihna ni hqing hly bak bak nu? **3** Jesu Khrish awh baptisma ak hu ningnih boeih taw a thihnaak awh baptisma ni hu hawh uhy, tice am nami sim nawh nu? **4** Cedawngawh baptisma huhnaak ak caming amah inggawi pup haih na ni awm uhy, ningnih awm hqingnaak ak thai ing ni hqingnaak thai aham, Pa boeimangnaak ing Khrish ce thihnaak awhkawng thawl sak tlaih hy. **5** Vemyihna a thihnaak awh amah ing ni tuqu awhtaw, a thawlthaihnaak awhawm amah inggawi tuqu na ni awm lawt kawm uh. **6** Thawl tamnaana amni awm voel unawh, thawl pumsa a qeeng thainaak aham, nik thlang khqym ce thinglam awh heen na awm hawh hy, tice ni sim uhy. **7** Ikatvithi uwarn ak thi ak thlang taw thawlhaak awhkawng loet hawh hy. **8** Khrish inggawi ni thihi hah hawh awhtaw, amah ing ni hqing tlaih lawt kaw, tice nik cangna uhy. **9** Khrish taw thihnaak awhkawng thawl na a awm hawh dawngawh, Anih ce am thi thai voel hy; thihnaak ing ak khanawh boei na am awm thai voel hy, tice ni sim uhy. **10** Thihnaak awh a thihnaak cetaw, thlang boeih aham hypboet na a thihnaak na awm hy; Cehlai hqingnaak awh a hqingnaak ce bai taw Khawsa benna ni a hqing hy. **11** Cemyih lawt na, thawlhaak awh ak thi hawhna ngai qu nawh Khawsa ben awhtaw Jesu Khrish awh ak hqingna ngai qu uh. **12** Pumsa ngaihnaak amak leek ce am nami hqut aham ak thi thai awm thawl amak leek sainaak aham koeh pe law uh, cehlai thihnaak awhkawng nami hqing tlaih hawh amyihna nami pum ce Khawsa venawh pe uh; dyngnaak sainaak aham nami pum ce pe law uh. **14** Anaa ak kaiawh am awm u tiksaw qeennaak ak kaiawh nami awm hawh dawngawh, thawlhaak ce nangmih a boeina am awm voel kaw. **15** Cawhtaw ikawmyihna a awmnaak yh voei? Anaa ak kaiawh amni awm voel hawh nawh qeennaak ak kaiawh ni awm hawh dawngawh thawlhaak nik sai hly uh nu? Am ni! **16** Tamnamyihna thlang ak awi ngai aham na pum ce thlang a venawh na peek awh, thihnaak na anik zawikung thawl a tamnaana na awm awhawm, dyngnaak na anik sawikung

awingainaak awh na awm awh awm awi nang ngai peek thlang a tamnaana awm hyk ti tice am na sim nawh nu? **17** Thawlh tamnaa na awm hlai uhyk ti, nangmih a venawh khoem sak na ak awm anaa awi ce kawlung tang tang ing nami pawm awh, Khawsa venawh zeelnaak ta nyng. **18** Nangmih taw thawlhaak awhkawng loet u tiksaw dyngnaak a tamnaa nani nami awm hawh hy. **19** Thaawmnaa am nami taak dawngawh thlhangqing awih kqawn nani kak kqawn law hy. Nangmih ing nami pum ak keek ce amak ciimcaih ing thawlh amak leek sainaak benawh nami peek khawi amyihna, tuh ciimcaihnaak benna ak sawikung dyngnaak benna nami pum ak keek ce pe law lah uh. **20** Thawlh a tamnaa na nami awm awh, dyngnaak pinzen ak khui awhkawng ngaihding uhyk ti. **21** Chahqai phiyhkwat na ak awm cee awhkaw ik-oeih nami saikhqi ce hawihkhangnaak ja thaith ikaw a awm? Cawhkaw ak thaith taw thihaak doeng ni! **22** Cehlai tuh awhtaw thawlh ak khuiawh kawng loet hawh u tiksaw Khawsa a tamnaa nani nami awm hawh, ce a hawihkhangnaak taw dyngnaak na awm nawh, ak thaith taw kumqui hqingnaak na awm hy. (**aiōnios g166**) **23** Ikawthi thawlh phu taw thihaak na awm hy, cehlai Khawsa a themzo pek taw ningnih a Bawipa. Jesu Khrish awh kumqui hqingnaak ni. (**aiōnios g166**)

7 Koeinaakhqi, anaa awi ak simkhqi venawh ni awi ve kak kqawn hy, anaa awi ing thlang ce a hqing khui doeng ni a uk hy, tice am nami sim nawh nu? **2** Kqawnnaak mai awh, anaa awi ing vaa ak ta nu pynoet ce a vaa a hqing khui piin na awm hy, cehlai a vaa ce a thih awhtaw, chungvaanaak anaa awi awhkawng anih ce loet hawh hy. **3** A vaa a hqing hyn awh thlak chang a vaanaak mantaw, Anih ce samphaih na awm hy. Cehlai a vaa ce a thih awhtaw, cawhkaw anaa awi awhkawng a loet hawh dawngawh, thlak chang vaa na mai seiawm anih ce sampaih am ming na voel hy. **4** Cedawngawh, koeinaakhqi, Khrish a pum ak caming nangmih awm anaa awi benawh thi hawh uhyk ti, Khawsa ham ak thaith ni qah thainaak aham thihaak awhkawng ak tho tlaia a koe na ni awm uhy. **5** Thawlhnaak ing ningnih ce a ni pinzen khqi awh, thihaak ak thaith ce ni qahnaak aham ningnih a pum awh pumsa ngaih thawlhaakkhiq ing anaa ak caming bi bi hy. **6** Cehlai tuhawhtaw, ningnih a nik pinzen lak awhkawng ni thi hawh nawh, anaa awi awhkawng ni loet hawh hy; cak khgym awi amyihna am ni, Myihlak thai awh bi ni bi thainaak ahamna ni. **7** Cawhtaw ikawmyihna nu ni ti lah voei? Anaa awi ve thawlhaak nu? Am ni! Cehlai anaa awi awhkawng simsakna ama awm man thawlh am sim voei nyng; Anaa awi ing, "Koeh nai," ama ti man nai ve am sim hly hlai hyning. **8** Cehlai thawlhaak ing, awi peek awh a tym leek lo nawh nainaak soepkep khawzah ce kak khanawh awm sak hy. Anaa awi ama awm awhtaw, thawlhaak taw thi hy. **9** Anaa awi kaana khaw ana sa hlai nyng; awipeek a awm lawhtaw, thawlhaak ce hqing law nawh, kai taw thi nyng. **10** Hqingnaak aham awipeek ce thihaak hawna awm hy, tice sim nyng. **11** Ikawthi thawlhnaak ing awipeek awh tha lo nawh kai ce ni thai na nawh, anaa awi ing ni him hy. **12** Cedawngawh, anaa awi taw ciimcaih hy, dyng nawh leek hy. **13** Cawhtaw them leek ce kai ham thihaak na awm nawh nu? Amni! Thawlh ce thawlh na ang dang thainaak ham, awipeek ak caming thawlh ce thlawlh ing a be thainaak aham, them leek ing kai awh thihaak ce awm sak hy. **14** Anaa awi taw Myihla ben them ni ti, ni sim uhy; cehlai kai taw pumsak thlangna awm nyng, thawlh tamnaa na zavinhna kak awm ni. **15** Ikawmyihna them nu ka sai ti, am sim nyng; ka sai them boeih ve, ka ngaih kawi am ni, ka sawhnaak soeih ni ka sai hy, **16** Sai aham am ka ngaih them ce ka sai awhtaw, anaa awi taw leek hy tinawh kang dyih pyi na awm hy. **17** Cehlai tuh awhkaw them ak sai ve kai am ni, kai ak khuiawh ak awm thawlh ing ni a sai hy. **18** Ka pumsa thawlh awh ve themleek am awm hy tice sim nyng.

Themleek sai aham ngaih hlai nyng, am sai thai nyng. **19** Ikawthi themleek sai ka ngaih ve a sai kaana; thawlhaak sai am ka ngaih ce sa khaak nyng. **20** Cedawngawh sai ham am ka ngaih ce ka sai awhtaw, kai ing am sai nyng saw kai ak khuiawh ak awm thawlhaak ing ni a sai hy. **21** Themleek sai ham ka ngaih awh, themche ce ka venawh awm hy, tice anaa awi ak caming sim nyng. **22** Kak kawlung taw Khawsa a anaa awi awh zeel hlai hy; **23** ka pumsa awh anaa awi ak chang ing bibi hy, ce ing ka pum awh bi ak bi thawlhaak anaa thawngim khuiawh ce nik thla hy. **24** Thlang khuiha soeihna awm nyng! Ve thihaak pumsa ak khuiawh kawng u ing a ni hul lah voei? **25** Jesu Khrish ningnih a Bawipa ak caming, Khawsa venawh zeelnaak awm seh! Cedawngawh, kamah awm kak kawlung khuiawh taw Khawsa anaa awi a tamnaa na awm hlai nyng, pumsa benawh taw thawlh tamnaa na awm nyng.

8 Cedawngawh, Jesu Khrish awh ak awmkhqi boeih ham tuh dawknaak qoe qoe am awm voel hawh hy, **2** hqingnaak Myihla anaa awi ing thawlh ingkaw thihaak anaa awi awhkawng, Jesu Khrish ak caming kai ce ni loet sak hawh hy. **3** Pumsa thawlhnaak awh anaa awi ce ak tha am awm nawh ama sai thai awh, Khawsa ing thlak thawlh amyihna amah a Capa ce thawlhyh phympnaak aham tyi law hy. Thlak thawlh awh thawlhaak ce dawk sak hy, **4** Pumsa ngaih thawlhaak amyihna khaw amak sa nawh Myihla ngaihnaak amyihna khaw ak sa ningnih awh ce dyngnaak ing a ngoe anaa awi ce a soepnaak thai aham thawlh anaa ce dawk sak hy. **5** Pumsa ngaih thawlhaak amyihna khaw ak sakhqi ing pumsa ngaihnaak awh a mik kawlung ce ta uhy; cehlai Myihla ngaihnaak amyihna khaw ak sakhqi ingtaw Myihla ngaihnaak awh a mik kawlung ce ta lavt uhy. **6** Thlakthawlh ak kawlung taw thihaak na awm nawh, Myihla ing a sawi kawlung taw hqingnaak ingkaw ngaihdinggaak na awm hy; **7** thawlhaak kawlung taw Khawsa ingqawi thunkha qu hy nih. Khawsa anaa awi awh am pe qu nawh, ang peek na awm am pe qu thai qoe hy. **8** Pumsa ngaih thawlhaak ing ak awmkhqi ing Khawsa ce am zeel sak thai uhy. **9** Cehlai, nangmih taw, pumsa ngaihnaak awh am awm uhy ti, nangmih ak khuiawh Khawsa ang Myihla a awm awhtaw, nangmih taw Myihla awh ni nami awm hy. U awm Khrish ang Myihla ama taak awhtaw, anih taw Khrish a koe na am awm hy. **10** Cehlai nangmih ak khuiawh Khrish a awm awhtaw, thawlhaak awh nangmih a pum ce thi mai seiawm dyngnaak awh nangmih ang Myihla taw hqing hy. **11** Thihaak awhkawng Jesu ak thawhkung ang Myihla ce nangmih ak khuiawh a awm awhtaw, thihaak awhkawng Khrish ak thawhkung nangmih ak khuiawh ak awm awh hqingnaak ce ni pek khqi lawt kaw. **12** Cedawngawh, koeinaakhqi ni sai hly kawi ni ta uhy. Cehlai pumsa thawlhaak benawh hqing khawsaknaak awh amni. **13** Pumsa ngaih thawlhaak benawh khaw nami sak mantaw, thi kawm uk ti; cehlai Myihla ak caming pumsa sai thawlhaakkhiq ce nami him awhtaw hqing kawm uk ti, **14** kawthi Khawsa ang Myihla ing a sawi thlangkhiq boeih taw Khawsa cakhqi na awm uhy. **15** Kqjh awm tamnaa na awm tlaihaak Myihla ce am hu u tiksaw, ca na coengnaak Myihla ni nami huh hy. Ce ak caming, "Abba, ka Pa," tinawh nik khy thai uhy. **16** Myihla amah qoe ing ningnih ang Myihla ing ningnih taw Khawsa cakhqi na ni awm uhy tice dyih pyi hy. **17** A cakhqi na ni awm awhtaw, ningnih taw qo ak pangkung na ni awm uhy – a boeimangnaak ing pang pyi thainaak aham ang yhnaak ce ning yh pyi tang tang awhtaw, Khrish ingkaw Khawsa qo ak pang haih na ni awm uhy. **18** Tuh tloek awhkaw khuiha ni huhnaakkhiq ve ningnih awh ak awm law hly kawi boeimangnaak ingqawi ka nyhtah awh kawna awm am awm hy tinawh poek nyng. **19** A ik-oeih saikhqi ing Khawsa cakhqi ang dangnaak tym ce ngaih-u soeih doena lamtoen uhy. **20** Them saikhqi boeih ing phu amak ta na

ak awm sak ak awi awina awm uhy; a mimah ing a mi ngaih dawngawh am nawh, cekkhqi ak awm sakkung a awm sakkhqai amyihna ak awm khqi ni, ngaih-uunaak doe ing, 21 them saikhqi boeihboeih awm seetnaak tamnaa awhkawng loet sakna awm kawm saw, Khawsa cakhqi a boemang ngaihdingnaak ak khuiawh lut lawt kaw. 22 Them sai boeih boeih ing tuhdy naa ak awm tawm tlawhnaak amyihna khy am kqang uhy tice ni sim uhy. 23 A mingmih doeng amni, ningnih Miyihla thaihcyk na ak awmkhqi awm cana ni awmnaak loetnaak ingkaw pum thaawngnaak khawngni ce lamtoen doena am cei na taw ning ko ning kqang uhy. 24 Ikawtihih vawhkaw ngaih-unaak awh ni thaawng na ni awm uh. Cehlai mik huh nawn ngaih-unaak taw ngaih-unaak tang tang amni. U ing nu a taak ce ce ang ngaih-u khawi? 25 Ni taak hlan ik-oehi ce ning ngaih-u awhtaw, khawdungaak ing qeh uhy. 26 Cemyih lawtna, nik tha amma awmnaak awh Miyihla ing ningnih ce ni bawmkhqi hy. Cykcah hly kawi ce ningnih ingtaw amni sim uhy, cehlai Miyihla ing awi ing kqawn noeng kaana ko doena ningnih aham thoeh law hy. 27 Ningmih kawlung ak suikung ing Miyihla kawlung ce sim hy, kawtih Khawsa kawngaihnaak amyihna tlak ciimkhqi aham Miyihla ing thoeh pehy. 28 Amah ak lungnaakkhqi ingkaw, amah ing ang cainaak amyihna ak khykhqi aham, ik-oehi boeih boeih Khawsa ing ak leek na sai pehy, tice ni sim uhy. 29 Ikawtihih anih ce koeinaa khawzah anglakawh cakcyk na a awm thainaak aham Khawsa ing a sim ceekhqi ce amah a Capa a myi ing a ning myih aham hoep cee hawh hy. 30 Amah ing a hoop ceekhqi ce khy nawh; ak khykhqi ce dyng sak hy; am dyng sakkhqi ce zoeksang khqi hy. 31 Cawhtaw ve ak camawh ikawmyihna nu ni ti lah voei? Ningmih benna Khawsa ce a awm awhtaw, uing nu a ni tuk thai kaw? 32 Amah a Capa awm am hlyn kaana, ningnih aham ak pe boeih ing, them boeih boeih ce a peek kaana awm hly nawh nu? 33 Khawsa ing ak tyh thlangkhqi ce u ing nu thawlh ak puk thai kaw? Khawsa ing dyng sak hawh hy. 34 U ing a bo sak ce? Jesu Khrir, thihnaak awhkawng ak tho tlaih ing Khawsa ak tang benawh ngawi nawh ningnih aham thoeh law poepa hy. 35 Khrir a lungnaak awhkawng uing nu a ni khqeng thai kaw? Kyinaak, khuikhanaak, thekhanaak, khawseet khawkhaanaak, ak pum a zalna awmnaak, kqjhawmnakaak ingkaw zawzi ing nu? 36 Nangmih ak camawh khanwng qui himna awm nyng; him aham ak awm tuu amyihna ni ta uhy," tinawh a qee hyt amyihna. 37 Amni, ve a ik-oehi boeih awh ningnih anik lungnaak khqikung ak caming ningnih taw noengkung na ni awm uhy. 38 Ikawtihih kai taw thihnaak, hqingnaak, khan ceityikhqi ingkaw qaaikhqi, tuh awm ni hai benawh awm, ikawmyih thaawmnaak ingawm, 39 sangnaak ingkaw nemnaak ing, ik-oehi sai boeih ak khuiawh ikawmyih ca ingawm ningnih a Bawipa Jesu Khrir awh ak awm Khawsa lungnaak awhkawng amnik khqeng thai hy, tice sim nyng.

9 Khrir awh awitak tang ni kak kqawn, ka qaaip ap kqawn nyng, Ciim Miyihla awh ka simnaak ingawm dyih pyi hy – 2 kawseetaak ak bau soeih ing kawlung tlawhnaak tak khqoet khqoet nyng. 3 Ka koeinaa, ka pilnamkhqi aham ka mah ve awihkha zawk nawh Khrir inggawi kqeng qu ham dyna poek nyng. 4 A mingmih taw Israel thlangkhqi ni, cakhqi na coengnaak, boemangnaak, awikammaak, sainaak, anaa awi huhaak, bawkim bawknaak ingkaw awikammaak ak hu thlangkhqi na awm uhy. 5 Pakdamlkhqi awm a mingmih a koe ni, cekkhqi ak khuiawh kawng ni pumsa benawh taw Khrir ce a law hy, anih taw ik-oehi boeih ak khanawh Khawsa na awm nawh, kumqui kyihcah aham awm hy! Amen. (aiōn g165) 6 Khawsak awi ce hqawng hawh hy ni ti man tinaak. Israel awhkawng ak lawkhqi boeih ce Israel na am awm boeih uhy. 7 Anih a cadilkhqi ce Abraham a cakhqi na am awm boeih bai hy. "Isaak awhkawng ni cadil qui ce noet na a awm hly," tinawh ni a awm hy. 8 Pumsa benawh kaw cakhqi ve

Khawsa cakhqi na am awm hy, awikammaak awh ak paakhqi ceni Abraham cakhqi na a mik awm. 9 Awikammaak cetaw; a tym a khoek awh law tlaih kawng nyng saw, Sarah ing cak pa ta kaw," tinawh awm hy. 10 Ce doeng amni, Rebekah a cakhqi ingawm pa pynoet doeng ni a mi taak hy, ningnih a pa Isaak ce. 11 Cehlai, cakphei ta hlan nawh, ak che ak leek a sim hlanawh – Khawsa ang cainaak tyknaak ce ang dyih thainaak aham: 12 bibinaak ak caming am nawh anih ak khykung ing – "A hqam ing ang no a bi be kaw," tina hy. 13 Jakob lungna nyng saw Esau sawh na nyng," tinawh qee hyt na awm hawh hy. 14 Cawhtaw ikawmyihna nu ni ti lah voei? Khawsa ve am thym hy nik ti hly nu? Amni ti qoe qoe kaw! 15 Mosi a venawh, "Qeennaak ka taak thlang ak khanawh qeennaak ta kawng nyng saw, lungnaak ka taak ak thlang ak khanawh lungnaak ta kawng nyng," tinawh kqawn pe hawh hy. 16 Cedawngawh, ak ngaihkung ak camawh am nawh, ak thawngkung ak camawh am bai ni, ak queenk Khawsa ak camawh ni. 17 Cakciim ing Pharaoh a venawh: Kang ming ce khawmdek pum awh khyipyi na a awm nawh, nang ak khanawh ka boemangnaak kang dang sak aham kang cainaak ik-oehi awh ve nang taw ka ni tlung sak qoe ni," tina hy. 18 Cedawngawh Khawsa amah ing a ngaih thlang ak khanawh qeennaak ta nawh, a ngaih ak thlang ce am thin hqam sak hy. 19 Nangmih ak khuiawh kawng uingawm: "Cawhtaw kawtih Khawsa ing thlang thawlak ak puk bai? Anih ak kawngaih ak oehl thai u nu ak awm?" ti kawm uk ti. 20 Cehlai, Aw thlanghqing, Khawsak awi ak oehl thai nang ce a u nu? "A sai ik-oehi ing ak saikung a venawh, 'Ikawtih vemyihna nani sai?' tina kawm nu?" 21 Am ak sepkung ing tamrai boengoet awhkawng a vang ce ak nep soeih na, a vang bai taw hawnaak mailai na saithainaak am ta nawh nu? 22 Khawsa ing kawsonaak ce tyk nawh a saithainaak ce dang sak ham a ngaih mantaw, cehlai plawci aham ak awm am ak khanawh yhnaak ak dung soeih ing ang yh awhtaw, ikawmyihna? 23 Boemang aham a qoek a bah cekhqi, qeennaak a taak thlangkhqi venawh boemangnaak ap kqawn noeng ce a sai peek awhtaw – 24 Judakhqi ven doeng awhkawng am nawh Gentelkhqi ven awhkawng awm ak khy ningnih vetaw ikawmyihna ni awmnaak kaw? 25 Hosea awh vemyihna kqan hawh hy: "Kak thlang na amak awmkhqi ce 'kak thlangkhqi'" tinawh khy kawng nyng saw; am ka lungnaak nu ce 'ka lungnaak,' tina kawng nyng" 26 nangmih kai ak thlangkhqi amni,' tinawh ak khynaak hun qoe qoe awh, a mingmih ce 'Ak hqing Khrir cakhqi,' tinawh khy kawm uh," tinawh kqawn hy. 27 Isaiyah ingawm Israelkhqi awh vemyihna anak kqawn bai hy: "Israel thlangkhqi ve tuicunli a keng awhkaw dizui zah law u seiawm, ak syng tloek doeng ni a hul hly. 28 Ikawtihih Bawipa ing khawmdek khanawh awideng kawmsaw ang tawnna a dytnaak ce pha sak kaw," tiyh. 29 Isaiyah ing lamma na vemyihna kqawn bai hy: "Bawipa ing cadilkhqi ve a ma hlyn mantaw, ningnih ve Sodom khaw amyihna ni awm kawm usaw, Gomora khaw amyihna ni ni awm hly hawh uhy," tinawh kqawn hy. 30 Cawhtaw ikawmyihna ni ti lah voei? Dyngnaak amak hqut Gentelkhqi ing cangnaak ak caming dyngnaak ce hu uhy, 31 cehlai dyngnaak ham anaa ak hqut Israelkhqi ingtaw am hu uhy. 32 Ikawtih a mami huh? Cangnaak ing a hqut kaana bibinaak ing ami hqut a dawngawh "Bahaak lung," awh bah uhy. 33 Toek lah, bahaak aham ingkaw tluknaak aham Zion awh lung ta nyng, u awm ce ak ypnook thlang taw ityk awh awm chah am phyi kaw," tinawh qee hyt awm hawh hy.

10 Koeinaakhqi, kak kawlung ngaihnaak ing Israel thlangkhqi ham kak cykcahnaak taw a mingmih hul na ami hqut a dawngawh "Bahaak lung," awh bah uhy. 33 Toek lah, bahaak aham ingkaw tluknaak aham Zion awh lung ta nyng, u awm ce ak ypnook thlang taw ityk awh awm chah am phyi kaw," tinawh qee hyt awm hawh hy. 3

Khawsa ven awhkawng ak law dyngnaak ce a sim kaana a mimah a dyngnaak doeng ce sai aham cai uhy, Khawsa dyngnaak awh am pe qu uhy. 4 Khril taw anaa awi a dytnaak na awm nawh a cangnaak thlang boeih aham dyngnaak ce awm hy. 5 Anaa awi a kamming dyngnaak ce Mosi ing: Ve a ik-oehkhqi ak sai thlang taw vekkhqi ak kamming hqing kaw," tinawh a na qee hy. 6 Cehlai cangnaak ak kamming dyngnaak ingtaw vemyihna kqawn hy: "Nak kawk khuiawh, 'U nu khawk khan na a kaai hly?' Cetaw Khril ak kqum law tinaak ni. 7 Am awhtaw, 'U nu ceeikuina ak kqum hly? Cetaw thiinhaak awhkawng Khril a thaws law hly tinaak ni' koeh ti uh,' tihy. (Abysos g12) 8 Cawhtaw ikawmyihna a ti? "Awi taw na venawh awm hy; nam kha ingkaw nak kawlung khuiawh awm hy," ti nawh kqawn hy; cetaw cangnaak awi ningnih ing nik khypyi ve ni: 9 "Jesu taw Boei ni, tinawh nam kha ing diyh pyi nawh, thiinhaak awhkawng anih ce Khawsa ing thaws thalh hy, tinawh nak kawlung ing nak cangnaak awhtaw hul na awm kawp ti," ti ve. 10 Ikawthi kawlung ing nak cangnaak dawngawh a ni dyng sak na awm nawh, nam kha ing na pho a dawngawh a ni hul na awm hy. 11 U awm anih ce ak ypnaak thlang taw ityk awh awm chahqai na am awm kaw," tinawh Cakciim ing kqawn hy. 12 Juda ingkaw Gentel haanaak am awm voel hy – cawhkaw Bawipa ce thlang boeih a Bawipa na awm nawh amah ak khykhqi boeih a venawh zoseennaak khawzah pehy – 13 Kawtith, U awm Bawipa ang ming ak khykhqi boeih taw hulnaak hu kaw" 14 Cawhtaw, amak cangnaak ing ikawmyihna ak khynaak thai kaw? Iyawmyihna a mang zaak awhtaw anih ce ak cangnaak kaw? A mingmih a venawh u ing amak kqawn peek awhtaw ikawmyihna ang zaak naak kaw? 15 Thlang amni tyih awhtaw ikawmyihna khypyi na a awm thai kaw? "Awithang leek ak haw lawkung khqi a khaw taw leek soeih soeih mah hy!" tinawh qee hyt na awm hawh hy. 16 Cehlai Israelkhqi boeih ing awithang leek ce am do uhy. Isaiah ing, "Bawipa, kaimih ak awih kqawn ve u ing nu ak cangnaak?" a na ti amyihna. 17 Cangnaak taw awi zaaknaak awhkawng ni a law, awi taw Khril ak avi zaaknaak awhkawng awm hy. 18 Cehlai doet lah vang: Am za unawh nu? Za uhy: A mingmih ak awi ce khawmdek penglum pha nawh, ak awikhqi ce khawmdek a dytnaak de pha hy." 19 Doet tlaih lah vang nyng: Israelkhqi ing am zasim unawh nu? Lamma cyk awh Mosi ing, "Qam na amak dyi thlangkhqi ce ni yt sak kawng nyng saw; zaksimnaak amak ta qam inggawi nak kaw ni so sak kawng," a na tihy. 20 Isaiah ing qaal leeknaak ing, Kai a manik sui thlangkhqi ing ni hu unawh; kai a manik sui thlangkhqi venawh dang pe nyng," tinawh anak kqawn hy. 21 Cehlai Israelkhqi awh ce, awi amgai thlangkhqi ingkaw kai anik oelkhqi aham khawngi zuung ka baan phyl nyng," tinawh kqawn bai hy.

11 Cawhtaw kai ing doet nyng: Khawsa ing ak thlangkhqi ce ak hoet nu? Am hoet qoe qoe hy! Kai kamah awm Israel thlang, Abraham a cadil, Benjamin na awm nyng. 2 Khawsa ing a sim cee hawh ak thlangkhqi ce am qoeng hy. Elijah ing Israelkhqi ama ngaih a dawngawh Khawsa venawh a cyckahnaak awi Cakciim awh ak awm ce am nami sim nawh nu? 3 Bawipa na tawngkhqi awm him unawh nang a bawtkhankhqi awm hqe hawh uhy; kai doeng ni ka awm hy, cehlai tuh kai awm him aham ni sui uhy," a ti ce. 4 Khawsa ing ikawmyihna awi am hlat peek ce? "Baal a haiawh khuk amak sym kamah aham thlang thong khqiqi hoep hun nyng," tina hy. 5 Camih lawtna, tuhawm am qeenakaak ing thlang ak tyh ce awm hun hy. 6 Qeenakaak ing ak tyk mantaw, bibinaak ak kamming am voel hawh ni; bibinaak ak kamming mantaw, qeenakaak ce qeenakaak na am awm voel kaw. 7 Cawhtaw ikawmyihna a awmnaak? Israelkhqi ing ngaihitaak doena sui hlai uhy am hu uhy, ak tyhkhqi ingtaw hu uhy. Ak changkhqi taw kawlung hqam sak hy. 8 Mik ta hlai uhy a mami huh thainaak

ham, haa ta hlai uhy a maming zaak thainaak aham, tuhngawi dy awh, Khawsa ing a mingmih ce ngai qepnaak kawlung pek khqi hy," tinawh qee hyt awm hawh hy. 9 David ingawm: A mingmih a caboeih ce dawng ingkaw thang na awm seitaw, a mingmih ang bahnaak ingkaw a mi khawboe phu zawknaa na awm seh. 10 Khaw a mami huh thainaak aham a mi mikkhqi hyp seitaw, a mim tingkhqi ce khun seh," ana tihy. 11 Doet tlaih lah vang nyng: ama mi thawh thainaak voel dyna tlu unawh nu? Amni! A mingmih a sai thawlhaak awhkawng, Israelkhqi ing ami ytnaak aham, hulnaak ce Gentelkhqi venawh law hly. 12 Cehlai a mingmih a sai thawlhaak ce khawmdek boeinaak na awm nawh, a mingmih ing ami hlawng ce Gentelkhqi boeinaak na a awm awhtaw, a mingmih a soepnaak ing iqyt dy nu boeinaak ce a awm sak khqoet kaw! 13 Nangmih Gentelkhqi venawh ni ka nik kqawn peek khqi. Gentelkhqi ham ceityih na ka awm khui taw, bi ve khawzah bi nyng. 14 ikawmyihna awm kak thlangkhqi ing tytnaak ta unawh thlang vang awm hul na a mi awm thainaak aham bi bi nyng. 15 Ikawthi a mingmih ing a mi qoeng a dawngawh khawmdek ing tuqunaak na ang coeng awhtaw, a mingmih ing a mi do ak khqoet man thiinhaak awhkawng hqingnaak na am awm kawm nu? 16 Phaihipi ak cyk ce pe nawh a ciimcaih sak hawh awhtaw, phaihipi a cuu boeih na ciimcaih hy; thingkung ce a ciim awhtaw, a baaikhqi awm ciimcaih hy. 17 A baai a vang ce a ek awhtaw, nangmih, olive chap, olive thing a baai awh cawng na awm tiksaw aik kqa awhkawng ak pli ce hang taai na hyt ti, 18 Cedawngawh a baai chang ak khanawh koeh oek qu. Nang oek qu awhtaw, ve ve poek: nang ing ak kqa ce tha am pe hyt ti, ak kqa ing ni nang ce tha a ni peek. 19 Cedawngawh, Kai ve cawng na ka awmnaak thai aham a baaikhqi ek hy," na ti aham awm hy. 20 Thym hy, a mingmih ing a ma mik cangnaak awh ni a mi ek hy, nangmih awm cangnaak awh ni naming diyh hy. Cedawngawh koeh hoel qu nawh taw, kqih lah. 21 Khawsa ing a baai tang tang zani a mam hlyn awhtaw, nangmih awm am nimi hlyn khqi kaw. 22 Cedawngawh Khawsa am qeenakaak ingkaw a tlungthangnaa ce poek lauh u. Ak tlukhqi hamna taw ak khawngkhqi camawh ni; nang ahamma taw leek hy, a leeknaak awh na awm poe awhtaw; cekkaataaw nang awm tluk sakna awm lawt kawp ti. 23 Cangnaak kaana a mami awm poe awhtaw, a mingmih ce cawng khqi tlaih kaw. 24 Nangmih olive thiik chap awhkawng chawm na awm u tiksaw olive thing tang awh cawng na nami awm awhtaw, vawhkaw olive thing tangkhqi ak khqoet lawt olive thing awh cawng hly thai khqoet saw! 25 Koeinaakhqi, nangmih ing am naming oekqunaak aham vawhkaw awihyp ve sim kaana nami awm aham am ngaih nyng: Gentelkhqi ami soepnaak nyn a pha hlai dy taw, Israelkhqi amik kawlung hqam kaw. 26 Cehlai Israelkhqi boeih hul na awm kaw; "Hulkung ce Zion awhkawng law kawmsaw; Jakob a venawh kawng Khawsa ama simmaak ce khawng kaw. 27 Ve a mingmih mi awikammaak ka sai ni, a mingmih a thawlhaak ce lawh pe kawng," tinawh qee hyt hawh amyihna. 28 Awithang leek awi awhtaw, a mingmih ce nangmih a qaal na awm hlai uhy, tyknaak benawh taw, pakdamkhqi ak kamming lungnaak hu uhy. 29 Ikawthi Khawsa a zoopeek kutdo ingkaw khynaak vetaw hqe thai na am awm hy. 30 Nangmih awm maa nataw Khawsak awi am ngaii hlai uhy ti a mingmih ing awi a mami ngainaak ak kamming tuh awhtaw qeenakaak ce hu hawh uhyt ti, 31 cemiyih lawtna a mingmih awm Khawsa ing nangmih a venawh qeenakaak a taak lawt amyihna qeenakaak ami huh thainaak aham tuh awi am ngaii uhy. 32 Thlang boeih ak khanawh qeenakaak a taak thainaak aham, Khawsa ing thlang boeih ce awi amak ngaii na tahi. 33 Aw Khawsa a cyihanaak ingkaw thoemnaak boeinaak" ak dung soeih soeih ve! Ak awi dengaaka sim thai noeng am ingkaw, hqut thainaak a ceng benna ak awm lam aih ve! 34 U ing nu Bawipa ak kawlung ce a sim

hawh? U ing nu anih ce khaw ak poek pyi? **35** Khawsa ing a sam tlaighthaa aham, u ing nu ik-oeih a peek hawh? **36** Ikawthi amah a ven awhkawng amah ak caming amah a venawh ik-oeih boeih ve awm hy. Amah a venawh thangleeknaak a poepa na awm seh! Amen. (aiōn g165)

12 Cedawngawh, koeinaa khqi, Khawsa qeennaak awh, ak hqing bulnaak, ak ciimcaih ingkaw Khawsa a ym kawi na nami pum ce pek aham ni thoeh khqi nyng; ve ve nami bawknaak awh ak awm hly qoe ni. **2** Ve khawmdeik phung amyihna koeh awm unawh; Khawsa a ngaih kawi, ak leek, ym kawi ingkaw leeknaak ak soep ce ak ceetna zaaksimnaak nami taaknaak ham, namik kawlung ak thaina awmnaak ing chawt qu lah uh. (aiōn g165) **3** Kai a venawh a ni peek am qeennaak ak caming nangmh boeih a venawh kanik kqawn peek khqi: Na mimah ingkaw na mimah ce ak sang soeih na koeh ngai qu uh, Khawsa ing a ni peek cangnaak ing a ting a tawk na na mimah ingkaw na mimah ce ngai qu uh. **4** Ningmh ing ni pum awh a baai khawzah ni ta uhy, cehlai a mi bibnaak ce am myih boeih hy, **5** cemyih lawtna ningnih awm Khrhi a baai khawzah na ak awm pum pynoet na ni awm uhy, a baaikhqi boeih ce pynoet ingkaw pynoet a koena awm qu qip boeih hy. **6** Qeennaak a peeknaak amyihna kutoh ak chang chang ni ta unawh, awikqawnkungna ak awm ing cangnaak a taak khoek amyihna kqawn seh; **7** bibuking thahly doena bi bi seh, cawngpyikung ing ypawmna cawngpyi seh, **8** ak sawikung ing ypawmna sawi seh; them ak pekung ing a hai kaana pe seh, awitlykkung ing ak leekna awitlyk seh, thlang ak qeenkung ing zeel doena qeen seh nyng. **9** Lungnaak taw kawlung tang tang ing a awm aham awm hy. Seetnaak ce sawhna unawh, leeknaak ce ak cakna tu uh. **10** Pynoet ingkaw pynoet cingnahqui lungnaak ing lung qu na uh. **11** Thaseetnaak qoe qoe koeh ta law uh, tha lo law unawh, Bawipa bi ce bi law uh. **12** Ngaih-unaaak awh ce zeel uh, kyinaak nami huh awh kawdungawh ing yh law unawh, cyckahnaak awh cak lah uh. **13** Thlakciimkhqi a voetnaak dawm unawh, khinkhqi ce ak nep na toek law uh. **14** Nangmh anik thekhanaak thlangkhqi ce zoseennaak pe law uh; zoseennaak pe unawh awih che ing koeh zyi uh. **15** Ak zeelkhqi ce zeel pyi unawh; kaw ak sekhhqi ce kawseet pyi uh. **16** Pynoet ingkaw pynoet qoep ang qui cana awm uh. Koeh oek qu uh, thlang ak kaina ak awmkhqi mi pyi qu uh. Namah ingkaw namah koeh zoeksang qu. **17** Thawlhaaka ce thawlhaaka ing koeh thung uh. Thlang boeih amik huh awh ak thym ce ngaihtaaknaak ing sai law uh. **18** Ang coeng thai awtaw nangmh ben awhkawng ang coengaak thai khuina thlang mi qoep ang qui cana awm law uh. **19** Ka pyikhqi, nami phu koeh sui law uh; Khawsa ak kawsonnaak ce ken law uh, "Kut thungnaak taw kai a koe ni, kai ing thung kawng nyng," tinawh Bawipa ing thi. **20** Ce anglakawh: Na qaal ce ak phoen a cawih awhtaw, buh pe; Tui a ngaih awhtaw, awk kawi ce pe. Vemyihna na sai awhtaw a lu awh maieh na tloeng peek ing myih kaw." **21** Seetnaak ing koeh ni noeng seitaw, leeknaak ing seetnaak ce noeng lah.

13 Thlang boeih ukkung ak kaiawh awm seh. Khawsa ing a mak tyh ukkung am awm hy. Ukkungna ak awmkhqi boeih ve Khawsa ing ak tyh khqi ni. **2** Cedawngawh, u awm ukkungkhqi ak oelh thlang taw Khawsa ing a taak ce ak oelh thlang nani a awm, cemyihna amik sai thlangkhqi ingtaw amah ingkaw amah ak khanawh awidengnaak ce hu kaw. **3** Ik-oeih ak thym ak saikhqi aham ukkung khqi ham am awm hy, cehlai ik-oeih amak thym ak saikhqi ham ni kqjh a awm. Uknakaak ak takhqi ce amak khqi ham nak ngaih nu? Them leek mah sai lah, cawftaw nim kyh bit kaw. **4** Ikawthi nang ing them leek na sainaak aham anih ce Khawsa a tyihzawih na awm hy. Cehlai ik-oeih amak leek na sai awhtaw kqjh

lah, anih ing zawi ce a zoena am tahi. Ik-oeih ak sai thawlkhkqi ak khanawh kawsonnaak ak takung, Khawsa a tyihzawih na awm hy. **5** Cedawngawh toelnaak nak khqi doeng kaana namah a simnaak qoe qoe ingawm ukkung ak kaina na awm aham awm hy. **6** Cawhni mangmu awm nami peek hy, ukkung taw Khawsa a tyihzawih na a awm dawngawh, a mingmh ing ve a ik-oeih awh ve bibi uhy. **7** Na peek tyng ce pe boeih: Mangmu peek aham a awm awhtaw pe mai; them phu peek ham a awm awhtaw pe; khqi chahnaak peek ham a awm awhtaw zoeksangnaak ce pe. **8** Pynoet ingkaw pynoet lungnaak am kaa taw, ik-oeih laiba koeh ta law uh, u awm thlakchang ak lungnaak ingtaw anaa awi ce soep sak hawh hy. **9** Koeh samphaih; thlang koeh him; koeh qu; koeh nai," tinaak awipeek ingkaw ikawmyih ak chang awipeek awm vawhaw: "Namah a pum amyihna na imceng lung law na," tinaak awi awi cui boeih hy. **10** Lungnaak ing a kengsam thlang a seetnaak am sai hy. Cedawngawh lungnaak taw anaa awi a soepnaak na awm hy. **11** Tuh tloek awhkaw a tym ve sim doena, ve ve sai lah, nik cangnaak thai awhkawng lak awh hulnaak a tym ce a zoe law voe voe hawh dawngawh, ihnaak awhkawng na hang hqyng lawnaak a tym ce pha hawh hy. **12** Khawmthan boeih tawm ca hawh nawh; khaw dai tawm ca hawh hy. Cedawngawh than awhkaw ik-oeih saikhqi ce qoeng hlah unawh khawkdai a suisak ing thoeihcam qu hlah u sih. **13** Khawkdai awhkaw amyihna khawboe leek sai unawh, oelh qunaak ingkaw tlaiseetnaakkhqi ce koh ta u sih nyng. **14** Vemyihkhqi anglakawh Jesu Khrhi ing thoeihcam qu unawh, pumsa ngaih thawlhaaka a soepnaak aham koeh poek law uh.

14 Cangnaak awh tha amak awm thlang ce a theenaak kaana do law uh. **2** Thlang pynoet ingtaw, cangnaak ak caming ik-oeih boeih aih thy thai mai hlaib hy, cangnaak benawh tha amak awm thlang ingtaw, anhah doeng ni a ai hly. **3** Ik-oeih boeih boeih ak ai ing anhah doeng ak ai ce koeh the na seh, anhah doeng ak ai ingawm ik-oeih boeih ak ai ce koeh cawt seh, kawthi anih ce Khawsa ing do hawh hy. **4** Thlakchang a tyihzawih awi ak deng nang ce a u nu? A Bawipa aham ni ang dyih nawh ang tluk hy. Anih ce dyi kaw, Bawipa ing anih ce dyih sak thai hy. **5** Thlang pynoet ing khawngi ak chang boeih anglakawh khawngi pynoet ce ak ciimcaih na poek hy; thlang pynoet bai ingtaw khawngi boeih ce ang myih na poek hy. Thlang boeih ing amah ak poeknaak amyihna awm seh. **6** Khawngi ak zeih ing Bawipa a boemangnaak hamna ni a zeih, ik-oeih ak ai ing Khawsa venna zeelawi kqawnawh a ai ak caming Khawsa kyihcahnnaakna ai hy; a mak ai ingawm Khawsa venna zeelawi ak kqawn ak caming Khawsa kyihcahnnaak na am ai hy. **7** U awm ni mah doeng aham amni hqing nawh ni mah doeng aham am ni thi hy. **8** Ni hqing awhtaw Bawipa ham ni hqing unawh, ni thih awh awm Bawipa ham ni, ni thih uh hy. Cedawngawh ni hqing awh awm, ni thih awh awm ningnih taw Bawipa koena ni awm uhy. **9** Ve a dawngawh ni thlak thi ingkaw thlak hqing a Bawipa na a awmnaak thai aham, Khrhi taw thi nawh hqing tlaih hy. **10** Cawftaw, ikaw ham na nu nang ing na koeinaa ce awi na deng? Ikaw ham nu na koeinaa ce na thenaak? Ningmh boeih ve Khawsa awidengnaak ngawihdoelh a haiawh ning dyi boeih kawm uh. **11** "Kai ka hqing a dawngawh, khawkhlu boeih ing ka haiawh khuk sym kawm uh, lai boeih ing khawsa haiawh thawl phawng kawm uh," tinawh qee hyt awm hawh hy. "Kai ka hqing a dawngawh, khawkhlu boeih ing ka haiawh khuk sym kawm uh, lai boeih ing khawsa haiawh thawl pho kawm uh," tinawh qee hyt awm hawh hy. **12** Cedawngawh ningnih boeih ing nimah akawng ce Khawsa haiawh nik pho kawm uh. **13** Cedawngawh pynoet ingkaw pynoet awi koeh deng qu voel u sih. Ce anglakawh, u ingawm koeinaa ang tluknaak ham ingkaw

ang bahnaak hly kawi ce koeh sai voel u sih. 14 Bawipa Jesu awh ka awm hawh amyihna, ikawmyih a buh a an awm amah poek awh am ciimcaih hy tice am awm hy. Cehlai u ingawm ik-oeh pynoet oet ce amak ciimcaih na ak poek awhtaw, anih aham am ciim hy. 15 Nang a awk ai awh ce na koeinaa ing ak kaw ama law awhtaw, lungnaak ing them am sai voel hyk ti. Anih aham Khrish ce a thih hawh dawngawh na awk na ai ing na koeinaa ce koeh hqe. 16 Nangmih ing nep hy tinawh namik poek ce thlang ing ak che na koeh kqawn seh. 17 Ikawtih Khawsa qam taw awk ai awh am awm hy, Khawsa qam taw dyngnaak, qoep ang quinaak, Ciim Myihla awh zeelnaak ni, 18 u awm vemylhna Khrish a bi ak bi ing Khawsa zeel sak nawh thlang ing kylh am cas hy. 19 Cedawngawh qoep ang quinaak ben ingkaw pynoet ingkaw pynoet hawihkhangaak kawi ben ce sai u sih. 20 Buh a an a dawngawh Khawsa bibi ce koeh hqe u sih. Buh a an boeih ve ciim hy, cehlai thlang ang bahnaak aham ikawmyih awm ni awk ni ai ve am thym hy. 21 "Na koeinaa ang tluknaak hly kawi na a awm awhtaw, meh a ma ai ham aw, misurtui ama awk ham aw, am awhtaw kaw awm a ma ai aham nep hy. 22 Ve a ik-oeh awh ve nang ing nak cangnaak ce namah ingkaw Khawsa anglakawh ta dym. U awm amah ing a sai ik-oeh awh dawk amak pe qu taw a zo ak seen thlang ni. 23 Cehlai u awm upvoetnaak kawlung ing ak ai taw thawl hawh hy, cangnaak ing ama ai a dawngawh; cangnaak awhkawng amak law ik-oeh boeih taw thawlhnaka na awm hy.

15 Ningmih tha ak awmkhqi ing tha amak awmkhqi a voetnaak ce ning zaksim peek aham awm hy, nimah ak kawzeelnaak doeng poek aham am awm hy. 2 Ningmih boeih ing ni ven awhkaw thlang a leeknaak aham ingkaw a hawihkhangaak aham ak kawzeelnaak ce sai peek aham awm hy. 3 Khrish ing zani amah ak kawzeelnaak ce am sai hy. "Nang anik zyikungkhqi a zyihnaak ce kak khanawh tla hawh hy," tinawh qee na a awm amyihna. 4 yhnaak ingkaw Cakciim ak thapeeknaak aham kaming ngaih-unaka ni taaknaak thai aham, ak qkjym awh a mi na queekhyi boeih taw ningnih sang saknaak aham ni a mina qee hy. 5 yhnaak ingkaw thaawmnaak ak pekung Khawsa ing Jesu Khrish a hu ak hqut na nami awm dawngawh nangmih kawlung pynoet na taaknaak ce ni pek khqi seh, 6 ningnih a Bawipa Jesu Khrish a Pa Khawsa ce nami zoeksangnaak thai aham namik kawlung ingkaw nami hui na mium lai pynoet na ta lah uh. 7 Khawsa zoeksang na a awmnaak thai aham, Khrish ing nangmih a ni do khqi lawt amyihna nangmih pynoet ingkaw do qu lah uh. 8 Ikawtih ka nik kqawn peek khqi taw Khawsa ak awitak ang zyngna Khrish ce Judakhqi a tyihzawih na coeng hy, pakdakmhqi venawh awi a taak ce caksak aham, tive ni, 9 am geennaak awh Gentelkhqi ing Khawsa ce a mi zoeksangnaak thai aham na ni. "Cedawngawh Gentelkhqing lak awh nang ce ni zoeksang kawng nyng saw; nang ming kyihcahrainaak laa ce sa kawng nyng." 10 Aw Gentel thlangkhqi, ak thlangkhqi mi zeel lah uh," tinawh qee hyt amyihna. 11 Cekoengawh, "Gentelkhqi boeih aw, Bawipa ce kyihcahrainaak laa ce sa kawng nyng," ti bai hy. 12 Cekoengawh Isaiyah ingawm, "Phyllum thlang uk aham, Jesse ak kqa ce cawn kaw; Gentelkhqi ing anih awh ce ngaih-unaka ta kawm uh," tinawh kqawn bai hy. 13 Ciim Myihla thaawmnaak ingkaw ngaih-unaka ng nami be hlai thainaak aham, amah ce nami ypnaka amiyihna, ngaih-unaka Khawsa ing awmhly zeelnaak boeih ing nangmih ce ni be sak khqi seh. 14 Koeinaakhoji, nangmih taw leeknaak ing be uhyk ti, cyihnaak ing soep u tiksaw pynoet ingkaw pynoet yn a tawn qu uhyk ti, tice sim nyng. 15 Khawsam geennaak ka venawh a ni peek amiyihna, ityk nin taw qaal nepnaak ing ca ni qee law pek khqi kawng nyng, 16 Gentelkhqi venawh Jesu Khrish a bibikung na ka awm amiyihna,

Ciim Myihla a ciim saknaak ak caming Khawsa a do kawi ik-oeh peek na a mi awm thainaak aham khawsoeih bibinaak ing Khawsa ak awithang leek khypyi nyng. 17 Cedawngawh Jesu Khrish awh Khawsa bi ka binaak awh ve kylh qunyng. 18 Kai ing kai ak caming a soep sak Khawsa awingainaak aham Gentelkhqi sawinaak am awhtaw, ce ce kqawn nawh sai hawh nyng, ikaw awm ap kqawn sawhqat kawng – 19 Myihla thaawmnaak ing kawpoek kyi saithainaakkhqi ce sai hawh nyng. Jerusalem awhkawng Illiricum kengsam dyna, Khrish ak awithang ce khypyi hawh nyng. 20 Thlang ing Khrish a ma simnaak a hun awh awithang leek kypyi ve kai ang cainaak na awm poepa hy, cawh ni thlang ak tungling ak khanawh im am ka sak hly. 21 "Thlang ing amak kqawn peek thlangkhqi ing za kawm usaw, amak zakhqi ing zasim kawm uh," tinawh qee hyt awm hawh hy. 22 Ve a dawngawh nangmih a venna am ka law thainaak na awm hoeih hoeih hy. 23 Cehlai tuh awhtaw ve a qam tloek awh bibinaak aham a hun am awm voel hy, nangmih a myi awm ka huh aham ka ngaih hawh adawngawh, 24 Spain qam na ka ceh awh law aham cai nyng. Ka ceh awh cawhkawng law kawng nyng saw nangmih awm ni hqip lawk khqi kawng nyng, nangmih mi a khoeoh ni awm coengawh, lam awh nangmih ing nim leng bet kawm uk ti tinawh ngaih-unyng. 25 Cehlai, tuh awhtaw, Jerusalem awh a milk awm thlakciimkhqi bibipyi aham cet hun nyng. 26 Makedonia ingkaw Akhaia awhkaw thlangkhqi ingtaw awmhly doena Jerusalem awh ak awm thlak ciimkhqi ik-oeh do a dan uhy. 27 Cemiyhna do dan aham ce ngaih uhy, cekkhqi venawh cemiyhna a mi sai ham qoe na awm awm hy. Gentelkhqi ing Judakhqi ang Myihla zoseennaak ce a pang pyi awhtaw, pumsa ik-oeh zoseen naak ce Judakhqi venawh a ming qek a ming qaa thoem aham awm lawt hy. 28 Vawhkaw bibi kak coengawh vawhkaw ak thaith ve a mingmih ing a mi huh coeng awhtaw, Spain qam na cet kawng nyng, nangmih awm ni hqip lawk khqi pahoei kawng. 29 Nangmih a venna ka law awh, Khrish a zoseennaak ing ak be na law kawng nyng tice sim nyng. 30 Koeinaakhoji, kyinaak ka huhnaak awh ve kai aham Khawsa venawh nami nik cykcah pyi aham, ningnih a Bawipa Jesu Khrish ingkaw Myihla lungnaak ak caming thoeh law nyng. 31 Judah awhkaw amak cangnaak thlangkhqi a kut kuihawh kawng loet nawh Jerusalem awh amik awm thlak ciimkhqi ing ka bibi ve a mi donaak thai aham cykcah lah uh, 32 Khawsa ngaihnaak amiyihna, zeelnaak ing nangmih nami kqaknaak aham nangmih a venawh ka law thainaak aham cai nyng. 33 Khawsa a ngaihdingnaak nangmih boeih a venawh awm seh. Amen.

16 Kenkhrea khaw thlangboel a tyihzawih na ak awm nangmih ingkaw kaimih a ci nu Fobi ce ym law lah uh. 2 Anih ce Bawipa awh thlakciimkhqi amiyihna do law unawh, nangmih a venawh kawng ang syt bawmnaak ce pe law uh, anih ing thlang khawzah ce bawm hy, kai awm ni bawm hy. 3 Jesu Khrish awh a bibi pyi Priscilla ingkaw Aquila ce kut tlaih law uh. 4 Kai aham a ni hqingnaak dy dun hy nih. Kai doeng am nawh Gentel thlangboel boeih ing cekqwai ak khanawh zeelnaak ta uhy. 5 Cekkqawi a im awh a milk cur thlangboelkhqi awm kut tlaih law uh. Ka pyi Epenetus ce kut tlaih law uh, anih ce Asia qam kuihawh lama cyk na Khrish ak cangnaak na awm hy. 6 Nangmih aham thatlawh doena bi ak Meri ce kut tlaih law uh. 7 Thawngim kang tlaak pyi hiah ka cakaw qawi Andponikas ingkaw Junias ce kut tlaih law uh. Cekkqawi taw ceityihkhqi anglakawh thlang ing sim nawh, kai hlanawh Khrish awh awm hawh hy nih. 8 Bawipa awh ka lungnaak Ampliatas ce kut tlaih law uh. 9 Khrish awh bibi pyikung Urbanas ingkaw ka pyi Staki ce kut tlaih law uh. 10 Noek a dak na awm hlai hy ak cek khak, Apelles ce kut tlaih law uh. 11 Ka cakaw na ak awm, Herodion ce kut tlaih law uh. Bawipa awh a mik awm

Narkisa ipkhui ce kut tlaih law uh. **12** Bawipa awh bibi ak cak nu qawi, Trufena ingkaw Trufosa ce kut tlaih law uh. Bawipa awh bibi ak cak, ka pyi nu Persi ce kut tlaih law uh. **13** Bawipa awh tyk na ak awm Rufa ingkaw a nu, kai a nu na awm awm lawt hy, anih ce kut tlaih law uh. **14** Asunkhqita, Flekon, Herme, Patqoba, Herma ingkaw koeinaakhqi ce kut tlaih law uh. **15** Filloka, Julia, Neria ingkaw a koeinu, Olimpas ingkaw cawh ak awm thlak ciimkhqi boeih ce kut tlaih law uh. **16** Pynoet ingkaw pynoet ak ciim mawnaak ing mawk qu lah uh. Khril thlangboel boeih ing nangmih kut ni tlaih khqi uhy. **17** Koeinaakhqi, nangmih anglak li awh phek a bonaak sai nawh nami cawng ing ak kah na nangmih lam anik kangkhqi awh ce nami ngaihtaak aham ni ngaih khqi nyng. Cemyih ak thlangkhqi ce qei uh. **18** Cemyih ak thlangkhqi ing ningnih a Boei Khril a bi ce am bi uhy, a mimah ak phoen phyinaak aham ni bi a mi bi. A mi pauthainaak ing thlang kyih am cah unawh kaw amak cak thlangkhqi ce thai na uhy. **19** Thlang boeih ing nangmih ak awngainaak ce za hawh uhy, cedawngawh nangmih ak khanawh zeel soeih nyng; cehlai them leek awh cyih nami taak aham ingkaw them amak leek awh ce ikaw amak sim amyihna nami awm aham ngaih nyng. **20** Roepnaak Khawsa ing Setan ce nami khaw ing ni neet sak khqi bit kaw. Ningmih a Bawipa Jesu am qeenaaak ce nangmih a venawh awm seh. **21** Ka bibi pyi, Timote ing nangmih ce kut ni tlaih khqi uhy, ka cakawkhqi Lukia, Jason ingkaw Sosipater mi ingawm kut ni tlaih khqi uhy. **22** Ve ca ak qeekung kai, Tertia ingawm Bawipa awh kut ni tlaih khqi nyng. **23** Kai ingkaw vawh ak awm thlangboel toek nawh ak khuut ak hlepung Gaia ing kut ni tlaih khqi uhy. Khawk bau khuiawh kaw qangpui bibinaak ak hquikung Erasta ingkaw kaimih a naa Kuarta ing kut ni tlaih khqi uhy. **24** Ningmih a Bawipa Jesu Khril am qeenaaak nangmih a venawh awm seh. Amen. **25** Kai ing kak kqawn law awithang leek ingkaw Jesu Khril akawng kak kqawn lawnaak ak caming nangmih anik dyih sak khqi thaikung ing, ni hu ben kum khawqyt khuiawh thuh na ak awm awi hyp ce, (aiōnios g166) **26** tuh awhtaw kumqui Khawsa ak awipeeknaak amyihna tawngkhakhoi ak cauk awh dang sak hawh hy, qam boeih thlang ing cangna unawh anih ak awi ce a ming ngainaak aham – (aiōnios g166) **27** ce Khawsa ak cyi doeng a venawh Jesu Khril ak caming kumqui dy thangleeknaak awm seh! Amen. (aiōn g165)

1 Korin

1 Khawsa a ngaihnaa amyihna Jesu Khril a ceityih na ak awm Paul ingkaw ni koeinaa Sosthenas ing, **2** Korin khaw awh ak awm Khawsa a thlangboel ingkaw, Jesu Khril awh ciimcaih sak na awm nawh ak ciimcaih na awm aham ak khy thlangkhqi, hun hoei awh a mingmih ingkaw ningnih a Boei – ningnih a Bawipa Jesu Khril ang ming ak khy thlangkhqi boeih a venawh: **3** Pa Khawsa ingkaw Bawipa Jesu Khril a ven awhkaw qeenaaak ingkaw ngaihdingnaak awm seh. **4** Jesu Khril ak caming nangmih a venawh a ni peek khqi am qeenaaak awm nangmih aham Khawsa venawh zeelhaak awi kqawn poepa nyng. **5** Amah awh ce nangmih taw ik-oeih soepkep awb boei uhyk ti – awi kqawnnaak boeih ingkaw cyihnaak soepkep awh – **6** kaimih ing Khril akawng ka mik kqawn law ce nangmih awh ce cak hawh hy. **7** Cedawngawh nangmih ing ningnih a Bawipa Jesu Khril ang dangnaak nyn ce naming lamtoen awh myihla zoepeek kutdo ik-oeih voet hlauhnaak qoe qoe am ta voel uhyk ti. **8** Ningmih a Bawipa Jesu Khril a kawnyh awh nangmih taw coet ak kap na am nami awmnaak aham, amah ing a dyt dyna thaawmaak ni pek khqi bit kaw. **9** Khawsa capa, ni Bawipa Jesu Khril khawsaknaak haih a nik khy khqi taw ypawm hy. **10** Koeinaakhqi, nangmih anglakawh phekbonaak ama awmnaak aham pynoet ingkaw pynoet kawpoek kutoet na ta unawh kawlung pynoet poeknaak pynoet ing nami cuui aham ni Bawipa Jesu Khril ang ming ing qeenaaak ni thoeh lawk khqi nyng. **11** Koeinaakhqi, nangmih anglakawh oell qunaak awm hy, tinawh Khalo ipkhui khaw awhkaw thlangkhqi ing kqawn law uhy. **12** Kak kqawn ngaihnaak taw veni: Ningmih anglakawh thlangvang ing, “Kai taw Paul a bawng ni,” ti uhyk ti, thlangvang bai ing, “Kai taw Apollo a bawng ni,” ti uhyk ti, ak chang khqi bai ing, “Kai taw Cepha a bawng ni,” ti uhyk ti, a chang bai ing, “Kai taw Khril a bawng ni,” ti uhyk ti. **13** Khril ve phek ang bo qunawh nu? Paul aw nangmih aham thinglam awh a mi tai? Paul ang ming awh aw baptisma nami huh? **14** Krispa ingkaw Gaia doeng am taw u awm baptisma am ka ni peek khqi a dawngawh zeel nyng. **15** Cedawngawh kai ang ming awh baptisma ak hu u awm am awm hy. **16** (Oeh, Stefen ipkhui khaw ce baptisma pe bai nyng; cekcoengawh, thlak chang baptisma ka peek ak awm hy voei nu, am sim nyng.) **17** Ikwatih Khril ing baptisma peek aham amni tyi hy, awithang leek ak khypyi aham ni a ni tyih – thlanghqing a cyihnaak awi ing amni, cawh mantaw Khril thinglam sai thainaak ce a hqawng na awm hawh kaw. **18** Thinglam awithang taw ak qeeng huikhqi aham qawnaak na awm nawh, hulna ak awm hui ningnihkhqi aham taw Khawsa thaawmnaak na awm hy. **19** “Thlakcyikhiqi a cyihnaak ce hqe kawng nyng saw; kawpoek ak cyikhqi ak poeknaak ce hoet kawng nyng,” tinawh qee hyt awm hawh hy. **20** Thlakcyi hana nu? Cak qeekung hana nu? Ve khawmdek awh ak oelhkung ce hana nu? Khawsa ing khawmdek cyihnaak ce qawnaak tinawh am dang sak nawh nu? (**aiōn g165**) **21** Khawsa a cyihnaak ve khawmdek cyihnaak ing ama pha dawngawh amah ce am sim thai hy, qawnaak awi khypyinaak ak caming ak cangnaak thlangkhqi hul na a awmnaak awh Khawsa taw ak kaw zeel hy. **22** Judakhqi ing kawpoek kyi hatnaak ce ngaih uhy, Greekkhqi ing cyihnaak, **23** cehlai ningnih ingtaw Khril thinglam awi ce nik khypyi uhy: ve ak awi ve Judakhqi ang bahaaka na awm nawh Gentelkhqi a qawnaak na awm hy, **24** cehlai Khawsa ing ak khykhqi aham taw, Juda awm Greek awm, Khril taw Khawsa ak thaawmnaak na a awm dawngawh, Khawsa a cyihnaak na awm hy. **25** Ikwatih Khawsa a qawnaak taw thlanghqing a cyihnaak anglakawh cyi bet nawh, Khawsa ak tha ama awmnaak taw thlanghqing ak tha awmnaak anglakawh

ak tha awm bet hy. **26** Koeinaakhqi, nangmih khy na nami awm awh ikawmyihna nami awm tice poek lah uh. Thlanghqing a huh awhtaw nangmih ak khuiawh thlakcyi khawzah am awm uhyk ti; thlang ak khanawh ak awm khawzah am awm uhyk ti; qypawn ipkhui awh ak awm thlang khawzah am awm bai uhyk ti. **27** Cehlai thlakcyi chah sak aham Khawsa ing khawmdek awh ak qawkhqi ce tyk nawh; tha ak awmkhqi chah sak aham khawmdek awh tha amak awmkhqi ce tyk hy. **28** Ve khawmdek awh ak kaina ak awmkhqi ingkaw thlang ing a thenaak khqi – ik-oeih ak awmkhqi ce hqe aham – **29** u awm a haiawh amang oek qu aham amak awm ik-oeihkhqi ce tyk hy. **30** Anih ak caming nangmih taw Jesu Khril ak khuiawh awm uhyk ti, anih ce ningnih aham Khawsa ven awhkaw cyihnaak na awm hy – cetaw ningnih aham dyngnaak, ciimnaak ingkaw hulnaak na awm hy. **31** Cedawngawh, U awm ak oek qui ingtaw Bawipa awh oek qu seh,” tinawh a qee awm hawh hy.

2 Ningmih a venna ka law awh, Koeinaakhqi, pau thainaak, cyihnaak ak sang soeih ing Khawsak awi nangmih a venawh ap khy law pyi nyng. **2** Ningmih a venawh ka awm awh ce Jesu Khril ingkaw a thinglam awi am awhtaw ikawm sim aham am poek nyng. **3** Ningmih a venna ka law awh tha a awm kaana kqjih doe ingkaw thyne doena ni ka law. **4** Kak awih kqawn ingkaw awi ka nik kqawn law peek khqi awm cyihnaak ingkaw thlanghqing ak kawtlaak na ap kqawn nyng, Myihla thaawmnaak ing ni kak kqawn law, **5** nangmih ak cangnaak taw thlanghqing a cyihnaak awh am hang nawh, Khawsa ak thaawmnaak awh ni ang hang hy. **6** Hqamcakhqi venna taw cyihnaak awi ce kqawn nyng, cehlai khawmdek cyihnaak awi amni, ve khawmdek ukkung ak qeeng hly khqi ak awicyih awm am ni; (**aiōn g165**) **7** Khawsa ak awicyih awihyp, thuh na ak awm, ni boeimangaak a hamna Khawsa ing khawmdek a syn hlan awhkawng a hoep cee hawh awi ni. (**aiōn g165**) **8** Cece u khawmdek ukkung pynoet ca ingawm ce a cyihnaak ce am sim uhy, ami sim mantaw boeimangaak Bawipa ce thinglam awh am tai voei uh. (**aiōn g165**) **9** Cehlai, Mik ing ama huh khawi, haa ing amang zaak khawi ingkaw, kawlung ing amak poek khawi ce amah ing a lungnaak thlangkhqi ham Khawsa ing qoek a bah pe hawh hy.” tinawh qeena awm hy. **10** Khawsa ing ningnih a venawh amah ang Myihla ak caming dang law sak hawh hy. Myihla ing ik-oeih boeih ce sui hy, Khawsa a koe ak dung seih awm sui hy. **11** Ak khuiawh thlanghqing myihla awm kaana thlanghqing ak kawpoek ak sim u nu ak awm? Cemiyh lawtna Khawsang Myihla kaana u ingawm Khawsa ak poekaak ce am sim hy. **12** Ningmih ing ve khawmdek myihla amni hu unawh Khawsa ing a zoena a ni peek ce ning zaksimnaak thai aham Khawsa ven awhkaw Myihla ni ni huh uh hy. **13** Ve ni ka mik kqawn hy, thlanghqing a cyihthoemnaak ing a ni cawngpyi am nawh, myihla awitak ce myihla ak awi ing myihla a cawngpyinaak amyihna kqawn unyng. **14** Myihla amak ta thlang ing Khawsang Myihla a venawh kawng ak law ce am do thai hy, anih aham taw cekkhqi ce qawnaak na awm hy, Myihla ben nakaw na a awm adawngawh, ang zaak na awm am zasim thai hy. **15** Myihla thlang ingtaw a soep hoei sim hy, cehlai anih ce u ingawm am sim thai uhy. **16** U ing nu Khawsak kawlung ce sim nawh anih ce awi ak kqawn peek thai? Cehlai kaimih ingtaw Khril ak kawlung ta unyng.

3 Koeinaakhqi, myihlak thlangkhqi venawh awikqawn amyihna nami venawh ap kqawn nyng, cehlai pumsak thlangkhqi venawh kqawn amyih nani kak kqawn hy, Khril-awh nasen thlangkhqi venna kqawn amyih na. **2** Buh am nawh, suktui ing ni ka ni cawm khqi hun, buh nami ai thai hlan adawngawh; tuhawm am ai thai hlan uhyk ti. **3** Pumsak thlangna awm hun uhyk ti. Naming

lakawh ytynaak ingkaw oelh qunaak a awm adawngawh pumsak thlangna awm unawh khawmdek thlangna am nami awm nawh nu? 4 Pynoet ing, "Kai taw Paul a bawng ni," pynoet bai ing, "Kai taw Apollo a bawng ni," nami ti khui pumsak thlangna am nami awm nawh nu? 5 Apollo ce a u nu? Paul taw a u bai nu? Nangmih ing namik cangnaak thai aham Bawipa ing bibi a peek qip tyihzawikhqi boeih ni. 6 Kai ing saw nyng, Apollo ing tui syp hy, cehlai ak tai sakkung taw Khawsa ni. 7 Cedawngawh ak sawkung ingkaw ak sypkung ce ikawna am awm hy, Khawsa doeng ing ni, a cawt sak. 8 Ak sawkung ingkaw ak sypkung ang cainaak taw pynoet ni, a ni bibinaak amyihna ceqkawi ing zoopeek kudo ce hu bit kawn nihi. 9 Ikawtih kaimih taw Khawsa bibi pylkung na awm unyng saw; nangmih taw Khawsa lo na, Khawsa im na awm uhyk ti. 10 Khawsa qeennaak ka venawh a ni peeknaak amyihna, im ak sa thai amyihna kai ing lung im khoeng nyng, thlak chang ing ce lungkhoeng awh im sa hy. Cehlai im ak sakung ing ikawmyihna im a sak tice ngaihta seh. 11 Ikawtih thlang pynoet ing lung a khoeng coeng awhtaw thlak chang ing ce ak khanawh lung ak chang am khoeng thai voel hy, cawkaw lungkhoeng cetaw Jesu Khril ni. 12 Ce lungkhoeng ak khanawh u ingawm sui, ngun, lung a phuktlo, thing, cangzing ing im a sak awhtaw, 13 thlang boeih a bibi ce dang kaw. Khawngi ing dang law sak kaw. Maina dang law sak nawh; ce a mai ing thlang boeih a bibi ce ikawmyihna awt tice dang law sak kaw. 14 U myih awm cawkawh a im sak ce ang dyih poe awhtaw, zoopeek kudo ce hu kaw. 15 Cehlai im ce a uih boeih awhtaw hlawng boeih kaw, amah taw loet hly hlai hy, mai kqawng anglakawhkwang ak loet amyihna awm kaw. 16 Khawsang Myihla nangmih ak khuiawh a awm adawngawh, nangmih taw Khawsa a bawkim na awm uhyk ti, tice am nami sim nawh nu? 17 U ingawm Khawsa a bawkim ce a hqe awhtaw, Khawsa ing anih ce hqe lawt kaw; kawtih Khawsa a bawkim taw ciimcaih hy, cawkaw bawkim taw nangmih ni. 18 Na mimah ingkaw na mimah koeh thai qu na uh. Nangmih anglakawh u ingawm tulh tolok awhkaw cyihnaak awh amah ingkaw amah ce thlakcyi na ang ngai qu awhtaw, thlakcyi na a awmnaah amah "thlakqaw" na awm seh. (aiōn g165) 19 Ikawtih ve khawmdek cyihnaak ve Khawsa mik hui awhtaw qawnaka nani a awm. "Thlakcyikhqi ce a mimah a thainaak awh aawk sak khqi hy," tinawh qee amyihna, 20 cekoengawh, Bawipa ing thlakcyikhqi ak poeknaak ve a hqawng a h qap nani a awm hy tice sinhy," tinawh awm bai hy. 21 Cedawngawh, thlanghqing awh ve ikaw awm oek qu ahem am awm hy! Ik-oeih boeih ve nangmih aham ni, 22 Paul awm Apollo awm am awhtaw Cepha awm, khawmdek awm hqingnaak awm thihnaak awm tuh kawkkhqi awm haiben awhkawk khqi awm – nangmih boeih aham ni, 23 nangmih awm Khril a koena awm u tiksaw Khril taw Khawsa koena awm hy.

4 Cedawngawh ningnih ve Khril a tyihzawih ingkaw Khawsa ak awihyp ak khoem thlang na thlang ing ning ngai khqi seh. 2 Ik-oeih ak khoemkung taw ypaumna a awm ham ngaih hy. 3 Nangmih am awhtaw thlanghqing awidengnaak ing awi nami ni deng mai mantaw ikaw na awm am poek nyng; kamah ingkaw kamah zani awi am deng qunyng. 4 Kak kapwoek ve caih hlai hy, coet a kap kaana am awm nyng. Bawipa ing ni kai ve awi a ni deng hy. 5 Cedawngawh a tym a pha hlawanuh awm awi koeh deng; Bawipa a law dy qeh uh. Anih ing khawmthan khuiawh thuh na ak awmkhqi ce vangnaak awh dang sak kawmsaw thlanghqing ak kawlung awm dang sak bit kaw. Cawh thlang boeih ing Khawsa am kyihnaak ce hu boeih bit kawm uh. 6 Tuh koeinaakhqi, "Cawh qee na ak awm ak kep na koeh cet uh," tinaak awi ce kainih a venawh kamah cawgnaak thai aham nangmih nami hawihkhangaak aham ve a ik-oeikhqi ve kai ingkaw Apollo ing haw na nih nyng. Cawhtaw thlang pynoet ing pynoet ak khanawh am oek qu kaw. 7 U ing nu nangmih ak lawha bet na a ni sai khqi? Am nami huh

ak kaa awh ikaw nami taak? Nami huh awhtaw kawtih amak hu amyihna nami zoeksang qu? 8 Nami ngaih ce ta hawh uhyk ti! Nangmih taw boei hawh uhyk ti! Kaimih kaana – sangpahrangkhqi na coeng hawh uhyk ti! Nangmih mi sangpahrang na awm haham, sangpahrang na nami awm tang tang ce ni ngaih pyi khqi soeih soeih nyng! 9 Kai ingtaw, thihi aham ami toen thlangkhqi amyihna, Khawsa ing kaimih ceityikhqi ve a dytnaak benawh ni dang sak namih hy, tinawh poek nyng. Khawk khan ingkaw khawmdek boeih a haiawh, khan ceityikhqi ingkaw thlangkhqi haiawh dan aham kaimih ve ni sai khqi hy. 10 Khril aham thlakqaw na awm unyng, cehlai nangmih taw Khril awh cyi uhyk ti! Kaimih taw ka milk tha am awm hy, cehlai nangmih taw namik tha awm hy! 11 Tuh qoe qoe awh ve kaimih taw buh cawi unawh tui ngaih unyng, ak pum a zal na awm unyng, thlang a kut hqitnaak na awm unyng saw im a lo taal unyng. 12 Ka mimah a kut ing bi bi unyng. Thlang ing a ni thekhanaak khqi awh, yh ngah ngah unyng; 13 amak thym na ami nik kqawn awh, kawdungnaak ing hlat pe unyng. Tuh dy na khawmdek bi bawi amyihna awm unyng saw, khawmdek ing ama ngaih na awm unyng. 14 Nangmih namik chahnaak aham ve ak ca ve ka qee law amni, ka lungnaak ka cakhqi amyihna ni nami ngaihataaknaak aham ve ak ca ve qee law nyng. 15 Khril awh nangmih a nik khoemkungkhqi thlang thonghqa awm ta hlai uhyk ti, pa khawzah am ta uhyk ti, Ikawtih Jesu Khril awh awithang leek ak coming kai ve nangmih a pa na coeng nyng. 16 Cedawngawh kai ve nami ni oet aham ni ngaih khqi nyng. 17 Ve adawngawh ka lungnaak, ka capa ingkaw thlang ypaum, Timote ce nangmih a venawh tyi law nyng, anih ing Jesu Khril awh ka khawsak ce khaw a hoei awhkaw Thlangboel a venawh ka cawngpyinaak a amyih ce ni sim sak khqi bit kaw. 18 Kai, nangmih a ven am kak law hly voel amyihna thlangvang ing oek qu uhy. 19 Cehlai, Bawipa ing tyng hy a ti awhtaw, nangmih a venna law nai kawng nyng, cawkaw lungkhoeng ak oek qukhqi ak awi doeng kaana, a mi bibikhqi ce sim bit kawng. 20 Ikawtih Khawsa qam taw pauthainaak awh am awm nawh thaawmnaak awh ni a awm. 21 Han nu nami ngaih bet? Vyknaak cung ing nu ka law kaw, am awhtaw lungnaak ingkaw kawdungnaak ing nu ka law kaw?

5 Nangmih anglakawh nupa thawlhaak, lukiikhqi venawh za amak awm, a pa a zu ak zunaak awithang za nyng. 2 Nangmih ing kawseet doena cemyihna ak awm thlang ce ak chang na nami hqek aham awm hlai hy, cehlai nangmih ing oek qu na lat uhyk ti? 3 Nangmih a venawh pumsa ingtaw am awm hlai nyng, myihla ingtaw nangmih a venawh awm nyng. Kamah kak awm a mih qoe qoe na, kai ingtaw cemyihna ak awm ak thlang ce awi deng hawh nyng. 4 Bawipa Jesu ang ming ing nangmih kutoet na naming cun awh kai awm myihla ingtaw awm lawt nyng, ningnih a Bawipa Jesu ak thaawnnaak awm cawkaw awm hy, 5 pumsa thawlhaak ce hqe na awm nawh Bawipa a khawngi awh ang myihla ce hul na a awmnaak thai aham, ce ak thlang ce Setan a venawh pe uh. 6 Nangmih naming oek qu paqap ve am nep hy. Hen vetehtaing ce phaihipi a cuna zam hy tice am nami sim nawh nu? 7 Hen amak bawi phaihipi ak thai na nami awm amyihna, hen ak kqym ce khawng lah uh. Ikawtih Khril, ningnih a cehtaak poe tuuca ce hyih na hlut hawh uh. 8 Cedawngawh henpak khqym, seetnaak ingkaw thawlhaak henpa ing poei sai kana taknaak ingkaw thymnaak phaihipi, hen amak bawi ing poei sai u sih. 9 Nu pa thawlhaak ak saikhqi mi am naming pha qu aham ni qee law pek khqi hawh nyng – 10 nu pa thawlhaak ak saikhqi ingkaw ak kamvaah thlangkhqi, thlang a sa ai ak ngaihkhqi, myiqawl ak bawk ve khawmdek thlangkhqi mi koeh pha qu law qoe qoe uh am ti nyng. Cemyihna a awm mantaw ve khawmdek ve nami cehtaak aham awm kaw. 11 Nangmih a venawh ca ka qee law ngaihnaak taw koeinaa na awm nyng ti hlai hy nu pa thawlhaak ak sai,

ak kamvaa, myiqawl ak bawk, thlang ak theet, zu ak aw ingkaw thlang a sa ai ak ngaih ak thlang ceni kak kqawn hy. Cemyih ak thlangkhqi mi ce buh awm koeh ai law hahih. 12 Thlangboel a leengna ak awmkhqi awideng aham kai ing ikaw a seng? Ak khuiawh ak awmkhqi ce nangmih ing awi nami deng aham am awm nawh nu? 13 A leengna ak awmkhqi taw Khawsa ing awi deng kaw, "Nangmih anglakawhkaw thlak thawlce a leengna khawng uh," ti bit kwak.

6 Naming lakawh pynoet ingkaw pynoet awipungnaak a awm awhtaw, thlak ciimkhqi haiawh kqawn anglakawh Khawsa amak sim awi dengkung a venna namik kqawn hly ngam nawh nu? 2 Thlak ciimkhqi ing khawmdek ve awi deng kaw, tice am nami sim nawh nu? Khawmdek ve awi deng aham nami awm awhtaw, ikoeih ak zawica awh awm awi am nami deng kawm nu? 3 Khan ceityikhqi zani awi ni deng kaw, tice am nami sim nawh nu? Ve khawmdek hqjinggaak ik-oeiikhqi ak khqoet awhtaw ikawmyih dyna nu awi ni dengnaak kaw? 4 Cemyih a dawngawh nangmih anglakawh awipungnaak a awm awhtaw, thlangboel ak khuiawh ak zawi khyt na ak awmkhqi awm nangmih aham awi ak tlyk kungnaa ta uh! 5 Nangmih namik chahnaak aham ve ak awi ve kqawn nyng. Nangmih anglakawh awipungnaak ak sit sak thai thlakcyi u awm am awm nawh nu? 6 Cemyih kaana, koeinaa pynoet ing ak chang pynoet ce taza a cawi mantaw – cawhtaw cangnaak amak takhqi haiawh dyihna awm hawh kaw! 7 Taza cawinaak awh nami ceh dawngawh lamma na dawk oepchoeh hawh uhk ti. Ikawthiaw dawk am nami hul mai? Ikawthi thainaak ce am nami zawk mai hy voei? 8 Na mimah ing thlang thai na lat unawh amak thym ikoeih ce sai uhyk ti, nami koeinaakhqi venawh cemyihna ce sai uhyk ti. 9 Thlak thawlce ing Khawsa qam am pang thai kaw tice am nami sim nawh nu? Thai lat na koeh awm uh ee: nu pa thawlce sainaak, myiqawl bawknaak, pa pum zawihaak, pa ingkaw pa thawlce sainaak, 10 quuknaak, kamvaanaak, zu quinaak, thlang theetnaak, thlang a sa ai ngaihnaak vemyih ak sai thlangkhqi boehing Khawsa qam am pang thai kaw. 11 Cemyihna maw nangmih anglakawhkaw thlang pynoet ingtaw nami awm mah hy. Cehlai nangmih taw ningnih a Khawsa ang Myihla ak caming Bawipa Jesu Khrish ang ming awh silhna awm hawh uhk ti, ding sak na awm hawh uhk ti. 12 A hoei sai ve ka hamna ciimcaih hy, cehlai a hoei sai ve am leek boeih hy; a hoei sai ve ka hamna ciimcaih hy; cehlai ikaw tamnaa na awm pek qu am ngaih nyng. 13 Buh ve phoen a hamna awm nawh phoen awm buh a hamna awm hy. Cehlai Khawsa ing cekqawi ce hqe hahih kaw. Pum ve nu pa thawlce sainaak aham amni, Bawipa ham ni, Bawipa awm pum aham ni. 14 Khawsa ing ak thaawminaak ing Bawipa ce thiihnaak awhkawng thawh hy, ningnih awm nim thawh khqi lawt kaw. 15 Nangmih a pum taw Khrish amah a pangkhqi ni tice am nami sim nawh nu? Khrish a pang ce lo nyng saw pum ak zawiikhqi ing ka tawm hly nawh nu? Amni! 16 Pum ak zawi nu ing anik awm hahih taw pum ak zawi nu ing pum pynoet na awm hawh hy tice am na sim nawh nu? "Pakkhih ce pumoet na coeng hawh kaw, a ti amyihna. 17 Cedawngawh u awm Khrish ingqawi a nik pha qu taw myihla awh pum pynoet na awm hy nih. 18 Nu pa thawlce sainaak ce cen taak uh. Thlang ing ak chang thawlhaak a saikhqi boehing taw a pum a leeng benawh kaw ni, cehlai a awm nu pa thawlhaak ak sai taw amah a pum awh thawlhaak ak sai na awm hy. 19 Nangmih a pum taw, Khawsa venawh kaw nami huh a dawngawh nangmih ak khuiawh ak awm Ciim Myihla a bawkim ni tice am nami sim nawh nu? Nangmih ve na mimah a koe na am awm uhk ti; 20 nangmih taw a phu ing thlaih na namik awm ni. Cedawngawh nami pum ing Khawsa ce zoeksang lah uh.

7 Nangmih ing ca nami qee lawnnaak akawng awh: Pa ing a zu ama lawh aham nep hy. 2 Cehlai cemyihna nu pa thawlhaak a awm dawngawh, thlang boeih ing zu ta boeih seh, nu boeih boeih ing vaa ta boeih seh nyng. 3 Pa ing a zu venawh chungnaa na a awmnaak ce soep sak seitaw, zu ingawm a vaa a venawh soep sak seh. 4 Zu ing a pum ce amah doeng am koe na hy, a vaa ing ni a koe naak hy. Cemyih lawtna, vaa ing awm amah a pum ce am koe na hy, a zu ing ni a koe naak hy. 5 Cykcahnaak ham a tym a koeih hawnaak a awm kaana amah doeng a ngaihnaak doek khoeih ce koeh sai law uh. Am nang yh thainaak ce Setan ing haw na nawh nang ce ama ni syknaaih aham kutoet na awm hahih uh. 6 Nangmih ing nami do ahani kak kqawn, awipeek amyihna am kqawn nyng. 7 Pa boeih boeih ve kai amyihna awm lawt lah voei uh ti ngaih nyng. Cehlai thlang boeih ing Khawsa a kutdo ce ta qip qip lawt uh; pynoet ing ak chang ta nawh pynoet baiing ak chang ta bai hy. 8 Zu amak lo ingkaw vaa amak takhqi ingkaw nuhaikhqi venawh: kai amyihna zu lawh vaa taak kaa qoe na a mi awm lawt aham ngaih nyng. 9 Cehlai ama ming yh thai awhtaw, zu a mi lawh vaa a mi taak aham awm hy, yh tloei anglakawhtaw zu lawh vaa taak ce nep bet hy. 10 Zu ak lo vaa ak takhqi venawh (kai ing am nawh, Bawipa ing) ve ak awi ve ni pek khqi hy: a zu ing a vaa ce koeh ma seh. 11 A vaa ce ama awhtaw vak chang koeh ta voel seh, am awhtaw a vaa ce pan tlaih seh. A vaa ingawm a zu ce koeh tha lih seh. 12 Ak chang bai taw (Bawipa ing am nawh, kamah ing ni kak kqawn hy): Koeinaa thlang pynoet ing amak cangnaak thlang ce zu na mai nawh cawhkaw nu ing a vaa ing awm poe aham a ngaih awhtaw, a zu ce thlak aham am awm hy. 13 Nu pynoet ing amak cangnaak thlang pynoet ce va na nawh cawhkaw pa ing a zu inggawi awm poe aham a ngaih awhtaw, ce nu ing ce koeh ma seh nyng. 14 Amak cangnaak pa ce a zu ak caming ciim sak na awm hawh hy, amak cangnaak nu awm cangnaak ak ta a vaa ak caming ciimcaih sak na awm hy. Cemyih am mantaw nami cakhqi ce am ciimcaih kaw, cehlai cemyihna a awm dawngawh ciimcaih hly hy. 15 Cehlai cangnaak amak ta ing a cehtaak awhtaw, cehtaak mai seh. Cangnaak ak ta pa am awhtaw nu ce cemyih ing am pin hy; Khawsa ing qoep ang qui cana awm aham ni a nik khy khqi. 16 Nu nang, na vaa hul kawng nyng tice ikawmyihna na sim naak? Pa nang, na zu hul kawng tice ikawmyihna na sim naak? 17 Khawsa ing khy nawh Bawipa ing bibi a peeknaak awm thlang boeih ing a hqing khuiawh awm u seh nyng. Ve ve thlangboel boeih a venawh ka peek awi na awm hy. 18 Khy na ak awm pa ce chahhui qeet ce hawh nu? Chahhui amak qeet thlang myihma koeh awm seh. Chahhui qet kana ak awm khy ak awm hly nu? Anih ce chahhui a qeet aham am awm hy. 19 Chahhui qeet awm ama qeet awm ikawna am awm hy. Khawsa ak awipeek khoem ce ni awipui bet hy. 20 Khawsa ing ak khynaak amyihna thlang boeih ing amah a awmnaak hun awh awm seh. 21 Khyna na awm awh tamnaa na nu na awm? Ce ing ce kawpoek kyinaak koeh ni pe seh, na loetaak ham a tym leek na huh awhtaw cawn taak ham cai. 22 Bawipa ing ak khy awh tamnaa na ak awm ce Bawipa awhtaw ak loet thlang na awm hy; cemyih lawtna, khy awh loet na ak awm ce Bawipa a tamnaa na awm hy. 23 Nangmih taw a phu ing thlaih na awm u hyk ti; thlang a tamnaa na koeh awm uh. 24 Koeinaakhqi thlang boeihing Khawsa venawh sai aham bibi ami taak boeih boeih amyihna, Khawsa ing ak khynaak amyihna awm boeih u seh nyng. 25 Nulaa cadawngkhqi akawng awhtaw; Bawipa a ven awhkaw awipeek taw am hu pai hlai nyng, Bawipa am qeenaak awh yawpm na ka awm amyihna kai ing awi ni pek khqi nyng. 26 Tuh tloei awhkaw kyinaak awh ve, tuh awhkaw nami awm amyihna nami awm poe ce nep hy tinawh poek nyng. 27 Zu nak lo vaa nak ta hawh nu? Cawhtaw koeh pek qu voel uh. Zu nak lo va nak ta hilan hyn nu?

Cawhtaw na zu koeh lo voel. 28 Zu na lawh hawh awhtaw, ce ce thawlhnak amni; nulaa ingawm vaa a taak awhtaw am thawlhy. Cehlai zu ak lo vaa ak takhqi taw ve hqing khui khawsaknaak awh kyinaak hu kawm uh, cedawngawh kai ingtaw ciimcah sak aham ni ngaih khqi nyng. 29 Koeinaakhqi, kak kqawn ngaihnaak taw, a tym tawi hawh hy tive ni. Tuh awhkawng zu ak takhqi ing zu amak tamyihna a mi awm aham awm hy; 30 ak khy ak kqangkhqi ing, amak khy amak kqang amyihna; ak awmhlykhqi ing amak awmhly amyihna; ak thlaikhqi ing amah ta amyihna; 31 Khawmdek them ak hawnakkhqi ing ce a them awh ce kawlung koeh pe u seh. Ikawtih ve khawmdek awhkaw khqi ve khum boeih kaw. 32 Nangmih ly doena nami awm ham am ngaih nyng. Zu amak taa ing Bawipa benawh ly seh nyng, ikawmyihna Bawipa ce a zeel sak hly thai, tice poek seh. 33 Zu ak ta ingtaw, ikawmyihna nu ka zu ce ka zeel sak thai lah voei, tinawh ve khawmdek them awh ly seh. 34 Vaa amak taa nu, am awhtaw nulaa ingtaw Bawipa ben them ce poek hy: ang cainaak taw Bawipa awh apum ingkaw myihla pe bawk hy. Cehlai vaa ak ta nu ingtaw ikawmyihna nu ka vaa ka zeel sak thainaak lah voei, ati awh ve khawmdek them awh lyaanak tahi. 35 Nangmih nami leeknaak aham ni ve ve kak kqawn hy, nangmih ka nik bymmaak khqi aham amni, khawsak ak leekna khaw nami sak naak thai ham ingkaw Bawipa bi ce ngaih aa kana nami binaak thai ham ni ka kqawn hy. 36 U ingawm a canu nula, vataak kana khawqyt a awm sak akawngawh ak mak thymna ang ngaih qu awhtaw, anih taw thlang hoengna awm nawh, a ngaih awhtaw, a sai ngaih ce sai seh; am thawlhy; taak sak seh nyng. 37 Cehlai pa ing ak kaw poek nawh, u a ceeinaak awm a awm kaana yhthainaak a taak dawngawh, nulaa ce ama zunaak aham ak poek awhtaw – ce awm ak thym ni a sai. 38 Cedawngawh, nulaa ak zunaak ce thym hy, Cehlai zu amak lo ce nep bet hy. 39 Vaa ak ta nu taw a vaa a hqing khui pinna ak awm ni. Cehlai a vaa a thihi awhtaw thlang a ngaih ce vaa na thai hy, Cehlai a vaa ce Bawipak thlang na a awm ham awm hy. 40 Ce a nu ce a awm khawi amyihna a awm mantaw zeel bet kaw, tinawh poek nyng, kai awm Bawipa Myihla ce ta nyng tinawh poek qu nyng.

8 Tuh myiqawl a venawh bulnaak awk a ai akawng kqawn lah sih: cyihnaak ni ta boeih uhy tice ni sim uhy. Cyihnaak ve oek qu poepa hy, cehlai lungnaak ingtaw taai sak hy. 2 Sim hawh nyng ak ti ing a sim hly kawi ce sim tang tang hlan hyn hy. 3 Cehlai Khawsa ak lungnaak thlang taw Khawsa ing anih ce sim hy. 4 Cawhtaw, myiqawl bawknaak awh bulnaak na ami nawh buh a an awh: Khawmdek awh myiqawl bawknaak ve kawna awm am awm nawh Khawsa awm pynoet doeng ni a awm, tice ni sim uhy. 5 Ikawtih khawmdek ingkaw khawk khan awh khawsa tinawh amik khy awm hlai hy (“khawsa” khawzah awm nawh “Bawipa” khawzah awm pai hlai hy) 6 ningnih aham taw Khawsa pynoet doeng ni a awm, anih taw Pa, anih a ven awhkawng ik-oeih boeih ce law nawh anih aham ningnih ve ni hqing uhy, Bawipa awm pynoet doeng ni a awm, anih taw Jesu Khril ni, anih ak caming ik-oeih boeih law nawh, anih ak caming ningnih awm ni awm uhy. 7 Cehlai u ingawm ve ve am sim hy. Thlang pynoet taw myiqawl bawknaak ce ak kawk khuiawh a awm hyn dawngawh bulnaak buh a an ami ai awh ce, a mik kawpoek tha ama awm dawngawh, amak ciimcah na awm hawh hy. 8 Cehlai awk a ai ing Khawsa venna amni khyh hy; ni ai a dawngawh am ni se bet nawh, amni ai dawngawh awm amni leek bet bai hy. 9 Cehlai na ngaihdingnaak ce tha amak awm khqing bahaanak na ama awm thainaak aham ngaihtha lah uh. 10 Nangmih vawhkaw cyihnaak ak takhqi ing myiqawl bawknaak bawkim awhkaw awk a ai nami ai ce poeknaak thai amak ta thlang ing a ni huh awhtaw, myiqawl bawknaak awhkaw bulnaak buh a an ce ai ngaihnaak kawlung am ta hly nawh nu? 11 Nang a

cyihnaak ing, vawhkaw tha amak awm koeinaa, Khril ing anih aham thi hhai hy, him hawh hy. 12 Vemyihna koeinaa ak khananwa na thawlhy awh cekkhqi a simnaak tha amak awm ce maa sak hawh hyk ti, cedawngawh Khril ak khananwah thawlhy awh hyk ti. 13 Cedawngawh, ka awk ai ing ka koeinaa ce thawlhy awh kang tlukku sak awhtaw, anih ce am kang tlukku saknaak aham ityk awh awm meh am ai voel kawng nyng. (aiōn g165)

9 Ngaihding ak thlang na am ka awm nawh nu? Ceityih pynoet am kang ming na nawh nu? Ningmih a Bawipa Jesu ce am ka hu nawh nu? Nangmih ve Bawipa awh kai a bibinaak ak thail khqi am nu? 2 Thlak chang a venawh ceityih na am awm mai nyng seiawm, nangmih a ven awhtaw awm nyng! Bawipa awh nangmih ve ceityihna ka awmnaak ak dang sakkung na awm uhly ti. 3 Kai awi anik deng khqi venawh ve ve kang hulgunaak na awm hy. 4 Aawk thai ai thainaak ni ta uhy ka ti my? 5 Cangnaak ak ta ni zukhqi awm ceityih ak changkhqi ingkaw Bawipa a naakhqi ingkaw Cepha amyihna khawlawng ni ceh pyi thai lawt hy ka ti? 6 Kai ingkaw Barnaba doeng ing nu phoen khuitnaak na bi ka ni bi hly? 7 U ing nu amah a tangka ing qalkap bi a bi? U ing nu misur thing ling nawh ai kaana a awm? U ing nu vaitaw khoen nawh a suuktui aawk kaana a awm? 8 Thlanghqing a huhnaka mai awm nu ve ve kak kqawn? Anaa awi ingawm ce ni ak kqawn ka ti my? 9 Mosi a anaa awi awh vemyihna qee hy: “Caang ak leh vaaitaw ce a hui koeh pin pe,” ti nawh. Khawsa ing vaitaw ham doeng nu ak poek pek? 10 Ningnih a ham doeng na ak kqawn law am nu? Oeih, ningnih aham queen a awm hy: dek ak naawkkung ing dek naawk nawh caang ak lehkung ing caang a leh awh, caang ce ang ngaih-u lawt dawngawh cemiyihna ce bibi lawt hy. 11 Nangmih anglakawh myihla ben camci ce ka mi saw dawngawh, nangmih a ven awhkawng khawmdek ik-oeih ka mi ah ce doem aih nawh nu? 12 Thlak chang ing nangmih a venawh kawng bawmnaak ce ami huh awhtaw, kaimih ingtaw khawzah khqoet am ka mik hu hly nu? Cehlai vawhkaw anaa ve am haw na unyng. Khril ak awithang leek kangna ama awmnaak a ham ikawm yh ngah ngah unyng. 13 Bawkim awh bi ak bikhqi ing bawkim awhkawng buh hu unawh, bawkthang awh bi ak bikhqi ingawm bawkthang awhkaw ami pek khqi ce bawn lawt uhy tice am nami sim nawh nu? 14 Cemiyh lawtna, awithang leek ak khypyikhqi ing awithang leek khypyinaak ak caming ak phoen khuit aham Bawipa ing taak pek khqi hy. 15 Cehlai vemyihna saithainaak ve pynoet awm am haw na nyng. Kak khanawh cemiyihna nami sainaak a ham ve ak ca awm am qee law nyng. Vawhkaw kang oekqunaak ve thlang ing kawna a sui kaana a awmnaak anglakawthaw ka thihi leek hly bet hy. 16 Cehlai awithang leek kak khypyi awh, awithang leek khypyi qoe qoe aham ka awm dawngawh am kyih qu thai nyng. Awithang leek am kak khypyi awhtaw kai aham khaw na bin hy! 17 Kamah ak thahlynaak ing awithang leek ve kak khypyi mantaw, kutdo hu kawng; thahlynaak ing am kak khypyi mantaw, ka venawh peek na ak awm ce kak khypyi mailai na awm hy. 18 Cemiyh a awm mantaw kai aham ikaw kutdo a awm kaw? Ve mai ni: awithang leek kak khypyinaak ve a zoe na ni, cedawngawh ka saithainaak ce awithang leek khypyinaak awh am haw na nyng. 19 U a tyihzawih na awm am awm nyng saw ngaihding na awm hlai nyng, thlang khawzah ka lawhnaak thai aham thlang boeih a tamnaa na sai qu nyng. 20 Judakhqi venawh Judakhqi ka ka lawhnaak thai aham Juda na awm nyng. Anaa ak kaiawh ak awmkhqi venawh (kamah taw anaa ak kaiawh ak awmkhqi venawh anaa ak kaiawh am awm hlai nyng), anaa ak kaiawh ak awmkhqi ce ka lawhnaak thai aham, anaa ak kaiawh ak awm amyihna awm lawt nyng. 21 Anaa awi amak ta thlangkhqi venawh anaa awi amak ta myihna awm lawt nyng (Khawsa anaa awhkawng

am loet nyng saw Khrirh a anaa ak kaiawh awm nyng), cawh ni anaa avi amak ta thlangkhqi ce ka lawh hly thai. 22 Tha amak awm thlangkhqi venawh, tha amak awmkhqi ce ka lawhnaak thai aham, tha amak awm thlang na awm nyng. Ang coengnaak thai khuiwa thlang ka hulnaak thai aham, thlang boeih a venawh ami awm awm a myihna awm nyng. 23 Awithang leek zoseennaak awh ka paa thainaak aham, vemyihkhqi boeih ve sai nyng. 24 Dawng taaqunaak awh dawng boeih hlai uhy, thlang pynoet doeng ing ni kutdo a huh hy tice am nami sim nawh nu? Kutdo nami huhnak thai aham dawng lah uh. 25 Taaqunaak awh ak paa ingtaw thalawhnaak ing amik tha lo ngah ngah uhy. Cekkhqi ing amak kyi poe hly kutdo huh aham cemyl tluk na amik tha lo uhy; cehlai ningnih ingtaw kumqui dyna ak cak boei lumyk ce huh aham bi ni bi uhy. 26 Cedawngawh cainaak amak awm thlang amyihna haiben na am dawng nyng; zilh hqawng ak hyp amyihna am hyp nyng. 27 Cemyihna, thlang a venawh awithang leek kak khypyi coengawh kutdo huh ham amak kawihna am ka awmnaak ham kamah a pum ve vyk nyng saw noengnaak na ta nyng.

10 Koeinaakhqi, pakdamkhqi ing myi ak kaiawh tuicunli ami na kat ce a sim kaana nami awm ham amni ngaih khqi nyng. 2 Cekkhqi boeih ing Mosi awh myi ing tuicunli awh baptismu hu uhy. 3 Myihla buh pynoet ce vel qip unawh, 4 myihla tui pynoet ce a na aw qip uhy; a mingmih a hu awh ak bat myihla lungnu awhkawng tui ce aw uhy, cawkaw lungnu ce Khrirh ni. 5 Cehlai thlang ak kuum ak khanawh Khawsa ak kaw am law adawngawh qamkoh khuiawh thi boeih uhy. 6 A mingmih ing ami sai them che awh kawlung amni taaknaak ahamna ni toek hly kawi na awm law hy. 7 Thlang pynoet ing myiqawl ami bawk amyihna nangmih khqjng koeh bawk law lawt uh; "Thlangkhqi ing awk a ai aham ngawi unawh laam aham dyi uhy," tinawh qee hyt amyihna. 8 Cekkhqi ak khuiawh thlang wang ing nupa thawlhaak ami sai dawngawh khawngi hypoet awh thlang thongkul thongthum ami thih amyihna, ningnih ing nupa thawlhaak koeh sai u sih. 9 Thlangvang ing Bawipa ami noek ami dak dawngawh – khqui ing cuk khqi nawh ami thih boeih amyihna – ningnih ing Bawipa ve noek a dak aham am awm hy. 10 A mingmih anglakawhakaw thlangvang ing ami saibi a dawngawh – khan ceityih ing a thi sak khqi boeih amyihna, ningnih taw koeh saibi u sih. 11 Ningnih ing ni toek aham vemyih khqi ve ana awm nawh a tym a pha lawh ning ngaih ni taaknaak aham qeena ak awm ni. (aiōn g165) 12 Cedawngawh, ak cak cara dyi nyng, tinawh ak poek nang ing, am nang tluknaak aham ngaihta lah! 13 Thlanghqeing a venawh amak law khawi sykzoeknaak ce nangmih a venawh am law hy. Khawsa taw ypwam hy; anih ing am nang yh noeng sykzoeknaak ce nak khanawh am pha law sak kaw. Sykzoeknaak hu bai tek seiawm, sykzoeknaak ak kaiawh nang dyihnaak thai a hamna anih ing lam qoek a bah law kaw. 14 Cedawngawh, ka lungnaak ka pyikhqi, myiqawl bawkaak ce cen taak uh. 15 Thlakcyikhqi venawh ni awi kak kqawn law hy; kak kqawn ve na mimah ing hqimhqa lah uh. 16 Zoseennaak boet ningnih ing ni zeelnaak ve Khrirh a thi ni qupnaka pyi am nu? Phaihipi ning thek uh ve Khrirh a pum ni qupnaka pyi am nu? 17 Ningnih thlang khawzah ve phaihipi cunoet, pum pynoet na nik awm ni; ni cu boeih na phaihipi cunoet doeng ni ni quum hah uh. 18 Israel thlangkhqi ce poek lah uh bulnaak awhkaw buh ak aikhqi taw bawkthang am qup hah lawt unawh aw? 19 Cawhtaw kai ing myiqawl a venawh bulnaak awh ami pek qup pyi ham ka ti nawh nu? Am ni, 20 lukih thlangkhqi ing bulnaak ami sai taw Khawsa venawh ami sai am nawh; qaaai a venawh ni ami sai, nangmih ing qaaai mi naming pha qu am ni ngaih pyi khqi nyng. 21 Bawipa a boet ingkaw qaaai a boet am aw hah thai kawm uk ti; Bawipa ak caboei ingkaw qai ak caboei am veel hah thai bai kawm uk ti. 22 Bawipa ve tlaiseet sak ham cai uhyk ti? Anih

anglakawh ningnih nik tha awm khqoet nawh nu? 23 Ik-oeih boeih sai ciimcaih hy, cehlai ik-oeih boeih sai am leek hy. Ik-oeih boeih sai ciimcaih hy, cehlai ik-oeih boeih sai ing thlang am tlaih vawng hy. 24 Cedawngawh a awm amah a leeknaak hly doeng a sui kana thlang chang a leeknaak hly sui seh nyng. 25 Kawlung khuiawh doetnaak a taak qee kaana meh a mi zawihi ce ai mai, 26 ikawthih, khawmdek ingkaw ak khuiawh ak awm boeih ve Bawipa koe ni. 27 Amak cangnaak thlang ing buh ai na nik khy nawh ceh aham na ngaih awhtaw, kawlung khuiawh doetnaak a taak qee kaana na haiawh a toen law ce ai mai. 28 Cehlai u ingawm, "Vawhkaw buh a an ve bulnaak buh a an ni," a ti awhtaw ak kqawn lawlung mi kawlung a caihnaak aham koeh ai voel, 29 nang ak kawlung ap kqawn ngaih na nyng, ak kqawn lawlung ak kawlung ni kak kqawn ngaihnaak hy. Ikaw ham nu ka ngaihdingnaak ce thlang ak poeknaak ing awi a deng kaw? 30 Ymnaak ing buh veel nawh Khawsa venawh zeelhaak awi kak kqawn awhtaw, kaw tinawh nu coet ak kap na ka awm kaw? 31 Cedawngawh na awk na ainaak ingkaw them na sainaak hoei awh, Khawsa a boeihmangnaak na sai lah. 32 Thlang ang bahaanak aham ik-oeih koeh sai law uh, Juda awm, Greek awm Khawsa ak thlangboel awm – 33 ik-oeih a soep a hoei awh thlang boeih ak kawngaih sai aham kak tha ka lawh lawt amyihna nangmih ing namik tha lo lawt lah uh. Kamah a leeknaak doeng ce am sui nyng saw hulna ami awm thainaak aham thlang khawzah a leeknaak ni ka sui hy.

11 Kai ing Khrirh ka toek amyihna nangmih ing kai ve ni toek lawt lah uh. 2 Ik-oeih soepkep awh kai ni sim unawh, ka cawngpyinaak namim tu loet adawngawh ni ym khqi nyng. 3 Cehlai pakhqi boeih a lu taw Khrirh na awm hy, nu a lu taw pa na awm nawh, Khrirh a lu taw Khawsa na awm hy tice sim sak ahamni ngaih khqi nyng. 4 Pa ing a lu a sing doena cykcah nawh awi ak kqawn awhtaw amah a lu chah ak phiyh ak pe ni. 5 Cehlai nu ing a lu a sing kaana cykcah nawh awi ak kqawn awhtaw amah a lu chah ak pena awm nawh; lusam a voh ing myih hy. 6 Nu ing a lu ama sing awhtaw a lusam ce voh seh; Cehlai lu voh ce chahqai na ak poek awhtaw a lu ce sing seh nyng. 7 Pa taw Khawsa myi sam ingkaw a boeimangnaak na a awm adawngawh a lu a sing hly qoe am ni; nu taw pa a kyihcahnaak ni. 8 Ikawthih nu awhkawng pa ve am law hy, cehlai nu taw pa awhkawng ak law ni; 9 nu aham pa ve saina am awm nawh, nu ce pa aham saina ak awm ni. 10 Ve akawng ingkaw khan ceityihkhqi akawng awh ve, nu ing a lu ak khanawh saithainaak hatnaak a taak aham awm hy. 11 Cehlai Bawipa awh nu ve pa kana am awm thai nawh, pa awm nu kana am awm thai lawt hy. 12 Ikawthih nu ce pa awhkawng law nawh, pa awm nu awhkawng thang lawt hy. Cehlai ik-oeih boeih ve Khawsa awhkawng ak cawn boeih ni. 13 Na mimah ing poek lah uh: Nu ing lu sing kana Khawsa venawh ak cykcah ce ak nep nu? 14 Khawmdek khawsaknaak qoe awh mah pa ing a lusam ak sai na am hlyn mantaw chahqai na awm nawh, 15 nu ing a lusam ak sai soeih na a taak awhtaw a daawnaak na awm hy; a lusam taw a dah qunaak na a pek ni. 16 Cehlai ak oelh a awm awh awm ningnih venawh khawsak am ta unyng, Khawsa a thlangboelkhqi ingawm am ta uhy. 17 Cehlai we ak wai ka nik kqawn peek khqi caming am nim kyihcak khqi thai nyng, nami leeknaak hly kawina am nawh, nami seetnaak hly khqoet kawina naming cun adawngawh. 18 Lammacykawh kang zaak taw, thlangboel kutet na cun aham nami law awh, naming lakawh phek bonaak ce awm hy tinawh za nyng, cang awm cangnaak nyng. 19 Naming lakawh a tak ang dangnaak thai ham, naming lakawh ap cangsuinaak awm ak awm hly qoe ni. 20 Naming cun awh Bawipa mybuh ak ai na am kawih uhyk ti, 21 thlang boeih ing nami mybuh ce lammaa na ai hoeih hoeih uhyk ti;

cawh ce thlang pynoet ak phoen cawi nawh, thlang pynoet ing qui hy. 22 Ikawmyihna, nami awk ainaak aham im am nami ta nawh nu? Khawsa a thlangboel aw nami thekha naak, am awhtaw amak takhqi nami the kha naak awh nu? Ve a dawngawh ka nim kiyh hlyk khqi nawh nu? Amnmin kiyh hlyk khqi qoe nyng! 23 Ikawthi Bawipa venawh kawng ka huh veni ka nik kqawn law peek khqi petoe hy: Bawipa Jesu ing, a mim tu hly am than awh, phaihpi lo nawh, 24 zeelawi ak kqawn coengawh, thek nawh, "Ve ve nangmih aham ka peek ka sa ni; kai nami ni simnaak poe aham sai law uh," tinak khqi hy. 25 Cemyih koep na, phaihpi ami ai coengawh boet ce lo bai nawh, "Ve ak boet taw ka thi awhkaw awikam thai ni; nami ni simnaak poe aham ve se sai law uh," tinak khqi hy. 26 Ikawthi vawhkaw phaihpi ai unawh boet nami awk a hoesi awh, a law tlaih lhan dy awh Bawipa a thihnaak ce namik khypyi na awm hy. 27 Cedawngawh, u awm Bawipa a phaihpi ingkaw boet ce kawna a sui kaana ai nawh ak aw taw Bawipa a pum ingkaw thi awh thawlhaak ak sai ak thlang na awm hy. 28 U ingawm phaihpi ingkaw boet ce a awk a ai hlanawh ak nep cana poek qu seh. 29 U ingawm Bawipa a pum ak leekna ak poek qu kaana a awk a ai awhtaw ak khanawh awidengnaak ce pha kaw. 30 Cawh ni naming lakawh tlo unawh ami mu hy, thlang vang ingtaw thi uhy ce. 31 Nimaing ingkaw nimah lamma na nik poek qu hqeeat awhtaw awidengnaak amni hu kaw. 32 Bawipa ing awi a ni deng khqi awh khawmdekk ingqawi thawlak sak hainha am ni awm naak a hamna Bawipa a toelna ni awm uhy. 33 Cedawngawh Koeinaakhqi, awk a ai aham nami law awh, qeh qu cang uh. 34 U awm ak phoen a cawih awhtaw, pynoet na naming cun awh awidengnaak ama huhnaak aham, im awh a ai aham awm hy. Kai ka law awh awi nik kqawn law pek khqi tlaih bit kawng nyng.

12 Koeinaakhqi, myihla ben them peek ve a sim kaana nami awm ham amni ngaih nak khqi nyng. 2 Maana lukih na nami awm awh ikawmyih na awm a ngaihnaak amyihna, ce myiqawl awi amak takhqi benna ceh pyi na awm uhyt ti sim uhyt ti. 3 Cedawngawh ka nik kqawn peek khqi, u awm Khawsa myihla ing awi ak kqawn ingtaw, "Jesu taw khawssii zawk seh," am ti uhy, u ingawm Ciim Myihla ak caming kawat, "Jesu taw Boei ni," am ti thai hy. 4 Them pek ak chang chang awm hlai hy, Myihla taw pynoet ni. 5 Bibinaak ak chang chang awm hlai hy, Bawipa taw pynoet ni. 6 Bibinaak ak chang chang awm hlai hy, Khawsa ing ni thlang boeih awh bi a bi hy. 7 Hawiikhkaangnaak a hamna Myihla simsakaak ce thlang boeih a venawh pek na awm hy. 8 Thlang pynoet a venawh Myihla ing cylinhaak awithang pe nawh, ak chang a venawh Myihla ing awithang simnaak pe bai hy. 9 Thlak chang pynoet a venawh Myihla awh cangnaak ce pe nawh, thlang pynoet a venawh thlak tlo qoei sak thainaak pe hy. 10 Thlang pynoet a venawh kawpoek kyi thaawmnaak pe nawh, pynoet a venawh awithang khypyinaak pe hy. Pynoet a venawh myihlakhqi hqimhqha thainaak pe nawh, ak chang pynoet a venawh awi ak chang chang pau thainaak pehy. Ak chang pynoet a ven bai awh ce am sim awi zaaksim thainaak pe hy. 11 Cehlai vekkhqi boeih ve Myihla pynoet ing thlang boeih a venawh ak ngaihnaak amyihna teei nawh bibi hy. 12 Pum ve pynoet doeng hlai ni a baai khawzah awm hy; cawhawh a baai khawzah ing pum pynoet coeng sak hy. Cemyih nani Khrith awm a awm hy. 13 Ikawthi ningnih boeih ve Myihla pynoet ing ni pumoet na awm a hamna baptismal ari peek khqi boeih hy; Juda awm Greek awm tamnaa awm ak tamnaa am awm, awk hly kawi Myihla pynoet doeng ni ningnih a venawh a ni peek khqi hy. 14 Pum ve pynoet doengna am sai nawh a baai khawzah nani a sai. 15 Khaw ing, "Kai taw kut na am awm nyng saw pum awh am paa nyng," a ti mantaw, cemyihna a ti ak camawh pum awh a paa kaana am awm thai hy. 16 Haa ing, "Kai taw mik na am

awm nyng saw pum awh am paa thai nyng," a ti mantaw, cemyihna a ti ak camawh pum awh a paa kaana am awm thai hy. 17 Pum ve mik hqoeng na a awm mantaw, ikaw ing nu awi ang zaak kaw? Pum ve haa hqoeng na a awm mantaw, ikaw ing nu bwang ang zaak bai kaw? 18 Cehlai Khawsa ing pum awhkaw a baaikhqi boeih ce amah ing a ngaihnaak a hun awh ta boeih hy. 19 Pum a baaikhqi ve pynoet na a awm boeih mantaw pum ve hana nu a awm kaw? 20 Cedawngawh, a pang kqeng soeih hlai hy, pum taw pynoet ni. 21 Mik ing kut a venawh, Amni ngoe nyng! am tina thai hy. Lu ing khaw a venawh, "Amni ngoe nyng!" am tina thai bai hy. 22 Cemyihna pum a baai tha amak awn amyihna ak dangkhqi ve phu ak ta boeikhqi na awm uhy. 23 Cekcoengawh zoeksang kawina am ning ngaih pum a baaikhqi ce, ce qoe ce huuuhly kawina awm uhy; huh sitna ak awm ni baaikhqi ing zoeksangnaak khawzah hu uhy. 24 Ni baai huuuhly ak cukhqi ingtaw cemyihna sai am ngaih hy. Pum-awh ve hqeengaak qoe qoe am awm nawh, a baaikhqi ing ang myih qipna amil bawng qunaak qip thai a hamna. 25 Khawsa ing dawnaak amak ta a baai ce zoeksang khqoet nawh, pum ve pumoetna a sai ni. 26 Cemyihna a baai pynoet ing ang yh awhtaw a baai changkhqi boeih ingawm yh lawt unawh, a baai pynoet zoeksangna a awm awhtaw a baaikhqi boeih ing ym pyi uhy. 27 Nangmih taw Khrith a pumna awm unawh, a baaikhqi boeihna awm uhyt ti. 28 Khawsa ing thlangvang ce thlangboel khuiawh ta nawh, a pynoetna awh ceityih na, a pakkhinaak awh awikhqawnkung na, ak pakthumnaak awh cawngpyikung na ta hy; cekcoengawh kawpoek saithainaak, ak tlo qoei saknaak, awi a phyn phyn na awikgawn thainaak them pekkhqi ce awm bai hy. 29 Ami cu boeih ceityih na awm boeih unawh nu? Ami cu boeih tawngtha na awm boeih unawh nu? Ami cu boeih cawngpyikung na awm boeih unawh nu? Ami cu boeih ing kawpoek kyi them sai boeih unawh nu? 30 Ami cu boeih ing thlakto qoei sai thai boeih unawh nu? Ami cu boeih ing awi kqawncaihnaak thai ta boeih unawh nu? 31 Cehlai thempeek ak bau soeikhqi ce ngaih soeih kawm uk ti. Cawhice lamleek soeih nim huh khqi kawng nyng. soeih lah uh.

13 Thlanghqing awi ingkaw khan thlang awina awikgawn nyng seiawm, lungnaak am ka taak awhtaw maawng ang qeeng ingkaw tlaklaak ang qeeng mai amyihna ni a awm hly. 2 Tawngtha awi kqawn thainaak ta nawh ang awihyp ingkaw simthainaak boeih ta nyng seiawm, tlengnaak ang qeeng mai amyihna ni a awm hly. 3 Ka khawhthemkhqi boeih khawdeng hahqakhqi venawh pe nawh ka pum ve mai awh uih sat ham dyna pe qu mai nyng seiawm, lungnaak am ka taak awhtaw, ka hamna ikaw phu am ta hy. 4 Lungnaak ingtaw yh thai nawh, qeenaaak tathy. Lungnaak ing ytnaak am ta nawh, am hoel qu nawh, am oek qu hy. 5 Am thin am se nawh, am kamvaa hy. Ak kaw am so sak nawh, thawlhaak lam am poek hy. 6 Lungnaak ingtaw them che awh am zeel nawh, cehlai awitak ce ym hy. 7 A soep hoeiawh yh thai nawh, a soep awh cangnaak ta nawh, a soep awh ngaih-uunaak ta nawh, a dytnaak dyna yh thai hy. 8 Lungnaak we ityk awh awm am dyt kaw. Cehlai tawngnak awi awm seiawm dyt kaw, amsim awi pau na awm seiawm dyt kaw, simnaak awm seiawm dyt kaw. 9 Ningmih ing a vang a phal ni si sim unawh a vang a phal doeng ni nik khypyi uhy, 10 cehlai soepnaak a nyn ce a pha law awh ama soepnaakkhqi boeih ce qeng hawh kaw. 11 Naasen na ka awm awh, naasen amyihna paunyng, naasen amyihna poek nyng, naasen amyihna zasim nyng. Cehlai ka pacawng awhtaw, naasen poeknaakkhqi boeih cehta nyng. 12 Tuh hlalang awh ni huh amyihna ak caih na amni hu uhy; cawhtaw ni haai ingkaw ni hai ning hu qu hawh kaw. Tuh ve a vang a phal doeng ni ka sim hy; ce cawhtaw tuh ak nepna ni sim amyihna, ak nepna sim

hawh kawng nyng. 13 Ve pakthum tloek ve awm hy: vetloek taw cangnaak, ngaih-unaak ingkaw lungnaak ve ni. Cehlai ve tloek ak khuiawh ak bau soeih taw lungnaak ni.

14 Lungnaak ve hquut unawh taw myihla ben kutdo ve ngaih soeih lah uh, kutdo ak khuiawh awikqawnnaak ve ngaih khqoet lah uh. 2 Ikawtih amsim awi na ak pau ing thlang a venawh am pau nawk Khawsa venawh ni a pau hy. Amsim awina awikhqawn ing thlanghqing venawh awi ak kqawnna am awm nawk, Khawsa venawh ak kqawn ni, u ingawm ak awikhqawn ce am zasim uhy; cehlai myihla ing awihpawng ak kqawn ni. 3 Cehlai awi ak kqawn ingtaw thlang ak thaawmnaak, thapeeknaak ingkaw ngaihdingnaak aham awi kqawn pehy. 4 Amsim awi ak pau ing amah doeng tlaithvawng nawk, awikhqawnung ingtaw thlangboel tlaithvawng hy. 5 Amsim awi nami pau boeih aham ngaih hlai nyng, cehlai awi namik kqawn a hamna ni ngaih pyi khqi bet nyng. Amsim awi ak pau ing thlangboel a hawihkhangnaak aham kqawn caihnaak ama taak awhtaw, amsim awi pau anglakawh awi ak kqawn taw leek bet hy. 6 Koeinaakhqi, nangmih a venawh law nawk amsim awina kqawn nawk, simsaknaak mai aw, simnaak mai aw, awikhqawnnaak mai aw, cawngpyinaak mai aw nami venawh am kak kqawn mantaw nangmih hamna ikaw phu a taak kaw? 7 Ik-oeih hqingnaak amak awm, ak qeng thai, khqung maiaw, tingtoeng mai aw thlang ing a oei awm kaana a tum sawhqt mantaw u ing ang zak thai kaw? 8 Uut awm a lawng a lam na ama qeng mantaw, qaal tuk aham u nu ak hlaih kaw? 9 Cemyih nani nangmih awm nami awm hly. Nam lai ing zaksim kawi awi am nak kqawn ce u ing ang zaksim kaw? Zilh awh awi nak kqawn amyihna man a awm kaw. 10 Khawmdek khan awh awi khawzah awm hlai hy, zaksim na amak awm awi pynoet awm am awm hy. 11 Thlang ing awi ak kqawn ce am kang zaksim mantaw, kai taw anih aham thlanglang na awm kawng nyng saw, anih awm kai aham thlanglang na awm kaw. 12 Cemyihna ce nangmih awm Myihla ben thempeek ce huh aham nami ngaih adawngawh, thlangboel hamna a hawihkhang naak hly ben thempeek ce ngaih lah uh. 13 Ve a dawngawh amsim awi ak pau ing ak kqawncaihnaak thai a hamna cykcah seh nyng. 14 Amsim awi na kak cykcah mantaw kang myihla ni ak cykcah hy, cehlai ka simnaak ing am hawihkhanga hy. 15 Cawhtaw ikawmyihna nu ka ti hly? Myihla ing cykcah kawng nyng saw, kak kawlung ingawm cykcah kawng; myihla ing laa sa kawng nyng saw, kawlung ingawm laa sa kawng. 16 Myihla ing Khawsa namim kyihcak mantaw nami venawh ak awm amak zasimkhqi ing ikawmyihnanu nangmih a zeelnaak awi kqawnnaak awh ce, "Amen" ami ti thai kaw? 17 Nangmih ingtaw zeelnaak awi kqawn hly pari hlai uhuy ti, thlakchang aham hawihkhang naak am awm hy. 18 Nangmih boeih anglakawh amsim awi khawzah ngaina ka pau dawngawh Khawsa kyihcak nyng. 19 Cehlai thlangboel ak khuiawh amsim awi thonghqa kqawn anglakawh thlang cukkiknaak aham thlang ing ang zaksim awi lung nga ni kak kqawn hly lat hy. 20 Koeinaakhqi, kawpoekaak benawh koeh nasen voel uh; cehlai thawlh sainaak awhtaw nasen unawh, kawpoekaak awhtaw hqamca law uh. 21 Anaa awi awh, "Thlak chang awi ak paukhqi ingkaw qapchang thlangkhqi a hui am lai hawnaak ing, ve thlangkhqi venawh awi kqawn kawng, cawh pateng awm kak awi ve am ngaih kawm uh," tinawh Bawipa ing kqawn hy. 22 Amsim awi vetaw, ak cangnaak thlangkhqi ham am nawk amak cangnaak thlangkhqi aham hatnaak ni; cehlai awiphawng taw amak cangnaak thlangkhqi aham am nawk ak cangnaak thlangkhqi ham ni. 23 Thlangboelkhqi pynoet na a ming cun awh amsim awi na ami pau boeih mantaw, cawhkaw ak awm amsim awi na amak pau thlang, am awhtaw amak cangnaak thlangkhqi ing, nangmih ve ami cyih am awm voel hy, amni tina

hly khqi nawk nu? 24 Cehlai nangmih ing awi namik kqawn awh, amsim awi amak zasim ingkaw amak cangnaak thlang ce a law mantaw, anih ce nangmih ing ak nepna namik kqawn peeknaak ak camping thlakthawlh na awm nyng, tice sim kaw, 25 ang hyp kawlung poeknaakkhqi boeih ce dang sak na awm kaw. Cawhtaw anih ing khuk sym doena Khawsa ce bawk kaw, "Nangmih anglakawh Khawsa awm tang tang hy!" ti kaw. 26 Cawhtaw Koeinaakhqi ikawmyihna nu ni ti lah voei uh? Kutnoet na naming cun law awh, laa sak ham, am awhtaw nyhtahnaak awi aw, awiphawng ham aw, amsim awi pau ham aw, am awhtaw kqawncaih ham aw ta qip uhuy ti. Vemyihkhqi boeih ve thlangboel thaawmnaa aham nami sai aham awm hy. 27 Amsim awi ak pau a awm awhtaw, thlang pakkhii pakthum ce pynoet na pau kawm usaw, cawh thlang pynoet ing ak kqawn caih aham awm hy. 28 Ak kqawn, caihkung ama awm awhtaw, thlangboel anglakawh amsim awi ak pau ce awm dyn seitaw amah ingkaw Khawsa anglak law awh pau seh nyng. 29 Thlang pakkhii pakthum ing awi phawng kawmsaw, thlak chang ing cawhkaw awi ce ak nepna a nai a nawng aham awm hy. 30 Ak ngawi thlang a venawh phawng hly kawi awi a pha awhtaw, awi ak kqawn lamma ce ang dyn aham awm hy. 31 Thlang boeih cukkik na awm nawk thaawmnaak a mi huh thainaak aham, pynoet ojip ing awikhqawn thai uhuy ti. 32 Awi ak phawngkungkhqi ang myihla taw awi phawngkung a hquinaak khuiawh ni a awm. 33 Ikawtih Khawsa taw kqonaak Khawsa am nawk qoepnaak Khawsa ni. Thlakciimkhqi cunnaak thlangboel khuiawh a awm amyihna. 34 Nukhqi ing awi kqawn kaana ami awm dyn aham awm hy. A mingmih aham awi kqawn thainaak am awm hy. Anaa awi ing ak kqawn amyihna awi ngainaak ing ami awm aham awm hy. 35 Ik-oeih akawng sim aham ami ngaih awhtaw, im na ami vaakhqi ce doet u seh; kawthi tu ing thlangboel khuiawh awi ak kqawn ve chahqai na awm hy. 36 Nangmih a venawh nu Khawsak awi ve a law ma? Am awhtaw nangmih doeng nu ak pha ma na nami awm uh? 37 U ingawm tawngtha am awhtaw myihla kutdo ak hu na ang ngai qip awhtaw, kai ing nangmih a venawh ka qee law awi ve Bawipa ak awipeek ni ti sim seh. 38 Cehlai ikawna ama sui awhtaw anih awm ikawna am sui lawt kaw. 39 Cedawngawh, koeinaakhqi, awiphawng ve ngaih bet uh, Cehlai amsim awi pau awm koeh kham law uh. 40 Ik-oeih soepkep ve a lawng a im amyihna ang qoep cana sai aham awm hy.

15 Koeinaakhqi, nangmih a venawh kak khy law pyi awithang leek, nangmih ing hu u tiksaw dyih hun na nami taak ce sim sak tlaih aham ni ngaihnaak khqi nyng. 2 Nangmih a venawh kak khy law pyi awi ce ak kak cana na mim tu awhtaw, ce awithang leek ak camping nangmih taw hui na awm uhuy ti. Cemyih am mantaw a hqawng a hqap ni namik cangnaak hly. 3 Ikawtih kai ing ka huh ce lamma cyk na nangmih a venawh awipui na ning zaak sak khqi nyng. Cakciim ing ak kqawnnaak amyihna Khrih taw ningnih a thawlhnaka awh thi nawk, 4 phyi awh pup uhuy, Cakciim ing ak kqawnnaak amyihna am thum nyn awh tho tlaih hy, 5 cekoengawh Piter ingkaw thlanghqa hlaih a venawh dang pek khqi hy. 6 Cekoengawh, ce a tym awh koeinaa thlang zanga a venawh dang pek khqi bai hy. Cekkhqi ak khuiawh thlangvang taw hqing hyn unawh, thlang vang bai taw thi hawh uh. 7 Cekoengawh Jacob a venawh dang pe nawk, ceityikhqi venawh awm dang pek khqi bai hy, 8 a hukhit na a tym canawh amak thang, kai a venawh awm dang law lawt hy. 9 Kai ve ceityikhqi ak khuiawh ak zawi soeih na awm nyng saw Khawsa a thlangboel ce ka thekhanaak dawngawh ceityih tinawh khy ham awm am kawih nyng. 10 Cehlai Khawsa qeenaaak ak camping kai taw kai na awm nyng, ka venawh a ni peek am qeenaaak ve

awm a hqawng na am awm hy. A mingmih anglakawh khawzah ngai bibi nyng. Cehlai kai amni, kai a venawh ak awm Khawsam geennaak ak caming ni. **11** Kai ingawm a mingmih ingawm, ve ni ka mik khypyi nawh, veni ka mik cangnaak hy. **12** Khrih taw thiinhaak awhkawng tho tlaih hy tice khypyi na a awm hawh awhtaw, ikawmyihna nangmih anglakawkawh thlang pynoet ing tlakthi thawh tlaihnaak am awm hy, nami ti uh? **13** Thlakthi thawh tlaihnaak ama awm mantaw, Khrih awm thiinhaak awhkawng am tho voel lawt ti kaw. **14** Khrih ce thiinhaak awhkawng ama thawh tlaih mantaw, kaimih ing awi ka mik khypyi ve a hqawng na awm kawmsaw nangmih ak cangnaak awm a hqawng na awm kaw. **15** Cedoeng kaana, Khwsa ing Khrh ce thiinhaak awhkawng thawh tlaih hy tinawh ka mik khypyi adawgawh kaimih ve Khwsa ak simpyikung zap na awm kawng unyng. Thlakthikhqi a mami thawh voel mai mantaw Khrh awm thiinhaak awhkawng am tho voel hy, ti aham awm hy. **16** Thlakthikhqi a mami thawh voel mantaw, Khrih awm thiinhaak awhkawng am tho voel hy. **17** Khrih ce thiinhaak awhkawng ama thawh voel awhtaw, nangmih ak cangnaak ce kawna awm amang coeng coengawh; nangmih taw thawlhnak awh awm hyn uhyk ti. **18** Cedawngawh Khrh awh amik ipkhqi awm qeng hawh kawm uh. **19** Ve khawmdek hqjinggaak ham doeng Khrh awh ngaih-unaak ni taak mantaw thlang boeih boeih anglakawn qeen ak kap soeih na ni awm kawm uh. **20** Cehlai Khrh taw thiinhaak awhkawng a thawh tang tang hawh dawngawh, anih ce ak ipkhqi aham thaihcyk na awm hy. **21** Ikawthi thiinhaak taw thlang pynoet awhkawng law nawh, thawh tlaihnaak awm thlang pynoet awhkawng law lawt hy. **22** Adam awh thlang boeih a thih amyihna, Khrh awh thlang boeih hqing lawt hy. **23** Thaihcyk na ak awm Khrh ce a law awh, amah a koena ak awmkhqi boeih taw amah a tym a pha awh tho tlaih kawm uh. **24** Cawhtaw a tym a dynnaak ce awm hawh kaw, uknaakkhqi, saithainaakkhqi ingkaw thaawmnaak khqi ce a hqe coeng awhtaw qam ce Pa Khwsa venawh pe kaw. **25** A qaalkhqi boeih boeih a khawk kaina a taak hlan dy taw boeimangaaka ce ta kaw. **26** A hukhit na a him hly kawi qaal taw thiinhaak veni. **27** Ikawthi amah ing, ti awh ik-oeih boeih boeih Khrh a khawk kaina ak taak peekkung, khwsa amah am paa hy tice ciim hy. **28** Vemyihkhqi a sai coengawh, Khwsa taw soepkep awh soepkep na a awmnaak thai aham Capa ce ak kaiawh ik-oeih boeih ak taak peekkung a venawh peek na awm kaw. **29** Thawhtlaihnaak ama awm mantaw, tlakthikhqi aham baptisma ak pekhqi ce ikawmyihna a awmnaak kaw? Thlakthikhqi ce ama thawh tlaih mantaw, ikaw ham cekkhqi aham baptisma huh a ngaih? **30** Ningmih ingtaw, ikaw ham myngawi awh kqih awm khuihka ni huh uh? **31** Myngawi awh kai taw thi poepa nyng – kak kqawn ngaihnaak taw Koeinaakhqi – nangmih ak khanawh Khrh Jesu ningnih a Bawipa awh zoeksang na awm poepa nyng. **32** Thlanghqing mi ka ming tuk qu mantaw, ikaw hawhkhangaak ka huh kaw? Thlakthi a mami thawh voel awhtaw, “Khawngawi awh thih aham ni awm hawh dawngawh, aw unawh taw ni ai mai thaw voei uh” **33** Thlang ing ni sawi khqi thawlh hau kaw: Thlak leek am ing khawboek leek hqe hy ka ti koe noek” **34** Nami awm ham ang kawih vahih amyihna hu na voei tlaih unawh taw, koeh thawlh voel uh; Khwsa amah sim thlang vang awm uhyk ti ve – ve ve nangmih namik chahnaak bet aham kqawn law nyng. **35** Thlang pynoet ing, ikawmyihna tlak thi ce a thawh tlaih naak kaw? Ikawmyihna a pum ing nu a mi awm kaw?” tinawh ni doet mai kaw. **36** Qaw hyk ti! Na saw ce ama thih maa awhtaw am hqing saw kaw. **37** Na saw awh a thing ce am ling pahoei hy, caang mai awm ikawmyih am ci mai awm ak ui ni a saw hy. **38** Khwsa ing ni amah ing ak poeknaak amyihna a thing ce ang coeng sak hy, am ci boeih awh amah a thing amyihna a thing ce coeng sak boeih hy. **39** Pumsa ve awm myih qu boeih hy.

Thlanghqing a pumsa ak chang, qamsa a pumsa ak chang, pha ingkaw nga a pumsa ve ak chang bai ni. **40** Khan pumsa awm nawh dek pumsa awm awm hy; khan pumsa a boeimangaak ak chang na awm nawh dek pumsa a boeimangaak ak changna awm nawh pihla ingkaw aihchi a boeimangaak ak chang na awm hy; aihchi ingkaw aihchi a boeimangaak awm am myih hy. **42** Cemyihna ni tlakthi thawh tlaihnaak awm a awm hy. Ak thu thai pum ce saw na awm kawmsaw, amak thu thaina tho tlaih kaw; **43** huhsit soeihna saw na awm kawmsaw, ak boeimang soeihna tho tlaih kaw; **44** khawmdek pumsa na sawna awm kawmsaw, myihla pumsa na tho tlaih kaw. Khawmdek pumsa a awm amyihna, myihla pumsa awm awm hy. **45** Cemyihna, “Thlanghqing cyk Adam taw thlanghqing na awm hy,” tinawh qee hyt amyihna awm hy; Adam hu kyng taw hqjinggaak ak pekung myihla na awm hy. **46** Myihla pum am awm ma nawh, khawmdek pun ni a awm ma hy, cekoengawh ni myihla pum ce a awm hy. **47** Lammacyk thlanghqing taw dekvia na awm hy, thlanghqing a pakkhihnaak taw khanna kawna awm hy. **48** Khawmdek thlang taw, khawmdek a koena awm nawh; khan ben thlang taw, khanben thlangkhqi myihna awm uhy. **49** Khawmdek thlanghqing myi ni lawh lawt amyihna, khan benna kaw thlanghqing myi ce ni lo lawt kawm uh. **50** Koeinaakhqi, thisa ing Khwsa qam am pang thai hy, ak thu thai ing amak thu thai ce am pang thai lawt kaw, tive nik kqawn pek khqi nyng. **51** Ngai lah uh, awihyp nik kqawn law pek khqi vang nyng: ningnih boeih ve amni pi kawm uh, cehlai hlengna ni awm boeih kawm uh – **52** cehlai ni cu boeih na ak hukhit uut tum awi ang qeng lawawh mik hqip tawk lek awh hlengna ni awm boeih kawm uh; uut taw qeng law kaw, cawhtaw thlak thikhqi ce amak thu thaina thawh sakna awm kawm uh, ningnih awm hlengna ni awm kaw. **53** Ikawthi ak thu thai ce amak thu thai ing singdah na awm kawmsaw, ak thi thai ce amak thi thai ing singdah na awm hawh kaw. **54** Ak thu thai ce amak thu thai ing singdah na awm nawh, ak thi thai ce amak thi thai ing singdah na a awm awhtaw, vawhkwai awi qee hyt na ak awm: “Noengnaak ing thiinhaak dairi hawh hy,” ti awi ve soep hawh kaw. **55** Aw thiinhaak, na noengnaak hana nu a awm? Aw thiinhaak, hana aw nak chy a awm?” (Hadès g86) **56** Thiinhaak ak chy taw thawlhnak ni, thawlh ak thaawmnaak taw anaa awi ni. **57** Cehlai Khwsa venawh thangleeknaak awm seh! Ni Bawipa Jesu Khrh ak caming noengaak ce ningnih a venawh ni pek khqi hawh hy. **58** Cedawngawh, ka lungnaak koeinaakhqi, ak cak na dyi lah uh. Ikaw ingawm koeh ning tah sak khqi seh. Bawipa bi nami bi ve am zoe hy tice nami sim dawngawh, Bawipa bibi ce bi law quiqah lah uh.

16 Khawsak thlangkhqi caawinaak awh ve: Galatia thlangboel a venawh sai aham kak kqawn peek amyihna nangmih ingawm sai lawt lah uh. **2** Khawnghi khqih nyng awhkaw khawnghi lamma cyk awh, nangmih boeih ing tangka nami huh ak khuiawh kawng hoep unawh, cun uh, kai ka law awh ce tangka cawi koeh ngaih voel seh nyng. **3** Kai ka pha law awh ce, nangmih ing namik tyh thlang ce capat ing Jerusalem na nangmih a kudo ce thak sak bit kawng nyng. **4** Kai awm ceh aham ka awm awhtaw cekkhqi mi ci tet haih vang nyng. **5** Makedonia qam awhkawng nangmih a venna law kawng – Ikawthi Makedonia qam awhkawng ni ka ceh hly. **6** Nangmih a venawh a khoei taw awm hyn mai kawng, chicka khuiawh taw nangmih a venawh awm mai kawng nyng, cawhni nangmih ing hana ka ceh awh awm lam lak awh nami ni bawm hly thai hy. **7** Tuh taw nangmih huh aham ngaih hlan nyng saw nik kankhqi hun nyng: Bawipa ing tyng hy a ti awhtaw, nangmih a venawh awm hun kawng, tinawh ngaih-u nyng. **8** Cehlai Efisa khaw awh Pentikost nyn dy awm kawng nyng. **9** cawh

kai aham a phu ak awm bibi thainaak aham chawh awng qu hy, cehlai kai anik oelh awm thlang khawzah awm hy. **10** Timote a law awhtaw, nangmih a venawh a awm awh kqihnaak ama taaknaak aham ak nepna toek law uh, anih ingawm kai amyihna ni Bawipa bi ce a bi lawt hy. **11** U ingawn anih ce a do kaana awm aham am awm hy. Ka ven a pha lawnnaak tlaih aham ak nepna tyi law uh. Anih ingkaw Koeinaakhqi ce kai ing a nang ngaih-u kawng. **12** Ni koeinaa Apollo akawng: Koeinaakhqi mi nangmih a venna ceh aham anih ce kai ing kqawn pe nyng. Tuh awhtaw ceh aham am ngaih ngaih hyn hy, cehlai a hoengaak awh law bit kaw. **13** Ak nepna ngaihta uh; cangnaak awh ak cak na dyi uh; pacawng thin ak cak na awm unawh, namik tha awm sak uh. **14** Ik-oelh soepkep lungnaak ing sai law uh. **15** Stephana ipkhui khaw taw Akhaia qam khui awh ak cangnaak lannacyk na awm uhy tice sim uhyk ti, a mingmih taw thlakciimkhqi a bibinaak awh cak uhy. Koeinaakhqi, awi ni yn khqi nyng, **16** a mingmih amyihna bi ak bikhqi ce bawng unawh, bibi law uh. **17** Stephana, Fortunata ingkaw Akhaika mi ami pha law awh ce, nangmih a voet hlauhnaak ce a mingmih ing a ni bawm khqi dawngawh zeel nyng. **18** A mingmih ing kai ingkaw nangmih awm ni caih sak khqi hy. Vemih ak thlangkhqi taw ym aham awm hy. **19** Asia qam awhkaw thlangboelkhqi ing kut nim tu uhy. Akuila ingkaw Priskili ing Bawipa awh zeel doena kut nim tuk khqi hy, a im awh amik cun thlangboel ingawm kut niim tuk khqi hy. **20** Vawh amik awm koeinaakhqi boeih ing kut nim tuk khqi hy. Pynoet ingkaw pynoet ak ciimcaih mawagnaak ing mawk qu lah uh. **21** Kai, Paul ing kamah a kut qoe ing ve kut tunaak ca ve qee law nyng. **22** U ingawm Bawipa ce ama lungnaak awhtaw – anih ak khanawh seetnaak awm seh. Aw Bawipa, law lah! **23** Bawipa Jesu am qeenaa nangmih ak khanawh awm seh. **24** Khrilh Jesu awh nangmih boeih ni lung nak khqi nyng. Amen.

2 Korin

1 Khawsa kawngaihnaa amyihihna Jesu Khrith a ceityih na ak awm Paul ingkaw ningnih a naa Timote ing, Korin khaw awhkaw ak awm thlangboel ingkaw, Akhaia qam khuiawh ak awm thlakciuumkhqi boeih a venawh: 2 Ningmih a Pa Khawsa ven ingkaw Boei Jesu Khrith a ven awhkaw qeennaak ingkaw ngaihdingnaak awm seh. 3 Ningmih a Bawipa Jesu Khrith a Pa ingkaw ngaihdingnaak boeih a Pa Khawsa venawh thangleeknaak awm seh, 4 Khawsa venawh kawng ni huh ngaihdingnaak ingkaw kyinaak a hukhqi ce ngaihdingnaak awi nik kqawn peeknaak thai aham, kyinaak boeih awh amah ing ngaihdingnaak ce ni pehy. 5 Khrith ak khuikha a huuhaak ce ningnih a hqingnaak awh ang lawng lawt amyihihna, Khrith ak caming ngaihdingnaak awm lawng lawt hy. 6 Kawseet ngaihkyinaak ham ingkaw hulnaak ahamni; kaimih ka mingngaih a ding awhtaw, nangmih naming ngaih a dingnaak aham ingkaw hulhaak ahamni; ce ing ce kaimih ing ka ming yh kyinaak ce yh thainaak ni pek khqi hy. 7 Ningmih aham kaimih ang ngaih-unaak ve cak hy, kaimih ak khuikhanaak nami ni qup pyi adawngawh, kaimih a ngaihdingnaak awm ni qup pyi lawt kawm uk ti. 8 Koeinaakhqi, Asia qam awh kyinaak kami huh ce a sim kaana nami awh amah am ngaih unyng. Am kami yh thai dyna, khuikhanaak ce thihhlo dyna yh unyng. 9 Kak kawk khuiauh taw thiinaak hu hawh kawng unyng, tinawh poek unyng. Cehlai ka mimah awh ang hang kaana, thlakthi ak thawhkung Khawsa awh ka ming hangnaak thai ahamni vemyihna a awm. 10 Anih ing cemyih thihipit dyna awmnaak awhkawng ni loet sak khqi hy, haiben awh awm ni loet sak hyn bai kaw. Anih ing ni loet sak khqi bai kaw, tinawh ngaih-unaak ce ak khanawh ta unyng, 11 nangmih ing cykcahnaak ing ni bawm uhk ti. Thlang khawzah ak cykcahnaak ce am qeennaak awh thung na a awm a dawngawh kaimih ang zyngnaak thlang khawzah ing zeelnaakawi kqawn kawm uh. 12 Ve we kaimih a zoeksangnaak na awm hy: ka mimah awhkaw ak chee ak leek simnaak kawlung ing Khawsa ven awhkaw ciimcaihnaak, kawlung tang ing khawmdek awh, awipui na nangmih mi tuqunaak awh ak nep na khaw sa unyng tice ni sim sak hy. Khawmdek cyihnaak ing cemyihna bi am bi unyng saw Khawsa am qeennaak ak caming ni. 13 Ikawthi nangmih ing am nami noet thai ingkaw am naming zaksim ce am qee law nyng. 14 Kaimih ve ak kek am tai awm nami ning zaksim hawh dawngawh, Bawipa Jesu a nyn awh nangmih awh ka zoeksang qu aham a awm amyihihna, kaimih awh awm nangmih zoeksang qu kawm uk ti, tice ak soep cana zasim bit kawm uk ti tinawh ngaih-u unyng. 15 Ikawthi vawhkaw yip qunaak ka taak dawngawh, nangmih hih voei na nami hawikhangnaak ham, lamma na nangmih a venawh law aham cai nyng. 16 Makedonia na ka ceh awh nangmih hqip paohei aham cai nyng, cekcoengawh Makedonia awhkawng nangmih a venna law tlaih aham cai nyng, cawhkawng Judah dyna nangmih ing ni thak uh, ti nyng. 17 Vemyihna kang cai awh, a zangohep cana nu kang cai? Kang hqi ing, "Oeih, oeih" am awhtaw "Am, am" ka tinaak ham khawmdek phung na nu kang cai? 18 Cehlai Khawsa taw a yp a awm dawngawh, kaimih ak awithang ve nangmih a venawh, "Oeih" ingkaw "Am" amni. 19 Ikawthi Khawsa Capa, Jesu Khrith, nangmih a venawh kai, Sila ingkaw Timote mi ing kamik khypy ce, "Am" ingkaw "Oeih" amni, Cehlai amah awhtaw a poepa na "Oeih" na awm hy. 20 Ikawthi Khawsa ing iqyt awi taaknaak sai mai seiawm, Khrith awh cemyihkhqi boeih ce "Oeih" na awm hy. Anih ak caming Khawsa thangleeknaak aham ningnih ing "Amen" ni ti uhy. 21 Khawsa ing ni kaimih ingkaw nangmih ve Khrith awh ak cak na a ning dyih sak khqi. Anih ing situi ni syp khqi nawh, 22 amah a koena ni awmnaak tacik ce ni

deng sih khqi nawh, Ciim Myihla ce nipek khqi hy. 23 Nangmih hlyn aham ka ngaih awh ni Korin khaw na am kang hlat hy, tice anik sim pyikung na Khawsa ta nyng. 24 Nangmih ak cangnaak awh ak cak na naming dyih dawngawh, nangmih a zeelnaak ahamni nangmih mi bi ni bi haih uh hy.

2 Nangmih a venawh kawseet doena am ka lawnaak bai aham kaw poek nyng. 2 Nangmih kaw ka ni seet sak khqi mantaw, u ing nu kak kaw a ni zeel sak hly chang bai? 3 Kai anik zeel sak hly kawi nangmih a venna ka law awh kak kaw ama seetnaak aham vemyihna ca ni qee law pek khqi nyng. Nami ni zeel pyi thainaak aham, nangmih boeih ve ni yp nak khqi nyng. 4 Nangmih kaw seet sak aham am nawh ni lungnaak khqi soeih nyng tice nami simnaak thai aham, kawseet mikphli tui a baw doena ca ni pat lawk khqi nyng. 5 U ingawm kawseetnaak a sai awhtaw, kai anik kawseet sak anglakawh nangmih boeih ni anik kawseet sak khqi ngai hy – ak tlo soeih na koeh poek law aih uh. 6 Thlang khawzah ing a toel cemah anih aham khoek da hawh hy. 7 Ce anglakawtaw, ak kaw ama seetnaak aham anih ce queenkhaw ngai pe unawh ngaihdingnaak awi namik kqawn peek aham awm hy. 8 Cedawngawh, anih ce nami lungnaak tlaih ahamni thoeh lawk khqi nyng. 9 Ni hu awh ca ka ni qee law peek khqi taw syzkocnaak awh ak cak na naming dyih nawh ik-oeih a soep a hoi awh awi namik ngai hy voei nu tice sim ka ngaihnaak awh ni. 10 Nangmih ing queenkhaw ngai hawh nyng. Ik-oeih pynoet oet awh queenkhaw ngai aham awm nawh kai ing queenkhaw kang ngai hawh awhtaw – nangmih aham Khrith a mikhuh awh ni kai ing anih ce queenkhaw kang ngai hawh hy, 11 cetaw Setan ing ningnih awh a tym leek a huinhaak thai ahamni. Ikawthi anih ang cainaak ce ni sim boeih uh. 12 Khrith ak awithang leek khypyi aham Troas khaw na ka ceh awh, Bawipa ing chawh awng law hy tice hu nyng, 13 Cehlai ka naa Tita ce cawh am ka huh dawngawh kang ngaih am qep hy. Cedawngawh a mingmih ce kut tlaih nyng saw Madedonia na cet poy nyng. 14 Khrith awh noengaak ing ningnih anik sawikung ingkaw, amah a cyihnaak bawktui a hun hoei awh ak khyn sak kung, Khawsa venawh zeel nyng. 15 Ikawthi ningnih taw hulna ak awm huikhqi ingkaw ak plathamkhqi aham Khawsa venawh Khrith a bawktui na ni awm uh. 16 Pynoet a venawh thiinaak a baw na nik khqim unawh; pynoet a venawh taw hqingnaak a bawktui na ni awm uh. Ve a ik-oeih awh ve ang amyihihna u nu ak awm bawk hly thi? 17 Thlang khawzah amyihihna a awm kaana, Khawsak awi ve hawikhangnaak huinhaak a aham amni haw na uh. Vemyihna a awm kaana, Khawsa ing a tyih thlangkhqi amyihihna, Khawsa haiawh Khrith awh ce kawlung tang tang ing ningnih ing awi nik kqawn uh.

3 Ka mimah ingkaw ka mimah kamik kyih qu nu? Thlangkhqi amyihihna, nangmih a ven awhkaw aw, am awhtaw nangmih a ham aw kyihnaak cahawn kami ngaih nawh nu? 2 Nangmih taw, kaimih ak kawlung khuiawh qeena ak awm, thlang boeih ing sim nawh noet uh, kaimih a capat na awm uhk ti. 3 Nangmih taw, kaimih a bibinaak a phu, Khrith a ven awhkaw capat na awm uhk tie dangsak uhk ti, catui ing a qee am nawh ak hqing Khawsa ang Myihla ing qee na awm uhk ti, lungpei awhkaw qee am nawh thlanghqing kawlung awh ni qee na a awm. 4 Ve we Khrith ak caming Khawsa haiawh ningnih a ngaihdingnaak na awm hy. 5 Ka mimah ak caming ik-oeih ak awm sak amyihihna am poek unyng saw ak awm sakkung taw Khawsa ni. 6 Anih ing awikamnaak ak thai awh bibukungkhqi na ni tak khqi hy – cahawn bi amni bi unawh Myihla bi ce ni bi uhy; cahawn ingtaw him hlai hy, Myihla ingtaw hqingnaak pehy. 7 Lungpei awh qee na ak awm, thiinaak ak law pyikung cahawn ce Mosi ing a haw law awh, cawhkaw bibinaak awh a boemang haai ce Israelkhqi ing am toek thai uhy, cehlai

anih a haai ce thi hqui didi hy, **8** cawhtaw Myihla a bibinaak ak khqoet ikawmyihna a boeimangnaak kaw? **9** Thlang ak bo sak bibinaak zani a boeimang awhtaw, dyngnaak ak lawpyi bibinaak ak khqoet ce ikawmyihna nu a boeimangnaak hly! **10** Ak qgym awh boeimang na ak awm ce tuh awhkaw boeimangnaak ing a poe voelh hawh dawngawh am boeimang voel hy. **11** Ak thi hqui didi zani boeimangnaak ing a law awhtaw, a poepa na ak boeimang taw bau khqoet kawm man! **12** Cemyih ngaih-unaak ce ni taak dawngawh nim thin cak hy. **13** Mosi amyihna amni awm uh, Anih ingtaw a hai awhkaw vangnaak a thihi hqui voe voe awh Israelkhqi ing hu hau kawm uh, tinawh hi ing dah hy. **14** Cehlai amik kaw mawn hy, tuh dy na awikam qgym ami noet noet awh ami haai dah hyn uh. Hi ce hliip hlan uh, Khrilh doeng awh cawhkaw hi ce lawh thai na awm hy. **15** Mosi ak cauk ce ami noet awh tuh dy na ami lingbyi dah pek khy hyn hy. **16** Cehlai u awm Bawipa benna ak mang taw, cawhkaw hi ce hliip pe hawh hy. **17** Bawipa taw Myihla na awm hy, Bawipa Myihla a awmnaak hoei awh, ngaihdingnaak ce awm hy. **18** Ningmih haai dahnaak amak awmkhqi venawh Bawipa a boeimangnaak ce vang hy, amah mi ning myih qu voe voe unawh Myihla na ak awm, Bawipa a ven awhkaw Boeimangnaak ing ni be voe voe uh.

4 Tuh ni awmnaak khawmdek im ve hqe na awm seiawm, kut ing ama sak, Khawsa ing a taak law khawk khan awh kumquii Khawsam qeennaak ak camping ve a bibi ve ni taak dawngawh, nik kaw am boet hy. **2** Ang hyp ik-oeih chahnaak ak awmkhqi ce khang unawh; thai a latnaak ce am haw na unyng, Khawsak awi awm ak kawi na ap kqawn unyng. Awitak ce haai benna ta unyng saw thlang boeih ak kaw tlaak na Khawsa haiawh ka mimah ingkaw ka mimah pe qu unyng. **3** Kaimih ak awithang leek kqawn ve hliip a dah na a awm awhtaw, ak plalthamkhqi hamni hlipdah na a awm. **4** Khawsa myihliip na ak awm, Khrilh boeimangnaak awithang leek a vangnaak ce a mami huhnaak thai aham tuh tolok a tym awhkaw khawsa ing cangnaak amak ta khawmdek **thlangkhqi** ak kawlung mik ce hyp sak hawh hy. (**aiōn g165**) **5** Ka mimah poek awh awi awi ap kqawn unyng saw, Khrilh taw Boei na awm hy tice ni ka mik khypyi hy, Jesu Khrilh awh kaimih taw nangmih a tamnaa na awm unyng. **6** Ikawthi, "Thannaak khuiawh vangnaak ve vang seh," ak tung Khawsa ing amah Khawsa boeimang a cyihnaak vangnaak ce Khrilh a haiawh peek aham vangnaak ce ningnih ak kawlung khuiawh vang sak hy. **7** Vemyihkhqi boeih noeng thainaak thaawmmaak ve ka mimah a koe am nawn Khawsa ven awhkaw ni, tice dang sak aham vawhkaw khawh ve khawmdek am awh ni ta uh. **8** Han ben ben awm kyinaak ni hu hlai uh amni tamtaw uh; ngaihkyi ing ni awm hlai uh nyik kaw am boet hy; **9** thekhanaak ni zawk hlai uh cehtaak hyt na amni awm uh; hqe na ni awm hlai uh amni see uh. **10** Jesu a hqingnaak ce ningnih a pum awh ang dang thainaak ham, Jesu a thihnaak ce ningnih a pum awh ni khyn poepa uh. **11** Ikawthi ak thi thai ningnih a pum awh amah a hqingnaak ce ang dang thainaak aham, ningnih ak hqingkhqi ve Jesu Khrilh aham thihnaak awh peek na ni awm uh. **12** Cedawngawh thihnaak ing kaimih a pum awh bibi hlai hy, nangmih awh hqingnaak ing bibi hy. **13** Cangna nyng: cedawngawh kqawn nyng, tinawh qee hyt awm hy. Cemyih cangnaak kawlung ing kaimih ingawm cangna unyng saw kqawn unyng, **14** thihnaak awhkawng Bawipa Jesu ak thawhkung ing kaimih awm Jesu ingqawi nim thawh hain kawmsaw nangmih a haiawh ning diyh sak kaw, tice ni sim uh. **15** Thlang a venawh ak awm khqoet khqoet am qeennaak ak camping zeelnaak ce ak be ngen na lawng nawn, Khawsa boeimangnaak na a awm thainaak ham vemyihkhqi boeih ve nangmih a hawhkhangan aham awm hy. **16** Cedawngawh ka mik tha am se hy. Pumsa

awhtaw khuiawh hlai unyng, kamik kawlung khuiawh taw hypoet coengawh hypoet ak thai na awm hqui hqui unyng. **17** Ikawthi ak zang ca ing a kheoh tloek awhkaw khuihanaak ve kami huh hly kawi kumqui boeimangnaak ing ka nyhtah awh kawna awm am awm hy. (**aiōnios g166**) **18** Cedawngawh huh nawn ik-oeih ce am toek unyng saw, amni huh ik-oeih ce ni kami toek hy. Huh nawn ik-oeih taw a kheoh tloek ca awhkaw hamni, cehlai amni huh ik-oeih taw kumqui dy na cak hy. (**aiōnios g166**)

5 Tuh ni awmnaak khawmdek im ve hqe na awm mai sei awm, kut ing amni sak, Khawsa ing a taak law khawk khan awh kumqui im ni ta uh, tice ni sim uh. (**aiōnios g166**) **2** Tuh khawk khan khawsaknaak amyihna thoeihcam qu hawh ahamni ngaih dawngawh, ning ko uh, **3** cawhkaw awmnaak ing ning thoeihcam qu hawh mantaw, ak pum a zal na amni awm voel kawm uh. **4** Cehlai ve khawmdek im khuiawh ni awm hui awh ve, khawk khan awmnaak ing thoeihcam ahamni ngaih hawh dawngawh ning ko unawh phyihqih ni phyi uh, cawhtaw hqingnaak ing ak see thai ve daih hawh kaw. **5** Ve cainaak awh Khawsa ing ningnih ve ni sai khqi nawn ningnih a venawh ak law hly kawi avi taaknaak aham Myihla ce ta law hy. **6** Cedawngawh ve pumsa ipkhui awh ni awm ak khuiawh taw Bawipa ing ak hla na ni awm uh yice ak caihna ni sim poepa uh. **7** Huh nawn ing amni hqing unawh, cangnaak ing ni ni hqing uh. **8** Cedawngawh ak caih na ni sim uh, ve pumsa ing ak hla na ni awm hawh Bawipa ing im awh awm hahih ni ni ngaih hawh hy. **9** Cedawngawh ve khawmdek pumsa im awh ni awm awh awm ak hla na ni awm awh awm, ve ve amah a zeelnaak aham cainaak na ni ta uh. **10** Ikawthi ningnih boeih ve Khrilh a awidengnaak ngawihdoelh haiawh ning dang boeih kawm uh, ve khawmdek pumsa awh ni awm awh, ak che ak leek ni sainaak amyihna, ni sai phu ce ni hu boeih kawm uh. **11** Bawipa kqihnaak ve kaw hy voei nu, tice ka mi sim dawngawh, thlangkhqi ce zoek unyng. Khawsa haiawh sim na awm unyng, nangmih a simnaak awh awm sim na awm hy voei unyng tinawh ngaih-u unyng. **12** Nangmih a venawh ka mimah a leeknaak kqawn aham am cai hlai unyng, kawlung khuiawh ak awm ik-oeih anglakawh mik huh nawn awh ak oek qukhqi ce namih hlatnaak thai aham ingkaw kaimih awh nangmih naming oek qunaak aham a tym leek ni pek khqi nyng. **13** Kaimih ve kami qaw mantaw, Khawsa ahamni kami qaw hy; kami ciyh awhtaw nangmih ahamni. **14** Ikawthi ningnih ve Khrilh a lungnaak ing ni tyi khqi ngah ngah hy, thlang boeih ve ni thi uh. **15** Ak hqingkhqi boeih ing nimah aham a hqing voel kaana a mingmih aham thi nawh ak tho tlaih aham ami hqingnaak aham, anih ce thlang boeih aham thi hy. **16** Cedawngawh tuh awhkawng taw u awm khawmdek poeknaak ing am toek voel unyng. Ak kqym awhtaw Khrilh ce cemyihna anak poek hlai unyng, tuh taw cemyihna am poek voel unyng. **17** Cedawngawh, u awm Khrilh ak khuiawh a awm hawh awhtaw, anih taw sai thai na awm hawh hy; ak kqym boeih ce khum hawh nawn, ngaih lah, ak thai ce law hawh hy! **18** Vemyihkhqi boeih ve Khawsa ven awhkawng law hy, Khrilh ak camping ningnih ce amah ingqawi tuqunaak sai law nawn tuqunaak bibi ce ningnih a venawh ni pek khqi hy. **19** thlanghqing a thawlhaak ce ikawna awm a sui peek kaana, Khawsa ing Khrilh ak camping khawmdek ingqawi qeepnaak ce sai hy. Ningmih a venawh qeepnaak awithang ce ni pek khqi hawh hy. **20** Cedawngawh, ningnih hawnaak ing Khawsa ing bi a bi dawngawh ningnih taw Khrilh ang dyihthing na ni awm uh. Khrilh ang zyng na nangmih a venawh ni thoeih khqi nyng: Khawsa ingqawi tuhkai qu lah uh. **21** Anih ak camping ningnih thlakdying na ni awmnaak thai aham, thawlhaak amak ta thlang ce Khawsa ing ningnih aham thlakthawlh na sai law hy.

6 Khawsa bi ak bi pyikung na ni awm dawngawh Khawsa qeenaaak ce a zoe na am nami huhnaak ahamni thoeh lawk khqi nyng. 2 "Nang ce leeknaa a tym awh ning ngai nung saw, hulnaak nyn awh nik pyi nyng," tinawh kqawn hy. Ka nik kqawn peek khqi, tuh ve a tym leekna awm nawh, tuh ve hulnaak nyn na awm hy. 3 Kaimih a bibi ve tlhang ak coet na a awmnaak ham, u a lam awm am kang pe unyng. 4 Khawsa tyihzawih na kami awm dawngawh ik-oeih soepkep awh ak nep cana bibi unyng: khawteh na yhnaak awh; kyinaak awh, kawseet khuikhua huhnaak awh; 5 tlhang a vyknaak awh, thawngim tlaaknaak ingkaw awipungnaak awh; tha tlawh na bibinaak awh, ihmyh na awmnaak ingkaw buhuy anchyp na awmnaak awh; 6 ciimcaihnaak awh, zaksim ciimcaihnaak awh, kawdungnaak ingkaw qeenaaak awh; Ciim Myihla ingkaw lungnaak tang tang awh; 7 awitak kqawnnaak ingkaw Khawsa a thaawmnaak awh; cawng tang benawh dyngnaak phuqua ing; 8 zoeksangnaak ingkaw thekhanaak awh, tlhang ing ak che ak leek na kqawnnaak aw; thymnaak awh, qaii awi ak kqawn amyihna poeknaak awh; 9 sim hlai hy amak sim amyihna awmnaak awh; ak thi amyihna ni ta hlai uhy hqingnaak awh; ni vyk hlai uhy, amni him uhy; 10 kawseet ing awm hlai unyng, zeel poe unyng; ikaw awm am ta hlai unyng, a hoei ta unyng. 11 Korin thlangkhqi aw, nangmih a venawh ngaihding na awi kqawn law nyng, nangmih a venawh kawlung ak kau soehina awng law unyng. 12 Nangmih aham thin tlawhnaak ve am hlawh hlai unyng, nangmih ingtaw hlawh law uhyt ti. 13 Thawnaak nepna a awmnaak aham – ka cakhqi amyihna awi nik kqawn law pek khqi nyng – nangmih ingawm kawlung ak kau na awng lah uh. 14 Amak cangnaak thlangkhqi mi kutoet na hawngkawl koeh aawi hahih uh; seetnaak ingkaw leeknaak ing ikaw qupnaak ani taak? Am awhtaw, vangnaak ingkaw thannaak ing ikaw qupnaak ani taak? 15 Khrilh ingkaw Belial anglakawh ikaw aning qoepquinaka a awm? Ak cangnaak tlhang ingkaw amak cangnaak tlhang anglakawh ikaw qup hahnaak taak? 16 Khawsa a bawkim ingkaw myiqawl bawkim ing ikaw qoepquinaka taak? Ikawthi ningnih taw ak hqing Khawsa a bawkim na ni awm uhy. Khawsa ing: "A mingmih mi awm hahih kawng nyng, a mingmih mi pla hahih kawng nyng, a mingmih a Khawsa na awm kawng nyng saw, a mingmih ce kak tlhang na awm kawm uh," tinawh kqawn hawh hy. 17 Cedawngawh a mingmih ce cehta unawh ak chang na awm uh, tinawh Bawipa ing tihy. Amak ciimcaihkhqi ce koeh bi uh, cawh ni kai ing ka ni do hly khqi hy." 18 Nangmih a Pa na awm kawng nyng saw, nangmih taw capa ingkaw canu na awm kawm uk ti, tinawh boemang Bawipa ing kqawn hy."

7 Ka pyikhqi, vawhkaw awikennaak ve a awm hawh adawngawh, pum ingkaw Myihla amak ciimcaih sak khqi boeih ce ciimcaih sak u sih. Khawsa kqihchahnaak ing ciimcaihnaak soep ing awm u sih. 2 Namik kawlung khuiawh kaimih aham hun ta law uh. U ak khanawh awm ak che am sai unyng, u awm am seet sak unyng, u awm amak tyng na am haw na unyng. 3 Nangmih bo sak aham ve am haw na unyng. Nangmih bo sak aham ve ak awi ap kqawn unyng; nangmih mi hqing hahih thih hahih aham kaimih ak kawlung khuiawh hun ta uhyt ti tice nik kqawn law pek khqi hawh nyng. 4 Nangmih ve ni ypnak khqi nyng; cedawngawh nangmih awh ce oekqu nyng. A kah tha awm hy; kyinaak soep ka huhnaak awh ka zeelnaak ing be nyng. 5 Makedonia qamma kami law awh, vawhkaw kami pum ing ngaiqepnaak qoe am ta nawh kyinaak ing awm poepa unyng. Voei avang qaaltuknaak awm nawh ak khui benawh kqihnaak ing awm unyng. 6 Cehlai ak kaikhyt na ak awmkhqi ngaih ak ding sakkung Khawsa ing Tita a tyih lawnaak ak caming ngaihdingnaak ce ni pek khqi hy, 7 Anih a lawnaak ak caming am doeng am nawh, nami awmdamnaak khqi, naming kqaangnaak

khqi, kak khanawh nami leeknaak anim thennaak khqi ingkaw nangmih awhkaw ngaihqepnaak ing awm ka ngai ni qep sak hy. 8 Ca ka ni pat law khqi awh nangmih kaw ni seet sak khqi mai nyng seiawm am zut nyng. Am zut thai nyng – kak ca ing namik kaw ni seet sak khqi hy tice sim nyng, cehlai kawlhkah mai awh ni. 9 Cehlai tuh zeel nyng, namik kaw ka ni seet sak khqi awh am nawh, namik kawseetnaak ing a ning zut sak khqi awh ni. Khawsa ang cainaak amyihna namik kaw se hy, kaimih ing nami tlawhnaak aham ikaw awm am sai unyng. 10 Khawsa kawngaihna kawseetnaak ing hulnaak a hamna zythaak pha sak nawh, cece nik kawseet hly kawi am ni. Khawmdek kawseetnaak ingtaw thihihnaak pha sak hy. 11 Khawsa ak kawngaihna kawseetnaak ing nangmih ikawmyihna a ni awm sak khqi tice toek lauh: them am kqawnnaak, seet am sainaak, thawlh sai sawhnaak ingkaw thawlh kqihnaak, thahlynaak, ak thawlh toel thainaak khqi ce ni taak sak khqi hy. 12 Cedawngawh nangmih a venawh ca qee law hiae nyng, tlhang pynoet a thawlhnaka, am awhtaw, thawlhnaka ak saikhqi awh am nawh, Khawsa haiawh nangmih ing kaimih ak awi ngai uhyt ti tice nami huh thainaak ahamni. 13 Vemyihkhqi boeih awh ve kamik tha na awm hy. Kaimih ak thaawmnaak coengawh, Tita a zeelnaak ce awm kami huh awh kamik kaw zeel khqoet bai hy, kawthi nangmih boeih ing anih ce ak kawlung caih sak pang uhyt ti. 14 Anih a venawh nangmih ce ni zoeksang khqi hawh nyng, nangmih ing kak kaw zeel law sak uhyt ti. Nangmih a venawh kak kqawn law hawh amyihna ik-oeih boeih ce thym hy, cedawngawh Tita a venawh nangmih ka ni zoeksangnaak khqi awm thym hy. 15 Nangmih ing awi ngai uhyt ti tice a huh awh nangmih ing anih ce kqjh ingkaw thyn doena nami do dawngawh nangmih a ni lungnaak khqi ce sang khqoet bai hy. 16 Tuh taw nangmih ce ka ni ypnak khqi hawh dawngawh ka zeelnaak soep hawh hy.

8 Koeinaakhqi tuh, Makedonia qam awhkaw tlhangboelkhqi venawh Khawsa ing a peek qeenaaak ce nami sim aham ngaih nyng. 2 Sykzoeknaak sang hlai uhy, zeelnaak ing be ngen unawh, khawdeng hahqah soeih hlai uhy, ami khawboe leek hy. 3 Ami peek thai khuiawh pe uhy, a mami peek thainaak a voel dyna pe uhy. A mimah qoe qoe ing, 4 thlakciimkhqi bi bi pek ahamna ka venawh thoeh law uhy. 5 Kaimih ing kamik poeknaak amyihna am awm uhy, Bawipa venawh lamma na a mimah ingkaw a mimah aming peek qu coengawh Khawsa ngaihnaak hqut doena kaimih a venawh awm pe qu bai uhy. 6 Cedawngawh nangmih awh maa awhkawng a sai law hawh adawngawh ve qeenaaak awm nangmih avenawh a sai pahoei hamna Tita ce qeenaaak thoeh nyng. 7 Cawhce, a soep – cangnaak awh, awihkqawn thoemnaak awh, simnaak benawh, thahlynaak kawi boeih awh, ani lungnaak khqi awh – nami huh amyihna ce qeenaaak ce nami huh naak thai ahamna tha yw law uh. 8 Nangmih awi amni pek khqi nyng, cehlai coet amak kap lungnaak ce tlhang a venawh ypaawm na awmnaak ing nyhtah aham ngaih nyng. 9 Ningmih Bawipa Jesu Khrilh am qeenaaak ce sim uhyt ti, anih ce Boei hlai hy nangmih ing anih a khawdengnaak ak caming nami boeinaak aham anih ce khawdeng na coeng hy. 10 Ve a kawnglam awh ve nangmih aham ak leek khyt ce kqawn law vang nyng: Ni hukum awh nangmih ve them ak pe cyk doeng kaana cemiyh na sai ham ak ngaih cyk na awm awm uhyt ti. 11 Cawhkaw bibi ce ang coeng dy na bi uh, cawh ni na mimah a sainaak amyihna nami ngaihnaak ing ang qoep hly. 12 Thlanghinqing pek ngaihnaak kawlung ing a taak soeih awh am nawh a taak a myih lawtna a peek ve ym ham awm hawh hy. 13 Thlangkhqi ham hawihkhang naak na a awm awh nangmih aham phyihqih na a awm aham am ngaih unyng, ang myih qip na awm ahamni kami ngaih hy. 14 Tuh ve nangmih a thempeek ing a mingmih a voethluhnaak ce dawm kaw, cawh ni nangmih nami

voethlauh awh a mingmih ing a mini dawm hly lawt hy. Cawthaw ang myih pin na awm kawm uk ti: **15** Ak cun ingawm am ta kyng nawk, a khoechca ak cun ingawm a khoechca am tahi," tinawh a qee amyihna. **16** Nangmih a venawh ngaihnaak ka taak lawt amyihna nangmih a venawh ngaihnaak kawlung Tita a venawh ak pekung Khawsa venawh zeelnaakawi qkawn nyng. **17** Kaimih a thoehnaak ce a do coengawh, amah a ngaihnaak kawlung qoe ing nangmih a venna law aham ngaih hy. **18** Anih ing ak law hah aham awithang leek awh thlangboel ce tyi law hah kawng unyng. **19** Cek coeng bai awh, kutdo ce kami khyn awh kaimih anik bawng aham anih ce thlangboel ing tyk bai hy, cawhkaw ik-oeih kutpeek bibinaak taw Bawipa amah zoeksangaak ham ingkaw thlang dawmhlahi aham ngaihnaak ta unyng tice dang saknaak ahamni. **20** Vawhkaw ngaihding na ik-oeih kutpeek bibinaak awh thlang ing a coet aham am ngaih unyng. **21** Ikawthi ak dyng ik-oeih taw Bawipa mik huh doeng am nawh thlanghqing mik huh awh awm sai aham tha lo unyng. **22** Cek coeng bai awh, ik-oeih a boe awh thahly na ak awm, tuh ak khqoet awh awm nangmih ni ypnak khqi nawh tha ak hly soeih kaimih a naa ce tyi law kawng unyng. **23** Tita ve nangmih anglakawh, kai bi a nik bi pyikung ingkaw kai anik pyikung na awm hy; koeinaakhqi taw thlangboelkhqi a dyihting na awm unawh Khrirh ak zoeksangkungkhqi na awm uhy. **24** Cedawngawh thlangboel ing a huh thainaak aham, ve ak thlangkhqi venawh nangmih a lungnaak ingkaw nangmih awh kaimih ang oek qunaak ce dang sak lah uh.

9 Thlakciimkhqi venawh bi ka binaak kawng ve nangmih a venawh qee aham am ngaih hy. **2** Ikawthi nangmih ing thlang bawm aham nami ngaihnaak ce sim nyng, Makedonia thlangkhqi venawh ve ak camawh ve oek qu hawh nyng, ni hu kum awhkawng Akhaia qam khuiawh ak awm nangmih ingtaw peek aham ta oepchoeo uhyti; nangmih ak thahlynaak ing khawzah taw peek lawt aham ngaih sak hy. **3** Nangmih awh kang oek qunaak ve a hqawng na am awm nawk, nangmih a oepchoeo na nami awmnaak aham koeinaakhqi ce tyi law kawng, kak qkawn hawh amyihna sai kawm uk ti, tinawh ngaih-unyng. **4** Makedonia thlang u awm a law awh nangmih oepchoeo na am nami awm ce a huh mai mantaw nangmih akawng kaw awm qkawn na ama awm dawngawh nangmih ka ni ypnak khqi soeih awh ce chah phyi hau kawng unyng. **5** Ce dawgawh koeinaakhqi ing nangmih ce oepchoeo na a ni hqipnaak khqi thai aham qkawn pe nawh khawboe leeknaak ing peek aham awi ami taak kutdo ce qoekbah aham ak qkawn peek ngaih kaw, tinawh poek nyng. Cawhni khawboe cawwnaak ing ik-oeih nami peek ce a oepchoeo na ana awm hly, thlang ing a peek sak ngah ngah amyihna am awm kaw. **6** Ve ve sim lah uh: A khoech ca ak saw ingtaw a khoech ca aat lawt kaw, khawzah ak saw taw khawzah aat lawt kaw. **7** Thlang boeih ing a haai doena koeh pe seitaw, am pek awh amak coengna ngaih nawh a peek kana, amik kawhuiawh a awm amyihna pe useh; Khawsa ingtaw kawzeel doena ak pee ak thlang ni a lungnaak hy. **8** Khawsa ing am qeenaaak boeih ing nang ce ni vyih thai hy, ik-oeih boeih awh ityk awh awm, na ngoenaak boeih ce anih ing tahi, cedawngawh them leek sainaak boeih awh khawzah ta kawp ti. **9** A themkhqi ce khawdeng hahqahkhqi pek khqi awh; a dyngnaak taw kumqui dyna cak hy," tinawh qee cemiyihna. (aïon g165) **10** Camci ak sawkung a venawh camci ak pekung ingkaw ai hly kawi phaihpi ak pekung ing cang nam cun ce pung law sak kawmsaw dyngnaak cang na ah ce pung a tai sak kaw. **11** Them peeknaak awh nami khawboe a leeknaak aham nangmih ce ni boei sak khqi kaw, nangmih a khawboe leeknaak ce kaimih a venawh kawng Khawsa thangleeknaak na awm kaw. **12** Vawhkaw bi nami binaak ve Khawsa thlangkhqi ak

voet ak hlauhkhqi bawmnaak ham doeng amni, Khawsa venawh zeelnaak ak ngen pawk nang dang saknaak na awm awm bai hy. **13** Vawhkaw bibinaak ing na mimah ingkaw na mimah ang dyih hun naming dang sak hawh amyihna, Khrirh ak awithang leek awi ngainaak ing nangmih ing cangnaak naming dang saknaak awh, cekcoengawh nangmih a khawboe cawwnaak ce cekkhqi ingkaw thlang boeih a venawh naming dang saknaak ak caming thlangkhqi ing Khawsa ce kyihcah kawm uh. **14** Nangmih aham amik cykcahnaak ak caming, Khawsa qeenaaak khawzah soeih ce nangmih a venawh peek na a awm hawh dawngawh cekkhqi ak kawlung ce nangmih a venawh cet kaw. **15** Amnik qkawn noeng kutdo them peek ak camawh Khawsa venna thangleeknaak awm seh!

10 Kai Paul, naming lakawh thlang mik huhawh kawdungnaak ing ak awm, lak a hla awh nangmih anik poekkhqi ing, Khrirh ak kawdawnaak ingkaw khawboe leeknaak ing ni thoeh khqi nyng; **2** Ve khawmdek phung amyihna khaw ak sa myihna ak poekkhqi venawh thincaknaak ka taak amyihna nangmih a venawh am ka lawnaak ham nangmih a venawh qeenaaak thoeh law nyng. **3** Pumsa ing awm pai hlai unyng, khawmdek pumsa qaal amyihna qaal am tuk unyng. **4** kaimih a phuquaakhyi ve ve khawmdek phuquaakhyi amni. Kaimih a phuquaas taw vawngpui qal ahq he thai Khawsa thaawmnaak veni. **5** Oelhnaakkhyi ingkaw Khawsa a ciyhaak ak oelh thainaak, poeknaakkhyi boeih boeih ce Khrirh ak awi ngai aham sai unyng. **6** Nangmih ak awi ngainaak ce a soep awh, awi amak ngai a sainaakkhyi ngainaak ce a soep awh, awi amak ngai a sainaakkhyi boeih boeih ce toel aham a oepchoeo na awmhly unyng. **7** Nangmih ingtaw ak khan ik-oeih doeng ce toek uhyti. U ingawm Khrirh a koena awm nyng tice a sim ceet awhtaw ahih amyihna ni kaimih awm Khrirh a koena kami awm lawt hy tice ak poek tlaih aham awm hy. **8** Nangmih ce hu benna ak dawh lat kaana hai benna taai sak aham Bawipa ing saithainaak ani peekkhqi a dawngawh kang oek qu awhtaw, ap chak nyng. **9** Ka capat ing nangmih kqih sak aham am ngaih nyng. **10** Thlang pynoet ing, Anih a capatkhqi kqih nawh ak tha awm hlai hy, ak thlang pum ingtaw thlang awm am noeng nawh ak awih qkawnkhqi awm kawna am awm hy," ti uhy. **11** Cemiyih ak thlang ing veve sim seh nyng, nami venawh am ka awm awh capat awh awina ka awm amyihna nami venawh ka awm awhawm bibinaak ing awm kawng nyng. **12** Amah ingkaw amah ak zoeksang qukhqi mi nyhtah aham am ngaih unyng. Cekkhqi ing a mimah ingkaw a mimah ce ami nyhtah awh, am cyi uhy. **13** Cehlai kaimih taw, kaming oek qu hly kawi a voel na am oek qu kawng unyng, Khawsa ing ani peek bibinaak ak khui doeng ni ka ming oek qu hly, cawhkaw bibinaak ak khuiawh nangmih awm paa uhyti. **14** Khawteh na am oek qu hly unyng, nangmih a venawh am kami law mantaw oek qu hly mai hlai unyng, kawth nangmih a venawh ang coeng thai khuina Khrirh ak awithang leek ce ning zaak sak khqi hawh nyng. **15** Thlang a bibinaak ak khanawh am oek qu unyng. Kaimih ang ngaih-unaak taw, nangmih ak cangnaak ce taai nawh, kaimih a bibinaak awm nangmih anglakawh a kunaak thai hamni, **16** cawhni nangmih a awmnaak a kil dyna awithang leek ve kamik khypyi hly thai hy. Thlak chang a bibinaak ce awh oek qu aham am ngaih unyng. **17** Cehlai, Ak oek qu ingtaw Bawipa awh oek qu seh. **18** Ikawthi a awm amah ingkaw amah ak zoeksang qu thlang ce do na am awm nawh, Bawipa ing a zoeksang thlang ni ami do hy.

11 Ka qawnaak bet awh qeenkhaw ning ngaih pe thai kawm uk ti, tinawh ngaih-u nyng; qeenkhaw awm ning ngaih hawh uhyti. **2** Nangmih ve Khawsa a tlaiseet na ing ni tlaiseet na sih khqi nyng. Nangmih ce nulak cyp amyihna vaa pynoet doeng a venawh kami peek thainaak khqi aham Khrirh, ceni awi ka ni

taak sak khqi hy. 3 Cehlai Evi ce khqui ing a thainaak amyihna, nangmih awm ikawmyih nanu kawlung ciimcaih naak ing Khrih a venawh nami peek qunaak awhkawng pleng hau kawm uk ti, tice kqih nyng. 4 Thlang pynoet law nawh kaimih ing kamik khypyi Jesu kaana ak chang Jesu akawng ce ak khy law pyi mantaw, am awhtaw tuh awhkaw nami huh Myihla am nawh ak chang Myihla nami huh mai mantaw, am awhtaw nami do ce awithang leek am nawh ak chang awithang leek ce nami do mantaw, ce ak thlang ce ak zoei cana queenkaw ngai mai kawm uk ti. 5 Cehlai ceityih ak baukhqi, anglakawh ak nem na am ngai qunyng. 6 Awihkgawn thainaak benawh cawmnaak am ta nyng seiawm, cyihnaak ce ta nyng. Ve ve nangmih a venawh ak caih cana dang law sak hawh nyng. 7 Nangmih zoeksang aham kamah ingkaw kamah ak kaina awm doena Khawsa awithang leek ce a zoena kak khy law pyi dawngawh ka thawlhw nawh nu? 8 Nangmih a venawh bi ka binaak thai aham thlangboel ak changkhqi ven awhkaw bawmnaak ce ka qawt peekna awm hawh hy. 9 Nangmih a venawh awm nawh kang sytnaak a awm awh, u a phyihqih na awm am awm nyng, Makedonia benna kawng ak law koeinaakhqi ing ka ngaihnaakkhqi ce ni pe uhy. Nangmih a phyihqih na am ka awmnaak aham a soep awh yh qunyng, vemyihna awm hyn bai kawng. 10 Khrih ak awitak ce kak khuiawh a awm dawngawh, Akhaia qam khuiawh ak awmkhqi ing kai ami ni oequesnaak ce ityk awh awm ap phah kawm uh. 11 Ikawthi aw? Nangmih am ka ni lung naak khqi awh nu? Ni lung nak khqi nyng tice Khawsa ing sim hy! 12 Ik-oehi sainaakkhqi awh kaimih ing amyihna poek unawh ak oek qu thlangkhqi a tym leek ak ngaih thlangkhqi ce a kung awhkawng ka boek thainaak aham tuh awhkaw ka sai ve sai poe hyn kawng nyng. 13 Ikawthi cemiyih ak thlangkhqi taw ceityih qawlkhqi ni, bibikung thlak thaikhqi, Khrih a ceityih amyihna amik sa qukhqi ni. 14 Cedawngawh kawpoek kyi aham am awm hy, Setan ing zani khan ceityih ak vang amyihna sa qu hy. 15 Cedawngawh, a tyihzawikhqi ing thlakdying amyihna ang sa qu awh ngaihkyi aham am awm hy. A mimah bibinaak amyihna ni a dytnaak ce awm lawt bit kaw. 16 Kqawn tlaih bai nyng: U ingawm thlak qawna koeh ning ngai seh. Nami ni ngai vik awhtaw thlakqaw amyihna ni do mai uh, oek qunaak khqoet bet lah vang. 17 Kamah poek kang oek qunaak awh Bawipa a oek qu na ap kqawn nyng, thlakqaw amyihna ni kak kqawn. 18 Thlang khawzah ing khawmdek phung amyihna aming oek qu boehi dawngawh, kai awm oek qu lawt kawng nyng. 19 Nangmih taw thlakcyi na nami awm dawngawh thlakqawkhqi ce zeel doena queenkaw ngai thai uhyt ti! 20 Nangmih tamnaa na anik saikhqi ingkaw nangmih amak thym na anik hawnaakkhqi, nangmih a venawh kawng hawihkhangnaak ak lokhqi, hai na cet nawh nangmih nami haai awh anik beikhqi zani queenkaw ngai uhyt ti. 21 Chah doena cemiyih ben awhtaw thlakqaw amyihna ni kak kqawn – kai awm oekqu thai nyng. 22 Cekkhqi ce Hebrewi thlangkhqi aw? Kai awm Hebrewi thlang ni. Cekkhqi ce Israelkhqi aw? Kai awm Israel thlang ni. Cekkhqi ce Abraham cadilkhqi aw? Kai awm Abraham a cadil na awm nyng. 23 Cekkhqi ce Khrih a bibikungkhqi aw? (Ciyinhaak ing ve ve ap kqawn voel nyng.) Kai awm awm khqoet nyng. Cekkhqi anglakawh bi khawzah bik khqoet nyng, thawngim na tla tlaih tlaih nyng, ak tlo soeih na quiboeng ing ni vyk uhy, thihi aham ni teng uhy. 24 Phlikip a cupnaak aham thekoet ca ak ngoe dyna Judakhqi ing ni vyk uhy. 25 thingboeng ing thum voei ni vyk uhy, lung ing hyphoet nik khawng uhy, tuicunli awh lawng ing thum voei ni khup phlet nawh, tuicunli awh hypoet ingkaw thanoet awm nyng, 26 khawlawng na cet khing nyng. Tuinu lawngcakhqi awh kyinaak hu soeih nyng, quk-aikhqi kut awh kyinaak hu nyng, ka pilnam tulilikqi venawh kawng kyinaakkhqi hu nyng saw, Gentelkhqi venawh kawng awm kyinaak hu bai nyng;

hawk bau awh kyinaak hu nyng saw, vangcakhqi awh kyinaak hu nyng, tuicunli awh kyinaak hu nyng, amak thym koeinaakhqi venawh kawng kyinaak hu bai nyng. 27 A ih kana bibi nyng saw khuikhya nyng, phoencawih tuingaih doena awm hoeih hoeih nyng; hik kaana khawk ding awh khuikhya nyng. 28 Cekkhqi boehi coengawh, myngawi thlangboelkhqi ce poek hyn bai nyng. 29 Thlang ak tha a seet awh kai awm kak tha am se lawt nawh nu? Thlang a thawlhw awh, kai awm kak kawk khuiawh mai amyihna am ui nawh nu? 30 Kang oek qu awhtaw, kak tha ama awmnaak ik-oeih awh ni kang oek qu kaw. 31 Kumqui dy awh kyih aham ak awm Bawipa Jesu a Khawsa ingkaw Pa ing ka qaaí ap kqawn nyng tive sim hy. (aiōn g165) 32 Damaska khaw awh qam uk Boei ing Sangpahrang Areta ak caming Damaska thlangkhqi ce tui aham ni mah sak khqi hy. 33 Cehlai vawng hlalang awng awhkawng bawmrang awh ni nuk thla unawh anih a kut khuiawh kawng loet nyng.

12 Oek qu hyn bai kawng nyng. A phu huh ham ikaw awm am awm hlai hy, Bawipa venawh kawng huhsaknaak ingkaw awiphawngkhqi ce hu hun kawng. 2 Ni hu kumhqa hlaiphli awh Khrih thlang pynoet khawk khan a dawt thum dyna a hak pawm ce sim nyng. Pumsa na aw am awhtaw pumsa am na aw am sim nyng – Khawsa ing sim hy. 3 Cawkawh thlang ce - pumsa na aw am awhtaw pumsa am na aw am sim nyng, Khawsa ing sim hy. 4 Paradise dyna hak pawm hy. Thlang ing kqawn aham a kham peek ik-oeih, kqawn thai na amak awm ik-oeih ce anih ing zahy. 5 Cemiyih ak thlang awh ce oek qu kawng nyng, kak tha ama awmnaak doeng am awhtaw kamah ingkaw kamah taw am oek qu kawng nyng. 6 Oek qu bai nyng seiawm, awitak ce kak kqawn aham a awm dawngawh thlakqaw na am awm kawng nyng. Cehlai kak kqawn ingkaw ka sai anglakawh thlang ing ak lawn na ama nik poeknaak aham, yh qunyng. 7 Kqawn noeng na amak awm vawhkaw ak bau soeih awiphawng awh ve kawpoek ak sang soeihna am ka taaknaak aham, kai anik thekhanaak ham, Setan a dyihthing ing ka pum awh hling ce ni pe hy. 8 Vawhkaw hling ve a lawh law aham Bawipa venawh thum voei dy thoeh nyng. 9 Cehlai anih ing, “Kam qeennaak ve nang aham khoek hy, kawthi kai ak thaawmnaak ve am thaawmnaak awh ni a soep hy,” ni tina hy. Khrih ak thaawmnaak ce kai awh a awmnaak thai aham, kak tha ama awmnaak awh zeel doena oek qu hawh kawng nyng. 10 Cedawngawh maw, Khrih ak caming, thaawmnaak am awh, thlang ing ani ziyinhaak awh, kiyinhaak awh, thekhanaak awh, kyinaak awh ka zeel hawh lawt mah hy. Kak tha ama awm awh ni, kak tha a awm hy. 11 Kamah ingkaw kamah thlakqaw na si qunyng, nangmih ing ni qaw sak uhyt ti. Nangmih ing nami ning diyh pyi aham awm hlai hy, kawna am ka awm awh aw, “ceityih baukhqi,” anglakawh am zawi am nem tlo nyng. 12 Ceityih na ka awmnaak hatnaak – miknoekkhqi, kawpoek kyi ik-oeihkhqi ingkaw ngaihkyi ik-oeihkhqi awm hawh hy. 13 Nangmih aham phyihqih na am ka awm ak kqawn kaana thlangboel ak changkhqi anglakawh nangmih ikaw nemnaak nami taak aih? Amak thymnaak awh nim geen kawm uk ti. 14 Tuh a thumvoeinaak na nangmih hrüp ahamma cai nyng, cehlai nangmih aham phyihqih na am awm kawng nyng, nangmih a them ce am ngaih nyng saw na mimah qoe qoe ni ka ni ngaih khqi hy. Cakhqi ing ami nu ami pa aham them am cun pe khawi uhy ami nu ami pakhqi ing ni cakhqi aham amim cun peek. 15 Cedawngawh ka taak themkhqi boehi ce nangmih aham zeel doena haw na kawng nyng saw kamah aham awm haw na kawng nyng. Nangmih ve ka ni lungnaak khqi khqoet mantaw, nangmih a lungnaak ce ak zawi hly lat nu? 16 Cemiyihna awm mai seiawm, nangmih a phyihqih na am awm nyng. Cehlai, ak thai ak thlang, ni thai naak khqi nyng saw nangmih ce nim tuk khqi nyng! 17

Nangmih a venawh ka tyih law thlang u awm haw na nyng saw nangmih ka ni ai khqi nawh nu? **18** Tita ce ceei nyng saw nangmih a venawh koeinaa thlang pynoet ingqawi tyi law hainh nyng. Tita ing nangmih amni ai khqi hy, anik ai khqi nu? Cawkaw kawlung ing am sai nih nyng saw ce a lam ce am ka ni hqut bawk nawh nu? **19** Nangmih a venawh kaimih ing ka mimah ak cangnaak ni kami hul hy, tinawh namik poek nawh nu? Khrih awh ak awm na kami awm dawngawh Khawsa mik huh awh ni awi ka nik kqawn law peek khqi hy; ka pyikhqi, bi ka sai lawkhqi boeih awm, nangmih namik tha a awmnaak aham nani. **20** Ikawtih kai ka law awh ka ngaihnaak amyihna amni huk khqi hau kawng nyng saw nangmih ingawm huh nami ni ngaih amyihna kai ve amni hu hau kawm uk ti, tice kqih nyng. Hqonaak, tlaiseetnaak, kawsonaak, oelh qunaak, kqawnseethaak, ang hyp na theet qunaak, oek qunaak ingkaw khawboe seetnaakkhqi awm hau kaw tice kqih nyng. **21** Nangmih a venna ka law tlaih awh ka Khawsa ing nangmih a haiawh chah ni lawh sak hau kawmsaw, maa na kaw ak thawlh thlangkhqi ingkaw ama ciimcaihnaak benawh amak zut ak thlangkhqi, nu ingkaw pa thawlh sainaak ingkaw pumsa ngaihnaak ak saikhqi ak khanawh kak kaw se bai kaw, tice kqih nyng.

13 Ve ve a thum voeinaak nangmih ka ni hqipnaak khqi na awm kaw. Ikawmyih a kawng awhawm thlang pakkhih pakthum simpyikung simpyinaak ing nami caksak aham awm hy. **2** Nangmih a venawh ka awm awh a hih voeinaak na ngaihtaaknaak awi nik kqawn pek khqi tlaih bai nyng: Kang hlat law tlaih awh ak thawlkhqi ingkaw them chang ak saikhqi ce am hlyn kawng nyng, **3** kai awhkawng Khrih ing awi ak kqawn tang hy voei nu tice nangmih ing kyk uhyk ti. Nangmih ing tuqunaak awh anih ce tha amak awm thlang na am awm hy, nangmih anglakawh ak tha awm hy. **4** Tha ama awm doena thinglam awh tai hlai uhy, Khawsa thaawmnaak ing hqing hy. Cemyih lawtna, kaimih taw amah awh tha amak awm na awm hlai unyng, nangmih a bibi aham amah awh Khawsa thaawmnaak ing awm kawng unyng. **5** Cangnaak ak khuiawh nami awm ingkaw am nami awm ce, na mimah ingkaw na mimah noek dak qu lah uh. Am awhtaw, nangmih awh Jesu Khrih awm hy ti namimah ing am naming sim qu thai nawh nu? Amak ngaih thlangna am nami awm awhtaw. **6** Kaimih taw a ngaih kana am awm unyng tih namik simna ning ngai khqi nyng. **7** Amak thym na bi am nami binaak aham Khawsa venawh cykcah unyng. Noek a daknaak awh amni bo hy tice thlang ing a huhnaak ham am nawh, amni sai nami hysinawh anil poek awh awm ak thym ik-oeih ce ni sainaak aham ni. **8** Awitak ing ak kalh na ikawm amni sai thai hy, awitak aham ni ikawm ni sai uh hy. **9** Kaimih taw kamik tha ama awm awh zeel unyng, cehlai nangmih taw namik tha awm hy; kaimih ing nangmih nami soepnaak aham cykcah unyng. **10** Cedawngawh ni kamah am ka awm awh ve ak ca ve ka qee law hy, ka law awh ka sai thainaak haw na nawh am ka tlungaak aham – cawkaw saithainaak taw nangmih hqenaak aham am nawh dyih sak aham ni. **11** A hukhit na taw koeinaakhqi kut nim tuk khqi nyng. Soepnaak ben ce cai na unawh taw, qeenaaak ka thoeh law ve ngai lah uh, kawlung kutoet na ta unawh taw, qoepnaak ing awm lah uh. Cawhtaw lungnaak ingkaw qoepnaak Khawsa ce nangmih a venawh awm kaw. **12** Pynoet ingkaw pynoet ak ciimcaih mawknak ing mawk qu lah uh. **13** Thlakciimkhqi boeih ing kut nim tuk khqi uhy. **14** Bawipa Jesu Khrih am qeenaaak, Khawsa lungnaak ingkaw, Ciim Myihla awmpyinaak taw nami venawh awm seh.

Galatia

1 Thlanghqing a venawh kawng thlang ing am tyi nawk, Jesu Khrh ingkaw amah ce thihsnaak awhkawng ak thawhkung Pa Khawsa ing a tyih kai ceityih Paul – 2 ingkaw ka venawh ak awm koeinaakhqi boeih ing, Galatia qam awhkaw thlangboel khqi venawh: 3 Ningmih a Pa Khawsa ingkaw Bawipa Jesu Khrh a ven awhkaw qeenakaak ingkaw ngaihdingnaak nangmih a venawh awm seh, 4 ni Pa Khawsa ak kawngaihnaak amyihna, tuh khuk awhkaw kawngihi amak leek khuiawh kawng ningnig ce hul aham amah ingkaw amah ce pe qu hy, (aiōn g165) 5 amrah a venawh thangleeknaak kumqui dyna awm seh. Amen! (aiōn g165) 6 Khrh qeenakaak kamminghangmih anik khyung ce hlah plak unawh awithang leek ak chang benna na ming hawitaak a dawngawh kak kawpoek na kyi hy; 7 cawkawng awithang leek ce awithang leek tang amni; nangmih ce nik plamkhqi nawh Khrh ak awithang leek ce melh voek aham a mik tha lo uhy. 8 Cehlai kaimih ing ka mik khy law pyi awithang leek anglakawh ak chang awithang leek ce kaimih ing aw am awhtaw khan ceityikhqi ing aw khy law pyi bai qoe u seiawm, ce ak awithang ak khypyi ce kumqui dyna tamdeng na awm seh nyng! 9 Kak kqawn law hawh amyihna, tuh kqawn law tlahi bai vang nyng: Nangmih ing nami do ce awithang leek anglakawh ak chang awithang leek ce thlang ing ak khypyi awhtaw, anih ce kumqui dyna tlakche na awm seh nyng! 10 Kai ing thlang ak kawngaihnu ka sai, am awhtaw Khawsak ak kawngaihnu? Thlanghqing ak kawzeelnaak nu kai ing ka sai? Thlanghqing ak kawngaihnaak ka sai awhtaw, Khrh a tyihzawih na am awm kawng nyng. 11 Kai ing kak khypyi awithang leek ve thlang ing a sai mai mai amni, tice koeinaakhqi, nangmih sim sak aham ngaih nyng. 12 Ve awithang leek ve thlang a ven awhkaw ka huh am nawk, thlang ingawm amni cawngpyi hy; Jesu Khrh ak a phonaak awhkawng ni ka huh hy. 13 Ak khqym awb Juda phung na ka awm awhkaw ka khawboe ce za hawh uhyti, ikawmyih dyna nu Khawsa a thlangboel the a kha na nawk cekkhqi hqe aham tha ka lawhnaak tice sim uhyti. 14 Juda bawkaak benawh Juda thlangkhqi ingkaw ka mi thawn pyi khawzah anglakawh poe khqoet nyng saw ka pakhqi ak awipek awh cak nyng. 15 Cehlai ka thangthai ca awhkawng anik hoep nawk am qeenakaak ing anik khyung Khawsa ing, 16 Gentelkhqi venawh amah akawng kak khypyi thainaak aham kai awb a Capa ang dang sak naak awhkawng kai ing u awm am doet nyng, 17 kai hlan awh ceityih na ak awmkhqi hul aham Jerusalem na awm am cet nyng, Arab qam na cet pahoei nyng, cekcoengawh a hu na Damaska khaw na hlat tlahi nyng. 18 Cawkawng kum thum a di coengawh, Piter ingqawi ka ning haiben qunaak aham Jerusalem na hang cet nyng saw a venawh hqa nylnihaa awm nyng. 19 Cawh ceityih ak chang u awm am hu nyng, Bawipa a na Jakob doeng ni ka huh. 20 Nangmih a venawh ka qee law ve ka qaai amni tice Khawsa haiawh ak cak na nik kqawn law pek khqi nyng. 21 Cekcoengawh Siria ingkaw Kilikia na cet nyng. 22 Pumsa benawh taw Judah qam khui awhkaw Khrh awb a mik awm thlangboelkhqi mi am sim qu unyng. 23 "Maa na ningnih a nik thekhanaak thlang ce tuh awhtaw amah ing hqe aham tha a lawh sih cangnaak ceni ak khypyi hawh lawt hy," tinawh amik kqawn awithang ce ni a ming zaak hy. 24 Cekkhqi ing kai ak camawh Khawsa ce kylkahc uhy.

2 Kumhqa hlaihphli a di coengawh Jerusalem na cet tlahi bai nyng, cawhtaw Barnaba ingqawi cet haih nih nyng. Tita awm ceh pyi haih nyng. 2 Awiphawng ka huhnak amyihna Gentelkhqi venawh awithangleek kak khypyi ce kqawn peek aham cet nyng. Cehlai dawng taaqunaak awb a hqawng na dawng hau kawng nyng, tice kak kqih a dawngawh, ve ve sawikung na ak awmkhqi

venawh ang hyp na sai nyng. 3 Ka venawh ak awm Tita, Greek thlang zani chahhui am geet sak ngah ngah nyng. 4 Amak thym koeinaakhqi ing kaimih ang dyih hun ce vyt unawh Khrh awh ngaihding na ka mi awmnaak ve tamnaa na sai tlahi aham awi thoeng sak uhy. 5 Awithang leek awitak ce nangmih awb a cak poenaak aham, cekkhqi venawh kawlhkalh awm am pe unyng. 6 Awihtang na amik awm thlangkhqi awm, ikawmyih ak thlang awm kai aham a lawhanaak ikaw am awm hy; Khawsa ing ak khan awhkaw ang dangnaak amyihna awi am tlyk ni, cemyih thlangkhqi ing kai ak awih kqawn ve am sap qoe uhy. 7 Piter ve Juda thlangkhqi venawh awithang leek kqawn aham peek na a awm lawt amyihna, kai awm Gentelkhqi venawh awithang leek kqawn aham ni pehy tice, hu uhy. 8 Judahkhqi venawh ceityih na ak awm Piter a bibinaak awb Khawsa ing bi a bi amyihna, Gentelkhqi venawh bi ak bi kai a venawh awm bibi lawt hy. 9 Tungling na ak awm Jakob, Piter ingkaw Johan ing, kai a venawh am qeenakaak ce ni pe lawt hy tice a mi sim awb kai ingkaw Barnaba ce tangkut ing ni do uhy. Kainih ve Gentelkhqi venawh ceh aham ingkaw a mimah taw Judahkhqi venawh ceh aham ti unyng. 10 A mingmih ing khawdeng hahqahkhqi ce poek quiqah aham awi ni yn uhy, ce ni kai ingawm sai aham ka ngaih qoe hy. 11 Piter ce Antiock khaw na a law awb, a thawlhnak a awm dawngawh, a haai qoe qoe awb oelh nyng. 12 Jakob a ven awhkawng thlang vang a mi law hlan awhtaw, Gentelkhqi mi buh ai haih uhy. Cehlai cekkhqi ce amphi awhtaw, chahhui ak qeet thlangkhqi ce ak kqih a dawngawh, a huna thoeih nawh Gentelkhqi ven awhkawng amah poek awb ak changna awm hy. 13 Cawh Judah tlakchangkhqi ingawm sa qu unawh pyi lawt uhy, cekkhqi ing a ming sa qu dawngawh Barnaba awm pleng lawt hy. 14 Awithang leek ing ang qoep na bi am bi uhy tice ka huh awb, cekkhqi boeih a haiawh, "Nang Juda thlang ing zani, Juda thlang amyihna a awm kaana Gentelkhlang amyihna awm hyk ti. Ikawmyihna Gentelkhlangkhqi ce Juda phung ngai sai sak aham na buk ngaih ngah?" 15 Ningmih Juda thlang na ak thang nawh "tlakthawlhkhqi" amyihna a ma mik awmkhqi ing, 16 anaa awi hqutnaak ak caming dyngnaak amni hu unawh, Jesu Khrh cangnaak ak caming ni dyngnaak ni huh uh hy, tice ni sim uhy. Cedangawh, ningnih ingawm, anaa awi hqutnaak ak caming u awm dyngnaak ce a ma huh thi dawngawh anaa awi hqutnaak ak caming am nawk Khrh cangnaak ak caming tlakdyng nani awmnaak thai aham Khrh awb cangnaak ce ni ta uhy. 17 Khrh awb dyngnaak ce ni sui uh awhtaw, ningnih awm tlakthawh na ni awm lawt uhy, tice caih hy. Cawhtaw Khrh ing thawlhnak ce tha pehy tinaak nu? Am pe qoe qoe hy! 18 Ka hqe ce ce kang dyih sak tlahi bai mantaw, kai taw cawngpyinaak awi ak hqekung nani ka awm. 19 Khawsa ham ka hqingnaak thai aham, cawngpyinaak awi ak caming cawngpyinaak awi awb thi hawh nyng. 20 Khrh ing thinglam awb heen haihna ka awm hawh dawngawh kamah ve am hqing voel nyng saw, Khrh ni kai awb ak hqing hawh. Ve a pum awb ka hqingnaak vetaw, kai ni lungna nawk a hqingnaak a nik pekung, Khawsa Capa cangnaak ing ni ka hqing hawh. 21 Khawsa am qeenakaak ce am hoet nyng, dyngnaak ce anaa awi hqutnaak ak caming huh thai na a awm mantaw, Khrh a thihnaak taw a hqawng a hqap nani a awm hly hly!" tina nyng.

3 Ningmih Galatia tlakqaw khqi! U ing a nim tuui khqi vik hy voei? Na mik huh qoe qoe awb Khrh thinglam awb henna ak awm ce ak caihna dang hy. 2 Nangmih a ven awhkaw them pynoet ca doeng ni cawng aham ka ngaih hy: Anaa awi hqutnaak ak caming nu Myihla ce nami huh uh, am awhtaw na ming zaak ce na mik cangnaak camawh nu? 3 Cemyih aihna nami qaw nawk nu? Myihla ing kqawn na a awm coengawh, tuh thlanghqing a saithainaak ing nang cainaak ce huh aham tha nami lo nawk nu? 4 Kawna amak coeng them aham na mik kuihka nawk nu – ikawna

awm a mang coeng tang tang awhtaw? 5 Anaa awi na ming ngaih ak camawh nu Khawsa ing amah ang Myihla ce ni pek khqi nawh kawpoek kyi them ce nami sai, am awhtaw na ming zaak ce na mik cangnaak dawngawh nu? 6 Abraham ce poek lah uh: Anih ing Khawsa ce ak cangnaak camawh, anih ce thlakdhyng na tahi." 7 Cawhtaw, zasim lah uh, ak cangnaak thlangkhqi taw Abraham a cadil na awm uhy. 8 Khawsa ing Gentelkhqi ce cangnaak ak caming dyng sak kaw, tice Bible ing a na hu oepchoeh hawh hy, cedawngawh Abraham a venawh awithang leek ce anak khypyi oepchoeh: "Nang ak caming qampum thlang ing zoseennaak hu kawm uh," a na tina hy. 9 Cedawngawh cangnaak ak ta thlangkhqi taw, cangnaak ing ak awm Abraham ingqawi zoseennaak hu hain uhy. 10 Anaa awi hqutnaak awh ak hangkhqi boeih taw awikhha zawknaak ak kai awh awm uhy: "Anaa Cakciim ak khuiawh qee na a awm amyihna amak ngaih ak thlangkhqi boeih taw awikhha ak zawkkhqi na awm uhy," tinawh qee na awm hy. 11 U awm anaa awi hqutnaak ak caming Khawsa haiawh thlakdhyng na am awm qoe qoe hy, ikawthi, "Thlakdhyng taw cangnaak ing hqing kaw," tinawh awm hy. 12 Anaa awi taw cangnaak awh am dyi hy, "Vawhkaw them ak sai thlangkhqi taw ami sai ak caming hqing lawt kawn uh," tinawh ni a awm hy. 13 Ningmih aham awikhha na ak thoeng anaa awikhha ak khui awhkawng Khrithi ing ningnih ce ni hul khqi hy: "U awm thing awh a tai thlang taw awikhha ak zawk thlang na awm hy," tinawh qee amyihna. 14 Cangnaak ak caming Myihla awitaak ce ni hul thainaak aham ingkaw, Abraham a venawh a peek zoseennaak ce Jesu Khrithi ak caming Gentelkhqi ham a awm thainaak aham anih ing ningnih ce ni hul khqi hy. 15 Koeinaakhqi, myngawi awhkaw khawsak naak awhkawng nytahnaak pynoet awh kqawn law lah vang nyng. U ingawm awikamnaak a sai ce ce am qoeng thaih nawh a ma sap thaih voel amyihna ni ve a ik-oehi awm a awm lawt hy. 16 Awikamnaak ve Abraham ingkaw a cadil aham ni ak kqawn peek hy. Cakciim ing, "A cadilkhqi," am tihy, cetaw thlang khawzah ak kqawn ngaihnaak ni, Cehlai, "Na cadil a venawh," tinawh kqawn hy, cetaw thlang pynoet Jesu Khrithi ni. 17 Kak kqawn ngaihnaak taw veni: Anaa awi, kum 430 a dii coengawh a peek ing, Khawsa ing lamma na awikamnaak a sai ce am qoeng nawh awikam ce awm am hq hy. 18 Ikawthi qo pangnaak ce anaa awi awh ang hang qu mai mantaw, awikamnaak awh am hang qu voel hawh hy; Cehlai Khawsa ing am qeennaak ing awikamnaak ce Abraham a venawh pehy. 19 Cawhtaw anaa awi ve ikaw ham hy voei nu? Ve bai taw awikamnaak ing ak khi Cadil a law hlan dy, thawlhnak awh a sap sih naak ni. Anaa awi ce khan ceityih ak caming dyihting pynoet ing caksak hy. 20 Cawhkaw dyihting pynoet ing thlang hloep oet doeng am hut nahy; cehlai Khawsa taw pynoet ni. 21 Cedawngawh, anaa awi ing Khawsa awikamnaak ce ak oelh nu? Am oelh qoe hy! Hqingnaak ak pe thai anaa awi ce peek na a awm awhtaw, dyngnaak awm anaa awi ak caming law hawh kaw. 22 Cehlai Cakciim ingtaw khawmdekk pum ve thawlhnak ing khuk hy tihy, cedawngawh cawhkaw awikamnaak ce, ak cangnaak thlangkhqi ing a mi huhnaak thai ham, Jesu Khrithi cangnaak ak caming peek na awm hawh hy. 23 Vawhkaw cangnaak a law hlanawh, anaa awi ing ningnih ce thawngim khuina nik kqoep khqi hy, cangnaak ang dang hlan dy awh ni khawh khqi hy. 24 Cedawngawh anaa awi taw cangnaak ak caming thlak dyng na ni awm thainaak aham Khrithi a venna ningnih a nik sawikung na awm hy. 25 Cawhtaw tuh cangnaak ce law hawh hy, cedawngawh anaa awi doencangnaak ak kaiawh ningnih taw amni awm voel uhy. 26 Jesu Khrithi cangnaak ak caming nangmih boeih taw Khawsa cakhqi na awm uhy ti, 27 Ikawthi Khrithi awh baptismia ak hukhqi boeih taw Khrithi ing thoeih ang cam qu boeih hawh uhy ti. 28 Juda ingkaw Greek am awm nawh tamnaa ingkaw thlak loeih am

awm hy. Nu ingkaw pa ti awm am awm hy. Ikawthi Khrithi awh pynoet na awm boeih uhy ti. 29 Khrithi a koena nami awm awhtaw, Abraham a cadil na awm hawh uhy ti, awikamnaak amyihna qo ak pangkungkhqi na awm hawh uhy ti.

4 Qo ak pangkung ce naasen na a awm khuiawh taw, qampum ce ta mai seiawm tamnaa ingqawi a lawhanaak am awm hy. 2 A pa ing a tym a taak naak a pha hlan dy amah ak khoomkungkhqi ingkaw ak khuit ak hlepungkhqi kut awh ni a awm hy. 3 Cemyih lawtna, ningnih ve naasen na ni awm awh, khawmdekk awhkaw phung ak kai awh tamnaa na ni awm uhy. 4 Cehlai a tym a pha awhkawng taw, Khawsa ing a Capa ce tyi law hy, nu ing ta nawh, anaa ak kaiawh thang law hy, 5 anaa ak kaiawh ak awm thlangkhqi ce hul aham, ningnih ing cakhqi na coeng thainaak ce ak soep na ni huh thainaak aham ni. 6 Nangmih taw cakhqi na nami awm dawngawh, Khawsa ing amak a Capa ang Myihla ce ningnih ak kawlung khuiawh tyi law hy, cawhkaw Myihla ing, "Abba, Ka pa," tinawh nik khy sak hy. 7 Cedawngawh nang taw tamnaa na am awm voel hyk ti, ca nani na awm hawh; ca na na awm hawh dawngawh, Khawsa ing qo ak pangkung na ni ta hawh hy. 8 Khawsa nami sim hlanawh Khawsa na amak awm thlangkhqi a tamnaa na awm uhyk ti. 9 Cehlai tuh taw Khawsa ce sim hawh uhyk ti – am awhtaw Khawsa amah ing ni sim khqi hawh hy – cawhtaw ikawmyihna cawhkaw tha amak awmkhqi mi ikawna awm amak awm benna na ming hlat tlahi uh? Cemyihkhqi a tamnaa na awm tlahi aham nami ngaih nawh nu? 10 Kharngihkhqi hlakhoi ingkaw kumkhqi ce zeih uhyk ti! 11 Nangmih aham phu amak awmna kak tha plak kawng nyng, tice kqih nyng. 12 Kai amyihna nami awm lawt aham, koeinaakhqi, nangmih a venawh qeennaak thoeh law nyng, kai awm nangmih amyihna awm lawt nyng. Kak khanawh ikawmyih a thawlhnaka am sai uhyk ti. 13 Nami sim amyihna, ka tlawh a dawngawh nangmih a venawh lamma cyk na awithang leek hky law pyi nyng. 14 Ka tlawhnaak ce nangmih aham noek a dakauna na awm mai seiawm, nangmih ing am ni the na unawh am nim tyih uhyk ti, Khawsa ak khan ceityih amyihna, Khrithi amah qoe qoe amyihna ni do uhyk ti. 15 Nami zeelnaakkhqi boeih ce ikawmyihna nu a awm hy? Nami sai thai mantaw nami mik zani koeih unawh ni pe kawm uk ti, ti nyng. 16 Awitak ka nik kqawn peek khqi dawngawh nangmih a qaal na ka awm nawh nu? 17 Nangmih noeng aham ak ngaih soeih khqi ce, a leeknaak aham amni. A mingmih a ngaihnaak taw nangmih ingkaw kaimih pek ang bo qunaak aham ni, cawh ni a mingmih ce nangmih ing nami ngaih hly tihy. 18 Thlang ing a ni ngaih ve leek hy, cai ang hlahnaka ni taak awm nep hy, ka awm doeng awh am nawh cemyihna awm poeapa lah uh. 19 Ka lungnaak ka cakhqi, nangmih ak khuiawh Khrithi a awm hlan khuiawh naaca ak awm tawm awhkaw amyihna awm nyng, 20 tuh nangmih a venawh awm lah nyng saw kak awi thaw lah voei nyng, nangmih akawng kang ngaih na kyi soeih saw! 21 Anaa ak kaiawh awm aham ak ngaihkhqi, kqawn law lah uh, anaa awi ing ak kqawn ce am nami sim nawh nu? 22 Abraham ing cakpa pakkhih tahi, pynoet taw a tamnaa nu a capa na awm nawh pynoet taw tamnaa nu am a capa na awm hy. 23 A tamnaa nu ingqawi a ni taak a capa cetaw ca taak mailai na awm hy; cehlai tamnaa nu am ingqawi a ni taak a capa taw awikamnaak amyihna a taak na awm hy. 24 Vawhkaw ik-oehi ve nythnaak na ta lah sih, cawhkaw nugawi ce awikam pakkhih sainaak ing myih hy. Awikamnaak pynoet taw Sinai tlang awhkaw awikamnaak na awm nawh tamnaa na ak awm hly kawi canaakhqi ce tahi: vetaw Hagar ni. 25 Hagar taw Arabia qam awhkaw Sinai Tlang na awm hy, a cakhqi mi tamnaa na a mi awm dawngawh, tuh khawk bau na ak awm Jerusalem ing myih hy. 26 Cehlai khan benna ak awm Jerusalem taw tamnaa nu

am na awm nawh, anih taw ningnih a nu na awm hy. 27 Cak kaa nang nu, zeel lah; tlawhnaak amak sim nang, khawteh na khy lah; Ikawtih a hqek nu ing vaa ak taak anglakawh khawzah khgoet ca tahi," tinawh qee hyt ce awm hawh hy. 28 Nangmih koeinaa, Isaak amyihna ak awmkhqi taw awikammaak cakhqi na awm uhyk ti. 29 Cawh ca taak mailai ing Myihla saithainaak ing ak thang capa ce the a kha nahy. Cemyihna ni tuh awm a awm hy. 30 Cehlai Cakciim ing ikawmyihna nu ak kqawn? "Tamnaa nu ingkaw a capa ce hqek lah uh, kawtih tamnaa nu a capa ing ityk awh awm tamnaa nu am a capa a qo ce a pang pyi thai kaw," tinawh kqawn hy. 31 Cedawngawh, koeinaakhqi, ningnih ve tamnaa nu a cakhqi na amni awm uh, tamnaa nu am a cakhqi nani ni awm uh hy.

5 Tamnaa na koeh awm aham Khril ing ningnih ce ni loet sak khqi hawh hy. Cedawngawh, ak cak na dyi unawh taw, tamnaa a phyihqih ce koeh phyi voel uh. 2 Kak awi ve khoem lah uh! Kai, Paul ing ka nik kqawn peek khqi, chahhui qeetnaak benna nami awm tlaih awhtaw, Khril taw nangmih aham a phu am awm voel hy. 3 Anaa awi boeih hqutnaak aham chahhui qeet aham awm hy tinawh ak poekkhqi venawh kqawn law tlaih bai nyng. 4 Nangmih anaa awi ing dyngnaak huh aham tha ak lokhqi Khril ing pek qu hawh uhyk ti; qeennaak ce tluuk taak hawh uhyk ti. 5 Cehlai ningnih ingtaw cangnaak ing ning ngaih-u dyngnaak ce Myihla ak caming ning ngaih-u uh. 6 Ikawtih Khril awh chahhui qeet ingkaw a ma qeet ikaw awm a phu am tahi. A phu ak ta taw lungnaak ing ak dang cangnaak doeng ni. 7 Dawng taanaak awh tha lo unawh dawng uhyk ti. U ing nu nangmih ce nik khai khqi nawh awitak awi am naming ngainaak aham a nim tu khqi khaak? 8 Cemyih sykoeknaak ve nangmih anik khykhqikung a venawh kawng am law hy. 9 Hen vetehca ing phaihpi hlym zam boeih hy. 10 Ak chang poeknaak am ta uhyk ti tice Bawipa awh yp qu na nyng. Nangmih, a u na awm awm seh, kawlung ak kyi sakkunkhqi ing lai nami sah aham awm hy. 11 Koeinaakhqi, chahhui qeetnaak akawng kak khypyi bak bak mantaw, ikaw hamna nu kyinaak ca huh bak bak kaw? Cemyihna a awm mantaw Khril thinglam ak oelkhkqi awm am awm voel kaw. 12 Kyinaak ak saikhqi ce, a mimah ingkaw a mimah a mi sainaak hoiw awh a mik tha a seet aham awm hy! 13 Koeinaakhqi, nangmih taw tamnaana amak awm aham ni a nik khy khqi, cehlai tamnaana am nami awmnaak ve pumsa ham lehcainaakna koeh lo unawh, pynoet ingkaw pynoet lungnaak ing bibi qu law pe uh. 14 Anaa awi boeih ve awipeek pynoet: "Na ven awhkaw tlhang ce namah a pum amyihna lungna lawt lah," a tinaak awh cuui boeih uh. 15 Cehlai nangmih pynoet ingkaw pynoet cui qui unawh na mik kqah qu awhtaw, am naming qeengnaak ham ngaihtha kawm uk ti. 16 Cedawngawh ka nik kqawn peek khqi, Myihla awh ce hqing lah uh, cawhtaw khawmdek thawlh ngaihnaak ce am sai kawm uk ti. 17 Pumsa ngaihnaak ing Myihla lam noeng thai nawh, Myihla ngaihnaak ingawm pumsa ve noeng thai ny; them sai ham naming cai am nami sai naak thai ham pumsa ingkaw Myihla ve kah qu hy nih. 18 Cehlai Myihla ing a ni hqui awhtaw, nangmih cawngpyinaak ak kaiawh am awm voel uhyk ti. 19 Khawmdek pumsa thawlh ngaihnaakkhqi taw dang hy: nu ingkaw pa thawlhaak, a ma ciimciahnaka ingkaw khawboe seeetnaak; 20 myiqawl bawknaak ingkaw tlhang tuuinaak; tlhang sawhnaak, kawpoek ak changna taaknaak, tlaiseetnaak, kawsonaak, mah doeng aham poeknaak, pek ang bonaak, pynoet ingkaw pynoet qaal qunaak, 21 tlhang ytnaak, zu aawkaak, zusuk poeiauh nawmnaakkhqi, vemyihkhqi ve; vemyih akawnglam awh maana, "Cemyih them ak saikhqi t aw Khawsa qam am pang kaw," tinawh ka nik kqawn peekkhqi hawh nyng. 22 Cehlai Myihla ak thaih taw lungnaak, zeelnaak, ngaihding naak, yh thainaak, qeennaak, leeknaak, ypmawmnaak,

23 kawdungnaak ingkaw nimah ingkaw nimah kymsym qu thainaak veni. Ve ing anik kahh qu anaa awi am awm hy. 24 Khril awh ak awmkhqi ingtaw ve khawmdek pumsa ce, thawlh poeknaakkhqi ingkaw ngaihnaakkhqi ce thinglam awh heen sit boeih hawh hy. 25 Myihla ing ak hqjingga ni awm awhtaw Myihla awh ce awm poe u sih nyng. 26 Koeh oek qu unawh taw, pynoet ingkaw pynoet kawsonaak ingkaw ytnaak koeh ta u sih.

6 Koeinaakhqi, tlhang pynoet mai awm a thawlh vik awhtaw, nangmih Myihla ben thlangkhqi ing kawdungnaak ing nami tlaih nami vawng aham awm hy. Cehlai na mimah ingkaw na mimah awm na ming ngaih ta uh, cemyih am awhtaw sykoeknaak ak khuiawh tla lawt kawm uk ti. 2 Pynoet ingkaw pynoet phyih qih leng qu lah uh, vemyihna ni Khril anaa awi ce nami soep sak hly thai hy. 3 U ingawm amah ingkaw amah ce ikaw na awm a ma awm loei awh ak sang soeih na ak poek qu awhtaw, amah ingkaw amah ni ang thai qunaak hy. 4 Thlang a hoiw ing a bibinaak ce a noek a dak aham awm hy. Cawhtaw tlhang ing ang nyhtah qu qee kaana, oek awm oek qu seh, 5 kawtih tlhang boeih ing a mimah a phyihqih ce phyih boeih aham awm hy. 6 Toelnaak awi ak za ingtaw anih ak toeklung ing ik-oehi leek boeih ce a ning qek aham awm hy. 7 U ingawm koeh ni thai nak khqi seh nyng: Khawsa ve u ingawm qaih am qinna am sai thai hy. Thlang ing a saw ni a ah hly tlaih hy. 8 Pumsa ngaih thawlhaak ak saw ing, pumsa ben seetnaak ce aat lawt kaw; Myihla kawngaih ak saw ingtaw, Myihla awh kumqui hqingnaak ce aat lawt kaw. (aiōnios g166) 9 Them leek sainaak benawh tha koeh seet sak u sih, a qoeng kaana ni sai awhtaw a tym a kheok awh caang ce ni aat lawt bit kawm uh. 10 Cedawngawh a tym leek ni taak tloek awh, tlhang boeih a venawh them leek sai u sih, ak cangnaak ipkhui kaw thlangkhqi aham na sai khqoet u sih. 11 Toek lah ka kut qoe qoe ing calung ak bau soeih na ka ni qee law peek khqi ve! 12 A chang benawh leeknaak sai aham ak ngaihkhqi ing nangmih ce chahhui qeet sak ngah aham ngaih uhy. Vemyihna sai ham a mi ngaihnaak taw Khril thinglam awh a khuikha ce a mik kqjh a dawngawh ni. 13 Chahhui ak qeetkhqi ing zani anaa awi a mami hqut thai awh, nangmih a pumsa awh oek qu aham a mi ngaih awh nangmih ce chahhui qeet sak aham ngaih uhy. 14 Bawipa Jesu Khril thinglam am awhtaw am oek qu qoe kawng nyng, anih awh khawmdek ve kai aham thinglam awh taiq qu hawh hy, kai awm khawmdek aham thinglam awh taiq qu hawh hy, kai awm khawmdek aham taiq qu nyng. 15 Saithainaak tikaaw taw chahhui qeet ve ikawna am awm nawh, chahhui am qeet awm ikawna am awm hy. 16 Vawhkaw hquisawinaak ak hqut Khawsa koe Israel thlangkhqi venawh, ngaihdingnaak ingkaw qeennaak awm seh. 17 A hukhit awhtaw, Jesu hatnaak ce ka pum awh ka taak hawh dawngawh, u ingawm kyinaak koeh ni pe voel seh nyng. 18 Koeinaakhqi, Bawipa Jesu Khril am qeennaak ce nangmih ang Myihla awh awm seh nyng. Amen.

Efesa

1 Khawsa ngaihnaak amyihna Jesu Khril a ceityih pynoet na ak awm, Paul ing, Ephesa khaw awhkaw thlaciim, Khril awh ypawm na ak awm thlangkhqi venawh. 2 Ni Pa Khawsa ingkaw Bawipa Jesu Khril a venna kaw qeennaak awm seh nyng. 3 Ni Bawipa Jesu Khril Khawsa ingkaw Pa venawh kyiolahnaak awm seh, khawk khan awh ningnih ce amah ing zoseennaak ni pek khqi nawh Khril awh Myihla ben zoseennaak soepkep ce ni pek khqi hawh hy. 4 Ak ciimcaih coet a kap kaana a haiawh awm aham khawmdek a syn hlan awhkawng ningnih ce nik tyk khqi hawh hy. Lungnaak awh 5 amah ing ningnih ve a cana taak aham Jesu Khril awh a oepchoeh na ni hoep khqi hawh hy, amah a zeelnaak ingkaw ngaihnaak amyihna – 6 a boemang qeennaak kyiolahnaak ingkaw, amah ing a lungnaak thlang awh ningnih ce a zoe na ni pek khqi hawh hy. 7 A thi ak caming thawngnaak ce ni hu uhy, thawlh queenkaw ngainaak, ak dung soeih soeih Khawsam qeennaak amyihna, 8 ningnih ak khanawh cyihnaak ingkaw zaksimnaak ce a hai kaana ni viyh sih khqi hy. 9 Amah a koe ak leek zeelnaak, Khril awh ang cainaak a awm hawh amyihna, amah awhkaw ang hyp ngaihnaak ce ningnih a venawh dang sak hawh hy, 10 a tym a khoek awh khan ing khawmdek awhkaw ik-oeh boeih boeih a lu na ak awm Khril ak kaina taak peek boeih aham ak kawngaih na awm hawh hy. 11 Amah awh ningnih awm tyk na ni awm uhy, amah a ngaihnaak amyihna ik-oeh boeih ak poekkung ing ang cainaak amyihna ni hoep oepchoeh khqi hawh hy. 12 A boemangnaak ak kyiolahkung na ni awmnaak thai aham, ningnih taw Khril awh ngaih-unaaak ak ta cyk na ni awm uhy. 13 Nangmih awm awitak, ni loetaak awithang leek ce naming zaak awh, Khril awh awm hawh lawt uhyl ti. Namik cangnaak hawh a dawngawh, nangmih a pum awh hatnaak, Ciim Myihla awikamnaak ce awm hawh hy. 14 Khawsa koena ak awm amah a boemangnaak kyiolah aham ak awmkhqi a thaawngnaak a pha hlan di ningnih a qo pangnaak hly awh anih ce hawhi na awm hy. 15 Vawh, nangmih ing Bawipa Jesu awh cangnaak ing thlaciimkhqi boeih nami lungnaak ce kang zaak awh, 16 a boet kaana zeelnaak awi kqawn nyng, kak cykahnaak awh nangmih ce ni sim khqi poepa nyng. 17 Ni Bawipa Jesu Khril a Khawsa, qeennaak ing ak be Pa ing cyihnaak Myihla ing amah ce ak leek bet na nami sim thainaak aham ingkaw huh saknaak ce a ni peek thainaak khqi aham thoeh poepa nyng. 18 Amah ing anik khynaak ngaih-unaaak, thlaciimkhqi ing boemangnaak qo pang hly kawi ce nami sim thainaak aham nangmih ak kawlung mik a dai sak naak aham cykcah bai nyng. 19 Ak cangnaak ningnih boeih aham thaawmnaak aq bau soeih ce awm hy. Cawhkaw thaawmnaak cetaw ak thaawmnaak aq bau soeih ing bibi amyihna awm hy. 20 Khril ce thawh tlaib hawh Khawk khan hun awh Pa tang benawh ang ngawihsaknaak thaawmnaak ce haw nahy, 21 uknaak ingkaw saithainaak, thaawmnaak ingkaw temnaak, peek thai na ak awm ming boeih boeih, tuh a khuk awh am nawh ak law hly a khuk ak khanawh Khril taw awm hy. (aiōn g165) 22 Ik-oeh boeih boeih a khawk kaiawh Khawsa ing taak pe nawh thlangboel aham ik-oeh boeih boeih a lu na anih ce tahi. 23 Cawhkaw thlangboel cetaw a pumsa ni, ik-oeh soepkep awh ak be soep saknaak ce.

2 Nangmih taw, awi eeknaak ingkaw thawlhaak awh thi hawh uhyl ti. 2 Ve khawmdek a phung na nami awm awh ce zilh ak ukkung boei, tuh awm awi amak ngaikhqi venawh bi ak bi myihla a phungna awm uhyl ti. (aiōn g165) 3 Ak kqym awh ningnih boeih awm cekkhinq lakawh khaw ni sa lawt uhy. Thawlh a ngaih sainaak ingkaw thawlh ngaihnaak a huawh ce ning bat lawt uhy. Thlak changkhqi amyihna, ningnih awm kawsonaak ak zawkkhqi

na ni awm uhy. 4 Cehlai ningnih a ni lungnaak khqi soeih a dawngawh, qeennaak ing ak be, Khawsa ing, 5 awi eeknaak awh ni thih huiawh awm Khril ing ningnih ce ni hqjng sak khqi hah tlaib hawh hy – qeennaak awh ni nangmih hulna ni awm uhy. 6 Khawsa ing ningnih ve Khril ing ni thawh sak khqi hah nawh, Khril awh khan hun na amah ing ning ngawih sak khqi hah hy. 7 Ak law hly khuk a awm awh am qeennaak amni nyhtah thai noeng ce ang dang saknaak aham ingkaw Jesu Khril awh ningnih ani lungnaak khqi ce ang dang saknaak ahamni. (aiōn g165) 8 Caangnaak caming qeennaak awh thaawngna namik awm ni; namimah a bibi camawh am nawh, Khawsa a them pek ni; 9 bibinaak ak caming amni, cemyih am kaa taw thlang ing cawng a cuh qo kawm uhy. 10 Them leek sai ahamna Isu Khril awh saina ni awm nawh amak a kut sai qoena nik awm ni; ce them leek sai ce ni khawsak hly qoena Khawsa ing a syn qoe ni. 11 Cedawngawh, maana ningnih pumsa awm Gentel, pumsa awm kut ing sai "Chahhui qeet" ami tikhqi ingkaw "Chahhui amak qeet" ami tikhqi aw, 12 ce tloek awhce, Khril kana, Israelkhqi a tui khaw ingqaw lak hla ing, khawmdek awh ve ngaih-uunaak amak ta ingkaw Khawsa kana awm ing, awikam awhkawng khinna nami awm ce sim poe kawm uk ti. 13 Cehlai tuh awhtaw Jesu Khril awh, nangmih maana ak hla soeihna namik awmkhqi ce Khril a thi ing zoei sak awm uhyl ti. 14 Amah qoe ce ningnih aham qoepnaak na awm hawh hy, anih ing pakkhii ce pynoet na sai nawh qaal anglak pheknqa vawng ak awm ce hqe hawh hy, 15 a pumsa ing anaa ak awipeek sai aham ak awmkhqi boeih ce hqe hawh hy. Amah awh thlang pakkhii ak khuiawh kawng thlak thai pynoet sai aham cai hy, cemyihna qoepnaak ce sai hy. 16 Vawhkaw pum pynoet awhkawng thinglam ak caming Khawsa ingkaw cekqwai anglak law awh tuqunaak ce sai hy, thinglam awh a thihnaak ak caming qaal qunaak ce boet sak hy. 17 Nangmih ak hla nakaw ak awmkhqi ingkaw ak zoe awh ak awmkhqi venna law nawh qoepnaakawi ce kqawn hy. 18 Cedawngawh amah ak caming ningnih boeih ing Pa a venawh Ciim Myihla pynoet ak caming tuqunaak ce ni ta uhy. 19 Cedawngawh, nangmih taw khawlawng thlang ingkaw thlang lang na am awm voel uhyl ti, Khawsa ak thlangkhqi ingkaw Khawsa ipkhui cakaw na awm hawh uhyl ti. 20 Ceityihkhqi ingkaw tawngkhakhqi awh sak na awm u tiksaw, Khril amah qoe ce a kil awhkaw lungkhoeng na awm hy. 21 Anih awh im ce tuqu boeih nawh Bawipa a bawkim na dyi hy. 22 Nangmih awm amah awhce Myihla-awh, Khawsa awmnaak a ham sakna namik awm ni.

3 Cedawngawh kai Paul, nangmih Gentelkhqi ak camawh Jesu Khril awh thawng ak tla, ing – 2 nangmih aham kai a venawh peek na ak awm Khawsa am qeennaak bibi ka taak ce za hawh uhyl ti; 3 cemyihna awihyp ce ak tawi cana ka qee law hawh amyihna kai a venawh awiphawngnaak ing ni sim sak hy. 4 Ce ak awi ce nami noet awh, Khril ak awihyp ka huhnaak akawng ce zasim thai kawm uk ti, 5 cawhkaw awihyp ce tuh Myihla ing Khawsa a ceityih ciimkhqi ingkaw tawngkhakhqi venawh ang dang sak amyihna ak chang cadil khqi anglaklung awh simsak na am awm hy. 6 Cetaw veni, Awithang leek ak caming Jesu Khril-awh Gentelkhqi qo a pangpyikhqi, pumsa a ke a baipyikhqi, awikam dopyikhqi na awm uhy. 7 Amah a saithainaak bibinaak ak caming ka venawh peek na ak awm Khawsam qeennaak awh kai taw ve awithang leek a tamnaa na awm nyng. 8 Khawsak thlangkhqi boeih ak khuiawh ak zawi soeikhqi anglakawh zawi khqoet hlai nyng vawhkaw am qeennaak ve ka venawh ni pehy: Gentelkhqi venawh am sui thai noengna ak awm Khril a boeinaak ce kqawn peek aham ingkaw, 9 maa awh, ik-oeh boeih ak synkung Khawsa awh thuh na ak awm, ve awihyp a bibinaak ve thlang boeih a

venawh sim sak aham ni. (aiōn g165) 10 Anih angcainaak taw, thlangboel ak caming, Khawsa a cyihnaak ak dung soeih ce khawk khan hun awhkaw ukkungkhqi ingkaw saithainaak ak takhqi venawh simsak aham ni, 11 amah a kumqui angcainaak ce ningnih Bawipa Jesu Khrish awh soep sak hawh hy. (aiōn g165) 12 Amah awh cangnaak ak caming ngaihdingnaak ingkaw ypnaak taak doena Khawsa venawh ni zoe thai hawh uhy. 13 Cedawngawh, nangmih boeimangnaak aham kai ing ka khuikhanaak awh ve namik tha koeh set sak uh. 14 Ve ak camawh Pa a haiawh khuk sym ing koep nyng, 15 anih a venawh kawng khawk khan ingkaw khawmdek awh ak awm a cakaw khqi ing a mimah ang ming ce hu uhy. 16 A boeimangnaak ingkaw ang Myihlaa ak caming nangmih ak kawlung khuiawh thaawmnaak ani peeknaak khqi thai aham cykcah lah uh, 17 nangmih ak kawlung khuiawh cangnaak ak caming Khrish a awm thainaak aham. Lungnaak awh namik kqa thla unawh nami cakanaka aham cykcah nyng. 18 Thlakcimkhqi mi kutoetna a kaunaak, a saunaak, a saangnaak ingkaw a dungnaak khqi ce simcaithainaak ingkaw, 19 Khrish a lungnaak am sim noeng simthainaak ce ta thai kawm uk ti. 20 Cawhce, ningnih awh ak bi themsaithainaak amyihna, ni thoehnaak ingkaw nik poeknaak boeih anglakawh ak saang soeiha them ak saithaikung venawh, 21 kumqui dy, kumqui dy na, thlangboelkhqi ingkaw Khrish Jesu awh boeimangnaak awm poe seh nyng. Amen. (aiōn g165)

4 Nangmih ing khynaak nami huh amyihna khynaak ing ang qoep na khaw nami sak aham Bawipa awh thawng ak tla kai ing ni yin khqi nyng. 2 Namik kaw dung sak unawh taw awm moel moel uh; yhnaak ta law unawh taw pynoet ingkaw pynoet kawdung doena lungnaak ing awm law uh. 3 Qoepnaak ing pinzen qu unawh Myihla ak kawdawnaak ce nami hamnaak thai ham tha lo lah uh. 4 Purn pynoet doeng awm nawh Myihla awm pynoet ni a awm – nangmih anik khy khqi awh ngaih-unaak pynoet doeng en a nik khy khqi amyihna – 5 Bawipa pynoet, cangnaak pynoet, baptisma pynoet; 6 ik-oehi soepkep ak khan ingkaw ik-oehi soepkep awh ak awm Pa Khawsa pynoet doeng ni a awm. 7 Cehlai ningnih boeih a venawh Khrish ing a hoep lawnaak amyihna am qeenaaak ce peek na awm hawh hy. 8 Cedawngawh: "Khan na a hang kaiawh tamnaakhqi ce sawi khqi nawk, thlanghgingkhqi venawh awm kutdo ce pe hy," tinawh anak kqawn hy. 9 (Amah ce khawmdek ak kaina, khawmdek awh nuk kqum hy ti am awhtaw "hang kaai hy" tive ikaw ak kqawn ngaihnaak hy voei? 10 A nuk kqum ce khawk khan boeih ak khanna a hak kaai ceni, khawmdek ingkaw khawngi boeih anih ing a khuk thainaak aham cemiyihna ce awm hy.) 11 Anih ing thlangvang ce ceityih na, thlang vang ce twangna ha, thlangvang ce awithang leek ak kqawnkung na, thlangvang ce tuuk khai ingkaw cawngpyikung na tathy. 12 Khawsa ak thlangkhqi ing bibi thai unawh, Khrish a pum ce a ming dylh naak sak thai aham, 13 cangnaak awh pynoet na bawngqu unawh Khawsa Capa simnaak awh kawcyihnaak taak dyna ni awmnaak aham ingkaw, Khrish awh ni beenaak thai aham cemiyihna ce tathy. 14 Cawhtaw naasen na amni awm voel kawm uh, tuinu ing hu na hai na amni khyr voel kawmsaw, cawngpyinaak ingkaw thlang a thainaak soepkep ing hu na hai na amni zawn voel kaw. 15 Lungnaak ingkaw awitak ce nik kqawn kawm usaw, lu na ak awm Khrish awh ik-oehi soepkep awh ning taai hawh kawm uh. 16 Amah a venawh kawng pum boeih ce tuqu nawk tha pe qu uhy, lungnaak ing taai unawh, amah a bi ce bi qip uhy. 17 Cedawngawh ve ve ka nik kqawn peek khqi, ve a dawngawh Bawipa awh awm unawh, kawna amak ny Gentelkhqi ak poeknaak amyihna nami awm aham am awm voel hy. 18 A mingmih ang zaksimnaak taw khaw amyihna than nawh, simnaak a taak kaana kawlung ami qil sak adawngawh Khawsa hqingnaak ingqawi phek qu uhy. 19 Ak

che ak leek simnaak a taak voel kaa qoena, pumsa ngaih amak ciimcaih soepkep benawh a mimah ingkaw a mimah ce pe qu uhy, hy ngaihnaak benawh cet khqoet khqoet uhy. 20 Cehlai, nangmih taw, cemiyihna Khrish ce am sim uhyt ti. 21 Anih akawing ce naming zaaknaak amyihna Jesu Khrish awh ak awm awitak ce nangmih a venawh cawngpyi na awm hawh hy. 22 Maa nakaw nami khawsaknaa thlanghging khym, thailatnaak ing ak bee ce khawng unawh, 23 namik kawlung ce myihla awhce ak thaaina awm unawh; 24 thlanghging ak thaai, awitak dyngnaak ingkaw cimcaihnaak awh Khawsamayihna saina ak awm ing ce theoihcam qu kawm uk ti. 25 Cedawngawh nangmih boeih ing amak thym ik-oehi ce suut unawh na kengsam awhkaw thlang a venawh awih thym ce namik kqawn aham awm hy, ningnih ve pum pynoet a ke a baikhqi na ni awm uhy. 26 Kawso unawh, thawl mah koeh sai uh; namik kawsonaak ce khaw ing koeh tlaak pyi seh; 27 setan ce ang dyih hun koeh pe law uh. 28 Ak qu khawi ing koeh qu voel seh, bibi seitaw, ak voet ak hlauh thlangkhqi ce a do a dan thainaak aham amah a kut qoe ing amah a hawihkhangaak hly bi ce sai seh. 29 Nam khak khuiawh kawng awihche koeh cawn sak, cehlai a ngoengaihnaak amyihna themleek ak sai ham awileek a hoesi cawn seh, ak ngai zaakhqi ham lungnaakna a awmnaka a hamma. 30 Khawsa a Ciim Myihla ce koeh kawseet sak uh, hulnaak nyn aham anih awhce hatnak deng sihna namik awm ni. 31 Awihkhaakhqi, kawsonaakkhqi, kawtawinaakkhqi, qawnaakkhqi, awihche kqawnnaakkhqi boeih ingkaw thawlhaak boeih khqi ce centaak kawm uk ti. 32 Pynoet ingkaw pynoet ak khanawh qeenaaak ta law unawh, Khrish awh Khawsa ing nangmih qeenkhaw a ning ngai pekkhqi amyihna, nangmih pynoet ingkaw pynoet qeenkhaw ngai qu lah uh.

5 A lungnaak a cakhqi na nami awm amyihna, Khawsa a khawboe ak oetkung na awm law lah uh, 2 Khrish ing ningnih ni lung nak khqi nawk ningnih aham Khawsa venawh bawktui bulnaak na ang peek qu amyihna, nangmih awm lungnaak ing kaw sa lah uh. 3 Nangmih anglakawh nu ingkaw pa thawlhaak, kamvaanaak ingkaw amak ciimcaih ikawmyih awm a awm qoe qoe aham am awm hy, vermyihkhqi ve Khawsa thlangkhqi ing am kawih na uhy. 4 Chahnaak ben awihkqawn khqi, qawnaak awihkqawnkhqi ingkaw amak coeng poeloem halang awihkqawnkhqi ve a awm voel kaana zeelawi mah kqawn kawm uk ti. 5 Vekkhqi ve sim kawm uk ti: khawboe amak leek, amak caih ik-oehi ingkaw ak kamvaa ak thlang cemiyih ak thlang taw myihlip ak bawk ak thlang ni – cemiyih ak thlang ing Khrish ingkaw Khawsa qam ce am pang thai kaw. 6 Thlang ing awihqawng ing koeh ni thai nak khqi seh, kawthi cemiyihna awi amak ngai thlangkhqi ak khanawh Khawsa ak kawsonaak ce pa kaw. 7 Cemiyih ak thlangkhqi mi koei awm law hah uh. 8 Thannaak ak khuiawh ni nami awm hla, tuh taw Bawipa awm vangnaak ak khuiawh awm hawh uhyt ti. Cedawngawh vangnaak cakhqi amyihna awm lah uh, 9 (Ikawthi vangnaak ak thhai taw themleek, dyngnaak ingkaw awitak awh awm nawh), 10 Khawsa ngaihnaak ce hu uhy. 11 Ak thhai amak awm than a bibiaak awh koeh thum unawh taw, cemiyih ik-oehi sainaakkhqi ce dang sak lat uh. 12 Awingai kaana thannaak ak khuiawh kawtih cemiyihna awi amak chah awm hy. 13 Cehlai vangnaak ing ak coei ik-oehi boeih taw huu thai na awm hy, 14 vangnaak ing ik-oehi boeih ce huu thai aham coei hy, cedawngawh, "Aw ak ip nang, hqyng nawhtaw, thihnaak ak khuiawh kawng tho lhlah cawhtaw Khrish a vangnaak ing nik coei kaw," tinawh anak kqawn hawh hy. 15 Cedawngawh nami khawsak naak awh ce ak nep na naming ngaih ta lah uh, a cyih amak awm amyihna koeh awm unawh thlakcyi amyihna awm lah uh, 16 khawngkhikhqi ve ama leekvoel hawh adawngawh, a tym leek boeih boeih ce thlai lah uh.

17 Cedawngawh thlakqaw amyihna koeh awm unawh taw, Bawipa ak kawngaih ve ikawnu tice sim law lah uh. 18 Zuu koeh qui uh, ce ing khawboe amak leek ce awm sak hy. Ce anglak awh Myihla ing be leh uh. 19 Pynoet ingkaw pynoet Saamawi qkawn unawh, kyihcahnaak laa ingkaw Myihla ben laa ce sa lah uh. Namik kawk khuiawh Bawipa venawh kyihcahnaak laa ce sa lah uh, 20 a soep hoeiawh Pa Khawsa venawh ni Bawipa Jesu Khrilh ang ming ing zeelawi qkawn poepa lah uh. 21 Khrilh kqjhchahnaak ing pynoet ingkaw pynoet pe qu lah uh. 22 Zukhqi, Bawipa venawh naming peek qu amyihna nami vaakhqi venawh pe qu lah uh. 23 Khrilh taw amah a pumna ak awm, amah ing a thaawng thlangboel a lu na a awm amyihna, vaa taw zu a lu na awm hy. 24 Thlangboel ing Khrilh a venawh ang peek qu amyihna, zukhqi ingawm ik-oeih soepkep awh vaakhqi venawh ang peek qu aham awm hy. 25 Vaakhqi, Khrilh ing a thlangboel lungnaawh nawh a hqingnaak a peek amyihna, nami zukhqi ce lung law na uh. 26 Khrilh ing thlangboel ce ciimcaih sak hy, awi ak caming tui ing sil nawh, 27 amah a venawh ak vang thlangboel, myn a maa amak kap qoe, ak ciimcaih ingkaw coet amak kap na a peek amyihna nami zuukhqi ce lung law na lah uh. 28 Cemyih lawtna, vaakhqi ing ami zuukhqi ce a mimah a pum ami lungnaak lawt amyihna ami lungnaak aham awm hy. A zu ak lungnaak thlang taw amah a pum ak lungnaak thlang ni.

29 U ingawm amah a pum ce am sawh na khawi hy, Khrilh ing thlangboel a hquisawi amyihna, hqin amcah nawh hqui a sawi hy – 30 ningnih taw amah a pum awhkaw a ke a baikhqi na nik awm ni. 31 Ve ak camawh pa ing a nu ingkaw a pa cehta nawh a zu ce tawm kawm saw, pakkhih ce pumoet na coeng hawh kawni nih.

32 Ve ve awihdung awihyp na awm hy; cehlai kai ing kak kqawn taw Khrilh ingkaw thlangboel akawng ni kak kqawn hy. 33 Cehlai, nangmih boeih ing nami mah a pum nami lungnaak amyihna nami zukhqi ce nami lungnaak aham awm hy, zukhqi ingawm a mi vaakhqi ce a mik kqjhchah aham awm hy.

6 Naasenkqi, Bawipa awh nami nu ingkaw nami pakhqci ak awi ce ngai uh; vetaw ak dyng na awm hy. 2 "Nanu ingkaw napa kqjhchah lah," tinaak awi ve awipeek lammacyk ni. 3 "Naham na leek nawh khawmdek awh na hqinglu sang kaw," tinaak awitaak ak awm ni. 4 Pakhqi, nami cakhqi kawsonaak hly kawi koeh sai law pe uh; ce anglakawhtaw Bawipa awh yyn a tawnnaak ingkaw cuk am kiknaak ing taaif law sak lah uh. 5 Tamnaakhqi, Khrilh ak awi naming ngai peek amyihna, khawmdek awhkaw nami boeikhqi ak awi ce kawlung ciimnaak ing ngaih law pe unawh taw kqjhnaak ing kqjhchah lah uh. 6 Thlanghqing kawzeelnaak hamna mik huh doengawh bi a sai kana, Khrilh a tamnaa na nami awm amyihna, namik kawlung khuiawh kawng Khawsa ak kawngaih ce sai law uh. 7 Thlanghqing a bi ak bi amyihna ak poek kaana, Bawipa bi ak bi amyihna, namik kawlung tang tang ing bibi law pe uh, 8 kawtih tamnaa awm tamnaa am awm, thlang boeih ing bibi leek ami bi amyihna, Bawipa ing kutdo ce pe kaw, tice sim uhyk ti. 9 Boeikhqi, nangmih ingawm nami tamnaakhqi ce cemyihna sai law lawt uh. Cekkhqi ingkaw nami Bawipa taw khawk khan na awm hy tice sim doena, tamnaakhqi ce koeh the koeh kha na uh, kawtih Khawsa ing u a haai awm am toek hy. 10 A hukhit awh, Bawipa a saithai thaawmnaak awh namik tha awm law sak lah uh.

11 Setan ang cainaak ce nami khamaaka thai aham Khawsa a phuqhaa ing thoelhcam qu lah uh. 12 Ikawtih ningnih taw pumsa thisa qaal mi amning tuk qu unawh, ukkungkhqi, saithainaak ak takhqi, ve khawmdek than thaawmnaakkqi ingkaw khan nakaw Setan myihla thaawmnaakkqi mi ni ning tuk qu uh. (aiōn g165) 13 Cedawngawh Khawsa ang thoelhcamnaak Phuqhaa ing thoelhcam qu lah uh, cawh ni khawngi amak nep a pha law awh, ak cakna dyi thai kawm u tksaw, ik-oeih boeih nami sai coeng dyna naming

dyih hly thai hy. 14 Cedawngawh awitak cawi zeennaak ing zeen qu unawh, dyngnaak kqangdan ing dah qu doena, 15 quoepnaak awithang leek khawmyk ce myk doena a oepchoeh na awm lah uh. 16 Vemyihkhqi boeih boeih coengawh, cangnaak phuhqa ce pawm lah uh, ve ing ni setan a la ak alh hlap hlap ce namim thi hly thai hy. 17 Hulnaak thi lumyk ce myk unawh, Khawsa a zawzi Myihlak zawzi ce pawm lah uh. 18 A soep hoeiawh cykcahnaak thoehnaak soepkep ing Myihla awh cykcah lah uh. Ve ve nak kawk khuiawh taak doena, thlakciimkhqi boeih aham cykcah poe lah uh. 19 Ityk awhawm kam kha ka awng hoeiawh awithang leek awihyp ve ak kqjh kaana kak kqawnnaak thai aham, kai aham awm cykcah law lah uh, 20 ve a dawngawh dyilhthing na awm nyng saw thiqli ing khihna awm nyng. Kqjhnaak a taak kaana kak kqawnnaak thai aham, cykcah law uh. 21 Ka lungnaak ka naa, Bawipa a ypawm tyihzawih, Tukika ing ik-oeih soepkep ce nik kqawn law pek kqjh bit kaw, cawhkaw iamyiha ka awm nawh ikaw ka sai tice sim kawm uk ti. 22 Ikawmyihna ka mi awm tice sim unawh anih ing tha anii peeknaakkqi thai aham anih ce tyi law kawng. 23 Pa Khawsa ingkaw Bawipa Jesu Khrilh a ven awhkaw lungnaak ingkaw cangnaak ce koeinaakkqi venawh awm seh nyng. 24 Amak thi thai lungnaak ing ni Bawipa Jesu Khrilh ak lungnaak khqi ak khanawh am qeenakaawm seh nyng.

Filipi

1 Jesu Khrih a tyihzawih na ak awm, Paul ingkaw Timote ing. **1** Filipi awh ak awm thlakciimkhqi boeih ingkaw thlangboel ak sawikungkhqi ingkaw bibikung khqi venawh: **2** Bawipa Jesu Khrih ingkaw ni Pa Khawsa am qeenaaq ingkaw ngaihqepnaak awm seh. **3** Nangmih ka nik poek khqi a hoesiawh Khawsa venawh zeelawi kqawn nyng. **4** Nangmih boeih aham kak cykcah hoesiawh, awmhly doena cykcah poepa nyng, **5** khanngchin ak cyk awhkawng tuh dy awithang leek kqawnnaak awh nami paa thai a dawngawh, **6** Nangmih a venawh ak leek bibi a tylkung ing Jesu Khrih nyn a pha dy ak soep cana bibi kaw, tice upvoetaak am awm hy. **7** Nangmih akawng kai ing vemyihna kak poek ve kai aham thym hy, kak kawlung khuiawh ka nik poek khqi poepa a dawngawh; thiui ing khihna awm nyng awithang leek ve dyih pyi nyng caksak nyng awm, nangmih taw kai ingkaw Khawsa qeenaaq ak pang hainha ni awm u hyk. **8** Nangmih ve Jesu Khrih a lungnaak ing i ikawmyih tluk ka ni kyngnaak khqi tice Khawsa ing sim hy. **9** Kak cykcahnaak taw: nangmih a lungnaak ce cyihnaak simnaak ing a be naak khqoet khqoet aham na ni, **10** cawh ni ak leek soeih ce ngaih thai unawh Khrih a khawngkha a pha hlan dy coet amak kap cimcaihnaak ing nami awm hly thai, **11** Khrih awhkaw ak law dyngnaak ak thaing ing be kawm u tiksaw - Khawsa a boemang zoeksangnaak na a awm hly. **12** Kak khanawh ik-oehi ak awm ing awithang leek haina maa sak hy, tice koeinaakhqi, sim sak ham ngaih nyng. **13** Ahu nataw boei a im ak qehkhqi ingkaw thlang boeih a venawh Khrih aham ni thiui ing khih na ka awm tice ak ciim na dang hy. **14** Thiui ing khih na ka awmnaak a dawngawh, Khrih awh koeinaa thlang ak kuum bet ing Khawsak awi ce qal leeknaak ing kqih kaana khypyi ham thaawmnaak hui uh. **15** Thlang a vang ingtaw Khrih ce ytnaak ingkaw kqawnseetnaak doena kqawn pai uhy, cehlai thlangvang bai ingtaw kawlung ak leek soeih taak doena kqawn uhy. **16** Cekkhqi ing Awithang leek ak kqawn hamna Khawsa ing ve bibi ani pec niti sim unawh lungnaak ak camawh ak kqawn khqi na awm uhy. **17** Thlangvang ingtaw a tangtang na am bi unawh, nang aw kai aw tinaak kawlung ing suibai ami bai a kawnglamawh awipungnaak ak awm kawina amik sai ni. **18** Cehlai ikawmyihna a awm? A hqawng na mai awm, atak na mai awm Khrih ce khypyina ak awm ni, cedawngawh kak kaw zeel hy. Oeih, zeel poe kawng nyng. **19** Cetaw nangmih ak cykcahnaak ing Jesu Khrih Myihla ak pyinaak ak camping, ka venawh ik-oehi ak awm ve ka loetnaak na coeng kaw tice sim nyng. **20** Am chak qoe ti kawng, tuh awhkawng a poepa na ka pum awm Khrih ve thihiak ang am awhtaw hqingnaak ing aw zoeksang na awm kaw, tice qehdam doena ngaih-uu nyng. **21** Kai aham ka hqingnaak ve Khrih ni, ka thih awh awm ka hoesiikhqanak ni. **22** Cehlai ka pum awh ve ka hqiq poe awhtaw, ka bibinaak ak thaing qah kaw tinaak ni, Cehlai ikaw kak tyk lah voei? Am sim nyng! **23** Ik-oehi pakkhii anglak lawawh awm hqoeng nyng: kamah ingtaw cet nawh Khrih ing awm hahng ngaih bet hawh nyng, ce ce nep bet hy; **24** cehlai pum awh ka awm ve nangmih aham ngoe hyn hy. **25** Awm hyn kawng tice sim nyng, nangmih cangnaak awh nimi taainaak aham nami venawh awm poe kawng nyng ti sim nyng. **26** Cawh ni nangmih mi ni awm hainhaak ak camping Jesu Khrih awh nami zeelnaak ce kai ak camawh a ngen hly hy. **27** Oeih ikawmyihna awm seiawm, nangmih a khawboe qamlang ce Khrih ak awithang leek ing ang qeep na awm sak uh. Cawhtaw, kai law nyng ka ni huh khqi awh awm, am law nyng nami kawng kang zaak awh awm, kawlung pynoet ing dyi kawm u tiksaw, thlang pynoet amyihna awithang leek cangnaak awh naming dyih hly thai hy, **28** nangmih anik oelh thlangkhqi ce am kqih voel ti kawm uk

ti. A mingmih aming tluk naak aham simnaak taw ve ni, cehlai nangmih taw hul na awm kawm uk ti - Khawsa ing ni hul khqi kaw. **29** Amah ce cangnaak aham doeng kaana, anih aham kyinaak huh ham awm Khrih ang zyng na nangmih a venawh peek na awm hawh hy, **30** tuh kai ing ka huh kyinaak huh lawt aham nangmih awm awm u hyk ti.

2 Khrih ingqawi tuqunaak ak camping thaawrnnaak, a lungnaak camping ngaihqepnaak, Myihla ingkaw pawlhengnaak, thlang geenkaw ngaainaak, nami taak awhtaw, **2** kawlung pynoet na ta unawh ka awmhlyna we soep sak uh, cawhkaw lungnaak ce ta unawh, kawlung pynoet ing cainaak ce ta lah uh. **3** Mah doeng ngaihnaak ing mai aw oekqunaak ing mai aw ik-oehi koeh sai law uh, cehlai kawdungnaak ing na mimah anglakawh thlak chang ce ak leek bet na poek law uh. **4** Na mimah a ngaihnaak doeng ce koeh toek law uh, thlakchang a ngaihnaak awm toek law pe uh. **5** Ve poeknaak, Jesu Khrih ak poeknaak amyihna awm seh nyng. **6** Anih cetaw ang coengnaak awh Khawsa na awm hlai hy, Khawsa ing ang myih na a awmnaak ik-oehi ce tu aham ap poek hy, **7** amah ingkaw amah ce ikawna awm ang ngaiqu kaana, tyihzawih ang dyih hui ce a hui coengawh, thlanghqing amyihna ce sa qu hy, **8** thlanghqing pynoet amyihna awm lawt nawh, dungvoeng na ce awm hy, thih dy na awi ngai nawh - thnglam khan awh thi hy. **9** Cedawngawh Khawsa ing, anih ce ak sang soeih awh ta nawh, ming boeih boeih ak khanawh, ak awm ming ce pehy. **10** Jesu ang ming awh, khan ingkaw dek ingkaw khawmdek kai awhkaw, khawkhlu boeih ing khuksym nawh, **11** Khawsa boemang naak aham, lai boeih ing Jesu Khrih taw Boei ni tice ak kqawnnaak aham ni. **12** Cedawngawh ka pyikhqi, awi naming ngai khawi amyihna - kai ka awm awh awm, tuh am ka awm ak khqoet awh - kqih ingkaw thyn doena nangmih thaawngnaak ce bi poe lah uh, **13** ngaihnaak ham ingkaw ak leek soeih amah ang cainaak sainaak aham nangmih ak khuiawh bi ak bikung taw Khawsa ni. **14** A soep hoi ve hqo ang hqitnaak taak kaana sai law uh, **15** Khawsa a ca coet amak kapna nami awmnaak aham awipungnaak ingkaw hqo ang hqitnaak amak awmna a soep hoi ve sai law uh, cedawngawh nangmih taw khan nakaw aihchi amyihna vang uhyk ti. **16** Hqinqnaak awi ce ak cakna namim tu awhtaw a hoeina am dawng nawh ka bibinaak ve a hoi na a awm kaana Khrih nyn awh ka zoeksang qu hly thai. **17** Hyih phumnaak awh aawk hly kawi ik-oehi peek amyihna ni hawk unawh nangmih ak cangnaak awhkawng ak law bibinaak na awm mai nyng awm, nangmih awh zeel nyng. **18** Cemyih koepna nangmih awm kai amyihna namik kaw zeel nawh nami awmhly aham awm hy. **19** Nangmih a venawh Timote tyi law hly nai nyng tinawh Bawipa. Jesu ak camping ngaih-uu nyng, cawh ni nangmih ak awithang kang zaak awh kai awm kang ngai a qep hly. **20** Nami leeknaak ahamna kawlung tak ing ak pequ, anih a myih thlakchang u awm am ta nyng. **21** Ikwith, thlang boeih ing amimah a leeknaak doeng ce sui uhy, Jesu Khrih ak kawngaih am sui uhy. **22** Timote ingtaw amah ingkaw amah ce huqo hy, kawthi pa ingkaw capamyihna awithang leek awh bi ni bi pyi hy. **23** Cedawngawh, ka bi sai ve ka nai ka nawng coengawh anih ce tyi law nai bit kawng tinawh ngaih-uu nyng. **24** Kamah awm law nai ngai kawng nyng tinawh Bawipak camping ngaih-uu nyng. **25** Ka napa, ka bibipyi hahng ingkaw ka qalkap pyi Apaphroditia ve nangmih a venawh ka tyih law tlhai ham ngoe hy tinawh poek nyng, anih nangmih a dyiathing na awm nawh kai anik bawmkung na nami tyih law na awm, awm bai hy. **26** Nangmih ni kyng nak khqi boeih hy, tlo hy tinawh naming zaak a dawngawh ak kaw se hy. **27** Thih tawm dyna tlo taw tlo hy. Cehlai, Khawsa ing qeen hy, anih doeng a qeen kaana kawsetnaak ce kawsetnaak ing ama sap voel aham kai awm ni qeen hy. **28** Cedawngawh anih ce

ka tyih law ham ngaih nyng, cawh ni anih ce nami huh awh zeel kawm u tiksaw kai awm am ka mawn am ka tang hly bet hy. **29** Zeel doena anih ce Bawipa awh ym law uh, anih amyihna ak awm thlangkhqi awm kqjhchah law uh, **30** A thihi tawm dyna Khrish bi ce bi hy, nangmih ing am nami peek thai dawmhlainaak ce peek aham a hqjngnaak dy awh kyinaak hu hy.

3 Ahu khit nataw, koeinaakhqi, Bawipa awh zeel sah leh uh! Caa ka qee tlaih tlaih ham am ngak nyng. Nangmih aham loetnaak na ni a awm. **2** Them che ak sai, pumsa awh chahhui ak qeet uikhqi awh ngaihta uh. **3** Ikwatih, ningnih ve chahhui ak qeetkhqi, Khawsa Myihla ing Khawsa ak bawk, Khrish awh zoeksang na ak awm, pumsa awh ypnaak amak ta na ni awm uh. **4** Vemyihkhqi awh kai ingawm ypnaak ta nyng. U ingawm pumsa awh ypnaak taak aham ak poek awhtaw, kai tak khqoet nyng; **5** Ak kqeet nyng awh chahhui ak qeet, Juda thlang, Benjamin ak kaw, Hebrai khuiawh Hebrai na awm nyng; anaa awi ben awh, Farasi na awm nyng; **6** thahlynaak ben awh, thlang ak thekhanaak kung na awm nyng; dyngnaak benawh coet amak kap na awm nyng. **7** Cehlai ka hawihkhangaak boeih boeih ce tuh awhtaw Khrish awh hlaawng boeih hawh nyng. **8** Ce anglakawh ik-oehi kha hlaawngkhqi boeih ce ka Bawipa Jesu Khrish ang ming ing ka nythah awh bau khqoet hy, anih awh ik-oehi boeih boeih ce hlaawng kang hawh nyng. Cemyih khqi ce boei nani kak poek, Khrish ce hu nyng. **9** Amah awh huh na ka awm naak thai aham ni, anaa awi awhkawng ak law kamah a dyngnaak am ta nyng, Khrish ak cangnaak ak caming ing ni dyngnaak ce ka taak - Khawsa ven nakaw ak law dyngnaak ingkaw cangnaak ak caming ni. **10** Khrish ingkaw a thawtlaihnaak thaawmnaak ingkaw a khuihanaak khqi awh yh pyinaak, a thihnaak awh amah amyihna coengaak, **11** Ikawp na awm thihnaak awhkawng thawtlaihnaak ce huh aham ngaih nyng. **12** Ak hu hawhna am ngai qu nyng, ak soep hawhna awm am ngai qu nyng; "Khrish a nim tunaak ing ang cainaak ce ke huh thai khoem awhtaw," tinawh a hqjntua hqjntu nyng. **13** Koeinaakhqi, ak hu hawhna am ngai qu nyng. Cehlai ve them pynoet ve sai nyng – hu ben nakaw ik-oehi ak awmkhqi ce hilh nawh, malam nakaw ik-oehi ak awmkhqi ce pan ing, **14** Khrish Jesu Khawsa khan ben nakaw ak khynaak kutdo huh ahamna awikam benna ce dawng poepa nyng. **15** Ningmih thlik hqamkhqi boeih ingtaw cemyih ik-oehi ce nik poek ham awm hy. Ikawmyih a kawnglam awhawm kawlung ak chang ak toenna nami awm awhawm, Khawsa ing ni sim law sak khqi kaw. **16** Ikawmyihna awmseiawm, ni phanaak hun awhkawng malam pan usih. **17** Koeinaakhqi, ka khawsak ak oot na awm lah uh, nami oot kawi kaimih awm unyng, cemyihna khawksakhqi ce toek khqi kawm uk ti. **18** Thiang khawzah cet uhy, cehlai cekkhqi taw Khrish thinglam a qaalna awm uhy tinawh ami kawnglam ce nik qkawn pek khqi hawh nyng. **19** A mingmih a dytnaak taw qawknaak na awm nawh, ami Khawsa awm a mimah ak phoen ce ni, ami zoeksangnaak awm chahqai phyihnaak ni. Amik kawlungkhqi ce khawmdek them awh ta uhy. **20** Cehlai, ningnih taw khan ben thlang nani ni awm uh. Ningmih ing cawhkaw hulkung ce ning ngaih-u uhy, Bawipa Jesu Khrish ce, **21** amah a sai thainaak ak caming ik-oehi boeih ak takung ing ak kaina nik awm ningnih a pumkhqi ve amah a boemangnaak pum na coeng sak kaw.

4 Cedawngawh, ka koeinaa, lungna nawh kang ngaikhqi, ka zeelhaak ingkaw ka boei lumyk na ak awmkhqi, ka pyikhqi, cemyihna ce Khrish awh ak cak cana na ming diyh ham awm hy! **2** Bawipa awh qoepqui cana nami awm naak aham, Euodia ingkaw Suntuki avenawh awm geennaak thoeh law nyng. **3** Oeih, ka bibipyi, ni thoeh law nyng; Awithang leek awh a nik dyihpyi, Kalemen ingkaw ka bibipyi chang hqjngnaak cauk khuiawh ming

ak awmkhqi ingkaw nukhqi ce pyih khqi. **4** Bawipa awh zeel poepa lah uh: kqawn tlaih bai nyng, zeel lah uh. **5** Nangmih ak kawdungnaak ce thlang boeih ing sim seh. Bawipa taw zoe hawh hy. **6** Ikaw awhawm mawnnaak koeh ta law uh; a soep hoeiawh cyckcahnaak ing thoeh unawh, zeelawi kqawn doena, naming sytnaak boeih ce Khawsa venna zaaksak na awm seh nyng. **7** Cawhtaw, Khawsa ngaihqeep naak, kawlung ing ama pha thai ing namik kawlung ingkaw namik kawpoek ce Khrish Jesu awhce ni khoemdoen pek khqi kaw. **8** Ahu dyt na taw, koeinaakhqi, ak thym boeih, kqjhchah kawi boeih, ak dyng boeih, ak ciimcah boeih, lungnaak ak kap boeih, nai ak cu boeih - ikaw awm leek nawh kylhcah ham ak tyng boeih - cemyih ce poek law uh. **9** Kai a ven awhkawng nami cawngkhqi nami huhkhqi ingkaw naming zaakkhqi ce sai lawt uh. Ngaihqeepnaak Khawsa ing ni awmpyi khqi kaw. **10** Ahu dyt na kai awh kawlung ak thaai na nami taak a dawngawh Bawipa awh zeel soeih nyng. **11** Ka voet ka lhalu a dawngawh vemyihna ka ti amni, ikawmyih diyh hunawh awm nyng awm, ka awm thainaak aham cawng nyng. **12** Ak voetna khawsak sim nyng, boeina khawsak awm sim nyng; ikawmyih diyh hun buh cawih ingkaw ak phyi khawsak, boei ingkaw khawdeng khawsak awihhyp ce sim boeih nyng. **13** Thamahnaak anik pekung ak caming a soep boeih sai tha nyng. **14** Cehlai ka kyinaak ce nangmih ing ni bawm u tiksaw leek uhyti. **15** Ce anglak bai awh nangmih Filipi thlangkhqi ing nami sim amyihna, awithang leek naming zaak cyk tloek awh, Makedonia benнакawng ka law awh thlangboel pynoet ingawm peeknaak ingkaw donaak am ta uhy, nangmih doeng ing ni nami taak hy; **16** Thesalonika khaw awh ka awm awh awm, ka ngoe ngaihnaakkhqi pat law tlaih tlaih uhyti. **17** Kai ing laksawng am ngaih-uu nyng, cehlai nangmih aham ikaw hawihkhangaak a awm kaw ti ni kak poek. **18** Thaphu hu nyng khawzah hu pateng nyng, tuh Epaphrodita a ven nakawng nangmih a kutdo pat awm hu bai nyng. Ce a kutdo cetaw bawktui kutdo na awm hy, do ham ak tyng hyihphumnaak, Khawsa ak zeel sakna awm hy. **19** Khawsa ing Jesu Khrish awh a boemangnaak amyihna nangmih a ngoe ngaihnaak boeih ce ni soep pe sak khqi kaw. **20** Ni Khawsa ingkaw Pa a venawh zoeksangnaak kumqui dy awm seh nyng. Amen! (aiōn g165) **21** Khrish awh thlakciimkhqi boeih ce kut tlaih law uh. Ka venawh ak awm koeinaakhqi mi kut ni tlaih khqi uhy. **22** Thlakciimkhqi boeih ing kut ni tlaih khqi uhy. Awipui na Kaisar ipkhui kaw ing ni tlaih uhy. **23** Jesu Khrish a lungqeennaak ce nangmih ang Myihlak khan awh awm seh nyng. Amen.

Kolosa

1 Khawsa ngaihnaak amyihna Jesu Khrin a ceityih na ak awm Paul ingkaw nangmih a naa Timote ing, **2** Kolosa khaw awhkaw Khrin awh ypawm na ak awm koenaa thlakciimkhqi venawh: Nangmih Pa Khawsa awhkaw qeennaak ingkaw ngaihqeepnaak awm seh nyng. **3** Nangmih Bawipa Jesu Khrin a Pa Khawsa venawh, nangmih aham ka mik cykcah awh, zeelnaak awi kqawn poepa unyng, **4** Jesu Khrin awh nangmih ak cangnaak ingkaw thlakciimkhqi nami lungnaak ce ka ming zaak ak camawh, **5** ngaih-unaak awhkawng ak thoeng law cangnaak ingkaw lungnaak ce khawk khan na nangmih aham cun ce na awm hawh hy, ve akawng ve awitak awhkawng nangmih ing za hawh uhyt ti, awithang leek ce nangmih a venna law hawh hy. **6** Ce ak awi ce nangmih ing za u tiksaw Khawsam qeennaak ingkaw awitak ce naming zaksim coengawh kawng nangmih anglakawh bi a bi lawt amyihna khawmdek pum awh ve awithang leek ve ak thaih qah nawh hqam hqui hy. **7** Ve akawng ve tyihzawih pyi, kaimih ang zyng awh ypawm na Khrin bi ak bi Epaphra a ven awhkawng sim uhyt ti, **8** anih ing Mihih awh nangmih ing lungnaak nami taak awm ka mi venna kqawn law hy. **9** Vawh, nangmih a thang ka ming zaak cyk awhkawng, nangmih aham cykcahnaak a boet kaana ta unyng. Amah ak Kawngaih saithainaak ingkaw mihih ben cyinhaak boeih ingkaw zaksimnaak boeih boeih ing nami benaak thai aham Khawsa venawh theoh law nyng. **10** Bawipa ak Kawngaih na hqing unawh ik-oeih soepkep awh amah ak Kawzeelnaak nami sainaak aham cykcah nyng: ik-oeih soepkep awh ak thaih leek nami qah coengawh Khawsa simnaak benawh nami hqamnaak thai aham, **11** yh thainaak ingkaw kawdungnaak nami taaknaak thai aham, amah boemang thaawmnaak boeih ing tha awm sak na awm uhyt ti, zeel doena. **12** Pa a venawh zeel awi namin kqawnnaak thai aham, anih ing thlakciimkhqi ingkaw vangnaak qam khuihaw qo pang hain aham nangmih ce ni sai khqi hawh hy, **13** Kawthi amah than uknaak khui awhkawng ni hul khqi nawh a lungnaak a Capa qam khuina ni khyn khqi hawh hy. **14** Anih awh ce nangmih ing hulnaak, thawlh queenkawh ngainaak ce ni ta uhy. **15** Anih taw huh thai na amak awm Khawsa myi, ik-oeih sai boeih boeih ak khanawh ak thang cyk na awm hy. **16** Anih ak caming ik-oeih boeih ve syn na awm hy: khan ing dek awhkaw ik-oeihkhqi boeih, huh thai ingkaw am huh thai boeih, ngawihdoelh sang ingkaw thaawmnaakkhhqi, uknaakkhhqi ingkaw saithainaakkhhqi; a soep ik-oeih boeih ve amah ing amah aham sai hy. **17** Ik-oeih boeih a awm hlanawh anih taw awm hawh hy, anih awh ik-oeihkhqi boeih ce cun boeih hy. **18** Amah taw pum, thlangboel a lu na awm hy; ik-oeih soepkep a baunaak ak sang soeih na a awm thainaak aham, a kung ak qjannaak ingkaw thlakthi anglakawh kawng ak thang lamma na awm hy. **19** Anih awh a soepnaak ce Khawsa ak kaw zeelnaak na awm hy, **20** amah ak caming a soep hoei, khawmdek khanawh ak awm ingkaw khanna ak awm boeih ce, thinglam awhkawng ak lawng law a thi ingkaw qoepnaak a sainaak ak caming qoepqui sak na ce awm hy. **21** Khawsa ing pek qu hawh u tiksaw nami khawboe a seet a dawngawh kawlung awh qaal na awm hawh uhyt ti. **22** Cehlai tuh taw a haiawh a ma amak awm coet amak kap thlakciim na anih peek naak khqi thai ham, Khrin a pum a thihnaak ak caming nangmih ing tuqunaak ce sai hawh hy - **23** cangnaak awh nami awm poe awithaw, ak cak cana dyi unawh, awithang leek awhkaw ngaih-unaak ce koei thoeih taak uh. Ve awithang leek ve nangmih ing za u tiksaw khawngi ak kaiawh ak awm a sai ik-oeih boeih a venawh khypyi na awm hy, ve a dawngawh ni kai Paul awm tyihzawih na ka awm. **24** Tuh nangmih aham ka khuikhanaak awh

ve zeel nyng, Khrin a khuikhanaak tika nataw ka pumsa awh ve be sak nyng; vetaw amah a pumna ak awm thlangboel aham nani. **25** Khawsa ing ani tyihnaak amyihna nangmih a venawh Khawsa awi ka soepna khypyi aham kai taw tyihzawih na awm nyng - **26** cawhawng awihyp kum khawqyt ingkaw cadil cegyt thuh na ak awm ce, tuh awithaw thlakciimkhqi venawh dang hawh hy. (aiōn g165) **27** Cekkhqi venawh Khawsa ing vawhkaw a boeimang awihyp ve Gentelkhqi venawh kqawn aham tyi hawh hy, ce ik-oeih cetaw boeimangaak ngaih-u na ak awm nangmih ak khui awhkaw khqi ceni. **28** Kaimih ing anih akawng ce khypyi unyng, toel unyng thlang boeih ce Khrin awh a soepnaak thai aham ciyinhaak boeih ing cawngpyi unyng. **29** Ce ak bi hamna Khrin ak thamahnaak hawnaak ing bibi poepa nyng, cawhkaw thaawmnaak ing kai awh bibi hy.

2 Nangmih ingkaw Laodicea khaw awh ak awmkhqi, pumsa awh kai ama nik hu khawi thlangkhqi boeih aham iqyt ka khuikha ti nami sim aham ngaih nyng. **2** Kawlung ngaihqepnaak ta unawh lungnaak ing naming tuqu aham ngaih nyng; cawh ni zaksimnaak ta unawh, Khawsak awihyp, Khrin ce ami sim hly thi, **3** anih awh cylinhaak ingkaw simnaak boeih ce thuh na awm hy. **4** Thlang ing pauthainaak ing nangmih a mani thainaak khqi aham ve ve nik kqawn pek khqi nyng. **5** Nangmih a venawh pumsa na am awm hlai nyng, kang mihih taw nangmih a venawh awm nawh nangmih ing a cypmyih na Khrin awh cangnaak cak ing nami awm ce huh aham ngaih nyng. **6** Cawthaw, Jesu Khrin ce Boei na namik kqoei hawh a dawngawh, anih awh awm poe lah uh, **7** Amah awh namik kqa thla u nawhtaw dyi lah uh, cawngpyinaak nami huh hawh amyihna cangnaak awh namik tha awm sak unawh, zeelnaak ing be ngen lah uh. **8** U ingawm awihqawng khawmdek cylinhaak ing koei ni thai nak khqi seh, cemyihkhqi ce thlanghqing a phung ing Khrin awh amak koemkhqi khawmdek them nani ami awm. **9** Khrin awh Khawsa soepnaak boeih boeih pum ce awm hy, **10** saithainaak boeih a lu na ak awm, Khrin awh soepnaak ce nangmih a venawh peek na awm hawh hy. **11** Anih awh, khawmdek thawlh hlamaak chahhuiqueet na awm hawh uhyt ti, thlanghqing a kut sai chahhuiqueet na am awm nawh Khrin a sai chahhuiqueetaak ni, **12** baptisma awh amah ing pup hiah na awm u tiksaw, amah ce thihnaak awhkawng anik hulkung Khawsa ak thaawm cangnaak ak caming ak tho hain na awm bai uhyt ti. **13** Thawlhaak awh thih na awm u tiksaw, khawmdek thawlhaak awh chahhuiqueet kaana nami awm awh, Khawsa ing Khrin ing ni hqing sak khqi hawh hawh hy. Ningmih a thawlhaak boeih awh queenkawh ning ngai pek khqi hawh hy. **14** Cauk awh qee na ak awm, cawngpyinaak awi, ningnih a qaal na ak awm ce lo nawh, thinglam awh heen boeih hawh hy. **15** Saithainaak thaawmnaak khqi ce tha boeih sak nawh, thinglam ing cekkhqi ce a noeng coengawh thlang kqeng amik huh awh dang sak hy. **16** Cedawngawh u ingawm nangmih a awk a ai awh, bawkaak benawh kaw poei khawngi awh, hlak thai awh Sabbath awh awi koei ni deng khqi seh. **17** Vemyihkhqi taw ak law hly kawi ik-oeih ang mihih na awm nawh; a tak taw Khrin awh ni hu hy. **18** Amak thym ak kaina awmnaak a lungnaakkhhqi ingkaw khan ceityih ak bawkkhhqi ing kutdo na huh hly kawi awh koei ni lawlh koei ni maih u seh. Cemyih ak thlang ingtaw a huh ik-oeih ce ak dung na poek nawh; mihih amak awm kawlung ce thangkaak ing oek qu sak hy. **19** Lu ing tuqunaak lam hang hy, lu awhkawng ni pum boeih tha pe nawh quhgawng ingkaw thaqui thakqaa khqi boeih ak thamah sak nawh, Khawsa a ngaih kawi amyihna taa kawai hy. **20** Ve khawmdek a kung qjannaak awh Khrin nami thi hain hawh a dawngawh, kawtih khawmdek a koe na ak awm amyihna: **21** Koei tu! Koei teng! Koei bi!" ti uknaak ak khuiauh nami awm

paqap kaw? 22 Vekkhqi boeih taw thlanghjing ak awipeek ingkaw cawngpyinaakawi na a awmawh a hawnnaak hly kawi nani a awm boeih hy. 23 Vemyih cawngpyinaakawi, nimah a ngaih poeknaak, bawknaak, amak thym na ak kaina awmnaak ingkaw nimah a pum ak tlo soeih na khuikha peeknaakkhqi ve ak khan awhtaw ak cyi amyihna dang hlai hy, pumsa a ngaih soepnaak aham a hawikhhangnaak am awm hy.

3 Khrir awh thawhtlaih na nami awm hawh awhtaw, Khawsa a tang ben awh ak ngawi Khrir a awmnaak, khan benna kaw them awh namik kawlung ce ta lah uh. 2 Khawmdtek them awh kawlung taak kaana, khan ben nakaw ak awm them awh namik kawlung ce ta lah uh. 3 Thi u tiksaw, nangmih a hqingnaak ce Khrir ingkaw Khawsa awh thuh na awm hawh hy. 4 Nami hqingnaak Khrir ce ang dang law awh boeimang ak thlang na dang kawm uk ti. 5 Cedawngawh, khawmdtek themkhqi ikawmyih awm thi sak boeh boeh uh: nupa thawlhaak, amni ciimnaak, hyy ngaihnaak, themche ngaihnaak ingkaw ak pyh ngaihnaak, vemyihkhqi ve myi bawknaak na awm hy. 6 Vemyihkhqi awh ve, Khawsa ak kawsonaak pha law kaw. 7 Vemih ik-oeih awh nangmih awm u tiksaw cet khawi uhyk ti. 8 Cehlai tuh taw vemyih ik-oeihkhqi boeih ve nami qoeng aham awm hy: kawsonaak, kawtawknaak, thlang sawhnaak, thlang theethnaak ingkaw tyih ak awm awi qoe qoe ce nam kha awhkawng koeh cawn seh. 9 Nami thlanghjing kqym a bibinaak ce nami qoeng hawh a dawngawh, pynoet ingkaw pynoet a venawh nami qaai koeh kqawn uh. 10 Saikung a myi ingkaw anik lo qu cyihnaak awh thaai sak na ak awm thlanghjing thaai ing theoihcam qu lah uh. 11 Vawh Greek ingkaw Juda am awm nawh, chahhuiqeet ingkaw ama geet awm am awm hy, tlak kqym, Skuthia, tamnaa ingkaw ak loet awm am awm hy, Khrir taw ik-oeih soepkep awh soepkep na awm hy. 12 Cedawngawh, Khawsak thlang tyk, tlakciim ingkaw am thintlohnaka thlangkhqi na nami awm amyihna pynoet ingkaw pynoet geennaak, kawdungnaak, ak kaina awmnaak, yhnaak ing theoihcam qu lah uh. 13 Pynoet ingkaw pynoet ythainaak ta law unawh, pynoet ingkaw pynoet ak khanawh kawset naak na sai thawlh awhtaw queenkaw ngai law uh. Bawipa ing queenkaw ang ngai amyihna queenkaw ngai law uh. 14 Vemyih ik-oeihkhqi boeih coengawh lungnaak ing theoihcam qu uh, ce ing ce zen qu unawh pynoet na cuut qu law uh. 15 Nangmih ak kawlung ce Khrir a ngaihqeepnaak ing uk seh, pum pynoet a ke a bai na nami awm amyihna qoepnaak ing awm aham nani nangmih ce anik khy khqi. Zeelnaak awi kqawn uh. 16 Pynoet ingkaw pynoet cyihnaak boeih ing cuk am kik qu unawh naming toel qu awh nangmih ak khuiawh Khrir ak awi khawzah awm law sak uh, Saam laa sa unawh, laa saknaak ing Myihla ben laakhqi nami sak awh nak kawlung ing Khawsa venawh zeelnaak awi kqawn doena sai law uh. 17 Ikaw boeih awm nami sai awh, nak awih kqawnnaak ingkaw na them sainaak awh Bawipa Jesu ang ming ing sai law uh, Pa Khawsa venawh anih ak caming zeelnaak awi kqawn law uh. 18 Zukhqi, Bawipa a awm amyihna, nami vaakhqi venawh pe qu lah uh. 19 Vaakhqi, nami zu ce lung law na unawh ak tlo aih na koeh zyi law uh. 20 Cakhqi, ik-oeih soepkep awh na nu ingkaw na pa ak awi ce ngai lah, kawtith vetaw Bawipa a ngaih ni. 21 Pakhqi, na cakhqi ak kawsonaak koeh sai law pe uh, amik kaw boet kaw. 22 Tamnaakhqi, ik-oeih soepkep awh khawmdtek awhkaw nami boei awi ngai uh, thlang ak kawzeelnaak ham doenga thlang amik huh doengawh bi koeh bi unawh, Bawipa kqjhchah doena sai law uh. 23 Ikawm nami sai taw, thlang a bi ak bi amyihna koeh poek unawh Bawipa bi ak bi amyihna na mik kawlung boeih ing sai law uh. 24 Bawipa venawh kaw kutdo qo pang hly kawi ce sim hawh uhyk ti. Boeikhqi bi ni nangmih ing nami bi uh. 25 U awm ik-

oeih ak sai thawlh thlang taw a sai thawlh phu ce thung tlaih kaw, mikhaai toeckaak am awm kaw.

4 Boeikhqi, nami tamnaakhqi ak khanawh ak thym ingkaw ak dyng ik-oeih ce sai law pe uh, kawtih nangmih awm khawk khan na Boei ta uhyk ti, ti sim uhyk ti. 2 Cykcah poepa unawh, zeelawi kqawn doena ngaihta uh. 3 Kaimih ak khypyi awi awh Khawsa ing chawh awng nawk, Khrir ak awihyp ce ka mik khypyi thainaak aham, kaimih aham awm cykcah law lawt uh, cedawngawh ni quihget ing kihh na ka awm. 4 Ak caih phan na kak khypyi hly kawi ce kak khypyi thainaak aham cykcah uh. 5 A leng benna kaw thlangkhqi venawh ik-oeih nami sai awh ngaihta uh; a typ leek nami huh awh phu ak awm doeng ce sai law uh. 6 Awihhkqawnnaak a hoeiawh qeennaak ing be poepa seh, ikawmyihna awi ka thungnaak thai kaw ti nami simnaak thai aham cii amyihna al law uh. 7 Tukhika ing kai ak awithang boeih ce kqawn law boeih bit kaw. Anih ce ka lungnaak ka naa, bibikung ypawm ing Bawipa awh tyihzawih pyi hiah na awm hy. 8 Kaimih ang dyih hun ingkaw ka ming cainaak ce sim unawh kawlung thaawmnaak nami taak thainaak aham anih ce nangmih a venna tyi law kawng. 9 Anih ce kaimih a ypawm ka lungnaak ka naa Onesima ing law hiah kawn nih, anih ce nangmih a venawh kaw ni. Vawhkhqi ik-oeih akawngkhqi boeih ce cekqwai ing kqawn law bit kawn nih. 10 Thawng kang tlak pyi hiah Aristarka ing kut ni tlaih khqi hy. Barnaba a naa bennak a awm Marka ingawm kut ni tlaih khqi hy. (Anih am cukkiknaak awi ce do hawh uhyk ti; anih ce a law awhtaw ak nep na do uh). 11 Jasta ak mingnaak Jesu ingawm kut ni tlaih khqi boeih hy. Vemyihkhqi boeih ve Khawsa qam bi ak bi pyukungkhqi khuiawh Juda thlangkhqi na awm uhy, cekkhqi ing kang ngaih qep sak uhy. 12 Jesu Khrir a tyihzawih pynoet na ak awm Epaphra ing kut ni tlaih khqi hy. Khawsa a ngaihnaak boeih awh ak cak na naming dyih phat coengawh, hqam khyk unawh a tang na nami awmnaak thai aham, nangmih aham anih ve cykcah poepa hy. 13 Nangmih aham Loadicea khaw ingkaw Hiqepolis khaw awhkaw ak awm thlangkhqi ham bibi soeih hy ti kai ing sim pyi nyng. 14 Siboei na ak awm ka mi lungnaak Luka ingkaw Dema ing kut ni tlaih khqi hy. 15 Laodicea khaw awh ak awm koeinaakhqi ingkaw Nymptha ingqawi a im awh ak cun thlangboel ce kut tlaih law uh. 16 Vawhkaw kak capat ve nami qeel coengawh, Laodicea awhkaw thlangboel awm qeel sak lawt uh, cekcoengawh cekkhqi ak ca awm nangmih ing qeel pe lawt bai uh. 17 Arkhipa a venawh, "Bawipa awh na huh bibi ce a boet dyna nak coeng aham ngaihta lah," tinawh kqawn law pe uh. 18 Kai, Paul ing ve kut tlaihnaak ve kamah kut qoe ing qee nyng. Ka quihget ve sim law poe uh. Am geennaak nangmih a venawh awm poe seh nyng.

1 Thessalonika

1 Paul, Sila ingkaw Timote, Pa Khawsak ingkaw Jesu Khrin awh ak awm Thesalonika khaw awhkaw thlangboelkhqi venawh; Am qeenaak ingkaw ngaihqepnaak nangmih a venawh awm seh. **2** Nangmih boehi aham ka mik cykcahnaak awh Khawsak venawh zeelnaakawi kqawn poepa unyng. **3** Cangnaak ak caming bibinaak, lungnaak ing tha na ynaak ningnih Bawipa Jesu Khrin awh ngaih-unaak ak caming yh thainaak nami taak naak awh ningnih Pa Khawsak haiawh boet kaana ni sim kqo poepa nyng. **4** Khawsak ing a lungnaak koeinaakhqi, Khawsak ing nangmih nik tyk khqi hy tice sim unyng. **5** Ikwatih, nangmih a venawh awithang leek ce awi sawhqtat ing am law hy, cehlai thaawmnaak, Ciim Myihla ing ak dungna simnaak ing ni a law. Nangmih a venawh ikawp na kami awm tice ni sim uhyk ti. **6** Cawh nangmih taw kaimih ing Bawipa a khawboe ak oet na awm uhyk ti, kyinaak khawzah hu hlai uhyk ti, Ciim Myihla ing ani peek zeelnaak ing awithang ce do uhyk ti. **7** Cedawngawh nangmih taw Makedonia ingkaw Akhaia qam pum awh ak awm, ak cangnaak thlangkhqi boeih a toek kawina awm uhyk ti. **8** Nangmih a ven awhkawng Bawipa ak awithang ce Makedonia ingkaw Akhaia qam doeng awh am thang hy - nangmih ak cangnaak ce awm thlang boeih ing sim uhy. Cedawngawh ikaw kqawn aham awm am ngoe voel hawh hy, kaimih ikawpna nami do nami dan uh tice a mimah ing kqawn hawh uhy. **9** Myihlip bawknaak ce qoeng unawh ak hqjng ingkaw ak thym Khawsak bibi ham ingkaw. **10** amah ing thihsnaak awhkawng am thawh - ak law hly kawi kawsonaak awhkawng ningnih anik loet sakkung, khan nakawng ak law hly kawi amah a Capa Jesu qeh uhyk ti tice kqawn law uhy.

2 Koeinaakhqi, nangmih a venawh ka mi law ce a hoeina am awm hy tice sim uhyk ti. **2** Nami sim hawh amyihna, lamma na Filipi khaw awh ni the ni kha na unawh kyinaak hu unyng, cehlai Khawsak ak pyinaak caming nangmih a venawh awithang leek kqawn law thai unyng. **3** Nangmih a venawh qeennaak ka mi thoeh law ce amak thym kawpoek amak ciim ing am sai law unyng, ka ni thainaak khqi aham ka mi ngaih a dawngawh awm amni. **4** Khawsak ing awithang leek khoem sak nawh ak dyihpyi thlangkhqi nani ka mi awm. Thlanghqing zeelhaak am sui unyng saw, kawlung ak qymkung Khawsak aq Kawngsaih sah amni ka mingcay hy. **5** Ityk awh awm oekqu doena awi ap kqawn khawi unyng, ak pyh ngaihnaak dahi aham awm ap kqawn unyng - Khawsak ing ni sim khqi hy. **6** Thlanghqingkhqi am kyihcahnaak am sui unyng, nangmih am kyihcahnaak awm am sui unyng, u a kyihcahnaak awm am sui unyng. Khrin a ceityh na ka mi awm a dawngawh nangmih aham phyihqihna awm, awm thai hlai unyng, 7 anu ing a cakhqi a cuun amyihna nangmih a venawh kawdung thlang na awm unyng. **8** Nangmih ka ni lung naak khqi soeih a dawngawh Khawsak awithang leek zeel doena ka mik kqawn doeng kaana ka mi hqjngnaak awm ni pek khqi unyng, ka ni thin tlawhnaak khqi a dawngawh, **9** Koeinaakhqi kaimih a kyinaak ingkaw khuikhanaak ning zaak sim pyi uhyk ti, nangmih a venawh Khawsak awithang leek ka mik kqawn huili awh u awm phyihqih peek aham am kami ngaih a dawngawh than dai bibi unyng. **10** Nangmih amik cangnaak thlangkhqi venawh ak ciim ingkaw ak dyng caana ka mi awm ce nangmih ing ni sim u tiksaw Khawsak ingawm sim hy. **11** Pa ing a cakhqi a hloep amyihna nangmih kani hloep khqi ce sim uhyk ti, **12** tha ni pek khqi nyng, ngaihqepnaak awi kqawn law unyng, a qam ingkaw a boeimangnaak ak khuiawh nangmih anik khykung Khawsak mik cuuk hatlaak na khawsak aham awi kqawn law unyng. **13** Kaimih a ven awhkawng na ming zaak Khawsak awi ce nami do awh, thlang ak awi zap amyihna

am do u tiksaw Khawsak awi qoe qoe na, nangmih amik cangnaak khqi a venawh bi a binaak amyihna nami do a dawngawh Khawsak venawh a boet kaana zeelawi kqawn unyng. **14** Koeinaakhqi, nangmih taw Khrin awh ak awm, Judah qam awhkaw thlangboel ak oet na awm uhyk ti: cekkkhqi ing a mimah Juda piy a thekhanaak ami huh amyihna nangmih awm na mik thlang nawn a thekhanaak ce hu uhyk ti. **15** Judahkhqi ing Bawipa Jesu ingkaw tawngkhqi ce him unawh kaimih awm ni hqek khqi hy, Khawsak kaw am nawm sak unawh thlang boeih a qaal na awm uhy. **16** Gentelkhqi venawh awithang leek ap kqawn pe thai unyng saw, thaawng na a mami awm naak aham tha lo uhy. **17** Vemyihna a mimah a thawlhnaak ce a boet dyna cun uhy, cedawngawh Khawsak ak kawsonaak ce a dytnaak nataaw a mingmih ak khanawh tlaak pek khqi hy. **18** Nangmih a venawh law aham ngaih unyng - kai, Paul ve law aham cai bai cai bai nyng - cehlai, setan ing ni kang hy. **19** Kaimih ang ngaih-unaak, zeelhaak, ni Bawipa Jesu a law awh a haaiahw kaimih a boeimangnaak lumy ce ikaw? Nangmih am aw? **20** Nangmih ve kaimih a boeimangnaak ingkaw zeelnaak na awm uhyk ti.

3 Ce a dawngawh am kami yh thai voel awthaw, Atheni khaw awh awm aham nep hly soeih hy ti unyng. **2** Khrin awithang leek khynaak benawh Khawsak bi anik bi pyikung, ka mi naa Timote ce cangnaak benawh nangmih tha ak pe aham ingkaw ngaihqepnaak awi ak kqawn na tyl law unyng, **3** cawh ni u ingawm vemyih khuikhanaak ingkaw ngaihkyinaak a mami peek hly. Vemyihkhqi awh ni kaimih kami law tice ak leek cana sim uhyk ti. **4** Nangmih a venawh ka mi awm awh thekhanaak hu kawng unyng tice nik kqawn pek khqi hawh unyng, ka mik kqawn amyihna awm tang saw nangmih ing sim uhyk ti. **5** Vawh am ka yh thai voel awh nangmih ak cangnaak ce sim aham thlang ti law unyng. Ikawp na nu sykzoekkung ing nangmih ce ni syk khqi nawh kaimih a bibinaak ve a hoeina a awm kaw ti kqjhy nyng. **6** Tuh, Timote ve nangmih a ven awhkawng law thai nawh nangmih ak cangnaak ingkaw lungnaak awithang leek ce law pyi hy. Kaimih amni hilh khqi nawh kaimih ing nangmih huh aham kami ngaih amyihna nangmih ingawm kaimih huh aham ngaih uhyk ti tice anih ing kqawn law hy. **7** Cedawngawh, koeinaakhqi, kyinaak ingkaw thekhanaak ami huh awh awm cangnaak nami taak a dawngawh ka ming ngaih qep hy. **8** Bawipa awh ak cak na naming dyih hawh a dawngawh, tuh awthaw ningnih ni hqjng tang tang hawh uhy. **9** Nangmih ak camawh ni Khawsak haiawh zeelnaak ka mi taak boeih a dawngawh ikawmyihna nu Khawsak venawh zeelnaak awi ka mik kqawn tloep lawt lah voei? **10** Nangmih ni huk khqi tlaih unyng saw nangmih ak cangnaak ak voet ce dawn a hlai thainaak aham khawmthan khawdai cykcah poepa unyng. **11** Amah ningnih a Pa Khawsak ingkaw ningnih a Bawipa Jesu ing nangmih a venna ka mi law thainaak aham lam qoek abah law seh. **12** Bawipa ing nangmih ak cangnaak ce pung a tai sak seitaw nangmih boeih aham ingkaw tlak changkhqi ham awm nangmih aham ka mi sai lawt amyihna be ngen sak seh nyng. **13** Ni Bawipa Jesu ce ak tlakciimkhqi mi a law awh ni Pa Khawsak haiawh coet a kap kaana awm thainaak aham nangmih ak kawlung ce tha awm sak seh.

4 A hukhit awh, koeinaakhqi, Khawsak ngaih na khaw nami sak thainaak aham ni yn khqi nyng. Vemyihna nami awm thainaak khqoet khqoet aham Bawipa Jesu awh ni yn khqi nawh nik kqawn law pek khqi nyng. **2** Bawipa Jesu ak caming ikawmyihna ka min cukkik khqi tice sim uhyk ti. **3** Khawsak ngaihnaak taw ak ciimcahnai nami awmnaak veni: nu ingkaw pa thawlh sainaak koh sai kawm ti, **4** ak ciim ingkaw zoeksang kawi na nangmih boeih ing nami pum ce nami hawnaak aham awm hy, **5** Khawsak amak sim lukikhqi amyihna nami pumsa hy ngaihnaak ce koh

hquut kawm uk ti; 6 ve a ik-oeih awh u ingawm a koeinaa ak khanawh amak thym na koeh awm seitaw a tym leek koeh sui seh. Cemyih thawlhaak ak sai taw Khawsa ing toel kaw, cedawngawh nik kqawn law pek khqi nying saw awi ni yn khqi hawh nying. 7 Khawsa ing ningnih ve amak ciim aham amnik khy khqi nawh, ak ciim na khaw sak aham ni anik khy khqi. 8 Cedawngawh, vawhkaw cuk am kiknaak ak hoet ak thlang taw thlanghqing am hoet nawh Ciim Myihla ak pekung Khawsa ak hoetkung nani a awm. 9 Koeinaa lungnaak akawng awh ve ca ka pat law aham am ngoe voel hy, pynoet ingkaw pynoet lung qu aham Khawsa ing ni cawngpyi khqi hawh hy. 10 Nangmih ing Makedonia qam pum awhkaw koeinaakhqi ce lungna uhyl ti. Cehlai, koeinaakhqi lung qu nak khqoet khqoet lah uh. 11 A kylh a syk cana awm doena khaw sa law unawh, na mimah a bibi doeng ce poek uh, kak kqawn law hawh amyihna kut ing bibi doeng ce qeet law na uh, 12 cawh ni nangmih a myngawi khawsaknaak ce thlang ing kjihchah na nawh thlang a pum awh amma ming hang hly. 13 Koeinaakhqi, ak ipkhqi akawng ce a sim kaana nami awm aham amni ngaih khqi nying, ngaih-unaak amak ta thlangkhqi amyihna kawseet ing awm aham amni ngaih khqi nying. 14 Jesu taw thi nawh tho tlaih hy tice nik cangna uhyl, cedawngawh Khawsa ing Jesu awh ak ipkhqi ce amah ing khyn law hah kaw, tice nik cangna uhyl. 15 Bawipa ing amah ak awi amyihna, ningnih ak hqingkhqi Bawipa a law dy ak awm hyn khqi ing ak ipkhqi ce amnik khai thai kawm uh. 16 Ikawthi Bawipa amah qoe ce, khawteh na khynaak awipeek ing khan ceityih ak bau soeih ak awi ingkaw Khawsa uit ak awi ing khawk khan nakawng law kaw, cawh Khrish ahk thikhqi ce lamma na tho kawm uh. 17 Cekcoengawh, ningnih ak hqingkhqi ingkaw amik awm hunkhqi ce khawk khan na Bawipa hqun aham cekkhqi mi myi awh ce pawm na ni awm kawm uh. Cawhtaw Bawipa ing a poepa na ni awm hawh kawm uh. 18 Cedawngawh ve ak awi ing pynoet ingkaw pynoet tha pe qu lah uh.

5 Tuh koeinaakhqi, a tym ingkaw khawngi akawng ce nangmih a venawh qee aham am ngoe hy, 2 khawmthan awh quk-ai a law amyihna Bawipa a khawngi ce law kaw, tice ak nep cana sim uhyl ti. 3 Thlangkhqi ing Ngaihdingnaak ingkaw syng ypnaak,” tinawh amik kqawn awh, cekkhqi ak khanawh seetnaak ce pha pahoei kaw, nu pumqih ing ca a taak tawm awhkaw a tlawh tara amyihna, cekkhqi ce am loet kawm uh. 4 Cehlai koeinaakhqi tuh tloek awh quk-ai ing nangmih naming ngaih a kyi sak amyihna, thannaak ak khuiawh am awm uhyl ti. 5 Nangmih taw vangnaak khawkdai a ca na awm boeih uhyl ti. Ningmih taw thannaak ingkaw khawmthan thlang na amni awm uhyl. 6 Cedawngawh ak ip ak thlangkhqi amyihna koeh awm u sih, hqak unawh ngaihtaak u sih. 7 Ikawthi ak ip ak thlang taw than awh ni a ih, zu ak qui awm than awh ni am qui hy. 8 Cehlai ningnih taw khawkdai thlang na ni awm a dawngawh, ngaihtaak doena awm u sih, cangnaak ingkaw lungnaak ce kqangdan amyihna dam unawh, ngaih-unaak hulnaak ce thi lumyk amyihna myk u sih. 9 Ikawthi Khawsa ing ningnih ve ak kawsonaa zawk aham amni tak khqi nawh ningnih a Bawipa Jesu Khrish ak caming hulnaak huh ahamni ani taak khqi. 10 Ni hqak awh awm ni ih awh awm, amah ing hqing hah aham, anih ce thi hy. 11 Cedawngawh nami sai khawi hawh amyihna, pynoet ingkaw pynoet tha pe qu unawh dyl ang hqoeng qu uh. 12 Koeinaakhqi, nangmih anglakawh bi ak tlo soeih na ak bikhqi, Bawipa awh nangmih ak khanawh ak awmkhqi ingkaw nangmih anik cukkikkhqi ce kjihchah lawna lah uh. 13 A mingmih a bibinaak awh ce ak sang soeih na pawm law unawh lung law na lah uh. Pynoet ingkaw pynoet qoep ang qui cana awm law uh. 14 Koeinaa tha ak damkhqi ce toel law uh, tha ak zawikhqi ce tha pe law uh, tha amak awmkhqi ce bawm law u nawhtaw, pynoet

ingkaw pynoet kawdungaak ing awm law uh. 15 Thawlhaak ce thawlhaak ing am nami thungnaak aham ngaihta unawh, pynoet ingkaw pynoet ak khanawh thlang boeih ak khanawh geennaak a law uh. 16 Zeel poepa unawh: 17 a boet kaana cykcah uh; 18 ik-oeih soekep awh zeelhaak awi kqawn lah uh, kawthi ve ve Jesu Khrish awh nangmih aham Khawsa a ngaihnaak na awm hy. 19 Myihla maihchoei ce koeh thih law uh; 20 awiphawngnaak ve koeh hep uh. 21 Ik-oeih soekep noek a dak law uh. Ak leek ik-oeih ce tu qap uh. 22 Ik-oeih amak leek boeih boeih ce re law uh. 23 Ngaihgeepnaak Khawsa amah qoe ing nangmih ce ni ciim sak khqi seh. Naming myihla, hqingnaak ingkaw nami pum boeih ce nami a Bawipa Jesu Khrish a law awh coet a kap kaana awm law sak seh. 24 Nangmih anik khykung ce ypawm thlang na a awm dawngawh anih ing awm law sak bit kaw. 25 Koeinaakhqi kaimih aham cykcah lah uh. 26 Koeinaakhqi boeih ce ak ciim mawkaak ing kut tlaih law uh. 27 Vawhkaw capat ve koeinaakhqi boeih a venawh nami noet peek aham Bawipa a haiawh awi ni pek khqi nying. 28 Bawipa Jesu Khrish am geennaak nangmih boeih ak khanawh awm seh.

2 Thessalonika

1 Paul, Sila ingkaw Timote ing Ningmih a Pa Khawsa ingkaw Bawipa Jesu Khril awh ak awm Thesalonika khaw awhkaw thlangboel a venawh: **2** Pa Khawsa ingkaw Bawipa Jesu Khril a venawh kaw qeenaaak ingkaw ngaihqepnaak awm seh. **3** Koeinaakhqi, nangmih ak cangnaak ingkaw taai hqui khqoet khqoet nawk, nangmih pynoet ingkaw pynoet naming lungqunaak awm a taai hqui a dawngawh nangmih awh ce Khawsa venawh zeelawi ka mik kqawn poepa aham awm nawk, kqawn aham awm tyng qoe hy. **4** Cedawngawh, nangmih ang yhnaak, kyinaak ingkaw sykzoeknaak soepkep anglakawh cangnaak nami taak ce Khawsa thlangboel khqi anglakawh ning cawngcah pyi khqi unyng. **5** Vemyihkhqi boeih awh ve Khawsa ak awitlykaak taw thym hy tive dang hy. Cedawngawh nangmih taw Khawsa qam thlangkhqi na noet sih na awm kawm uk ti, ce aham ni nangmih ing nami khuikha hy. **6** Khawsa taw dyng hy: Nangmih kyinaak anik pe thlangkhqi ce anih ing kyinaak pe tlhai kawmsaw, **7** nangmih kyinaak ak hukhqi venawh hawikhhangnaak ce pe kaw, kaimih awm ni pek khqi lawt kaw. Bawipa Jesu Khril ce khawk khan nakawng maikqawng ing khan ceityih thaawmnaak ing ang dang law awh vemyihkhqi ve awm kaw. **8** Khawsa amak simkhqi ingkaw ni Bawipa Jesu Khril ak awithang leek awh amak ngai thlangkhqi ce anih ing phep kaw. **9** Kumqui seetnaak ing a mingmih ce phep kawmsaw Bawipa amah ing amah a boeinang thaawmnaak a hai awhkawng hawi taak na awm kaw. (*aiōnios g166*) **10** Ak thlangciim khqing lakawh zoeksangnaak ingkaw ak cangnaak thlangkhqi boeih aham kawpoek kyi awmhlynaak khawngi ce awm kaw. Nangmih a venawh kak kqawn law awi ce namik cangnaak a dawngawh, nangmih awm ce ak khuiawh thum lawt kawm uk ti. **11** Ve ak awi ve kawlung khuiawh taak doena, Khawsa ing nangmih anik khynaak khqi ing ak tyng na nami awmnaak thai aham ingkaw nangmih ing naming cainaak ap nek soeih ce a soep sak thainaak aham ik-oehi nami sainaak hoiw awh cangnaak ing nami saithainaak aham cykcah poepa unyng. **12** Nangmih a Khawsa ingkaw Bawipa Jesu Khril ang ming ce nangmih awh zoeksang na a awmnaak ham ingkaw nangmih awm amah awh ce zoeksang na nami awmnaak thai aham cykcah unyng.

2 Ni Bawipa Jesu Khril a lawnaak ingkaw amah awh ningnih ning cun awh ce, koeinaakhqi, **2** thlang pynoet ak awiphawngnaak aw, awikqawnnaak aw, capat mai aw kaimih a venawh kaw ak law amyihna, Bawipa a khawngi pha law hawh hy tinawh kqawnnaak awi a awm awhtaw am nami lynaak aham kqawn law nyng. **3** U ingawm nangmih koeh ni thai nak khqi seh, qaal na ak tho thlang ingkaw seetnaak ahamnaak awm lap hang na bi ak bi ak thlang ang dang law hlan dy taw, ce a khawngi ce am pha law kaw. **4** Khawsa tinawh khy aham ingkaw amah ce bawk aham, Khawsa a bawkim awh amah ingkaw amah ce hawih qu nawh Khawsa na amah ingkaw amah ak kqawn qu thlang ce qaal na tho kawmsaw zoeksang kawm uh. **5** Nangmih a venawh ka awm awh vemyih ik-oehi akawng ka nik kqawn law peek khqi am nami sim nawk nu? **6** A tym a khoek awh ang dang naak aham, anih a hu na tu na awm hyh tice sim uhyk ti. **7** Tuh anaa amak ta thlangkhqi ing ang hyp na bibi hawh uhy; cawkaw bi ak bikung ce khoe valh na a awm hlan dy bibi hun kaw. **8** Cawhtaw anaa amak takhqi ce dang hawh kawm uh, cemyih thlangkhqi ce Bawipa Jesu ing boeinang soeih na a law awh am kha awhkaw hqi ing hqe boeih kaw. **9** Anaa amak ta ing setan a bibinaak amyihna amak thym kawpoek kyi ik-oehi, hatnaak ingkaw ngaih kyinaak boeih ce haw na kawmsaw bibi kaw. **10** Them amak leek soepkep ingkaw ak qeeng kawi thlangkhqi ce thai na kawm uh. Cemyih ak thlangkhqi ing awitak ce lungna

nawh hulnaak huh aham amik thanaak a dawngawh qeeng kawm uh. **11** Cedawngawh a mingmih ing qaaai awi ce amik cangnaak aham Khawsa ing thlakthai ce tyih pehy. **12** Awitak ce cangnaak kaana themche sainaak awh ak zeel thlangkhqi boeih thawlakthi sak na a awm thainaak aham cemyihna awm kaw. **13** Bawipa ing a lungnaak koeinaakhqi, Myihla ciimsaknaak ingkaw awitak cangnaak ak caming hul aham ak cyk ca awhkawng Khawsa ing anik tyk khqi hawh a dawngawh, nangmih aham Khawsa venawh zeelawi ka mik kqawn poepa aham awm hy. **14** Ni Bawipa Jesu Khril a boeimangnaak awh nami paa naak thai aham kaimih ak awithang leek kqawnnaak ing nangmih ce nik khy khqi hy. **15** Cedawngawh koeinaakhqi, ak cak na dyi unawh kaimih ing awi ing aw hui am lai ing ca ing aw ka mik kqawn law patoe ce ak cakna tu lah uh. **16** Ni Bawipa Jesu Khril amah qoe ing ningnih ani lungnaak khqi nawh am qeenaaak ing kumqui thaawmnaak ingkaw ngaih-uunaak leek anik pekung Pa Khawsa ing, (*aiōnios g166*) **17** namik kawlung ce tha pe seitaw bi sainaak ingkaw awi kqawnnaak boeih awh tha ni awm sak khqi seh.

3 A hukhit awhtaw koeinaakhqi, nangmih a venawh ka mik kqawn amyihna, Bawipa ak awithang ve kqjihchahnaak ing ang tawnna a thangnaak aham kaimih aham cykcah lah uh. **2** Thlang boeih cangnaak ama taak a dawngawh, thlakthawlakthi a kut khuiawh kawng ka mi loetnaak aham cykcah lah uh. **3** Cehlai Bawipa taw ypawm nawh anih ing nangmih ce tha ni awm sak khqi kawmsaw thlang amak leek a kut khuiawh kawng ni loet sak khqi bit kaw. **4** Kaimih ing ka mik kqawn law ce nami sai hawh amyihna sai poe kawn uk ti, tinawh Bawipa ak caming ka ming ngaih yh hy. **5** Bawipa ing nangmih ak kawlung ce Khawsa lungnaak ingkaw Khril ang yh thainaak benna sawi law seh. **6** Koeinaakhqi, kaimih ing ka ni cawngpyi khqi amyihna am awm nawh tha ak dam thlangkhqi ce nami gei aham Bawipa Jesu Khril ang ming ing awi ni pek khqi nyng. **7** Ikwamyihna kaimih a awm a ih nami oet hly tice na mimah ing sim hawh uhyk ti. Nangmih a venawh ka mi awm awh ka mik tha am dam qoe qoe hy, **8** a phu a peek kaana u a mih a buh awm a zoe na am ai unyng. U awm phyihqih am ka mi peeknaak aham khawmthan khawdai ak tlo tlo na bibi unyng. **9** Saithainaak am kami taak awh am nawh nangmih a oet kawi na ka mi awmnaak aham cemyihna bi ce bi unyng. **10** Nangmih a venawh ka mi awm awh vawkaw ahi ve ni pek khqi nyng: "Bi amak bi taw, a ai na awm koeh ai seh," a tive. **11** Nangmih ak khuiawh thlang tang waw amik tha dam hy ti za nyng. Bibi kaana; Bi ak bi na ak sa sukhiq awm hy tinawh za nyng. **12** Cemyih thlangkhqi ce bibi unawh a mimah ak phoen ami khuet aham Bawipa Jesu Khril ak caming awi pe nyng. **13** Koeinaakhqi, nangmih ingtaw ak thym bi sai ve koeh ngak law qoe qoe uh. **14** Vawhkaw ca ing ka ni yin law khqi ahi ve amak ngai ak thlang a awm awhtaw, anih ce hat law uh. Ak chahnaak aham koeh pawlheng law uh. **15** Cehlai qaal a myih aih na taw koeh poek law uh, koeinaa amyihna anih ce cuk am kik law uh. **16** Ngaihqepnaak ak pekung Bawipa amah qoe qoe ing nangmih ce a hun a hoi awh ityk awm ngaihqepnaak ni pek khqi seh. Nangmih boeih a venawh Bawipa taw awm seh. **17** Kai, Paul ing ve kut tlainhaak ca ve kamah a kut qoe qoe ing qee law nyng, ca ka pat khqi boeih ak khuiawh ve ve a lawhanaak na awm hy. Vemyihna ca ni qee law pek khqi nyng. **18** Nami Bawipa Jesu Khril am qeenaaak nangmih boeih ak khanawh awm seh.

1 Timote

1 Paul, hulkung Khawsa ingkaw ning ngaih-uu Jesu Khrish ak awipeeknaak amyihna Jesu Khrish a ceityih na ak awm ing: **2** Cangnaak awh ka Capa tang tang Timote a venawh: Pa Khawsa a ven ingkaw ni Bawipa Jesu Khrish a venawh kaw am qeenakaak, lungnaak ingkaw ngaihdingnaak awm seh. **3** Makedonia khaw na ka ceh awh awi a ni yin hawh amyihna tuhawm Ephesa khawawh awm cang ahamma ni thoeih nyng. Cawh thlang a vang ing cawngpyinaak amak thym ce cawngpyi uhy, amami cawngpyinaak voel ham tinak khqi. **4** Syn awi mai ingkaw amak dyt thai khui thoepnaak mai ce koeh sai voel u seh. Cemyih ing Khawsa awh nik cangnaak a taaik sak nawh oelh tainaaak ni ak cawn sak hy. **5** Vawhkaw awipeek ang cainaak tav kawlung ciimcaihnaak, ak che ak leek hqimhqanaak ingkaw cangnaak ak thym awhkawng ak cawn law lungnaak taaknaak thai hamna ni. **6** Thlang vang ingtaw ve ve cehta unawh, a lawng a lam amak awm awipungnaak benawh cet uhy. **7** Anaa awi cawngpyikungkhqi na ami awm ngaih hlai uhy, a mimah ak awih kqawn haha zani a mamik sim thlangkhqi ingkaw ikaw amim tu ti awm amak sim thlangkhqi na awm uhy. **8** Ak thym na thlang ing a hawnaak awhtaw anaa awi ve leek hy tice ni sim uhy. **9** Thlak dyng aham anaa awi ve sai na am awm nawh anaa awi ak hqekhqi ingkaw qaal na ak thokhqi, Khawsa amak simkhqi ingkaw thlakthawlkhqi, thlakcium am khqi ingkaw Khawsa amak bawkkhqi ami nu ingkaw ami pa amik him thlangkhqi, **10** ak samphaiikhqi ingkaw thlak leek am khqi, tamnaa ak zawikhqi ingkaw a qaii ak kqawnkhqi ak thym ik-oeih ami sim loei loei awh amak thym na ak kqawnkhqi – ak thym cangnaak ak kah boeih boeih hamna ni a awm hy. **11** Boemang khawsa ing a ni zoeksang lawt amyihna ce awithang leek ce kai ni khoem sak hy. **12** Tha anik pekung, Jesu Khrish, ni Bawipa venawh zeelnaakawi kqawn nyng. **13** Ma na Khawsa ak thekhanaak ingkaw thlangboel ak thekhanaak thlangna awm nawh thlakche na awm hlai nyng, a sim kaa ingkaw ak cangnaak kaana ka awm dawngwah ka venawh qeenakaak ce dang law sak hy. **14** Jesu Khrish awh ak awm cangnaak, lungnaak ingkaw Bawipa am qeenakaak ce khawzahzah na kak khanawh ni hawk sih hy. **15** "Khrish Jesu thlakthawlkhqi thaawng hamna khawmdek awh law hy," tive ypawm soeih nawh ak pawm tyng soeih hy; aming lakawh thlakthawl soeih na awm nyng. **16** Cehlai ve ak camawh ni, Jesu Khrish ing thlakthawl soeih kaiawh ve ak kawdung kawneemnaak boeih boeih ce a phonaak thai hamna; kumqui hqjinggaak al pang hamna amah ak cangnaak hly khqi huh saknaak hamna am qeenakaak ka huh hy. (aiōnios g166) **17** Kumqui Sangpahrang, amak thi thai qoe, huh thai na amak awm, Khawsa doeng a venawh, thangleeknaak ingkaw kqjhchahaak kumqui dy awm seh. Amen. (aiōn g165) **18** Ka ca, Timote, nang awh awiphawng kak kqawn lawkhqi ce hqout nawh qaalleepnaak ing qaal na tuknaak thai ham awi ni pe nyng; **19** cangnaak ingkaw ak che ak leek hqimhqanaak thai ce ak cakna tu lah. Thlang a vang ingtaw cece hlahphlam unawh cangnaak benawh lawng ak see amyihna see boeih uhy. **20** Cekkhqi ak khuiawh Hymenias ingkaw Alexander awm paa hy ni, Khawsa thekhanaak kaana cukkik na ani awmnaak aham cekqawi ce Setan a kut awh pe hawh nyng.

2 Lamma cyk awh, qeen thoehnaak, cykcahnaak, thlaktlo aham cykcahnaak ingkaw thlang boeih aham zeelawi kqawnnaak ce, **2** ningnih ing qoep ang quinaak ing ngaihqep caana Khawsa kqjhnaak ing ak ciim cana ni awmnaak thai ham, sangpahrangkhqi ingkaw saithainaak ak takhqi ham nami taak peek aham thoeih law nyng. **3** Cetaw anik thaawngkung Khawsa poeknaak awh leek soeih nawh, ym ham tyng soeih hy. **4** Anih ing thlang boeih

hulna a awm thainaak ham ingkaw awitak cyihnaak benna law aham ngaih hy. **5** Ikawthi Khawsa pynoet awm nawh Khawsa ingkaw thlanghqing anglakawh dyihthing pynoet doeng awm nawh, cetaw thlanghqing, Jesu Khrish, **6** thlang boeih boeih hulnaak hamna ak pee qu ing: cece amah a tym awh simsakna a awm ham tyng ni. **7** Ce hamna ak khypyikung ingkaw ceityihna tykna kak awm ni; (awitak kqawn nyng, ka qaai ap kqawn nyng;) cangnaak ingkaw awitak awh Gentelkhqi ak cawngpyikung na awm nyng. **8** Kawsonaak ingkaw oelh qunaak a taak kaana pakhqi ing ami kut ak ciim ce soeng unawh amik cykcah aham ngaih nyng. **9** Nukhqi ingawm ak boe ngai na thoeih ang cam qu unawh, a cyp a myih ing khaw sak doena, lusam tum nawh sui ing aw pale ing aw angki hinaak a phu ak tlo tlo ing aw thoeihcam qu aham am ngaih nyng. **10** Cehlai them leek sainaak ing, a cyp amyihna nu ing Khawsa a bawk aham awm hy. **11** Nu ing a awm dym doena awi ngaihnaak ing a cawng aham awm hy. **12** Nu ing cawngpyi aham ingkaw pa ak khanawh saithainaak taak aham am ngaih nyng; a awm dym aham awm hy. **13** Ikawthi Adam ni sai maana a awm, cekcoengawh ni Evi ce sai na a awm hy. **14** Cekcoengawh Adam ve thainaak na am awm nawh; nu ni thainaak na awm nawh thawlhnaak awh ang tluk hy. **15** Cehlai cangnaak, lungnaak ingkaw ciimcaihnaak ta nawh, kawlung ak dyng cana a awm awhtaw ca taaknaak ak caming hulnaak ce hu kaw.

3 Ve awih kqawn ve thym hy: "U ingawm sawikung na awm ham a ngaih awhtaw, anih taw bibi ak leek bi ham ak ngaih thlang ni," tive. **2** Ceamyihna sawikungna ak awm ak thlang taw coet amak kap, zu pynoet doeng ak ta, thlak chyyp, kawpoek ak dyng, ak ypawm, khin ak ym thai, thlang ak cuk ak kik thai, **3** zuu amak aw, thlang amak kqaak, kaw aik daaw, tangka awh am thin amak tlo, **4** kqjhchah kawina a cakhqi toeltham nawh a ipkhui khawsak khaw ak khan thaina a awm ham awm hy; **5** (Thlang ing amah a ipkhui zani ama toek thai awhtaw, ikawmyihna nu Khawsa a thlangboel ce a toek naak thai kaw?) **6** Cangca thlak thaaina koeh awm seh, cekkaataw oek qunaak na awm kawm saw, setan awidengna a awm amyihna awidengnaa ce hu hau kaw. **7** Ce am awhawm a leng nakaw thlangkhqi am kyihcah thlangna a awm ham awm hy, cekkaataw kqawnseetna awm kawmsaw setan ak thangawh aawk hau kaw. **8** Cemyih bai na, Thlangboel bibikung khqi awm, kqjhchah kawina ak awm thlangna a awm ham awm hy; awi ak pung, zuu ak aw, amak thymnaa ak kamvaa thlangna a awm ham am awm hy. **9** Kawlung ciimcaihnaak ing awitak cangnaak ak dung ce ak tu khak ak thlang na a awm aham awm hy. **10** Cemyih ak thlang ce lamma na noek adak aham awm hy; i ikawmyih coetnaak ama awm awhtaw Thlangboel bibikung bi ce bi kaw. **11** Cemyih lawt bai na, ami zukhqi awm thlang ing amik kqjhchah thlangkhqi na ami awm aham awm hy, thlang amak theet ingkaw kawlung ak dyng, ik-oeih soepkep awh ypawm thlang na ak awm ak thlang na a awm aham awm hy. **12** Thlangboel bibikung taw a zu pynoet doeng ak ta thlang ingkaw a cakhqi ingkaw a ipkhui khawsak khaw ak khan thai thlang na a awm aham awm hy. **13** Bibik leek bi nawh ak cak na ak dyi ak thlangkhqi taw Jesu Khrish awh cangnaak cak ak ta thlangkhqi na awm uhy. **14** Na venawh law zy ngaih-uu doena vawhkaw ahi wynaak ve qee law nyng; **15** cehlai am ka law nai khoem awhtaw, Khawsa ipkhui cakawkhqi ing ikawmyih nanu khaw ami sak hly ti na simnaak thai ham qee law nyng; Khawsa ipkhui cakawkhqi taw Khawsa ak hqing Thlangboelkhqi, awitak tung ingkaw ang dyihnaak nace awm hy. **16** Cawh Khawsa ak kawngaih awihyp taw am oelh thaina sang soeih hy: "Pumsana dang law nawh, Myihla ing dyih pyi nawh, Khan ceityihkhqi ing hu

nawh, thlang phyn boeih a venawh khypyi na awm hy, khawmdek awh cangna unawh boeimangnaak ing kaipyi na awm hy.

4 A khukit awhtaw thlangvang ing cangnaak ce hlah phlam kawm usaw qaaai a cawngpyinaak qaaai kqawnkung myihla ben ce hqut kawm uh, tinawh Myihla ing ak caih cana kqawn hawh hy. **2** Cemyih cawngpyinaakkhqi ce a qaaai ak kqawn thlak thailat ak che ak leek simnaak kawlung ce thik hlawk ing ak dawi thlangkhqi venawh kawng law kaw. **3** Chungvanaak kham kawm usaw, ak cangnaak thlangkhqi ingkaw awitak ak sim thlangkhqi ing zeelnaak awi kqawn doena ai aham a sai awk ai avang ce ama ai aham kham pe kawm uh. **4** Ikawith Khawsa ing a sai ik-oieh boeih ve nep hy, zeelawi kqawnnaak ing ni ai awhtaw ikawm hoet kawi am awm hy; **5** Khawsak awi ingkaw cyckcahnaka ing ciim sak hawh hy. **6** Koeinaakhqi venawh ve aki awi ve nang zaaksak awhtaw, Jesu Khrih a bibikung leek na awm kawm tiksaw, cangnaak awitak ingkaw cawngpyinaak leek nang ing na hqut a dawngawh ak taai thlang na awm kawp ti. **7** Khawsa amak kqjhchah ingkaw nucawngkhqi a syn awi mailikhqi ce koeh ngaih nawh; Khawsak kawngaih ak sai ak thlang na awm law kawp ti. **8** Pumsa benawh kaw cawngpyinaak ve a phu taw awm lawt hlai hy, khawsa benawh kaw cawngpyinaak taw a soep hoeiawh a phu awm khqoet hy, tuhawhkaw hqingnaak ingkaw ak law hly kawi hqingnaak aham awm awikamaanak acak soeih na awm hy. **9** Do aham tyng hy tinaak awi ve a ypawm hy. **10** (Ikawith vawh bi ni bi nawh ni khuikhka hy), thlang boeih a hulkung na ak awm nawh ak tungnaak cangnaak thlangkhqi ak hulkung, ak hqing Khawsa awh ningnih ing ngaih-uunaak ni ta uh. **11** Vek awi ve kqawn pe nawh cawngpyi lah. **12** Na naaseennaak thlang ing koeh ni husit seh; cehlai awikqawnnaak, khawsaknaak, lungnaak, cangnaak ingkaw ciimcahnaka awh ak cangnaak thlangkhqi a toek kawi na awm kawp ti. **13** Kai ka law hlan dy, qangpui a venawh awiciim noetnaak, awikqawnnaak ingkaw cawngpyinaak ce ta law kawp ti. **14** Tawngkhaki ing awikqawn unawh a hqamcakhhqi kut awhkawng Khawsa ing ani pek kuto de coeh dalaq pyi kawp ti. **15** Thlang boeih a haiawh na taainaak ang dangnaak tha ham cekkhqi awhce nak tha hly sak nawh pum pe qu lah. **16** Namah ingkaw na cawngpyinaak awh ngaihthai nawh; ce a them sai nawh awm poe lah; cemyih na sainaak ing namah ingkaw nak awi ak zaakhqi ce hulkhqi thai kawp ti.

5 Kum ak hqamkhqi bet ak thlang ce ak tlo na koeh zyi, na pamyhna thapeeknaak awi kqawn pe. Kum ak no bet thlangkhqi ce na naakhqi amyihna poek law nawh, **2** kum ak hqam bet nukhqi ce nam cawtnu amyihna, kawlung ciimnaak ing poek law lah. **3** Nuhai ak voet ak hlauhkhqi ce ak leekna kqjhchah khqi lah. **4** Cehlai nuhai ing a cakhqi aw a ca a cakhqi aw a taak awhtaw, cekkhqi ing a mimah a ipkhui kaw ce ak leekna khut a hlepnaak ing a mimah a bawknaak ce lamma na ami sai aham awm hy, cemyihna nu ingkaw pa ingkaw nukdam pakdamkhqi a cawmcahnaka ce thung thai kawm uh, ve ve Khawsa ka kaw zeelnaak na awm hy. **5** Amah doeng ak awm ak voet ak hlauh nuhai ingtaw Khawsa venawh ngaih-unaa ta nawh than ingkaw dai cyckcahnaka Khawsa venawh geennaak thoeh hy. **6** Cehlai mah doeng awmhlynaak doeng ak sui nuhai taw a hqing hui awhawm ak thi ni. **7** U ak khanawh awm coet kawi ama awmnaak aham, thlangkhqi venawh awm vawhkaw cawngpyinaak ve kqawn pe. **8** U awm amah a cakaw amak toek teng, a ipkhui awmpyi cakaw nawn awm amak toek teng ingtaw cangnaak ak oelh ak thlangna awm nawh amak cangnaak thlang anglakawh thawlkhqoet hy. **9** Nuhai taw kum kqukip ak kai am nawh, thlang pynoet doeng ak vaa naak, **10** cakhqi khuit nawh, khin ak khai khuit nawh, thlakciimkhqi khaw sil khawi nawh, ak patangkhqi toek kawi

nawh them leek a hoi thahlynaak ing bi kawi nawh them leek sainaak awh thlang am kyihcah kawina ak awm taw nuhaina taak thai ni. **11** Nuhai kum ak no betkhqi taw cemyih nuhaikhqi ak khuiawh paa sak aham am awm hy. Khrih a venawh ang peek qunaak ce pumsa ngaihnaak ing a noeng awhtaw vaa taak tlaih aham ngaih uhy. **12** Ceamyihna, lamma awhkaw awitaaknaak ce a hqe hawh a dawngawh amah ingkaw amah ak khanawh awidengnaak ce pha sak hy. **13** Cekcoeng baiawh, amik tha dam sak unawh im im awh van uhy. Amik thakdam doeng am khoek nawh, thlang theetnaak kawsonaak ing a mamik kqawn hly kawi ik-oieh ce kqawn uhy. **14** Cedawngawh nuhai a kum ak nokhqi taw vaa ta tlaih seh, ca ta u seitaw, ami ipkhui ce ak leekna khoem u seh, cemyihna sainaak ing thlang kqawn seetnaak qaal ce a tym leek koeh pe seh. **15** Tuhamw thlangvang tloek ingtaw setan lam pan ing khaw kan hawh uhy. **16** Ak cangnaak nu ing a cakaw ak khuiawh nuhai a taak awhtaw, ak leek na khut a hlep seh, thlangboel phyihqih a peek aham am awm hy, cawh ni thlangboel ing ak voet ak hlauh tang tang nuhaikhqi ce ami toek hly thai. **17** A Thlangboel ce ak leek cana lam ak sawikung ing ak pyhna kqjhcahna awm seitaw, awikqawn ingkaw cawngpyinaak awh tha ak yy ak thlangkhqi taw ce anglakawh ak pyh khqoetna kqjhcahna awm seh. **18** Ikawith Cakciim ing, "Cang ak leh huili vaitaw a hui ce koeh pin pe, bi ak bi ingtaw a bibi phu ce huh aham tyng hy," tinawh kqawn hy. **19** A hqamca pynoet ce simpyikung pakkhii pakthum ama awm awhtaw thawlkooh puk. **20** Thawlhaak ak sai thlang ce ak dangna toel aham awm hy, cawh ni thlang ngaih a taak hly. **21** Vawhkaw awipeekkhqi ve phekbonaak a taak kaana hqut aham ingkaw u a haai awm a toek kaana ak thym bibi aham Khawsa, Jesu Khrih ingkaw ak tyh khan ceityihkhqi amik huh awh awi ni pe nyng. **22** Thlang ak khanawh angtawnna na kut koeh tloeng nawh, thawl sainaak ce koeh bawng law. Ak ciimcahna awm law. **23** Tui doeng ce koeh aw voel, nak phoen tlawh ingkaw ak chang tlawhnaak na taak a dawngawh misur tui ce apk pe bet bet. **24** Thlangvang a thawlhaak taw dang pahoei nawh, awidengnaak hun pahoei hy; thlangvang a thawlhaak taw am dang pahoei hy. **25** Cemyih lawtna, them leek sai ak dang pahoei awm nawh, dang hlan seiawm thuh phah toeih thai kawi am awm hy.

6 Khawsa ang ming ingkaw a cawngpyinaak awi ce kqawnseetna ama awmnaak aham, tamnaa haawngkawi ak aawi boeih ing amimah a boekhqi ce a soep a hoeiawh kqjhchah hlyna ngaih useh. **2** Cangca boei ak ta ing koeinaana ani awm ak camawh koe thekha na seh, cehlai hawikhhangnaak ak hukhqi taw ak cangnaak ca ingkaw a lungnaakkhqi na ami awm awh ami bi ce ak nauh na bik khqoet useh. Cek awi ce cawngpyi nawh ynn kawp ti. **3** U ingawm amak thym cawngpyinaak ce cawngpyi nawh ni Bawipa Jesu Khrih a cawngpyinaak ak thym ce ang dyih pyi kaana Khawsak kawngaih ik-oieh ce ama cawngpyi awhtaw, **4** ce ak thlang taw amah ingkaw amah ak oek qu ingkaw ikaw awm amak sim ak thlang ni. Amak caih oelh qunaak ingkaw ythaak, thintawinaak, awihche kqawnnaak, amak leek upvoethnaak ingkaw, **5** kawpoek amak leek ak chang chang ak ta thlangkhqi na awm uhy, awitak a taak kaana Khawsak kawngaih them sai ve tangka huhnaak aham mai ni, tinawh ak poek thlangkhqi na awm uhy. **6** Cehlai Khawsak kawngaih naak ingkaw geennaak ve hawikhhangnaak ac bau soeih na awm hy. **7** Ikawith khawmdek awh ikawm amni law pyi thai nawh ikawm amnik cawn pyi thai bai hy. **8** Cehlai awk ai ingkaw suibai ni taak awhtaw cawh ce nik kaw ni qeem sak aham awm hy. **9** Boei ak ngaih thlangkhqi taw sykzoeknaak awh tla unawh qawnnaak soepkep ingkaw thlanghqing seetnaak ingkaw plal a thamnaak khuina ak tlak sak hyt ngaihnaak

amak leek ak khuina tla uhy. **10** Ikawtih tangka ngaihnaak taw thawlhaak boeih a kung na awm hy. Cece thlangvang ing oet unawh, cangnaak ce hawitaak unawh, amimah ingkaw amimah kawseentnaak khawzah ing vui qu khoep uhy. **11** Cehlai nang, khawsak thlang ingtaw, vemiyihkhqi ve cehta nawh, dyngnaak, khawsak kawngaih, cangnaak, lungnaak, yh thainaak ingkaw kawdungnaak ce hqut lah. **12** Cangnaak taa qunaak ce ta nawh, kumqui hqingnaak ce ak cak na tu. Ce ak pang aham ni nang ce Khawsa ing anik khy. Simpyikung thlang khawzah a haiawh dyihpyinaak ak leek ce dyihpyi hawh hyk ti. (aiōnios g166) **13** Ik-oeih soepkep a venawh hqingnaak pe nawh, Pontia Pilat a haiawh awih leek ak kqawnkung Jesu Khrin a koe na ak awm, Khawsa mik huh awh, awi ni yn nyng. **14** Ni Bawipa Jesu Khrin ang dang hlan dy coet amak kap ingkaw ciimcaih cana vawhkaw awipeek ve na pawm aham awm hy. **15** Cetaw Khawsa ing amah a tym awh law pyi kaw – zoseennaak ak hu ingkaw ukkung na ak awm, sangpahrangkhqi boeih a Sangpahrang ingkaw boeikhqi boeih a Boei, **16** a nih doeng ce kumqui na awm nawh u ingawm ama pha thai vangnaak na awm hy, anih ce u ingawm am hu nawh u ingawm hu hlan hy. Amah a venawh zoeksang naak ingkaw thaawmaak kumqui dyna awm seh. Amen. (aiōnios g166) **17** Ve khawmdek awh ak boei thlangkhqi ce ama ming oek qunaak aham ingkaw amak cak boineaak awh ngaih-unaak a mami taaknaak nawh Khawsa awh ngaih-unaak ami taaknaak aham kqawn law pe. Ikawtih Khawsa ingtaw ningnih ni zeelnaak aham ik-oeih soepkep ce khawzah soeih na ni pek khqi hy. (aiōn g165) **18** Them leek sai aham, bibi leek sainaak ing ami boei aham, khawboe leeknaak ing thlang a venawh peek ngaihnaak kawlung ami taak thainaak awh ami boei aham, **19** ami hailam ham ak tym leek awh a mimah aham dyih hun ak cak khawhthem ce cur thai kawm usaw, hqingnaak tang tang ce tu thai kawm uh. (aiōnios g166) **20** Timote, na venawh khoem sak na ak awm ce ak nepna khoem lah. Khawsa amak kjihchah awikqawn naak ce hawi taak nawhtaw, amak thym poeknaak cyihnaak ce hawitaak lah. **21** Cemyih ce thlangvang ing amik tana ngaiqu unawh cangnaak lam ce pleng taak hawh uhy. Am qeennaak na venawh awm seh.

2 Timote

1 Jesu Khrih awh ak awm awitaak naak amyihna, Khawsa kawngaihnaak amyihna Jesu Khrih a ceityih na ak awm, Paul ing, **2** Ka lungnaak ka capa Timote a venawh: Pa Khawsa ingkaw ningnih a Bawipa Jesu Khrih a ven awhkaw am qeennaak, thintlawhnaak ingkaw ngaihdinggaak awm seh. **3** Pakdamkhqi amyihna a bi ka bi peek Khawsa venawh, kawlung caihnaak ing zeel nyng saw than ingkaw dai nangmih aham cyckah poepa nyng. **4** Nang amik phli tuikhqi ce poek nyng, zeelnaak ing ka be thainaak aham, nang a myi ce huh aham ngaih nyng. **5** Na nukdam Loisi ingkaw na nu Euniki awh ak awm ma cangnaak ce, nang awh awm hy tice sim tlaih nyng, tuh awhtaw cawkaw cangnaak ce nang awh awm awm hy. **6** Cedawngawh Khawsa kutdo peek, nak khanawh kut ka thoeng law awhkaw mai kqawng ce a caknaak aham na zah aham kqawn law nyng. **7** Ikwatih Khawsa ing kqjhnaak myihla ce amni pe nawh, thaawmnaak, lungnaak ingkaw yththainak myihla ni ani peek hy. **8** Cedawngawh ni Bawipa akawng kqawn aham koeh chak, thawng ak tla kai akawng awh awm koeh chak. Cehlai awithang leek awh kyinaak ka huhaak ve ning yh pyi lawt lah, Khawsa ak thaawmnaak ak camping, **9** anih ing ningnih ce ni thaawng khqi nawh hqing ciimnaak ing hqing aham nik khy hy – ik-oehi pynoet oet ni sai peek awh am nawh amah ang cainaak ingkaw am qeennaak camawh ni. Vawhkaw am qeennaak vetaw a tym ak kqan hlan awhkawng ningnih a venawh Jesu Khrih awh ni pek khqi hawh hy. (aiōnios g166) **10** Tuhawhtaw thihnaak ce noeng nawh awithang leek ak camping hqinggaak ingkaw kumqui vangnaak ak khuina anik sawikung ningnih a hulkung, Jesu Khrih ak camping dang hawh hy. **11** Ve awithang leek ve khypyi aham ceityih ingkaw cawngpyi kungna awm aham kai ve ni caksak hy. **12** Cedawngawh khuikha hu nyng. Cehlai kai ing kak cangnaak thlang ce a u nu, tice ka sim dawngawh ap chak nyng, ce a khawngi aham kai ing ka khoem sak ce ak nep cana khoem law kaw, tice sim nyng. **13** Kai a ven awhkaw naming zaak ce, Jesu Khrih awh cangnaak lungnaak ingkaw cawngpyinaak ak thym toek hly kawi na ta law uh. **14** Nangmih a venawh ik-oehi leek khoem sak na ak awm ce ak leek na qeet na uh – ningnih ak khui awhkaw ak awm Ciim Myihla bawmnaak ak camping ak leek na qeet na uh. **15** Asia qam awh ak awm thlangkhqi ing ni cehtaak hawh uhy tice sim uhk ti, Phygelus ingkaw Hermogenes ingawm ni cehta lawt hy nih. **16** Bawipa ing Onesiphora ipkhui kaw ak khanawh am qeennaak dang sak seh, kawtih anih ing ni caih sak pang nawh thiqui khihna ka awmnaak awh awm ap chak hy. **17** Rom khaw awh a awm awh kai a mani huh hlan dy awh ni sui khing hy. **18** Ce a khawngi awh Bawipa a ven awhkaw qeennaak a huhaak aham Bawipa ing qeen seh! Ephesa khaw awh ikawmyih dyna kai ani bawm ani ceem tice nang ingawm sim hyk ti.

2 Cedawngawh, nang ka ca Jesu Khrih awhkaw am qeennaak awh nak tha awm sak lah. **2** Simpyikung khawzah a haiawh kak kqawn law nang zaak ik-oehikhqi ce thlang ak cuk ak kik thai yp ak awm thlangkhqi venawh kqawn law pe patoe lah. **3** Jesu Khrih a qalkap leek amyihna kyinaak ce kaimih ning yh pyi lawt lah. **4** Qalkap bi ak bi ingtaw thlang mailai amyihna am awm hy – qaalboei ak kawzeelnaak aham ni bibi aham a ngaih. **5** Cemyih lawtna, taaqunaak awh ak paa thlang ingawm a lawng a lam amyihna taaqunaak ce ama sai awhtaw kutdo am hu hy. **6** Tha tlawh doena lo bi ak bikung ing a lo sang ce a ai ma khet aham awm hy. **7** Awi kak kqawn law ve poek lah, ve myihkhqi boehi poek thainaak aham Bawipa ing cyihnaak ni pe bit kaw. **8** David a cadil na ak awm, thihnaak awhkawng ak tho tlaih, Jesu Khrih

ce poek lah. Ve ve kai ak awithang leek ni, **9** ve a dawngawh khuikha hu nyng saw thlakthawlh amyihna thiqui ing khii dyna awm nyng. **10** Jesu Khrih awh ak awm kumqui boemangnaak ingkaw thaawngnaak ce ami huh thainaak aham, ak tyh thlangkhqi aham ik-oehi soepkep ce yh nyng. (aiōnios g166) **11** Vawhkaw awih kqawnnaak ve thym hy. Amah ing ni thih hah awhtaw, amah ing ni hqing hah lawt kaw; **12** ningnih ing ning yh awhtaw, amah ingqawi boemangnaak ce ni pang lawt kaw. Amah ce ni qoeng awhtaw, anih ing ningnih ce ni qoeng khqi lawt kaw; **13** ypawm na amni awm awhtaw, anih taw ypawm na awm poe kaw, kawtih amah ingkaw amah ce am qoeng qu thai hy. **14** Vawhkaw ik-oehikhqi ve kqawn pe poe lah. Amik oehl qukhqi ce Khawsa haiawh ngaihthynnaak ahi kqawn pe; ikaw awm a phu am awm nawh ak gaikhqi sheetnak nani a awm kqoet. **15** Kiyihnaak ak hu bibikung na na awm amyihna Khawsa haiawh ak leek soeih na pe qu law lah, bibikung ak thym cana awitak ak tu ingtaw chah aham am awm hy. **16** Khawsa amak pa awi a kaa kqawnnaak ce re lah, vemyih a ik-oehi awh amik paakhqi taw Khawsa amak sim thlangkhqi na awm khqoet khqoet uhy. **17** A mingmih am cukkiknaak ce qawk ak pawi amyihna pawi kang kaw. Cemyih thlangkhqi ak khuiawh Himenia ingkaw Phileta awm pa lawt hy nih, **18** cekgawi taw awitak awhkawng ak hla na pleng hawh hy nih. Thlakthi thawh tlaihnaak taw awm coeng hawh hy ti nih nawh, thlang pynoet ak cangnaak ce hqe hy nih. **19** Cehlai, Khawsak tunning taw ak cak cana awm nawh vawhkawawi ing hatnaak tahi: “Bawipa ing amah a koekhqi ce noek hy,” nawh, “U awm Bawipa ang ming ak diyh pyi ingtaw ik-oehi amak leek ce cehta seh.” **20** Im ak bau soeih ak khuiawh sui ingkaw ngun ing a sai ik-oehi doeng am awm nawh, thing ing tamlai ing a sai ik-oehi awm awm hy; pynoet taw qyp awm kawi aham awm hy. **21** U ingawm a hukhit awhkaw ik-oehi awhkawng ak ciim ak caih na a awm awhtaw, anih taw qyp awm kawi ik-oehi, ak ciim ik-oehi sai na awm kawmsaw, Bawipa aham a phu ak awm ingkaw ik-oehi leek sainaak aham qoek abah na awm kaw. **22** Cadawng hy ngaihnaakkhqi ce cehta nawthaw, dyngnaak, cangnaak, lungnaak ingkaw ngaihdinggaak ce kawlung ciimnaak ing Bawipa ak khy thlangkhqi mi hqut lawt lah. **23** Qawnnaak ingkaw cyihnaak kaana ikawmyih a ik-oehi awm koeh oehl law, cemyih a ik-oehi ingtaw hqo ang hqitnaak ni a awm sak hy tice sim hawh hyk ti. **24** Bawipa a tyihzawih thlang ingtaw hqo ang hqitnaak ak khuiawh a paa ham am awm hy: thlang boehi a venawh qeennaak ta kawmsaw, cuk am kik hly thai hy, kawsonaak am ta kaw. **25** Anih ak oehl thlangkhqi ce, Khawsa ing zutnaak pe kawmsaw awitak simnaak benna sawi ngai kaw tinawh ngaih-unaaak kawlung taak doena, **26** zaksim thainaak kawlung a taaknaak thai aham ingkaw, amah ak kawngaih sai sak aham ak khawhkung setan ak dawng awhkawng a loetnaak thai ham awi zoei cana kqawn caih peek aham awm hy.

3 Ve ve hat lah: Khawngi a hukhit awhtaw kqih awm ik-oehi ce awm kaw. **2** Amah ingkaw amah ak lung qunaakkhqi, tangka ak lungnaakkhqi, ak hoel qukhqi, ak oek qukhqi, amak thym na bi ak bikhqi, a nu ingkaw a pa ak awi amak ngaikhqi, zeelnaak kawlung amak takhqi, amak ciimkhqi, **3** Lungnaak amak takhqi, qeennawh amak ngai theikhqi, thlang ak theetkhqi, yh thainaak amak takhqi, kaw ak tawikhqi, ik-oehi leek amak lungnaakkhqi, **4** thlang ak thainaakkhqi, am thin ak tawikhqi, thin sahnaka, Khawsa lungnaak anglakawh awmhly theza ak lungnaak – **5** Khawsa ak kqih amyihna dang hlahy a sai thai thaawmnaak ak oehlkhqi na awm kawm uh. Cemyih ak thlangkhqi mi koeh awm law hahih uh. **6** Cemyih ak thlangkhqi taw ipkhui na kun voeh voeh unawh tha amak awm nukhqi ak tu thlangkhqi, thawl phyihqih ing nam

qu nawh ak che ik-oeih hyy ngaihnaak ing hu na hai na ak sawi ak thlangkhqi, 7 cawng poepa lawt hlai hy awitak amak sim thai thlangkhqi na awm uhy. 8 Janne ingkaw Jambre ing Mosi ani oelh amyihna – kawlung ak plawci thlangkhqi na awm unawh, cangnaak benawh a hoet thlangkhqi na awm uhy. 9 Cemiyah ak thlangkhqi ce ak hla na am awm kawm uh, cekkhqi a qawnaak ce thlang boeih a venawh ak caih cana dang bit kaw. 10 Cehlai nang ingtaw, ka ni cawngpyinaakkhqi, ka khawsak naakkhqi, kang cainaak, cangnaak, kawdungnaak, lungnaak, yh thainaak, 11 khuikha huhnaak, kyinaak ka huhnaakkhqi – Antiok, Ikonium ingkaw Listra khaw awhkaw mih a ik-oeih aw kak khanawh pha law nawh ka khuikha tice nang ingtaw sim boeih hyk ti. Cehlai cemiyah ak khui awhkawng Bawipa ing ni hul hyl. 12 A tang tang awhtaw, Jesu Khrish awh Khawsak Kawngaih na khaw sak aham ak ngaih thlangkhqi boeih taw khuikha kawm uh, 13 thlakchekhqi ingkaw thlak thailatkhqi ce ami seetnaak thai khuina se kawm uh, thlang ce thai na kawm uh, thainaak huili na awm awm hawh hy. 14 Cehlai nang ingtaw, cawng nawh na sim hawh ik-oeih awh ce awm poe lah, kawtih nang ingtaw nang anik cawngpyi thlangkhqi venawh kawng sim hawh hyk ti, 15 na naasen awhkawng Cakciim awi ce sim hawh hyk ti, ce Cakciim ing Jesu Khrish cangnaak ak caming hulnaak aham ni cyih sak thai hy. 16 Cakciim boeih taw Khawsa ing ang hqj ak chan sih na awm nawh cawngpyinaak aham, toelnaak aham, tlaihnaak aham ingkaw dyngnaak benawh cawngpyinaak aham a phu awm hy, 17 cawh ni Khawsak thlang ing ik-oeih leek soepkep awh thoeih ang cam na a awm hly.

4 Amah dang nawh a qam a pha awh, thlakthi ingkaw thlangqing awi ak deng kawi, Khawsa ingkaw Jesu Khrish a haiawh, ve ak awi ve ni yn nyng: 2 Awi ve khypyi lah; a tym awh awm a tym am awh awm a oepchoeh na awm poepa lah: tlaih lah, toel nawhtaw tha pe lah – kawdungnaak ing ngaihtaak doena cuk am kik lah. 3 Amak thym cawngnaak ingkaw thlang ing ang oek qunaak khanngi ce law kaw. A mimah a ngaih sainaak ham ak thak lup lup aming haakhqi ing aming zaak awi kqawnnaak aham cawngpyikungkhqi khawzah ce cawi a khel kawm uh. 4 Awitak ama ming zaaknaak aham aming haakhqi ce byp unawh syn awi mailai ngaihnaak aham aming haakhqi keng kawm uh. 5 Cehlai nang ingtaw, ik-oeih soepkep awh ak leek na poek nawhtaw, kyinaakkhqi ce yh lah, awithang khypyinaak bibi ce bi nawh, na sai hly kawi bibi boeih ce ak soep na bi lah. 6 Ikawtih kai taw awk hly kawi ik-oeih nawn amyihna hawk li na awm hawh nyng, ka cehnak hly a tym awm zoe hawh hy. 7 Qaal tuwnaak leek ce tuk coeng hawh nyng, taaqunaak awm coeng hawh nyng, cangnaak ce tu khak hawh nyng. 8 Tuuhawtaw dyngnaak sui lumyk ce kai aham a oepchoeh na awm hawh hy, awidengkung thlak dyng, Bawipa ing ce a khawngi awh kai ce ni pe kaw, kai doeng amni pe kaw, amah a lawnnaak ak lamtoen thlangkhqi boeih a venawh awm pe lawt kaw. 9 Ka venawh ang tawnna na lawnnaak aham hilah lah, 10 ikawtih Dema ing khawmdek ve a lungnaak bet dawngawh ni cehta nawh Thesalonika khaw na cet hawh hy. Krescen khaw Galatia qam na cet nawh, Tita awm Dalmatia qam na cet hawh hy. (aiōn g165) 11 Luka doeng ni ka venawh ak awm hy. Marka ce law pyi kawp ti, anih ce ka bibinaak awh anik bawmkung na awm hy. 12 Tukika ce Ephesa khaw na tyi nyng. 13 Na law awh Troas khaw awh Karpa a im awh ka cehtaak angki dung ce haw law, cekoengawh ka cauk, awipui na mehvyn cauk ce haw law bai. 14 Thi ak deep Alexander ing tlawhnaak ni pehy. A ik-oeih sainaak awh Bawipa ing kut thung seh. 15 Nang ingawm anih ce ngaihtaak doena oelh law, kawtih ningnih ak awih kqawn ve anih ing oelh hy. 16 Cang ka lawhnaak kak kqawn awh, kai anik diyh pyi u pynoet awm am law hy, thlang boeih ing ni cehta

uh. A mingmih ak khanawh seetnaak koeh pha seh. 17 Cehlai kai ak caming awithang ve khypyi khawngkh na a awm nawh Gentelkhqi boeih ing aming zaak thainaak aham Bawipa ce ka venawh dyi nawh tha ni pehy. Sendeih am khak khui awhkawng kai ce ni loet sak hy. 18 Anik cuhkung ik-oeih amak leek a kut khui awhkawng Bawipa ing ni hul kawmsaw ak khawk khan na a ding a syk na ni ceh pyi kaw. Amah a venawh thangleeknaak kumqui dyna awm seh. Amen. (aiōn g165) 19 Priscilla, Akuila ingkaw Onesifora ipkhui kaw ce kut tlaih law. 20 Erasta ce Korin khaw awh awm nawh, Tqoppima ce a tlawh dawngawh Mileta awh cehta nyng. 21 Chikca a pha hlanawh vena a pha lawnnaak aham tha lo law lah. Eubula, Puden, Linu, Klaudia ingkaw koeinaakkhqi boeih ing kut ni tlaih uhy. 22 Bawipa taw nang myihla awh ce awm seh. Am qeenaka na venawh awm seh.

Titu

1 Khawsa tyihzawih na awm nawh Khawsa ing ak tyh thlangkhqi ak cangnaak ingkaw Khawsa ak kawngaih benna ak sawikung awitak cyihnaak – **2** Kumqui hqjinggaak ngaih-unaak awh ak dyi cangnaak ingkaw cyihnaak, qaai amak kqawn Khawsa ing a tym amik kqan hlan awhkawng awi a taak amyihna, (*aiōnios g166*) **3** amah ing a tym hoep nawh a taak amyihna ningnih hulkung Khawsa ak awipeeknaak amyihna akawi ce vangnaak ak khuina ak haw law kung amah ak awipeek amyihna akawi ak khypyikung kai Paul ing. **4** Cangnaak awh ka capa Tita a venawh: Pa Khawsa ingkaw ningnih hulkung Jesu Khrish a ven awhkaw qeennaak ingkaw ngaihqepnaak awm seh. **5** Krete sanglak anglak na ka ni ceh taaknaak taw ni hu awh ak coeng kaana ka cehtaak bibi coeng aham ingkaw awi ka peek hawh amyihna khaw boeih awh a hqamca taak peek aham ni. **6** A hqamca taw coet amak awm thlang, a zu pynoet doeng ak ta, a cakhqi ing amik cangnaak ak thlang ingkaw awi am ngaih nawh a awm a hqoh a dawngawh thlang a haiawh toelna amak awm ak thlangkhqi na ami awm aham awm hy. **7** Thlangboel khoemkung taw Khawsa bibi ak khoemkung na a awm a dawngawh, coet kawina amak awm ak thlang na a awm aham awm hy- amah ak kawngaih doeng ak ngaih ak thlang na am awm kaw, am thin amak tawi, zu amak aw, hqo ang hqit amak ngaih, amak thym ik-oehi huh amak ngaih thlang na a awm aham awm hy. **8** Khin ak khai ak toek thai, ik-oehi leek ak lungnaak, yh thainaak kawlung ak ta, kawpoek ak dyng, ak ciim ingkaw a khawboe ak leek thlang na awm kaw. **9** Cawngsakaak amyihna ypawm kawi awihcak ce ak tu ak thlang na awm kaw, cawh ni cangnaak thym ing tlakchang ce tha pe thai nawh ak oelhkhqi ce a hlat hly khqi thai. **10** Ikwath, cem a qaal na ak tho thlang khawzah awm hy, am lai ak haalkhqi ingkaw thlang ak thainaak khqi na awm uhy, chahhui ak queethkqi ce cemyihna awm khqet uhy. **11** Cemyih thlangkhqi ce ami awm dym aham awm hy, ama mi cawngpyi hly kawi ce cawngpyi unawh ipkuikaw thlang boeih qawk sak uhy - amak thym ik-oehi huhnaak aham cemyihna sai uhy. **12** A mingmih ak khui awhkaw tawngtha pynoet ingawm vemyihna kqawn hy, "Krete thlangkhqi taw qaai ak kqawn thlangkhqi na awm uhy, tlak che cakhqi, thakdam cakhqi na awm uhy," tinawh. **13** Vawhkaw awih kqawn ve thym hy. Cedawngawh cekhkhqi ce khawteh na toel lah, cawh ni cangnaak awh ak thym na a ming dyih hly. **14** Judahkhqi a syn awi mailai ing awitak ak oelh thlangkhqi akawi ce koeh ngaih law pe uh. **15** Ak ciim thlangkhqi ham nataw, ik-oehi boeih caih hy, cehlai ak qawk thlangkhqi ingkaw amak cangnaak thlangkhqi ham ikaw awm am caih hy. Ak cang cang awhtaw, amik kawlungkhqi ing amik kawpoekkhqi boeih awm qawk kang hawh hy. **16** Khawsa sim nyng ti lawt hlai uhy, a ik-oehi sai ingtaw oelh qu noe noe bai hy. Ce mihkhqi ce tyih ak cu khqi ni, haa amak za thlangkhqi ing ik-oehi leek sai aham amak kawih thlangkhqi ni.

2 Ak thym cangnaak ing anik qoep ik-oehi ce na cawngpyi aham awm hy. **2** A kum ak hqam bet thlangkhqi ing a cyp amyihna awm aham, thlang kqjhchah kawi na awm aham, yh thainaak kawlung taak aham, ak thym cangnaak taak aham, lungnaak ingkaw kawdungaak ing awm aham cawngpyi. **3** Cemyih lawtna, kum ak hqam hawh nukhqi ingawm kqjhchah kawi na khaw sak aham, thlang a mami theetnaak aham ingkaw zu a mami awk naak aham, cehlai ak leek ik-oehi ce cawngpyi patoe aham cawngpyi lah. **4** Cawhtaw kum ak no bet nukhqi ce a va a ca lungnaak aham a mi cawng hly pyi thai, **5** yh thainaak ta nawh ak caih na awm aham, im awh plawng ang thawh aham, kaw dung aham, a vakhqi

ak kaina awm aham cawngpyi, cawh ni u ingawm Khawsak aham ce a kqjhchah hly thai hy. **6** Cemyihna, cadawngkhqi ing yh thaingawh amti taaknaak thai aham tha pe law. **7** Soepkep awh ik-oehi leek sainaak ak camping cekhkhqi a toek Kawina awm law lah. Na cawngpyinaak awh ak thym ingkaw ak cang cang na na awm aham awm hy, **8** upvoet ak awm na awi nak kqawn aham am awm hy, cawh ni nang anik oelhkhqkhi ing ningnih a seetnaak kqawn aham am hu kawmsaw amik chah hly. **9** Tamnaakhqi ing ik-oehi soepkep awh ami boeikhqi akawi ngaih peek aham kqawn pe, a boeikhqi ak kawzeelaak sai aham ingkaw awi ama hlat aham, **10** A ik-oehi khqi ama quiknaak peek thai aham ingkaw ypawm na ami awmnaak ce dang sak aham awm hy, cawh ni ik-oehi soepkep awh ningnih hulkung Khawsa akawng ni cawngpyi ve thlang ing ngaih aham a ngaih hly. **11** Hulnaak Khawsa qeennaak ing a haw law ce thlang boeih a venawh dang hawh hy. **12** Khawsa ak kawngaih am ik-oehi ben ingkaw khawmdek ik-oehi ben awh "Amni" ni tinawh, yh thainaak ing khaw sak aham, tuh a mih awh ak dyng na khaw sa nawh, Khawsa ngaih na khaw sak aham ni cawngpyi hy. (*aiōnios g165*) **13** Ngaih-unaak ypawm ik-oehi - boeimang Khawsa ingkaw hulkung Jesu Khrish a lawnaak khawnghi ce ning ngaih-u uhy, **14** Thawlh ama leeknaak boeih khui awhkawng ningnih ce hul aham amah ing amah ce pe qu hy, ik-oehi leek sai ngaihnaak kawlung taak ham amah aham qoe qoe na ni ciimcaih sak khqi hy. **15** Cedawngawh, vemyih ik-oehi khqi ve na cawngpyi aham awm hy. Sai thainaak boeih boeih ing tha pe nawh toel lah. U ingawm koeh ni hep seh.

3 Thlangkhqi ing ukkungkhqi ingkaw anaa ak takungkhqi akawi ce ngaih peek aham, ik-oehi leek sainaak benawh a oepchoeh na ami awm naak thai aham, **2** thlang ak che na kqawn kaana, a cyp a myih na qoep ang qui cana awm aham, thlang boeih a venawh kawdungaak tang ce dang sak aham kqawn pe. **3** Ni hu awh ningnih awm tlakqaw, awi amak ngaih, yh thainaak, thawlhaak, thlang a sawhnaak, pynoet ingkaw pynoet sawh qunaak ing ni awm uhy. **4** Cehlai ningnih hulkung Khawsa qeennaak ce ang dang law awhtaw, **5** anih ing ningnih ce ni hul khqi hy, dyngnaak ki-ehi ningnih ing ni sai a dawngawh am nawh, amah am qeennaak a dawngawh ni. Thang tlaih silinhaak Ciim Myihla thai saknaak ing ni hul khqi hy, **6** Ningmih hulkung Jesu Khrish ak camping haainaak taak kaana nik khan awh Ciim Myihla ce ni hawk sih khqi hy, **7** kumqui hqjinggaak ngaih-unaak qoe ce ni pang naak thai aham am qeennaak ing ningnih ce ni dyng sak khqi hy. (*aiōnios g166*) **8** Vawhkaw awih kqawn ve yp awm hy. Khawsa ak ypnaka thlangkhqi ing ngaihataaknaa ing them leek ami sainaak aham vawhkaw ik-oehi khqi awh nak tha lo lah. Vawhkaw them ve ak leek ingkaw thlang boeih hawihkhangaak aham awm hy. **9** Cehlai ciyihnaak amak awm oelh qunaak ing khuilam kqawnnaak awipungnaak anaa awi awh hqo ang hqitnaak ce qee law lah, kawthi vemyihkhqi ve ikaw hawihkhangaak am awm hy. **10** Peknaak ak sai thlang ce toelnaak awi kqawn pe, cekcoengawh a hih voeinak awh toel tlaih bai. Cekcoengawh taw awm taak dym lhl. **11** Cemyih ak thlang cetaw tlak dyng am ingkaw tlak thawlha, amah ingkaw amah tlawlh ak pel qu na awm hy, tice sim kawp ti. **12** Nang a venna Artemas am awhtaw Tukhiko ka tyih law awh Nikopoli khaw na law aham hlal lah, chikca khuiawh cawh awm aham cai nyng. **13** Upadi ak sim Zenas ingkaw Apolo ce lam ani law awh avoet a hlauhnaak aham awm naak aham bawm law. **14** Nik thlangkhqi ing ik-oehi leek ami sai thai khui ami sai thainaak aham tha lo law u seh, cawh ni myngawi ngoenaak ce hu kawm u saw ik-oehi sai kaana aham mi awm hly. **15** Ka venawh ak awmkhqi boeih ing kut ni tlaih uhy. Cangnaak

awh kaimih anik lungnaakkhqí ce kut tlaih law. Am qeennaak nangmih boeih a venawh awm seh.

Filemon

1 Jesu Khril a thawk tla Paul ingkaw ningnih a naa Timote ing, 2 Ka lungnaak pyi ingkaw bibi pyikung Filemon ingkaw, 3 Bawipa Jesu Khril ingkaw Pa Khawsa venawh kaw qeenakaak ingkaw ngaihdingnaak awm seh. 4 Kak cykcah awh nang aham Khawsa venawh zeelnaak awi kqawn poepa nyng, 5 Bawipa Jesu awh cangnaak na taaknaak ingkaw thlakciimkhqi na lungnaak dawngawh zeelnaak awi kqawn nyng. 6 Thlang a venawh nak cangnaak ce nak kqawn awh nak tha a hly naak aham cykcah nyng, cawh ni Khril awh ik-oeih leek ni tahi tice zaksim caihnaak na taak hly thai hy. 7 Nang, naa pa ing thlak ciimkhqi ak kawlung ce na caih sak peng a dawngawh, nang a lungnaak ing ni zeel sak nawh tha ni awm sak hy. 8 Cedawngawh, Khril awh ka qaal leek nawh nang ing na sai hly kawi ik-oeih ce sai aham awi ni pe thai nyng seiawm, 9 lungnaak awh nang a venawh qeenakaak thoeh law nyng. Cedawngawh, kai Paul, pacawng ingkaw Jesu Khril awh thawng ak tla ing, 10 ka capa Onesima aham qeenakaak thoeh law nyng, thi qui ing khil na ka awm awh anih ce ka capa na coeng hy. 11 Ak cyk awhtaw anih ve nang aham a hawihkhangnaak am awm hy, cehlai tuh awhtaw nang ingkaw kai aham hawihkhangnaak awm hawh hy. 12 Anih, kak kawlung tang tang ve, na venna tyi law tlaih nyng. 13 Awithang leek awh thi qui ing khil na ka awm awh kai anik bawm aham, ka venawh awm sak aham ngaih mai kawng nyng. 14 Cehlai nang ing na nim lengnaak ve namah ak tha hlynaak ing sai na a awm nawh sai sak ngah ngah amyihna ama awmnaak aham nang ang haa tlaaknaa kaana taw ikaw awm sai aham am ngaih nyng. 15 Nang a venawh kawng kawlkhkal a pleng qunaak ve nang ing ak nep na na taaknaak tlaih aham va ni hy voei – (aiōnios g166) 16 tamnaa na taak voel kaana, tamnaa anglakawh ak nep khqoet, naa amyihna na taak thainaak aham ngaih nyng. Kai ing lungna nyng, cehlai pumsa ingkaw Bawipa awh nang ing lungnak khqoet hyk ti. 17 Kai ve nang ing bi ak bi hiah ak thlang na na nik poek awhtaw, kai nani do amyihna anih awm do law lawt. 18 Nang a venawh ik-oeih a sai thawlh aw laiba sah hly kawi aw a taak awhtaw, kai a venawh kqawn law mai. 19 Kai, Paul ing kamah a kut qoe qoe ing ve ak ca ve qee law nyng. Namah qoe qoe ka venawh peek qu aham awm hyk ti kqawn kaana, kai ing ni pe tlaih bit kawng. 20 Ka naa, Bawipa awh ce nang a venawh kawng hawihkhang naak ka huh thainaak aham ngaih nyng; Khril awh kak kawlung ve caih law sak lah. 21 Nang ak awi ngainaak ce kak cangnaak dawngawh, kai ing ka thoeh law anglakawh khawzah khqoet sai law kawp ti tice sim doena, na venawh ca qee law nyng. 22 Ik-oeih pynoet awm hyn hy: kai aham pahnaak ce qeek abah law lah, nang ak cykcahnaak qawi a qj na awm kawmsaw na venawh awm kawng tinawh poek nyng. 23 Jesu Khril awh thawng kang tlaak pyi Epafra ing kut nim tuk khqi hy. 24 Cemyih lawtna ka bibi pyikhq, Marka, Aristarka, Dema ingkaw Luka ingawm kut nim tuk khqi hy. 25 Bawipa Jesu Khril am qeenakaak ce nang myihla awh awm seh.

Hebrai

1 Ak qkym awhtaw Khawsa ing ningnih a pakdamkhqi venawh tawngkhakhi hawnak ing ak chang chang na awi khawzah pek khqi hy. **2** Cehlai tuh tloek a tym a boet lam na taw a Capa ak caming ningnih a venawh awi kqawn law hawh hy, anih ak caming khan ingkaw dek boeih ve ana sai nawk anih ik-oehi boeih boeih qo ak pangkung na tahi. (aiōn g165) **3** Capa taw Khawsa boeimang a vangnaak na awm nawk amah coengnaak qoe qoe a dyihting na awm hy, ak awi thaawmnaak ing ik-oehi boeih boeih ak awm sakung na awm hy. Thawl hawh ciim saknaak ce a sai coengawh, boeimang kut tang benawh khawk khan na ngawi hawh hy. **4** Cawh anih taw khan ceityihkhqing lak awh sang khqoet nawk ang ming awm a mingmih ang ming anglakawh sang khqoet hy. **5** Han awhkaw khan ceityih a venawh Khawsa ing, "Nang taw ka Capa na awm hyk ti; tuhngawi awh na Pa na awm hawh nyng," a tinaak? Am awhtaw, "Kai taw anih a Pa na awm kawng nyng saw, anih ce ka Capa na awm kaw," a ti? **6** Cekcoengawh, khawmdek awh Khawsa ing amah a caming ce a haw law awh, "Khawsak khan ceityih boeih ing anih ce bawk seh," tinawh kqawn hy. **7** Khan ceityih akawng ak kqawn awh, Khan ceityihkhqi ce zilh na sai nawk, a tyihzawihkhqi ce maikqawng na sai hy," tinawh kqawn hy. **8** Cehlai a Capa awhtaw, Aw Khawsa, na ngawihdoelh ce kumqu na awm kawmsaw, dyngnaak ce na qam a sawngihqawi na awm kaw. (aiōn g165) **9** Dyngnaak ce nang ing lungna tiksaw ik-oehi che ce sawh na hyk ti; cawh Khawsa, na Khawsa ing na pyikhqi boeih ak khanawh ni ta nawk zeelnaak situi ing ni syp hawh hy," tinawh kqawn hy. **10** Cekcoengawh vemyihna kqawn bai hy, Ak cyk ca awh, Aw Bawipa, khawmdek ang dyihnaak ce syn tiksaw khan ce nang a kut saikhqi na awm hy. **11** Vemyihkhqi boeih taw plawci hly hlai hy, nang taw cak poe kawp ti; vekkhqi taw hi amiyihna se kawm uh. **12** Cekkhqi ce hi amiyihna nang ing zawl kawm tiksaw; angki amiyihna cekkhqi taw hleng qu kaw. Cehlai nang taw ang qui na cak poe hyk ti, nang a kumkhqi taw a dytnaak am awm qoe kaw." **13** Han awhkaw khan ceityih a venawh Khawsa ing, "Na qaalkhqi ce na khawk kaina ka taak hlan dy kak tang benawh ngawi lah," a ti naak? **14** Khan ceityihkhqi boeih ve hulnaak ak hu thlangkhqi a bibi aham ni tyih na a awm ka ti koe noek?

2 Cawh, ak chang na am naming plengaak hau aham ningnih ing ning zaak awi ce ak nep na ning ngaih aham awm hy. **2** Khan ceityihkhqi ak kqawn awi ing zani thlang pin nawk, awi ak eekkhqi ingkaw awi amak ngaikhqi boeih ing toelnaak ce ami huh awhtaw, **3** ak bau soeih soeih hulnaak ce ikaw na awm amni sui awhtaw ikawmyihna nu amni loet thainaak khqoet kaw? Vawhkaw hulnaak ve Bawipa ing lamma cyk na phawng law hy, amik zakhqi boeih ing ce ak awi ce caksak uhy. **4** Khawsa ingawm hatnaak, ngaih kyinaak kawpoek kyinaak ing sim sak hy, cekcoengawh Ciim Myihla kutdo ik-oehi ce amah ak ngaihnaak amiyihna pe bai hy. **5** Ningmih ing nik kqawn uh, ak law hly kawi khawmdek ce khan ceityihkhqi venawh anih ing am pehy. **6** Cehlai hun pynoet awh thlang pynoet ing: Thlanghqing ve ikawmyih nanu a awm nawk nang ing nak poek loet, thlanghqing capa awm ikawmyihna nu a awm nawk na khoem loet? **7** Khan ceityih anglakawh ak nem bet na anih ce nang ing sai hyk ti; boeimang kqijchahnaak ing nang ing myk adah tiksaw **8** a khawk kai awh ik-oehikhqi boeih ce taak pe hyk ti," tinawh kqawn hy. A khawk kaiawh ik-oehikhqi boeih taak pehy tinawh, amah a venawh amak pe qu ik-oehi pynoet awm Khawsa ing am hang hy tinaak ni. Cehlai tuh a venawh ik-oehi boeih peek na ak awm ce amni hu hlan hy. **9** Cehlai Jesu Khrish, khan ceityih anglakawh ak nem bet na sai na ak awm ce, boeimang kqijchahnaak ing myk adah na awm hawh

hy, Khawsam qeenaaak ak caming thlang thihnaak ce anih ing yh hy. **10** Cakpa kawzah boeimangnaa na a ceh pyinaak ce, amah ak caming amah aham ik-oehi boeih ak awm sak Khawsa ing, khuinha ak soep na a huhnaak ak caming amah ce hulnaak ak saikung na sai hy. **11** Thlanghqing ak ciimcaih sakung ingkaw ce ciimcaih thlangkhqi taw ipkhui kaw pynoet ni. Cawh cekkhqi ce ka koeinaakhqi tinawh khy aham Jesu ce am chak hy. **12** Anih ing, Ka koeinaakhqi venawh nang ming ce phawng kawng nyng saw; na thlang kqeng ang cunnaak awh nam kiyhaak laa ce sa kawng nyng," tihy. **13** Cek coeng bai awh, Anih ce ypnra kawng nyng," ti bai hy. Cekcoengawh vemyihna kqawn bai hy. "Khawsa ing ani peneenkhqi ing vawh awm nyng," tinawh qee hy. **14** Naasenkhiq ingtaw thi ingkaw sa ami taak awh thi saithainaak ak tutuk ce Khrish ing a thihnaak ak caming a hqe thainaak aham thlanghqing na coeng law hy. Cawhkaw thihi a ik-oehi saithainaak ak tutuk taw, setan ni. **15** Thih kqijhaak tamnaa ak kaiawh ak awm thlangkhqi boeih ce loet sak hy. **16** Anih ing khan ceityihkhqi ce am bawm hy, Abraham a cadilkhqi ni a bawm hy. **17** Cawh thlang queenkaw a ngai thainaak aham, Khawsa bibinaak awh ypawm khawsoeih na a awm thainaak aham ingkaw thlangkhqi a thawlhaak awh hulnaak a sai thainaak aham ik-oehi soepkep awh anih awm a koeinaakhqi amyihna sai qu aham ngoe hy. **18** Amah ing sykzoeknaak hu nawk a khuinha hawh awh sykzoeknaak ak hu thlangkhqi ce bawm thai hy.

3 Cedawngawh, khaw benna kaw khynaak az ka koeinaakhqi, ceityih ingkaw khawsoeih boei na ak awm, ningnih ing nik cangnaak uh Jesu awh ce na mik kawpoekkhqi ce caksak lauh. **2** Khawsa ipkhui kaw boeih awh Mosi ing ypawm na a awm amiyihna, anih awm amah ak cak sakung ak khanawh a ypawm hy. **3** Im anglakawh im ak sakung ce kyihcahrainaak a huh khqoet amiyihna Jesu awm Mosi anglakawh kyihcahrainaak abau khqoet huah aming hy. **4** Im ve thlang ing sa hy, cehlai ik-oehi boeih boeih ak sakung taw Khawsa ni. **5** Mosi taw Khawsa ipkhui awh ypawm na awm nawk, ni hai benawh kqawn hly kawi ce phawng hy. **6** Cehlai Jesu taw capamyihna Khawsa ipkhui ak khanawh a ypawm hy. Ningmih ing ni zoeksang qaal leeknaak ing ngaih-unaka ce nim tu awhtaw ningnih taw anih a ipkhui kaw thlang na ni awm uhy. **7** Cedawngawh Ciim Myihla ing ak kqawn amiyihna: "Tuhngawi awh ak awi na ming zaak awhtaw, **8** nami pungnawi awhkaw thin sah amiyihna namim thin koeh sah sak uh, qamkoh awh noekdak na ami awm uh **9** nami pakhqi ing kai ve ni noekdak unawh kum phlikip ak khuiawh ka ik-oehi saikhqi ce hu uhy. **10** Cedawngawh maw ce a cadilkhqik khanawh kak kaw so nawk, 'Amik kawlung ang pleng doeng na pleng uhy, ka lam am sim qoe qoe unawh', ka ti mah. **11** Cedawngawh kak kaw so nawk, 'kang dymnaak awh vekkhqi ve am kun kawn uh,' ka ti." **12** Koeinaakhqi, nangmih ak khuina u awm thlak thawl na am awm u tiksaw ak hqing Khawsa venawh kawng cangnaak kawlung taak kaana am naming hawi am naming mang taak aham ngaihita lah uh. **13** Tuhngawi tive a awm khui awhtaw thainaak thawl ing na mim thin amah sahnaak aham, myngawi pynoet ingkaw pynoet tha pe qu lah uh. **14** Ak cyk awhkaw ngaikhynaak kawlung ce a dyt dyna ni taak awhtaw Khrish awh ningnih taw ni awm hawh uhy. **15** Vemyihna kqawnnaak ana awm amiyihna: Tuhngawi awh, ak awi naming zaak awhtaw, nami pungnawi awhkaw kawlung nami sah sak amiyihna koeh sah sak voel uh." **16** Awi za hlai uhy amik pungnawi ce a ukhqi nu? Izip qam awhkawng Mosi ing a sawi thlangkhqi vam hy nu my? **17** Ukhqi ak khanawh nu khaw kum Phlikip khuiawh ak kaw a so? Thawlhaak sai nawk qamkoh awh ak thikhqi ak khanawh ni ka ti my? **18** Awi ama mik ngaikhqi, am awhtaw ukhqi ak khanawh nu Khawsa ing ang dymnaak awh ama

kun aham awi a kam ce? **19** Cekkhqi ing ama mik cangnaak awh am kun thai uhy, tice ni hu uhy.

4 Ang dymnaak khuina kunnaak awikamnaak ce ang dyih hun awh, nangmih ak khuiawh u a ca awm a mang tlaaknaak aham ngaihta lah uh. **2** A mingmih ing awithang leek amik khypyi ceni kaimih a venawh awm amik khy law pyi lawt; cehlai awithang leek ce cangnaak ing a maming zaak awh a mingmih aham a phu am awm hy. **3** Ningmih ak cangnaak thlangkhqi ingtaww dymnaak ak khui na ni kun hawh uhy. Khawsa ing, "Awi kam nyng saw kawso doena kqawn nyng, 'A mingmih ce kang dymnaak awh ity awh awm am kun kawm uh," tinawh kqawn hawh hy. Cehlai khawmdtek a syn cyk awhkawng a bibinaak taw boeih hawh hy. **4** Hun pynoet awh ak Krih nyn ce, Ak Kgjin nyn awh a ik-oeih sainaak boeih awhkawng Khawsa taw dynh," tinawh kqawn hy. **5** Cek coeng bai awh ak chei awhkaw awi awh, "A mingmih ce kang dymnaak awh ity awh awm am dym kawm uh," tinawh kqawn bai hy. **6** Thlang pynoet taw cawkawng dymnaak ak khuiawh a mi kun aham awm hyn hy, cehlai ak cyk awh awithang leek phawng peek na ak awm thlangkhqi ce awi a maming ngai awh am dym uhy. **7** Cedawngawh Khawsa ing khawnghi ce hoep pe tlaih hy, tuhngawi tinawh ak khy, ak cyk awh ak kqawn hawh amyihna syn awh David hawnaak ing: "Tuhngawi awh akawi naming zaak awhtaw, na mik kawlung ce koeh hqam sak voel uh," tinawh kqawn hy. **8** Joshua ing a mingmih ce dymnaak ama na peek mantaw, khawnghi ak chang akawng ce Khawsa ing am nak kqawn hawh kaw. **9** Cedawngawh, Sabbath nyn ce Khawsak thlangkhqi dymnaak khawnghi na ana awm poe hy; **10** kawtih Khawsa dymnaak khuiawh amik kun thlangkhqi boeih taw Khawsa ing a bibinaak awhkawng ang dym lawt amyihna bibinaak awhkawng dym lawt uhy. **11** Cedawngawh, u awm awi a mang ngai awh ang tlaak kaana dymnaak ak khuiuna kun thainaak aham tha lo lah u sih. **12** Ikawthi Khawsak awi taw hqing nawh ak tha awm hy. Zawzi hu hai h kqat anglakawh h qaat ngai nawh, hqingnaak ingkaw Myihla, quhcawng ingkaw quhhluk dyna pek a bo thi hy; lingbyi poeknaak ingkaw ngaihaak ce hawi a hel thi hy. **13** Ik-oeih sai boeih boeih ve Khawsa haiawh thuh thai na am awm hy, ni ik-oeih sainaak boeih boeih ak khing ak naikung a haiawh ik-oeih boeih boeih ve hlam qu pheng nawh huh thai boeih na awm hy. **14** Khawk khan na ak cet khawsoeih boei ak sang soeih, Khawsa Capa Jesu Khrich ce ni taak hawh awh cangnaak ni taak ve ak cak na tu khak lah u sih. **15** Ningmih nik tha ama awmnaak awh qeenakaak amak ta thai khawsoeih boelikhyl amni, ningnih amih lawtna sykzoeknaak soepkep ak hu, cehlai thawlhaak amak ta ceni ni taak uh. **16** Cedawngawh qeenakaak ce ni huu ningnih a ngoenaak awh bawmnaak ce ni huu thainaak aham am qeenakaak ngawihdoelh ben ce ngaikhyaak kawlung ing zoe lah u sih.

5 Khawsoi boeikhyt boeih taw pa ak khuiawh kawng tyk na awm nawh Khawsa ing tuqunaak benawh kutto suum ham ingkaw thawlhaak awh lucik sai aham caksak uhy. **2** Ik-oeih amak sim thlangkhqi ingkaw lam ak pleng thlangkhqi ce awih zoei na ak hqui thai thlang na awm nawh amah awm tha ama awmnaak awh pe qu hy. **3** Cedawngawh amah a thawlhaak awm lucik ce a suum aham awm nawh, thlangkhqi a thawlhaak awm lucik suum aham awm hy. **4** U ingawm zoeksangaak ce amah aham am lo hy; Aaqon taw khy na a awm myihna anih ce Khawsa ing ak khy aham awm hy. **5** Cedawngawh Khrich awm khawsoeih boeikhyt na a awmnaak awh zoeksangaak ce amah aham am lo hy. Cehlai Khawsa ing a venawh, "Nang taw ka Capa na awm hyk ti; tuhngawi awh na pa na awm hawh nyng," tina hy. **6** A hun ak chang bai awh Nang taw Melkhizadek a myihna kumqui khawsoeih na awm hyk ti," tinawh kqawn bai hy. (**aiōn g165**)

7 Khawmdtek awh Jesu a hqing awh, thihnaak ak khui awhkawng ak hul thaikung a venawh khawteh na khy nawh mikphli tui a baw doena qeenakaak thoeh nawh cykcah hy, kqjhchahnaak ing a suum qu dawngawh ak cykcahnaak awi ce zaak peek na awm hy. **8** Anih ce Capa na awm hlai hy, khuikha a huhnaak awhkawng awi ngai ce cawng hy, **9** cedawngawh anih ce soep sak na awm hy, anih ak awi ak ngai thlangkhqi boeih aham anih ce kumqui hulnaak kung na coeng nawh (**aiōnios g166**) **10** Melkhizadek amyihna Khawsa ing anih ce khawsoeih boeikhyt na caksak hy. **11** Ve akawng ve khawzah kqawn aham awm hy, am naming zaak thai re re awh, kqawn caih aham kyi soeih hy. **12** A tang tang awhtaw, tuh ve cawngpyikung na ni naming kawih hawh hlai, Khawsak awi a kung awhkawng kqawn tlaih tlaih nawh cuk am kik ngoe hyn uhyk ti! **13** U awm suktui ak aw hyn taw, naasen ca nani a awm hy, dyngnaak akawng cukkiknaak ce am sim thi han hly. **14** Buh hqam taw ak hqam thlangkhqi ham ni, ak che ak leek hqimhqa thainaak aham cukkik na ak awm thlangkhqi na awm uhy.

6 Cedawngawh Khrich akawng a kung cawngpyinaak ce cehta unawh hqam ben ce pan hlai u sih, thihnaak benna lam ak sawi ik-oeih sai zutnaak ing Khawsa cangnaak, **2** baptisma akawng cawngsak naakkhhqi, thlang ak khanawh kut tloengnaakkhhqi, thlakthi thawh tlaihnaakkhhqi, kumqui thawlhi awi dengaakkhhqi ce koeh kqan tlaih tlaih voel u sih. (**aiōnios g166**) **3** Khawsa ing ani sai sak awhtaw, ni sai hly ngoen hy. **4** Vangnaak ing hypoet kah nawh, khan kutdo peek ak tan hawh, Ciim Myihla awh ak awm hawh, **5** Khawsak awi leeknaak ak tan hawh ingkaw ak law hly kawi chan awh thaawmnaak ak tan hawh thlangkhqi ce, (**aiōn g165**) **6** a ming tuuk tlaih mantaw, cekkhqi zut sak tlaih aham am coeng thai voel hy, cemyihna a ming qeengnaak awh Khawsa Capa ce thinglam awh tai tlaih unawh thlang kqeng a thekhanaak ham pe tlaih uhy. **7** Khawk-a tui ak aw deklai taw lo ak tenkung aham a phu am cang ce daw sak nawh Khawsa a zoseennaak ce huh sak hy. **8** Cehlai hling a thing ingkaw bei hqoeng ak awm lo taw a phu am awm awihche zawk aham awm hqoeng hy. A hunu taw ce a lo ce dawi na awm kaw. **9** Ka pyikhqi, vemyihna awi kqawn hlai unyng, nangmih aham ak nep bet ik-oeih – hulnaak ak awm ik-oeih awh ce ypawm na awm unyng. **10** Khawsa taw amak dyng na am awm hy; nangmih a bibinaak ing ak thlangkhqi bawm u tiksaw nam bawmnaak lungnaak a venawh naming dang sak ce am hilh kaw. **11** Nang ngaih-unaak ce a caihnaak aham nangmih boeih ing vemyihna thahlynaak ce a dyt dyna naming dang sak aham ngaih nyng. **12** Ak thakdam na nami awm aham am ngaih unyng, cehlai cangnaak yhnaak ak caming awikamnaak qo ak pangkhqi ce nami oet aham ngaih unyng. **13** Khawsa ing Abraham a venawh awi a taak awh, awi a kamnaak aham ak bau soeih anih aham u awm ama awm awm amah ingkaw amah ce awikam qu hy. **14** Zoseennaak ni pe kawng nyng saw cadil khawzah ni pe kawng nyng," tina hy. **15** Kawdungnaak ing Abraham ing a qeh coengawh awikamnaak ce huu hy. **16** Thlang ing amah anglakawh ak bau khqoet ing ni awi a kam, cawkawng awikamnaak ce cak nawh oell qunaakkhhqi ce boet sak hy. **17** Amak hleng qu thai amah ang cainaak awitaak cakhqi venawh ak caih na ak awm ce Khawsa ing sai aham a ngaih awh, awikamnaak ing ak awitaak ce caksak hy. **18** Hleng thai na amak awm ik-oeih pakkhih awh Khawsa taw a qaii ap kqawn thai hy, ningnih a venawh peek na ak awm ngaih-unaak ce tu aham ning dawng nawh ning ngaih a dingnaak aham Khawsa ing vemyihna sai hy. **19** Myihla ham vawhkaw ngaih-unaak ak cak ingkaw ypawm ve ni ta uhy. Cawkawng ngaih-unaak cetau hi zannaak a hu ben awhkaw hun ciim ak khuiawh kun hy, **20** ce a hun awh ningnih a haina ak cet Jesu ce ningnih ang zyng

na kun hy. Melkhizadek amyihna anih taw ningnih aham kumqui khawsoeih boekhyt na awm hawh hy. (aiōn g165)

7 Vawhkaw Melkhizadek vetaw Salem sangpahrang na awm nawk Sawsang soeih Khawsa a khawsoeih na awm hy. Anih ing ce Sangpahrangkhqi noeng nawh ak voei law Abraham ce hqum nawk zoseennaak pehy. 2 Abraham ing anih a venaw pahqa awh pynoet pehy. Lamma cyk awh anih ang ming kqawn ngaihnaak taw "Dyngnaak Sangpahrang tinawh kqawn ngaihnaak "Salem Sangpahrang" mingna bai hy. 3 Anu ingkaw a pa am awm hy, ak hlakhung a qui a qawng thiham qoe am awm hy, ak kqannaak nyn awm am awm nawk a hqing a dytnaak awm am tahi, Khawsa Capamyhna kumqui khawsoeih na awm hy. 4 Anih ce ikawmyih ahna a bau tice poek lah uh: Pakdam Abraham ing zani thlang a ik-oeih a qawt peek ak khui awhkawng pahqa pynoet ce ana pehy. 5 Anaa awi ing khawsoeih na ak awm Levi a cadilkhqi ing thlangkhqi venawh pahqa pynoet cawi aham ngoe hy – cawkaw thlangkhqi taw a koeinaa suum Abqamham a cadilkhqi lawt ni. 6 Cawkaw thlang cetaw, Levi a cadil na am awm hlai hy, Abraham a venawh kaw pahqa pynoet ce lo nawk awikammaak ak ta Abraham ce zoseennaak pehy. 7 Upvoetnaa a taak kaana ak zawi ce ak bau khqoet ing zoseennaak pehy. 8 Pynoet benawh, ak thi thlang ing pahqa pynoet ce cawi hy, cehlai pynoet bai bai awhtaw, cawkaw a hqing thlang ing ce ana cawi bai hy. 9 Pahqa pynoet ak cawi Levi ing Abraham ak caming pahqa pynoet pehy, u ingawm ti thai mai hy. 10 Ikawtih Abraham ing Melkhizadek ang hqum awh Levi taw a pakdam a pum khuiawh ni a awm hyn. 11 Levikhqi a khawsoeih bibinaak ak caming soepnaak ce huh thai na a awm mantaw (vawh anaa awi peek ce thlangkhqi venawh peek na awm hy), ikaw ham Aaron a mihi kaana Melkhizadek amyihna ak awm khawsoeih ak law hly kawi ce a mi na ngoe bai? 12 Khawsoihkhqi a mi na hleng qu awh, anaa awi peek awm hleng qu aham awm hy. 13 Vawhkaw ik-oeikhqi awh kqawn na ak awm anih ce thlak chang ni, ce ak thlang khui awhkawng u ingawm bawkthang awh bibi hlan hy. 14 Ningmih a Bawipa taw Juda thlang ak khui awhkawng law hy, cehlai ce ak thlang ak khui awhkawng khawsoeih ak awm hly kawi Mosi ing ap kqawn hy. 15 Melkhizadek amyihna ak awm khawsoeih ak chang ve ang dang law mantaw ningnih ing nik kqawn ve caih khqoet hy. 16 anih taw pakdamkhqi ing ami sawinaak a lawng a lam amyihna ak awm khawsoeih am nawk amak plawci thai hqing saithainaak ak caming ak awm na awm hy. 17 Ikawtih vemyihna phawng hyt awm hy: Nang taw Melkhizadek amyihna, kumqui khawsoeih na awm hyk ti," a tina. (aiōn g165) 18 Lamma awhkaw sainaak cetaw ak tha am awm nawk kawna a mang coeng awh hoep na awm hy. 19 (Ikawtih anaa awi peek ing ikawtih awm am soep sak hy), cedawngawh ngaih-unakaak nep bet ce awm sak hy, ce ak caming ningnih taw Khawsa venawh ni zoe bet uhy. 20 Ce a ik-oeih awh awikam kaana am na awm hy. Thlangkhqi taw aki kam kaana khawsoeih na coeng uhy, 21 cehlai anih taw Khawsa ak awi kamnaak ing khawsoeih na coeng hy: "Bawipa ing awi ana taak hawh dawngawh ak kaw am thaw voel kaw: 'Nangtaw kumqui khawsoeih na awm hyk ti,' tinawh awi kam hawh hy. (aiōn g165) 22 Vawhkaw awikammaak awh, Jesu taw ak nep bet awikammaak ak caksak na awm hy. 23 Thihnaak ing kang nawk bi amak bi thi khawsoeih thlang awm hy; 24 Cehlai Jesu taw a hqing loet awh, anih taw khawsoeih ak cak na awm quiqah hy. (aiōn g165) 25 Cedawngawh amah ak caming Khawsa venawh ak law thlangkhqi boeih ce hul thai hy, Ikawtih cekkhqi ham geennaak thoeh peek aham anih taw awm quiqah hy. 26 Cemyihna ak awm khawsoeih boekhyt ing ni ningnih a ngoenaak ce a soep sak thai – ak ciim, coet amak kap, ak caih, thlak thawlak ak khui awhkawng ak hoep

qu nawk khan a saw na ak zoeksang qu thlang ing ni ni ngoenaak ce a soep sak thai. 27 Ak chang khawsoeih boeikhqykhqi amyihna anih ing amah aham ingkaw ak thlangkhqi ham myngawi lucik ce sai aham am ngoe hy. Cekkhqi a thawlhaak awh hypoet ak kheok koeng na amah ingkaw amah lucik coeng hawh hy. 28 Anaa awi peek ing tha amak awm thlanghqing ce khawsoeih boekhyt na caksak hy; cehlai anaa awi peek awi coengawh ak law awikammaak ing Capa ce a caksak awh anih taw kumqui dy ak soep na awm hy. (aiōn g165)

8 Kaimih ing ka mik kqawn ngaihnaak taw veni: Sawsang soeih ngawihdoelh tang benawh ak ngawi, khawsoeih boekhyt ce ningnih ing ni ta uhy, 2 anih taw hun ciim, thlanghqing a sai kaana Bawipa ing a sai hi im tang khuiawh bi ak bi na awm hy. 3 Khawsoih boekhyt boeih taw ik-oeih suum ham ingkaw hyihphum aham caksak na awm hy, cedawngawh anih ingawm ik-oeih pynoet oet ce a suum ngaii kheok aham awm hy. 4 Anih ce khawmdtek awh a awm mantaw, anaa awipeek ing ak kqawnnaak amyihna ik-oeih ak suum hly kawi thlangkhqi ce ami awm hawh awh anih ce khawsoeih na awm aham am ngoe voel hy. 5 Cekkhqi ing khawk khan na ak awm hun ciim ang myihlip khawmdtek awhkaw hun ciim awh bibi uhy. Cedawngawh mah maw Mosi ing hi im sa vang nyng a ti awh: "Hul na na awm awh na venawh ka nim huh amyihna na sak boeih aham ngaihta lah," a tinaak mah hy. 6 Cehlai Jesu a bibinaak taw a mingmih a bibinaak anglakawh bau khqoet nawk, awikammaak ak nep bet awh ang diyh awh, dyihting na a awrnnaak awikammaak a sai ce awm awikammaak ak kqynn anglakawh bau khqoet bai hy. 7 Lamma awhkaw awikammaak sainaak awhkaw thawlhaaka am a awm awhtaw, ak chang awikammaak ce sui aham am ngoe voel hy. 8 Cehlai Khawsa ing ak thlangkhqi ak khanawh thawlhaaka ce a huuh awh: "Israel ipkhui kaw Judah ipkhui kaw ing awikam tha ki sainaak a tym ce law tawn hawh hy, tinawh Bawipa ing kqawn hy. 9 Ami pakhqci ce a kut awh tunyng saw Izip qam khui awhkawng ka sawi awh awikammaak ka sai amyihna am awm voel kaw, kak awikammaak awh a mingmih taw ypawm na am awm uhy, cedawngawh a mingmih ce hawi taak khqi nyng, tinawh Bawipa ing kqawn hy. 10 Cekcoengawh vawhkaw awikammaak ve Israel ipkhui kaw mi kai ing sai kawng nyng, tinawh Bawipa ing kqawn hy. Ka anaa awi peek ce a mingmih a lingbyi khuiawh taak pe kawng nyng saw amik kawlkungkhqi awh qee pe kawng nyng. A mingmih a Khawsa na awm kawng nyng saw, cekkhqi taw kai ak thlangkhqi na awm kawm uh. 11 U ingawm a imceng awhkaw thlang ce am cawngpyi voel kaw, thlang ing a koeinaa a venawh, "Bawipa ce sim lah' am tina voel kaw, kawtih ak zawi khyt awhkawng ak bau khyt dyna cekkhqi ing kai ce ni sim hawh kawm uh. 12 A mingmih a thawlhaaka ce kai ing geenkaw ngai kawng nyng saw ami thawlhaakkhyt ce am sim loet voel kawng nyng," tinawh Khawsa ing kqawn hy. 13 Vawhkaw awikammaak ve ak thai a ti awh, ak kqynn awikammaak taw hqe hawh hy; hqe na ak awm nawk ak kqynn hawh cetaw qeeng dip hawh kaw.

9 Awikammaak lamma awhkaw Khawsa bawknaak ing a lawng a lam ingkaw khawmdtek hun ciim tahi. 2 Hi im ce ana sa uhy. Ipkhui lamma cyknaak awh mai vangnaak, caboei ingkaw phaihipi ce awm hy; ve ve Hun Ciim tinawh khy uhy. 3 A pakkhiihnak hi zaannaak ak kep awh Hun Ciim Khyt ce awm hy, 4 cedawngawh ce bawktau dawinaak sui bawkthang ingkaw awikam sainaak sui ing a khym bawm ce awm hy. 5 Cawkaw a bawm asaw awh Boemangnaak cherubim ing hulnaak dahnaak bawm ce asaw naukang ing dah hy. Cehlai ve a ik-oeikhqi hy teuh ak soep na am nik kqawn hly thai hy. 6 Vemyihna ik-oeikhqi boeih qoekbah na a awm coengawh, khawsoeikhqi ing a mimah a bibi aham kawt ak

khuiawh kun poepa uhy. 7 Khawsoih boeikhyt doeng ce kum oet awh hypoet doeng ca ipkhui na kun hy, cehlai amah a thawlhnak ingkaw thlangkhqi ing a mami sim awh ami sai thawlhnak awh lucik sai aham thisen kaana am kun hy. 8 Hun Ciim Khyt ak khuiina cehnaak lam ce lamma awhkaw hi im ang dyih khui awhtaw khaih na am awm hy tice ve a ik-oeih ingkaw Ciim Myihla ing dang sak hy. 9 Tuh awhkaw ik-oeih nytahnaak aham ce a ik-oeih ce awm hy, ik-oeih suum ingkaw lucik sainaakkhqi ing Khawsa ak bawk thlangkhqi ak kawlung am ciim sak hy tice dang sak hy. 10 Ce miikhqi taw awk ai ingkaw silhnaak ak chang changkhqi mai ni – ak thai sainaak a awm hlan khui awhtaw ak khan ben ik-oeih sainaak ce ana how na uhy. 11 Vawh a oepchoeh na ak awm ik-oeih leekkhqi a khawsoeih boeikhyt na Khril ce a law awh, thlanghoing kut ing ama sai, ik-oeih sai ak khuiawh amak pa, ak bau khoqet ingkaw ak soep khqoet hi im ak khuiina ce cet hy. 12 Me ingkaw vaitaw a thi ing am kun hy; amah a thi ing Hun Ciim Khyt ce thlang boeih aham hypoet doeng kun nawh, kumqui hulnaak ce hu law hy. (aiōnios g166) 13 Me ingkaw vaitawm cai a thi ingkaw vaitaw ca a hlawi ce amak ciim thlangkhqi ak khan benawh ami ciimnaak aham ak khanawh theh sih khqi hy. 14 Cemyihna a awm awhtaw coet amak kap nawh kumqui Myihla ak caming Khawsa venawh amah ingkaw amah ak suum qu Khril a thi khqoet ingtaw ikawmyih dyna nu ningnih thihnaak na anik sawikung “ningnih ak hawlm simnaakkhqi ve ak hqjng Khawsa bi ni binaak tham aham a ciim law sak khqoet kaw cel! (aiōnios g166) 15 Vawh ve Khril taw awikam tha i dylithing na awm hy, ak khy thlangkhqi ing kumqui qo awikamnaak ce ami pangnaak tham ingkaw – lamma awhkaw awikamnaak ak kaiawh a mik thawlak thlangkhqi ce hul nawh loet sak aham anih taw thi hawh hy. (aiōnios g166) 16 Ngaihnaak ik-oeih awh, ce ngaihnaak ak saikung a thihnaak ce dang sak aham ngoe hy, 17 Ikwatih ngaihnaak taw thlang pynoet oet a thi awh ni a cak hy; Ngaihnaak ak saikung a hqjng khuiawh am cak hy. 18 Cedawngawh mah maw lamma awhkaw awikamnaak ce awm thi ing caksak na a awm lawt mah hy. 19 Mosi ing thlangkhqi boeih a venawh anaaawi peek boeih ak kqawn peek awh, vaitaw ca a thi ce tui ing lo hahy, tuu a myi ak thim ingkaw hyssop thing pang ce a lawh coengawh, cazawl ing thlangkhqi ce theh sih khqi boeih hy. 20 Vetaw awikam sainaak thi ni, vetaw nami khoeam aham Khawsa ing nangmih awi ani peek khqi ni,” tina hy. 21 Cemyih koep lawtna, hi im ingkaw khawning awhkaw ik-oeih hawnaakkhqi boeih awm thi ing theh sih hy. 22 Anaaawi peek awi ing ik-oeih soepkep ang toek ce ciim sak aham a ngoe awh, thi a mang lawng awhtaw queenkaw ngainaak ce am awm hy. 23 Cedawngawh, khan benna kaw ik-oeikhqi buk tloep nawh ciim sak aham vawhkaw hyihphumnaak sai ve ngoe hy, cehlai khan benna kaw ik-oeikhqi qoe taw vekkhqi anglakawh ak leek khqoet na awm hy. 24 Ikwatih ak thym bawktang ang myihlip thlanghqing ing kut ing a sai bawktang ak khuiawh Khril ce am kun hy; ningnih aham Khawsa haiawh dang aham amah qoe qoe ce khanna kun hy. 25 Khawsoih boeikhyt ing Hun Ciim Khyt awh kum goek awh amah a thi ing am nawh thi khyn nawh a kun amyihna, amah ingkaw amah suum qu tlaih tlaih aham khan na am kun hy. 26 Cemyihna a kun mantaw khawmdeak a syn cyk awhkawing khuihka hu quiqah hawh kaw. Cehlai thawlhnak ciim sak aham amah ingkaw amah ce lucik na a sai qunaak ak caming chan a boetaak benawh thlang boeih aham ak khoek koeng na hypoet na dang law hawh hy. (aiōn g165) 27 Thlanghqing ve hypoet thi hahm awm nawh, cekoengawh awi deng aham a awm amyihna, 28 thlang khawzah a thawlhnak ceh pyi aham Khril awm hypoet lucik na sai qu hy; cekoengawh a hih voeinaak na dang law bai kaw, thawlhnak ak yh aham am voel nawh amah ak qeh thlangkhqi aham hulnaak khyn aham ni ang dang hly hawh.

10 Anaaawi peek taw ak law hly kawi ik-oeih leek ang myihlip ni – ik-oeih a tang tang hlan hyn ni. Cedawngawh, hyihphumnaak sai khawi kum goek awh a boet qoe kaana sainaak aki caming Khawsa bawk aham ak lawkhqi ce ityk awh awm am soep sak thai kaw. 2 A soep sak thai mantaw, ik-oeih ami suum quiqah ce qoeng hawh kawm u man, my? Khawsa ak bawk thlangkhqi ce hypoet na ciim kang kawm usaw, thawlhnak awh ngaihseetnaak am ta voel kawm uh. 3 Cehlai cawkaw lucik sainaakkhqi cetau kum goek awh thawlhnak ak sim sak kqoeng mai ni, 4 Ikwatih vaitaw ingkaw me a thi ing thawlhnak ce ceh pyi aham am coeng tha hy. 5 Cedawngawh Khril ing khawmdeak awh a law awh: “Lucik ingkaw ik-oeih suum ce nang ing am ngaih hyk ti cehlai kai aham na qoekbah hyt pum ce ni; 6 hyih phum suumnaak ingkaw thawlak suumnaakkhqi awh nak kaw am law hy. 7 Cedawngawh kai ing, ‘kai vawh awm nyng kai akawng ni cazawl awh ana qee – Aw Khawsa, nak kawngaih sai aham law hawh nyng’ tinawh anak kqawn hy. 8 Lamma cyk awh, Lucik sainaak ingkaw ik-oeih suumnaak khqi hyihphumnaak ingkaw thawlak ik-oeih suumnaakkhqi ce am ngaih tiksaw, cekkhqi awh ce nak kaw am hoet hy,” (ce miikhqi ce sai aham anaaawi ingtaw ngoe hy) tinawh anak kqawn hy. 9 Cekoengawh, Vawh awm nyng, nak kawngaih sai aham law hawh nyng, ti bai hy. Ahih voeinaak ce dyih sak aham ak cyk awhkaw ce ak chang na tahi. 10 Cawkaw kawngaihnaak aki caming, hypoet ak khoek koeng na thlang boeih aham Jesu Khril, a pum lucik na sainaak aki caming ningnih boeih taw ni ciim hawh uhy. 11 Khawnghi hypoet coeng hypoet khawsoeih boeih ing dyi nawh beeckaen ben bibi ce sai hy; ityk awh awm thawlhnak amak ceh pyi tha i sai khawi lucik ce suum bai suum bai hy. 12 Cehlai vawhkaw khawsoeih ingkaw thawlak lucik ce ak khoek koeng na a suum coengawh taw, Pa tang benawh ce ngawi hy. 13 Cawkawng a qaal ce a khawlk kaina a taaknaak tym ce qeh hy, 14 Ikwatih lucik hypoet a sainaak aki caming amah ing a ciim sak thlangkhqi aham kumqui dyna soep hawh hy. 15 Ciim Myihla ingawm vawhkaw ik-oeih ve ningnih a venawh ni sim sak khqi hy. Lamma cyk awh: 16 Cek coeng awhtaw vawhkaw awikamnaak ve a mingmih a venawh sai kawng nyng, tinawh Bawipa ing kqawn hy. A mingmih ak kawlung khuiawh ka anaaawi khqi ce taak pe kawng nyngsaw, amik kawlungkhqi ak khuiawh qee pe kawng nyng, tinawh. 17 Cekkhqi a thawlhnak ingkaw khawboe seetnaak khqi ce am sim pe hly voel nyng, ti bai hy. 18 Thawlak queenkaw ngainaak a awmnaak hoei awh, thawlak lucik am awm voel kaw. 19 Cedawngawh, koeinaakkhqi, Jesu a thi aki caming Hun Ciim Khyt awh kun thainaak ce ni taak hawh dawngawh, 20 ak thai ingkaw ak hqjng lam amah a pum hi zan ce awng law hawh hy. 21 Khawsa ipkhui awh khawsoeih ak bau ce ni taak hawh dawngawh, 22 cangnaak ypnak kawlung tang Khawsa ce zoe lah u sih, ningnih ak kawlung ce thawlak simnaak awhkawing ciimnaak aham syp unawh ningnih a pum awm tuihciim ing sil lah u sih. 23 Ngaih-unaak ni taak ce ang thoehi kaana tu khak u sih, kawtih awi ak takung ce a ypaawm hy. 24 Lungnaak ing ik-oeih leek sainaak benawh pynoet ingkaw pynoet ikawmyihna nu tha ning peek qu lah voei tice poek u sih. 25 Huh cunnaak ve koeh hlah phlam u sih, thlang pynoet ingtaw hlah phlam uhy, cehlai ningnih taw pynoet ingkaw pynoet tha pe qu lah u sih – Khawnghi a zoe hawh dawngawh tha hlynaak ing sai khqoet khqoet u sih. 26 Awitak ciimnaak ni huh coengawh awm ni thawlak bak bak mantaw, thawlak lucik ce am awm voel kaw, 27 cehlai Khril awm awidengnaak ingkaw Khawsa qaal a uihnaak hly mai kqawng doeng ni a awm hawh hy. 28 U awm Mosi a anaaawi ak eek taw thlang pakkhih pakthum a simpynaak ing qeenaak a awm voel kaana thihnaak ce hu hy. 29 Cawhtaw Khawsa Capa ce khaw ing ak leh, lucik na a sai a thi ce amak ciim na poek nawh,

qeennaak Myihla ak thekhanaak thlang ak khqoet ce kawmih dyna nu kqih awm toeblaak a huh kaw tinawh nak poek? **30** Kawtih, Lu lawhnaak taw kai a koe ni; kai ing thung bit kawng," ti thi, cekcoengawh, "Bawipa ing ak thlangkhqi ce awi deng kaw," ti bai hy. **31** Ak hqing Khawsa kut awh tlaak aham kqih awm soeih hy. **32** Vangnaak nami huh coeng awhkaw khawngkhqi ingkaw kyinaak a haiawh hat qunaak ak bau soeih ing naming dyih ce poek lah uh. **33** Ityk nyn awhtaw thekhanaak aham ingkaw khuikha sak aham qangpui a huh awh nik tun khqi uhy; ityk nyn awhtaw kyinaak ak hukhqi mi voei a vang awh dyi uhyk ti. **34** Thawngim ak tla thlangkhqi ce queen u tiksaw, ak leek bet ingkaw kumqui dy ak cak kawn ta uhyk ti tice nami sim awn nami ik-oelikhqi a mini qawt law awh zeel doena dun uhyk ti. **35** Cedawngawh ypawmnaak nami taak ce koeh khawng valh uh; cawhtaw kutdo ak bau soeih hu kawn uk ti. **36** Khawsak Kawnggah nami sai coengawh yhnaak nami taak aham awm hy, amah ak awitaak amyihna hu bi kawn uk ti. **37** Kawlkhalkh awh, Ak law hly kawi thlang ce ang yih kaa qoe na law hawh kaw. **38** Cehlai kak thlakdyng taw cangnaak ing hqing kaw. Ahu na ang thoeih awhtaw, ak khanawh zeelnaak qoe am ta kawng nyng. **39** Cehlai ningnih taw hu na ak thoeih nawh ak plawci thlang na amni awm uhy. Cangna nawh hulna ak awm thlangkhqi na ni awm uhy.

11 Cangnaak taw amni hu hlai hy, ning ngaih-u ik-oehi awm mare hy ti simnaak veni. **2** Vawh ni syn awhkaw thlangkhqi ingawm kyiuhcynaak a mina huh. **3** Cangnaak ak caming khan ingkaw dek ve Khawsa awipeeknaak myihna sai na awm hy tice ning zasim thai uhy, cedawngawh huh thai na ak awmkhqi ve huh ik-oehi awhkawng sai na am awm hy. (aïon g165) **4** Cangnaak ak caming Abel ing Kain anglakawh lucik ak nep khqoet ce Khawsa venawh suum hy. Cangnaak ak caming thlakdyng anang ming na nawh, Khawsa ing a ik-oehi suum ce ak nep na kqawn pehy. Anih ce thi hawh hlai hy, cangnaak ak caming tuh dy na awi kqawn hyn hy. **5** Cangnaak ak caming Enoch taw a hqing na lawh na awm hy, cedawngawh thihnaak ce am sim hy; Khawsa ing a lawh hawh awh, anih ce huh thai na am awm voel hy. Anih ce a lawh hlan awh, anih taw Khawsak kaw ak zeel sakkung kyiuhcynaak ak hu thlang na awm hy. **6** Cangnaak kaana Khawsak kaw zeel sak aham am coeng thai hy, u awm a venawh ak law thlangkhqi boeih ing anih taw awm nawh amah ak sui thlangkhqi ce kutdo pehy tice ak cangnaak aham awm hy. **7** Cangnaak ing Nova ing ama huh ik-oehi akawng a venawh kqawn peek na a awm awh, ak ciim kqijhaak ing a ipkhui kaw hulnaak aham lawng ce sai hy. Ak cangnaak ak caming khawmdekk ce ana dawk sak nawh cangnaak ak caming ak law dyngnaak qo ak pangkung na awm hy. **8** Cangnaak ak caming Abraham ing, qo na a pang hly kawi hun pynoet na ceh ham khy na a awm awh, han benna nu ka ceh lah voei ti awm am sim hlai hy, awi ngai nawh cet hy. **9** Cangnaak ak caming awikamnaak ram awh ce im sa naws thlang a ram awh ce khin a myihna awm hy; hi im sa naws awm hy, amah ingkaw cawhkaw awikamnaak ak pang hain Isak ingkaw Jakob awm awm lawt hy nihi. **10** Anih ing hai ben awhkaw ak awm Khawsa ing a sak khawk bau ingkaw hun ce dan hy. **11** Cangnaak ak caming, Abraham ing pacawng hawh nawh – Sarah awm cakkaa bai hlai hy – a venawh awi ak takung ing anih ce ypawm thlang na ak poek awh pa na awm sak hy. **12** Cedawngawh cawhkaw thlang pynoet awhkawng, anih ce ak thi amih tluk nani a awm hawh hlai, khan na kaw aiuchi khawzah ingkaw tuicunli a keng awhkaw noet noeng am dizui zah cadil pung pe sak hy. **13** Vawhkaw thlangkhqi boeih ve ami thihi awh cangnaak ing hqing uhy. Awitaaknaak amak awm ce am hu hlan hyn uhy; ak hla nakawng ni hu unawh ami do hy. Khawmdekk awh thlanglang ingkaw khin nani ka mi awm tice sim

uh. **14** Vemyihna ak kqawnkhqi ing a mimah aham qam ak awm ceni ami sui tice dang sak uhy. **15** A cehtaak qam ce amik poek tlaai mantaw, ang hlat na awm hlat hawh kawm uh. **16** Cehlai ak leek khqoet qam – khan qam ce – lamtoent uhy. A mingmih aham khawk bau ce a poek abah peek hawh dawngawh, a mingmih a khawsa tinawh khy aham khawsa ce ap chak hy. **17** Cangnaak ak caming Abraham ing, khawsa a noek adak awh, lucik na sai aham a capa Isak ce suum hy. Awitaaknaak ak hu thlang ing a taak chyn a Capa ce lucik sainaak aham pe seng hy. **18** Khawsa ing, Isak awhkawng ni na cadil ce noet na a awm hly," tina hy. **19** Khawsa ingtaw thlakthi awm thawh sak thai hy tice Abraham ing poek hy, cedawngawh Isaak ce thihnaak ak khui awhkawng hu tlaai hy. **20** Cangnaak ak caming Isak ing Jacob ingkaw Isau ce hailam ben awhkaw ham zoseennaak pehy. **21** Cangnaak ak caming Jacob ing a thih tawm awh Josep a cakhqi ce zoseennaak peek pehy, a sawngqjawl awh ang hang doena Khawsa ce beek hy. **22** Cangnaak ak caming Josep ing, a hqing boetaak a pha tawm awh Izip ram awhkawng Israel thlangkhqi amik conaak akawng ce kqawn nawh a quh khoemnaak akawng ce kqawn pehy. **23** Cangnaak ak caming Mosi a thang coengawh a nu ingkaw a pa ing hla thum dy awh thuh hy nihi, naasen mailai amni tinawh a mi huh awh, sanpahrang ak awi peek zani am nali kqih hy nihi. **24** Cangnaak ak caming Mosi ing a taai law awh, Feqo a canu a capa na awm aham anak tha na hy. **25** Kawlkhalkh awh thawl awm hlynaak huh anglakawthawt Khawsak thlangkhqi mi kuihka hain aham tyk bet hy. **26** Amah a kutdo a huh hly ce a oepchoeh a a huh awh, Khrir a kuihka huhnaak ce Izip qam awhkaw kawn a qaa anglakawh a phu ak awm khqoet na ce poek hy. **27** Cangnaak ak caming Izip qam ce cehta hy, Sangpahrang ak kawsonaak ce kqih kaana; huh thai na amak awm ce a huh awh yh hy. **28** Cangnaak ak caming cehtak poei ingkaw thi ing synaak ce a sai awh, caming ak himkung ing Israel camingkhqi ce am bi hy. **29** Cangnaak ak caming thlangkhqi ing tuinuk sen awh cengdek awh cet uhy; cehlai Izipkhqi ami ceh lawt awhtaw, tui awh cum kanglak uhy. **30** Khaw khqih nyn thlangkhqi ing amik chung coengawh cangnaak ak caming Jeriko vawng ce min hy. **31** Cangnaak ak caming a pum a zawi nu Rahab ing, lam amik zamkhqi ce ana do khqi nawh, awi amak ngai thlangkhqi mi him hain na am awm hy. **32** Kaw kak kqawn bai kaw? Gideon, Barak, Samson, Jephthah, David, Samyl ingkaw tawngkhqi kawng kqawn aham a tym ing am khoek hy, **33** cangnaak ak caming cekkhqi ing ramkhqi noeng uhy, am dyngna uk unawh awikamnaak ce hu uhy; cekkhqi ing samthynn am kha khqi cyp sak uhy, **34** mai kqawng ce thih unawh zawzi ak hrat awhkawng loet uhy; a mingmih ak tha ama awmnaak ce thaawmnaak na coeng nawh; qaal tuknaak a hun awh thaawmnaak ing rap chang cem a qaal ce hqut a dep uhy. **35** Nukhqi ing amik thlakthi a hqingna ak tho tlaikhqi ce hu uhy. Ak changkhqi taw kuihka huh sak unawh am hlah uhy, cekkhqi ing thawl tlaikhnaak ak leek bet ce hu kawn uh. **36** Thlang pynoet ing qaihbu na sainaak ing quiboeng ing vyknaak ce zawk uhy, thlang pynoet bai taw thiqli ing khit unawh thawngim khuina thla uhy. **37** Lung ing khawng uhy; hlawh ing boenghii na aat pat uhy; zawzi ing thihi sak uhy. Tuu a vynkhqi me a vynkhqi bai sak unawh re a ra uhy, ak voet ak hlaah na ta uhy, kuihka huh sak unawh the a kha na uhy – **38** khawmdekk ve a mingmih aham taw awmnaak pa am cu hy. Kqawng ingkaw tlang kqang re ang ra unawh, lukkawk ingkaw lawk-kqawngkhqi awh awm uhy. **39** Cangnaak awh vemyihkhqi boeih ve ana zawk uhy, cehlai u ingkaw awikamnaak ce am pang hy. **40** Ningmih mi kutoet na a mingmih awm ami soepnaak thai aham Khawsa ing ak leek khqoet ik-oehi ce ningnih aham qeek abah law hy.

12 Cedawngawh, ningnih ve cingmai amyihna ak sah dyihthing ing anik chung khqi kheop dawngawh ningnih anik kangkhqi boeih ingkaw ak zoei cana ngaih ak kyi sak thawlhnak ve khawng unawh, ningnih aham a taak law hyt hat qunaak cainaak benna kawdungnaak ing dawng lah u sih. **2** Ningmih ak cangnaakkung ingkaw ak soep sakkung Jesu ce mik lyl na u sih, a haiawh zeelnaak ce taak na awm hlai hy thinglam tainaak ce yh hy, chahqinaak ce yh nawh Khawsa ngawihdoelh tang benawh ce ngawi hy. **3** Namik tha hoet nawh namik kaw ama boetnaak aham cemyihna thlakthawlhkhqi a thunkhanaak ak zawk anih ce poek lah uh. **4** Thawlhnak nami tuk awh, thi ang lawng dyna tuk hlan uhyk ti. **5** Cakhqi amyihna nangmih a venawh thapeeknaak awih kqawn awm hilh hawh uhyk ti: "Ka Capa, Bawipa a toelnaak ce a mailai na koeh poek, ani ziyh awh ce nak kaw koeh boet sak, **6** 'Bawipa ingleungnaak thlangkhqi ni a toel hy, a cana a taak thlangkhqi boeih ce phep hy' **7** Kyinaak ce toelhaak amyihna poek lah; Khawsa ing cakhqi amyihna ni anii taak hy. Kawmih a ca nu a pa ing a toel kaana ak awm? **8** Toel na am nami awm mantaw (thlang boeih toel na awm hy), nangmih taw ca tang tang na am awm u tiksaw caqukkhqi na ni nami awm. **9** Ningmih ing ak toelkung thlanghqing pakhqi ni ta boeih unawh cekkhqi ce nik kqihchah uhy. Cawhtaw ikawmyih aih na nu ningnih ang Myihla a Pa venawh ning pe qu nawh ni hqing hly ce! **10** Ningmih a pakhqi ing ak leek soeih na poeknaak ing kawlhkalh awhkaw ham ni toel khqi hy; ningnih ing amah ciimcahnkaak ak khuiawh ni paa thainaak aham khawsa ing ningnih a leeknaak aham ni toel khqi hy. **11** Kawmih a toelnaak awm a toel tloek awhtaw am awm hqa hy, tlo hy. Cehlai, a huna taw phep na ak awmkhqi ing dyngnaak ing ngaihdingnaak ce aat uhy. **12** Cedawngawh, tha amak awm nami baankhqi ingkaw namim khukkhqi ce ak tha awm sak lah uh. **13** Nami khaw lehnaak aham lamkhqi ce ak qip na sai uh," cedawngawh ni khawk khemkhqi ing ceh thai kaana am awm kawm usaw ami qoei hly lat hy. **14** Thlang boeih mi qoep ang qui cana awm thainaak aham ingkaw ak ciim cana awm aham na mik tha lo lah uh; ciimnaak kaa awhtaw u ingawm Bawipa ce am hu thai kaw. **15** U ingawm Khawsak seennaak ce sim kaana ama awmnaak nawh kyinaak ing thlang khawzah ama ciimnaak aham ak kqa ak kha ce a ma cawtnaak aham ngaihta uh. **16** Nu ingkaw pa thawlh sainaak, Esau amyihna Khawsa sim kaana am nami awmnaak aham ngaihta uh, anih ingtaw caming qo pang hly kawi ce buh khangoet na zawi hy. **17** Cekcoengawh taw, nami sim amyihna, zoseennaak ce huh aham ngaih lawt hlai hy, am hu thai voel hy. Zoseennaak ce mikphli ing thoeh hlai hy, kawlung am thaw pe thai voel hawh hy. **18** Bi thai na awm nawh mai na ak kqawng tlang na ce namgih am law uhyk ti; thannaak, khaw na than khawhli; **19** ut yng awi ingkaw cemiyh awipau ak zakhqi ing cemiyh ak awi ce a maming zaaknaak voel ahm queenak thoeh uhy, **20** kawtih a mingmih a venawh peek na ak awm awi: "Qamsa ing zani tlang ce a leh awhtaw, lung ing khawng aham awm hy," tinaak awi ce am yh thai uhy. **21** Ni huh awh kqih ham a awm awh, Mosi ing, "Kqih doena thyn hy," tinawh kqawn hy. **22** Cehlai nangmih taw Zion Tlang, khan Jerusalem, ak hqing Khawsa a khawk bau na ni nami law hy. Khan ceityih a thong a sang zeel doena a ming cunnaak awh, **23** Khawk khan na ming qee na ak awm caming a thlangboel a venawh ni nami law hy. Nangmih taw thlang boeih awi ak dengkung, Khawsa, soep sak na amik awm thlakdyngkhqi ang Myihla ing, **24** simpikung ak thai dyihthing na ak awm Jesu, Abel a thi anglakawh awi ak leek bet ak kqawn thi ing a syp a venawh ni nami law hy. **25** Awi ak kqawn ce am nami oelhnaak aham ngaihta uh. Khamdeok awh a mingmih a venawh ngaih taaknaak awi ak kqawn peek thlang ce ami oelh awh ama mi loet awhtaw, khawk khan nakawng ningnih ngaih taaknaak awi

ak kqawn law ce ni oelh mantaw ikawmyihna ningnih ing ni loet naak khqoet kaw? **26** Cedawngawh ak awi ing khawmdek tyn sak hy, cehlai tuh anih ing, "Tuh khawmdek doeng kang tyn sak voel kaana khan awm tyn sak kawng nyng," tihy. **27** "Bai awh" a tinaak awi vetaw tyn thai na ak awm ik-oeihkhqi boeih kheonaak veni – cetaw tyn thai na amak awmkhqi ce a cak naak poe aham ni. **28** Ningmih ing amak tyn thai qam ce ni huh hawh awh, zeelnaak awi kqawn u sih, kqihchah kawpoek kyinaak do kawi na Khawsa ce bawk u sih, **29** kawtih ningnih a Khawsa taw "Mai na ak kqawng Khawsa ni.

13 Cingnahqui amyihna lung qu na poe lah uh. **2** Khin ak khai do a dan aham koeh hilh law uh, cemyihna ak do ak dankhqi ing sim kaana khan ceityihkhqi ce do a dan uhy. **3** Thawngim ak tlakhqi ce thawng ak tla pyi amyihna poek qu unawh koeh hilh law uh, thlang ing a thekhanaak thlangkhqi ce na mimah awm ak khuihkhqi amyihna poek qu unawh koeh hilh law uh. **4** Chungvanaak ve thlang boeih ing a zoeksang aham awm hy, chungvanaak ihkhun awm a ciimcaih aham awm hy, kawtih ak samphaihkhqi ingkaw nu ingkaw pa amak thym na ak awmkhqi ce Khawsa ing awi deng kaw. **5** Tangka ngaihnaak ing khaw koeh sa law, na taak ang cang ing na mik kaw ttyp law sak uh, kawtih Khawsa ing, Ityk awh awm amni cehtaak kawng nyng; ityk awh awm amni qoeng hty kawng nyng," tihy. **6** Cedawngawh ningnih ing ngaih tlypnaak ing, Bawipa taw ak dawm ak hlaikung ni; am kqih kawng nyng. U ing kai ikaw anii tinaak tang kaw? ni ti uhy. **7** Nangmih anik ukkungkhqi, nangmih a venawh Khawsak awi ak kqawn lawkungkhqi ce koeh hilh law uh. A mingmih a khawsaknaak ce poek unawh taw a mingmih ak cangnaak ce oet lah uh. **8** Jesu Khrir taw zan, tuhgawi ingkaw kumqu dyna am hleng qu hy. (aiōn g165) **9** Cawngsaknaak ak lawha soepkep ce koeh hqut law uh. Am geennaak ing ningnih ak kawlung ve tha awm sak aham leek hy, buh awk a ainaak kung awhkaw buh a an kaana, buh ak veelkhqi aham ikawh a phu am awm hy. **10** Cehlai hi im awhkaw bi ak bikhqi ing ce bawkthang awh buh ama ai thai bawkthang ce ningnih ing ni ta uhy. **11** Khawsoih boeikhyt ing Hun Ciim soeih ak khuiawh qamsa a thi ce thawlh ik-oeih suum na khyn hy, cehlai a pum taw a ceng na hyih na phum hy. **12** Cedawngawh Jesu ingawm amah a thi ing thlangkhqi ce ciim sak aham khawk bau awhkaw vawng a ceng na khuihka hu hy. **13** Cedawngawh, the a kha a zawknaak vawng a ceng na amah a venna cet lah u sih. **14** Ikawtih vawh ve khawk bau ce ni siu uh hy. **15** Cedawngawh, Jesu ak caming Khawsa venawh ang ming ak cangnaak hui am kha ak thaith ing kyihnaak ce a boet qoe kaana suum u sih. **16** Ik-oeih leek sainaak ing thlang a venawh kqawn peek poetoe aham koeh hilh u sih, kawtih vemyih lucik sainaak ing khawsak kaw zeel sak hy. **17** Nangmih anik ukkhhqik awi ce ngai unawh taw a saithainaak awh ce pe qu law lah uh. A mimah a bibinaak akawng ak kqawn hly kawi na ami awm awh nangmih ce ni khoem ni doen khqi poepa hy. Cekkhqi a bibinaak thlang zeelnaak na a awmnaak nawh, phyihqih na a awm awmnaak aham awi ngai law pe uh, phyihqih na a awm mantaw nangmih a hawikhhangnaak am awm kaw. **18** Kaimih ingtaw ik-oeih soepkep awh thlang ak kqihchah kawi na khaw sak aham ak ciim na kawpoek ta unyng. **19** Nangmih ce ka nim thawh thai khqi tlaihnaak aham awipui na cykcah aham ni ceei khqi nyng. **20** Tuukhaung bau na ak awm ningnih a Bawipa Jesu Khrir ak caming kumqu awikamnaak sainaak ak haw lawkung, ngaihdingnaak Khawsa ing, (aiōnios g166) **21** amah ak kawngaih saithainaak aham ik-oeih soepkep ing ni theoiehcam khqi seitaw, amah ak kawzeelnaak ce Jesu Khrir ak caming ningnih ak khuiawh sai seh, Jesu Khrir a venawh thangleeknaak kumqu dy awm seh. Amen (aiōn g165) **22** Koeinaakhqi, ka ni yonnaakkhqi

awi ve ak nepna naming ngaih aham ngaih nyng, ca ak tawi cani nangmih aham ka qee law hy. **23** Ningmih a naa Timote hlah hawh uhy tice nami sim aham ni ngaih khqi nyng. Anih ce a pha law awhtaw, nangmih hqip aham anih ingqawi law haih kawng nih nyng. **24** A hqamcakhqi ingkaw Khawsak thlangkhqi boeih ce kut tlaih law uh. Italy qam awhkaw thlangkhqi ing kut ni tlaih uhy. **25** Nangmih boeih a venawh am qeenndaak awm seh.

Jakob

1 Khawsa ingkaw Bawipa Jesu Khril a tyihzawih, Jacob ing. Qampum awh ak theh qu khawngkhak pilnam hlaih avenawh: Kut ni tlaih khqi nyng. **2** Koeinaakhqi, kyinaak soepkep nami huh hoih awh ce, awmhlynaak na poek law uh, **3** kawtih nangmih ak cangnaak noek adak naak ing yh thainaak awm sak hy. **4** Hqing taai khyk unawh nami soepnaak aham yh thainaak ing a bibi ak coeng aham awm hy, cawh ni voet a hlauhnak am nami taak hly. **5** Nangmih ak khuiawh cyihnaak ak voet thlang nami awm awhtaw, khawboe cawwnaak ing saibi kaana ak pekung Khawsa venawh a thoeh aham awm hy, cawhtaw anih ing pe kaw. **6** Cehlai a thoeh awhtaw, upvoetnaak a taak kaana cangnaak ing thoeh seh, upvoetnaak kawlung ak ta thlang taw tuicunli awhkaw tuibak, zilh ing huhai na a zawn ing myih hy. **7** Cemyih ak thlang ing Bawipa venawh kaw ik-oeih huh aham koeh poek seh. **8** Cemyih ak thlang taw kawlung ak lak law plak, ik-oeih a sainaak hoih awh amak cak ak thlang ni. **9** Ak nem na kawdungnaak ing ak awm thlang ing dyih hun ak sang awh a zoeksang qu aham awm hy. **10** Cehlai ak boei ak thlang awm a dyih hun a nem a dawngawh a zoeksang qu aham awm hy, kawtih anih ce qam a pai amyihna kawlhkalh awb qeem kaw. **11** Khawmik ang thoeng law awhtaw hlawk nawk qam ce zai hy; a pai ce zai nawk a dawnaka ce geem hy. Cemyih lawtna, thlang boeikhqi taw boeinak ce a mi sui huiauh zani plal a tham kawm uh. **12** Khuikhanaak ak kaiawh ak yh ngah ngah ak thlangkhqi taw ami zoseen hy, noek daknaak ce ami huh coengawh, Khawsa ing a lungnaak thlangkhqi ham a taak peek hqingnaak lumyk ce hu kawm uh. **13** Sykzoeknaak huh na a awm awh, u ingawm "Khawsa ing ni a ni sykzoek" koeh ti seh. Ikawtih ik-oeih amak leek ing Khawsa ce am sykzoek thai hy, u awm am syk qoe bai hy; **14** Cehlai thlang boeih ing amah ak che ngaihnaak awh ni sykzoeknaak ce a huh hy, cawh sykzoeknaak ing sawi nawk zoek hy. **15** Ngaihnaak awm law nawk ce ing thawlhnak ce thang sak hy; thawlhnak ce hang taai nawk, ce ing thihnaak ce thang sak patoe bai hy. **16** Koeinaakhqi, u ingawm koeh ni thai nak khqi seh. **17** Kutdo laksawng leekkhqi ingkaw a zoe ik-oeih soepkepkhqi boeih ve khan benna kaw ni, khan benna kaw vangnaak Pa a venawh kawng ni a law hy, anih taw myihlip amyihna am thaw qu hy. **18** Awitak ing thang sak aham ingkaw a ik-oeih saikhqi boeih ak khuiawh ningnih ve thaih cyk na ni awmnaak thai aham ningnih ve nik tyk khqi hawh hy. **19** Kalung naak koeinaakhqi, ve ve sim lah uh: Thlang boeih ing ngainaak benawh ang tah ly seitaw, awih kqawn benawh taw heng seh, kawsnaak benawh awm heng seh. **20** Ikawtih kawsonaak ing Khawsak Kawnggaih khawsak dyngnaak ben ikaw awm am haw law hy. **21** Cedawngawh, tyih ak cu khawboe qamlang ingkaw ik-oeih ak che soeikhqi ce qoeng unawh nangmih a nik hul thaikhqi nangmih ak khuiawh ling na ak awm awi ce kawdungnaak ing do law uh. **22** Namah ingkaw namah qaainaak ham, awi ce ang ngai doeng na koeh ngai law doek uh. Ak kqawn ce sai law uh. **23** U awm awi ce ngai hlai hy ak kqawn ce amak sai ak thlang taw hlialang awh a haa ak toek ing myih hy, **24** amah ingkaw amah toek qu nawk a ceh coeng awhtaw ikawmyihna a awm tice hilh pahoei hy. **25** Cehlai u awm loetnaak ak pekung anaa awi soep ce ak toek ceet taw, a qoeng kaana sai poe hy, ang zaak awi ce am hilh hy, cehlai sai poe hy – cemyih ak thlang taw a ik-oeih sainaak hoih awh zoseennaak hu kaw. **26** U awm bawknaak ak lungnaak thlang na awm hlai hy am lai ce a ma cyp awhtaw, amah ingkaw amah ak qaii qunaak thlang na awm nawk a bawknaak ce awm phu am tahi. **27** Ningmih a pa Khawsa ing ak caih ingkaw coet amak kap bawknaak a do taw veni: cadahkhqi ingkaw nuhaikhqi a

kyinaak ak dawm ak hlai nawk amak ciimcaih ve khawmdek ik-oeih awhkawng ak hoep qu thlang ce ni.

2 Ka koeinaakhqi, ningnih a Bawipa Jesu Khril ak cangnaak thlangkhqi na nami awm dawngawh, thlang a mikhaai koeh toek uh. **2** Tinaak maiawh, nangmih pynoet na naming cun awh sui kut cabyn byn nawk subai ak leek ing ak thoeihcam qu thlang ce law mai lah seh, cawh subai ak che ca ak bai thlang pynoet kun law lawt lah seh. **3** Subai ak leek ing ak thoeihcam qu thlang ce mik lyl na u tiksaw, "Vawhkaw ngawhihnaak leek awh ngawi," nami tinaak coengawh khawdeng hahqah thlang a venawh, "Nang taw cena a nang dyi mai," aw am awhtaw ka khawkung dek awh ngawi mai," nami tinaak mantaw, **4** na mimah ak khuiawh peknaak a sai, kawpoek amak leek ak pekkung na am nami awm nawk nu? **5** Ka lungnaak koeinaakhqi, ngai lah uh: khawmdek mik huh awh hahqah na awm hlai hy cangnaak awh ak boei nawk, amah ing lungna nawk awitaak qam pang aham ak awm thlangkhqi ce Khawsa ing am tyk hy nak ti nu? **6** Cehlai nangmih ingtaw hahqah thlangkhqi the a kha na uhyk ti. Boeikhqi ing ni nangmih awi dengnaak kung na a ni sawi khqi ka ti my? **7** Nangmih a nik ta khqi kung ang ming ak sang soeih ce a mingmih ing ni ak che na a mik kqawn ka ti my? **8** Cakciim awh ak awm anaa awi, "Namah a pum amyihna na imceng thlang ce lungna lawt," tice nami hqut tang awhtaw, ik-oeih dyng ak sai thlang na awm uhyk ti. **9** Cehlai thlang a mikhaai nami toek mantaw, thawlhnak aik sai na awm u tiksaw anaa awi ing anaa awi ak hqekungkhqi na ni tak khqi nawn hawh hy. **10** Ikawtih u awm anaa awi hqut boeih hlai hy. Pynoet doeng ca awm a ma sai awhtaw ak changkhqi boeih awm ak hqekung na awm hawh hy. **11** Ikawtih, Koeh samphaih, ak tikung ing, Thlang koeh him, ti bai hy. Am samphaih hlai hyk ti thlang na him awhtaw, nang taw anaa awi ak hqekung na awm hyk ti. **12** Loetnaak ak pekung anaa awi ing awi a deng hly kawi thlang amyihna awi kqawn unawh ik-oeih sai uh, **13** kawtih qeennaak amak ta thlangkhqi taw qeennaak taak kaana awidengnaa hu lawt kaw. Qeennaak ing awidengnaa ce noeng hy! **14** Koeinaakhqi, thlang ing cangnaak ta nyng ti hlai hy sainaak ama taak awhtaw, ikaw hawihkhangaak a awm? Cemyih cangnaak ing ak hul hly nu? **15** Tinaak mai awh koeinaa pa awm nu awm subai ingkaw awk a ai a taak kaana awm lah seh. **16** Nangmih ak khuiawh thlang pynoet ing, Sadip na cet lhah; a awihpyt na awm nawhtaw nak phoen phyi seh nyng," tina seitaw pumsa awh a kyk ngaihnaak ikaw awm a peek kaana a tyih mantaw ikaw hawihkhangaak a awm kaw? **17** Cemyih koep lawtna, cangnaak ce amah doeng awm hqoeng nawk, sainaak ing a mak bawng awhtaw thi hy. **18** Thlang pynoet ing, Nang ing cangnaak ta hyk ti; kai ing sainaak ce nyng," ti lah seh. Sainaak amak awm cangnaak ce nim huh lah, cawhtaw cangnaak ce sainaak ing dang law sak lawt vang. **19** Khawsa pynoet awm hy tice cangna uhyk ti. Nep hy! Qaaikhqi ingawm cangna unawh – thyn uhy. **20** Nang thlakqaw, sainaak amak awm cangnaak taw phu am tahi tice huh sak aham nak ngaih nu? **21** Ningmih a pakdam Abraham ing bawkthang awh a capa Isaak a nawnnaak ak caming ni thlakdyng ang mingnaak ka ti my? **22** Ak cangnaak ingkaw a sainaak ce pynoet na ak bawng a dawngawh, ak cangnaak ce a sainaak ing soep sak hy. **23** Cedawngawh, Abraham ing Khawsa cangna nawk, cawhkaw ak cangnaak ce dyngnaak na taak pehy," tinaak cauk awi soep hy, anih ce Khawsa a pyi tinawh khy uhy. **24** Cangnaak doeng kaana ik-oeih sainaak ing thlang ing dyngnaak hy ti cye hu hawh uhyk ti. **25** Cemyih lawtna, a pum ak zawi nu Rahab zani lapzamkhqi ami law awh a im awh awm sak khqi nawk lap chang benna kawng a tyih tlaih a dawngawh ni a sainaak ce dyngnaak na a noet peek ka

ti my? 26 Myihla amak awm pum taw a thiib amyihna sainaak
amak awm cangnaak awm thi lawt hy.

3 Koeinaakhqi, nami mah ak khuiawh cawngpyikungkhqi na koeh awm law khawngkhak uh, kawtih thlang ak cawngpyikhqi ing awidengnaak ak tlo khqoet hu kawm uh, tice sim hawh uhyuk ti. **2** Ningmih boeih ve ning bah uhy. U awm awi ak kqawn awh ama thawlh qoe mantaw, anih cetaw thlak soep na awm kaw, a pum boeih ak ukteem thai thlang na awm kaw. **3** Awi ang ngainaak aham meqang am khak khuiawh thi ve tehca nik chan peeknaak ai caming, meqang pum boeih ce ni hawi ni hel thai hy. **4** Ce am awhtaw lawng ak bau soeih ce nythahaak na haw na lah sih. Bau soeih nawh zilh ak tha ak awm soeih ing ni a khyn thai hy, cehlai lawng ak kaihunking a kaihnaak ve tehca ing ni a ngaihnaak amyihna a ceh sak thai hy. **5** Cemyih lawtna lai ve pum awh ve tehca ni a law hy, cehlai oek qu soeih hy. Mai kqawng ve tehca ing ni kqawngkhukhqi a uih pheng pheng hy tice poek lah uh. **6** Lai ve awm mai ni, pum ak khuiawh ak che ik-oehi pynoet na awm hy. Lai ing thlak che na thlang coeng sak hy, a hqjngnaak boeih ce mai awh phum sak nawh amah ce awm hell na tlak sak hy. (**Geenna g1067**) **7** Qamsa boeih boeih phakhqii, ak cawlh ak tat thai boeih ingkaw tui khuiawh kaw ak awm qamsakhqi awm thlang ing phep thai hy, **8** cehlai lai ve u ingawm am phep thai hy. Lai vetaw ik-oehi che amak dym qoe, thiinhaak ak chy ing ak be na awm hy. **9** Nimi lai ing ningnih a Bawipa ingkaw Pa ce nim kyihiun unawh, Khawsa myi ak lo na a sai thlang ce hah theet nawn bai hy. **10** Kha pynoet ak khuiawh kawng kyihcahnaak ingkaw tuui haw lawnaak ce thoeng law bawk hy. Koeinaakhqi, vemyihna a awm aham am hlai ni. **11** Tui a phytnaak pynoet awhkawng tui al ingkaw tuih tui ak cawn hah thai nu? **12** Koeinaakhqi, thai thing awh olive ak qah hly thai nu, am awhtaw misur awh thai ak qah hly thai nu? Ci a tui a phytnaak awhkawng ityk awh awm tuih tui am awm thai kaw. **13** Ningmih ak khuiawh u nu ak cyi nawh ak thoem? Cawhtaw a khawboe leeknaak ing dang sak seh, cyihnaak awhkawng ak law kawdungaak ing ik-oehi sai seh. **14** Cehlai thlang ytnaak ingkaw ak pyh ngaihnaak ce kawlung khuiawh nami be sak awhtaw, koeh oek qu nawh ak thym ce koeh oehl. **15** Cemyih cyihnaak ce khan benna kawng am law hy, khawmdmek benawh kawng ni a law hy, miyihla ben ik-oehi am nawh, amak leek ik-oehi ni. **16** Thlang ytnaak ingkaw ak pyh ngaihnaak a awmnaak hoei awh am quoep qunaak ingkaw ak che ik-oehi soepkep sainaak ce hu kawm uk ti. **17** Cehlai khan benna kawng ak law cyihnaak taw ciimcain hy; qoepnaak ak lungnaak, khaw ak poek thai, thlang ak kaina ak awm, qeenakaak ing ak be nawh ak thahleek ak qah, peknakaak amak ta ingkaw kawlung dyng ak ta na awm hy. **18** Roepnaak camci ak saw quoepnaak ak saikungkhqi taw dyngnaak ce aat kawm uh.

4 Nangmih ak khuiawh ikaw ing nu hqo ang hqitnaak a awm sak? Na mimah ak khuiawh ak tuk qu hy ngaihnaak awhkawng ni a law ka ti my? **2** Ik-oeh pynoet oet ngaih hlai uhyk ti am hu uhyk ti. Thlang him unawh thlang a ik-oeh nai hlai uhyk ti, nami ngaih ce am hu uhyk ti. Hqo qu unawh kqak qu uhyk ti. Khawsa venawh am nami thoeh a dawngawh, am hu uhyk ti. **3** Thoeh lawt hlai uhyk ti am hu uhyk ti, nami huh ce awmhlynaak aham nami ngaih a dawngawh thoehnaak kawpoek am thym hy. **4** Nangmih samphaihlkhqi, khawmdtek kawnggaih ik-oeh ing pyi na awmnaak ve Khawsa ing sawh qunaak na awm hy tice am nami sim nawh nu? U awm khawmdtek ing pyi na awm aham ak tyk thlang taw Khawsa a qaal na awm hawh hy. **5** Ningding ak khuiawh ak awm myiila ve anih ing thlang yt sak hy tinawh Cakciim ing ak kqawn ve a lawng a lam amak awm amyiinha namik poek nawh nu? **6** Cehlai anih inqtaw geennaak ni khawzah a ni

peak. Cedawngawh maw Cakciim ing: "Ak oek qu ce Khawsa ing oelh nawk dung voeng na ak awmkhqi venawh qeenaa pehy," ti hy. 7 Cedawngawh Khawsa venawh pe qu lah uh. Setan ce oelh lah uh, cawhtaw nangmih a venawh kawng cen bit kaw. 8 Khawsa venawh zoe lah, cawhtaw nangmih a venawh anih ce zoe lawt kaw. Nangmih thlak thawlkhkqi nami kut ce sil unawh, nangmih kawlung pakkhih na ak awmkhqi namik kawlungkhqi ce ciimcaih sak lah uh. 9 Ko lah uh, ngaih kyi u nawtawh kqang lah uh. Raihnaak ce ngaihkyinaak na thoeng sak unawh zeelnaak ce kawseetnaak na thoeng sak lah uh. 10 Bawipa a haiaawh dung voeng na awm lah uh, cawhtaw anih ing ni zoeksang khqi kaw. 11 Koeinaakhqi, pynoet ingkaw pynoet awihche ing koeh zyi qu uh. U awm a koeinaa ce awihche ing zyi nawk awi ak deng thlang taw anaa awi kah nawk awi ak dengkung na awm hy. Anaa awi ak dengkung na awm awh, anaa awi ak hquutkung na awm kaana, awidengnaak ak khanawh ak ngawi nani na awm hy. 12 Anaa awi ak pekung ingkaw awidengkung thleng pynoet doeng ni a awm, ce ak thlang taw ak hul thaikung ingkaw ak hqe thaikung na awm bawk hy. Cehlai nang – na imceng ak khanawh awi nak dengkung nang ce a u nu ce? 13 Tuhngawi awh am awhtaw khawngawi awh cawkaw khawk bau awh am awhtaw ak chang na cet u sih, cawh ce kum oet awm unawh, bibi u sih, tangka sui u sih," tinawh ak kqawnkhqi aw ngai lah uh. 14 Kharngawi awh ikaw ak law hly ti awm am nami sim awh ikaw hamma cemiyhna namik kqawn? Nangmih a hqingnaak ve ikaw nu? Nangmih ve myi kawlkhkah awh zam nawk ak qeng bang ing ni naming myih hy. 15 Ce anglakawhtaw, "Bawipa ak kawngaih awhtaw, ni hqing kawmsaw ce ni sai kaw, ce ni bi kaw," nami ti aham awm hy. 16 Cehlai, oek qu u tiksaw hoel qu uhyh ti. Cemiyhna oek qunaak ce am nep hy. 17 Cedawngawh, u ingawm ama sai awhtaw thawl na awm hy.

5 Nangmih boei thlangkhqi, ngai lah uh, nangmih ak khanawh ak law hly kawi kyinaak ce sim doena kqang u nawhtaw khy lah uh. **2** Nami khawththemkhqi ce plawci kang nawh, suibaikhqi awm laihqa ing ai boeh hawh hy. **3** Sui ingkaw ngunkhqi awm a eek ing ai kang hawh hy. Cawhkaw a eek ing a ainaak ce nangmih ama ngaihnaak ak dang sakkung na awm kawmsaw mai amyihna nami sakhqj ce ai law kaw. Khawnghi a dytnaak benawh kawn a them cun hawh uhky tive. **4** Toek lah uh! Na lo ak phlokhqi kutphu am na peek khqi a dawngawh nik khy sih hawh uhky ce. Cang ak aat lawkungkhqi ang kqangnaak awi ce Bawimang soeih Bawipa ang haa ce pha hawh hy. **5** Nangmih khawmdtek awh awmhly zeelhaak ing khaw sa unawh na mimah a ngaihnaak amyihna awm uhky ti. Qamsa himnaak khawnghi awh him aham na mimah ingkaw na mimah ak tha pyt pyt na cah qu hawh uhky ti. **6** Nangmih a ma nik oelkhkhqi, thawlhnak amak ta thlangkhqi ce palh sak unawh him uhky ti. **7** Cedawngawh koeinaakhqi, Bawipa a law hlan de yhnaak ing awm lah uh. Lo ak tenkung ing cang ak thaith huh aham angaih awh khawcui awrhkaw qawhtui ce ikawmyih tluk na ang lamtoen tice poek lah uh. **8** Nangmih awm, yhnaak ing ak cak na dih lah uh, kawtih Bawipa a lawnaak tym ce zoe ca hawh hy. **9** Koeinaakhqi, pynoet ingkaw pynoet ak khanawh koeh kawso uh, awidengnaak hu hau kawm uk ti. Awidengkung taw chawmkeng awh dyi hawh hy! **10** Koeinaakhqi, nami khuikha awh yh thainaak benawh nangmih ing nami dan aham, Bawipa ang ming ing awi ak phawng tawngkhakhy ce poek lah uh. **11** Nami sim myihna, kyinaak ak yh thlangkhqi ce zoseennaak ak hu thlangkhqi na nik poek uh. Joba ang yh thainaak ce za u tiksaw a hukhit na Bawipa ing ikaw a sai peek ti awm hu hawh uhky ti. Bawipa taw qeenkhaw ak ngai qeenennaak ing ak be na awm hy. **12** Vekkhqi boehi coengawh, ka koeinaakhqi, khan ingqawi am awhtaw khawmdtek ingqawi nu ikawmih ingqawi awm awi

koeh phoei law uh. "Oeih" nami ti awhtaw oeih ti mai u nawhtaw, "Amni" nami ti awhtaw amni ti paqap mai uh, cemih am awhtaw palhnaak hu hau kawm uh ti. **13** Nangmih ak khuiawh kyinaak ak hu thlang ak awm nu? Cykcah seh. Ak zeel thlang ak awm nu? Kyihcahnaak laa sa seh. **14** Nangmih ak khuiawh ak tlo ak naa thlang ak awm nu? Anih ak khan awh Bawipa ang ming ing situi hluk nawh cykcah peek aham thlangboel a hqamcakhqi ce khy seh. **15** Cangnaak ingkaw cykcahnaak ing tlak tlo ce qoei sak kaw; Bawipa ing anih ce thawh tlaih kaw. Thawlhmaak a sai hau awhtaw, a thawlhmaak khan awh queenkhaw ngai pe kaw. **16** Cedawngawh pynoet ingkaw pynoet ak khan awh dawk lo u nawhtaw nami qoeinaak aham pynoet ingkaw pynoet aham cykcah lah uh. Thlakdyng ak cykcahnaak taw ak tha awm nawh ik-oeih sai thai hy. **17** Elijah awm ningnih a myihna ak awm thlanghqing lawt ni. Khaw ama aanaak aham, khawteh na cykcah hy, cedawngawh kum thum coengawh ak kekvang khawmdek awh khaw am aa hy. **18** Cekcoengawh cykcah tlaih bai nawh, khan nakawng khaw a aa coengawh, khawmdek awh am ci ak uikhqi awm sak tlaih hy. **19** Ka koeinaakhqi, nangmih ak khuiawh kawng u awm awitak awhkawng ang pleng hau awhtaw naming hlat sak tlaih aham awm hy, **20** ve ve sim lah uh: u awm tlak thawlh ce a thawlhmaak lam awhkawng ak hlat sak tlaih ing anih ce thihsaak ak khui awhkawng hul kawmsaw thawlhmaak khawzah myk a dah pe kaw.

1 Piter

1 Jesu Khrish a ceityih na ak awm, Piter ing, Khawsa thlak tyk, khawmdek awh khin na ak awm, Ponta qam, Galatia qam, Kapadokia qam, Asia qam ingkaw Bithunia qam awh a thek a zak na ak awm, **2** Pa Khawsa ing sim oepchoeh nawh, Ciim Myihla ing a ciim saknaak ak coming, Jesu Khrish ak awi ngai nawh a thi ing syp aham ak tyh oepchoehkhqi venawh: Qeenaaak ingkaw ngaihdingnaak khowzah na awm seh. **3** Ningmih a Bawipa Jesu Khrish a Pa Khawsa venawh kyihcagnaak awm seh! Am qeenaaak aq bau soeih ak coming aq hqing ngaih-unaak awh thihnaak awhkawng Jesu Khrish a thawh tliahnak acoming ningnih ce ni thang sak khqi hawh hy, **4** amak qeeng thai, amak plawci thai ingkaw amak zai thai qo ce nangmih aham khawk khan awh ta law hawh hy, **5** cangnaak awh Khawsa ing khowngi a boet awh ak dang law hly kawi hulnaak a law hlan dy boemangnaak ing cekkhqi ce hlip ak chung khqi hawh hy. **6** Tuh kyinaak soepkep awh kawlkhalkh khuikhma mai u tik seiawm vawh nangmih zeel uhyl ti. **7** Vemyihkhqi taw sui anglakawh a phu ak tlo khqoet, sui taw mai ing a tui na ni hloei awh plawci thai hyn hy, nangmih ak cangnaak ak cak ce Jesu Khrish ang dang law awh zoeksangnaak ingkaw kqihchahnaak huhnaak aham ni a awm hy. **8** Amah ce am hu hlai uhyl ti, lungna uhyl ti; tuh am hu u tik seiawm, cangna u tiksaw kqawn thai noeng am zeelnaak ing be uhyl ti, **9** kawtih nangmih taw myihla hulnaak cangnaak lhahnaak ce hu kawm uk ti. **10** Vawhkaw hulnaak awh, nangmih a venawh ak law hly kawi qeenaaak akawng ak kqawn tawngkhqiqi ing ngahtaak doena ana sui uhy, **11** a mingmih ak khuiawh ak awm Khrish Myihla ing Khrish ing a khuikha coengawh ak law hly kawi boemangnaak akawng ak kqawn peek oepchoehnaak a tym ingkaw khowngi ce ana sui uhy. **12** A mingmih ing a mimah a bi am bi unawh nangmih a bi ami binaak ce cawh a nang dang pe hawh hy, khan benna kawng tyih na ak awm Ciim Myihla ak coming nangmih a venawh awithhang leek ak khypyikhiq iing nangmih a venawh a phawng lawnaak awi ce ni a mingmih ing ami nak kqawn hy. **13** Cedawngawh, bibi aham namik kawlungkhqi ce qoek abah lah uh; yhnaak ta law unawh taw; Jesu Khrish ang dang law awh nangmih a venawh peek na ak awm am qeenaaak awh ngaih-unaak ce ta lah uh. **14** Awi ak ngai cakhqi na nami awm dawngawh, ikaw awm am nami sim awh hy ngaihnaak amak leek awh nami awm amyihna koeh awm voel uh. **15** Nangmih anik khykhqikung taw a ciim amyihna, nangmih awm ik-oehil nami sainaak hoei awh ak ciim cana awm lah uh; **16** Kai ka ciim dawngawh, nangmih awm ciim lah uh, "tinawh qee na awm hy. **17** U a haai awm a toek kaana awi ak dengkung Pe ce nami taak dawngawh, kqihchahnaak ing khin amyihna khaw sa lah uh. **18** Nami pakdamkhqi ing nangmih a venawh a ceh law taak ce ak plawci thai sui ingkaw tangka ingkaw a hqawng a h qap hqing hulnaak amni tice sim uhyl ti, **19** cehlai nangmih taw coet amak kap tuuca, Khrish a thi a phu ak tlo ing ni hul na nami awm hy. **20** Anih cetaw khawmdek syn na a awm hlanawh ni tyk oepchoeh na a awm hawh hy, cehlai a tym a boet deng awh nangmih aham dang law hy. **21** Anih ak coming amah ce thihnaak awhkawng thawh nawh ak zoeksangkung Khawsa ce cangna uhyl ti, cedawngawh nangmih ak cangnaak ingkaw ngaih-unaak taw Khawsa awh awm hy. **22** Tuh taw awitak ngainaak acoming na mimah ingkaw na mimah ciim hawh u tiksaw koeinaa lungnaak ta hawh uhyl ti. Pynoet ingkaw pynoet kawlung khuiawh lungnaak ak dung soeih ta hawh uhyl ti. **23** Nangmih taw thang tliah hawh uhyl ti, ak plawci thai ak ui awhkawng am nawh amak plawci thai awhkawng ni, ak hqing ingkaw ak cak khawsak awi awhkawng ni nami thang tliah hawh hy. (aiōn g165) **24** Ikwatih,

Thlang boeih ve qam amyihna ni a awm, a boemangnaak awm qam a pai amyihna ni a awm hy; qam taw reu nawh a pai awm zai hy, **25** cehlai Bawipak awi taw a poepa na cak hy." Ve ak awi ni nangmih a venawh khypyi na a awm. (aiōn g165)

2 Cedawngawh, thlang sawhnaak ingkaw thainaak khqi, sa qunaak, thlang ytnaak, thlang theethaa soepqep ce suut lah uh. **2** Naaca ak awm thai amyihna, myihla ben suktui ce ngaih lah uh, cawh ni hulnaak benawh nami taa hly thai hy, **3** tuh Bawipa taw leek hy tice tan hawh uhyl ti. **4** Thlang ingtaw hoet hlai hy Khawsa ing tyk nawh a phu ak tlo soeih na a taak ak hqing lung amah a venawh nami law hawh dawngawh, **5** nangmih awm, ak hqing lungkhqi, myihla im saknaak awh ak ciim khawsoeih, Jesu Khrish ak coming Khawsa a do kawi myihla ben bulnaak nawn na awm uhyl ti. **6** Cabu Toek lah, Zion awh lung, a kil awh ak awm a phu ak tlo soeih ce hawih nyng, u awm cawhkaw lung ce ak cangnaak taw ityk awh awm am chak kaw," tinawh. **7** Tuh nangmih ak cangnaak thlangkhqi venawh vawhkaw lung ve a phu ak tlo soeih na awm hy. Cehlai amak cangnaak thlangkhqi ham taw, "im ak sakhqi ing ami qoeng lung ce a kil awhkaw lung ak khoeng soeih na awm hawh hy," **8** cekcoengawh, cetaw thlang ak bah sak lung ingkaw thlang ak tluk sak lung na awm hy," Awi a maming ngai dawngawh bah uh - a mingmih aham ce ce a taak peek khqi qoe na awm awm hy. **9** Cehlai nangmih taw thannaak khuiawh kawng amah ak kawpoek kyi vangnaak ak khuiawh amah kyihcah amah ak tyh thlang, boei khawsoeih, pilnam ak ciim Khawsa ak thlangkhqi na awm uhyl ti. **10** Maa na taw Khawsak thlangkhqi na am awm hlai uhyl ti, tuh taw awm hawh uhyl ti; am qeenaaak amak hu thlangkhqi na awm hlai uhyl ti, tuh taw am qeenaaak ce hu hawh uhyl ti. **11** Ka lungnaak ka pyikhqi, ve khawmdek awh thlang lang ingkaw khinkhqi na nami awm dawngawh, nangmih ang myihla a qaalkhqi na ak awm thawlh ngaihnaakkhqi ce nami re aham ni yn khqi nyng. **12** Lawki thlangkhqi venawh khawsakaanak ing khaw sa lah uh, nangmih ce ik-oeh amak thym ak sai thlangkhqi na nik poek khqi mai seiawm, nangmih a ik-oehi leek sai ce hu kawm usaw Khawsa ing ningnih anir hqip khqi nyn awh amah ce zoeksang kawm uh. **13** Bawipa awh thlang ukteem thainaak ak ta khqik kaiawh koep lah uh: saithainaak a boetaak ak ta sangpahrang, **14** qam ak ukkungkhqi, ik-oehi ak sai thawlkhqi toel ham ingkaw ik-oehi dyng ak saikhqi zoeksang aham cekkhqi ce anih ing tyi hy. **15** Ik-oehi leek sainaak acoming ikaw amak sim thlak qawkhqi, awi ce sit sak aham Khawsa ngaihnaak na awm hy. **16** Ngaihding na khaw sa lah, cehlai na ngaihdingnaak ce thawlh dahnak aham koeh hawh na; Khawsa a bi ak bikung amyihna khaw sa lah. **17** Thlang boeih ce kqihchah lah: ak cangnaak koeinaakhqi ce lungna lah, Khawsa kqih nawh, sangpahrang ce zoeksang lah. **18** Tamnaakhqi, nami boeikhqi ak kaiawh kqihchahnaak ing koep lah uh, thlak leek ingkaw khaw ak poek thai a ven doeng awh am nawh, ak kyikhiq ak kaiawh awm koep lah uh. **19** Thlang ing Khawsa a sim dawngawh amak tyng khuihnaak ce a huh awhtaw ce ak thlang ce kyih aham awm hy. **20** Ik-oehi nami sai thawlh dawngawh nganbawh nami zawk mantaw ikaw hawikhhangnaak a awm kaw? Cehlai ik-oehi leek nami sai dawngawh kyinaak nami huh awh taw yh mai uh, Khawsa huiawh ce ce kyih aham awm bet hy. **21** Vemyihna awm aham ni anik khy khqi hy, Khrish ing nangmih aham yh nawh nangmih ing a khawleh thuuh hly kawi ce ceh law taak hawh hy. **22** Thawlhnaak am sai nawh, a hui awh qaai awi ve tehca awm am dang hy." **23** Amak thym na ami zyih awh, anih ing am thung hy; a khuikhaw thlang am kqih am hqin hy. Ak thym na awi ak dengkung a venawh pe qu hy. **24** Thawlh benawh ni thi unawh dyngnaak benawh ni hqingnaak aham, amah qoe qoe ing a pum awh ningnih a

thawlhaak ce thing awh yh hy; a nganbawh ngawha ing nangmih taw qoei hawh uhyk ti. 25 Tuu amyihna lam pleng hawh hlai uhyk ti, tuh awhtaw nangmih ang myihla Tuukhaikung ingkaw ak khoemkung a venawh hlat tlaih hawh uhyk ti.

3 Cemyih lawt na, zukhqi, nami vaakhqi ak kaina koep lah uh, cawh ni nami vaakhqi ak khuiawh awi amak cangnaak a awm awhtaw, nangmih zukhqi a khawboe ak caming a mingmih ce awi kqawn kaana noeng na a awm hly. 2 nangmih a khawboe ak ciimcaih ingkaw kjihchah ak cu khawsaknaa ce hu kawmsaw na noeng hly thai hy. 3 Nangmih a thangleeknaak ce a ceng benna kaw thoieh ang camnaak na a awm aham am awm hy, Lusun petkhqi, sui ing thoieh ang cam qukhqi, suibai ak leek leekkhqi ing thoieh ang cam qukhqi na a awm ham am awm hy. 4 Ce anglakawhtaw, nak khuiawh ak awm ce ni a leek aham a awm, amak zai thai kawdungnaak ingkaw a cyp a myih na awmnaak, ce ni Khawsa huh awh a phuk tlo na a awm. 5 Cemyihna ni syn awhkaw nu thlakcimkhqi ing Khawsa awh ngaih-unaak ami taak nawa thlak leek na ami na awm hy. Ami vaakhqi ak kaiawh koep uhy, 6 Sarah amyihna, anih ing Abraham ak awi ce ngai nawa boeipa tinawh khy hy. Nangmih awm ik-oehi ak thym ce nami sai nawa kqihnaak am nami taak awhtaw anih a canu na awm uhyk ti. 7 Cemyih bai lawtna nangmih vaakhqi aw nami zukhqi ak khanawh khaw ak poek tha na awm lah uh, nami zukhqi ce qeenaka hqinqnaak kutdo ak pang hahih tha amak awm khqoet na ngai unawh kjihchah lah uh, cawh ni na cykcahnaak ak kangkung na ama awm hly. 8 A hukhit awh, nangmih boeih pynoet ingkaw pynoet qoep ang qui cana awm lah uh; qeenaka ta unawh, cingna tainamyihna lung qu na lah uh, qeen qu unawh taw namik kaw dung sak uh. 9 Amak leek ik-oehi ce amak leek ik-oehi lawt ing koeh thung unawh ziyihnaak ce ziyihnaak ing koeh thung uh, zoseennaak pe law mai uh, kawithi vemyihna awm aham ni anik khy khqi hy, cawh ni zoseennaak nami pang hly. 10 Ikawtih, U awm hqinqnaak ce ak lungnaak nawa khanwghi leek huk ah ngaih ingtaw ik-oehi amak leek awhkawng am lai ce khoem seitaw thainaak awhkawng am kha ce cyp seh. 11 Ik-oehi amak leek ce cehta seitaw ik-oehi leek ce sai seh; goepnaak ce sui seitaw hqut seh. 12 Ikawtih Bawipa amik taw thlak dyng ak khanawh awm nawa ang haa ing cekkhqi ak cykcahnaak awi ce ngai pehy, cehlai ik-oehi amak leek ak saikhqi ce Bawipa ing hawi taak khqi hy,” tihy. 13 Ik-oehi leek sai aham nami ngaih awhtaw u ing nangmih ce nganbawh ani zawk sak hly khqi? 14 Ik-oehi thym nami sai dawngawh khuihka qoe bai u tik seiawm, ce ce nangmih aham zoseennaak ni. “A mingmih ing amik kjih ce koeh kjih uh; koeh ly uh. 15 Cehlai namik kawlung khuihwa Khrirh ke Bawipa na ta uh. Nangmih ing nami taak ngaih-unaak akawng ce thlang ing ani doet khqi awh namik kqawn peek thainaak ham a oepchoeh na awm uh. Cehlai kawdungnaak kjihchahnaak ing kqawn law pe uh, 16 kawpoek ak caih na ta uh, cawh ni Khrirh awh nangmih a khawboe leeknaak che na amik kqawnkhqi ce amik chah hly. 17 Khawsa ak kawngaih awhtaw, ik-oehi amak leek sai anglakawh ik-oehi ak leek sai ce nep bet hy. 18 Ikawtih nangmih ce Khawsa venna ceh pyi ham, thlak dyng am aham thlak dyng, Khrirh ing thlang boeih aham hypoet thi hawh hy. Anih ing a pum awh thihiak ce hu hy, cehlai Myihla ing hqinq sai tlaih hy, 19 anih ak caming thawngim ak ta myihlakhqi venawh cet nawh awi kqawn hy. 20 Cekkhqi taw syn awh Nova ing lawng a sak awh awi amak ngai Khawsa ing kawsonaak ing a qeh thlangkhqi ni. Cawh thlang a khoechaa, a cuna kqeet, doeng ni tui awhkawng hul na a awm. 21 Cawhkaw tui cetaw tuh nangmih awm hulnaak na ak awm baptisma huh saknaak na awm hy – pum awhkaw khen a ciimnaak am nawa Khawsa benawh kawpoek caihnaak ingkaw awikamnaak ni. Ce ing

Jesu Khrirh thawh tlaihnaak ak caming nangmih ce ni hul khqi hy, 22 anih cetaw khan na cet nawa hhan ceityihkhqi, sai thainaakkhqi ingkaw boeimangaakkhqi ing khawsak tang benawh awm hawh hy.

4 Khrirh ing a pum awh a khuikha hawh dawngawh, cemyih kawlung ing nangmih thoeih ang cam qu lah uh, u awm a pum awh ak khuikha thlangkhqi taw thawlhaak dawngawh ni. 2 Khawmdek awh thlanghqing ak kawngaih amak leek sai aham am hqinq nawa Khawsak kawngaih sai aham ni a hqinq hy. 3 Nangmih taw ak kqym awh lukih thlangkhqi ing tyk unawh ami sai ik-oehi sainaak aham a tym haw na hawh uhyk ti – khawboe seeetnaa, hy ngaihnaak, zuu quinaak, so a teenaak, zuukqui na awmnaak ingkaw tyih am leh ak cu myiqawl bawknakkhqi ce sai uhyk ti. 4 Cemyih ik-oehi awh nangmih am namik cawn dawngawh amik kawpoek na kyi nawa nangmih ce amak tyng nani sai khqi hy. 5 Cehlai thlakthi ingkaw thlanghqing awi ak dengkung a venawh a ik-oehi saikhqi boeih ce phawng kawm uh. 6 Ve a dawngawh maw awithang leek ve thlakthikhqi venawh awm khypyi na a awm mah, cekkhqi awn thlangkhqi amyihna pumsa benawh awideng na a awm thainaak aham, cehlai Khawsa benawh taw myihla awi deng na awm kaw. 7 Ik-oehi boeih a dytnaak a tym zoe hawh hy. Cedawngawh namik cykcah thainaak aham kawlung ak caih na ta unawh yhnaak ing awm lah uh. 8 Cekoengawh, pynoet ingkaw pynoet ak dung soeih na lung qu na lah uh, kawtih lungnaak ing thawlhaak khawzah ce sing hy. 9 Kawsonaak a taak kaana pynoet ingkaw pynoet do a dan qu lah uh. 10 Thlang boeih ing kutdo a huunaka amyihna thlak chang aham bibi qip aham awm hy, Khawsa qeenaka bi soekpep ce ypawm cana bi aham awm hy. 11 U ingawm Khawsak awi ak kqawn awhtaw, Khawsak awi ak kqawnnaak amyihna a sai aham awm hy. U ingawm bi a bi awhtaw, Khawsa ing a peek thaawmnaak ing a bi aham awm hy, cawh ni ik-oehi soekpep awh Jesu Khrirh ak caming Khawsa ce zoeksang na a awm hly. Anih a venawh boeimang thainaaka kumqui dy awm seh. Amen. (aiōn g165) 12 Ka lungnaak ka pyikhqi, khuikha huunaka ak tlo soeih a pha law awh, ik-oehi amak awm khawi nangmih a venawh pha law mai seiawm naming ngaih koeh kyi sak uh. 13 Cehlai Khrirh ak khuikhanaak ak bawnkung na nami awm dawngawh zeel lah uh, cawh ni amah a boeimangaak ang dang law awh zeelhaak ing nami be hly hlai hy. 14 Khrirh ang ming awh thlang ing nangmih ce ani ziyh khqi awhtaw, nami zoseen hy, boeimangaak ingkaw Khawsa ang Myihla ce nangmih ak khanawh awm hy. 15 Nami khuikha awhtaw, cawhkaw nami khuikhanaak ce thlang himnaak awh, quiknaak awh, khawboe seet ik-oehi pynoet oet sainaak awh, am awhtaw nimah thlang ik-oehi awh ang qawlh quinaak awh na koeh awm seh. 16 Cehlai, Khrirh thlang na na awm dawngawh na khuikha awhtaw, koeh chak, ce ang ming na khuikha dawngawh Khawsa ce kyihcah lah. 17 Ikawtih Khawsa ipkhui kaw awhkawng awideng naak kqannaak tym na awm hawh hy; awidengaak ce ningnih a ven awhkawng kqawn na a awm awhtaw, Khawsa awithang leek amak cangnaak thlangkhqi ak khqoet aham ikawmyihna a awmnaak kaw ce? 18 Cawh, Thlak dyng aham zani hulnaak ce a kyi awhtaw, Khawsa amak simkhqi ingkaw thlakthawlhkhqi ak khqoet aham ikawmyihna na a awm naak hly hy? 19 Cedawngawh, Khawsa ngaihnaak amyihna ak khuikhkhqi ing Saikhang ypaawm a venawh a mimah ce nawn qu u seitaw ik-oehi leek ce sai poe u seh.

5 Nangmih ak khui awhkaw a hqamcakhqi venawh, a hqamca pynoet na ak awm lawt nawa hhan Khrirh a khuikhanaak ak sim pyikung ingkaw ak hu hly kawi boeimangaak ak pang hly kawi na ak awm kai ing qeenaka thoeh law nyng. 2 Nangmih a khoemnaak ak kaiawh ak awm Khawsa a tuu ak khaikungkhqi, ak

khoemkungkhqi na awm lah uh – na sai qoe qoe aham awm hy ti kaana, sai ngaihnaak kawlung ing Khawsa ing sai sak ham ani ngaihnaak amyihna sai law lah uh; tangka ak ngaih soeih na koeh awm law uh, cehlai bibi awh cak lah uh; 3 nangmih a venawh khoem sak na ak awmkhqi ak khanawh boei na koeh awm law uh, cehlai tuu a dan kawi na awm law lah uh. 4 Tuu ak khaikung Boei ce ang dang law awh, amak zai thai boeimangnaak lumyek ce hu bit kawm uk ti. 5 Cadawngkhqi, cemyih lawtna pacawngkhqi ak kaina koep lah uh. Nangmih boeih pynoet ingkaw pynoet a venawh kawdungnaak ing theoihcam qu lah uh, Ikawtih, Ak oek qu ce Khawsa ing oell nawh kaw ak dung thlangkhqi ce qeennaak pehy.

6 Cedawngawh, a tym a khoek awh nangmih ce ani zoeksang thainaak ham, Khawsa kut thaawmnaak ak kaiawh kawdungnaak ing awm lah uh. 7 Na mawnnaakkhqi boeih ce ak khanawh hal lah, kawtih anih ing nang ce ni khut ni hlep hy. 8 yhnaak ing ngaihtaak doena awm lah uh. Nangmih a qaal setan taw samthyn amyihna kawk nawh thlang dahi aham qym poepa hy. 9 Cangnaak awh ak cak na dyi unawh taw, tuk lah uh, kawtih khawmdek pum awh ak awm nangmih a koeinaakhqi awm nangmih amyihna khuikha lawt uhy tice sim uhyk ti. 10 Qeennaak boeih a Khawsa, Khrith awh amah a kumqui boeimangnaak awh ak khykung ing, kawlhkalh nami khuikha coengawh, ni cun nik boem khqi tlaih kawmsaw, ak cak ingkaw ak khoeng na tha ni awm sak khqi bit kaw. (**aiōnios g166**) 11 Amah a venawh thaawmnaak kumqui dy awm seh. Amen (**aiōn g165**) 12 ypawm na ka taak ka naa Sila, ing nik bawng nawh ca a kheoh ca ni qee law pek khqi hawh nyng, nangmih tha ni pek khqi nyng saw vetaw Khawsam qeennaak cang cang ni tice nik kqawn law pek khqi nyng. Ce a ik-oeh awh ak cak na dyi lah uh. 13 Babylon awh ak awm nu, nangmih mi tyk haih na ak awm ing nangmih kut ni tlaih khqi hy, ka naa Marka ingawm kut ni tlaih khqi hy. 14 Lungnaak mawagnaak ing nangmih pynoet ingkaw pynoet kut tlaih qu lah uh. Khrith awh ak awm ngaihdingnaak nangmih boeih a venawh awm seh.

2 Piter

1 Jesu Khril a tyihzawih ingkaw ceityih pynoet na ak awm, Simon Piter ing, Ningmih a Khawsa Hulkung Jesu Khril a dyngnaak ak caming kaimih amyihna a phu ak tlo cangnaak ak hukhqi venawh: **2** Khawsa ingkaw ningnih a Bawipa Jesu a cyihnaak ak caming qeenakaq ingkaw ngaihdinggaak nangmih a venawh khawzah awm seh. **3** Amah Khawsa saithainaak ing amah a boeimangnaak leeknaak ing ningnih anik khykung ni simnaak cyihnaak ak caming ik-oeih ni ngoe soepkep ce ni pek khqi hawh hy. **4** Vawhkaw ik-oeikhqi ak caming ak bau soeih ingkaw a phu ak tlo awikamnaakkhi ce nangmih a venawh ni pek khqi hawh hy, cawhtaw cekkhqi ak caming Khawsa ik-oeih ngaihnaak ing ang coeng sak ve khawmdek ik-oeih amak leek awhkawng loet thai hawh kawm uk ti. **5** Vawh, cangnaak leek nami tawm thainaak aham namik tha lo law lah uh; ik-oeih leeknaak aham, cyihnaak; **6** cyihnaak ham, noeng qu thainaak; noeng qu thainaak aham, yh ngah ngahnaak; yh ngah ngah thainaak aham, Khawsa ngaih na awmnaak; **7** khawsa ngaih na awm thainaak aham, lungnaak ce ta lah uh. **8** Ve sai thainaakkhi ve nami taak khqoet khqoet awhtaw, a hawihkhang kaana ningnih a Bawipa Jesu Khril simnaak benawh kawna ang coeng kaana am awm kawm uk ti. **9** Cehlai u ingawm ce mikhkqi ce ama taak awhtaw, anih taw a huhsnaak tawi nawh mik ak hyp thlang na awm hy, ak kqym awhkaw a thawlhnakkhi silh ppeekna ak awm ce ak hilh ak thlang na awm hy. **10** Cedawngawh, koeinaakkhi, nangmih khy na nami awmnaak ingkaw tyk na nami awmnaak ce caih sak khqoet boeih lah uh. Ikawtih vemyihkhiq ve nami sai awhtaw, am tlu qoe qoe kawm uk ti, **11** ningnih a Bawipa ingkaw Hulkung Jesu Khril a kumqui qam khuina nangmih ce ni do khqi kaw. (aiōnios g166) **12** Cedawngawh ve a ik-oeikhqi ve sin unawh, tulh nami taak awitak awh ak cak na dyi hawh u tik seaiwm kqawn law loet hyn kawng nyng. **13** Ve ka pum qeh im awh ka awm khui awhtaw nangmih ni caih sak khqi tlaih tlaih ve them hy tinawh poek nyng. **14** Ningmih a Bawipa Jesu Khril ing ak caih na ka venawh ak kqawn law hawh amyihna, ve im ve ta hyt hawh kawng nyng tice sim nyng. **15** Kai ka ceh coengawh vawhkaw ik-oeikhqi ve namik poeknaak loet aham kak tha lo poepa kawng nyng. **16** Ningmih a Bawipa Jesu Khril a law tlaihnaak ingkaw ak thaawmnaak akawng nangmih a venawh kak kqawn law awh syn awi ami phawh mailai ce am hqut unyng, mik qoe qoe ing amah a boeimangnaak ak hukung simpilyikung na ni kami awm hy. **17** Ikawtih Boemang Thang leeknaak awi, "Vetaw ka lungnaak, ka Capa ni; ak khanawh zeel soeih soeih nyng," tinaak awi boemang zoeksangnaak ce Pa Khawsa ven awhkawng hy. **18** Kaimih ingawm khan benna kawng ak law ce ak awi ce amah inggawi tleng ciim awh kami awm awh za lawt unyng. **19** Ce ak awi ak caih sak khqoet tawngkhakhiq ak awi awm ni ta bai hy, ce ak awi ce nangmih ing ak leek na naming ngai aham awm hy, thannaak ak khuiawh maihwang amyihna, khaw dai nawh namik kawlung khuiawh aihchi a thoeng hlan dy ce ak awi ce ngai lah uh. **20** Cekkhqi boeih coengawh, Cakciim awhkaw kqawn oepchoeh na ak awmkhqi ve tawngha ak poeknaak mailai awhkawng am law hy tice nami sim aham awm hy. **21** Kqawn oepchoeh awikhqi ve thlanghqing ak kawngaih awhkawng ap kqawn qu nawh, Ciim Myihla a sawinaak amyihna ni thlang ing Khawsa venawh kaw ami ce kqawn hy.

2 Cehlai nangmih ak khuiawh cawngpyikung a qawlkhqi a awm lawt amyihna, thlangkhqi ak khuiawh awm tawngha qawlkhqi ve awm hy. Cekkhqi ing ang hyp na seetnaak hly kawi cawngpyinaak amak thym ce cawngpyi uhy, a mimah ak thlaikung boemang

Bawipa zani oehl unawh a mimah ak khanawh seetnaak ce pha sak uhy. **2** Chahnaak ham ak awm a mingmih a lam ce thlang khawzah ing hqut kawm usaw awitak lam sim ce seet sak kawm uh. **3** Ak law ngaihnaak awh cawhkaw cawngpyikungkhqi ing a mimah a phawh mailai syn awi ing nangmih ce amak thym na ni haw nak khqi kaw. Dawknaak ce cekkhqi ak khanawh bang qu hyt nawh a mingmih a seetnaak ce a ih kaana a hyrpy na hqak poepa hy. **4** Thawlhnaak ak sai khan ceityihkhiq ce Khawsa ing am hlyn nawh, hell na tyi hy, ak hyp dek khuina awideng aham thawng thla hy; (Tartaroō g5020) **5** Khawsa kawna amak ngai thlangkhqi ak khanawh tuiliu law sak nawh, dyngnaak awi ak kqawnkung Nova ingkaw ak chang khqih toek doeng ak hilpichungkung ing syn awhkaw khawmdek awm am hlyn hy; **6** Khawsa kawna amak ngai thlangkhqi ak khanawh kamyihna ik-oeih a pha kaw tice huh saknaak aham Sodom ingkaw Gomorah khawk bau ce mai ing dawi nawh vyt na ngawih sak hy; **7** khawboe ak se thlangkhqi tyih ak cu a khawsaknaak awh ak kaw ak se, thlak dyng Lot ce hul hy. **8** (Cawhkaw thlak dyng cetaw, khawwny hypoet awh hypoet ce ak thlangkhqi venawh awm hy, cekkhqi a khawboe seet ik-oeih saikhqi ce hu nawh ang zaak awh a hqjinggaak ak dyng ing khuihka hy). **9** Vemyihna a awm awhtaw, syk a zoek ing khypyinaak ak hu Khawsa ngaih ak sai thlangkhqi ikawmyihna ka hulnaak nawh thlakthawlkhqi a boet kaana toelnaak ami huh awh ikawmyihna awi ka dengaako hly, tice Bawipa ing sim hy. **10** Ve a ik-oeih ve amak thym thawlh kawngaih sainaak ak hqut thlangkhqi ingkaw ukkung ak hep thlangkhqi aham awm khqoet kaw. Am thin ak sah ingkaw ak oek qu thlangkhqi ingtaw, khan ben ik-oeih ak che na kqawn ham ap kqih uhy; **11** khan ceityih ak tha awm nawh ik-oeih ak sai thai khqoetkhqi ing zani, Bawipa a haiawh cemiyh ik-oeikhqi ce ak che na ap kqawn uhy. **12** Cehlai ve ak thlangkhqi ing a mami sim ik-oeih ak khanawh thekhanaak awi ce kqawn uhy. A mingmih taw qamsak tlung amyihna, ami simnaak taw awm lawt hlai hy, tu nawh hqe hly kawi nani ami thang hy, qamsamylhna a mingmih awm qeeng kawm uh. **13** Thlang ak khanawh tlawhnaak ami sai dawngawh a mingmih awm tlawhnaak ing kut thung na awm lawt kaw. A mingmih a zuuqui awmhly poeknaak ce awm a dainaak awh thang kawngkhak hawh hy. Coet ak kap thlangkhqi, nangmih mi buhveelaakkung awh ak zeel thlangkhqi na awm uhy. **14** Samphaihnaak mik ing awm unawh, thawlhnak ce am qoeng thai uhy; kawpoek amak cakkhqi ce zoek uhy; ak pyh ngaihnaak benawh thoem uhy – tuui khyn ak zawk cakkhqi na awm uhy. **15** Lam ak dyng ce cehta unawh ik-oeih che sainaak a phu ak lungnaak Beor a capa Balam a hu awh bat aham ak thoek khqi na awm uhy. **16** Cehlai anih taw a ik-oeih sai thawlhnak awh – ami amak kqawn khawi qamsa – meqang ing zyi hy, cawhkaw meqang ing thlanghqing ak awi na pau nawh tawngha a qawnak ce kham pehy. **17** Vemih ak thlangkhqi taw tui amak awm lawngca, myi zilh ing a zawn ak thlangkhqi ni. Ak hyp soeih thannaak ce a mingmih aham hoep peek na awm hawh hy. (questioned) **18** Amim khakhqi a auhltahuu na ta unawh, oeknaak awi ing khawmdek thawlhy ngaihnaak ce sui uhy, amak thym khawsaknaak awhkawng amik loet plek thlangkhqi ce syk a zoek uhy. **19** A mimah awm seetnaak a tamnaa na ami awm huili awh thlak chang ce loet sak aham awih kqawn pe uhy, kawtih a u awm amah ak noengkung a tamnaa na awm hy. **20** Ningmih a Bawipa Hulkung Jesu Khril simnaak ak caming khawmdek seetnaak awhkawng ami loet hawh awh ce a ik-oeih awh awk tlaih unawh ce a ik-oeih ing a noeng khqi bai awhtaw, ak cyk awhkawng lak awh a hukhit benna nauh khqoet kawm uh. **21** Dyngnaak lam ce ami sim awh a mingmih a venawh peek na ak awm ak ciim awipeek ce ami hqut anglakawhtaw a mami sim ngala mantaw a mingmih aham nep khqoet hlai hy. **22** A mingmih awh ce vawhkaw

awicyih ve thym hy: "Ui ing am lawh ai tlaih hy", cawh "Vawknu ing tui ang hluk hqeeet coengawh nawng awh cawn tlaih hy," tive.

3 Ka lungnaak ka pyikhqi, ve ak ca ve nangmih a venawh hih voei ka pat lawnaak hawh ni. Ik-oeh boeih ak leek na namik poek thainaak aham ka pat law na awm hy. **2** Ak kqym awh tawngħaq ciimkhqi ing ami nak kqawn awi ingkaw ceityihkhqi hawaak ing ningnih a Bawipa ingkaw Hulkung ing anik kqawn law peek khqi awi ce nami sim tlaih aham ngaih nyng. **3** Lamma cyk awh, kawngħi a dytnaak ber awhtaw thlang ak kqawnseetkhqi law kawm usaw thlang kqawn seet kawm uh, a mimah ak che ngaiħnaak doeng ce hqut kawm uh, tice nami sim aham awm hy. **4** Cekkhqi ing, Anih ing awi tahi, tice hana kawng a law? Ni pakħqi ami thih coeng awhkawng ik-oeihkhqi ve khawmdek a syn cyk awhkawng amah toeng nani a awm boeih hy," ti kawm uh. **5** Cehlai syn awħ Khawsak awi ing khawk khan awm nawh tui awhkawng tui ingkaw khawmdek ve sai na awm hy tice hilh uhy. **6** Vawhkaw tui ing cawkaw khawmdek ce liu nawh hqe bai hy. **7** Cawkaw awi ing tuh kaw khawmdek ingkaw khawk khan ve mai ing dawi aham ta nawh, awidengaakkħqi hqenaak kawngħi awm hoep pe bai hy. **8** Cehlai, ka lungnaak ka pyikhqi, ve a ik-oehi pynoet ve koeh hilh uh: Bawipa ham taw kawngħi hypoet ve kum thong khat amyihna awm nawh, kum thong khat awm kawngħi hypoet amyihna awm hy. **9** Thlang pynoet ing ami sim amyihna, awi a taaknaak awħ Bawipa taw ang tah am heng hy. Nangmih ak khanawh anih ce ak kaw dung hy, u awm plawci aham am ngaih nawh thlang boeih aming zut ceni a ngaih hy. **10** Cehlai Bawipa a kawngħi taw quk-ai amyihna law kaw. Khawk khan taw hum kawmsaw qeeng kaw, ik-oeihkhqi ce mai awh ui kaw, cawh khawmdek ingkaw ak khuiawh ak awm ik-oeihkhqi boeih ce hlam qu pheng kaw. **11** Vemyihna ik-oeihkhqi boeih hqe aham a awm dawngawh, nangmih taw ikawmyih ak thlangħqi na nami awm aham a awm ce? Ak ciim ingkaw Khawsak kawngħaj khawsaknaak ing khaw nami sak aham awm hy. **12** Khawsa kawngħi ingkaw a lawnaak ceni naming lamtoen hy. Ce a kawngħi ing mai ing khawk khan hqenaak ce haw law kaw, cawh ak khuiawh ak awm ik-oeihkhqi ce a hlawk aih awħ a tui na tle kaw. **13** Cehlai amah ak awi taak ce khoem doena thlakciimkhqi awmnaak im khawk khan thai ingkaw khawmdek thai ce ningnih ing ning lamtoen uhy. **14** Cawhtaw, ka lungnaak ka pyikhqi, ce a ik-oehi ce naming lamtoen a dawngawh, coet a kap kaana awm unawh amah ing qoep ang qui na nami awmnaak thai aham namik tha lo law lah uh. **15** Ningmih a naa Paul ingawm Khawsa ing a peek ciyħnaak ing nangmih a venawh ca ami qee law hawh amyihna, ningnih a Bawipa ak kawdungnaak taw hulnaak ni, tice namik kawk khuiawh ta law uh. **16** Anih a capatkhqi boeih awħ ak myih qu na ve akawng ve kqawni hy. A capat awħ awi pynoet zaksim ak kyikhqi awm awm hy, kawna awm amak ngaiħkhqi ingkaw kawlung amak cak thlangħqi ing Cakciim ak chang ikaw awi ami melħ amyihna, a mimah a seetnaak aham, ce ak awi ce ak kawi na melħ uhy. **17** Cedawngawh, ka lungnaak ka pyikhqi, ve a ik-oehi ve nami sim hawh dawngawh, a lawng a lam kaana khaw ak sakħqi a thawħħnaak aħħam paa unawh ak cak dijh hun awhkawng am naming tluuknaak aham ngaiħta lah uh. **18** Ningmih a Bawipa ingkaw Hulkung Jesu Kħrieh am geennaak ingkaw ciyħnaak awħ ce hang taai hquj lah uh. Amah a venawh thangleeknaak tuh awhkawng kumquj dy awm seh! Amen (aiōn g165)

1 Johan

1 Ak cykca awhkawng ak awm, ningnih ingawm ning zaak uh, mik ing ni toek unawh ni hu uhy, kut ing ni bi uhy - Vawhkaw hqingnaak Awi veni ningnih ing nik kqawn uh. **2** Hqingnaak ce dang hy; ningnih ing ni hu unawh ning diyh pyi uhy, nangmih a venawh kumqui hqingnaak awi ce kqawn law u nyng, cawhkaw awi cetaw Pa ing anik awm hahih ce ningnih a venawh dang hawh hy. (*aiōnios g166*) **3** Kaimih ing ka mi huh ingkaw ka ming zaak ce nangmih ing kaimih ing pawlhengnaak nami taak naak thai aham nangmih a venawh kqawn law patoe nyng. Kaimih a pawlhengnaak taw Khawsa ingkaw a capa Jesu Khrish awh ni. **4** Kaimih a zeelaak a soepnaak thai aham ve ak ca ve qee law nyng. **5** Kaimih ing za unyng nangmih a venawh ka mik kqawn awi taw veni: Khawsa taw vangnaak na awm nawh; amah awh thannaak tehca awm am awm hy. **6** Amah ing pawlhengnaak ta hawh nyng ni ti hlai hy, than ak khuiawh ni ceh khing awhtaw, qawai ak kqawn na ni awm unawh awitak ing am ni hqing uhy. **7** Cehlai vangnaak ak khuiawh ni ceh uh awhtaw, amah taw vangnaak na a awm a dawngawh, ningnih taw pynoet ingkaw pynoet pawlheng naak ak ta thlang na ni awm uhy, amah Capa, Jesu thi ing thawlhnaka boeih khui awhkawng ningnih ce ni sil khqi hawh hy. **8** Am thawlhnaka ce ni sil khqi hawh hy. **9** Am thawlhnaka ce ni sil khqi hawh hy. **10** Am thawlhnaka ce ni sil khqi hawh hy. **11** Am thawlhnaka ce ni sil khqi hawh hy. **12** Am thawlhnaka ce ni sil khqi hawh hy. **13** Am thawlhnaka ce ni sil khqi hawh hy. **14** Am thawlhnaka ce ni sil khqi hawh hy.

2 Ka lungnaak ka cakhqi, am nami thawlhnaka aham ve ak ca ve qee law nyng. Cehlai u ingawm thawlhnaka ce a sai palh awhtaw, ningnih ang zyng na ningnih aham Pa a venawh awi ak kqawnkung ce ni ta uhy - anih cetaw Jesu Khrish, Thlak dyng ceni. **2** Anih cetaw ningnih a thawlhnaka ahl tlang na lucik na pe qu hy, ningnih aham doeng am nawh khawmdek pum awhkaw thawlhnaka ahl na awm awm hy. **3** Ak awipeek ce ning ngai uh awhtaw amah ce ni sim hawh uhy tice ni sim uhy. **4** Anih ce sim nyng, thlang ing ti hlai hy, ak awipeek ce amak sii taw qawai ak kqawn thlang ni, anih awh awitak am awm hy. **5** Cehlai u ingawm ak awi ce nang ngai awhtaw, Khawsa lungnaak ce anih awh ak soep na awm kaw. Amah awh ni awm uhy ti simnaak taw veni. **6** U awm anih awh hqing nyng ak ti ingtaw Jesu amyihna a ceh aham awm hy. **7** Ka lungnaak pyikhqi, awipeek ak thai am qee law nyng, ak cykca awhkaw nami taak ak kqym ceni ka qee law. Cawhkaw awipeek cetaw nangmih ing naming zaak ce ni. **8** Cehlai kai ing awipeek thai qee law nyng; cawhkaw awitak ce anih ingkaw nangmih awh ni hu hy, than khaw ce khum nawh dainaak tang tang ce vang hawh hy. **9** U awm vangnaak ak khuiawh awm hawh nyng ti hlai hy a koeinaa ce a sawhnaak awhtaw anih ce thannaak khuiawh ni a awm hyn. **10** U awm a koeinaa ak lungnaak thlang taw vangnaak khui awhkaw thlang na awm hy, cedawngawh anih ce ikaw ingawm am tluk sak thai hy. **11** Cehlai u awm a koeinaa ak sawhnaak ak thlang taw than khuiawh ak van thlang na awm hy; hanaa ka ceh ti awm amak sim ak thlang ni, thannaak ing a mik ce hyp sak hawh hy. **12** Ka lungnaak ka cakhqi, ang ming ak caming nangmih a thawlhnaka ak khanawh queenkaw ngai na a awm hawh dawngawh, ca qee law nyng. **13** Pakhqi, ak cyk ca awhkawng ak awm anih ce nami sim hawh a dawngawh ca qee law nyng. Cadawngkhqi, thlak che ce noeng hawh u tiksaw ca qee law nyng. Naasenkhqi, Pa ce nami sim hawh a dawngawh, ca qee law nyng. **14** Pakhqi, ak cyk ca awhkawng ak awm anih ce nami sim hawh a dawngawh ca qee law nyng. Cadawngkhqi, nangmih

taw na mik tha awm nawh, nangmih ak khuiawh Khawsak awi a awm a dawngawh, thlak che ce noeng uhy ti, cedawngawh nangmih aham ca qee law nyng. **15** Khawmdek ingkaw ak khuiawh ak awm ik-oeikhqji ve koeh lung na. U ingawm khawmdek ve a lungnaak awhtaw Pa a lungnaak ce anih ak khuiawh am awm hy. **16** Ikwatih, khawmdek awh ak awm them boeih - thlak thawlhn a nainaak, a mik ing hy ngaihnaak, a taak them ingkaw sainaak awh oek qunaak khqi - vemyih ik-oeikhqji ve Pa a ven nakawng ak law amni, khawmdek awhkawng ni a law. **17** Khawmdek ingkaw khawmdek a ngaihnaakkhqi boeih taw khum seiawm, Khawsa kawngaih ak sai al thlang taw kumqui dy hqing kaw. (*aiōnios g165*) **18** Ka lungnaak naasenkhqi, a tym a dytraak ben hawh ni, Khrish a qaalhqi law kawm uh tice naming zaak hawh amyihna, tuh zani Khrish a qaalhqi ce law hawh uhy. Ce a dawngawh tuh ve a tym a dyt naak ben hawh ni ti sim uhy ti. **19** Ningmih a ven awhkawng cawn uhy, cehlai ningnih ak thlang na am awm qee uhy. Ningmih ak thlang na ami awm mantaw, ningnih a venawh awm poe kawm uh, cehlai aming cawn a dawngawh pynoet awm ningnih ak thlang am ni tice dang hawh hy. **20** Cehlai nangmih taw thlakciim a ven nakaw situi hluk nani nami awm, cedawngawh nangmih boeih ing awitak ce sim uhy ti. **21** Awitak am nami sim a dawngawh ve ak ca am qee law nyng, cehlai awitak ce nami sim a dawngawh qawai pynoet awm awitak awhkawng am law hy. **22** U nu qawai ak kqawn? Jesu ve Khrish amni tinawh ak oelh ak thlang ce ni. Cemyih ak thlang ce Khrish a qaal na awm hy - anih ing Pa ingkaw Capa ce oelh qawi bawk hy. **23** U awm Capa ak oelh taw Pa ce am ta hy; cakpa ce ak do taw Pa awm ak do ak thlang na awm hy. **24** Ak cyk ca awh naming zaak ce nami taaknaak poe aham ngaihata lauh. Nami taak poe awhtaw Cakpa ingkaw Pa awh nangmih ce awm poe kawm uk ti. **25** Ningmih a venawh a taak law awi taw veni - kumqui hqingnaak ve. (*aiōnios g166*) **26** Nangmih lam palh sak aham tha amik lokhqi akawng ce tuh qee law nyng. **27** Nangmih taw a venawh kawng nami huh situi hluknaak ce a awm phat a dawngawh, thlang a cawngpyinaak ce am ngoe voel uhy ti. Cehlai amah a situi hluknaak ing ik-oeih akawng boeih ce a ni cawngpyi khqi amyihna, amah awh awm poe lauh. **28** Tuh ka lungnaak naasenkhqi, amah awh awm poe lauh uh, cawh ni amah ang dang law awh ning ngai qep kawmsaw alaw law awh am nik chah hly. **29** Anih ce thlak dyng ni tice nami sim awhtaw u awm ik-oeih ak dyng ak saikhqi boeih taw anih a cahlah ni tice sim uhy ti.

3 Khawsa cakhqi ni simnaak aham Khawsa ing ningnih ani lungnaak khqi ve ikaw mih aih na a bau naak! Cemyih na ce ningnih ni awm uhy! Khawmdek ing ningnih a mami sim thainaak khqi vetaw amah ce ama sim a dawngawh ni. **2** Ka lungnaak pyikhqi, tuh ningnih taw Khawsa ca na ni awm hawh uhy, hai ben awh ikawp na ni awm kawm uh, titaw sim na awm hlan hy, cehlai amah ang dang law awh, amah amyihna ni awm lawt kawm uh, tice ni sim uhy, amah ce amah amyihna ni hu kawm uh. **3** U awm amah awh ve ngaih-unaak ak takhqi taw amah a ciim amyihna, amah ing amah ciimcainaak awm thlangkhqi na awm uhy. **4** U awm thawlhnaka ak sai al thlang taw aanaa awi ak hqe na awm hy; thawlhnaka taw aanaa awi kaana khaw saknaak veni. **5** Cehlai ningnih a thawlhnaka ceh pyi aham anih taw dang law hy, tice sim uhy ti. Anih awhtaw thawlhnaka am awm hy. **6** U awm anih awh amak hqing taw thawlhnaka ce sai poe hy. Thawlhnaka ak sai poe ingtaw anih ce am hu nawh sim awm am sim hy. **7** Ka lungnaak naasenkhqi, u ingawm nangmih ce lam koeh ni pleng pyi khqi seh. Ik-oeih ak thym ak sai al thlang taw thlak dyng ni, anih awm a dyng a dawngawh. **8** U awm thawlhnaka ak sai taw setan thlang ni, setan cetaw ak cykca awhkawng thawlhnaka ce ana sai hawh hy, Khawsa Capa ang dang lawnaak taw setan a bibi hqe aham na

ni. **9** U awm Khawsa a cahlah ingtaw thawlhaak ce am sai poe ti kaw, Khawsa am cii ce anih awh awm poe hawh hy; am thawl poe kaw, Khawsa a cahlah na a awm a dawngawh. **10** Khawsa cakhqi ingkaw setan a cakhqi simnaak taw veni; a koeinaa amak lungnaak awm Khawsa ca amni. **11** Ak cyk ca awhkawng naming zaakawi taw; pynoet ingkaw pynoet naming lung qunaak aham awm hy, tive. **12** Kain amyihna koeh awm uh, anih cetaw thlak che na awm nawk a koeinaa ce him hy. Ikaw tih a naa ce a him? Amah a ik-oeih sai ce am leek nawk, a napa a ik-oeih sai ce a dyng a dawngawh him hy. **13** Khawmdek ing nangmih ani sawhnaak awhtaw, koeinaakhqi, na mik kawpoek koeh kyi sak uh. **14** Koeinaa ni lungnaak a dawngawh thihaak awhkawng hqingnaak na ak loet thlangkhqi na ni awm hawh uhy. U awm lungnaak amak ta ak thlang taw thihaak khuiawh ni a awm. **15** U awm a koeinaa ak sawhnaak ak thlang taw thlang ak him ni, u awm thlang ak him taw kumqui hqingnaak am ta hy ti sim uhyuk ti. (*aiōnios g166*) **16** Lungnaak simnaak taw veni: Jesu Khril ingningnih aham a hqingnaak pehy. Ce a dawngawh ningningh ingawm koeinaakhqi aham ni hqingnaak ni peek lawt aham awm hy. **17** Thlang ing khawmdek them ta hlai hy koeinaa a voethlauhaaka a huh awh qeenaa a maak awhtaw, ikawp na anih ak khuiawh lungnaak ce a awm naak thai kaw? **18** Ka lungnaak naasenkhanhqi, awihqawng ing koeh lung qu na u sih, awitak ik-oeih sai ing lung qu na u sih. **19** Vemyihna ik-oeih sainaak ingkaw awitak ta thlangkhqi na ni awm uhy tice ni sim kawmsaw, a haiawh kawlung dymnaak ni ta uhy ti ce. **20** Ningmih ak kawlung ing ani palh sak khqi awh ni sim kawm uh. Ikawthi, Khawsa taw ningningh ak kawlung anglakawh bau khqoet nawk anih ing soepkep boeih ce sim hy. **21** Ka lungnaak pyikhqi, ningnih ak kawlung ing ama ni palh sak khqi awhtaw, Khawsa haiawh ngaihqepnaak ce ni ta uhy. **22** a venawh ik-oeih ni thoeh saqui ce ni pek khqi hy, amah ak awipeek ce ning ngai nawk ak kaw zeelhaak ce ni sai peek a dawngawh. **23** Ak awipeek taw veni: a Capa, Jesu Khril ming cangna nawk, ak awipeek amyihna pynoet ingkaw pynoet ning lung qunaak veni. **24** U awm ak awipeek ak ngai ak thlang taw amah awh awm nawk, cekkhqi ak khuiawh amah ce awm hy. Ningmih ak khuiawh anih awm hy ti simnaak taw veni; Amah ing a ni peek Ciim Myihla ak caming ni sim uhy, ti veni.

4 Ka lungnaak pyikhqi, myihla saqui ce koeh cang law na uh, Khawsa ben nakaw hy voei aw tice simnaak aham noek a dak law lah uh, tawngqa qawl ve khawmdek awh khawzah a ceh hawh a dawngawh. **2** Khawsa Myihla hatnaak taw veni: Jesu Khril pumsa na law hy ak ti myihla cetaw Khawsa ben nakaw myihla na awm nawk, **3** Jesu amak dyih pyi myihla boeih boeih cetaw Khawsa ven nakaw amni. Ce miikhqi cetaw Khril ak oelh myihla, cemyih myihla law kaw, tinawh nangmih ing naming zaak ceni, ce myihla ce tuh awm khawmdek awh awm hawh hy. **4** Ka lungnaak naasenkhanhqi, nangmih taw Khawsa ven nakaw thlangkhqi na nami awm a dawngawh ce miikhqi ce noeng hawh uhyuk ti, kawthi nangmih ak khuiawh ak awm ce ve khawmdek awh ak awm anglakawh bau khqoet hy. **5** Ce miikhqi taw khawmdek ben nakawng ami law a dawngawh khawmdek huhnakk ing kqawn uhy, khawmdek ingawm cekkhqi ak awi ce ngai pehy. **6** Ningmih taw Khawsa ven nakaw thlangkhqi ni, u awm Khawsa ak sim ingtaw ningnih ak awi ce ngai hy, cehlai u awm Khawsa ben nakaw thlang am ingtaw ningnih ak awi ce am ngai hy. Ve ve awitak Myihla ingkaw amak thym myihla hatnaak na awm hy. **7** Ka lungnaak pyikhqi, pynoet ingkaw pynoet lung qu na lah u sih, kawthi, lungnaak taw Khawsa ven nakawng ni a law lungnaak ak ta thlang taw Khawsa ing a cun thlang na awm nawk Khawsa ce sim hy. **8** U awm lungnaak amak ta thlang taw Khawsa ce am

sim hy, kawthi, Khawsa taw lungnaak na a awm a dawngawh. **9** Vemyihna Khawsa ing ningnih a venawh lungnaak dang law sak hy: amah ak caming ni hqingnaak thai aham pynoet chyn ca ak awm amah a Capa ce khawmdek na tyi law hy. **10** Lungnaak taw veni: ningnih ing Khawsa amni lungna hy, cehlai amah ing ningnih ani lungnaak khqi a dawngawh ningnih a thawl awh tleng na lucik sainaak aham a Capa ce tyi law hy. **11** Ka lungnaak pyikhqi, Khawsa ing ani lungnaak khqi soeih a dawngawh ningnih awm pynoet ingkaw pynoet ning lung qunaak aham awm hy. **12** U ingawm Khawsa ce am hu man hy; cehlai ningnih pynoet ingkaw pynoet ning lung qunaak awhtaw, Khawsa ce ningnih ak khuiawh awm nawk a lungnaak ce ningnih ak khuiawh soep hy. **13** Amah awn ni awm unawh anih awm ningnih ak khuiawh awm hy tice ni sim uhy; kawthi, amah ing amah ang Myihla ce ni pek khqi hawh hy. **14** Khawmdek hulkung na Khawsa ing a Capa tyi law hy tice ningnih ing ni hu unawh nik kqawn hawh uhy. **15** U awm Jesu taw Khawsa Capa ni ak ti taw, anih ak khuiawh Khawsa ce awm nawk anih awm Khawsa ak khuiawh awm hy. **16** Khawsa ing ningnih ani lungnaak ce ningnih ing ni sim unawh nik cangna uhy. **17** Cemyihna, awidengaak khawngi awh ngaihqepnaak ni taak naak thai aham ninglak awh lungnaak soep hy, kawthi, ningnih taw ve khawmdek awh amah amyihna ni awm uhy. **18** Lungnaak awh kqjhnaak am awm hy, lungnaak soep ing kqjhnaak ce hqut hy, kawthi kqjhnaak taw toelna a awm a dawngawh ni a awm. Kqjhnaak ak ta thlang taw lungnaak soep am ta hy. **19** Amah ing ani lungnaak khqi lamma a dawngawh ningnih ing ni lungna lawt uhy. **20** U ingawm, Khawsa lungna nyng' ti seiawm a koeinaa ce a sawhnaak awhtaw, anih ce qaa ak kqawn ni. A huh nawn a koeinaa za amak lungnaak thlang ing ama huh man Khawsa taw am lungna tikaw. **21** Anih ing ningnih a ven awhkaw awipeek ve ni pehy: U awm Khawsa ak lungnaak thlang ingtaw a koeinaa ce a lungnaak aham awm hy.

5 Jesu taw Khawsa ing a cuun Khril ni tinawh ak cangnaak thlang boeih ingkaw Pa ak lungnaak thlang boeih ingtaw a ca awm lungna hy. **2** Khawsa cakhqi ni lungna hy tice simnaak taw veni: Khawsa ni lungna nawk ak awipeekkhqi ni hqut veni. **3** Ak awipeekkhqi ve am rih aih hy, **4** Khawsa ing a cuun thlangkhqi boeih ingtaw ve khawmdek ve noeng hy, khawmdek ni noeng nawk ni hepnaak taw ningnih ak cangnaak veni. **5** U ing khawmdek ve a noeng? Jesu taw Khawsa Capa ni ti ak cangnaak thlang doeng ing ni a noeng hy. **6** Tui ingkaw thi ing ak law thlang cetaw - Jesu Khril ni. Tui doeng ing am law hy, tui ingkaw thi ing ni a law. Ce ce ak sim pyikung taw Ciim Myihla ni, kawthi Myihla taw awitak na awm hy. **7** Sim pyikung pakthum awm hy; **8** cekkhqi taw Myihla, thi ingkaw tui ve tloek ni, ve pakthum tloek ve hqui qu uhy. **9** Thlanghqing a simpyinaak za ningnih ing ni do uh awhtaw, Khawsa a simpyinaak taw bau khqoet hy, kawthi amah a capa ani peeknaak ce Khawsa a simpyinaak na awm hy. **10** U awm Khawsa a Capa ak cangnaak ak thlang taw amah ak kawkhuiawh ce simnaak tahi. U awm Khawsa amak cangnaak ak thlang taw amah a Capa a peeknaak awh Khawsa simpyinaak ce amak cangnaak a dawngawh amah ce qaa ak kqawn na sai hy. **11** Simpyinaak taw veni: Khawsa ing kumqui hqingnaak ce ni pe hawh hy, cawhkaw hqingnaak cetaw amah a Capa awh awm hy. (*aiōnios g166*) **12** U awm Cakpa ak ta ingtaw hqingnaak ce am tahi. **13** Kumqui hqingnaak ta hawh nyng tice nami simnaak thai aham Khawsa Capa ming ak cangnaak nangmih a venawh ve ik-oeikhqi ve qee law nyng. (*aiōnios g166*) **14** Khawsa ing ning zoe qunaak awh ve ngaihqepnaak ve ni ta uhy; amah kawngaihnaak amyihna ikaw mih awm ni thoeh awhtaw anih ing ning ngai pek khqi hy. **15**

Amah ing ningnih ak cykcahnaak ning ngai pek khqi hy tice ni sim awhtaw - ik-oeih ni thoeh saqui - a venawh ni thoeh boeih ni hu hy ti ni sim uhy. **16** Koeinaa pynoet ing thihsnaak dyna amak sawi thawlhmaak a sai ce thlang ing a huh awhtaw Khawsa ing hqingnaak a peeknaak thai aham ak cykcah peek aham awm hy. Thihsnaak khoek thawlhmaak amak saikhqi ni ka ti. Thihsnaak dyna ak sawi thlawlhnaak awm hy. Cemyih awh cykcah aham kak kqawn ngaihnaak amni. **17** Sai thawl boeih ve thawlhmaak na awm hy, thihsnaak dyna amak sawi thawlhmaak awm awm hy. **18** Khawsa ing a cuun thlang ingtaw u awm thawlhmaak ce am sai poe hy, Khawsa ing a cuun thlang taw amah ing ak nep na khoem hy, thlak leek am ing am tlawn sak thai hy. **19** Ningmih taw Khawsa cakhqi ni ti ni sim uhy, cehlai khawmdek pum ve thlak che kut khuiawh awm hy. **20** Khawsa Capa law nawh ak thym amah ce ni sim naak thai aham ningnih a venawh zaaksimnaak ni pek khqi hy, tice ni sim uhy. Ak thym amah - a Capa Jesu Khrish ak khuiawh ningnih taw ni awm uhy. Anih taw Khawsa tang ingkaw kumqui hqingnak na awm hy. (**aiōnios g166**) **21** Ka lungnaak naasenkhqi, myi bawknaak ce qee law uh.

2 Johan

1 A hqamca ing, ak thlak tyk nu ingkaw awitak awh kai ing ka lungnaak a cakhqi - kai doeng am nawk, awitak ak simkhqi boeih boeih a venawh, **2** ningnih awh awm nawk ningnih a venawh kumqui dy ak awm awitak awh. (**aiōn g165**) **3** Pa Khawsa ingkaw Pa a Capa Jesu Khril a venawh qeenhaak, thin tlawhnaak ingkaw ngaihqepnaak taw ningnih a venawh awitak lungnaak ing awm kaw. **4** Pa ing ningnih awi a ni peek khqi amyihna, nangmih ca thlang vang ing awitak awh ami ceh a dawngawh zeelnaak ak bau soeih ce ni pehy. **5** Tuh ka lungnaak nu, awipeek ak thai am qee law nyng ak cyk ca awhkawng ni taak uh awipeek ce ni ka mi qee law hy. Pynoet ingkaw pynoet lung qunaak aham thoeh law nyng. **6** Lungnaak taw ak awipeek ngainaak ing ni ceh ve ni. **7** Jesu Khril taw pumsa na law hy tice amak do, ak qaai kqawn thlang khawzah, khawmdek benna cet kang hawh uhy. Cemyih ak thlang taw ak qaai kqawn thlang ingkaw Khril a qaal ni. **8** Na bibi ce hlawng kaana laksawng ce ak soep na nami huhsaak aham ngaihta lah uh. **9** U awm haina dawng nawk Khril a cawngpyinaak awh amak awm poe taw Khawsa am tahi, u awm cawngpyinaak awh ak awm poe taw Pa ingkaw Capa ce ta haih hy. **10** Nangmih a venawh vawhkaw cawngpyinaak taak kaana ak law thlang ce na ipkhui na koeh ceh pyi. **11** U awm cemyih ak thlang ak do taw anih a bibi amak leek ak pyikung na awm hy. **12** Nangmih a venawh ca khawzah qee aham ta hlai nyng, catlap ingkaw cahang tui hawnaak ham am ngaih nyng. Ce anglakawh, kaimih a zeelnaak a soepnaak thai aham nangmih a venna law nyng mik huh qoe na awi kak kqawn ngaih nyng. **13** Ak tyk nang a nanu a cakhqi ing kut ni tlaih uhy.

3 Johan

1 A hqamca ing awitak awh ka lungnaak, ka pyi Gaia a venawh,
2 Ka lungnaak ka pyi na sa a dip naak thai aham ingkaw soepkep boeih ak leek na awm nawh nang myihla ak nep na a awmnaak thai aham cykcah nyng. **3** Koeinaa thlang vang law unawh awitak awh na yp a awmnaak ingkaw ce awitak awh na cehnaak poe akawng ce amik kqawn law awh zeel soeih soeih nyng. **4** Ka cakhqi ing awitak awh ami ceh a dawngawh zeelnaak ka taak anglakawh ak chang zeelnaak ak bau khqoet am ta voel nyng. **5** Ka lungnaak ka pyi, koeinaakhqi ham cemyih ce khin na awm hlai uhy, ik-oeih na sainaak awh ypawm na awm hyk ti. **6** Cekkhqi ing nang a lungnaak ce thlang a venawh kqawn hawh uhy. Ce miikhqi ce Khawsa a khawboe ing ang qoepna na tyih awhtaw nep soeih kaw. **7** Vekkhqi ing ce Ming awh cet unawh lukikhqi a ven awhkawng bawmnaak ikaw awm am hu uhy. **8** Awitak awh bi kutoet na ni binaak thai aham cemyih thlangkhqi ce ak leek na ni toek aham awm hy. **9** Thlangboel a venawh ca qee nyng, cehlai lamma na awm ak ngaih Diotgephe ce ningnih ing bet pha qunaak am ta kaw. **10** Cedawngawh, kai ka law awhtaw, anih a ik-oeih sainaak, ak che che na ningnih anik kqawnnaak khqi ce kai ting ti bit kawng. Ak che na anik kqawnkhqi doeng a khoek kaana, koeinaakhqi ce do aham am ngaih hy. Koeinaakhqi do aham amak ngaih thlangkhqi awm kham penawh thlangboel khui awhkawng hek khqi hy. **11** Ka lungnaak ka pyi, ik-oeih che ce koh eot nawhtaw ik-oeih leek ce oet lah. U awm them leek ak sai taw Khawsak thlang ni. U awm amak leek them ak sai ing Khawsa am hu hy. **12** Dementrius ve thlang boeih ing ak leek na kqawn uhy - awitak amah ingawm kqawn hy, kaimih ingawm ak leek na kqawn unyng, kaimih a simpyinaak ve thym hy tice nangmih ing sim uhyk ti. **13** Nangmih a venawh ca khawzah qee aham ngaih nyng, cehlai cacung ingkaw catui ing sai aham am ngaih nyng. **14** Nangmih ce ni huk khqi zy hawh kawng nyng tina pook nyng, cawh ce haai huh doena awi nik kqawn bit kawm uh. Ngaihqepnaak na venawh awm seh nyng. Vawh ak awm na pyikhqi ing kut ni tlaih uhy. Cawh ak awm pyikhqi ce ang ming ing kut tlaih lawk khqi.

Juda

1 Jesu Khril a tyihzawih pynoet na ak awm Jakob a naa, Juda ing, Khy na awm nawk, Pa Khawsa ing a lungnaak Jesu Khril ak caming khoem na ak awmkhqi venawh: **2** Am qeennaak, ngaihding naak ingkaw lungnaak ce nangmih aham khawzah awm seh. **3** Ka lungnaak ka pyikhqi, kaimih ing ka mik kqawn thaawngnaak akawng ce qee aham ngaih soeih hlai nyng, thlakciimkhqi boeih a venawh hypboet peek na ak awm cangnaak awh ngaih tlypnaak nami taak aham ca qee aham poek nyng. **4** Ikwatih maa na nangmih ak khuiawh ang hyp na ak kun thlakche na ak awm thlang pynoet akawng ce qee na awm hawh hy. Cemyih ak thlangkhqi cetaw Khawsa amak sim, Khawsa qeennaak nu ingkaw pa thawlhaak benna ak hawi lat ingkaw ningnih a sawsang soeih ingkaw Bawipa Jesu Khril ak oelhkqi na awm uhy. **5** Vemyihkhqi ve sim boeih hawh hlai uhyk ti, Bawipaing ak thlangkhqi ce lzip qam awhkawng sawi hy, cehlai a hu nataw amak cangnaak thlangkhqi ce him hy. **6** A mimah a saithainaak dyih hun awh a awm poe kaana a mimah a im a mil ceataak khan ceityihkhqi – ce thannaak ak khuiawh tahi, awidengnaak khawnyn bau awh awi deng aham kumqui thiuki ing khit hy. (**aīōnios g126**) **7** Cemyih lawtna, Sodom ingkaw Gomorrah ingkaw a kengsam awhkaw khawkhqi ing nu ingkaw pa thawlhaak awh a mimah ingkaw a mimah ce pe qu uhy. Kumqui mai awh ak khuiilha thlangkhqi aham dan kawina a mingmih ce awm uhy. (**aīōnios g166**) **8** Cemyih bai lawtna, vemyihna mang ak hankhqi ing a mimah a pum ce tyih ak cu na sai uhy, saithainaak ak takhqi ce qoeng unawh, khawngni na ak awmkhqi ce ak che na kqawn uhy. **9** Cehlai khan ceityih qham Mikal ing zani Mosi a pum ce setan ing a ning qawt qu awh, ak che na anih ak khanawh thawluk puk aham kqih nawh, “Bawipa ing ni zyi sehl!” tina hy. **10** Cehlai ve ak thlangkhqi ingtaw ama ming zaksim ik-oeih ingkaw cyihnaak ing a sim ik-oeih ak khanawh awm qamsa amyihna poeknaak taak kaana amak thym na ak che na kqawn uhy – vemyihkhqi ing a mingmih ce plawci sak khqi hy. **11** Khaw na map uhy! Kain a lam ce hquut uhy; hawihkhangnaak ami ngaih aih awh Balam a sai thawlhaak khuiawh cawn uhy; Korah a qaal thawhnaak awh plawci kang hawh uhy. **12** Vemih ak thlangkhqi ve nangmih lungnaak buhveel kung awh coet ak kap na awm uhy, ngaihseetnaak tehca awm a taak kaana nangmih anglakawh buh ai uhy – amah ingkaw amah doeng ak cah qu tuukhaikhqi na awm uhy. Zilh ing a zawn mailai khawtan tui amak awm cingmaikhqi ni; ak kqa nakawng phu qu nawh ak thaih amak awm, lo mai awhkaw thing – hih voei na ak thikhqi ni. **13** Tuicunli awhkaw tuibak ak tho, chahnaak ak awm ik-oeih ak cunkhqi ingkaw ak cet hyhy aihchikhqi ni, a mingmih aham kumqui na ak hyp thannaak ce taak peek ce na awm hawh hy. (**aīōn g165**) **14** Adam awhkawng ak khqih naak Enok ing ve ak thlangkhqi akawng ve anak kqawn oepchoeh hy: “Toek lah, Bawipa taw amah ak thlangciim thong sang ingkaw **15** Khawsa amak sim thlangkhqi boeih ing Khawsa ak kawngaih am na Khawsa ak kawngaih am lam awh amah ak kawngaih doeng ak hquut, thlang ak theethkhqi ce law kaw,” tinawh kqawn law uhy. **16** Vemih ak thlangkhqi ve nangmih anii pek thlangkhqi ni, khawmdek simnaak mai mai ak hquut thlangkhqi na awm unawh myihla am ta uhy. **17** Cehlai ka pyikhqi, ningnih a Bawipa Jesu Khril a ceityihkhqi ing ami nak kqawn ce ce poek lah uh. **18** Cekkhqi ing nangmih a venawh, “A tym a hukhit na taw Khawsa ak kawngaih am a mimah a hy ngaihnaak a hu awh amik cet thlang ak kqawn chekhqi awm law kaw,” tinawh a mik kqawn law ce. **19** Cekkhqi ing nangmih ce ni pek khqi kaw, cekkhqi taw khawmdek simnaak ak hquut zapkhqi ingkaw Myihla amak ta ak thlangkhqi ni.

20 Cehlai ka lungnaak ka pyikhqi, nangmih taw cangnaak ak ciim ing dyi unawh taw Ciim Myihla awh cyckah lah uh. **21** Nangmih a venawh kumqui hqjinggaak ak haw law hly kawi ningnih a Bawipa Jesu Khril ce nami qeh amyihna Khawsa a lungnaak ing awm lah uh. (**aīōnios g166**) **22** Upvoetaak kawlung ak ta thlangkhqi venawh qeennaak ta law uh; **23** mai ak khuiawh kawng thlang ce qawt law unawh taw hul law lah uh; thlang a venawh qeennaak dang law sak uh, kqihnaak ing pumsa thawlhaak ing ak sui a bai ce sawh law na uh. **24** Nangmih anik thawh khqi thaikung ingkaw amah a boeimangaak a haiawh thawlhaak a awm kaana zeelnaak ak bau soeih nangmih anik pekung – **25** Khawsa ningnih a Hulkung doeng a venawh thangleeknaak, boeimang naak, thaawm naak ingkaw saithainaak, Jesu Khril ningnih a Bawipa ak caming ak cycka ingkaw tuh awhkawng kumqui dyna awm seh! Amen. (**aīōn g165**)

Awiphawng

1 Jesu Khrish ak awiphawng, ak law hly kawi ik-oeih, a tyihzawikhqi venawh dang sak aham Khawsa ing a venawh a peek taw vemyihna awm hy. A tyihzawih Johan a venawh ak khan ceityih tyi nawk dangsak hy, 2 anih ing a huh ik-oeikhkqi boeih ce kqawn hy – cawkaw ik-oeih cetaw, Khawsa ak awi ingkaw Jesu Khrish a sim saknaak awi ceni. 3 Vawhkaw kqawn oepchoeh na ak awm awi ak noet taw a zoseen hy, ve ak awi ak zakhqi boeih ingkaw ce a ik-oeih qee na ak awmkhqi boeih ce ak kawk khuiawh ak khoem taw a zoseen hy, kawith atym taw zoe hawh hy. 4 Johan ing, Asia ram awhkaw thlangboel khqih a venawh: Ak awm hui, ak awm hawh ingkaw ak awm law hly ingkaw amah a ngawihdoelh a hai awhkaw myihla Khrish ingkaw, 5 ypawm simpyikung, thlakthi anglakawhkwak ak thang cyk, khawmdek sangpahrangkhqi boeih ak ukkung Jesu Khrish a venawh kaw qeenaka ingkaw ngaidhinggaak nangmih a venawh awm seh. Ningmih ni lung nak khqi nawk amah a thi ing thawlhnak ak khuiawh kawng ningnih anik loet sak khqikung, 6 a Khawsa ingkaw Pa a bibi aham ningnih ce a ram awhkaw pilnam ingkaw Khawsoikhqi na anik saikung a venawh thang leeknaak ingkaw thaawmnaak kumqui dy awm seh! Amen. (aiōn g165) 7 Toek lah, myi awl law kamsaw, mik a hoei ing amah ce hu kaw, amah cai ing a sunkungkhqi ingawm; khawmdek thlangkhqi boeih ing anih awl ce khy am kqang kawm uh. Ce myihna awm seh! Amen 8 Kai taw Alpha ingkaw Omega na awm nyng," tinawh "ak awm hui, ak awm hawh ingkaw ak law hly kawi, Bawimang." Bawipa ing kqawn hy. 9 Kai, Johan, nangmih a koeinaa na ak awm nawk Jesu awl ningnih aham ak awm qam ingkaw khuihnaak ak yh haih, taw Khawsak awi ingkaw Jesu akawng kak kqawn dawngawh Patmos sanglak cung awl awm nyng. 10 Bawipa nyn awl Myihla ing awm nyng saw, ka huben na kawng uut awl amyihna awi kawtbeh ce za nyng, 11 ce ak awi ing: "Na huh ve cazawl awl qee nawthaw thlangboel khqih tloek: Ephesa, Smyrna, Pergamum, Thyatira, Sardis, Philadelphia ingkaw Laodicea a venawh pat pe," ni tina hy. 12 Ka venawh awi ak kqawn lawkung ce toek aham hawi qunyng. Kang hawi qu awl sui mai vangnaak khqih ce hu nyng, 13 cawkaw mai vangnaak ak khuiawh pynoet taw, "thlanghjing capa myihna awm hy;" khawkkhik dy ak pha subai ing thawicam qu nawk ak kqang awl sui hi ca ing zeen qu hy. 14 A lu ingkaw a lusam taw tuu a myi myihna bawk nawk vyl a myihna bawk hy, a mik qawi taw maikqawng a myihna awm hy. 15 A khaw qawi taw mai awl qawhum hloei a myihna vang hy, ak awi taw tui ang lawng tha ak awm soeih a myihna awm hy. 16 Ak tang kut awl aihchi khqih pawm nawk am kha awl hu hai ak hrat zawzi ce thoeng hy. A hai taw khawmik a ling hui awhkaw myihna awm hy. 17 Anih ce ka huh awl, thlakthi myihna a khaw kung awl tlu hqoeng nyng. Cawh kak khanawh ak tang kut ce tloeng law nawk: "Koeh kqih. Kai taw ak kqannaak ingkaw a dytnaak na awm nyng. 18 Kai taw ak hqing thlang na awm nyng; thi hlai nyng, ngai lah kumqui ingkaw kumqui dy na hqing nyng! Thihnaak ingkaw Hades cabi ce ta nyng. (aiōn g165, Hades g86) 19 Cedawngawh, tuh ak awm ingkaw ak awm hly ik-oeih na huh ce qeel ah. 20 Kak tang benawh aihchi khqih ang hyp ik-oeih ingkaw sui mai vangnaak khqih na huh cetaw veni: Aihchi khqih cetaw thlangboel khqih tloek ak khan ceityikhqi na awm nawk mai vangnaak khqih tloek cetaw thlangboel khqih tloek ce ni.

2 Ephesa khaw awhkaw thlangboel khan ceityih a venawh qee lah: Ve ak awi taw ak tang benawh aihchi khqih ak pawm ingkaw sui mai vangnaak khqih anglakawh ak cet thlang ak awi na awm hy. 2 Na ik-oeih sainaak, tha tlawh doena bi na binaak

ingkaw, yh thainaak na taaknaakkhqi ce sim nyng. Thlakchekhqi am toek poek thai hyk ti, ceityih na ak sa qukhqii noek a dak tiksaw a hqawng ni amik kqawn hy tice hu hyk ti. 3 Kai ang ming awh kyinaak yh ngah ngah tiksaw nak tha am se hy. 4 Cehlai na lungnaak lamma ce na hoet a dawngawh vawh ka ni oelhnaak awm hy. 5 Ak sang nakawng nang tlaaknaak ce poek lah! Zut nawthaw lamma awhkaw na saikhqi ce sai tlaih lah. Am nang zut awhtaw, na venawh law kawng nyng saw na maivang ce a awmnaak hun awhkawng thoeih law valh kawng nyng. 6 Cehlai ve a ik-oeih sai ngaihnaak ce ta hyk ti: Nikolaitan a ik-oeih saikhqi ce sawh na hyk ti, kai ingawm sawh na lawt nyng. 7 Haa ak ta ingtaw, Myihla ing thlangboelkhqi venawh ak kqawn ce za seh. Noengnaak ak takhqi venawh, Khawsa a paradise ak khuiawh ak awm hqingnaak thikthaih ai thainaak ce pe kawng. 8 Smyrna khaw awhkaw thlangboel khan ceityih a venawh qee lah: Ve ak awi taw lamma ingkaw hudyat na ak awm, thi hlai hy ak hqing tlaih ak awikhqi ni. 9 Khuikhka nawk hahqah hyk ti tice sim nyng – cehlai boei hyk ti! Judah thlangkhqi amyihna thlang ak kqawn seetkhqi ce Juda thlangkhqi amni, sinakaww awhkaw setankhqi ni. 10 Khuikhnaak hly kawi awl ce koeh kqih ka nik kqawn law peek khqi ve, setan ing nangmih ak khui awhkaw thlang vang ce noek a dak aham thawng khuina nik thlak khqi kaw, hqa nyn khuiawh khuikhka naak hu kawm uk ti. Thih dyna ypawm na awm lah, hqingnaak boei lumyk ce ni pe kawng. 11 U awm haa ak ta ingtaw, thlangboelkhqi venawh Myihla ing ak kqawn peek awi ce za seh. Noengnaak ak ta thlang taw a hih voei thihnaak ing am tlawh sak qoe voel kaw. 12 Pergamum khaw awhkaw thlangboel khan ceityih a venawh qee lah: Ve ak awi taw hu hai na ak hqat zawzi ak takung ak awikhqi ni. 13 Setan ing ngawihdoelh a taaknaa – na awmnaak ce sim nyng. Cehlai kang ming awl a tak na awm poe hyk ti. Kai awl cangnaak ce am hlat taak hyk ti, kai a ypawm simpyikung na ak awm Antipas a awm awl awm, anih ce Setan a awmnaak na khawk bau khuiawh him uhy. 14 Cehlai, ka ni oelhnaak ik-oeih a khoecha awm hy: Balak ce Isarelkhqi a zoek sak coengawh myiqawl bawknaak buh a an i sak nawk thawl sak ham ingkaw nu ingkaw pa thawlhnaka sai amah ak cawngpyi Balam a cawngpyinaak ag ngai thlangkhqi nangmih a venawh awm hy. 15 Cemiyh nani kolaitan a cawngpyinaak ak hqutkhqi awm nangmih ak khuiawh awm bai hy. 16 Cedawngawh zut lah! Cemiyh am mantaw, na venawh law zy kawng nyng saw kam kha awhkaw zawzi ing cekkhqi ce tuk kawng. 17 U awm haa ak ta ingtaw, thlangboelkhqi venawh Myihla ing ak kqawn peek awi ce za seh. Ak noeng thlangkhqi venawh, ang hyp mana ce pe kawng. Ak hukhqi doeng ing ni a sim, ming thai geenaak lungbawk ce pe kawng nyng. 18 Thyatira khaw awhkaw thlangboel khan ceityih a venawh qee lah: Vetaw a mik mai amyihna kqawng nawk a khaw qawhum hloei amyihna ak vang, Khawsa a Capak awikhqi ni. 19 Na ik-oeih sainaak, nak cangnaak ingkaw lungnaak, na bibinaak ingkaw yhnaak, lamma awhkaw na sai anglakawh tlu khawzaah khqoet sai hyk ti tice sim nyng. 20 Cehlai ve a dawngawh ka ni oelhnaak awm hy: amah ingkaw amah tawngtha ak ti nu Jezebel te toek hyk ti. A cawngpyinaak ak caming ka tyihzawikhqi ni pa thawl sainaak ingkaw myiqawl bawknaak lucik buh a ankhqi ainaak benna sawi kang hawh hy. 21 Khawboe seet a sainaak a dawngawh zutnaak aham a tym ka peek hlai am ngaih hy. 22 Cedawngawh kyinaak ihkhum awl buuk kawng nyng saw, ak samphaih thlangkhqi awm anih a cehnaak lam awhkawng a mami zut awhtaw ce a nu ingqawh kyinaak huh sak kawng. 23 Kai ing ce a nu a cakhqi ce him pe kawng nyng. Cawh thlangboel boeih ing kai ce thlang a lingbyi kawlung ak suikung ni ti sim kawm uh, kai ing nami ik-oeih sainaak amyihna ni sam khqi boeih kawng. 24 Thyatira khaw awl ak awm thlak chang, ce a nu a cawngpyinaak

amak tukhqi ingkaw Setan a awihdung amak cawngkhqi "Kai ing phyihqih amni phyih sak khqi kawng." 25 Na taak cemah ka law hlan dy tu khak lah. 26 Noengnaak ak taakhqi ingkaw a boet dyna ak kawngaih ak saikhqi taw, qamkhqi khanawh sai thainaak ce pe kawng – 27 Anih ing cekkhqi ce thi sawngkhqawl ing uk khqi kawmsaw, cekkhqi ce am amyihna kawng khqi kqek kqek kaw – kai ing ka pa a venna kaw saithainaak ka huh lawt amyihna. 28 Kai ingawm anih ce mymcang thaike ce pe kawng nyng. 29 U awm haa ak ta ingtaw, Myihla ing thlangboelkhqi venawh ak kqawn awi ce za seh.

3 Sardis khaw awhkaw khan ceityih a venawh qee lah: Vawhkaw awikhqi vetaw Khawsa Myihla khqih ingkaw aihchi khqih ak bawmkung ak awikhqi ni. Na ik-oehi sainaak ce sim nyng, ak hqing a myihna tyk hlai hyk ti thi hyk ti. 2 Tho lah! ak thi tawn na pum ce tha awm sak lah, ka Khawsa a mik huh awh na ik-oehi sainaak ak soep te am hu nyng. 3 Cedawngawh, ik-oehi na huh ingkaw nang zaak ce poek lah, ce ak awi ce ngai nawhtaw zut lah. Cehlai amna thaws awhtaw, quk-ai a myihna law kawng nyng, ity awh na venawh ka law tice am sim kawp ti. 4 Cehlai bainaak amak kawlh thlang a khoech Sardis khaw awh awm hyn hy. Ce miikhqi cetaw hik bawk bai kawm usaw kai ing cet hain kawng unyng, cekkhqi cetaw kai mi ceh aham ak tyng khqi ni. 5 Cekkhqi myihna ak noeng thlangkhqi taw hik bawk bai lawt kawm uh. Anih ang ming ce ityk awh awm hqingnaak cabu khui awhkawng am hqe pe kawng, ka Pa inggawi khan ceityih haiawh ang ming ce kai ing simpi lawt kawng. 6 U awm haa ak ta ingtaw, Myihla ing thlangboelkhqi venawh ak kqawn peek awi ce za seh. 7 Philadelphia khaw awhkaw thlangboel khan ceityih a venawh qee lah: Ve ak awikhqi vetaw a kut awh David a cabi ak awm, thlakcium ingkaw ak thym ak awi ni. Anih ing am awng ce u ingawm am khai thai kawmsaw, a khaih ce u ingawm am awng thai kaw. 8 Na ik-oehi sainaak ce sim nyng. Toek lah, U ingawm ama khaih thai chawh ak awng qu ce na haiawh ta law nyng. Nak tha am awm hlai hy, kak awi ce khoem tiksaw kang ming ce am oehl hyk ti. 9 Setan a sinakawk na ak awmkhqi, Juda thlang na am awm loei saw ak sa qu thlangkhqi qaai ak kqawnkhqi ce – nangmih a venawh law sak kawng nyngsaw nangmih a khawlung awk khuk sym sak kawng, nangmih kai ing ni lungna nyng tice cekkhqi ing sim kawm uh. 10 Kak awipeek ce kawdungnaak ing namiyh a dawngawh kai ingawm khawmdekk pum khanawh ak awm thlangkhqi noekdak aham ak law hly kawi kyinaak khuiawh kawng ni hoop khqi kawng. 11 Law nai hawh kawng. U ingawm boei lumyk ce ama ni qawtnaak aham na taak ce ak cakna tu khak lah. 12 Ak noeng thlang cetaw ka Khawsa a tempul ak tung na sai kawng nyng. Cawhkawng ityk awh awm am cehta voel kaw. Anih a dawngawh ka Khawsang ming ing ka Khawsa a khaw bau ming ce qee pe kawng nyngsaw; kang ming thai ce awm qee pe kawng. 13 U awm haa ak ta ingtaw, thlangboelkhqi venawh Myihla ing ak kqawn peek awi ce za seh. 14 Laodicea khaw awhkaw thlangboel khan ceityih a venawh awh qee lah: Ve ak awikhqi taw Amen, ypaum ingkaw dyihthing thym, Khawsa ik-oehi sai ak ukkung ak awikhqi ni. 15 Na bibinaak ce sim nyng, ding awm am ding tiksaw ling awm am ling hyk ti. Pynoet na a awm qep aham ngaih hlai nyng! 16 Na oih kqoeng a dawngawh – ling awm am ling hyk ti, ding awm am ding hyk ti – kam khak khuiawh kawng ni sa tawn hawh nyng. 17 Namah ingtaw, 'boei nyng, khawhthem awm ta nyng ikaw awm am ngoe voel nyng,' tihyk ti. Ngaihak khawbing, qeen ak kap, khawdeng, mikhyp ingkaw ak pum a zal na na awm ce am sim hyk ti. 18 Na boeinaak aham kai a venawh kaw sui mai awh a hloei ce ve thlai lah; chahnaak ak awm am pum a zal na na awmnaak ce na singdahnaak aham hik bawk ve thlai lah; khaw na huhnaak thai aham miksi ve sak lah. 19 Ka

lungnaak thlang ce toel nyngsaw cuk am kik nyng. Cedawngawh ak thym na awm nawh zut lah. 20 Ngai lah chawmkeng awh dyi nyng saw khoeck nyng. U ingawm kak awi ce za nawh chawh ce am awng awhtaw, kun kawng nyng saw anih ing buh ai hain kawng nyng, anih awm kai a venawh awm lawt kaw. 21 Kai ing ka noeng a dawngawh ka Pa a ngawihdoelh awh ka ning ngawihhaih amyihna, ak noeng thlang cetaw boei ngawihdoelh awh kai ing ngawihhaih thainaak ce pe kawng. 22 U awm haa ak ta ingtaw, Myihla ing thlangboelkhqi venawh ak kqawn peek awi ce za seh.

4 Cekcoengawh ka toek hlai, ka haiawh khan chawh ak awng qu ce hu nyng. Ka venawh uut awi amyihna lamma cyk na kang zaak awi ing, "Hang law lah, vek coengawh ak awm hly kawi ce nim huh vang," ni tina hy. 2 Cawh Myihla ing awm pahoei nih nyng, ka haiawh khan boei ngawihdoelh awh thlang pynoet ce hu nyng. 3 Ce boei ngawihdoelh awh ak ngawi thlang ce jasper ingkaw karnelian ing lo qu hy nih. Lungsen suisak amyihna thlimha ing zawl kheop hy. 4 Cawhkaw boei ngawihdoelh ce ak chang boei ngawihdoelh a thong pupthli ce ngawi hy. Cawhkaw a hqamcakhiqetaw hik bawk bai unawh ami lu awh sui lumyk myk boeih uhy. 5 Boei ngawihdoelh a venawh kawng khawphla amyihna vang hilap hilap nawh khawhun ak awi amyihna ce hum hy. Boei ngawihdoelh a haiawh, maivang khqih ce vang uhy. Cawhkaw maivang cetaw Khawsa Myihla khqih ni. 6 Boei ngawihdoelh a hai cetaw hhalang ak cil soeih tuicun amyihna awm hy. Boei ngawihdoelh ing ak chung kheop ang lung kir awh, a hai ben ingkaw a hu benawh mik hqoeng na ak awm k-oehi sai ak hqing pupthli awm hy. 7 Lamma cyk awhkaw ik-oehi sai ak hqing pynoet taw samthyn ing lo qu hy nih, apak thumnaak taw thlanghing amyihna haai tahi, a pupthliak taw huu ak ding hulii amyihna awm hy. 8 Cawhkaw ik-oehi sai ak hqing pupthli tloek ing ang hla kquk ta boeih nawh a pum boeih ce mik hqoeng na awm hy, ang hla ak kep awh awm mik ce awm hy. Than dai a boet kaa qoena: "Ak ciim, ak ciim taw Boeimang Bawipa Khawsa ni, anih taw ak awm hawh, ak awm hulii ingkaw ak awm hly kawi na awm hy," tinawh khy uhy. 9 Cawhkaw ik-oehi sai ak hqingkhqi ing thangleeknaak, kqihchahnaak ingkaw ymaaka ce boei ngawihdoelh awh ak ngawi kumqui ak hqing a venawh ami peek awh, (aiōn g165) 10 boei ngawihdoelh awh ak ngawi a hqamca a thong pupthli tloek ing a haiawh koep unawh kumqui ak hqing ce bawk uhy. A mimah a boei lumyk ce anih ak khanawh tloeng unawh: (aiōn g165) 11 Kaimih a Bawipa ingkaw Khawsa, thangleeknaak, kqihchahnaak ingkaw thaawmnaak ce nang ing na huh aham tyng qoe hy. Ikwathit nang ing soepkep boeih sai hyk ti, namah ak kawngaih amyihna cekkhqi ce sai tiksaw awm uhy," ti uhy.

5 Cekcoengawh boei ngawih doelh awh ak ngawi thlang ak tang kut awh hatnaak khqih ak awm hu hai na a qee cazawl ce hu nyng. 2 Cawh tha ak awm thlang khan ceityih pynoet ing awi khawteh na, "Vawhkaw hatnaak ve hqe nawh cazawl ve u ing a hlam thai kaw?" tinawh khy hy. 3 Cawh khan ingkaw dek awh, dek ak kai nakaw cazawl hlam nawh ak khui dy ak toek hly u a ca pynoet awm am awm hy. 4 Cazawl hlam nawh ak khui ben ak toek hly kawi thlang pynoet awm ama awm a dawngawh kqang khing nyng. 5 Cawh a hqamca pynoet ing ka venawh, "Koeh kqang! Toek lah, Juda pa ak khuiawh kaw samthyn, David Zung ing noeng hawh hy. Anih ing cazawl ingkaw hatnaak khqih ce awng thai hy," tina hy. 6 Cekcoengawh him ce a myihna ak awm tuuca pynoet, boei ngawihdoelh ang lung awh dyi nawh, ak hqing ik-oehi sai pupthli ingkaw mik khqih tahi, cekkhqi cetaw khawmek awh a tyih Khawsang myihla khqih na awm hy. 7 Anih ing boei ngawihdoelh awh ak ngawi thlang ak tang kut awhkaw cazawl ce lo hy. 8 A lawh coengawh, ik-oehi sai ak hqing pupthli tloek

ingkaw a hqamca a thong pupthli tloek ce Tuuca haiawh tlu unawh beek uhy. Cekkhqi ing tingtoeng ta qip unawh thlakciimkhqi a cyckahnaak bawktui ing ak be boet ce ta qip bai uhy. **9** Cekkhqi ing lak thai ce sa uhy: Nang taw cazaawl ingkaw hatnaak ce ak hlam aham kawih na qoe hyk ti, kawtih him na awm hawh tiksaw, na thi ing rampum ingkaw phynlum khui awhkaw thlangkhqi ce Khawsa hamna thlai hawh hyk ti. **10** Cemih thlangkhqi ce ram ingkaw ningnih a Khawsa a bibi aham khawsoeikhqi na sai hawh hyk ti, ce miikhqi ce khawmdek awh boei poe kawm uh," tinawh sa uhy. **11** Ka toek awh khan ceityih khawzah thlang a thong thong ingkaw a sang sang akawi ce za nyng. Cekkhqi ing ik-oeh sai ak hqjng ingkaw a hqamcakhqi ing boei ngawihdoelh ce chung uhy. **12** Awi khawteh na: Him ce na ak awm Tuuca ing, thaawmnaak boemangnaak ingkaw kqihchahaak zoeksang naak ingkaw kiyihcanaak ce huh aham tyng qoe hy!" tinawh laa sa uhy. **13** Cekcoengawh khan ingkaw dek, tuicun ingkaw ak khuiawh ak awm ik-oeh sai boein ing laa sa uhy: "Boei ngawihdoelh awh ak ngawi ingkaw Tuuca a venawh, kyihihchanaak, kqihchahaak, zoeksang naak ingkaw thaawmnaak kumqui dyna awm seh!" tinawh. (aiōn g165) **14** Ik-oeh sai ak hqjng pupthli tloek ing, "Amen," ti unawh a hqamcakhqi ing tluk doena bawk uhy.

6 Tuuca ing hatnaak khqjih ak khuiawh kaw lamma cyk hatnaak ce a hlam awh toek nyng. Cawh ik-oeh sai ak hqjng pupthli ak khui awhkaw pynoet ing khawngum awi amyihna khawteh na: "Law!" ni tina hy. **2** Ka toek awh, ka haiawh mirang bawk pynoet ce hu nyng! Ce mirang awh la ak pawm thlang pynoet ngawi hy, anih ce boei lumyik pe uhy, qaal hoeng nawk noengaak ing mirang awh ngawi hy. **3** Tuuca ing a voeihih hatnaak ce awng tlaiah bai hy, cawh ik-oeh sai ak hqjng a pakkhihnaak ing, "Law!" ni tina hy. **4** Cawh mai myihna ak sen mirang ak chang pynoet ce law hy. Ce a mirang awh ak ngawi cetaw khawmdek awhkaw qoeplaak lo valh nawk thlangkhqi pynoet ingkaw pynoet him saknaak ce pehy. Anih a venawh zawzik bau soeih pe uhy. **5** Tuuca ing apak thum hatnaak ce am awng awh, ik-oeh sai ak hqjng apak thumnaak ing, "Law!" a tice za nyng, ka toek awh ka haiawh mirang mym ce hu nyng! Ce mirang khanawh ak ngawi ing cawi tahnaak ce a kut awh pawm hy. **6** Cekcoengawh ik-oeh ak hqjng pupthli anglakawhkaw awi ing, "Hypoet bibi phu ting sangvut sum oet ingkaw nyn oet bibi phu ting barli sup thum, cekcoengawh situi ingkaw misur tui ce koeh plawci sak," tinawh kqawn hy. **7** Tuuca ing a pupthli hatnaak ce am awng awh, ik-oeh hqjng a pupthliaka ing, "Law!" a ti awh ce za nyng. **8** Ka toek awh, ka haiawh a thi amak awm mirang ce hu nyng! Ce mirang awh ak ngawi cetaw Thihnaak mingna hy, ce a hu awh Hades ing hqut hy. Khawmdek awh ak awm thlang a hloep phlinnaak ce zawihi ing him thainaak, khawseet khawkhanaa, ramsa tlung ing him thainaak ce cekkawi a venawh pehy. (Hadēs g86) **9** Hatnaak a pumhamaak ce am awng awh, Khawsak awi ing ce ak awi a ming dyihpyi a dawgawh bawkthang ak kaiawh thlang ing a him myihla ak awmkhqi ce hu nyng. **10** Cekkhqi ing awi khawteh na, Bawimang Khawsa, ak ciim ingkaw ak thym, khawmdek awh ak awmkhqi ve iqyt dy kaimih a thi phu kut thung nawk awi deng kaana na awm kaw?" tinawh khy uhy. **11** Cekkhqi pynoet qip a venawh hik bawk ce pe unawh, kawlhkalh qeh aham ingkaw a mingmih a myihna him na ak awm thlangkhqi a cup hlan dy qeh aham kqawn pek khqi hy. **12** Hatnaak ak kquknaak am awng ce toek nyng. Cawh lipi khawteh na tat hy. Me a myihna ing a tah tlamhi a myihna khawmik ce mym zur hy, thi a myihna piila awm thim hy. **13** Thai thaih khawhli ing thloek nawk ang kqi a myihna khan nakawng aihchikhqi ce dek na tla hy. **14** Khawk khawngi ce canhah a myihna zawl qu nawh, thlangkhqi ingkaw sanglakkhqi awm thoek kang hy. **15** Cawh khawmdek awhkaw

sangpahrang khqi, sangpahrang cakhqi, qalboiekhqi, boiekhqi, tha ak awm thlangkhqi, tammaakhqi ingkaw ak loetkhqi ce tleng awh ak awm lungnuk khuikhqi awh thuk uhy. **16** Tlangkhqi ingkaw lungnukhqi venawh, Ngawihoelh awh ak ngawi a haai ingkaw Tuuca ak kawsonaak chungdah aham kaimih ve nng cuuk sih khqi lah! **17** Vekkhqi ak kawsonaak khawngi pui taw pha law hawh hy, uing a yh thai kaw?" tinawh khy uhy.

7 Cekcoengawh taw khawmdek kil pupphli awh ak pha law khan ceityih pupthli ce hu nyng, cekkhqi ing dek khan, tuicun ingkaw thingkhqi awh awm ama hlinaak aham khawmdek awh zilh pupthli ce tu khak uhy. **2** Cekcoengawh khawlaw benna kawng ak law khan ceityih pynoet ce hu bai nyng, anih ing ak hqjng Khawsa hatnaak ce tahi. Dek ingkaw tuicun plawci sak thainaak ak ta khan ceityih pupthli ce anih ing khawteh na khy hy: **3** Khawsa a tyihzoeikhqi a talri awh hatnaak ka taak peek hlan dy dek ingkaw tuicun ingkaw thingkhqi ce koeh plawci sak," tina hy. **4** Cekcoengawh hatnaak a takhqi noetnaak ce za nyng: Israael pilnam boeih khui awhkawng 144, 000 law hy. **5** Juda pilnam khuiawh 12,000 hatnaak tahi, Reuben pilnam khuiawh 12,000, Gad pilnam khuiawh 12,000, **6** Asher pilnam khuiawh 12,000, Naphtali pilnam khuiawh 12,000, Manasseh pilnam khuiawh 12,000, **7** Simeon pilnam khuiawh 12,000, Levi pilnam khuiawh 12,000, Assachar pilnam khuiawh 12,000, **8** Zebulun pilnam khuiawh 12,000, Joseph pilnam khuiawh 12,000, Benjamin pilnam khuiawh 12,000 tloek ve hanta awm hy. **9** Cekcoengawh ka toek awh, qamtawm, phynlum, awi cawm awi ce u ingawm ama noet noeng thlang kqeng boei ngawihdoelh ingkaw Tuuca haiawh ak dyi ce hu nyng. Cekkhqi ing hik bawk ce bai unawh ami kut samtoe ce pawn uhy. **10** Awi khawteh na: Hulnaak taw boei ngawihdoelh awh ak ngawi ningnih a Khawsa ingkaw Tuuca a koe ni," tinawh khy uhy. **11** Khan ceityih boeih ing boei ngawihdoelh ing a hqamcakhqi ingkaw ik-oeh sai hqjng pupthli tloek ce chung unawh dyi uhy. Boei ngawihdoelh haiawh koep doena Khawsa ce bawk uhy, **12** ve myihna kqawn uhy: "Amen! Kiyihchanaak, zoeksangnaak, cyihnaak ingkaw zeel awi kqawnnaak, kqihchanaak, saithainaak, thaawmnaak taw kumqui dyna ningnih a Khawsa ni Amen," ti uhy. (aiōn g165) **13** Cawh a hqamca pynoet ing ni doet hy, "Vawhkaw hik bawk ak baikhqi ve u khqi nu, hana kawng ami law?" ni tina hy. **14** Kai ing, "Bawipa namah ing sim hyk ti," tina nyng. Cawh anih ing, "Vawhkaw thlangkhqi vetaw kyinaak ak bau soeih khui awhkawng ak law khqi ni, Tuuca thi ingkaw a hikhqj ce ak bawk cana ak chuk thlangkhqi ni. **15** Cedawngawh, cekkhqi taw Khawsa a ngawihdoelh a haiawh awm unawh than dai a bawkim khuiawh a bi ce bi pe uhy, boei ngawihdoelh awh ak ngawi ing cekkhqik khanawh hi im ce zyng pek khqi kaw. **16** Buh am cawi qoe voel kawm uh, tui awm am ngaih voel kawm uh, khawling ing am eng khqi voel kawmsaw, a ling ingawm am dawi thai voel kaw. **17** Kawtih boei ngawihdoelh ang lung awh ak ngawi Tuuca ce cekkhqi a tuukhaikung na awm kawmsaw hqingnaak tui a lawngnaak kung awh cekkhqi ce sawi khqi kaw. A mikphli tuikhqi ce Khawsa ing huuh pek khqi kaw," tina hy.

8 Hatnaak ak khqihnaak ce am awng awh, khan na khawnoek keekvang khui a dinkqak na awm hy. **2** Cawh Khawsa haiawh ak dyi khan ceityih khqjih ce hu nyng, cekkhqi venawh uut khqjih pek khqi hy. **3** Khan ceityih ak chang pynoet, bawktui bawm pawm doena law nawk bawkthang a haiawh ce dyi hy. Thlakciimkhqi a cyckahnaak ce boei ngawihdoelh a haiawh ak awm sui bawkthang awh nawn aham bawktui khawzah ce anih a venawh pe uhy. **4** Bawktui ingkaw thlakciimkhqi ak cyckahnaak ce khan ceityih kut awhkawng Khawsa haina hang kai hy. **5** Cekcoengawh khan ceityih ing bawktui bawm ce lo nawh, bawkthang awhkaw mai ce

ahawk sih coengawh dek awh hawk hy; cekcoengawh khawngum awi, khawkphla ingkaw khawmdek awh lipi ce tat hy. **6** Uut ak pawm khan ceityih khqiqh ing uut ce yng uhy. **7** Ak lamma cyk khan ceityih ing uut ce yng hy, cawh rel ingkaw thi ing ak kqjt qu mai ce dek awh hawk qu hy. Cawh khawmdek hloep thum khuiawh hloep oet, thing hloep thum khuiawh hloep oet ingkaw sai ak hqinqkhqi boeih ce ui hy. **8** A pak kihhnaak khan ceityih ing uut ce a yng awh, tlang ak bau soeih amyihna ak awm ik-oeih pynoet ce mai awh ui nawk tuicun na khawng qu hy. Cawh tuicun hloep thum khuiawh hloep oet ce thi na thoeng hy, **9** tuicun khuiawh ak hqinq ik-oeih hloep thum khuiawh hloep oet ce thi nawh, tui awh ak cet lawng hloep thum khuiawh hloep oet te plawci kang hy. **10** Apak thumnaak khan ceityih ing uut ce a yng awh, khan nakawng maikhchoe a myihna ak kqawng aihchi ak bau soeih ce tuiva ingkaw lawngca hloep thum khuiawh hloep oet awh nung tla hy – **11** cawhkaw aihchi cetaw Thikkha mingna hy. Tui hloep thum awh hloep oet ce kha sak hy, cawhkaw tuikhka ami awk a dawngawh thlang khawzah ing thi hy. **12** A pupthinaak khan ceityih ing uut ce a yng awh, khawmik hloep thum khuiawh hloep oet, pihla hloep thum khuiawh hloep oet, aihchi hloep thum khuiawh hloep oet ce than hy. Khawkdai hloep thum khuiawh hloep oet ce vangnaak am awm nawh ak hloep thum khuiawh hloep oet awm vangnaak am awm hy. **13** Ka toek awh, khan khawngi zilh awh ak ding awi khawteh na ak khy huu pynoet ce hu nyng: "Khaw map hy! Khaw map hy! Ak chang khan ceityih pakthum ing uut yng aham a awm hyn a dawngawh khawmdek awh ak thlangkhqi ham khaw map hy!" tinawh khy hy.

9 Khan ceityih a pumhanaak ing uut ce yng hy, cawh khan nakawng dek awh anuk tla law aihchi pynoet ce hu nyng. Cawhkaw aihchi venawh a dytnaak amak awm lawk-kqawng dung cabi ce pe uhy. (*Abyssos g12*) **2** Anih ing a dytnaak amak awm lawk-kqawng dung ce am awng awh, mai ak cak soeih maikhu amyihna maikhu ce hang thoeng law hy. Khawmik ingkaw khawhli boeih ce a dytnaak amak awm lawk-kqawng awh maikhu ing than sak hy. (*Abyssos g12*) **3** Cawhkaw maikhu awhkawng khawmdek awh khamkhawkkhqi ce law unawh cekkhqi venawh khawmdek awhkaw cengta-ai amyihna saithainaak ce pehy. **4** Khawmdek awh sai, thigling ingkaw thingkhqi ama plawci sak ahem cekkhqi venawh awipeeknaak awm hlai hy, a talqi awh Khawsa hatnaak amak awmkhqi ce plawci sak ahem awi pehy. **5** Cekkhqi him thainaak taw am pe nawh hla nga ak khui kyinaak ingkaw thekhanakaak peek ahem awi pehy. Cawhkaw khuiukha huhnaak cetaw cengta-ai ing thlang ak cep awhkaw amyihna tlo hy. **6** Cemyihna a awm ak khuiawh thlangkhqi ing thihnaak ce sui hlai voei uh, am hu kawm uh; thih hy hlai voei uh thihnaak ing cekkhqi ce centaak khqi kaw. **7** Cawhkaw khamkhawkkhqi cetaw qaal tuk aham oepchoeh na ak awm meqangkhqi amyihna awm uhy. A lu awh sui lumyk amyihna ak awm lumyk ce myk qip uhy, ami haaiikhqi taw thlanghqing a haai amyihna awm hy. **8** Ami lusamkhqi taw nukhqi a lusam amyihna awm nawh, ami hakhqi taw samthyn a hakhqi amyihna awm hy. **9** Thi amyihna ak awm kqangdan bai unawh, ang hla ang hum awi taw qaal tuknaak awh ak dawng meqang khawzah akawi amyihna awm hy. **10** A ming maikhqi awm nawh cengta-ai amyihna thlang cep hy, ang mai ing hla nga ak khui thlang kyinaak pe thai hy. **11** A dytnaak amak awm lawk-kqawng dung khuiawh kaw khan ceityih ce a mingmih a sangpahrang na ta uhy, anih ang ming taw Abaddon mingna hy, Greek awi na taw Apollyon mingna hy. (*Abyssos g12*) **12** Lamma awhkaw khaw mapnaak taw khum hawh hy; cehlai khaw mapnaak pakkhiih ce a law aham awm hyn hy. **13** Ak kquknaak khan ceityih ing uut ce a yng awh, Khawsa haiawh ak awm sui bawkthang awhkaw kii awhkawng awi ce za nyng. **14** Ce ing uut ak pawm

khan ceityih a venawh, "Euphrates long awh pin na ak awm khan ceityih tloek ce hlah hlah," tina hy. **15** Ve khawnoek, nyn, hla ingkaw kum aham qoe na a pin khan ceityih pupthli tloek ce dek thlang hloep thum khuiawh hloep oet him aham hlah hy. **16** Mirang awh ak ngawi cawhkaw qalkap cetaw million zanhh law hy. Cekkhqi izah ami law tice za nyng. **17** Mirangkhqi ingkaw meqang ak khanawh ak ngawi thlangkhqi ce vemyihna hu nyng: Amik kqangdankhqi ce maikqawng amyihna ak hlawk, nukzup na ak awm ingkaw kat amyihna ak engkhqi na awm hy. Mirangkhqi cetaw samthyn a luhkhqi amyihna awm nawk am kha awhkawng maikqawng, maikhu ingkaw kat ce thoeng hy. **18** Cekkhqi am khak khui awhkawng ak thoeng nat pakthum maikqawng, maikhu ingkaw kat ing khawmdek awh thlang hloep thum khuiawh hloep oet ce him hy. **19** Ce meqangkhqi a saithainaak taw ang mai ingkaw am kha awh awm hy; ang maikhqi ce khqui amyihna a lu awm nawk thlang ngawha ai sak hy. **20** Vawhkaw nat ing am him nawk ak ngen tloek ce a mimah a kutsai awh zut hlan bak bak uhy; qaaibawk unawh, sui, ngun qawhun lung thing ing sai uhy- a mik amak dang, awi am za thai nawk amak cet thai myiqawlkhqi bawknaak ce am qoeng bak bak uhy. **21** Thlang himnaak, miklet, kutlam toeknaak, nu pa thawlh sainaak ingkaw quuk am qaainaak awh am zut bak bak uhy.

10 Cekcoengawh khan nakawng a nuk kqum law tha ak awm soeih khan ceityih ak chang pynoet ce hu nyng. Myi ce hi na bai nawh, a lu sawawh thlimha ce awm hy; a haai taw khawmik amyihna awm nawk a khaw qawi taw maihtung amyihna awm hy. **2** A kut awh cazawl tehca ce pawm nawk a kut awh phaiah hy. Tang ben a khaw ing tuicun leh nawh cawng ben a khaw ing dek leh hy, **3** samthyn kawk awi amyihna khawteh na a nih ce khy hy. Ak khy awh, khawngum khqiqh ing awi kqawn hy. **4** Khamngum khqiqh ing awi ak kqawn awh, ca qee aham cai nyng; cehlai khan benna kaw awi ing, "Khamngum khqiqh ing awi ak kqawn ce koeh qee nawhtaw hatnaak ta lah," ni tina hy. **5** Tui ingkaw dek awh ak dyi khan ceityih ing ak tang ben kut ce khan na hak thlek hy. **6** Kumqui dy ak hqinq, khan ingkaw ak khuiawh ak awm ik-oeikhqi boeih ak saikung, dek ingkaw ak khuiawh ak awm ik-oeikhqi boeih ak saikung, ang ming ing awi sa hy, "Am yih voel kaw! (*aiōn g165*) **7** Cehlai ak khqihnaak khan ceityih ing uut yng vang a ti awh, Khawsa a koe ang hyp ik-oeih ce amah a tyihzawih tawngkhakhi venawh ak kqawn peek oepchoeh amyihna soep hawh kaw," tinawh kqawn hy. **8** Cekcoengawh khan benna kaw kaw zaak awi ing awi ti law tlaih bai hy: "Cet nawhtaw, tuicun ingkaw dek awh ak dyi khan ceityih a kut awh a phaiah cazawl ce lo lah," ni tina hy. **9** Cedawngawh cawhkaw khan ceityih a venna cet nyng saw cazawl ce thoeh nyng. Anih ing, "Lo nawhtaw ai lah. Nak phoen ak khuina thuilhlai voei, nam kha awhtaw khaw amyihna awi kaw," ni tina hy. **10** Khan ceityih a kut awhkaw cazawl ce lo nyng saw ai nyng. Kam kha awh khawi amyihna awi hy, cehlai ka ai coeng awhtaw kak phoen khuina thuilhlai hy. **11** Cawh, Thlang khawzah, qamtawn, phynlum ingkaw sangpahrangkhqi venawh awi kqawn tlaih kawp ti," ni tina hy.

11 Caitying a myihna ak awm thikdyng pynoet ce ani peek coengawh, "Cet nawhtaw Khawsa a tempul ingkaw bawkthang ce tah lah, cekcoengawh vawh Khawsa ak beek thlangkhqi ce toek lah. **2** Cehlai a leng ben taw koeh pa sak; koeh tah, cetaw Gentelkhqi hamna ni. Cekkhqi ing khaw bau ciim ce nyn 42 khui khaw ing leh kawm uh. **3** Cekcoengawh kai ing ka mah a diything thlang pakkhiih a venawh saithainaak pe kawng nyng saw cekqawi ing tlamhi bai kawm nihsaw, khawngi 1260 khui awi kqawn kawm nih," ni tina hy. **4** Vekkqwai vetaw

khawmdek Bawi a haiawh ak dyi olive thing pakkhih ingkaw mai vangnaak pakkhih na awm hy. 5 U ingawm cekqawi ce tlawhnat sak aham a ngaih awhtaw, am khak khui awhkawng maikqawng ce thoeng sak nih nawh a qaalkhqi ce daih hy nih. U awm cekqawi ce tlawhnat sak aham ak ngaih taw cemyihna ce thi kaw. 6 Awi ani phawng khuiawh awm ama aanaak aham khan chawh ce khai hy nih; tui awm thi na thoeng sak thai nih nawh ani ngaihnaak a myihna khawmdek awh tlawhnat soepkep ce law sak thai hy nih. 7 Cekkqawi ing awi anik kqawn boet coeng awhtaw, a dytnaak amak awm lawk-kqawng dung khuiawh kawng ak thoeng law ramsa tlung ing cekqawi ce tul kaw, noeng kawmsaw cekqawi ce him kaw. (Abyssos g12) 8 Cekkqawi a pum ce khawk bau awhkaw lam awh helh hyt kawm uh, cawhkaw khawk bau ce ikaw mih nu ti kqawn nytnaak na Sodom ingkaw Izip tinawh khy uhy, cawh cekqawi a Bawipa awm thinglam awh ana tui uhy. 9 Khaw nyn thum coengawh kekvang thlang tawm, phynlum, awi cawm awi ce ing qampum awhkaw thlangkhih ing mikkel ing gym kawm usaw cekqawi a qawk ce vui aham thana kawm uh. 10 Cawhkaw tawngtha qawi ing khawmdek awh ak awm thlangkhih ce ana thekhanaak hawh a dawngawh thlangkhih ing cekqawi a khanawh zeel kawm usaw pynoet ingkaw pynoet kutto ik-oeih pat qu kawm uh. 11 Cehlai nyn thum coengawh kengvang a awm coeng awhtaw cekqawi ing Khawsa venna kaw hqingnaak hqi ce hu tlaib nih nawh ari khaw ing dyi hy nih, cawh ak hukhqi ing kqjh uhy. 12 Cawh khan benna kawng awi khawteh na, "Hang law lah," a ti awi ce za hy nih. A qaalkhqi ing ami toek hulii awh khan khawngkhy myi awh hang kai hy nih. 13 Cawh lipi khawteh na tat nawh khawk bau hloep hra khuiawh hloep oet ce plawci hy. Thlang thong khqih ce lipi a dawngawh thi uhy, a mik awm tloek ce ly unawh khan Khawsa ce zoeksang uhy. 14 Khaw map pak khinhnaak ce khum nawh, khaw map apak thumnaak ce a law aham awm hy. 15 Khan ceityih ak khqihnaak ing uit ce a yng awh, khan na awi khawteh na qeng hy, cawhkaw awi ing, "Khawmdek ram ve ningnih Bawipa ingkaw a Khrhi a ram na coeng hawh hy, anih ing kumquy dy uk hawh kaw," tihy. (aiōn g165) 16 Cekcoengawh Khawsa haiawh kaw boei ngawihdoelh awh ak ngawi a hqamca a thong pupthil tloek ing koep unawh Khawsa ce beek uhy. 17 Bawimang soeih soeih Bawipa Khawsa, na venawh zeelnaak awi kqawn law u nyng, nang taw ak awm hulii ingkaw ak awm coeng hawh na awm hyt ti, na sai ik-oeih bau soeih ce lo tiksaw boei na ngawi hawh hyt ti. 18 Rampum awhkaw thlangkhih ce amik kaw so unawh nang ak kawsonaak ce pha law hy, tlakthikhqi awi dengaak a tym ce pha law nawh, na tyihzoeikhqi, na tawngkhakhih, nak tlakciimkhih ingkaw nang ming ak kqjihchah thlangkhih, tlak zawi, tlak bau aham kutto huhnaak tym ce pha law hawh hy, khawmdek ak hqe thlangkhih hqenaak nyn ce pha law hawh hy," tinawh kqawn hy. 19 Cekcoengawh taw khanna ak awm Khawsa a temporal ce awng qu nawh, cawhkaw temporal khuiawh paipi a sainaak bawm ce awm hy, ce a nyn awhkawng kqek mai ing, khawngkhy awi ing, lipi tat nawh kqek khawzah ce kqi hy.

12 Kawpoek kyinaak bau soeih khanna dang hy: khawmik ce hi na bai nawh a khaw awh pihla ak ta a lu awh aihchi pahqa hlaihih ak awm boei lumyk ak myk nu pynoet hu nyng. 2 Ce nu cetaw tat tloei na awm nawh naa awm vang a ti dawngawh tlo nawh khy hy. 3 Cawh khanna hatnaak achang pynoet awm bai hy: A lu khqih law nawh ak kii pahqa ak law, a lu awh boei lumyk khqih ak awm thlim ak thim ak bau soeih pynoet ce awm hy. 4 Ang mai ing khanna ak awm aihchi hloep thum khuiawh hloep oet ce khawi baat nawh dek na nuk khawng hy. Naa a awm awh daih pahoei vang tinawh cawhkaw thlim ce naa ak awm tawm nu a haiawh dyi hy. 5 Cawhkaw nu ing thi boeng ing rampum

ak uk hly kawi a ca pa ce cuun hy. Ce a ca pa ce Khawsa ing a ngawihdoelh a awmnaak hun na pawm qu valh hy. 6 Ce nu ce Khawsa ing qoek abah pehy, qamkoh awh khawnghi 1,260 khui doeng khoemdoen aham dawng hy. 7 Cawh khan na qaal tuksaak awm hy. Mikael ingkaw ak khan ceityihkhih ing thlim ce tul uhy, thlim ingkaw khan ceityihkhih ingawm tul lawt uhy. 8 Cehlai cekkhih ce amik tha ama awm a dawngawh khawk khan na awmnaak hun am ta thai voel hy. 9 Khawmdek pum ak ceh pyi thawlq qaii am awhtaw Setan khqui kqym thlim ce nuk thla uhy. Anih ce ak khan ceityihkhih ing dek na nuk thlak khqi hy. 10 Cawh khawk khan na khawteh na: "Tuh taw thawlhaak ingkaw thaawmnaa ningnih Khawsa a ram ingkaw Khrhi a saithainaa ce law hawh hy. Kawtih ningnih a koeinaakhqi thawlq ak pukkung, than dai ningnih Khawsa haiawh cekkhih thawlq ak pukkung ce nuk thla law hawh uhy. 11 Tuucakhqi ingkaw awiphawngnaak ing anih ce noeng hawh uhy, thihihaak awhkawng qoeng aham cekkhih ing a hqinqnaak ce am lungna soeih uhy. 12 Cedawngawh nangmih khankhih ingkaw ak khuiawh ak awm thlangkhih, zeel lah u! cehlai qaai ce nang a venna a nuk thlak law na a awm hawh a dawngawh, khawmdek ingkaw tuicun taw khaw map hyt ti. A tym tawica doeng ni a taak hawh tice a sim a dawngawh, anih ce ak kaw so hy," tinawh awi ce za nyng. 13 Khawmdek awh nuk khawng law na awm hawh nyng tice thlim ing a sim awh, nu pa ca ak cuun ce hqutu hy. 14 Cehlai ce a nu ce kawlhkah toeknaak aham qoek abah pe hyt hy. Kqui ing ama phanaak qamkoh pynoet awh a tym iqyt nu, a tym kekvang khuiawh ding thainaak aham huu ak bau soeih ang hla qawi ce pe uhy. 15 Kqui ing am kha khuiawh kawng long tui amyihna tui sa nawh cawhkaw tui ak tha ing nu ce ban aham cai hy. 16 Cehlai khawmdek ing ce a nu ce hul hy, khqui ing am kha khuiawh kawng long tui amyihna a sa tui ce khawmdek ang nawh daih pe boeih hy. 17 Cawh thlim ce nu ak khanawh ak kaw so hy, Khawsa ak awipeek ngaih nawh Jesu ak awih kqawn ak tu ce nu a cadilkhqi ing tul qu aham cet hy.

13 Thlim ce tuicun keng awh dyi hy. Cawh tuicun khui awhkawng ak thoeng law qamsatlung ce hu nyng. Cawhkaw qamsatlung cetaw ak kii pahqa ingkaw a lu khqih tahi, ak kii boeih awh boei lumyk pahqa awm hy, a lu boeih awh Khawsa kqawn seethaak ming awm boeih hy. 2 Cawhkaw qamsatlung ka huh cetaw kaityn ing lo qu hy nih. Cehlai a khaw taw phawm a khaw amyihna awm nawh am kha taw samthynn am kha amyihna awm hy. Thlim ing cawhkaw qamsatlung a venawh thaawmnaak, boei ngawihdoelh ingkaw saithainaak ak bau soeih ce pehy. 3 A lu pynoet taw ngawha ai hlai hy, ngawha a ai ce qoei hawh hy. Khawmdek pum amik kawpoek kyi nawh cawhkaw qamsatlung a hu awh bat uhy. 4 Qamsatlung a venawh saithainaak ce a peek a dawngawh thlangkhih ing thlim ce bawk uhy, qamsatlung awm bawk unawh, "U nu qamsatlung amyihna ak awm? U ing anih ve a tul thai kaw?" ti uhy. 5 Oeknaak ingkaw Khawsa thekhanaak awi kqawn aham hui am lai ingkaw, hla 42 khui amah ngaih ik-oeih saithainaak ce pe uhy. 6 Anih ing Khawsa kqawn seet aham ingkaw anih ang ming ing anih a awmnaak hun ingkaw khan awh ak awm thlangkhih boeih kqawn seet aham am kha ce awng hy. 7 Thlakciimkhih tul thainaak ingkaw noeng thainaak ce hu hy. Phynlum, thlangtawm, awi cawm awi ce ingkaw qampum akganak a khanawh saithainaak ce tahi. 8 Khawmdek a syn cyk awh ami him tuuca a hqingnaak cauk ak khuiawh ang ming qee na amak awm khawmdek thlangkhih boeih ing cawhkaw qamsatlung ce bawk kawm uh. 9 U awm zaaknaak haa ak ta ingtaw za seh. 10 Tamnaa na ak khum hly kawi thlang taw tamnaa na khum kaw. Zawzi ing him hly kawi thlang taw zawzi ing him na awm kaw. Cedawngawh thlakciimkhih ing kawdung doena yhnaak taak aham ingkaw ypaawm na awm aham ngoe hy.

11 Cedawngawh khawmdek awhkaw ak law qamsatlung pynoet ce hu nyng. Tuuca amyihna kii pakkhih ta hlai hy, thlim amyihna awi pau hy. **12** Lamma awhkaw qamsatlung ang zyngna anih a saithainaakkhqi boeih boeih ce sai nawh ngawha ak ai nawh ak qoei hawh lamma awhkaw qamsatlung ce dek awhkawng thlang boeih bawk sak hy. **13** Anih ing kawpoek kyi hatnaak ik-oehikhqi ce sai hy, thlang a mik huh awh khawk khan nakawng pateng za mai nung tlak law sak hy. **14** Lamma awhkaw qamsatlung ang zyngna hatnaakkhqi saithainaak ce a venawh peek na a awm a dawngawh, khawmdek awh ak awm thlangkhqi ce anih ing thai nahy. Zawzi ing ngawha ai hlai hy ak hqing tlaih qamsatlung kqihchhaunaq myiqawl sai aham anih ing awi pehy. **15** Cawhkaw myiqawl bawk aham ak thanaak thlang boeih ce him saknaak thai awi kqawn aham lamma awhkaw qamsatlung myiqawl hqj sak thainaak ce anih a venawh peek na awm hy. **16** Thlang boeih, ak zawi ak bau, boei ingkaw khawdeng, ak loet ingkaw tamnaa cawng kut benawh am awhtaw a talqi awh hatnaak boeih anih ing taak sak ngah ngah hy, **17** cedawngawh qamsatlung ang ming am awhtaw ang ming a nambat hatnaak amak ta ingtaw ik-oeh am zawi thai kawmsaw thlai awm am thlai thai kawm uh. **18** Ve ing cyihnaak ngoe hy, u ingawm ak poek thai awhtaw qamsa a nambat ce noet lah seh, kawthi vawhkaw nambat taw thlanghqing nambat na awm hy, anih a nambat taw 666 na awm hy.

14 Tuuca ingkaw 144,000, cekoengawh ka toek hlai, ka haiawh tuuca, zion tlang awh ak dyi ce hu nyng, anih ang ming ing a pa ang ming a talqi awh ak qee thlang 144,000 a venawh ak awm ce hu hy. **2** Cawh khawk khan nakawng tuilet awi ingkaw khawngum awi amyihna za nyng. Cawhkaw awi cetaw tingtoeng ak tumkhqi ing tingtoeng ami tum awhkaw amyihna awm hy. **3** Cekkhqi ing boei ngawihdoelh a haai ingkaw ik-oehi sai ak hqing pupthli a haai ingkaw a hqamcakhqi haiawh lak thai ce sa uhy. Khawmdek awh thaawng na ak awm thlang 144,000 doeng am ingtaw u ingawm ce a laa ce am sa thai hy. **4** Vekkhqi vetaw nu inqgawi am thawlh nawh ak ciimcaih na ak awm thlangkhqi na awm uhy. Cekkhqi ing Tuuca a cehnaak hoei awh hqut uhy. Cekkhqi cetaw thlangkhqing lak awhkawng ak thlaik thlangkhqi na awm unawh Khawsa ingkaw Tuuca venawh thaihcyk nawn na awm uhy. **5** A hui awm qaai am awm nawh; coet amak kap thlangkhqi na awm uhy. **6** Cekoengawh khan khawngi awh ak ding khan ceityih ak chang pynoet ce hu nyng, anih ing khawmdek awh ak awm qampum, phynlum ingkaw awi cawm awi ce thlangkhqi venawh phawng aham kumqui awithang leek ce tahi. (*aiōnios g166*) **7** Anih ing khawteh na, "Amah a awi dengaak tym ce a pha law hawh a dawngawh, Khawsa ce khqj unawh thangleeknaak ce pe lah uh. Khan ingkaw dek, tuicun ingkaw lawngca ak saikung ce bawk lah uh," tinawh khy hy. **8** Apak khihnaak khan ceityih ing, "Tlu hawh hy, qampum samphain qawnaak misur tui ak awk sak Babylon khawk bau taw tlu hawh hy," tinawh kqawn bai hy. **9** Apak thumnaak khan ceityih ing khawteh na, "U ingawm qamsatlung ingkaw a myiqawl ce bawk nawh a talqi awh am awhtaw a kut awh aw anih a hatnaak ak hu taw, **10** Khawsa ing ak kawsonaak boet awh thaawmnaak ak be na tloieih hy, kawsonaak misur tui ce aw lawt kaw. Tuuca ingkaw ahan khan ceityih ciimkhqi cekkhqi ce kat mai ing dawi kaw. **11** A mingmih dawinaak kat maikhu ce kumqui dy boet qoe kaana khu kaw. Qamsatlung ingkaw a myiqawl ak bawk anih ang ming hatnaak ak hu thlangkhqi hamma than dai dymnaak qoe qoe am awm kaw," tinawh khy hy. (*aiōn g165*) **12** Ve dawngawh Khawsak awipeek ngai nawh Jesu awh ypawm na ak awm thlakciimkhqi ing kawdung naak ing yh aham ngoe hy. **13** Cekoengawh khan benna kawng awi pynoet za nyng, "Ree lah: Tuh kawng Bawipa awh ak thi thlangkhqi taw ami zoseen

hy." "Oeh, a bibinaak awhkawng dym kawm usaw, a bibinaak ing a mingmih ce hqut hawh lawt kaw," tinawh Myihla ing kqawn hy. **14** Ka toek awh, ka haiawh myiqawl awm a bawk awm nawh, cawhkaw myiqawl a bawk awh ak ngawi cetaw, "Thlanghging Capa" na awm nawh, a lu awh sui lumyk myk nawh a kut awh vin ak hqat ce pawm hy. **15** Khan ceityih ak chang pynoet ce bawkim khuiawh kawng law nawh myiqawl awh ak ngawi thlang a venawh khawteh na, "Na vin ce lo nawh aat hlah, cang ah ty khoek hawh hy, khawmdek awh cang hin boeih hawh hy," tina hy. **16** Myiqawl awh ak ngawi thlang ing a vin ce dek na nuk hawi law hy, cawh dek ce aat hy. **17** Khan na ak awm bawkim khui awhkawng khan ceityih pynoet ce law hy, anih ingawm vin ak hqat pynoet pawm hy. **18** Khan ceityih pynoet bai ce mai pawm law nawh bawkthang a venawh kawng law hy, awi khawteh na vin ak hqat ak pawm a venawh, "Na vin hqat ce lo nawh khawmdek awhkaw misur bawm ce aat hlah, misur thaithi hin hawh hy," tina hy. **19** Cawhkaw khan ceityih ing a vin ce khawmdek na nuk hawi hy, misur thaithi bawm ce aat nawh Khawsa ak kawsonaak misur tui suinaak awh nuk khawng hy. **20** Khawk bau ceng awhkaw misur tui suinaak awh cawhkaw misur thaithi bawm ce khaw ing leh uhy, cawhkaw a tui suinaak awhkawng thi lawng nawh meqang am khakkho dy a mylh na stadia 1,600 dy lawng hy.

15 Khawk khan na kawpoek kyi hatnaak ak bau soeih ce hu nyng: khan ceityih khqjih ingkaw tlawhche a dytnaak khqjih dy awm hy, ce a ik-oehi dawngawh Khawsa ak kawsonaak ce soep hy. **2** Mai ing ak kqj qu hlalang tulii amyihna ak awm ik-oehi ce hu nyng, cawhkaw tulii kengawh qamsatlung, a myiqawl ingkaw ang ming ak khanawh ak awm nambat ak cheiawh noengnaak ak ta thlangkhqi ce dyi uhy. Khawsa ing a peek tingtoeng ce cekkhqi ing pawm unawh, **3** Khawsa a tyihzawih Mosi ingkaw Tuuca a laa ce sa uhy: "Boeimang soeih Bawipa Khawsa, na ik-oehi saikhqi ve kawpoek kyi ak bau soeih na awm hy. Khawhqai quek sangpahrang, na lamkhqi ve dyng nawh thym hy. **4** Nang ama nik kqjih u nu ak awm kaw, Aw Bawipa nang ming amak zoeksang u nu ak awm kaw? Ikwatih nang doeng ciim hyk ti. Qampum thlang boeih law kawm usaw na haiawh ni bawk kawm uh, kawthi nang a ik-oehi thym saikhqi ce dang hawh hy," tinawh laa sa uhy. **5** Cekoengawh ka hak toek awh khan nakaw bawkim, Awitaaknaa hi im ak awng qu ce hu nyng. **6** Cawhkaw bawkim khui awhkawng khan ceityih khqjih ing tlawhche khqjih a law pyi ce hu nyng. Hik ciim ak vang soeih ce bai unawh, amik kqangkhqi ce sui hica ing zen uhy. **7** Ik-oehi sai ak hqing pupthli khuiawh kaw pynoet ing khan ceityih khqjih a venawh kumqui dy ak hqing Khawsa ak kawsonaak ing ak be boet khqjih ce pehy. (*aiōn g165*) **8** Cawh bawkim ce Khawsak thaawm boeimangaak awh zoeksangnaak maikhu ing be hy, khan ceityih khqjih a tlawhche khqjih ce a boeih hlan dy taw bawkim khuiawh u awm am kun thai hy.

16 Tempul khuiawh kawng khan ceityih khqjih a venawh khawteh na, "Cet nawhtaw, Khawsak kawsonaak boet khqjih ce khawmdek awh hawk lah," tinawh awi ak qeng ce za nyng. **2** A lammanaak khan ceityih ing cet nawh a boet ce khawmdek na nuk hawk hy, cawh ramsatlung ingkaw a myiqawl ak beek thlangkhqi ce ak tlo soeih ingkaw ak che soeih na haai uhy. **3** A pakkhinnaak khan ceityih ing boet ce tuicun awh hawk bai hy, cawh tui ce tlakthikhqi myihna coeng nawh tui ak khuiawh kaw ramsakhqi boeih boeih ce thi hy. **4** Apak thumnaak khan ceityih khqjih ing boet ce tuiva ingkaw lawngcakhqi ak khanawh hawk uhy, tui boeih ce thi na coeng hy. **5** Cawh Tui ak ukkung khan ceityih ing: "Vawhkaw awi dengaak awh nang ing ak dyng na awideng hyk ti, ak awm huili ingkaw ak awm hawk ak ciim, kawthi nang ing awi ce cemiyihna deng hawh hyk ti, **6** kawthi vekkhqi ing nak

thlangciimkhqi ingkaw tawng'hakhqi thi a lawng sak a dawngawh, a awk hly tyng thi ce awk sak hawh hyk ti," tinawh kqawn hy. 7 Cawh bawkthang benna kawng: "Oeih, boemang Bawipa Khawsa, nak awidengaakkhoi ve thym nawk dyng hy," tinawh hlat pehy. 8 Khan ceityih a pupthlinaak ing a boet ce khawmik awh hawk nawk khawmik a venawh khawmdek awhkaw thlangkhqi mai ing eng aham awi pehy. 9 Maihhawk ing a eng a dawngawh vawhkaw tlawhche ak law sakkung Khawsang ming ce kqawn seet uhy, cehlai zut nawk amah zoeksang aham am ngaih bak bak uhy. 10 Khan ceityih a pumha naak ing boet ce qamsatlung a ngawiidoelh awh hawk hy, cawh a ram ce thannaak khuina tla put hy. Ko ang kqang doena thlangkhqi ing amim lai ai unawh, 11 haai tlawn dawngawh khan Khawsa ang ming ce kqawn seet uhy. Cehlai ik-oeih sainaak awh am zut bak bak uhy. 12 Ak kquknaak khan ceityikhqi ing a boet ce Euphrates tuiva pui awh hawk uhy, cawh tuiva ce kak qup nawk khawlaw benna kaw sangpahrangkhqi ami lawnaak aham lam qoek a bah pehy. 13 Cekoengawh uphyih amyihna ak awm qaaiche pakthum ce hu nyng, cekkhqi ce, thlim am khak khuiawh kawng, qamsatlung am kak khui awhkawng, tawngha qawl am khak khui awhkawng thoeng uhy. 14 Ce miikhqi cetaw qaa'i myiqlihkhqi na awm unawh kawpoek kyi hatnaakkhoi ce sai uhy, khawmdek sangpahrangkhqi boeih a venna cet unawh boemang Khawsa khawngkhy pui awm qaql tuk aham cekkhqi ce pynoet na cawi khqi hy. 15 Ngai lah, quk-ai a myihma law kawng! Ih kaana a hyrpy na awm nawk a pum a zal na chaphphyi na ama awm aham hi a oepchoeh na ak ta taw a zoseen hy." 16 Hebrew awi na Armageddon ami ti a hunawh cekkhqi ing sangpahrangkhqi ce cun kang uhy. 17 Khan ceityih ak khqjhnaak ing a boet ce khan zilh awh hawk hy, cawh tempul khuiawh kaw ngawiidoelh awhkawng: "Boeih hawh hy," tinawh awi ce law hy. 18 Cawh khawkphla ingkaw khawng'hum awi ing lipi ce khawteh na tat hy. Khawmdek awh thlanghqing a awm plek awhkawng vemih lipi ve tat khawh lhan hy, lipi ce tat hy. 19 Hawk bau ce pakthum na pek qu nawk, rampum awhkaw khawk baukhoi ce plawci boeih hy. Khawsa ing Babylon hawk bau ce sim nawk ak kawsonaak misur tui ing ak be boet ce pehy. 20 Sanglakkhoi awm cen kang nawk thlangkhqi awm am dang voel hy. 21 Hawk khan nanakwng pawng zaoet ak rih qeel ce thlangkhqik khanna tla hy. Cawhkaw qeel ce tla nawk kqjh a awm a dawngawh Khawsang ming ce kqawnseet uhy.

17 Boet khqjh ak pawm khan ceityih khqjh khuiawh kaw pynoet ing ka venawh: "Law lah, tui khawzah awh ak ngawi, pup zawi pyi nu dyna ce nim huh vang. 2 Khawmdek sangpahrangkhqi ing anih ing samphaihnaak unawh khawmdek thlangkhqi ce anih a samphaihnaak misur tui ing qui sak boeih hy," ni tina hy. 3 Cekoengawh khan ceityih ing qamkoh na Myihla awh ni ceh pyi hy. Cawh Khawsa thekhanaak ming ing ak be, lu khqjh ta nawk kii pahqa ak ta ak thim qamsatlung ak khanawh ak ngawi nu pynoet ce hu nyng. 4 Ce nu ing ak thim ingkaw ak ling hi ce bai hy, ak vang sui ingkaw lung phuk tlo ingkaw pale ing thoeh ang cam qu hy. A kut awh tyih ak cu ik-oeih ingkaw a samphaihnaak tyih ak cu sui boet ce pawm hy. 5 A talqi awh menyihna ca qee awm hy: "PUP ZAWIKRI A NU INGKAW KHAWMDEK AWHKAWW TylH AK CU ANG HyP BAByLON KHAwK BAU. 6 Cawhkaw nu ce thlakciimkhqi thi, Jesu ak dyihpyi thlangkhqi a thi a qui ce hu hy. Anih ce ka huh awh, kak kawpoek kyi hy. 7 Cawh khan ceityih ing, kawtih nak kawpoek a kyi? Nu ingkaw ang ngawihihaak a lu khqjh ingkaw ak kii pahqa ak ta qamsatlung akoe ang hyp ce nik kqawn pe vang. 8 Qamsatlung vai na huh ce tuh awhkaw am voel ni, cawhkaw qamsatlung taw a dytnaak amak awm lawk-kqawn khui awhkawng thoeng kawmsaw amah a seetnaak hun

na cet kaw. Khawmdek a syn cyk awhkawng hqinqnaak cauk awh ang ming amak pa thlangkhqi ing ak awm hawh, cehlai tuh amak awm nawk ak law hly kawi qamsatlung ce ami huh ah amik kawpoek kyi kaw. (Abyssos g12) 9 Ve ik-oeih awh cyihnaak ngoe hy. Lu khqjh cetaw nu ang ngawihihaak tlang khqjh ni. 10 Cekkhqi ce sangpahrang khqjh na awm awm bai hy. Pumha tloek taw tlu hawh uhy, tuh pynoet awm hy, ak awm ce law hlan hyn hy; cehlai anih ce a law awh kawlhalkh ni a awm hly. 11 Ni hu awh ak awm, tuh amak awm ce sangpahrang ak kleetnaak na awm hy. Anih ce khqjh ak khuiawh pa nawk anih awm seethaak ak khuiawh cet lawt kaw. 12 Kii pahqa na huh cetaw qam ak hu hlan sangpahrang pahqa tloek ni, cehlai khawnoek pynoet khui sangpahrang saithainaak ce qamsatlung ing dang lawt kawm uh. 13 Cekkhqi ing cainaak pynoet ni ami taak uh, thaawmnaak ingkaw saithainaak ce qamsatlung a venawh pe kawm uh. 14 Tuuca ce tu kawm uh, cehlai tuuca ing noeng kaw, kawtih anih taw boekhqi a Boei ingkaw sangpahrangkhqi a Sangpahrang na a awm a dawngawh – amah ing khy hy, tyk nawk yipawm na a hu awh ak batkhqi ce a venawh awm kawm uh," ni tina hy. 15 Cawh khan ceityih ing ka venawh, "Pup zawi nu ang ngawihihaak tui cetaw thlangkhqi, thlang kqeng, phyllum ingkaw awi cawm awi ce khqi ni. 16 Qamsatlung ingkaw kii pahqa ak lawt ing cawhkaw pup zawikung ce sawhna kaw. Plawci sak kqawi kawmsaw ak pum a zal na cehta qawi kaw, a sa ce ai kawm nih saw mai awh phum kawm nih. 17 Ikwatih Khawsa ing cekkhqi kawlung khuiawh amah a ngaihnaak soep sak aham cawhkaw qamsatlung a venawh uk thainaak ce Khawsak awi a soep hlan dy pehy. 18 Nu na huh cetaw khawmdek sangpahrangkhqi ak ukkung khawk bau ni," ni tina hy.

18 Cekoengawh khawk khan awhkawng anuk kqum law khan ceityih pynoet ce hu nyng. Anih ing saithainaak ak bau soeih ce tahi, a boemangnaak ing khawmdek coei phenh hy. 2 Awi khawtih na: "Tlu hawh hy! Babylon hawk bau tlu tlu hawh hy! Qaaikhqi awmnaak hun na coeng hawh nawk qaihchekhqi thawng tlaknaak hun, amak ciim ingkaw tyih ak kap phakhyi thawng tlaknaak hun na awm hawh hy. 3 Kawtih thlangphyn khqi ing anih a samphaih qawnaka misur tui awh qui boeih hawh uhy. Khawmdek awhkaw sangpahrangkhqi ing anih samphaih unawh, ik-oeih ak zawikhqi ing anih a awmhlynaak awhkawng boei khqoet khqoet uhy," tinawh khy hy. 4 Cekoengawh khan nakawng awi pynoet za bai nyng: "Kak thlangkhqi, anih a thawlhaak awh am pa unawh anih a thawlhaak amma mi zawknaak aham, anih a venawh kawng law lah uh, 5 kawtih anih a thawlhaak taw khan dyna hang be nawk, Khawsa ing anih a thawlhaak ce sim pehy. 6 Ce nu ing a peek a myihma pe tlaih lawt hy, a ik-oeih sainaak awh ak bawk na pe tlaih hy. Amah a boet awh kqjt pe nawk a bawk na pehy. 7 Amah ingkaw amah ak thlang zoeksangnaak ingkaw a awmhlynaak a myihma khuihannaak ing ko ang kqangnaak ce pehy. Ak kawk khuiawh taw sangpahrang nu a myihma ak ngawi, hu hai na am awm nyng, ityk awh awm am ko am kqang tikaw, tyih. 8 Cedawngawh hypoet khuiawh a tlawhche ing anih ce lo kaw: thihnaak, go ang kqangnaak ingkaw khawhannaak ing anih ce zawl kaw. Mai awh ui kaw, kawtih boemang Khawsa ing anih ce awi deng hawh hy. 9 Anih ing samphaih haih nawk ak awmhly pyi hawh khawmdek sangpahrangkhqi ing mai ak khui ce ami huh awh anih ce kqah kawm usaw lungnat za kawm uh. 10 A khuihannaak ce kqjh kawm uh, ak hla na dyi hoe kawm usaw kqang kawm uh, khaw map hyk ti! khaw map hyk ti!, Aw hawk bau, Aw Babylon, tha ak awm hawk bau! khawnoek pynoet khuiawh na seetnaak ce pha law hawh hy! 11 Khawmdek awh ik-oeih ak zawikhqi ingawm anih ce kqah kawm usaw lungnat za kawm uh – 12 suikhqi,

tangkakhqi, a phu ak tlo lungkhqi ingkaw palekhqi, hi ak leek leekkhqi hawnkeh khqaikhqi, puu a sa ingkaw hik thimkhqi, thing soekekphqi, vyi a haa ingkaw a sai ik-oehi soekek, thingphu ak tlokhqi, qawhumkhqi, thi ingkaw lungbawk, 13 cinamon ingkaw singhal ak thaikhkhqi, bawktui Myrrh ingkaw frankisen, misurtui ingkaw olive situi, vak-kqa cang ingkaw phaihpi vai ak che che khqi vaitaw panaa ingkaw tuikhqi, mirangkhqi ingkaw a ik-oehikhqi, thlang pum ingkaw ang myihlakhqi ce u ingawm ap thlaiah pe voel kaw. 14 cekkhqi ing, nang ing nang lamtoen ak thaih ce cing hawh hy. Na boeinaakkhqi ingkaw awmhlynaakkhqi ce qeng boeih hawh hy, ityk awh awm am hu voel kawp ti, tina kawm uh. 15 Ve ik-oehi zawi nawh ve nu a venna kawng boeinaak ak hu ik-oehi ak zawikhqi ce ak hla na dyi hoe kawm usaw, ce a nu a khuikhanaak ce kqih kawm uh, kqang kawm usaw. 16 Ko ang kqang doena, "Khaw map hy! Khaw map hy! Aw khawk bau, hik leek leek, hawnkeh khqai ak thim ing thawi ang cam qu tiksaw sui, lung phuk tlo ingkaw pale ingkaw ak vang hlup hlup na, thawi am cam qu hlai hyk ti! 17 Khawnoek pynoet khui mai awh cawhkaw byn a baikhqi ce plawci boeih mah hy! Tuicunli awhkaw tui lawng ak uk ingkaw tui lawng awh ak cet thlangkhqi boeih lawng ak kaih thlangkhqi, tuicunli ingkaw phoen ak khut thlangkhqi ce ak hla na dyi hoe kawm uh. 18 Anih a mai ak khu dung dung ce ami huh awh, vernih khawk bau ve ak awm lawt hy voei nu? ti kawm uh. 19 Dekvai ing a lu awh phul qu kawm usaw, kqung ang kqap doena, "Khaw map hyk ti! khaw map hyk ti, Aw khawk bau, tui awh tui lawng ing ak cet thlangkhqi boeih ing anih a boeinaak ing maw ami boei hlai! Khawnoek pynoet khui mai awh plawci bang mah hy! 20 Aw khan nang, anih ak khanawh zeel lah! thlakciimkhqi ingkaw ceityikhqi ingkaw tawngkhakhqi zeel lah uh! Anih ing nangmih ani thekhanaak a myihna Khawsa ing ak khanawh awi deng hawh hy," ti uhy. 21 Cekoengawh khan ceityih pynoet ing cang netnaak teh ak law lung ak bau soeih ce lo nawh tuicunli khuina ak khawng coengawh, "Vernih khuikhanaak ing Babylon khawk bau taw khawng na awm kaw, ityk awm huk voel na am awm voel kaw. 22 Tingtoeng ingkaw tumding ak tumkhqi, phung ak tumkhqi, uit ak yngkhqi ce ityk awh awm nang ak khui awhkawng zaakaak am awm voel kaw. 23 Mai-im awhkaw maivang awm u ing am hu voel kaw. Zu ak lo ingkaw va ak ta hly kawi cadawng nulaa ak awi awm u ing nang ak khuiawh am za voel kaw. Nang ak khuiawh ik-oehi ak zawikhqi ce khawmdek awhkawng thlak bau na awm uhy. Nang a kutlam thoemnaak ingkaw qam boeih boeih ce lam hang sak hawh hyk ti. 24 Anih ak khuiawh tawngkhakhqi ingkaw thlakciimkhqi thi ingkaw khawmdek awh ami him thlangkhqi a thi ce awm hy," tinawh kqawn hy.

19 Vemyihkhqi a awm coengawh khan na thlang kqeng khawzah ak awi ce za nyng: "Halleluia! Hulnaak, thangleeknaak ingkaw thaawmnaak taw ningnih Khawsa a koe ni, 2 kawtih a awidengnaak taw dyng nawh thym hy. A samphaihnaak ingkaw khawmdek ak plawci sakkung, pup zawi nu ce dawk palh sak hawh hy. A tyihzawikhqi a thi phu ce anih a venawh lo hawh hy," tinawh khy uhy. 3 Cekoengawh khy tlaih bai uhy, "Halleluia! Anih a maikhu taw kumqui dyna nang khu hawh hy," ti uhy. (aiōn g165) 4 A hqamca a thong pupthli ingkaw ik-oehi sai hqing pupthli ing tluuq doena ngawihdoelh awh ak ngawi Khawsa ce bawk uhy. "Amen, Halleluia," ti uhy. 5 Cekoengawh ngawihdoelh awhkawng, "Amah ak kqih, a tyihzawikhqi, tlak zawi tlak bau boeih, ningnih a Khawsa ce kyih lah uh," tinawh khy uhy. 6 Cekoengawh thlang kqeng khawzah thlang ak awi amyihna, tuibau awi ingkaw khawng huk am amyihna, "Halleluia! Ikwatih ningnih a Bawipa Boemang Khawsa ing uk hy. 7 Cedawngawh zeel u seitaw amah ce thangleek sak lau u sih! Ikwatih tuuca a zulawhnaak taw law

hawh hy, a lawh hly kawi nula awm coekqoek na awm hawh hy. 8 Hik leek, ak ciim ingkaw ak vang ce thoeih ang cam qunaak na pe hawh hy, tinawh khy uhy. (Hik leek taw thlakciimkhqi a ik-oehi sai huk saknaak na awm hy.) 9 Cekoengawh khan ceityih ing ka venawh, "Ree lah: Tuuca zulawhnaak awh ak khy thlangkhqi taw ami zoseen hy!" ni tina hy. Cekoengawh, "Ve e Khawsak awi tang tang ni," ni tina bai hy. 10 Cedawngawh anih ce bawk aham a khawkung awh tlunyng. Cehlai ka venawh, "Cemyihna koeh sai! Kai taw nang ingkaw Jesu ak dyihpyi na koeinaakkhqi amyihna tyihzawih nani ka awm lawt. Khawsa bawk lah! Ikwatih Jesu ak awihkqawn taw myihla awiphawngnaak ni," ni tina hy. 11 Khan ak awng qu ingkaw ka haiawh meqang bawk ak dyi ce hu nyng, cawh ak ngawi taw ypawm ingkaw Thym mingna hy. Ak thym na awi deng nawh qaal thawh hy. 12 A mik kqawi taw mai amyihna vang nawh, a lu awhkaw boei lumykhawzah awm hy. U ingawm ama sim amah doeng ing a sim ming ce a sum awh qee na awm kaw. 13 Thi awh ak chum hi ce bai hy, ang ming taw Khawsak awi mingna hy. 14 Mirang bawk awh ak ngawi ak khan qalkapkhqi ing hik bawk leek soeih ce bai unawh a hu awh bat u hy. 15 Anih am khak khui awhkawng qamkhqi tlyhnaak aham zawzi ak hqat soeih ce thoeng hy. "Anih ing thi sawnghqawl ing cekkhqi ce uk kaw." Boemang Khawsa ak kawsonaak misurtui suinaak anih ing leh hy. 16 A hi ingkaw a phai awh ve ang ming ve awm hy: Boikri A Boi Ing Sangpahrang Kri A Sangpahrang. 17 Khawmik awh ak dyi khan ceityih pynoet ce hu nyng, anih ing khan na ak ding phakphqi boeih a venawh, "Law lah uh, Khawsa a buh veel aham cun lah uh, 18 sangpahrangkhqi, qalboeikhqi, thlak baukhqi, meqangkhqi ingkaw ak khanawh ak ngawikhqi, thlakzawi, thlakbau thlang thawt ingkaw tamnaakkhqi a sa ce ai lah uh," tina hy. 19 Cekoengawh qamsatlung ingkaw khawmdek awhkaw sangpahrangkhqi ing meqang awh ak ngawi ingkaw a qalkapkhqi ce tuk aham qalkapkhqi ce cawi uhy. 20 Cehlai qamsatlung ingkaw anih ang zyng na kawpoek kyi hatnaak ak sai tawngtha qawl ce tuk uhy. Kawpoek kyi hatnaak sainaak ak caming qamsatlung hatnaak ak takhqi ingkaw myiqawl ak bawkkhqi ce anih ing thai na hy. Cekkqawn ce kat mai tuili khuina a hqing na nuk khawng uhy. (Limnē Pyr g3041 g4442) 21 Ak changkhqi cetaw meqang awh ak ngawi kha khui awhkawng ak thoeng law zawihi ing him boeih hy, khan phakphqi ing a mingmih a sa ce ak phyi kynkqyng na ai uhy.

20 A dytnaak amak awm lawk-kqawng cabi ingkaw kenqui pawm law nawh khan naakawng anuk law khan ceityih pynoet ce hu nyng. (Abysos g12) 2 Anih ing thlim, syn awhkaw khui kqym Setan ce tuk nawh kum thongoet khui thawng thla hy. 3 a dytnaak amak awm lawk-kqawng khuiina khawng hy, kum thongoet a boeih hlan dy qampum awhkawng thlang ama thainaak thai ham chawh a khaih coengawh cabi khaih sih hy. Cekoengawh kawlkalh khuiawh loet sak kaw. (Abysos g12) 4 Awideng thainaak ak hu thlangkhqi ngawihdoelh awh amik ngawi ce hu nyng. Jesu ak awi ingkaw Khawsak awi a ming dyihpyi a dawngawh a hawng awh amik tlyh ang myihla ce hu nyng. Vekkhqi ing qamsatlung ingkaw a myi ce am bawk unawh a talqi ingkaw a kut awh hatnaak awm am ta uhy. A mingmih ce hqing unawh Khrirh ingqawi kum thong oet khui boei na uk uhy. 5 (Kum thongoet a boeih hlan dy ak changkhqi taw am hqing uhy.) Ve ve lamma cyk thawhnaak awh ak pakhoi taw zo ak seenkhqi ingkaw ak ciimkhqi na awm uhy. Thihnaak apakkhih ing cekkhqik khanawh ikaw saithainaak am ta voel kaw, cekkhqi taw Khawsa ing Khrirh a khawsoeih na awm kawm usaw Khrirh ing kum thongoet khui uk hah kawm uh. 6 Lamma cyk thawhnaak awh ak pakhoi taw zo ak seenkhqi ingkaw ak ciimkhqi na awm uhy. Thihnaak apakkhih ing cekkhqik khanawh ikaw saithainaak am ta voel kaw, cekkhqi taw Khawsa ing Khrirh a khawsoeih na awm kawm usaw Khrirh ing kum thongoet khui uk hah kawm uh. 7 Kum thongoet a boeih coeng awhtaw setan ce thawngim khui awhkawng hlah tlaih kaw, 8 Khawmdek kil phli awh ak awm qampum thlang ce thainaak aham


cet kaw – cetaw Gog ingkaw Magog ni – qaal tuk aham thlang cawi kaw. A doem naak benna taw tuicun ceng awhkaw dzui zah law uhy. 9 Khawmdek a boet voel dyna tho unawh Khawsa ing a lungnaak, Khawsa a awmnaak khawk bau ce chung uhy, cehlai khawk khan nakawng mai nung tla law nawh cekkhqi ce ui boeih uhy. 10 Cekcoengawh a mingmih ak thainaakkung qaai ce qamsatlung ingkaw tawngtha qawlkhqi ak khawngnaak kat mai tuili khuina khawng hy. Than dai kumqui dy ce a hun awh khuikha kawm uh. (aiōn g165, Limnē Pyr g3041 g4442) 11 Ngawihdoelh bawk ingkaw ak cheiawh ak ngawi thlang ce hu nyng, khawmdek ingkaw khan ce a hai awhkawng dawng unawh a awmnaak hun am ta voel uhy. 12 Cawh thlakthi ak zawi ak bau ngawihdoelh a hiaawh dyi unawh cauk ak awng qu hyt ce hu nyng. Ak chang cauk pynoet ak awng qu ce awm hu nyng. Cawkhaw cauk cetaw hqingnaak cauk ni, cauk awh qee amyihna thlakthikhqi ce awideng hy. 13 Tuicun awhkaw ak thikhqi ce tuicun ing pe law nawh, thihnaak ingkaw Hades ing lo hy, thlakthikhqi awm pe tlaih hy, thlang boeih ce a mimah a ik-oeih sai amyihna awideng boeih hy. (Hadēs g86) 14 Thihnaak ingkaw Hades te mai tuili na khawng hy. Cawkhaw mai tuili cetaw a voeihh thihnaak ni. (Hadēs g86, Limnē Pyr g3041 g4442) 15 Hqingnaak cauk awh ming amak pa thlang cetaw mai tuili na khawng uhy. (Limnē Pyr g3041 g4442)

21 Cekcoengawh khan thai ingkaw dek thai ce hu nyng, lamma awhkaw khan ingkaw dek cetaw khum hawh hy, tuicun awm am awm voel hy. 2 Va ak ta hly kawi nula ing a va aham a thawicam qu hqete a myihna, Khawsa a venawh kawng Khawk bau Ciim, Jerusalem thai anuk law ce hu nyng. 3 Bawkthang awhkawng awi khawteh na, "Tuh taw Khawsa a awmnaak ce thlanghping a venawh awm hawh hy, cekkhqi mi awm hahil hawh kaw. Cekkhqi ce amah ak thlang na awm kawm uh, Khawsa amah ce cekkhqi mi awm hahil kawmsaw a mingmih a Khawsa na awm kaw. 4 Ami mikphli tui boeih boeih ce huih pe hawh kaw. Thihnaak, lungnat zaakaak, ko ang kqangnaak ingkaw kqangnaak am awm voel kaw, kawtih ik-oeih kqymkhqi cetaw khum bat hawh hy," tinawh ak khy awi ce za nyng. 5 Ngawihdoelh awm ak ngawi ing, "Ik-oeih boeih boeih ak thai na sai pan hawh nyng!" tiyh. Cekcoengawh, "Ve ve qee lah, kawtih vawhkaw awikhqi vetaw ypnaak awm nawh thym hy," ni tina hy. 6 Ka venawh, Coeng boeih hawh hy. Kai taw Alpha ingkaw Omega, Grannaak ingkaw Boetnaak na awm nyng. Tui ak ngaih taw hqingnaak tui ak lawng ce a phu peek kaana awk sak kawng. 7 Noengnaak ta thlang ing vemyihkhqi boeih ve pang kaw, anih a Khawsa na awm kawng nyngsaw anih ce ka ca na awm kaw. 8 Cehlai kqina ak ngetkhqi, amak cangnaak thlangkhqi, boeksekhhqi, thlang ak himkhqi, amak thym na nu pa thawhnaak ak saikhqi, kutlam ak toek thlangkhqi, myi ak beekkhqi ingkaw qaai ak kqawnkhqi – vemi hthlangkhqi hamna a kat mai tuili ce awm hy. Ve ve a voeihh thihnaak na awm hy," ni tina hy. (Limnē Pyr g3041 g4442) 9 Nat khqih ing ak be boet khqih ak ta khan ceityih khqih ak khuiawh kaw khan ceityih pynoet ing ka venawh, "Law lah, Tuuca a zu, va ak ta hly nula ce nim huh vang," ni tina hy. 10 Anih ing Myihla ak caming tlang ak bau soeih ingkaw ak sang soeih na ni ceh pyi nawh, Khawsa a venna kawng anuk law Jerusalem, Khawk bau Ciim ce nim huh hy. 11 Cawkhaw awipui cetaw Khawsa boeimangaak ing vang theng hy, a vangnaak taw lung phu ak tlo soeih jasper lung amyihna yang nawh crystal amyihna caih hy. 12 Ce khawk bau ak chungnaak vawngsang soeih ingkaw ak bau soeih awm nawh, chawh pahqa hlaih ahw hy, chawh boeih awh khan ceityih pahqa hlaih ahw bai hy. Chawh boeih awh Israael pilnam pahqa hlaih ming ce qee hy. 13 Khaw law benawh chawh pakthum, thlung benna chawh pakthum, kham benna chawh pakthum ingkaw khawtaak benna

chawh pakthum awm hy. 14 Khawk bau ak chungnaak vawng ce tung pahqa hlaih ahw hy, cawkhaw tung awh ceityih pahqa hlaih ang ming ce awm hy. 15 Kai ing awi ak kqawn khan ceityih ing khawk bau, vawng ingkaw chawh tahnaak aham sui tahnaak ce pawm hy. 16 Khawk bau cetaw a kil pupthli law hy, sang awm sang nawh kau awm kau hy. A tahnaak ing khawk bau ce a tah awh a sang stedia 12,000 law nawh a kau ingkaw a sang awm miyh qu boeih hy. 17 Khawk bau awhkaw vawng ce a tah bai awh thlanghping tahnaak awhtaw dawng 144 sang nawh sah hy, ce ce khan ceityih ing hawna hy. 18 Cawkhaw vawng cetaw jasper lung ing sai nawh, khawk bau cetaw sui hqoeng na a awm coengawh hlanglang a myihna caih hy. 19 Khawk bau ak chungnaak vawng a tungling cetaw lung phuk tlo soepkep ing thoeihcam hy. A lamma cyknaak ce jasper, a pak kihhnaak ce sapphire, apak thumnaak ce chaledony, a pupthliaka ce emerald, 20 a pumhannaak ce sardonyx, ak kqkunaak ce carnelian, ak khqihnaak ce chrysolite, ak kqeethnaak ce beryl, ak kownaak ce topaz, a pahqa naak ce chrysoprase, a hlaioetnaak ce jacinth na awm nawh a hlaihinhnaa ce amethyst na awm hy. 21 Chawh pahqa hlaihiloek ce pale na awm nawh chawh pynoet qip ce pale ing sai hy. Khawk bau ak khuiawh kaw lam cetaw sui lam na awm nawh, hlanglang a myihna caih hy. 22 Khawk bau ak khuiawh bawkim am awm hy, Boeimang Bawipa Khawsa ingkaw Tuuca ce bawkim na awm hawh hy. 23 Ce khawk bau ing khawkdai ingkaw pihla yang awm am ngoe voel hy, Khawsa boeimangaak ing vang sak nawh, Tuuca ce maivang na awm hy. 24 Rampum thlangkhqi ing cawkhaw vangnaak awh cet kawm usaw, khawmdek sangpahrangkhqi ing a boeimangaak ce kun pyi kawm uh. 25 Ityk awh awm chawh ce am khai qu kawmsaw, khawmthan awm am awm voel kaw. 26 Qampum awhkaw boeimang naak ing zoeksangaak ce ak khuiina kun pyi kawm uh. 27 Ikaw awm amak ciim cetaw ce ak khuiina am kun qoe qoe kaw, chahqai ik-oeih ak saikhqi ingkaw thlak thaikhqi am kun kawm usaw, Tuuca hqingnaak cabu khuiawh ming qee na ak awmkhqi doeng kun kawm uh.

22 Cek coengwh khan ceityih ing hqingnaak tuiva, crystal a myihna ak caih, Khawsa ngawihdoelh ingkaw Tuuca ngawihdoelh awhkawng 2 hawk bau a lam lakli awh a nuk lawng law ce nim huh hy. Cawkhaw hqingnaak tuiva cengawh hqingnaak thing ce dyi hy, hla qeek awh voei hra hlaihiloek poepa hy. Cawkhaw thinghah cetaw thlangphyn khqi qoeinaak na awm hy. 3 Cawhtaw awikhka phawhnaak ingkaw khawsi zawknaak am awm voel kaw. Khawsa ingkaw Tuuca a ngawihdoelh ce khawk bau khuiawh awm kawmsaw, a tyihzoeihkhqi ing bibi pe kawm uh. 4 Anih a haai ce hu kawm usaw, ami talqikhqi awh anih ang ming ce awm kaw. 5 Khawmthan am awm voel kaw, Mai vang am ngoe voel kawm usaw khawkdai awm am ngoe voel kawm uh, kawtih Bawipa Khawsa ing vangnaak ce pek khqi kaw. A mingmih ing kumqui dy uk hawh kawm uh. (aiōn g165) 6 Khan ceityih ing ka venawh, "Vawhkaw awikhqi vetaw thym nawh a ypawm hy. Bawipa, tawngkhakhi myihla Khawsa ing ak awm hly kawi ik-oeih ce a tyihzoeihkhqi venawh huh ahah ak khan ceityih ce tyi hy," ni tina hy. 7 Ngai lah uh, law nai hawh kawng! Ve cabu ak khuiawh awiphawng ak khoem thlang law a zoseen hy." 8 Kai, Johan ing vawhkaw ik-oeikhkhqi ve za nyng saw hu nyng. Vawhkaw ik-oeikhkhqi ve za nyng saw ka huh awh, ve ik-oeikhkhqi anik huhkung khan ceityih ce bawk aham a khawkung awh tlunyng. 9 Cehlai anih ing ka venawh, "Cemyihna koeh sai! Kai taw nangmih ingkaw nami koeinaa tawngkhakhi ing ve cauk ak khuiawh kaw ahi ak khoemkhqi amyihna tyihzawih nani ka awm lawt. Khawsa bawk lah," ni tina hy. 10 Cekcoengawh anih ing, "Ve cauk awhkaw awiphawngkhqi ve koeh khai, kawtih a tym taw zoe

hawh hy. **11** Ik-oeih thawlh ak saikhqi taw sai mai seitaw boekse thlangkhqi cetaw ami boe se mai cang seh; ik-oeih thym ak saikhqi ingawm ak thym ik-oeih ce sai poe u seitaw; ak ciim thlang cetaw ciim poe seh," ni tina hy. **12** Ngai lah law nai hawh kawng! Kutdo laksawng ik-oeih haw law kawng nyngsaw, thlang ing bi a binaak a myihna pe kawng. **13** Kai taw Alpha ingkaw Omega, lamma cyk ingkaw hudyt khyt, akung ingkaw a dawng na awm nyng. **14** Hi caih na ak chuk thlangkhqi ing hqingnaak thikthaih ce aï thai kawm usaw khawk bau chawh khuiawh kun thai kawm uh. **15** A ceng nakawng thlangkhqi cetaw uikhqi, miklet ak saikhqi, nu pa amak thym na amik pawl qukhqi, thlang ak himkhqi, myi ak bawkkhqi ingkaw ik-oeih amak thym sai ak lungnaak thlangkhqi na awm uh. **16** Kai Jesu ing vawhkaw awi ve thlangboelkhqi ham nangmih a venawh peek aham kak khan ceityih tyi law hawh nyng. Kai taw David ak Gra ingkaw cadil na awm nyngsaw Myncang Thaike na awm nyng," ni tina hy. **17** Myihla ingkaw va ak ta hly kawi nula ing, "Law lah!" ni tina hy. "Law lah!" tinaak awi ak zaak ak thlang taw law seh. U awm tui ak ngaih taw, law seh; U awm ak ngaih ingtaw, hqingnaak tui ce a zoe na lo lah seh. **18** Ve cabu ak awiphawng amik za uh a venawh awm qalqingnaak awi pe nyng, U ingawm vawhkaw awipeek ve a tawm awhtaw, Khawsa ing ve cabu awh ak kqawn tlawhche ce anih aham tawn pe lawt kaw. **19** U ingawm ve cabu awhkaw awiphawng ve a zuuk thoem awhtaw, ve cabu awh ak kqawn anih ing a huh hly kawi khawciim khui awhkaw hqingnaak thing ce zuuk pe lawt kaw. **20** Vawhkaw ik-oeihkhqi ak dyihpyikung ing, "Oeih, law nai hawh kawng," tiyh. Amen. Bawipa Jesu law hilah. **21** Bawipa Jesu Khrish am qeennaak Khawsak thlangkhqi venawh awm seh. Amen.



Va ak ta hly kawi nula ing a va aham a thawicam qu hqeet a myihna, Khawsa a venawh kawng
Khawk bau Ciim, Jerusalem thai anuk law ce hu nyng. Bawkthang awhkawng awi khawteh na,
“Tuh taw Khawsa a awmnaak ce thlanghqing a venawh awm hawh hy, cekkhqi mi awm haih
hawh kaw. Cekkhqi ce amah ak thlang na awm kawm uh, Khawsa amah ce cekkhqi mi awm
haih kawmsaw a mingmih a Khawsa na awm kaw.”

Awiphawng 21:2-3

Reader's Guide

Tuivang at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of ten special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, "*As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him.*" Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, "*And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned.*" So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, "*Do your best to present yourself approved by God, a worker who does not need to be ashamed, properly handling the word of truth.*" 2 Timothy 2:15. "*God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,*" 2 Peter 1:4-8.

Glossary

Tuivang at AionianBible.org/Glossary

The Aionian Bible un-translates and instead transliterates ten special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 63 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos

Language: Koine Greek

Speech: proper noun, place

Usage: 9 times in 3 books, 6 chapters, and 9 verses

Strong's: g12

Meaning:

Temporary prison for special fallen angels such as Apollyon, the Beast, and Satan.

aīdios

Language: Koine Greek

Speech: adjective

Usage: 2 times in Romans 1:20 and Jude 6

Strong's: g126

Meaning:

Lasting, enduring forever, eternal.

aiōn

Language: Koine Greek

Speech: noun

Usage: 127 times in 22 books, 75 chapters, and 102 verses

Strong's: g165

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

aiōnios

Language: Koine Greek

Speech: adjective

Usage: 71 times in 19 books, 44 chapters, and 69 verses

Strong's: g166

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

Geenna

Language: Koine Greek

Speech: proper noun, place

Usage: 12 times in 4 books, 7 chapters, and 12 verses

Strong's: g1067

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs

Language: Koine Greek

Speech: proper noun, place

Usage: 11 times in 5 books, 9 chapters, and 11 verses

Strong's: g86

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr

Language: Koine Greek

Speech: proper noun, place

Usage: Phrase 5 times in the New Testament

Strong's: g3041 g4442

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol

Language: Hebrew

Speech: proper noun, place

Usage: 65 times in 17 books, 50 chapters, and 63 verses

Strong's: h7585

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō

Language: Koine Greek

Speech: proper noun, place

Usage: 1 time in 2 Peter 2:4

Strong's: g5020

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Chin-Matu---Tuvang-Matu-Chin-Bible/Noted

Glossary references are below. Strong's Hebrew and Greek number notes are added to 63 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Luke 8:31
Rom 10:7
Awiphawng 9:1
Awiphawng 9:2
Awiphawng 9:11
Awiphawng 11:7
Awiphawng 17:8
Awiphawng 20:1
Awiphawng 20:3

Cei 3:21
Cei 15:18
Rom 1:25
Rom 9:5
Rom 11:36
Rom 12:2
Rom 16:27
1 Korin 1:20
1 Korin 2:6
1 Korin 2:7
1 Korin 2:8
1 Korin 3:18
1 Korin 8:13
1 Korin 10:11
2 Korin 4:4
2 Korin 9:9
2 Korin 11:31
Galatia 1:4
Galatia 1:5
Efesa 1:21
Efesa 2:2
Efesa 2:7
Efesa 3:9
Efesa 3:11
Efesa 3:21
Efesa 6:12
Filipi 4:20
Kolosa 1:26
1 Timote 1:17
1 Timote 6:17
2 Timote 4:10
2 Timote 4:18
Titu 2:12
Hebrai 1:2
Hebrai 1:8
Hebrai 5:6
Hebrai 6:5
Hebrai 6:20
Hebrai 7:17
Hebrai 7:21
Hebrai 7:24
Hebrai 7:28
Hebrai 9:26
Hebrai 11:3
Hebrai 13:8
Hebrai 13:21
1 Piter 1:23

1 Piter 1:25
1 Piter 4:11
1 Piter 5:11
2 Piter 3:18
1 Johan 2:17
2 Johan 1:2
Juda 1:13
Juda 1:25
Awiphawng 1:6
Awiphawng 1:18
Awiphawng 4:9
Awiphawng 4:10
Awiphawng 5:13
Awiphawng 7:12
Awiphawng 10:6
Awiphawng 11:15
Awiphawng 14:11
Awiphawng 15:7
Awiphawng 19:3
Awiphawng 20:10
Awiphawng 22:5

aïdios

Rom 1:20
Juda 1:6

aiōn

Matthai 12:32
Matthai 13:22
Matthai 13:39
Matthai 13:40
Matthai 13:49
Matthai 21:19
Matthai 24:3
Matthai 28:20
Marka 3:29
Marka 4:19
Marka 10:30
Marka 11:14
Luke 1:33
Luke 1:55
Luke 1:70
Luke 16:8
Luke 18:30
Luke 20:34
Luke 20:35
Johan 4:14
Johan 6:51
Johan 6:58
Johan 8:35
Johan 8:51
Johan 8:52
Johan 9:32
Johan 10:28
Johan 11:26
Johan 12:34
Johan 13:8
Johan 14:16


aiōnios

Matthai 18:8
Matthai 19:16
Matthai 19:29
Matthai 25:41
Matthai 25:46
Marka 3:29
Marka 10:17
Marka 10:30
Luke 10:25
Luke 16:9
Luke 18:18
Luke 18:30
Johan 3:15
Johan 3:16
Johan 3:36
Johan 4:14
Johan 4:36
Johan 5:24
Johan 5:39
Johan 6:27
Johan 6:40
Johan 6:47
Johan 6:54
Johan 6:68

Johan 10:28
Johan 12:25
Johan 12:50
Johan 17:2
Johan 17:3
Cei 13:46
Cei 13:48
Rom 2:7
Rom 5:21
Rom 6:22
Rom 6:23
Rom 16:25
Rom 16:26
2 Korin 4:17
2 Korin 4:18
2 Korin 5:1
Galatia 6:8
2 Thessalonika 1:9
2 Thessalonika 2:16
1 Timote 1:16
1 Timote 6:12
1 Timote 6:16
1 Timote 6:19
2 Timote 1:9
2 Timote 2:10
Titu 1:2
Titu 3:7
Filemon 1:15
Hebrai 5:9
Hebrai 6:2
Hebrai 9:12
Hebrai 9:14
Hebrai 9:15
Hebrai 13:20
1 Piter 5:10
2 Piter 1:11
1 Johan 1:2
1 Johan 2:25
1 Johan 3:15
1 Johan 5:11
1 Johan 5:13
1 Johan 5:20
Juda 1:7
Juda 1:21
Awiphawng 14:6

Geenna
Matthai 5:22
Matthai 5:29
Matthai 5:30
Matthai 10:28
Matthai 18:9
Matthai 23:15
Matthai 23:33
Marka 9:43
Marka 9:45
Marka 9:47

Luke 12:5
Jakob 3:6
Hadēs
Matthai 11:23
Matthai 16:18
Luke 10:15
Luke 16:23
Cei 2:27
Cei 2:31
1 Korin 15:55
Awiphawng 1:18
Awiphawng 6:8
Awiphawng 20:13
Awiphawng 20:14
Limnē Pyr
Awiphawng 19:20
Awiphawng 20:10
Awiphawng 20:14
Awiphawng 20:15
Awiphawng 21:8
Sheol
Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Saam 6:5
Saam 9:17
Saam 16:10
Saam 18:5
Saam 30:3
Saam 31:17
Saam 49:14
Saam 49:15
Saam 55:15
Saam 86:13
Saam 88:3
Saam 89:48
Saam 116:3
Saam 139:8
Saam 141:7
Awicyih 1:12
Awicyih 5:5
Awicyih 7:27
Awicyih 9:18
Awicyih 15:11
Awicyih 15:24
Awicyih 23:14
Awicyih 27:20
Awicyih 30:16
Ecclesiastes 9:10
Song of Solomon 8:6
Isaiah 5:14
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5
Tartaroō
2 Piter 2:4
Questioned
2 Piter 2:17




Abraham's Journey

Cangnaak ak caming Abraham ing, qo na a pang hly kawi hun pynoet na ceh ham khy na a awm awh, han benna nu ka ceh lah voei ti awm am sim hlai hy, awi ngai nawh cet hy.


- Hebrai 11:8

Israel's Exodus

N



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



"Kawith thlanghging Capa ing za thlang bibi sakt aham am law naws, thlang a bi ak bi ham ni a law,
thlang khawzah hulnaak aham a hingnaak ak pe aham napi a law," tinak khaj hy. -Marka 10:45



Paul, Jesu Khrih a tyihzawih, tyihzawih hamna ak khy, Khawsa Awithang leek kgawn hamna ak khy ing, - Rom 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophesies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyred in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyred in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ►			Genesis 1:26 - 2:3 Mankind is created in God's image, male and female He created us					
How are we sinful? ►			Romans 5:12-19 Sin entered the world through Adam and then death through sin					
When are we? ▼								
Where are we?			Innocence		Fallen			Glory
			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age
								New Heavens and Earth
Who are we? ►	God	Father	John 10:30 God's perfect fellowship	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
		Son			John 8:58 Pre-incarnate	John 1:14 Incarnate	Luke 23:43 Paradise	
		Holy Spirit			Psalm 139:7 Everywhere	John 14:17 Living in believers		
	Mankind	Living	Ephesians 2:1-5 Serving the Savior or Satan on Earth Luke 16:22 Blessed in Paradise Luke 16:23, Revelation 20:5,13 Punished in Hades until the final judgment Hebrews 1:14 Serving mankind at God's command	Genesis 1:1 No Creation No people	Ephesians 2:1-5 Serving the Savior or Satan on Earth			Matthew 25:41 Revelation 20:10 Lake of Fire prepared for the Devil and his Angels
		Deceased believing			Luke 16:22 Blessed in Paradise			
		Deceased unbelieving			Luke 16:23, Revelation 20:5,13 Punished in Hades until the final judgment			
	Angels	Holy			Hebrews 1:14 Serving mankind at God's command			
		Imprisoned	2 Peter 2:4, Jude 6 Imprisoned in Tartarus Genesis 1:31 No Fall No unholy Angels	Genesis 1:31 No Fall No unholy Angels	2 Peter 2:4, Jude 6 Imprisoned in Tartarus	Revelation 20:13 Thalaasa Revelation 19:20 Lake of Fire Revelation 20:2 Abyss		
		Fugitive			1 Peter 5:8, Revelation 12:10 Rebelling against Christ Accusing mankind			
		First Beast						
		False Prophet						
		Satan						
Why are we? ►			Romans 11:25-36, Ephesian 2:7 For God has bound all over to disobedience in order to show mercy to all					



World Nations

Cedawngawh cet unawh thlang phyn boeih ce ka hubat na sai law unawh, Pa, Capa ingkaw Ciim Myihla ang ming awh Baptisma pe law uh. - Matthai 28:19